

बिलासपुरी बाईबल

The Open Bilsapuri Bible

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>.)

This Bible is provided at the cost of printing by the Digital Bible Society (dbs.org). This Bible, and many others, are available for free download in a variety of digital formats at dbs.org/bibles.

मत्ती.....	4
मरकुस	28
लूका	42
यूहन्ना	69
प्रेरितों.....	86
रोमियो.....	106
1 कुरिन्थियों	116
2 कुरिन्थियों	124
गलातियां.....	130
इफिसियां	134
फिलिप्पियां.....	138
कुलुस्सियां	141
1 थिस्सलुनीकियां	144
2 थिस्सलुनीकियां	146
1 तीमुथियुस.....	148
2 तीमुथियुस.....	151
तीतुस	153
फिलेमोन.....	155
इब्रानियों	156
याकूब.....	163
1 पतरस	166
2 पतरस	169
1 यूहन्ना.....	171
2 यूहन्ना.....	174
3 यूहन्ना.....	175
यहूदा	176
प्रकाशितवाक्य.....	177

मत्ती

भूमिका

मत्तिये रिया लिखि रिया खुशखबरिया च अहां जो ये सन्देश मिलां भई मसीह यीशु ई सैं मुक्तिदाता तिसरे औणे री जे भविश्यवाणी कित्तिरी थी। हजारों साल पैहले परमेशरे पुराणे नियमा च सैं वादा जे अपणे लोकां ने कित्तिरा था सैं तिने इस ई मुक्तिदाते रे जरिये पूरा कित्या। ये खुशखबरी सिर्फ यहूदि लोकां खातर ई नीं, तिन्हा च जे यीशु पैदा हुया कने पळ्या- बढ्या, पर ये सारे संसारा रे लोकां खातर ई।

ये खुशखबरी बडिया साबधानिया ने तुहां रे बिच पेश कित्तिरी। इसा री शुरुआत प्रभु यीशुये रे जन्मा ते हुईरी, फेरी तिसरे बपतिस्मे कने परीक्षा रा बर्णन आ, कने फेरी गलील प्रदेशा च प्रचार, शिक्षा, कने चंगा करने रिया सेबकाईया रा बर्णन आ। इसते बाद इसा खुशखबरिया च यीशुये री गलील ते यरुशलेम तका री यात्रा कने यीशु प्रभुये रिया जिन्दगिया रे अन्तिम हफते री घटनां रा बर्णन आ, तिसच जे तिसरा क्रूसा पर लटकाया जाणा कने मूर्ईरेआं ते जिन्दा हुणा। इसा खुशखबरिया च यीशुये जो इक महान गुरुये रा दर्जा दित्तिरा। तिसजो परमेशरा रिया व्यवस्था रा बखान करने रा अधिकार आ कने सैं परमेशरा रे राजा री शिक्षा देआं। तिस रियां शिक्षां जो पंजां भागां च बन्डीरा: (1) पहाडी उपदेश, सैं जे स्वर्गा च रहणे औळ्यां रे चाल-चलन, फर्ज, खास अधिकार कने अन्तिम आसा ने जुडीरा (पाठ 5-7); (2) बारा चेलयां रिया सेबकाईया रे बारे च ट्रेनिंग देणा (पाठ 10); (3) स्वर्ग राजा रे द्रष्टान्त (पाठ 13); (4) चेलयां रे सम्बन्धा च शिक्षायें (पाठ 18); कने (5) स्वर्ग राजा रे औणे कने अजके जुगा रे खात्मे ने जुडीरी शिक्षायें (पाठ 24, 25)।

रूप रेखा:

खानदान कने यीशु मसीह रा जन्म 1:1-2:23

यहून्ना बपतिस्मा देणे औळे रा सेवा काल 3:12

यीशुये रा बपतिस्मा कने परीक्षा 3:13-4:11

गलील च यीशुये री लोक सेवा 4:12-18:25

गलील ते यरुशलेम तक यात्रा 19:1-20:34

यरुशलेम च अन्तिम हफता 21:1-27:66

प्रभु यीशुये रा जिन्दा हुणा कने तिसरा दिखाई देणा 28:1-20

यीशये रा खानदान

1 अब्राहमा री सन्तान, दाऊदा री सन्तान, यीशु मसीह रा खानदान।
2 अब्राहमा ते इसहाक जम्मया, इसहाका ते याकूब, याकूबा ते यहूदा कने तिसरे भाई जम्मे, 3 यहूदा कने तामार ते फिरिस कने जोरह जम्मे, फिरिस ते हिस्त्रोन जम्मया, कने हिस्त्रोन ते एराम जम्मया, 4 एराम ते अम्मीनादाब जम्मया, अम्मीनादाब ते नहशोन, कने नहशोन ते सलमोन जम्मया, 5 सलमोन कने राहब ते बोअज जम्मया, बोअज कने रुता ते ओबेद जम्मया कने ओबेदा ते यिशै जम्मया, 6 कने यिशै ते दाऊद राजे रा जन्म हुया।

कने दाऊदा ते शुलैमान तिसा जनाना ते जम्मया सैं जे पैहले उरिय्याह री घराऔळी थी, 7 सुलैमान ते रहबाम, रहबाम ते अबिय्याह जम्मया, कने अबिय्याह ते आसा जम्मया, 8 आसा ते यहोशाफात जम्मया, यहोशाफात ते योराम जम्मया, कने योराम ते उज्रियाह जम्मया, 9 उज्रियाह ते योताम जम्मया, योतामा ते आहाज जम्मया, कने आहाजा ते हिजकिय्याह जम्मया, 10 हिजकिय्याह ते मनश्शेह जम्मया, मनश्शेहे ते आमोन जम्मया, कने आमोन ते योशिय्याह जम्मया; 11 कने बंदी हुईने बेबीलोन जाणे रिया बेला योशिय्याह ते यकुन्याह, कने तिसरे भाई जम्मे।

12 बंदी हुईने बेबीलोन च पजवाणे ते बाद यकुन्याह ते शालतिएल जम्मया, कने शालतिएल त जरूब्बाबिल जम्मया, 13 जरूब्बाबिल ते अबीहूद जम्मया, अबीहूद ते इल्याकीम जम्मया, कने इल्याकीम ते अजीर जम्मया, 14 अजोर ते सदोक जम्मया, सदोका ते अखीम जम्मया, कने अखीमा ते इलीहूद जम्मया, 15 इलीहूद ते इलियाजार जम्मया, इलियाजारा ते मत्तान जम्मया, कने मत्ताना ते याकूब जम्मया,

यीशुये रा जन्म

(लूका 1: 26-38; 2:1-7)

16 याकूब ते यूसुफ जम्मया, सैं जे मरियमा रा पति था, कने मरियमा ते यीशु जम्मया सैं जे मसीह जाणया जां, 17 इआंई अब्राहमा ते दाऊदा तक चौदा पीढियां हुईयां, कने दाऊदा ते बेबीलोन जो बंदी हुईने पजवाणे तक चौदा पीढी, कने बंदी हुईने बेबीलोन जो पजवाये जाणे रे बगता ते मसीह तक चौदा पीढियां हुई। 18 यीशु मसीह रा जन्म इस तरीके ने हुया, भई ताहली जे तिसरी माता मरियमा री मंगणी यूसुफा ने हुईगी, तां तिन्हारे मिलणे ते पैहले ई तिसारे पवित्र आत्मा रिया तरफा ते बच्चा रेईया। 19 पर तिसारा घराऔळा यूसुफ इक भला माहु था कने लोकां रे बिच तिसारी बदनामी नीं करना चाहन्दा था, इस खातर तिने तिसाने सगाई तोडनेरा निश्च कित्या। 20 ताहली जे सैं इन्हां गल्लां रे बारे च सोची करां था तां सपने च तिसरे सामणे परमेशरा रा इक स्वर्गदूत परगट हुईने तिसने बोलणे लगया, “ओ यूसुफ! दाऊदा रे पुत्र, मरियमा जो अपणीं घराऔळी बनाणे ते मत डरदा कांभई सैं बच्चा जे तिसारे पेदा चा सैं पवित्र आत्मा रिया तरफा ते आ। 21 तिसा इक्क पुत्र जणना तू तिसरा नौं यीशु रक्खयां, कांभई तिस अपणे लोकां जो तिन्हारे पापां ते छुटकारा देणा।”

22 ये सब किछ इस खातर हुया भई सैं गल्ल जे परमेशरे भविष्यबक्ते जो गलाणे जो बोली थी, सैं पूरी हुई जो: 23 “देकरा, इक क्वारिया कुडिया गर्भवती हुणा कने तिसा इक्की मुन्दुये जो जन्म देणा, कने तिसरा नौं इम्मानुएल रक्खया जाणा, “तिसरा मतलब ये हुया भई परमेशर अहांने सौगी आ। 24 फेरी यूसुफ परमेशरा रे दूता रे हुक्मा रे मुताबिक निंदा ते जाग्गीने घरा औळी अपणे घरे ल्यान्दी; 25 कने तदुआ तक जे सैं पुत्रा जो जन्म नीं देई बैठी, सैं तिसाने सौगी नीं सुत्या: कने तिने तिसरा नौं यीशु रक्खया।

जोतषियां रा औणा

2 हेरोदेश राजे रे राजा च ताहली जे यहूदिया रे बैतलहम च यीशुये रा जन्म हुया, तां पूरबा ते कई जोतषी यरुशलेम च आईने पुछणे लगे, 2 "यहूदियां रा राजा तिसरा जे जन्म हुईरा, सै कित्ति आ ? कांभई अहें पूरबा च तिसरा तारा देवखया कने तिसजो नमस्कार करने आईरे।" 3 ताहली जे हेरोदेश राजे ये सुणया तां सै बड़ा बेचैन हुया कने तिस सौगी यरुशलेम रे कई सारे लोक बी चिन्ता करने लगे। 4 फेरी तिने लोकां रे खास याजकां कने शास्त्रियां जो कडा करीने तिन्हाते पूछया, भई "मसीह रा जन्म कित्ति होणा चाहिन्दा ?" 5 तिन्हे तिसने बोलया, "यहूदिया रे बैतलहम च, कांभई भबिष्यवक्ते रे जरिये ईयां लिखीरा भई:

6 "ओ बैतलहम, सै जे यहूदा रे प्रदेशा चा, तू यहूदा रे अधिकारियां च किस बी तरीके ने तिन्हाते छोटा नीं आ; कांभई तू चा ते इक राजा निकळणा, तिस जे मेरी प्रजा इस्राएल री रखवाली करनी।" 7 फेरी हेरोदेश राजे जोतषियां जो चुपचाप सद्दीने तिन्हाते पुछया भई तारा किस बगत दिक्खया था, 8 कने तिने येदा बोलीने तिन्हांजो यरुशलेम भेजया, भई "जावा, तिस मुन्डुये रे बारे च सही ढंगा ने पता करा, कने ताहली जे सै मिली जांगा तां मिन्जो खबर देयो ताकि हऊँ बी आईने तिस्सो नमस्कार करी सकूँ।"

9 सै राजे री गल्ल सुणीने चलीगे, कने सै तारा जे तिन्हें पूरबा च देवखया था सै तिन्हांरे अग्गे-अग्गे चलया; कने तिन्हीजे मुन्डु था, तिसा जगह आईने तिसरे ऊपर रुकीया। 10 तिस तारे जो देखीने सै बडे खुश हुये। 11 तिन्हे तिस घरा च पुज्जीने तिस मुन्डुये जो तिसरी माता मरियमा सौगी देवखया, कने झुकीने मुन्डुये रे अग्गे मत्था टेकया, कने अपना-अपणा झोळा खोळीने तिसजो सोना, कने लोबान, कने गन्धरसा री भेन्ट चढाई। 12 फेरी सुखने च परमेशरे तिन्हांजो साबधान कित्या भई तुहें हटिने हेरोदेश राजे लॉ देवखां जान्दे, इस खातर सै किसी दूजे रस्ते अपने देशा जो मुडीने चलीगे।

मिस्र देशा जाणा

13 तिन्हांरे जाणे ते बाद यूसुफा रे सुखने च परमेशरा रा इक स्वर्गदूत आया तिने बोलया, "उठ तिस मुन्डुये जो कने तिसरिया माता जो लेईने चुपचाप मिस्र देशा जो चली जा; कने तदुआं तक जे हऊँ तिज्जो नीं बोळूँ, तदुआं तक तू उत्थी रैयां; कांभई हेरोदेश राजा इस मुन्डुये जो मरवाणे खातर टोली करां।" 14 फेरी सै राती जोई उठीने मुन्डुये जो कने तिसरिया माता जो लेईने मिस्र जो चलीगे, 15 कने हेरोदेशा रे मरने तक उत्थी रैयां. इस खातर भई सै गल्ल जे परमेशरे अपने भविष्यवक्ते ने बोलणे जो गलाई थी पूरी हुई सक्को: "मैं अपने पुत्रा जो मिस्र ते सद्या।"

16 ताहली जे हेरोदेश येदा देवखया, भई जोतषियें तिसने धोखा कित्या, तां सै गुस्से च लाल पीळा हुईया, कने लोकां जो भेज्जीने जोतषियां रे दस्सीरे सही बगता रे मुताबिक बैतलहम कने तिसरे अक्खा-बक्खा रे लाकयां रे दुई सालां रे या इसते छोड्यां बचयां री, हत्या करवाईती। 17 फेरी सै बचन जे यिर्मयाह भबिष्यवक्ते रे जरिये बोलीरा था, सै पूरा हुया:

18 रामाह च दुःखा ने भरीरी अवाज सुणही,
ये अवाज रोणे री कने बिलखणे री थी;
मौआं अपने बचयां रे खातर रोई करां थियां,
कने नीं चाहन्दिंयां थी भई कोई तिन्हाजो हिम्मत देईने चुप करो, कांभई तिसारे त सारे बच्चे मरी चुक्रीरे थे।"

मिस्र देशा ते बापस औणा

19 हेरोदेश राजे रे मरने ते बाद, मिस्र देशा च परमेशरा रे दूते यूसुफा जो सुखने च आईने बोलया, 20 "उठ, मुन्डुये जो कने तिसरिया माता जो लेईने इस्राएल देशा च चलीजा, कांभई सै जे मुन्डुये री हत्या करना चाहं थे, सै मरी मुकीगे।" 21 सै उठया, कने मुन्डुये जो कने तिसरिया माता जो सौगी लेईने इस्राएल देशा च आईया। 22 पर ताहली जे यूसुफे ये सुणया भई यहूदिया च अपने पिता हेरोदेशा रिया जगह पर अरखिलाउस राज करीं तां सै उत्थी जाणे ते डरिया। फेरी सुखने च सै परमेशरा रा हुक्म पाईने गलील प्रदेशा जो

चलीया, 23 कने नासरत नाँवा रे नगरा च जाईने बसीया, ताकि सै बचन पूरा ओ, सै जे भबिष्यवक्त्यां रे जरिये बोलीरा था: भई "तिस्सो नासरी बोलया जाणा।"

यूहन्ना बपतिस्मा देणे औळा

(मरकुस 1:1-8; लूका 3:18; यूहन्ना 1:6-8, 15-34)

3 तिन्हें दिनें यूहन्ना बपतिस्मा देणे औळा आईने यहूदिया रे सुनसान जगहां च ये प्रचार करने लगया: 2 "मन बदला, कांभई स्वर्गा रा राज औणे औळा।" 3 ये यूहन्ना सैई हा तिसरे बारे च जे यशायाह भबिष्यवक्ते चर्चा करदे हुये बोलया था: "सुनसान जगह च इक हाक पाणे औळे री अवाज सुणही राई, भई प्रभु रा रस्ता बणावा, तिसरे खातर सडकां सीधियां करा।" 4 यूहन्ने ऊँटा रिया ऊंना रे बणीरे कपडे पैहनीरे थे, कने तिने अपने लक्का पर चमडे री पेटी बन्हीरी थी। तिसरा खाणा टिट्टे कने जंगली शैहत था। 5 तिस बगत यरुशलेम कने सारे यहूदिया रे लाकयां च, कने यर्दन नदिया रे आसे-पासे रियां सारीयां जगहां रे लोक तिसले आईने कट्टे हुईये। 6 तिन्हे अपने-अपणे पापां जो मन्नीने यर्दन नदिया च तिसते बपतिस्मा लेआ।

7 ताहली जे तिने देवखया भई मते सारे फरीसी कने सद्की तिसले बपतिस्मा लेणे खातर आईरां ये तां तिने तिन्हाने बोलया, "ओ सप्पा रे बचयां साई बिष घाळणे औळयो, तुहांजो किने खबरदार कित्या भई औणे औळे कोपा ते नड्डा ? 8 इस खातर तुहांजो इसा गल्ला रा सबूत देणे पौणा भई तुहें मन बदल्या; " 9 कने अपने-अपणे मना च ये नीं सोच्चा भई अहें अब्राहम री सन्तान ये; कांभई हऊँ तुहांने बोलां भई परमेशर अब्राहमा रे खातर इन्हां पत्थरां ते बी बच्चा पैदा करी सक्कां। 10 हुण कुहाडी डाळां रिया जडां पर तां रखीरी भई सै डाळ जे खरा फळ नीं लौन्दा, सै बड्डी टुक्की ने अग्गी च पाई दित्या जाणा।

11 हऊँ त तुहांजो तुहारे मन बदलने खातर पाणिये ते बपतिस्मा देआं, पर सै जे मेरते बाद औणे औळा, सै माहते बी सामर्थी आ; हऊँ त तिस रियां जूतियां चकणे रे बी लायक नीं आ। तिस तुहांजो पवित्र आत्मा कने अग्गी ते बपतिस्मा देणा। 12 तिसरा छज तिसरे हत्था चा तिसने जे सै दाणयां जो भूआ ते लग करां, अपने खवाडे ते सै साफ कित्तिरे सारे नाजा जो कडा करीने पेडुये च भरी देआं, पर भूआ जो येदिया अग्गी च पाईने फुकी देआं सै जे कर्दी बुझदी नीं।"

यूहन्ने रे जरिये यीशुये रा बपतिस्मा

(मरकुस 1:9-11; लूका 3:21-22; यूहन्ना 1:31-34)

13 तिस बगत यीशु गलील ते चली ने यर्दन नदिया रे कन्डे यूहन्ने ले बपतिस्मा लेणे आया। 14 पर यूहन्ना येदा बोलीने तिस्सो रोकणे लगया, "मिन्जो अप्पूँ तेरे हत्थों बपतिस्मा लेणे री जरूरत ई, कने तू बपतिस्मा लेणे जो मेरले आया?" 15 यीशुये तिस्सो ये जबाब दित्या, "हुण तु ईयां ई हुणे दे, सै जे परमेशर चाहं तिस्सो पूरा करने खातर अहांजो येई करना ठीक आ।" फेरी तिने तियां ई होणे दित्या। 16 कने फेरी यीशुये बपतिस्मा लेईल्या। तियां जे सै पाणिये ते बाहर निकळया, अंबर खुलीआ, कने तिने परमेशरा रे आत्मे जो इक कबूतरा साई थल्ले उतरदे कने अपने ऊपर औन्दे देवखया। 17 कने देवखा, ये आकाशवाणी हुई: "ये मेरा प्यारा पुत्र आ, तिसते जे हऊँ बड़ा खुश आ।"

यीशुये री परख

(मरकुस 1:12-13; लूका 4:1-13)

4 फेरी आत्मा यीशुये जो सुनसान जगहां च इस खातर लेईया ताकि शैतान तिसजो परखी सक्को। 2 सै चाळी दिन, कने चाळी रात भूक्खा-प्यासा रहणे ते बाद जिस वगत जे तिस्सो बौहत जादा भूक्ख लम्गीई। 3 तां तिस्सो परखणे औळे नेडे आईने तिसजो बोलया, "जे तू परमेशरा रा पुत्र आ, तां इन्हां पत्थरां जो बोल, भई ये रोटियां बणी जाओ। 4 यीशुये जबाब दित्या, "पवित्र शास्त्रा च लिखीरा, 'माहु सिर्फ रोटिया तेई नीं ज्यूआं, पर सै हर तिसा गल्ला ते जिन्दा रैयां सै जे परेशरा रे मुहां ते निकलां ईयां।' " 5 फेरी

शैतान तिस्सो यरुशलैमा रे पवित्र नगरा च लेईया कने मन्दरा रिया सब्बीते उच्चिया ठारी खरेड्या, 6 कने तिसने बोलया, "जे तू परमेशरा रा पुत्र आ, तां उपरा ते छैल मार; कांभई शास्त्रा च लिखीरा : 'तिस तेरी देकखभाल करने खातर अपणयां दूतां जो हुकम देणा, कने तिन्हां तिज्जो अपणे हत्थां पर थम्मी लेणा; किति येदा नीं ओ भई तेरे पैरां जो पत्थरां ने चोट लगे।' " 7 यीशुये तिसजो गलाया, "शास्त्रा च ये बी लिखीरा: 'तू प्रभु अपणे परमेशरा जो किसी इन्तेहाना च मत पान्दा।' " 8 फेरी शैतान यीशुये जो इक बडे ऊचे पहाड़ा पर लेईया कने तिस्सो संसारा रे सारे राज-पाठ दस्सीने 9 तिस्सो बोलया, "जे तू मेरे अग्रे मत्था टेक्को, तां मांह ये सब किछ तिज्जो देई देणा।" 10 फेरी यीशुये तिसजो गलाया, "शैतान दूर हुई जा, कांभई शास्त्रां च लिखीरा: 'तू प्रभु अपणे परमेशरा रे अग्रे मत्था टेक, कने सिर्फ तिसरी ई सेवा टैहल कर।' " 11 फेरी शैतान तिस्सो छड्डी ने चली आ, कने देकखा, स्वर्गदूत आईने तिसरी सेवा टैहल करने लगे।

यीशुये रे सेवा रे कम्मां री शुरुआत

(मरकुस 1:14-15; लूका 4:14,15,31)

12 यीशुये ताहली जे सुणया भई यूहन्ना बन्दी बनाईलरा तां सै गलील जो मुडीने बापस आईया। 13 कने सै नासरत जो छड्डी ने कफरनहूम च, सै जे जबूलून कने नपताली रे देशा चा गलील री झीला रे कन्डे था, जाईने रैहणे लगया; 14 ये इस खातर हुया भई परमेशरे यशाय्याह भविष्यवक्ते रे जरिये जो किछ बोलया था, सै पूरा ओ: 15 "जबूलून कने नसाली रे देश, झीला रे रस्ते ते यर्दन नदिया रे पार गेर-यहूदियां रे देश गलील च 16 सै लोक जे नेहरे च जी करां थे, तिन्हे इक बड्डी जोत देकखी; सै जे मौती रिया परछाईया रे देशा च बैठीरे थे, तिन्हा पर जोत चमकी।" 17 तिस बगत यीशुये प्रचार करना कने ये बोलणा शुरु कित्या, "मन बदला कांभई स्वर्गा रा राज नेडे आईरा।"

शुरु रे चेलयां रा सदया जाणा

(मरकुस 1:16-20; लूका 5:1-11; यूहन्ना 1:35-42)

18 ताहली जे यीशु गलील रिया झीला रे कनारे ते जाई करां था तिने दुई भाईयां जो देकखया शमौन (सै जे पतरस था) कने तिसरा भाई अंद्रियास, सै झीला च अपणे जाळ पाईरां थे; कांभई सै मच्छुआरे थे। 19 यीशुये तिन्हाने बोलया, "मेरे पिछे चली आवा, हऊं तुहांजो सखांगा भई लोकां खातर मच्छियां पकड़ने रे बजाय माहु रूपी मच्छियां कियां पकड़ी जाईयां।" 20 तिन्हे इकदम अपणे जाळ छड्डी ते कने तिसरे पिछे चलीपे। 21 फेरी सै तित्थीते अग्रे चलीप्या, कने तिने देकखया भई जब्दिये रा पुत्र याकूब कने तिसरा भाई यूहन्ना अपणे पिते सौगी किश्तिया च बैठीरे अपणे जाळां री मरम्मत करीरा थे। यीशुये तिन्हांजो बी सदया। 22 सै इकदम किश्तिया कने अपणे पिते जो छड्डी ने तिसरे पिछे चलीपे।

यीशुये रा रोगियां जो चंगा करना

(लूका 6:17-19)

23 यीशु सारे गलील प्रदेशा च कने यहूदी प्रार्थना घरां च घुमदा हुआ स्वर्गा रे राजा री खुशखबरिया रा प्रचार करदा, कने लोकां री कई तरह री बमारीयां कने कमजोरियां जो दूर करदा रैया। 24 कने सारे सीरिया देशा च तिसरी खबर फैलीगी; इस खातर लोक येदे सारयां माहुआं जो सै जे बमार थे, या कई तरह री बमारियां कने दुःखां ने जकड़ोईरे थे, तिन्हां पर जे दुष्टात्मा स्वार थियां, तिन्हांजो जे मिर्गी आवां थी कने लकबे रे मारीरे थे, तिसले लौणे लगे। यीशुये तिन्हांजो ठीक कित्या। 25 इस खातर गलील कने दिकापुलिस, यरुशलैम, यहूदिया कने यर्दन नदिया रे पारा रे लोकां री बड्डी-बड्डी भीड़ तिसरे पिछे चलणे लगी।

यीशुये रा पहाड़ी उपदेश

5 यीशुये ताहली जे ये बड्डी भीड़ देखी तां सै इक्की पहाड़ा परा जो चलीया, कने ताहली जे सै बैठया तां तिसरे चले तिसले आये। 2 फेरी यीशुये तिन्हां जो उपदेश देन्दे हुये बोल्या:

धन्य बोल

(लूका 6:20-23)

3 "धन्य ये सै लोक, सै जे मना रे दीन ये, कांभई स्वर्गा रा राज तिन्हारा ई हाया। 4 "धन्य ये सै लोक, सै जे शोक करां ये, कांभई परमेशर तिन्हांजो शान्ति देओ।" 5 "धन्य ये सै, सै जे मन्न ये, कांभई सै पृथ्वीया रे अधिकारी होणे। 6 "धन्य ये सै, सै जे धर्मा रे भुक्खे कने प्यासे, कांभई परमेशरा सै रजवाणे। 7 "धन्य ये सै, सै जे दयालू ये, कांभई तिन्हा पर दया किति जाणी। 8 "धन्य ये सै, तिन्हारे जे मन साफ ये, कांभई तिन्हां परमेशरा रा दर्शन पाणा। 9 "धन्य ये सै, सै जे शान्तिया रे काम्म करां ये, कांभई सै परमेशरा रे पुत्र हुणे। 10 "धन्य ये सै, सै जे धर्मा रिया बजह ने सताये जायें, कांभई स्वर्गा रा राज तिन्हारा ई हा। 11 "कने तुहें बी धन्य ये, कांभई ताहली जे लोक मेरे खातर तुहांरा अपमान करो, तुहांजो यातना देओ, कने कई किस्मा रियां झुट्टियां गलां करीने तुहांरे बरोधा च गलाओ। 12 तां तुहें खुश रैयो कने मौज करयो, कांभई स्वर्गा च तुहांजो इसरा फल मिलणा। ये तियां ई हाया तियां जे तुहांते पैहलके भविष्यवक्त्यां जो लोके सताईरा था।

लूण कने जोति

(मरकुस 9:50; लूका 14:34-35)

13 "तुहें सारी माहु जातिया खातर लूण ये; पर जे लूणा रा स्वाद बिगड़ी जाओ, तां सै भीं किसा चीजा ने लूणका कित्या जांगा? फेरी सै किसी कम्मा रा नीं आ, सिर्फ सै फेरी इस लैक आ भई तिस्सो बाहर लोकां रे पैरां हेठ दळोणे खातर सट्टी दित्या जाओ। 14 तुहें संसारा रे खातर जोत ई। इक येदा नगर सै जे पहाड़ा रिया चोटिया पर बसीरा सै छिपाईने नीं छिपी सकदा। 15 कने लोक दयूआ बाळीने किसी बाल्टिया हेठ नीं रखदे पर तिस्सो किसी ऊच्चिया ठारी रक्खां ये, तिसते जे घरा रे सारयां लोकां जो लोय हुई जाई। 16 ईयां ई तुहांरी लोय लोकां रे सामणे चमको भई सै तुहांरे खरयां कम्मां जो देकखीने तुहांरे पिते री, बड्याई करो, सै जे स्वर्गा चा।

ब्यबस्था री शिक्षा

17 ये मता सोचदे, भई हऊं ब्यबस्था जो या भविष्यवक्त्यां रियां कताबां जो खत्म करने आईरा, इन्हां खत्म करने नीं, पर इन्हांजो पूरा करने आईरा। 18 कांभई हऊं तुहांने सच्च बोलां, भई ताहलूआं तक जे जमीन कने अम्बर खत्म नीं हुई जान्दे, तदुआं तक ब्यबस्था रा इक-इक शब्द कने इक-इक अक्खर बणीरा रैहणा, सै तदुआं तक बणीरा रैहणा तदुआं तक जे सै पूरा नीं हुई जान्दा। 19 इस खातर सैजे कोई इन्हां छोट्यां ते छोट्यां हुक्मां च ते किसी इक्की जो तोडो, कने लोकां जो बी तेदा ई करना सखाओ, सै स्वर्गा रे राजा च सबनीं ते छोट्टा हुणा; पर सै जे कोई तिन्हां हुक्मां रा पालन करगा कने तिन्हां सखांगा, सै माहणु स्वर्गा रे राजा च महान हुणा। 20 कांभई हऊं तुहांने बोलां, भई जे तुहांरी धार्मिकता शास्त्रियां कने फेरीसियां ते बधीने नीं हो, तां तुहें कदी स्वर्गा रे राजा च दाखल नीं हुई सकगे।

गुस्सा कने हत्या

21 तुहें जाणां ये भई अहारे बजुर्गा ने गलाया था भई 'हत्या नीं करनी', कने जे कोई हत्या करां तां तिस्सो कचैहरिया च तिसरा जबाब देणे पौणा। 22 पर हऊं तुहांने येदा बोलां, भई सै माहणु जे अपणे भाईये पर गुस्सा करां, तिस्सो बी कचहरीया च तिस गुस्से रे खातर जबाब देणे पौणा, कने सै जे कोई अपणे भाईये जो निकम्मा समझीने तिसरा अपमान करगा तिस्सो बी बडिया पंचैती रे सामणे जबाब देणे पौणा; कने जे कोई बोळो 'ओ मुख' सै नरका रिया अगी रिया सजा रा हकदार हुणा। 23 इस खातर जे तू बेदी पर अपणी भेंट चडाईरां, कने तित्थी तिज्जो याद आओ, भई तेरे भाईये रे मना च तेरे खातर कोई बरोध आ, 24 तां तू तिसा भेंटा जो बेदी रे सामणे छड्डी ओ, कने पैहले जाईने अपणे भाईये ने मेल मलाप कर फेरी आईने तू अपणिया भेंटा जो चढा। 25 तेरा दूश्मण तिज्जो कचैहरिया ले जान्दे बगत ताहली जे रस्ते ची ओ, तू इकदम तिसने मेल-मलाप करीने तिस्सो अपणा मित्र बणाईले किति येदा नीं ओ भई

सैं तिजो जज्जा ले सौंपी दो, कने जज तिजो सपाहिये ले सौंपी दो, कने फेरी सपाही तिजो जेला च पाई दो।²⁶ हऊँ तेरने सच्च बोलां भई तू जेला ते तदुआं तक नीं छुट्टी सकदा तदुआं तक जे तू पाई-पाई नीं चुकाई दो।

बुरा बिचार

²⁷ तुहें सुणी चुक्रीरे भई बोलया था, 'बुरा बचार नीं करना।' ²⁸ पर हऊँ तुहाने बोलां, भई जे कोई किसी जनाना पर बुरी नजर रक्खो सैं अपणे मना च तिसाने व्याभिचार करी बैठया। ²⁹ इस खातर जे तेरी सज्जी अक्ख तेरते पाप करवाओ, तां तिसाजो कड्डीने सट्टी दे; कांभई तेरे खातर ये ठीक आ भई तेरे जिस्मा रा कोई इक अंग खत्म हुई जाओ बजाये इसरे भई तेरा सारा जिस्म नरका च नीं पाया जाओ। ³⁰ जे तेरा दांया हात्थ तेरते पाप करवाये, तां तिसो बड्डी टुक्की ने सट्टी दे; कांभई तेरे खातर ये ठीक आ भई तेरे जिस्मा रा इक अंग खत्म हुई जाओ बजाये इसरे भई तेरा सारा जिस्म नरका च नीं जाओ।

तलाक

(मत्ती 19:9; मरकुस 10:11,12; लूका 16:18)

³¹ 'येदा बी बोलया था, 'जे कोई अपणिया घराओलिया जो तलाक देणा चाहो, तां तिसो कागजा पर लिखीने तलाक देणा चाहिन्दा।' ³² पर हऊँ तुहाने येदा बोलां भई सैं जे कोई माहु अपणिया घराओलिया जो व्याभिचारा ते इलावा किसी होरी बजह ने तलाक देओ, तां सैं तिसाते व्याभिचार करवाह; कने सैं जे कोई तिसा छड्डी रिया ने ब्याह करो, सैं बी व्याभिचार करां।

सगन्द

³³ 'फेरी तुहें सुणी चुक्रीरे हुणे भई अहारे बजुर्गां ने बोलया था, 'झुठी सगन्द नीं खायां, पर प्रभुये खातर अपणिया शपथा जो पूरी करयां।' ³⁴ पर हऊँ तुहाने येदा बोलां भई कदीं सगन्द नीं खायां; न त स्वर्गा री; कांभई सैं परमेशरा रा संघासण आ; ³⁵ न धरतिया री, कांभई सैं तिसरे पैरां री चौकी; न यरुशलम री, कांभई सैं महाराजे रा नगर आ। ³⁶ अपणे सिरा री सगन्द बी देख्वां खान्दे कांभई तू इक्की बाळा जो बी न सफेद, न काला करी सकदा। ³⁷ पर तुहांरी गल्ल 'हां' री 'हां' या 'नां' री 'नां' ओ; कांभई सैं किछ जे इसते मता हुआं सैं बुराईया ते हुआं।

बदला

(लूका 6:29,30)

³⁸ 'तुहें सुणी बैठीरे भई बोलया था, 'अक्खी रे बदले अक्ख कने दन्दा रे बदले दान्दा।' ³⁹ पर हऊँ तुहाने बोलां भई किसी बुरे माहुये रा बी बरोध मत कर; पर जे कोई तेरिया सज्जिया खाखा पर चपैड़ मारो, तिसखों दूज्जी खाख बी करी दे। ⁴⁰ जे कोई तूह पर मकदमा चलाईने तेरा कुर्ता बी त्वारना चाहो तां तिसो तू चोगा तक देई दे। ⁴¹ सैं कोई जे तिजो इक मील बेकार च लेई जाओ, तां तिस कने तू दो मील चली जा। ⁴² सैं कोई जे तूहते किछ मंगो, तां तिसो तू दे; कने सैं जे तेरते त्वाहरिये लेणा चाहो,, तिसो मना नीं कर।

बैरियां ने प्यार

(लूका 6:27,28,32-36)

⁴³ 'तुहें सुणी चुक्रीरे भई बोलया था, 'अपणे पडेसिये ने प्यार कर, कने दुश्मणा ने दुश्मणी रक्ख।' ⁴⁴ पर हऊँ तुहाने येदा बोलां भई अपणे दुश्मणां ने प्यार रक्ख कने तिन्हारे खातर प्रार्थना कर सैं जे तिजो परेशान करां ये, ⁴⁵ तिसते जे तुहें स्वर्ग च रहैणे औळे अपणे पिते री सन्तान बणी सक्को कांभई सैं खरयां कने बुरयां सारयां लोकां पर सूरजा री बराबर लोय करां, धर्मी क्या कने पापी क्या, सैं सबनीं पर बराबर बरखा करां। ⁴⁶ ये गल्लां हऊँ इस खातर करीरां भई जे तू तिन्हाने ई प्यार करगा सैं जे तेरने प्यार करां ये तां तिजो क्या फल मिलणा? क्या कर बसूलणे औळे बी येदा नीं करदे? ⁴⁷ 'जे सिर्फ तुहे अपणे ई भाईयां जो नमस्कार करां ये, तां केदा जेआ बड्डी

काम्म करां ये? क्या दूज्जिया जाति रे लोक बी येदा ई नीं करदे? ⁴⁸ इस खातर चाहिन्दा भई तुहें सिद्ध बना, तियां जे तुहांरा स्वर्ग च रहैणे औला पिता सिद्ध आ।

दान

⁶ 'खबरदार हुईने रौआ! तुहें लोकां जो दसणे रे खातर अपणे धर्मा रे काम्म नीं करा, नै त तुहांजो अपणे पिते ते, सैं जे स्वर्ग चा, तिसरा किछ बी फळ नीं मिलणा। ² 'इस खातर ताहली जे तू किसी दीन-दुखिये जो दान देन्दा हो तां तिसरा ढोल देखां पिटदा, तियां जे धार्मिक सभां च कने गलियां च कपटी लोक होरीं ते प्रशंसा पाणे खातर करां ये। हऊँ तुहाने सच्च बोलां भई सैं अपणा फळ पाई बैठे। ³ पर ताहली जे तू दान करे, तां सैं काम्म जे तेरा सज्जा हात्थ करां, तिसरा पता तेरे खब्बे हात्था जो नीं लगणा चाहिन्दा। ⁴ तिसते जे तेरा कित्तिरा दान छुपीरा रौओ, कने फेरी तेरा पिता सैं जे तू छुपीने करां तिसो बी देखां, तिस तिजो तिसरा फळ देणा।

प्रार्थना

(लूका 11:2-4)

⁵ 'ताहली जे तू प्रार्थना करे तां कपटियां साई नीं ओ, कांभई लोकां जो दसणे खातर प्रार्थना रे घरां च कने सड्कां रे मोड़ां पर खड्हीने प्रार्थना करना तिन्हांजो खरा लगां। हऊँ तुहाने सच्च बोलां भई सैं अपणा फळ पाई बैठे। ⁶ पर ताहली जे तू प्रार्थना करे, तां अपणे कमरे च जा; कने दरवाजा बन्द करीने अपणे पितेने प्रार्थना कर सैं जे गुप्त आ। फेरी तेरा पिता सैं जे गुप्त च तेरे कित्तिरे कम्मां जो देखां, तिजो तिन्हारा फळ देणा। ⁷ प्रार्थना करदे बगत होरीं जाति रे लोकां साई बेमतलबी गल्लां जो बार-बार देखां गलान्दे रैयो, कांभई सैं सोच्चां ये भई तिन्हारे जादा बोलणे ते तिन्हारी जादा सुणी जाणी। ⁸ इस खातर तुहें तिन्हां साई नीं बना, कांभई तुहांरा पिता तुहारे मंगणे ते पैहले ई जाणां भई तुहांरियां क्या-क्या जरूरतां रियां। ⁹ 'तुहें इस तरीके ने प्रार्थना करया करा: 'हे अहारे पिता, तू त स्वर्ग चा; तेरा नौं पवित्र मन्त्रया जाओ। ¹⁰ 'तेरा राज आये। स्वर्ग च तियां जे तेरी इच्छा पूरी हुई, धरतिया पर बी तेरी इच्छा तियां ई पूरी ओ। ¹¹ 'अजके दिनां री रोटी तू अहाजो आज दे। ¹² 'कने तियां जे अहें अपणयां दुश्मणां जो माफ कित्या, तियां ई तू बी अहारे बुरे कम्मां जो माफ कर। ¹³ 'कने अहारी परीक्षा नीं लै, पर बुराईया ते बचा; (कांभई राज कने प्राक्रम कने महिमा सदा खातर तेरे ई हाये।' आमीन।) ¹⁴ 'इस खातर जे तुहें लोकां रे अपराध माफ करणे, तां तुहांरा पिता सैं जे स्वर्ग चा तुहांजो माफ करगा। ¹⁵ कने जे तुहें लोकां रे अपराध नीं माफ करणे, तां तुहारे पिते बी तुहारे अपराध माफ नीं करने।

उपबास

¹⁶ 'ताहली जे तुहें उपबास करो, तां तुहारे मुँह कपटियां साई लटकीरे नीं हुणे चाहिन्दे, कांभई सैं अपणा मुँह बणईने रखां ये, ताकि सैं लोकां जो दस्सी सक्को भई अहें उपबास करीरां ये। हऊँ तुहाने सच्च बोलां भई सैं अपणा फळ पाई बैठे। ¹⁷ पर ताहली जे तू उपबास करे तां अपणे सिरा पर तेल मलयां कने मुहांजो धोई ले, ¹⁸ ताकि लोक ये नीं जाणे भई तू उपबास करीरां, पर तेरा पिता तिसो जे तू देखी नीं सकदा, जाणी लो भई तैं उपबास कित्तिरा। फेरी तेरा पिता सैं काम्म जे तैं छिपिने कित्तिरे सारयां कम्मां जो देख्वां, तिजो तिसरा फळ देणा।

स्वर्ग रा धन

(लूका 12:33-34)

¹⁹ 'अपने खातर धरतिया पर धन-दौलत कड्डी नीं करा, तिन्हीजे कीड़ा कने जंग लगीने इस्सो खराब करी दें, कने चोर सेन्ध मारीने तिसो चोरी सक्कां ये। ²⁰ पर अपणे खातर स्वर्ग च धन्न कड्डी करा, तिन्हीजे न त कीड़ा कने न जंग खराब करां, कने तिन्ही न त चोर सेन्ध मारीने चोरी नीं सकदे। ²¹ कांभई तिन्हीजे तेरा धन हुणा तिन्ही तेरा मन बी लगीरा रहैणा।

शरीरा री लोय (लूका 11:34-36)

22 “शरीरा रा दयूआ आकख ई: इस खातर जे तेरी आकख ठीक ई, तां तेरा सारा शरीर बी उजला हुणा। 23 पर जे तेरी आकख बुरी हुई जाओ, तां तेरा सारा शरीर बी नेहरे ने भरी जाणा; इस खातर सै लोय जे तेरे बिच ई जे नेहरा हो तां सै नेहरा कितणा गहरा हुणा।

परमेशर कने धन (लूका 16:13; 12:22-31)

24 “कोई बी माहु दुई मालकां री सेबा नीं करी सकदा, कांभई तिस इक्की ने बैर रखणा कने दूजे ने प्यार रखणा, या सै इक्की ने मिलीरा रेंहगा कने दूजे रा तिरस्कार करगा। तुहें धन कने परमेशर दुई री इक साथ सेबा नीं करी सकदे। 25 इस खातर हऊं तुहाने बोलां भई अपणे जीणे रे खातर खाणे-पीणे री चिन्ता छडी देवा; अपणे शरीरा रे खातर कपडयां री चिन्ता करना छडी देवा। क्या जिन्दगी रोटीया ते, कने शरीर कपडयां ते बधीने नीं आ? 26. देखा! समाणा रे पंछी न त बिजाई करां ये, न त कटाई करां ये, न त सै पेडूआं च दाणे कट्टा करीने रखां ये; फेरी भीं तुहारा स्वर्गा रा पिता तिन्हांरा पेट भरां। क्या तुहें तिन्हांते जादा कीमती नीं ये? 27 तुहां चा ते क्या कोई येदा हाया सै जे चिन्ता करीने अपणियां जिन्दगिया रा इक पल बी होर बधाई सकां?

28 “कने कपडयां रे खातर कजो चिन्ता करां ये? सोच्चा जंगला रे फुलां रे बारे च सै कियां खिलां ये; सै न कोई काम्म करां ये, न अपणे खातर कपडे बणां ये। 29 तां बी हऊं तुहाने बोलां भई सुलैमान बी, अपणिया सारिया धन-दौलता च तिन्हां चा ते किसी इक्की रे समान नीं सज्जी सकया। 30 इस खातर ताहली जे परमेशर जंगला रे घा जो, सै जे आज जिवित आ कने कल अग्गी च पाई दित्या जाणा, परमेशर येदे कपडे पनांह, तां अरे ओ घट बिश्वास करने औलयो, तुहांजो सै इन्हांते बधीने कां नीं पनाहंगा?

31 इस खातर तुहें चिन्ता करीने येदा मता बोलदे भई अहें क्या खांगे, या क्या पीहगे, या क्या पैहनेगे। 32 कांभई होरीं जातियां रे लोक इन्हां चीजां रे पीछे दौडीरे रें, पर स्वर्गा च रेंहणे औला तुहारा पिता जाणां भई तुहांजो इन्हां सारियां चीजां री जरूरत ई। 33 इस खातर पैहले तुहें परमेशरा रे राजा री कने सै तुहांते क्या चाँह इसरी खोज करदे रौआ तां ये सारीयां चीजां तुहांजो मिली जाणियां। 34 इस खातर कल की चिन्ता मता करदे, कांभई कल की त अहां रियां होर चिन्ता हुणियां; आज के खातर अजका ई दुःख मता।

किसी पर इल्जाम नीं लाणा (लूका 6:37,38,41,42)

7 “दूज्यां पर इल्जाम लगाणे री आदत नी पावा किति येदा नीं ओ भई तुहां पर बी इल्जाम नी लगे। 2 कांभई जिस तरीके ने जे तुहें इल्जाम लायें, तिस तरीके ने तुहां पर बी इल्जाम लगाया जाणा; परमेशरा बी तुहें तिस नापा ने नापणे, तिस नापा ने जे तुहें दूजे लोक नापीरे। 3 “तू कजो अपणे भाईये रिया अकखी रे तिनके जो देख्कां, तां जे तिजो अपणियां अकखीरा लट्टा ई नीं दिखदा? 4 तां जे तेरिया ई अकखीं च लट्टा समाईरा, तां तू अपणे भाईये जो कियां बोली सकां, ‘ल्या हऊं तेरिया अकखी रे तिनके जो कड्डी दूं?’ 5 ओ धोखेबाज माहुआ, पैहले अपणिया अकखी रे लट्टे जो कड्डी लै, फेरी तू ठीक ढंगा ने देखी पांगा कने अपणे भाईये री अकखीं रे तिनके जो कड्डी सकगा। 6 “पवित्र चीज कुत्तयां जो मता देन्दे, कने सुरां रे अगे मोती मत बखेरा; किति येदा नीं हो भई सै तिन्हांजो पैरां हेठ दळी दो कने मुडीने तुहांरी चीर फाड़ करी दो।

मंगे तां मिलणा (लूका 11:9-13)

7 परमेशरा ते मंगेदे रौआ तुहांजो दित्या जाणा; टोलदे रौआ तुहांजो मिलगा; खडकान्दे रौआ तुहारे खातर दरवाजा खोलया जाणा। 8 कांभई सै जे कोई मंगदा ई रैयां, तिस्सो मिलां; कने सै जे टोळां, सै पाई लेआं; कने सै

जे खडकान्दा रैयां, तिसरे खातर खोलया जाणा। 9 “तुहां च ते येदा कुण पिता हुणा, भई जे तिसरा मुन्डु तिसते रोटी मंगो, तां सै तिस्सो पत्थर देओ? 10 या मच्छी मंगो, तां सै तिस्सो सप्प देई दो? 11 इस खातर चाहे जे तुहें बुरे ई कां नीं ओ, तां जे अपणयां बच्चयां जो खरियां चीजां देणा जाणां ये, तां स्वर्गा च रेंहणे औळा तुहारा पिता अपणे मंगणे औळयां जो खरियां चीजां कां नीं देंगा? 12 इस खातर तेदा बर्ताव अपणे खातर तुहें दुज्यां लोकां ते चार्यें, तेदा ई बर्ताव तुहें बी तिन्हा सौगी करा; कांभई व्यबस्था री बिधि कने भविष्यवक्त्यां रे लेखां रा ये ई सार आ।

नेडा कने चौड़ा रस्ता (लूका 13:24)

13 “तंग दरवाजे ते दाखल हुआ, ये हऊं तुहांजो इस खातर दस्सी रां कांभई चौड़ा दरवाजा कने बड्डा रस्ता त बिनाशा खां लेई जां; कने मते सारे लोक ये सै जे तिस पर चलीरां ये। 14 कांभई तंग आ सै दरवाजा कने मुशकल आ सै रस्ता सै जे जीबना रिया तरफौं लेई जां; बडे थोडे जे सै लोक सै जे तिस रस्ते पर चलां ये।

जेदा डाल तेदा फळ (लूका 6:43,44,46; 13:25-27)

15 “झुठे भविष्यवक्त्यां ते बचीने रौआ, सै जे भेडां रे रुपा च तुहांले औवायें, पर अन्दरा ते सै खूखार भेडिये हुआये। 16 तिन्हारे कम्मां ते तुहें तिन्हांजो पछयाणी सकां ये। क्या लोक बराडियां ते अंगूर, या ऊँटकटारां ते अंजीर तोडां ये? 17 इयां ई हर इक खरे डाळा पर खरा फळ लगां कने बुरे डाळां पर त बुरे ई फळ लगां ये। 18 खरे डाळां पर बुरे फळ नीं लगदे, कने न बुरे डाळा पर खरे फळ लगां ये। 19 हर इक सै डाळ तिस पर जे खरे फळ नीं लगदे, सै बड्डी टुक्की ने अग्गी च पाई दित्ते जायें। 20 इयां ई तिन्हारे कम्मां ते तुहें तिन्हांजो पछयाणी सकां ये।

21 प्रभु-प्रभु बोलणे औळा हर माहु स्वर्गा रे राजा च नीं जाणा, पर सै जे स्वर्गा च रेंहणे औळे मेरे पिते रिया इच्छा पर चलां तिस ई स्वर्गा रे राजा च जाणा। 22 तिस दिन मतयां सारयां लोकां माहटे पुछणा, ‘प्रभु, हे प्रभु, क्या अहें तेरे नौवां ते भविष्यबाणी नीं कित्ति? कने क्या तेरे नौवां ते अहें बुरी आत्मां नीं नकाळियां? कने क्या तेरे नौवां ते कई चमत्कारा रे काम्म नीं कित्ते? 23 फेरी मांझ तिन्हांने खुल्हीने गलाई देणा, भई हऊं तुहांजो नीं जाणदा; ओ बुरकर्नयो, माहला ते दफा हुई जवा।’

घर बनाणे औळे दो माहु समझदार कने मुख (लूका 6:47-49)

24 “इस खातर सै जे कोई मेरियां ये गलां सुणीने तिन्हाजो मन्नां, तिसरी तुलना तिस समझदार माहुये ने हुणी तिने जे अपणा मकान सपडा पर बनाया। 25 बरखा हुई, बाढ़ आई, कने आँधियां आई, कने ये सारे तिस मकाना ने टकराये, पर सै नीं रुढ़या, कांभई तिसरी नीयूं सपडा पर बणीरी थी। 26 पर सै जे कोई मेरियां ये गलां सुणां पर तिन्हां पर अमल नीं करदा, सै तिस मुख माहुये रे बराबर आ तिने जे अपणा मकान रेत पर बणाया। 27 कने बरखा हुई, कने बाढां आईयां, कने आँधियां चली, कने तिस मकाना ने टकराई तिसते सै मकान पूरा ई रुढ़िया।” 28 ताहली जे यीशु ये गलां बोली बैठया, तां येदा हुया भई लोकां री भीड़ तिसरे उपदेशां पर रेहान हुईगी, 29 कांभई सै तिन्हारे शास्त्रियां साई नी पर अधिकारियां साई तिन्हांजो उपदेश देईरां था।

कोदा रे रोगिये जो चंगा करना (मरकुस 1:40-45; लूका 5:12-16)

8 यीशु ताहली जे पहाड़ा ते थल्ले उतरया, तां मते सारयां लोकां री भीड़ तिसरे पिछे चलीपी। 2 तिसा जगह इक कोढ़ी बी था, सै यीशुये ले आया कने तिने तिसले सिरा रे भार मत्था टेक्कीने बोलया, “प्रभु जी, जे तू चाहो तां मिन्जो ठीक करी सकां।” 3 तिसरिया इसा गला पर यीशुये अपणा

हात्थ अग्गे करीने तिस कोढीये जो छुया कने बोलया, “हऊँ चाँह, तू ठीक हुई जा।” कने इकदम तिस कोढीये रा कोढ ठीक हुईया। 4 फेरी यीशुये तिसने बोलया, “देख, इस बारे च किसी ने कुछ बी देखां गलान्दा, पर पण्डता जे जाईने अप्पू जो दस्स कने मूसा रे हुक्मा रे मुताबिक भेंट चढ़ा, तिसते जे लोकां जो तेरे ठीक होणे री गबाही मिलो।”

इक सुबेदारा रा बिश्वास (लूका 7:1-10)

5 फेरी यीशु ताहली जे कफरनहूम पुज्रया तां इक सुबेदार तिसले आया कने तिसते सहायता रे खातर बिनती कित्ति, 6 “प्रभु जी, मेरा इक दास घरें बमार पैईरा, तिस्सो लकवा रा रोग हुईगरा कने बड़िया पीड़ा चा।” 7 फेरी यीशुये सुबेदारा ने बोलया, “हऊँ आईने तिस्सो ठीक करगा।” 8 सुबेदारे जबाब दित्या, “प्रभु जी, हऊँ इस लायक नीं आ भई तुहें मेरे घरें आओ, इस खातर सिर्फ हुक्म करी दे बस मेरा दास ठीक हुई जाणा। 9 ये हऊँ जाणां कांभई हऊँ बी इक येदा माहु आ सैं जे किसी बड़े अफसरा रे थल्ले काम्म करां, कने मेरे थल्ले बी दूजे सपाईं ये। ताहली जे हऊँ इक्की सपाईंये जो बोलां, ‘जा!’ तां सैं चली जां; कने दूजे जो बोलां, ‘औ!’ तां सैं आई जां; कने ताहली जे हऊँ अपणे दास्सा जो बोलां, भई ‘ये कर!’ तां सैं तिस्सो करां।”

10 ये सुणीने यीशुये जो बड़ी रेहानी हुई, कने सैं लोक जे तिसरे पिछे चलीरे थे तिनै तिन्हाने बोलया, “हऊँ तुहाने सच्च बोलां भई मैं इतणा गहरा विश्वास इस्पाएल च बी किसी च नीं देखया। 11 कने हऊँ तुहाने बोलां भई मते सारे पूर्वा ते कने पछमा ते औणे कने सैं भोजा च अब्राहम कने इसहाक कने याकूबा सौगी स्वर्गा रे राजा च अपणी-अपणी जगह ग्रहण करगे। 12 पर राज्य री प्रजा धक्का देईने बाहर नेहरे च पाई दित्ति जाणी: तिथी सैं लोक चिखदे चिल्लान्दे हुये दान्द पीहन्दे रेहन्ने।” 13 फेरी यीशुये तिस सुबेदारा ने बोलया, “जा, तेदा ई तेरे खातर ओ, तेदा जे तेरा बिश्वास आ।” कने तिसरा दास इकदम ठीक हुईया।

कई रोगियां जो चंगा करना (मरकुस 1:29-34; लूका 4:38-41)

14 यीशु ताहली जे पतरसा रे घरें पुज्रया, तिनै पतरसा रिया सस्सा जो बुखारा ते पीड़ित बिस्तर पर सुत्ति रिया जो देखया। 15 तिनै तिसारा हात्थ अपणे हत्था ने छुया कने तिसारा बुखार उतरिया, फेरी सैं उट्टी कने यीशुये री सेवा टैहल करने लगी। 16 ताहली जे सान्झ हुई तां लोक तिसले मते सारे येदे लोकां जो लेईने आये तिन्हां च जे बुरी आत्मां थियां कने तिनै तिन्हां बुरी आत्मां जो अपणे बचनां ने नकालीत्या; कने सारे बीमारां जो ठीक कित्या। 17 ये इस खातर हुया ताकि परमेशरे भविष्यवक्ता यशायाह रे जरिये सैं जे कुछ बोलया था सैं पूरा ओ: “तिने अहां रियां कमजोरियां लेई लियां कने अहारे रोग ओड्डी ले।”

यीशुये रा चेला बणने री कीमत (लूका 9:57-62)

18 यीशुये ताहली जे अपणे चहूँ पासयां लोकां री भीड देखी तां तिनै अपणयां चेलयां जो ये हुक्म दित्या भई सैं नदिया रे पारले कनारे चली जावा। 19 फेरी इक्की शास्त्रिये नेड़े आईने तिसने बोलया, “गुरु जी, तिथी जे कित्ति तू जांगा, मांह तेरे पिछे चलणा।” 20 इस पर यीशुये तिसने बोलया, “गिदड़ियां री दूहड कने समाणा रे पंछियां रे आलणे हुआं ये; पर माहुये रे पुत्रा ले सिर टकाणे री बी कोई जगह नीं।” 21 इक होर चले तिस ने बोलया, “प्रभु जी, पैहले मिन्जो जाणे दे भई हऊँ अपणे पिते रिया लाशा जो दबाई सकूँ।” 22 पर यीशुये तिसने बोलया, “मेरे पिछे आईजा, कने मरीरयां जो अपणे मुड़दे खुद गडणे दे।”

तूफाना जो शान्त करना

(मरकुस 4:35-41; लूका 8:22-25)

23 फेरी यीशु इक्की किश्तिया पर जाईने बैठया, तां तिसरे चले बी तिसरिया सौगी थे। 24 तिस ई बगत नदिया च खतरनाक तूफान आया भई किश्ती पाणिये रिया छालियां ने डुबणे लगी, कने सैं सुत्ती रा था। 25 फेरी तिसरयां चेलयां आईने तिस्सो जगहया कने बोलया, “प्रभु, अहांजो बचा, अहें मरने जो हुईगरे।” 26 फेरी यीशुये तिन्हाने बोलया, “अरे कमजोर बिश्वासिओ, तुहें इतने डरीरे कजो ये?” फेरी तिनै उट्टीने तूफाना जो कने पाणिये जो थिड़कया, कने चहूँ पासयां शान्ति हुईगी। 27 कने सैं रेहान हुईने बोलणे लगे, “ये केदा माहु आ भई तूफान कने पाणी बी तिसरा हुक्म मन्ना ये।”

बुरी आत्मा रे सताईरे माहुये जो चंगा करना (मरकुस 5:1-20; लूका 8:26-19)

28 ताहली जे यीशु नदिया रे उस पार गदरेनियां रे देशा च पुज्रया, तां तिस्सो कन्नां ते निकलीने औन्दे दो माहु मिले तिन्हां च जे बुरी आत्मां थियां। सैं इतणे डराबने थे भई कोई तिस रस्ते ते कोई जाई नीं सकदा था। 29 तिन्हें चीन्डा मारदयां बोलया, “हे परमेशरा रे पुत्र, तू अहां ते क्या चाँह? क्या तू बगता ते पैहले ई अहांजो सजा देणे आईरा?” 30 तिथी थोड़िया जेईया दूरिया पर मते सारे सूरं रा इक झुण्ड चरने लगीरा था। 31 बुरी आत्मं तिसने येदा बोली ने बिनती कित्ति, “जे तिजो अहांजो बाहर कडणा ई हाया, तां अहांजो सुरां रे झुण्डा च भेजी दे। 32 तिनै तिन्हाने बोलया, “चली जावा!” फेरी सैं तिन्हां माहुआं ते बाहर निकलीने सूरं च जाईने बड़ीगीयां कने फेरी सूरं रा सारा झुण्ड तरवाईया ते उटकीने नदिया च पैईया, कने सारे सूर पाणिये च डुब्बिने मरीये। 33 तिन्हारे रखवाले फेरी तिथीते दौड़दे हुये नगरा च आये कने सूरं सौगी कने बुरी आत्मां ते ग्रस्त माहुआं सौगी जो कुछ हुया तिसरा सारा हाल सुणाया। 34 फेरी त नगरा रे सारे लोक यीशुये ने मिलणे जो बाहर निकलीने आईये, कने तिस्सो देखीने तिसते विनती कित्ति भई अहारे लाके ते बाहर चली जा।

लकबे रे रोगिये जो चंगा करना (मरकुस 2:1-12; लूका 5:17-26)

9 फेरी यीशु इक्की किश्तिया च बैठया कने नदिया रे पार अपणे नगरा च आईया। 2 लोक लकवे रे इक रोगिये जो मंजे पर लेटाईने तिसले ली आये। यीशुये तां जे तिन्हांरा विश्वास देखया तां तिनै लकवे रे रोगिये ने बोलया, “बचा, हौंसला रख; तेरे पाप माफ हुये।” 3 इसा गल्ला पर कई शास्त्रीयें सोचया, “ये माहु त परमेशरा रा अपमान करीरां।” 4 यीशु जाणां था भई ये क्या सोचिंरां ये तिनै बोलया, “तुहें अपणे मनां च बुरा बिचार कजो करीरां ये? 5 ठीक क्या? येदा बोलणा, भई ‘तेरे पाप माफ हुये’, या येदा बोलणा, भई ‘खड़ा ओ कने चलणे लग।’ 6 पर इस खातर भई तुहें जाणी लो भई माहुये रे पुत्रा जो पृथ्वीया पर पाप माफ करने रा अधिकार आ।” फेरी तिनै लकवे रे रोगिये जां बोलया, “खड़ा ओ, अपणा मंजा चक कने अपणे घरा जो जा।” 7 सैं लकवे रा रोगी खड़ा हुईने अपणे घरौ चलीया। 8 लोक येदा देखीने डरीये कने परमेशरा रे गीत गाणे लगे तिनै जे माहुआं जो येदा अधिकार दित्या।

मत्तिये जो सद्वया जाणा

(मरकुस 2:13-17; लूका 5:27:32)

9 यीशु ताहली जे ऊत्थीते चलीप्या तां तिनै चुंगी लेणे औळे रिया चौकिया पर बैठीरे इक माहुये जो देखया, तिसरा नौं जे मत्ति था, यीशुये तिसजो बोलया, “मेरे पिछे औं।” सैं उट्टीने तिसरे पिछे चलीप्या। 10 ताहली जे यीशु मत्तिये रे घरें रोटी खाणे बैठया तां कई चुंगी लेणे औळे कने पापी आईने यीशु कने तिसरे चेलयां सौगी खाणे बैठे। 11 येदा देखीने फेरीसियें तिसरे चेलयां ने गलाया, “तुहांरा गुरु चुंगी लेणे औळयां ने कने पापियां सौगी कजो खां?” 12 ये सुणीने यीशुये तिन्हाने गलाया, “भले चंगयां जो डाक्टरा री जरूरत नीं हुन्दी

पर बीमारां जो डाक्टरा री जरूरत हुआई।¹³ इस खातर तुहें लोक जावा कने समझा भई शास्त्रा रे इस बचना रा मतलब कया: 'हऊँ बलिदान नीं चाहन्दा पर दया चांह।' कांभई हऊँ धर्मियां जो नीं, पर पापियां जो सदणे आइरां।"

उपवासा पर स्वाल

(मरकुस 2:18-22; लूका 5:33-39)

14 फेरी यूहन्ने रे चेलयां तिसले आईने बोलया, "क्या कारण आ भई अहें कने फेरीसी इतणा उपवास रखां ये, पर तेरे चेले उपवास नीं रखदे?"

15 यीशुये तिन्हांने बोलया, "क्या बराती, तदुआं तक जे लाड़ा तिन्हा सौगी आ, दुःख मनाई सकां ये? पर सैं दिन ओणे ताहली जे लाड़ा तिन्हाते लग कित्या जाणा, तिस बगत तिन्हां दुःखी हुणा कने उपवास रखणा।¹⁶ नये कपड़े री टल्ही परवाणे कपड़े पर कोई नीं लगान्दा, कांभई कपड़े री खीज होर बधी जाणी, तिस रिया वजह ते इसा टल्हीया सैं कपड़ा होर बी जादा फाड़ी देणा¹⁷ कने नौआं दाखरस परवाणियां मशकां च नीं भरदे, कांभई येदा करने ते मशकां फटी जाईयां, कने दाखरस बगी ने बिखरी जां कने मशकां खत्म हुई जाईयां; इस खातर लोक नौवां दाखरस नौईयां मशकां च भरां ये तिसते जे दाखरस कने मशक दोनो बचीरे रैयें।"

मुईरी कुडी कने बमार जनाना

(मरकुस 5:21-43; लूका 8:40-56)

18 यीशु तिन्हां लोकां जो ताहली जे ये गल्लां गलाई ई करां था, तिस ई वगत यहूदियां रा इक मुखिया तिसले आया कने तिसले मत्था टेकीने बोलया, मेरी कुडी येब्बां ई मरी, तू चल्लीने जे तिसा पर अपणा हात्थ रखी दो, तां सैं फेरी भीं ते ज्युन्दी हुई जाणी।"¹⁹ यीशु उड्डीने अपणे चेलयां समेत तिसने चलीप्या।²⁰ कने देवखा, इक जनाना तिसाजो जे बारा सालां ते खून बगणे री बमारी थी, सैं पिछे ते यीशुये रे नेडे आई कने तिसरे कपड़े री कनारी छुई ली।²¹ कांभई सैं अपणे मना च सोची रां थी, "जे हऊँ इसरे कपड़यां जो ई छुई लेंगी, तां बी मांह ठीक हुई जाणा।"²² यीशुये मुडीने तिसाखौं देखया कने बोलया, बेटी हौंसला रख; तेरा सैं जे विश्वास था तिने ई तू ठीक कित्ति।" कने सैं जनाना तिस ई पल इकदम ठीक हुईगी।²³ ताहली जे यीशु तिस मुखिये रे घरे पुज्या तां तिने देखया भई शंख बजणे औळे कने तिन्ही कडे हुईरे लोक कुडिया रे मरने पर हल्ला करीरां थे,²⁴ फेरी यीशुये लोकां जो गलाया, "इत्थी ते बाहर जावा, कुडी मरीरी नीं, पर ये सुत्तीरी।" तिस रिया इसा गल्ला पर लोक यीशुये रा मजाक उवाणे लगे।²⁵ फेरी ताहली जे लोक बाहर भेज्तीते, तां यीशुये कुडिया रे कमरे च जाईने तिसारा हात्थ पकड़या, कने सैं उड्डीने बैठीई।²⁶ कने इसा गल्ला रा चर्चा सारे लाके च फैलीया।

दूई अन्हेयां रियां अक्खीं च जोत पाणा

27 यीशु ताहली जे तिन्हीते जाणे लगया, तां दो माह्नु अक्खीं ते अन्हे तिसरे पिछे हाक पान्दे हुये चले, "ओ दाऊद रे पुत्र, अहां पर दया करा!"²⁸ सैं ताहली जे घरा रे अन्दर पुज्या, तां सैं अन्हे तिसले आये, फेरी यीशुये तिन्हांते पुछया, "क्या तुहांजो विश्वास आ भई हऊँ तुहांजो भीं ते अक्खीं देई सकां?" तिन्हें जबाब दित्या, "हां, प्रभु।"²⁹ फेरी तिने तिन्हा रिया अक्खीं ने छोन्दे हुये बोलया, "तुहां रे खातर तेदा ई ओ तेदा जे तुहांरा विश्वास आ।"³⁰ कने तिन्हां रियां अक्खीं खुल्ली गियां। फेरी यीशुये तिन्हांजो साबधान करदे हुये बोलया, "इसरे बारे च किसी जो पता नीं चलणा चाहिन्दा।"³¹ पर तिन्हे उत्थीते जाईने ये खबर तिस लाके रे चहुँ पासयां फैलाईती।

इक गुँगे जो चंगा करना

32 ताहली जे सैं दोनो जणे ऊत्थीते बाहर जाईरां थे, तां कुछ लोक यीशुये ले इक गुँगे जो लेईने आये, सैं गुंगा बुरी आत्मा रा सताईरा था, इस खातर सैं बोली नीं पान्दा था।³³ ताहली जे बुरी आत्मा तिस चा ते कड्डी ती, तां सैं गुंगा जे बोलदा नीं था तिस वगत गलाणे लगया। इस पर लोके चम्भा करीने गलाया, "इसाएल च येदी गल्ल पैहले कदी नीं देखी।"³⁴ पर फेरीसियें बोलया, "ये त बुरी आत्मां जो शैताना रे मुखिये री सहायता ने कड्डी।"

थोडे मजदूर

35 यीशु हर इक गाँवा कने शहरां च गया कने यहूदियां रे प्रार्थना रे घरां च उपदेश देन्दा, कने परमेशरा रे राजा री खुशखबरिया रा प्रचार करदा, कने हरेक किस्मा री बमारियां कने दुःखां जो दूर करदा रैया।³⁶ ताहली जे तिने कई लोकां जो देखया तां तिस्सा लोकां पर तरस आया, कांभई सैं लोक तियां ई सताईरे कने मजदूर थे, तियां जे भेडां हुआं ईयां तिन्हांरा जे कोई चरवाहा नीं हुन्दा।³⁷ फेरी यीशुये अपणे चेलयां ने बोलया, "पक्कीरे खेत त मते पर मजदूर थोडे ई हाये।³⁸ इस खातर खेता रे मालका ने बिनती करा भई सैं अपणिया फसला जो कटणे खातर मजदूर भेज्ती देओ।"

यीशुये रे बारा चले

(मरकुस 3:13-19; लूका 6:12-16)

10 फेरी यीशुये अपणे बारा चेलयां जो अपणे नेडे सद्दीने, तिन्हांजो बुरी आत्मां जो बाहर कडणे कने कई किस्मा री बमारिया कने दुःख-तकलीफां जो दूर करने रा अधिकार दित्या।² तिन्हां बारां चेलयां रे नौं थे: पैहला शमौन, सैं जे पतरसा रे नौवा ते जाणया गया, कने तिसरा भाई अंद्रियास, जब्दिये रा पुत्र याकूब कने तिसरा भाई यूहन्ना।³ फिलिप्पुस, बरतुल्मै, थोमा, टैक्स लेणे औळा मत्ती, हलफै रा पुत्र याकूब कने तद्द।⁴ शमौन कनानी, कने यहूदा इस्करियोती तिने जे यीशुये जो धोखे ने पकड़वाया था।

बारा प्रेरितां रे सेबा रे काम्म

(मरकुस 6:7-13; लूका 9:1-6; 10:4-12)

5 यीशुये इन्हां बारां जो बाहर भेजदे हुये हुक्म दित्या: भई "गैर यहूदियां रे लाके च नीं जायो, कने सामरियां रे किसी नगरा च दाखल नीं हुयां।⁶ पर इस्राएल रे परिवारा री गवाच्छी री भेडां ले इ जायो।⁷ कने तिन्हांजो ये उपदेश देयो भई: 'स्वर्गा रा राज नेडे आइगरा।'⁸ बमारां जो ठीक करा, मुईरयां जो ज्युन्दे करा, कोदियां जो ठीक करा कने बुरी आत्मां जो कड्डी। तुहें बिणा कुछ दित्ते परमेशरा री शीष कने अधिकार पाया, इस खातर तुहें बी इन्हाजो दूज्यां रे खातर मुखत बन्डा।⁹ अपणिया जेबा च न त सोना, न चान्दी कने न ताँबा रखा;¹⁰ रस्ते खातर कोई झोळा बी देखां लेन्दे, कोई फालतू कमीज, न जुट्टे कने न सोद्री देखां रखदे, कांभई मजदूरा जो तिसरी रोटी मिलणी चाहिन्दी।¹¹ तुहें ताहली जे कदी किसी शहरा या गाँवा च जाओ, तां ये पता करा भई तिन्ही विश्वास लैक कुण आ; कने फेरी तदुआं तक तिस ई घरा च रुकीरे रैयो, तदुआं तक जे तिन्हीते आई नीं जाओ।¹² ताहली जे तुहें किसी घरा च जाओ, तां तिस घरा रे लोकां रा आदर करदे हुये बोला, 'तुहांजो शान्ति मिलो'।¹³ जे तिस घरा रे लोक लायक हुंगे तां तुहांरी शीष तिन्हां पर बणीरी रैहणी, कने जे सैं इसरे लायक नीं हुंगे तां तुहांरी शीष तुहांले बापस आई जाणी।¹⁴ जे कोई तुहांरा स्वागत नीं करो या तुहांरी गल्ल नां सुणो, तां तिस घरा या गाँवा ते निकलदे हुये अपणे पैरां री धूडीजो तिन्ही टुटकी लेआं।¹⁵ हऊँ तुहांने सच्च बोलां भई ताहली जे न्याय होणा, तिस दिन तिस गाँवा री दशा ते सदोम कने अमोरा रे नगरां री हालत खरी होणी।

ओणे औळा संकट

(मरकुस 13:9-13; लूका 21:12-17)

16 खबरदार! हऊँ तुहांजो भेडां साई भेडियां रे बिच भेज्तां, इस खातर सप्पां साई चलाक कने कबूतरां साई भोळे-भाळे बणा।¹⁷ पर लोकां ते खबरदार रैयां, कांभई तिन्हां तुहांजो बन्दी बनाईने यहूदी पंचैता रे हवाले करना, कने अपणिया पंचैती च तुहां पर कोडे बरसाणे।¹⁸ तुहें मेरे खातर हाकिमां कने राजयां रे सामणे पेश कित्ते जाणे, कांभई तुहें मेरे चले तुहांजो मौका दित्या जाणा भई तुहें तिन्हांजो कने गैर यहूदियां जो मेरे बारे च गवाही देओ।¹⁹ ताहली जे सैं तुहांजो पकड़णे तां इसा गल्ला री चिन्ता देखां करदे भई तुहां कया बोलणा कने कियां बोलणा, कांभई तिस वगत तुहांजो दस्सी दित्या

जाणा भई तुहां कया बोलणा। 20 याद रखा बोलणे औळे तुहें नीं ये, पर तुहारे पिते रा आत्मा तुहारे अन्दरा ते बोलां। 21 “भाईये अपणे भाई पकडवाईने मरवाई देणे, माता-पिता तिन्हां रयां बचयां पकडवाणे कने बचयां अपणे माता-पिता रे खलाफ हुई जाणा तिन्हां सै मरवाई देणे। 22 मेरे नौंवा रिया बजह ने लोकां तुहांने बैर रखणा, पर सै जे अंत तक टिकी रा रहन्गा तिसरा ई उद्धार हुणा। 23 सै ताहली जे तुहांजो इक्की नगरा च तंग करगे तां तुहे दूजे नगरा जो चली जायो। हऊं तुहांने सच्च बोलां भई इसते पैहले भई तुहे इस्राएल रे सारे नगरां रा चक्कर पूरा करो माहुये रे पुत्रा दूजी बार आई जाणा। 24 चेला अपणे गुरुये ते बड्डा नीं हुन्दा कने न ई कोई दास अपणे मालका ते बड्डा हुआ। 25 चेले जो गुरुये रे बराबर होणे च कने दासा जो अपणे स्वामिये रे बराबर होणे ची सन्तोख करना चाहिन्दा। तां जे सै घरा रे मालका जो ई शैतान बोलां ये, तां तिसरे घरा रे लोकां सौगी त होर बी बुरा सलूक करगे।

किसते डरिये ?

(लूका 12:2-7)

26 इस खातर तिन्हाते डरदे देखां; कांभई सै जे कुछ छिपिरा सारा सामणे औणा, कने हर सै चिज सै जे लकोई री प्रगट कित्ति जाणी। 27 हऊं नेहरे च सै कुछ जे तूह ने बोलां, हऊं चाँह तिस्सो तुहें लोई च बोलो, मैं सै कुछ जे तुहारे कनां च बोलीरा तुहें तिसरा प्रचार मकाना रिया छत्ता पर चढीने करा। 28 तिन्हांते मता डरदे सै जे तुहारे शरीरा जो खत्म करी सकां ये, पर तुहां रिया आत्मा जो नीं मारी सकदे, बस तिस परमेशरा ते डरा सै जे तुहारे शरीरा जो कने तुहां रिया आत्मा जो नरका च पाईने खत्म करी सकां। 29 कया इक पैसे च दो चिडियां नीं बिकदी? तां बी तुहारे पिते रिया मर्जीया ते बिना तिन्हां चा ते इक बी जमीना पर नीं पैई सकदी। 30 अरे तुहारे त सिरा रा इक इक बाळ गिणीरा। 31 इस खातर डरदे मता तुहांरी कीमत त येदी कई चिडियां ते बधीने ई।

यीशुये जो मनणा या नीं मनणा

(लूका 12:8,9)

32 “सै कोई जे मिन्जो सारयां लोकां रे सामणे मन्नी लेंगा, तिस्सो हऊं बी स्वर्गा च रहणे औळे अहारे पिते रे सामणे मन्नी लेंगा। 33 पर सै जे कोई सारयां लोकां रे सामणे मिन्जो नकारगा, मांह बी तिसरा अपणे पिते रे सामणे इन्कार करना।

यीशुये रे औणे रा नतीजा

(लूका 12:51-53; 14:26-27)

34 “ये नीं समझा भई हऊं धरतिया पर मेल-मिलाप करणे आईरा; हऊं मेल-मिलाप करणे नीं, पर तलवार चलवाणे आईरा। 35 हऊं त आया भई: ‘माहुये जो तिसरे पिते ते, कने कुडिया जो तिसा रिया माता ते, कने बहुआ जो तिसा रिया सस्सा ते लग करी दूँ, 36 माहुये रे बैरी तिसरे अपणे घरा रे ई लोक हुणे।’ 37 “सै जे अपणे माता-पिते जो मेरते जादा प्यार करां ये, सै मेरे लायक नीं ये; कने सै जे अपणे बेटे या बेटिया जो मेरते जादा प्यार करां ये, सै मेरा होणे रे लायक नीं आ; 38 कने सै से अपणे दुख-तकलीफां रा कूस लेईने मेरे पिछे नीं चलो सै बी मेरा होणे रे लायक नीं आ। 39 सै जे अपणी जान बचाणे री कोशिश करां, तिस अपणा प्राण गवाणा; कने सै जे मेरे खातर अपणी जान देगा, तिस जीवन पाणा।

प्रतिफल

(मरकुस 9:41)

40 “सै जे तुहांजो अपनांगा, सै मिन्जो ग्रहण करां। 41 सै जे किसी भविष्यवक्ते जो इस खातर अपनां भई सै भविष्यवक्ता, तिस्सो सैई फळ मिलणा सै जे भई भविष्यवक्ते जो मिलां; कने जे तुहें किसी भले माहुये रा स्वागत इस खातर करां ये भई सै भला माहु आ, तिस्सो सचमुच सै ई फळ मिलणा सै जे किसी भले माहुये जो मिलणा चाहिन्दा। 42 कने जे कोई मेरे इन्हां भोळे-भाळे चेलयां चा ते किसी इक्की जो बी इस खातर इक गलास ठन्डे

पाणिये रा देयो भई सै मेरा चेला, तां हऊं तुहांने सच्च बोलां भई तिस्सो इसरा फल जरूर मिलणा।”

बपतिस्मा देणे औळे यीशु कने यूहन्ना

(लूका 7:18-35)

11 ताहली जे यीशु अपणे बारा चेलयां जो हुक्म देई बैठया, तां सै तिन्हाते नगरां च उपदेश कने प्रचार करने जो तिन्हीते चलीया। 2 यूहन्ने ताहली जे जेला च मसीह रे कम्मां रा समाचार सुणया तां तिने अपणे चेलयां तिसले ये पूछणे खातर भेजे, 3 “कया औणे औळा तू ई हाया, या अहें किसी दूजे री बाट देखिये?” 4 यीशुये जबाब दित्या, “सै जे कुछ तुहें सुणीरां ये कने देखीरां ये, जाईने यूहन्ने जो दस्सी दवा, 5 भई अन्हें देखीरां ये कने लंगडे चली फिरी करां ये, कोढी ठीक हुईरां ये कने टौणे सुणीरां ये, मूईरे ज्युन्दे हुईरां ये, कने दीन दुखियां जो यीशु मसीह री खुशखबरी सणवाई जाईरां ई। 6 कने धन्य सै आ, सै जे मेरे खातर ठोकर नीं खाओ।”

7 ताहली जे यूहन्ने रे चले तिन्हीते जाईरां थे, तां यीशु यूहन्ने रे बारे च लोकां ने बोलणे लगया, “तुहें जंगला च कया देखणे आये थे? कया हवा ने हिलदे हुये सरकन्डे जो? 8 फेरी तुहें कया देखणे गये थे? कया बांके कपडे पैहनीरे माहुये जो देखणे गैईरे थे? देखा, सै जे बांके कपडे पैहनां ये, सै राजे रे मैहलां च रयां ये। 9 तां फेरी कजो गैईरे थे? कया किसी भविष्यवक्ते जो देखणे जो? हां, हऊं तेरते बोलां भई भविष्यवक्ते ते बी बड्डे जो। 10 ये सै ई हाया तिसरे बारे च जे शास्त्रां च लिखिरा:

‘देख, हऊं अपणे दूता जो तेरते पैहले भेजीरां,

सै जे तेरे खातर बाट बणांगा।’

11 हऊं तुहांने सच्च बोलां भई सै जे जनानां ते जम्मीरे, तिन्हां च ते यूहन्ना बपतिस्मा देणे औळे ते कोई बड्डा नीं हुया; पर सै जे स्वर्गा रे राजा च छोटे ते छोटा माहु बी यूहन्ने ते बड्डा। 12 बपतिस्मा देणे औळे यूहन्ने रे दिनां ते अज तक स्वर्गा रा राज खतरनाक जख्मां जो झेलदा रया कने हिंसा रे जोरा पर इस्सो छीनणे री कोशिश कित्ति जान्दी रई। 13 यूहन्ने रे औणे तक सारे भविष्यवक्त्यां कने मूसा री ब्यबस्थे भविष्यवाणी कित्ति थी, 14 कने जे तुहें व्यवस्था कने भविष्यवक्त्यां सै जे किछ बोलया, तिस्सो मनणे जो राजी ये, तां तिसरे औणे री जे भविष्यवाणी कित्ति थी, सै यूहन्ना सैई एलिय्याह। 15 सै जे सुणी सकां, सै सुणी लो।

16 “अज किया पीढीया रे लोकां री बराबरी हऊं किसने करूँ? सै बजारा च बैठीरे तिन्हां बचयां साई ये सै जे इक दुये जो हाक पाईने बोलीरां ये: 17 ‘अहें तुहारे खातर मूरली बजाई, पर तुहें नीं नच; अहें दुःख भरे गीत गाये, पर तुहें नीं रोये।’ 18 कांभई यूहन्ना होरी लोकां साई न खान्दा आया न पीन्दा आया, पर लोक बोलां थे भई ‘तिस च बुरी आत्मा ई।’ 19 माहुये रा पुत्र खान्दा पीन्दा आया, पर लोक बोलां ये ‘इस माहुये जो देखा, ये पेटू कने पियकड माहु, चुंगी लेणे औळया कने पापियां रा मित्र आ!’ पर ज्ञान अपणयां कम्मां ते सच्चा ठहराया जा।”

अविश्वासा पर हाय

(लूका 10:13-15)

20 फेरी यीशुये तिन्हां नगरां जो लवाहमा दित्या तिन्हां च जे तिने मते सारे चमत्कारा रे काम्म कित्तिरे थे, कांभई तिन्हे लोकें पाप करना नीं छडया था। 21 “हाय तू पर, खुराजीन! हाय बैतसैदा! तुहारे बिच सै जे चमत्कार हुये, जे सै चमत्कार सूर कने सैदा कित्तिरे हुन्दे, तां उत्थीरे लोक कधके टाटा रे कपडे ओडीने, कने धूड़ मलीने मन फिराई बैठीरे हुन्दे। 22 पर हऊं तुहां लोकां ने बोलां भई न्याय रे दिन सुर कने सैदा री दशा तुहांते जादा सैहणे लायक हुणी। 23 अरे कफरनहूम, कया तू सोचां भई कया तिजो स्वर्गा रिया महिमा तक ऊच्चा कित्या जाणा? तू त नरका जो जाणा! कांभई सै चमत्कारा रे काम्म जे तू च कित्तिरे, जे सै सदोम च कित्ते हुन्दे, तां सै नगर अज्जा तक टिकीरा हुन्दा। 24 पर हऊं तुहांजो दस्सां भई न्याय रे दिन तेरे लोकां री हालता ते सदोम री हालत कई माने च बधिया हुणी।”

बोझा ने दबोईरे लोकां रे खातर अराम

(लूका 10:21-22)

25 तिस मौके पर यीशुये गलाया, “पिता, तू स्वर्गा रा कने धरतिया रा मालक आ, हऊँ तेरा धन्यावाद करां भई तैं इन्हां गल्लां जो ज्ञानियां कने समझदारां ते छुपाईने रखीरा, कने बालकां पर प्रगट कित्या। 26 हॉ, हे पिता, ये इस खातर हुया कांभई तिजो ये ई ठीक लगया। 27 मेरे पिते सारा कुछ मिन्जो सौंपीरा; कने पिते ते इलावा कोई पुत्रा जो नीं जाणदा; कने कोई बी पुत्रा रे इलावा पिते जो नीं जाणदा; जिसरे खातर पुत्रे तिससो प्रगट करना चाया। 28 “अरे, ओ थके-माँदे बोझा ने दबोईरे लोको, मेरले आवा, हऊँ तुहांजो सुख चैन देंगा। 29 मेरा जुगड़ा लौआ कने तिससो अपणे उपर चक्का, फेरी माहते सिक्खा, कांभई हऊँ सिधा-साधा कने मना रा हल्का: कने तुहांजो बी अपणे खातर सुख-चैन मिलणा। 30 कांभई सैं जुगड़ा सैं जे हऊँ तुहांजो देई करां बड़ा सरल आ कने सैं बोझ जे हऊँ तुहां पर रखीरां से बड़ा हल्का।”

सब्त रा प्रभु

(मरकुस 2:23-28; लूका 6:1-5)

12 तिस वगत विस्राम रे दिन यीशु खेतां चीयें जाईरां था, कने तिसरयां चेलयां जो भुख लगीं तां सैं कणका रे सिल्लुआं जो तोडी-तोडीने खाणे लगे। 2 फरीसिये येदा देखीने तिसने बोलया, “देख, तेरे चले येदा काम्म करीरां ये, सैं जे बिस्राम रे दिन करना ठीक नीं आ।” 3 यीशुये तिन्हांते पूछ्या, “क्या तुहें नीं पढ़या भई दाऊद कने तिसरे साथियें, ताहली जे तिन्हांजो भुख लगी क्या कित्या था? 4 तिने परमेशरा रे घरें बडीने, परमेशरा जो चढाईरी रोटियां कियां खादियां थी, तिन्हा जो खाणा न त तिससो ठीक था न ई तिसरयां साथियां जो ठीक था, तिन्हां जो सिर्फ परोहत खाई सक्कां थे? 5 या मूसा री व्यवस्था च तुहें ये नीं पढ़या भई बिस्राम रे दिन पण्डत मन्दरा च बिस्राम दिना रिया बिधिया जो तोडने पर बी निर्दोष ठैहरां ये? 6 पर हऊँ तुहांने बोलां भई येथी सैं आ सैं जे मन्दरा ते बी बड्डा। 7 जे तुहें इसरा मतलब जाणदे, भई हऊँ लोकां च दया चांह, जानबरां री बली नीं, तां तुहें तिन्हांजो दोषी नीं बणां दे सैं जे निर्दोष ये। 8 माहुये रा पुत्र त बिस्राम रे दिना रा बी स्वामी आ।”

सुक्के हत्था औले माहुये जो चंगा करना

(मरकुस 3:1-6; लूका 6:6-11)

9 फेरी सैं ऊत्थीते चलीने यहूदियां रे प्रार्थना घरा च आया। 10 तिन्ही इक माहु था, तिसरा हात्थ जे सुक्कीरा था। तिन्हे यीशुये पर दोष लगाणे खातर तिसते पूछ्या, “क्या बिस्राम रे दिन किसी जो चंगा करना ठीक आ?” 11 तिने तिन्हांजो जबाब दित्या, “तुहां च येदा कृण आ तिसरी जे इक ई भेड ओ, कने बिस्राम रे दिन सैं खड्डे च पैई जाओ, तां क्या सैं तुहां पकडीने बाहरौ नीं कडणी? 12 भला, माहुये रा मुल भेडा ते बधीने नीं आ! इस खातर बिस्राम रे दिन ‘मूसा री व्यवस्था’ भलाई करने री अनुमति देआं ई।” 13 फेरी यीशुये तिस सुक्कीरे हत्था औले माहुये ने बोलया, “अपण हात्थ अगे कर।” कने तिने अपणा हात्थ अगे करीत्या, कने फेरी तिसरा सुक्कीरा हात्थ दूजे हत्था साई ठीक हुईया। 14 फेरी फरीसी बाहर चलीये कने तिससो मारने रे खातर कोई रस्ता टोळणे री तरकीब सोचणे लगे।

परमेशरा रा चुणीरा सेबक

15 यीशु ये जाणीया कने उत्थीते चलीप्या। कने मते सारे लोक तिसरे पिछे चलीपे, कने तिने सारयां लोकां जो ठीक कित्या, 16 कने यीशुये तिन्हांजो साबधान कित्या भई मेरे बारे च लोकां जो कुछ बी नीं दरस्यो। 17 सैं इस खातर हुया भई यशयाह भविष्यवक्ते रे जरिये परमेशरे जो किछ बोलया था, सैं पूरा ओ: 18 “देखा, ये मेरा सेबक आ, सैं जे मेरा चुणीरा; ये मेरा प्यारा, तिसते जे मेरा मन खुश आ: मांह अपणा आत्मा तिसरे ऊपर भेजणा, कने तिस सारयां देशां रे सारे लोकां जो न्याय रा समाचार देणा। 19 तिस न लडना

न कदीं चीन्डां मारनी, कने न बजारां च लोकां तिसरी अवाज सुणनी। 20 मरिन्डीरा सरकन्डा तिस नीं तोडना, कने बुझीरे दयूये जो कदीं नीं बझवान्दा, तदुआं तक जे सैं न्याय जो प्रबल नीं कराईलो।” 21 कने फेरी सारयां लोकां अपणियां आसां तिसरे नौवा ते रखणियां।”

यीशु कने बालजबूल

(मरकुस 3:20-30; लूका 11:14-23)

22 फेरी लोक यीशुये ले इक येढे अन्हे जो लयाये सैं जे गूंगा बी था, कांभई तिस पर बुरा आत्मा स्वार था; यीशुये सैं ठीक कित्या, कने इस खातर सैं गूंगा, अन्हा बोलणे कने देखणे लगया। 23 इस पर सारे लोक रेहान हुईने बोलणे लगे, “क्या ये दाऊद रा पुत्र हुई सक्कां!” 24 पर फरीसियें ये सुणीने गलाया, “ये त बुरी आत्मां रे मुखिये बालजबूल रे सहारे बुरी आत्मां जो नकालां।” 25 यीशु तिन्हारे मना री गल्लां जाणिने तिन्हांजो गलाणे लगया, “हर सैं प्रदेश तिसच जे फूट पैई जाई, सैं उजडी जा; कने तियां ई हर नगर या परिवार तिसच जे फूट पैई जाओ, तां कियां बणीरा रैहणा। 26 कने जे शैतान ई शैताना जो नकालणे लगे, तां ये त अपणा ई बरोध करना हुया; फेरी तिसरा राज कियां बणीरा रैहणा? 27 कने फेरी जे ये सच्च आ भई हऊँ शैताना रे सहारे बुरी आत्मां जो नकालां, तां तुहांरे अपणे चले किसरे सहारे तिन्हांजो नकालां ये? इस खातर सैं ई तुहांरा न्याय करगे। 28 हऊँ बुरी आत्मां जो परमेशरा रिया आत्मा रे सहारे नकालां, तां परमेशरा रा राज तुहांरे नेडे आईरा। 29 या फेरी कोई किसी रे घरें बडीने तिसरा माल कियां चोरी सक्कां तदुआं तक जे भई पैहले सैं तिस ताकतबर माहुये जो बन्ही नीं देओ? फेरी सैं तिसरे घरा जो लुटि सक्कां। 30 सैं जे मेरने नीं आ सैं मेरा बरोधी आ, कने सैं जे खिन्डी रिया भेड्यां जो कड्डा करने च मेरी मदद नीं करदा सैं तिन्हांजो खन्डेरी रां। 31 इस खातर हऊँ तुहांने बोलां भई माहुआं री कइयां किस्मां री निन्दा कने पाप माफ कित्ते जाणे, पर पवित्र आत्मा री निन्दा माफ नीं कित्ति जाणी। 32 कोई माहु जे माहुये रे पुत्रा रे बरोधा च कुछ बोलां, तां तिसरा सैं अपराध माफ कित्या जाणा, पर जे कोई पवित्र आत्मा रे बरोधा च बोलगा, तिसरा अपराध न त इस लोका च कने न परलोका च माफ कित्या जाणा।

डाळ कने तिसरा फळ

(लूका 6:43-45)

33 “जे डाळा जो खरा बोलो, तां तिसरे फळा जो बी खरा बोला, कने बुरे डाला जो बुरा ई फळ मिलां; कांभई डाळ अपणे फळा ते ई जाणया जां। 34 अरे ओ सर्पा रे बच्चयो, तां जे तुहें बुरे तां खरियां गल्लां कियां बोली सक्कां ये? कांभई सैं जे मना च भरोईरा, सैं ई मुंहां ते निकळां। 35 इक खरे माहुये रे मना च सैं जे अच्छाईयां कड्डी हुई रिया हुआं ईयां तिस च ते सैं खरियां गल्लां कड्डां, कने इक बुरा माहु सैं बुराई जे तिसरे मना ची तिसचा ते सैं बुरियां गल्लां कड्डां। 36 कने हऊँ तुहां लोकां जो दरसां भई न्याय रे दिन हर इक माहुये जो अपणिया बोली रिया गल्ला रा हिसाब-कताब देणे पौणा। 37 कांभई तु अपणिया गलाई रिया गल्ला रे कारण निर्दोष, कने तेरियां ई गल्लां रे कारण दोषी बणाया जाणा।”

स्वर्गा रे नशाणा री मंग

(मरकुस 8:11,12; लूका 11:29-32)

38 इसा गल्ला पर किछ शास्त्रियें कने फरीसियें तिसने बोलया, “गुरु जी, अहें तुहांजो चमत्कारा रे काम्म करदे देखणा चांये।” 39 तिने तिन्हांजो जबाब देन्दे हुये बोलया, “इस जुगा रे बुरे कने दुराचारी लोक ई चमत्कार करने औळे चिन्ह देखण चांये, पर योना भविष्यवक्ते रे चिन्हा जो छडीने तिन्हांजो होर कोई चिन्ह नीं दित्या जाणा। 40 कने तियां जे योना तिन्न दिन कने तिन्न रात तिस समुद्री जीबा रे पेड्डा च रैया था, तियां ई माहुये रे पुत्रा बी तिन्न दिन तिन्न रात जमीना रे अन्दर रैहणा। 41 न्याय रे दिन नीनवे रे निबासी अज किया इसा पीढिया रे लोकां सौंगी खडीरयां हुणा कने सैं दोषी बनाणे, कांभई नीनवे रे लोकें योना रा प्रचार सुणीने मन बदलया था; कने देखा, येथी सैं आ सैं जे योना ते बी बड्डा। 42 न्याय रे दिन दखण रिया राणिया इसा पीढिया रे लोकां

सौगी खदना कने तिसा सै दोषी बनाणे, कांभई सै जमीनां रे दूजे कोणे ते सुलैमान रा प्रचार सुणने आई थी; कने देखा, येथी सै आ सै जे सुलैमान ते बी बड्डा।

अधूरे सुधारा ते मुसीबत (लूका 11:24-26)

43 "ताहली जे कोई बुरी आत्मा किसी माहुये जो छड्डां ई, तां सै आराम पाणे रिया खोजा च सुक्की जमीन टोलदी रई, पर सै तिसाजो नीं मिलदी। 44 फेरी सै बोलां ई, तिस घरा जो जे हऊं छड्डीने आईरी, मांह फेरी भीं ते तिस घरो चली जाणा। ताहली जे सै हटिने तिस घरा च मुडीने आई जाई तां तिससो हुण तक खाली, साफ सुथरा कने सजीरा-सजाईरा पाई। 45 फेरी सै मुडीने ओवांई कने अप्पु कने होर सात्त बुरी आत्मां जो लेईने ओवां ई सै जे तिसाते बी बुरियां हुआं ईयां, फेरी सै सब आईने तिन्ही रैहणे लगां ईयां, कने तिस माहुये री हालत पैहले ते बी जादा खस्ती हुई जाई। इस जुगा रे लोकां री हालत बी येदी हुणी।"

यीशुये री मौ कने भाई (मरकुस 3:31-35; लूका 8:19-21)

46 ताहली जे सै लोकां ने गल्ल ई करीरां था, तिस वगत तिसरी माता कने भाई-बन्धु आईने बाहर खडीये कने तिसने गल्ल करना चांह थे। 47 किन्हिये यीशुये ने बोलया, "सुण तेरी माता कने तेरे भाई-बन्धु बाहर खडीरे कने तूहने गल्ल करना चांये।" 48 जबाबा च यीशुये गल्ल करने औलयां ने बोलया, "कुण ई मेरी माता? कने कुण ये मेरे भाई-बन्धु?" 49 फेरी तिने हत्था ने अपणयां चेलयां खौ इशारा करदे हुये बोलया, "देखा, ये वे मेरी माता कने मेरे भाई-बन्धु। 50 कांभई सै जे कोई स्वर्गा च रैहणे औले मेरे पिते रिया इच्छा पर चलां, सै ई मेरा भाई-बन्धु, कने मेरी बैहण, कने मेरी माता ये।"

ब्यू बाहणे औळे रा मरकुस द्रष्टान्त (मरकुस 4:1-9; लूका 8:4-8)

13 तिस ई दिन यीशु तिस घरा जो छड्डीने झीला रे कन्डे चलीया कने उपदेश देणे बैठया। 2 मते सारे लोक तिसरे चहुं पासयां कडे हुईये इस खातर सै जाईने इक्की किशिया पर बैठीया कने सारे लोक कनारे खडीरे रैये। 3 कने तिने तिन्हांजो द्रष्टान्तां च कई सारी गल्लां गलाईयां: तिने बोलया भई "इक बाहणे औळा ब्यू बाहणे निकळया। 4 बाहन्डे वगत किछ ब्यू बाटा रे कन्डे पैये कने पंछिये आईने सै चुगी ले। 5 किछ ब्यू सपडां पर पैये, तिन्ही तिन्हांजो मती मिट्टी नीं मिली कने डुगी मिट्टी न मिलणे रिया वजह ने सै इकदम उगीने बाहर निकलिये। 6 पर ताहली जे सूरज निकलया तां सै डाळु धुपे ने फुखीये, कने सै जादा जडां नां पकडने ते सुक्कीये। 7 किछ ब्यू झाडियां च पैये कने झाडिये बड्डी हुईने सै डाळु दब्बी ले। 8 पर थोडे ब्यू सै जे खरिया जमीना पर पैईरे थे, खरी फसल देणे लगे, फसल जितणी जे बाहीरी थी, तिसते कोई तीह गुणा, साठ गुणा, कने सौ गुणा ते बी जादा हुई। 9 सै जे सुणी सक्कां सै सुणी लो।"

द्रष्टान्तां रा मकशद (मरकुस 4:10-12; लूका 8:9,10)

10 फेरी चेलयां तिसले आईने तिसते पुछया, "तू लोकां ने द्रष्टान्तां च कजो गल्लां करां?" 11 तिने जबाब दित्या, "स्वर्ग राजा रे भेदां जो जाणने रा अधिकार सिर्फ तुहांजो दित्तीरा, पर इन्हांजो नी। 12 कांभई तिसले जे थोडा बौहत आ, तिससो होर बी दित्या जाणा, कने तिन्हांले जे बौहत ई जादा हुई जाणा; पर तिसले जे कुछ बी नीं आ, तिसते सै किछ जे तिसले हाया, सै बी लई लया जाणा। 13 हऊं तिन्हांने द्रष्टान्तां च इस खातर गल्लां करां भई सै देखां त हाये पर हकीकत च तिन्हांजो किछ सुझदा नीं आ, सै सुणां त हाये पर हकीकत च न सै सुणां ये न समझां ये। 14 तिन्हांरे बारे च यशयाहा री ये भविष्यवाणी खरी उतरी: 'तुहें सुणने कने सुणदे ई रैहन्ने, पर तुहां रिया समझा च कुछ नीं औणा; तुहां बस देखदयां ई रैहणा, पर तुहांजो किछ बी नीं

सुझणा। 15 कांभई इन्हां लोकां रे मन मोटे हुईगरे ये कन्नां ते उच्चा सुणां ये कने इन्हें अपणियां अक्खीं बन्द करी लरियां; ताकि सै अपणियां अक्खीं ते किछ बी नीं देखखो, कने सै कन्नां ते किछ सुणी नीं पाओ या भई अपणे मना ते कदीं नीं समझो, कने कदीं मेरखौ मुडीने आओ, कने हऊं तिन्हांजो ठीक करूं।' 16 पर धन्न भाग तुहां रियां अक्खीं कने तुहांरे कन्ना जो कांभई सै देखखी कने सुणी सक्कां ये। 17 हऊं तुहांने सच्च बोलां भई कई सारे भविष्यवक्तयां कने धर्मी लोक तिन्हां गल्लां जो जे देखणां चांह थे तिन्हांजो तुहें देखीरां ये, सै तिन्हांजो नीं देखखी सक्के; कने तिन्हां गल्लां जो जे सै सुणना चांह थे, तिन्हांजो तुहें सुणीरां ये, सै इन्हांजो नीं सुणी सक्के।

ब्यू बाहणे औळे द्रष्टान्ता री व्याख्या (मरकुस 4:13-20; लूका 8:11-15)

18 "हुण तुहें ब्यू बाहणे औले रे द्रष्टान्ता रा मतलब सुणा: 19 सै ब्यू सै जे बाटा रे कन्डे पैईरा था इसरा मतलब ये आ भई ताहली जे कोई स्वर्गा रे राजा री खुशखबरी सुणीने नीं समझदा, तिसरे मना च सै जे किछ बाहीरा था, तिससो शैतान आईने चोरी लेआं। 20 सपडां पर पैईरे ब्यूआं रा मतलब ये आ, सै माहु जे बचन सुणीने इकदम खुशिया ने ग्रहण करी बी लेआं। 21 पर अपणे अन्दर तिसरियां जडां नीं जमणे देन्दा तिसरिया वजह ने सै थोडियां ई देरा खातर बणीरा रैयां, कने ताहली जे बचना रिया वजह ने तिस पर दुःख कने तकलीपां औइयां तां सै इकदम ठोकर खां। 22 झाडियां च पैईरे ब्यूआ रा, ये मतलब आ, भई सै माहु बचन त सुणां ये, पर संसारा री चिन्ता कने पैसयां रा लालच परमेशरा रे बचना जो दब्बी लेईयां, कने सै माहु कामयाब नीं हुन्दा। 23 खरिया जमीना पर पैईरे ब्यूआं रा ये मतलब आ, भई सै माहु जे बचना जो सुणीने समझां, सै कामयाब हुआं; सै कामयाबी बाहीरे ब्यूआ ते तीह गुणा, साठ गुणा कने सौ गुणा तक हुआं ई।"

जंगली दाणे रा द्रष्टान्त

24 यीशुये तिन्हांजो इक होर द्रष्टान्त दित्या: "स्वर्गा रा राज तिस माहुये साई आ तिने जे अपणे खेतां च खरे बीज बाहीरे थे। 25 पर लोक ताहली जे सुत्तीरे थे तां तिस माहुये रा दुश्मण आया कने कणका च जंगली ब्यू बाहीने चलीया। 26 ताहली जे कुम्मल निकले कने तिन्हा पर सिन्नु लगे तां जंगली दाणे रे डाळु बी दिखणे लगे। 27 फेरी नोकर खेता रे मालका ले आईने बोलणे लगे, 'स्वामी जी, क्या तुहें अपणे खेतां च खरा ब्यू नीं बाहीरा था? फेरी जंगली दाणयां रे डाळु इसच कित्ते आये?' 28 तिने तिन्हांने बोलया, 'ये किसी दुश्मणा रा काम्म आ।' दासं तिसने बोलया, 'क्या तूह चांह भई अहें जाईने तिन्हांजो पट्टीने ली आईये?' 29 तिने बोलया, 'नां, येदा नीं ओ भई तुहें जंगली दाणयां रे डाळुआं जो कठेरदे वगत तिन्हा सौगी कणका रे डाळुआं जो पट्टीने ली आओ। 30 फसला रिया कटाईया तक इन्हा दूई जो सौगी-सौगी बधणे देवा, कने कटाईया रे वगत हऊं कटणे औळयां न गलांगा भई पैहले जंगली दाणयां रे डाळुआं रे पुल्ले बन्हीने तिन्हांजो फुकी देवा, कने कणका जो कठेरीने मेरे पेडूये च पाई देवा।"

राई रे दाणे रा द्रष्टान्त

(मरकुस 4:30-32; लूका 13:18,19)

31 यीशुये तिन्हांजो इक होर द्रष्टान्त दित्या: "स्वर्गा रा राज राईया रे छोटे जे दाणे रे बराबर आ, तिसजो किसी माहुये लेईने अपणे खेतां च बाहीत्या। 32 सै सारयां बीजां च सर्बीते छोटा त हुआ पर ताहली जे बधां तां सारे साग पत्तयां ते बड्डा हुआं; कने येदा डाळ बणी जां भई समाणा रे पंछी आईने तिसरियां डाळियां पर रैहणे लगां ये।"

मलेडे रा द्रष्टान्त (लूका 13:20, 21)

33 तिने इक होर द्रष्टान्त तिन्हांजो सणवाया: "स्वर्गा रा राज मलेडे साई आ तिसजो किसी जनाने बारा किलो आटे च मलाया कने तदुआं तक सै रखी रखया तदुआं तक जे सै सारे रा सारा अट्टा मलेडा नीं बणिया।"

द्रष्टान्तां रा इस्तेमाल (मरकुस 4:33,34)

34 ये सारियां गल्लां यीशुये लोकां जो द्रष्टान्तां च बोली, कने सैं बगैर द्रष्टान्ता ते तिन्हाने कुछ नीं बोलदा था, 35 भई सैं बचन जे भविष्यवक्ते रे जरिये गलाईरा था, सैं पूरा ओ: "मान्ज द्रष्टान्तां रे जरिये अपना मुँह खोलणा: सृष्टिया रे शुरु ते सैं गल्लां जे छुपी रियां रैइयां हऊँ तिन्हांजो प्रगट करणे आईरा।"

जंगली ब्यूआ रे द्रष्टान्ता री ब्याख्या

36 फेरी यीशु लोकां रिया तिसा भीड़ा जो विदा करीने घरें आया कने तिसरयां चेलयां तिसले आईने बोलया, "खेता रे जंगली दाणे रा द्रष्टान्त अहांजो समझा।" 37 यीशुये तिन्हांजो जबाब दित्या, "खरे ब्यूआ जो बाह्णे औळा माह्ये रा पुत्र आ। 38 खेत संसार आ, खरे ब्यूआ रा मतलब आ स्वर्गा रे राजा रे लोक, कने जंगली बीजा रा मतलब आ शैताना री सन्तान। 39 तिने दुश्मणे जे जंगली बीज बाहे थे सैं शैतान आ; कने कटाईया रा वगत आ इस संसारा रा खात्मा कने कटाई करणे औळे स्वर्गदूत ये। 40 ठीक तियां ई तियां जे जंगली बीजां जो कट्टा करीने अग्गी च फुक्की दित्या जां तियां ई संसारा रे अन्त च हुणा। 41 माह्ये रे पुत्रा अपणे स्वर्गदूत भेजणे, कने तिन्हां तिसरे राजा ते सारे पापियां जो कने तिन्हजो सैं जे लोकां जो पाप करणे खातर मजबूर करां ये सैं कट्टे करणे, 42 कने बळदिया अग्गी च पाई देणे, तिन्थी सिर्फ दान्द कीरडणा कने रोणा-पिटणा हुणा। 43 फेरी धर्मीयां अपणे पिते रे राजा च सूरजा साई चमकणा। तिसरे जे कात्र ओ सैं सुणी लो।

छुपी रे खजाने रा द्रष्टान्त

44 स्वर्गा रा राज खेता च छिपीरे धना रे बराबर आ, सैं किसी माह्ये जो मिळया कने फेरी तिने सैं तिन्थी गड्डीतया, तिने खुशिया रे मारे जाईने अपना सब कुछ बेचीतया कने सैं खेत मुल्ले खरीदीलया।

अनमोल मोतिये रा द्रष्टान्त

45 "फेरी स्वर्गा रा राज इक येढे बपवारिये रे साई आ सैं जे खरे मोतियां री खोजा च था। 46 ताहली जे तिस्सो इक अनमोल मोती मिलया तां जाईने सैं जे किछ तिसले था तिने बेचीतया कने मोती खरीदीलया।

जाळा रा द्रष्टान्त

47 स्वर्गा रा राज मच्छी पकडने खातर नदिया च पाईरे इक्की जाळा साई आ, तिसच कई किस्मा री मच्छीयां पकडोईयां। 48 ताहली जे सैं जाळ पूरा भरीया तां मच्छी पकडने औळयां सैं कन्डे जो खिजीलया, कने बैठीने खरी-खरी मच्छीयां छान्तीने टोकरियां च भरी लीआं कने बेकार मच्छीयां सट्टी तियां। 49 सृष्टिया रे अन्त च येढा इ हुणा। 50 स्वर्गदूतां आईने पापी धर्मीयां च ते छान्तीने लग करणे, कने सैं अग्गी रे कुन्डा च पाई देणे। तिन्थी तिन्हां रोणा कने दान्द पीहणे।

पुराणी कने नौई शिक्षा रा महत्व

51 यीशुये अपनां चेलयां ते पुछया, "क्या तुहें इन्हां सारियां गल्लां जो समझे?" तिन्हे जबाब दित्या, "हां।" 52 यीशुये तिन्हांने बोलया, "देख्वा, इस खातर हर इक शस्त्री सैं जे परमेशरा रा चेला बणीरा, तिस घरा रे मुखिये साई आ सैं जे अपणे भण्डारा ते नौइयां कने पुराणियां चीजां जो बाहर कड्डां।"

नासरत च यीशुये रा अपमान (मरकुस 6:1-6; लूका 4:16-30)

53 यीशु ताहली जे ये सारे द्रष्टान्त बोलीने खत्म करी बैठया, फेरी सैं उत्थीते चलीया। 54 कने अपणे नगरा च आईने यहूदियां रे प्रार्थना घरा च तिन्हांजो येढा उपदेश देणे लगया भई सैं रेहान हुईने बोलणे लगे, "इस्सो येढी

सूझ-बूझ कने चमत्कारी शक्ति किति ते मिली? 55 क्या ये तिस लुहारा रा ई मुन्डु नीं आ? क्या इसरिया मौआ रा नौं मरीयम नीं आ? याकूब, यूसुफ, शमोन कने यहूदा इसरे इ त भाई ये न? 56 कने क्या इसरी सारी बैहणीं अहांने ई नीं रैहन्दीं? तां फेरी इस्सो ये सारा कुछ कितिते मिलया।?" 57 इस तरीके ने तिन्हे तिसरिया बजह ने ठोकर खादी, पर यीशुये तिन्हांने बोलया, "किसी भविष्यवक्ते रा अपणे गाँवां कने घरा जो छड्डीने सारे आदर करां ये।" 58 कने तिने तिन्थी तिन्हांरे अविश्वासा रिया वजह ने मते सारे चमत्कारा रे काम्म नीं किते।

यूहन्ना बपतिस्मा देणे औळे री हत्या (मरकुस 6:14-29; लूका 9:7-9)

14 तिस वगत गलील रे राजे हेरोदेशे ताहली जे यीशुये रे बारे च सुणया, 2 तां तिने अपणे सेबकां ने बोलया, "ये बपतिस्मा देणे औला यूहन्ना आ! सैं जे मूर्ईरयां ते ज्युन्दा हुईया, कने इस खातर ये शक्तियां तिसच काम्म करीरां इयां तिन्हां रिया बजह ते जे सैं इन्हां चमत्कारां जो करां। 3 ये सैं ई राजा हेरोदेश था तिने जे यूहन्ने जो पकडीने जेला च पाया था। ये काम्म तिने हेरोदियासा रे गलाणे ते कित्या था, सैं जे पैहले तिसरे भाईये फिलिप्पुसा री घराओळी थी। 4 कांभई यूहन्ने तिसने गलाया था भई भाईये रिया जनाना जो रखणा ठीक नीं आ। 5 इस खातर सैं तिस्सो मारना चांह था, पर हेरोदेश लोकां ते डरां था कांभई लोक यूहन्ने जो भविष्यवक्ता मन्नां थे। 6 पर ताहली जे यूहन्ने रा जन्म दिन आया, तां हेरोदियासा रिये कुडिये हेरोदेश कने तिसरे मेहमानां रे सामणे नच्चीने इतणा खुश कित्या। 7 भई इस पर तिने सगन्द खाईने बचन दित्या, "जो कुछ तु मंगगी, मांह तिजो देणा।" 8 तिसे अपणिया मौआ रे बैहकावे च आईने बोलया, "मिन्जो यूहन्ना वपतिस्मा देणे औळे रा सिर थालिया च रखीने दे।" 9 राजा बड़ा दुखी हुया, पर अपणी सगन्द कने अपणे मेहमानां रिया वजह ने तिने तिसारी मांग पूरी करणे रा हुक्म देईतया। 10 तिने जेला च यूहन्ने रा सिर बडणे खातर आदमी भेजे; 11 कने यूहन्ने रा सिर थालिया च पाईने लन्दया कने तिसा कुडिया जो देईतया, सैं तिस्सो अपणिया मौआ ले लेईगी। 12 फेरी यूहन्ने रे चले आये कने तिन्हे तिसरा धड लेईने दफनाईतया, कने फेरी तिन्हे आईने यीशुये जो दस्या।

पांज हजार माह्युआं जो ख्वाणा (मरकुस 6:30-44; लूका 9:10-17; यूहन्ना 6:1-14)

13 ताहली जे यीशुये इसरी चर्चा सुणी, तां सैं किश्तिया च किसी खाली जगह च कल्हा चलीया। लोक येढा सुणीने अपणे-अपणे शहर कने गाँवा ते निकलीने तिसरे पिछे चलीये। 14 यीशुये ताहली जे किश्तिया ते उतरीने कनारे आया तां तिने देखया मते सारे लोक कट्टे हुईरे, तिस्सो तिन्हां पर तरस आईया कने तिने तिन्हांरे बमार लोकां जो ठीक कित्या। 15 ताहली जे रात हुई तां तिसरे चेलयां तिसले आईने बोलया, "ये सुणसान जगह ई कने देर बी मती हुईगरी; इस खातर लोकां जो भेज ताकि ये गाँवा च जाईने अपणे खातर खाणे रा जुगाड करी लो।" 16 पर यीशुये तिन्हांजो बोलया, "इन्हांजो किति जाणे री जरूरत नीं। तुहें ई इन्हाजो खाणा देवा।" 17 तिन्हे तिसने बोलया, "अहांले पांज रोटियां कने दो मच्छीयां छड्डीने होर किछ नीं आ।" 18 यीशुये बोलया, "तिन्हांजो मेरले ली आवा।" 19 तिने लोकां जो बोलया भई तुहें घा पर बैठी जावा, फेरी तिने सैं पांज रोटियां कने दो मच्छीयां लेईने स्वर्गा खौ देखया कने रोटिया खातर परमेशरा रा धन्यावाद कित्या फेरी रोटिया रे टुकडु-टुकडु करीने सैं अपणे चेलयां ले लोकां जो बंडणे जो दिते। 20 ताहली जे सब खाईने रज्जीगे, तां चेलयां बचीरे टुकडयां ने बारा टोकरियां भरीने चक्कीयां। 21 जनानां कने बचयां जो छड्डीने तिसा जगह खाणे औळे तकरीबन पांज हजार माह्यु थे।

यीशुये रा पाणिये पर चलणा (मरकुस 6:45-52; यूहन्ना 6:15-21)

22 फेरी तिने अपणयां चेलयां जो छोडचा ने किशतिया च बैठणे जो बोलया भई तुहें माहते पैहले दरयावा पार चली जावा, तदुआं तक हऊँ इन्हांजो भेजा। 23 सैं लोकां जो भेज्जिने, प्रार्थना करने जो लग पहाडा पर चलीया; कने सन्झा जो सैं उत्थी कल्हा था। 24 ताहलुआं तक किशती कन्डे ते मीलों दूर जाई चुक्कीरी थी कने पाणिये रियां छालियां कशतिया जो पिछेखौ धकेलया रां थियां, कांभई सामणे ते बडी हवा चलीरी थी। 25 तडके कोई तिन कने छे बजे रे बिच यीशु नदिया रे पाणिये पर चलदा हुआ तिन्हांले आया। 26 तिसरे चेलयां ताहली जे तिस्सो नदिया पर चलदे हुये देखया, तां सैं डरदे हुये अप्पुं चियें गलाणे लगे, “ये त कोई भूत आ!” सैं डरा रे मारे चिखणे लगे। 27 फेरी यीशुये इकदम तिन्हांने गल्ल करदे हुये बोलया, “हौंसला रखा! ये हऊँ आ, डरदे मता!” 28 पतरसे तिस्सो जबाब दित्या, “प्रभु जी, जे तुहें ई हाये तां मिन्जो अप्पुं ले पाणिये पर चल्लीने औणे रा हुक्म देवा।” 29 तिने बोलया, “चल आईजा!” फेरी पतरस किशतिया च ते उतरिने यीशुये ले जाणे जो पाणिये पर चलणे लगया। 30 पर हवा जो देखीने डरीआ, कने ताहली जे डुबणे लगया तां चिखदे हुये बोलया, “प्रभु, मिन्जो बचा।” 31 यीशुये छोडचा ने हात्थ अगे करीने पकडील्या कने तिसने बोलया, “अरे कमजोर विश्वासी, तैं शक कजो कित्या?” 32 ताहली जे सैं किशतिया पर कोहीये, तां हवा रुकी ई। 33 किशतिया परा रे लोकें यीशुये जो प्रणाम कित्या कने बोलया, “तू सच्चीजो परमेशरा रा पुत्र आ।” 34. सैं नदी पार करीने गन्नेसरत च उतरे।

गनेसरत च रोगियां जो चंगा करना (मरकुस 6:53-56)

34 सैं नदी पार करीने गन्नेसरत च उतरे। 35 तिन्थी रे लोकें यीशु पछ्याणील्या कने अक्खा-बक्खा रे सारे लाकयां च ब्योरा देईत्या, भई सारे बमार लोकां जो तिसले ली आवा, 36 कने तिसने अरज करने लगे भई सैं तिन्हांजो अपणे कपडयां रिया कनारिया ने ई छोणे दे; कने जितणे जे तिसने छोये, सैं सब जणे ठीक हुईये।

परम्परा रे पालन रा स्वाल (मरकुस 7:1-13)

15 फेरी कुछ फरीसी कने यहूदी शास्त्री यरुशलैम ते यीशुये ले आये कने तिसते पुछया, 2 “तेरे चले अहारे पुरखयां रे रीति-स्वाजा रा पालन कां नीं करदे, सैं रोटी खाणे ते पैहले अपणे हात्थ कां नीं धोन्दे?” 3 तिने तिन्हांजो जबाब दित्या, “तुहें बी अपणे रीति-स्वाजां रिया वजह ने परमेशरा रे विधि-विधाना जो कजो तोडां ये? 4 कां भई परमेशरे त गलाया था, ‘तु अपणे माता-पिता री ईज्रत कर’, कने ‘सैं जे कोई अपणे माता-पिता रा अपमान करो, तिसजो जरूर मारी देणा चाहिन्दा’ 5 पर तुहें बोलां ये भई जे कोई अपणे पिते कने माता ने बोलो, ‘सैं जे कुछ तुहांजो माहते मिलणा चाहिन्दा था, सैं सब कुछ परमेशरा रे अर्पण करीतरा’, 6 तां सैं अपणे पिते री ईज्रत नीं करो, इस तरीके ने तुहें अपणे रीति-स्वाजा रे मुताबिक परमेशरा रे बचना रा इन्कार करां ये। 7 ओ ढोंगियो, तुहारे बारे च यशायाहे ठीक ई भविष्यवाणी किन्तरी: 8 ‘ये लोक सिर्फ अपणे मुहां ते त मेरा आदर करां ये, पर इन्हांरा मन माहते दूर हुआं। 9 कने ये बेकार च मेरी पूजा-अर्चना करां ये, कांभई ये माहुआं रे बणाई रे कनूना जो धर्मा रा उपदेश समझीने सरखां ये।

अशुद्ध करने औळियां गल्लां (मरकुस 7:14-23)

10 फेरी तिने लोकां जो अप्पुं ले सदया कने तिन्हांने बोलया, “सुणा कने समझा भई: 11 सैं जे मुंहा रे अन्दर जां, सैं माहुआं जो अपवित्र नीं करदा, पर तिसरे मुंहा ते निकलीरी गल्ल तिस्सो अपवित्र करां ई।” 12 फेरी यीशुये रे चले तिसले आये कने बोलया, “क्या तुहांजो पता भई फरीसियें तुहां रिया गल्लां रा बड़ा बुरा मन्त्रया?” 13 यीशुये जबाब दित्या, “हर डाळ सैं जे स्वर्ग च रैहणे

औळे मेरे पिते रिया तरफा ते नीं लगीरा, पट्टी दित्या जाणा। 14 इन्हांजो छड्डा; ये त अन्हयां रे अन्हे अगबे ये कने जे इक अन्हा दूजे अन्हे जो बाट दरस्सो, तां सैं दोनो ई गड्डे च पैई जाणे।” 15 येदा सुणीने पतरसे तिसने गलाया, “इस द्रष्टान्ता रा मतलब अहांजो समझावा।” 16 तिने बोलया, “क्या तुहें हुण बी नीं समझे? 17 क्या तुहें नीं जाणदे भई सैं जे कोई चीज किसी रे मुंहा च जाई, सैं तिसरे पेटा च पुजां ई, कने लैटरिना रे रस्ते निकली जाई? 18 पर सैं गल्ल जे माहुये रे मुंहा ते निकलीने बाहर औवां ई, सैं तिसरे मना ते निकलां ई, कने सैं गल्ल माहुये जो अपवित्र करां ई। 19 कांभई बुरियां गल्लां करना, खून करना, पराई जनाना पर नजर रखणा, बुरा बताव करना, चोरी करना, झूठी गवाई देणा कने किसी री निन्दा करना ये सारी बुराईयां मना तेई औवां ईयां। 20 येई सैं गल्लां ईयां सैं जे माहुये जो अपवित्र करां ईयां, पर बिणा हात्थ धोये रोटी खाणे ते कोई अपवित्र नीं हुन्दा।”

कनानी जातिया री जनाना रा बिस्वास (मरकुस 7:24-30)

21 फेरी यीशु तिसा जगह जो छड्डा ने सुर कने सैंदा जो चलीप्या। 22 तिन्थीरी इक कनानी जनाना आई कने रडाणे लगी, “प्रभु! दाऊद रे पुत्र, माह पर दया कर! मेरी कुडी भूतां-प्रेतां री सताईरी।” 23 पर तिने तिसाजो कोई जबाब नीं दित्या। तां तिसरे चले तिसले आये कने विनती करीने बोलणे लगे, “ये अहारे पिछे रडान्दी हुई आईरां ई इसाजो दूर भेजा।” 24 तिने जबाब दित्या, “इसाएल रे घराने रियां गवाच्छी रियां भेड्डां ते इलावा हऊँ किसी ले नीं भेज्जिरी।” 25 पर सैं जनाना आई, कने यीशुये रे पैरा पर मत्था टेक्कीने बोलणे लगी, “प्रभु जी, मेरी मदद करा।” 26 तिने जबाब दित्या, “बच्चयां री रोटी लेईने घरा रे कुत्तयां जो देणा ठीक नीं आ।” 27 तिने बोलया, “प्रभु जी ये त सच्च आ, पर कुत्ते बी तिन्हां टुकडयां जो खाये, सैं जे तिन्हारे मालका ते रोटी खान्दे वगत मुंहां ते टिरां ये।” 28 इसा गल्ला पर यीशुये तिसाजो जबाब दित्या, “हे औरत तेरा विश्वास बड़ा बड्डा। तु तेदा जे चाहीं, तेरे खातर तेदा ई हुई जाओ।” कने तिसारी कुडी तिसा ई घडिया ठीक हुईरी।

कई रोगियां जो चंगा करना

29 फेरी यीशु तिसा जगह ते चलीप्या कने गलील री झीला रे कन्डे पुज्गीया। सैं इक्की पहाडा पर कोहीने उपदेश देणे बेठीया। 30 फेरी लोकां रा दंगला रा दंगल तिसले आया। सैं अपणिया सौंगी लंगडयां, टुन्डयां, अन्हयां, गूंगयां कने होर कई सारे लोकां जो तिसले लेईने आये, कने तिन्हांजो तिसरे चरणां च सम्भालित्या, कने तिने सब्बीजो ठीक कित्या। 31 ताहली जे लोकें देखया भई गूंगे बोलणे लगीरे, कने टुन्डे ठीक हुईये, कने लंगडे चली फिरी करां ये कने अन्हे देखणे लगीये तां तिन्हांजो बडी रेहानी हुई, सैं इसाएल रे परमेशरा री बडयाई करने लगे।

चार हजार लोकां जो ख्वाणा (मरकुस 8:1-10)

32 फेरी यीशुये अपणे चले सट्टे कने बोलया, “मिन्जो इन्हा लोकां पर तरस आईरां, कांभई ये लोक तिन्नां दिनां ते इकलखत मेरे सौंगी ये कने इन्हांले खाणे जो बी कुछ नीं आ। हऊँ इन्हांजो भूक्खा नीं भेजणा चाँह कांभई हुई सकां किति ये रस्ते ई बेहोश हुईने नीं पैई जाओ।” 33 फेरी तिसरे चेलया गलाया, “इतणे जादा लोकां खातर इस बियाबाण जंगला च इतणी रोटी अहांजो कितिते मिलगी?” 34 यीशुये तिन्हांते पुछया, “तुहांले कितणी रोटीयां हाई?” तिन्हे बोलया, “सात रोटीयां कने थोडी जेई मच्छीयां।” 35 फेरी तिने लोकां जो जमीना पर बैठणे रा हुक्म दित्या। 36 कने तिन्हां सात रोटीयां कने मच्छीयां जो लेईने तिने परमेशरा रा धन्यावाद कित्या, कने रोटीयां तोडीने अपणे चेलयां जो देणे लगया, कने चले लोकां जो देणे लगे। 37 इस तरीके ने सारयां लोकें रज्जी ने रोटी खादी कने चेलयां बचीरे टुकडयां रे भरिरे सात टोकरु चक्के। 38 खाणे औळयां च जनानां कने बच्चयां जो छड्डा चार हजार माहु थे। 39 लोकां जो भेज्जिने यीशु किशतिया च बैठीने आईया कने मगदन प्रदेशा जो चलीया।

स्वर्गा रे नशाणा री मंग

(मरकुस 8:11-13; लूका 12:54-56)

16 फेरी फरीसी कने सदूकी यीशुये ले आये, सै तिस्सो परखणा चाँह थे इस खातर तिन्हे तिसते कोई चमत्कार करने जो गलाया ताकि पता लगी जाओ भई तिस्सो परमेशरा रा हुक्म मिलीरा। 2 तिने तिन्हांजो जबाब दित्या, “सूरज छपणे पर तुहें लोक बोलां ये, ‘अज मौसम ठीक रैहणा, कांभई अम्बर लाल आ’, 3 कने सूरज उगणे पर तुहें बोलां ये, ‘अज तूफान औणा, कांभई अम्बर धुँधला कने लाल आ।’ तुहें अम्बरा रे लक्षणां जो पढ़ना जाणां ये, पर अपने टैमा रे लक्षणां जो नीं पढ़ी सकदे? 4 इस जुगा रे बुरे कने दुराचारी लोक चिन्ह देखणा चाँह ये, पर तिन्हांजो सिवाय योना रे चिन्हा ते कोई होर दूजा चिन्ह नीं दस्सया जाणा।” फेरी सै तिन्हांजो छड्डीने चलीया।

फरीसियां कने सदूकियां री शिक्षा रा मलेड़ा

(मरकुस 8:14-21)

5 यीशुये रे चले नदिया रे पार चलीये, पर सै रोटी लौणा भूलीये। 6 इस पर यीशुये तिन्हाने बोलया, “देखा, फरीसियां कने सदूकियां रे मलेड़े ते चौकने रौआ।” 7 सै अप्पू चीये सोच-बचार करदे हुये गलाणे लगे, “हुई सकां तिने ये गल्ल इस खातर बोली कांभई अहें रोटी सौगी नीं लन्दी।” 8 यीशु जाणां था, भई सै क्या सोचीरां ये, “अरे कमजोर विश्वासियो, तुहें अप्पू चीये कजो सोचीरां ये भई अहांले रोटी नीं? 9 क्या हल्लियें तक नीं समझे? क्या तुहांजो पंज हजार लोकां खातर पंज रोटीयां आद नीं, कने ये बी आद नीं आ भई कितणियां टोकरियां भरीने तुहें चक्कीयां थी? 10 कने क्या तुहांजो चऊँ हजार लोकां रे खातर सात रोटीयां, कने फेरी कितणी टोकरियां भरीने तुहें चक्की थी आद नींआ? 11 तुहें कां नीं समझे भई मैं तुहांने रोटीयां रे बारे च नीं गलाया, पर मैं त तुहांजो फरीसियां कने सदूकियां रे मलेड़े ते चौकना रैहणे जो गलाया था।” 12 फेरी सै समझीये भई रोटीया रे मलेड़े ते नीं, पर तिसरा मतलब फरीसियां कने सदूकियां री शिक्षां ते बचीने रैहणे ते था।

पतरसा रा यीशुये जो मसीह स्वीकारना

(मरकुस 8:27-30; लूका 9:18-21)

13 जिस बगत यीशु कैसरिया फिलिप्पी रे प्रदेशा च आया, तां तिने अपने चेलयां ते पूछया, “लोक माह्ये रे पुत्रा जो क्या बोलां ये?” 14 तिन्हे बोलया, “कुछ लोक बोलां ये भई तू बपतिस्मा देणे औळा यूहन्ना आ, कने कुछ बोलां ये भई तू एलिय्याह कने कुछ लोक बोलां ये भई तू यिर्मयाह या भविष्यवक्तां च ते कोई इक आ।” 15 यीशुये तिन्हाने बोलया, “होर मेरे बारे च तुहांरा क्या बचार आ भई हऊँ कुण आ?” 16 शमौन पतरसे जबाब दित्या, “तू ज्युन्दे परमेशरा रा पुत्र मसीह आ।” 17 यीशुये तिस्सो जबाब दित्या, योना रे पुत्र, शमौन, धन्न-भाग तिजो: कांभई ये गल्ल किसी माह्ये नीं पर स्वर्गा च रैहणे औले मेरे पिते, तूह पर जाहिर किति। 18 हऊँ बोलां भई तू पतरस आ, कने इसा ई चट्टाना पर मांह अपनी कलीशिया बनाणी, कने तिस पर मौती रा कोई जोर नीं चलणा। 19 हऊँ तिजो स्वर्गा रे राजा री चाबियां देई करां: ताकि जो किछ तू जमीना पर बन्हो, सै परमेशरा रे दरवाजे स्वर्गा च बन्होई जाओ; कने जो किछ तू जमीना पर खोलणा, सै स्वर्गा च परमेशरा रे दरवाजे च खुलणा।” 20 तिने अपने चेलयां जो शख्त हुक्म दित्या भई किसने बी नीं बोलणा भई हऊँ मसीह आ।

अपणिया मौती रे बारे च यीशुये री भविष्यबाणी

(मरकुस 8:31-33; लूका 9:22)

21 तिस वगत यीशु अपने चेलयां जो दसणे लगया, “मिन्जो यरुशलेम जाणा चाहिन्दा कने तित्थी बजुर्ग यहूदी अगबेयां, कने मुखिये याजकां कने शास्त्रीयां रे हत्थां ते बड़ा दुःख सहूँ; कने मारया जाऊँ; फेरी तिज्जे दिन मूर्ईरयां चा ते ज्युन्दा हुई जाऊँ।” 22 फेरी पतरस तिस्सो लग करीने कनारे नेईया कने गुस्सा हुईने बोलणे लगया, “प्रभु जी, परमेशर नीं करो! तेरे सौगी कदीं येदा ओ।” 23 यीशु तिसरी तरफ मुड़या कने बोलया, “पतरस, मेरे

सामणे ते हट! अरे दुष्ट, तू मेरे खातर इक अड़चण ई: कां भई तू परमेशरा रियां गल्लां पर नीं, पर लोकां रियां गल्लां पर मन लगा।”

यीशुये रे पीछे चलणे रा मतलब

(मरकुस 8:34-9:1; लूका 9:23:27)

24 फेरी यीशुये अपने चेलयां ने बोलया, “जे कोई मेरे पीछे औणा चाँह, तां सै अप्पू जो भुलीने अपना क्रूस खुद चक्रो कने मेरे पीछे आई जाओ। 25 कांभई सै जे कोई अपनी जिन्दगिया जो बचाणा चाहो, तिस अपनी जिन्दगी गवाणी; कने तिस किसी जे मेरे खातर अपनी जिन्दगी गवाणी, तिस अपने प्राण बचाणे। 26 जे कोई अपनी जिन्दगी गवाईने सारे संसारा जो बी पाई लेंगा, तां तिसजो क्या फायदा हुणा? या अपणिया जिन्दगिया जो भी पाणे खातर कोई भला क्या देई सका? 27 माह्ये रा पुत्र अपने स्वर्गदूतां सौगी अपने पिते रिया महिमा च औणे औळा, कने तिस वगत, ‘तिस हर किसी जो तिसरे कम्मां रे मुताबिक फल देणा।’ 28 हऊँ तुहांने बोलां भई सै जे येथी खद्वीरे, तिन्हा च किछ येदे भई सै तदुआं तक जे माह्ये रे पुत्रा जो तिसरे राजा च आऊन्दे हुये नीं देखी लेंगे, तदुआं तक मौती जो कदीं नीं देखगा।”

यीशुये रा रूप बदलना

(मरकुस 9:2-13; लूका 9:28-36)

17 छेआं दिनां ते बाद यीशुये पतरस, याकूब कने तिसरे भाईये यूहन्ने जो सौगी लेआ, कने तिन्हांजो सुनसाण जगह च किति उच्ये पहाड़ा पर लेईया। 2 तित्थी तिन्हारे सामणे तिसरे चेहरे रा रंग-रूप बदलीआ, तिसरा मुँह सूरजा साई चमकया कने तिसरे कपड़े ईयां चमकणे लगे तियां जे लोय चमकां ई। 3 फेरी इकदम मूसा कने एलियाह तिन्हा रे सौगी गल्ल बात करदे हुये तिन्हांजो दिस्से।

4 येदा देखीने पतरसे यीशुये ने गलाया, “प्रभु जी, अहांरा इथी रैहणा ठीक आ। जे तू चाहो तां हऊँ येथी तिन मण्डप बनाई दूँ; इक तेरे खातर, इक मूसा रे खतर, कने इक एलिय्याह रे खातर।” 5 सै हल्लियें गलाई करां था भई इक चमकदे हुये बदले सै ढक्कीले, कने बदला च ते अकाशवाणी हुई: भई “ये मेरा प्यारा पुत्र आ, तिसते जे हऊँ बड़ा खुश आ: इसरी सुणा।” 6 चले येदा सुणीने मुँहा रे भार पैईये कने बड़े भरी डरीये। 7 फेरी यीशु तिन्हांले गया कने तिन्हांने छोईने गलाया, “उरदे मता, खद्वी जवा।” 8 ताहली जे तिन्हें गासखा देखया तां तित्थी सिर्फ तिन्हांजो यीशुये ते सिवाय होर कोई नीं सुझया।

9 जिस वगत सै पहाड़ा परा ते उतरीरां थे तां यीशुये तिन्हांजो ये हुक्म दित्या, “तदुआ तक जे माह्ये रा पुत्र मूर्ईरयां च ते ज्युन्दा नीं हुई जाओ, तदुआं तक जो किछ तुहें देखया किसी ने देखां बोलदे।” 10 फेरी तिसरे चेलयां तिसते पूछया, “फेरी यहूदी शस्त्री कजो बोलां ये भई एलिय्याह रा पैहले औणा जरूरी आ?” 11 तिने जबाब दित्या, “एलिय्येह औणे लगीरा, तिस हर इक चीज ठीक करी देणी। 12 पर हऊँ तुहांने बोलां भई एलिय्याह आई पुज्जीरा, पर लोके तिस्सो नीं पछयाणया; कने तिस सौगी तेदा जे चाहया तेदा कित्या। तिन्हारे हत्थां माह्ये रे पुत्रा जो बी तियां ई दुख सैहणे पोणे।” 13 फेरी तिसरे चले समझे भई तिने अहांने यूहन्ना बपतिस्मा देणे औळे रे बारे च बोलया था।

बुरी आत्मा रे सताईरे मुन्डुये जो चंगा करना

(मरकुस 9:14-29; लूका 9:37-43)

14 ताहली जे यीशु मुडीने लोकां च आया, तां इक माह्ये तिसले आया, कने तिसरे पैरां पर मत्था टेकीने गलाणे लगया, 15 “प्रभु जी, मेरे मुन्डुये पर दया कर! तिस्सो मिरगिया रा दौरा पौआं, कने सै बड़ा भरी तड़फां; कने कई बार अग्गी च कने कई बार पाणीये च रुढ़ीया। 16 मैं इसजो तेरे चेलयां ले लन्दया था, पर सै इसजो ठीक नीं करी सके।” 17 यीशुये जबाब दित्या, “अरे अडीमूहर अविश्वासी लोको, मांह कदुआं तक तुहां रिया सौगी रैहणा? कदुआं तक हऊँ ईयां ई तुहांरी सैहन्दा रैहन्ना? तिस्सो येथी मेरले ली आवा।” 18 फेरी यीशुये बुरी आत्मा जो थिड़कया, कने सै तिस ते बाहर निकलीगी; कने सै मुन्डु तिस ई घड़ी ठीक हुईया।

19 फेरी तिसरे चेलयां कल्हिया जेईया जाईने यीशुये ते पूछ्या, “अहें इसा बुरी आत्मा जो कां नीं कड्डी सक्के?” 20 यीशुये तिन्हांजो दस्सया, “कांभई तुहां च विश्वासा री कमी, हऊं तुहांने सच्च बोलां, जे तुहां च औरिया रे दाणे जितणा बी विश्वास हुन्दा तां तुहें इस पहाडा ने बोली सक्कां ये ‘येथी ते खिसकीने ओथखा चली जा’, कने सैं चली जान्दा; कने कोई गल्ल तुहारे खातर मुश्कल नीं हुन्दी। 21 पर येदी बुरी आत्मार्ये सिर्फ प्रार्थना कने उपवास करने ते निकलां ईयां।”

अपणिया मौती रे बारे यीशुये री भीं ते भविष्यवाणी

(मरकुस 9:30-32; लूका 9:43-45)

22 ताहली जे सैं गलील च थे, तां यीशुये तिन्हांने गलाया, “माह्नुये रा पुत्र माहणुआं रे हत्थों पकड़वाया जाणे औळा; 23 सैं तिन्हां मारी देणा, कने तिज्जे दिन तिस भीं ते ज्यून्दे हुई जाणा।” इसा गला पर तिसरे चले बडे दवास हुईये।

मन्दरा रा कर

24 जिस वगत यीशु कने तिसरे चले कफरनहूम च आये, तां मन्दरा रा टैक्स बसूलणे औळे पतरसा ले आये कने पूछ्या, “क्या तुहांरा गुरु मन्दरा रा टैक्स नीं देन्दा?” 25 पतरसे जबाब दित्या, “हां सैं देआं।” ताहली जे सैं घरें आया, तां यीशुये तिसरे पुछणे ते पैहले ई तिसने बोलया, “हे शमौन, तू क्या सोचां? पृथ्वीया रे राजे टैक्स किसते लें? खुद अपने बच्चयां ते या पराये बच्चयां ते?” 26 पतरसे तिसने बोलया, “परायां ते।” यीशुये तिसने बोलया, “तां पुत्र बच्चीया। 27 पर अहां रिया बजह ने सैं लोक नराज नीं हो इस खातर झीला पर जा कने अपणा कांटा पाणिये च पा कने फेरी सैं जे पैहली मच्छी निकलो, तिसारा मुँह खोलयां तिज्जे इक सिक्का मिलणा, तिस सिक्के जो लेईने मेरे कने अपणे खातर तिन्हांजो देई देआं।”

स्वर्गा रे राजा च बड्डा कुण आ

(मरकुस 9:33-37; लूका 9:46-48)

18 तिस घडी यीशुये रे चेलयां तिसले आईने पूछ्या, “स्वर्गा रे राजा च सब्बीं ते बड्डा कुण आ?” 2 फेरी यीशुये इक बच्चे जो अप्पू ले सदया कने तिस्सो तिन्हारे सामणे खरेडीने बोलया, 3 “हऊं तुहांने सच्च बोलां भई तदुआं तक जे तुहें लोक नीं बदलगे कने बच्चयां साईं नीं बणी जांगे, तुहें स्वर्गा रे राजा च दाखल नीं हुई सकदे। 4 इस खातर सैं जे कोई अप्पू जो इस बच्चे साईं छोटा बणाई लेआ, सैं स्वर्गा रे राजा च सब्बीं ते बड्डा हुणा।” 5 कने सैं जे कोई मेरे नौवा ते इक येदे बालका जो ग्रहण करां सैं मिन्जो ग्रहण करां।

पाप करने रे इम्तेहान

(मरकुस 9:42-48; लूका 17:1,2)

6 “पर सैं जे मांह पर विश्वास करने औळे मेरे किसी येदे छोटे ते छोटे चले रे रस्ते च अडचण पैदा करां, तिसरे खातर ये अच्छा हुन्दा भई तिसरे गला च इक चक्कीया रा बट्ट लटकाईने, तिस्सो बडे डुगे समुद्रा च डुबोई देणा चाहिन्दा। 7 अडचणां रिया वजह ने मिन्जो संसारा रे लोकां खातर दुख आ, कने अडचणां त औणियां ई हाईयां पर दुख त मिन्जो तिस पर आ तिने जे ये अडचणां पैदा कित्तियां। 8 इस खातर “जे तेरा हात्थ या तेरा पैर तेरे खातर अडचण बणो, तां तिस्सो बड्डीने सट्टी दे, कांभई स्वर्गा रे अनन्त जीवना च बिणा हत्था पैरा ते दाखल हुणा तेरे खातर जादा बढीया; बजाये इसरे भई दुई हत्थां कने दुई पैरां समेत तिज्जे नरका री कदीं नीं बुझणे औली अग्गी च पाया जाओ। 9 जे तेरी आकख तेरे खातर अडचण बणो, तां तिस्सा जो कड्डीने बाहर सट्टी दे, कांभई स्वर्गा रे अनन्त जीवना च काणा हुईने तेरा दाखल हुणा जादा बडिया; बजाये इसरे भई दुई अक्खीं समेत तिज्जे नरका रिया अग्गी च पाई दित्या जाओ।

गवाच्छी रिया भेड्डा रा द्रष्टान्त

(लूका 15:3-7)

10 “देकरा, तुहें मेरे इन्हां छोटे ते छोटे विश्वासियां च ते किसी जो बी घटिया नीं समझयां; कांभई हऊं तुहांजो दस्सां भई तिन्हारी हिफाजत करने औले स्वर्गादूतां री पहुँच स्वर्गा च मेरे पिते ले सदा बणीरी रई। 11 कांभई माह्नुये रा पुत्र गवाच्छी रियां जो बचाणे आईरा। 12 “दस्स तू क्या सोचां? जे किसी माह्नुये ले सौं भेड्डां ओ, कने तिन्हां च ते इक गवाच्छी जाओ, तां क्या तिस नड्डीनुये भेड्डां जो जंगला ची छड्डीने, तिसा गवाच्छी रिया इक्की भेड्डा जो टोलणे नीं जाणा? 13 कने ताहली जे सैं तिस्सो मिली जाणी, हऊं तुहांने सच्च बोलां भई तिन्हां नड्डीनुये भेड्डां रे खातर सैं जे गवाच्छी रियां नीं थी, इतणी खुशी नीं मनाणी जितणी जे तिस इसा गवाच्छी रिया भेड्डा रे मिलणे पर मनाणी। 14 तुहांरा पिता बी नीं चाँहन्दा सैं जे स्वर्गा चा भई इयाई मेरे छोटे ते छोटे विश्वासिये च ते इक बी गवाच्छो।

अपराधियां ने बर्ताव

15 “जे तेरा भाई तेरने कोई बुरा बर्ताव करो, तां तू जा तिसने कल्हे ने गल्ल बात कर कने तिस्सो समझा; जे सैं तेरी सुणीलो तां तैं अपणे भाईये जो पाईल्या। 16 पर जे सैं तेरी नी सुणो, तां इक या दो माह्नु अपणिया सौगी जो लेईजा, ताकि ‘हर गला रियां तिन गवाहियां हुई जाओ।’ 17 जे सैं तिन्हांरी बी नीं सुणो, तां कलीशिया च दस्सी दो, पर जे सैं कलीशिया री बी नीं मन्नो तां तू तिसने इयां बर्ताव कर तियां जे सैं कोई पापी या कर बसुलणे औळा ओ।

रोकणा कने मोका देणा

18 “हऊं तुहांने सच्च बोलां, सैं जे किछ तुहें इसा धरितया पर बन्हगे, सैं स्वर्गा च बज्जी जाणा कने जो किछ तुहें धरतिया पर खोलगे, सैं स्वर्गा च खुली जाणा। 19 हऊं तिज्जे ये बी दस्सां भई इसा धरतिया पर जे तुहां च ते कोई दो जणे इक मन हुईने मेरे पिते ते किछ मंगगे, तां तिस तुहारे खातर सैं पूरा करना। 20 कांभई तिन्ही जे दो या तिन जणे मेरे नौवा ते कहे हुआं ये, तिन्ही हऊं तिन्हारे सौगी हुआं।”

बेदर सेबका रा द्रष्टान्त

21 फेरी पतरस यीशुये ले गया कने बोलया, “प्रभु, जे मेरा भाई अपराध करदा रओ, तां हऊं कितणी बार तिस्सो माफ करू? जे सैं सात बार अपराध करो तां बी?” 22 यीशुये बोलया, “न सिर्फ सात बार पर हऊं तिज्जे दस्सां भई तिज्जे सैं सत्तर बार माफ करना चाहिन्दा।” 23 “इस खातर स्वर्गा रे राजा री तुलना तिस राजे ने करी सक्कां ये तिने जे अपणे दासां ने हिसाब-कताब चुकता करने री सोची थी। 24 ताहली जे तिने हिसाब लेणा शुरु कित्या तां तिसरे सामणे इक येदा माह्नु खरेडया तिस पर जे दस हजार बोरियां रा कर्जा था। 25 पर तिसले इतणा सारा कर्जा चुकाणे रा कोई साधन नीं था, तां तिसरे मालके बोलया, ‘ये कने इसरी घराओली, कने इसरे बाल-बच्चे कने जो किछ इसरा आ सैं सब कुछ बेचीने, इसरा कर्जा चुकाई दित्या जाओ।’ 26 फेरी तिसरा दास तिसरे पैरा च पैईने गिडगिडाणे लगया, ‘मालका थोडी जेई तस्सल्ली रखा, मांह तेरा इक-इक पैसा भरी देणा।’ 27 इस पर मालका जो तिस दासा पर दया आईगी, तिने तिसरा कर्जा माफ करीने सैं छडीत्या।

28 “पर ताहली जे सैं दास बाहर निकळया, तां तिस्सो तिसरे साथी दासां च ते इक दास मिलया सैं तिसरे सौं दिनारां रा कर्जदार था; तिने सैं गळे ते पकडया कने तिसरा गला दबान्दे हुये बोलया, ‘जितणा कर्ज तू मेरा देणा मिन्जो वापस दे।’ 29 इस पर तिसरा साथी दास तिसरे पैरां पर पैईया कने विनती करने लगया, ‘तस्सल्ली रख, मांह तेरा इक-इक पैसा देई देणा।’ 30 पर सैं नीं मन्नया, इतणा ई नीं तिने तिस वगत तक सैं जेला च भेजीत्या तदुआं तक जे सैं तिसरा कर्ज बापस नीं करी दो। 31 तिसरे साथी दोस्त इसा सारिया घटना जो देखीने बडे दुखी हुये, कने सैं जे किछ हुया था तिसरा सारा हाल अपणे मालका जो जाईने दस्सीत्या। 32 फेरी तिसरे मालके तिस्सो सदया कने बोलया, ‘ओ नीच दास, मैं तेरा सैं सारा कर्ज माफ करीत्या,

कांभई तै माहते दया री भीख मंगी थी।³³ क्या तिजो बी अपने साथी दास्सा पर दया नीं दसणी चाहिन्दी थी तियां जे मैं तू पर दया कित्ति? ³⁴ कने तिसरे मालके गुस्से च आईने तिस्सो सजा देणे औळे रे हत्था च सौंपीत्या, भई तदुआं तक जे सै सारा कर्जा बापस नीं करी दो, तदुआं तक तिन्हारे हत्थां च रओ।

³⁵ इस तरीके ने जे तुहां च ते हर इक अपने भाईये जो मना ते माफ नीं करगा, तां मेरा पिता सै जे स्वर्गा चा, तुहांने बी तेढा ई करगा।”

तलाका रे बारे यीशुये री शिक्षा

(मरकुस 10:1-12)

19 ये गल्लां बोलणे ते बाद यीशु गलील ते मुडीने यहूदिया रे लाके च यर्दन नदिया रे पार चलीया।² फेरी ऊत्थी लोकां री मत्ती भीड, तिन्हांजो जे तिने ठीक कित्तिरा था, तिसरे पिछे चलीपी।³ तिस्सो परखणे रे खातर कुछ फरीसी तिसले आये कने गलाया, “क्या ये ठीक गल्ल ई भई कोई अपणिया घराओळिया जो किसी बी वजह खातर तलाक देई सकां?”⁴ तिने जबाब दित्या, “क्या तुहें नीं पढ्या भई संसारा जो रचणे औळे शुरु च तिन्हांजो इक नर कने नारीया रे रुपा च रचया कने बोलया,

⁵ इस बजह ने आदमी अपने माता पिता ते लग हुईने अपणिया घराओळिया सौंगी दो जिस्म इक जान हुईने रहणा? ⁶ हुण सै दो नीं पर इक जिस्म बणीने रैयें। इस खातर तिन्हांजो जे परमेशरे जोडीरा, सै किसी बी माहुये जो लग नीं करने चाहिन्दी।”⁷ तिन्हें तिसने बोलया, “फेरी मूसे ये कजो तह कित्या भई कोई माहु अपणिया घराओळिया जो तलाक देईने छडी सकां?”⁸ यीशुये तिन्हांने बोलया, “मूसे ये हुक्म तुहां लोकां रे मना री कठोरता रिया वजह ने दित्या था, पर शुरु ते येढा नीं था।⁹ कने हऊं तुहांने बोलां, भई सै जे कोई बुरे कम्मा जो छडीने होर किसी वजह ने अपणिया घराओळिया जो छडी दो, कने किसी दूजिया जनाना जो ब्याईलो, तां सै व्यभिचार करां; कने सै जे तिसा छडी रिया ने ब्याह करीलो, सै बी व्यभिचार करां।”

¹⁰ चेलयां तिसने बोलया, “जे इक्की जनाना कने इक्की माहणुये रे बिच येढा सम्बन्ध ओ, तां ब्याह करना ठीक नीं आ।”¹¹ फेरी यीशुये तिन्हांने बोलया, “हर कोई त इस उपदेशा जो ग्रहण नीं करी सकदा, इसजो सिर्फ सैई ग्रहण करी सकां ये तिन्हांजो जे ये दान दित्तिरा।¹² कुछ येढे सै जे अपणिया मौआ रे पेटा ने ई नपुंसक जम्मीरे; कने किछ येढे सै जे लोकें नपुंसक बणाईतरे; कने किछ नपुंसक येढे, तिन्हें जे स्वर्गा रे राजा रे खातर ब्याह नीं करने रा निश्चा कित्तिरा। सै जे इस उपदेशा जो ग्रहण करी सकां, सै ग्रहण करी लो।”

बालकां जो शीष

(मरकुस 10:13-16; लूका 18:15-17)

¹³ फेरी लोक किछ बच्चयां जो लेईने तिसले आये भई सै तिन्हारे सिरा पर हात्थ रखीने प्रार्थना करे कने तिन्हांजो आशीर्वाद दे, पर चेलयां सै थिडके।¹⁴ यीशुये बोलया, “बच्चयां जो रहणे दो, इन्हांजो मता रोकदे, कांभई स्वर्गा रा राज येढयां रा ई हाया।”¹⁵ फेरी तिने बच्चयां रे सिरा पर अपना हात्थ रखया कने ऊत्थीते चलीया।

अमीर मुन्दु कने अनन्त जीवन

(मरकुस 10:17-31; लूका 18:18-30)

¹⁶ इक माहु यीशुये ले आया कने तिसने बोलया, “गुरु जी, हऊं अनन्त जीवन पाणे खातर कुण जेआ खरा काम्म करुं?”¹⁷ यीशुये तिसने बोलया, “खरा क्या, इसरे बारे च तू मिन्जो कजो पुछीरां? कांभई खरा त इक्कोई हाया, पर जे तू अनन्त जीवना च दाखल हुणा चाँह, तां तू हुक्मां रा पालन करया कर।”¹⁸ तिने यीशुये ते पूछया, “कुण जे हुक्म?” तिने बोलया,

“ये भई खून मत कर, व्यभिचार मत कर, चोरी मत कर, झूठी गवाही मत दे, ¹⁹ अपने पिते कने अपनी माता रा आदर कर, कने तियां जे तु अप्पू जो प्यार करां, तियां ई अपने पड़ेसिये ने बी प्यार कर।”²⁰ तिने जवाने तिसते पूछया, “मैं इन्हां सारियां गल्लां रा पालन त कित्या; हुण मांह च किसा गल्ला री

कमी?”²¹ यीशुये तिसने बोलया, “जे तु सिद्ध बणना चाँह तां जा, कने सै जे किछ तेरले आ तिस्सो बेचीने अपनी सारी धन-दौलत गरीबां च बंडी दे, तिसते जे स्वर्गा च तिजो धन मिली सकां; कने मेरे पीछे आई जा।”²² पर ताहली जे तिने नौजवाने ये गल्ल सुणी तां सै दुखी हुईने चलीया कांभई सै बडा धनवान था।

²³ यीशुये अपने चेलयां ने बोलया, “हऊं तुहांने सच्च बोलां भई धनवाना रा स्वर्गा रे राजा च दाखल हुणा मुश्कल आ।²⁴ हां, हऊं तूहने बोलां भई किसी धनवान माहुये रा स्वर्गा रे राजा च प्रवेश पाणे ते इक ऊँटा रा सुईया रे नक्का ते निकलणा सान आ।”²⁵ ताहली जे तिसरयां चेलयां येढा सुणया तां रेहान हुईने पुछया, “फेरी किसरा छुटकारा हुई सकां?”²⁶ यीशुये तिन्हां री तरफ देखीने बोलया, “माहुआं रे खातर त ये मुश्कल आ, पर परमेशरा रे खातर कुछ बी मुश्कल नीं आ।”²⁷ इस पर पतरसे बोलया, “देख, अहें त अपना सारा कुछ छडीने तेरले आईगरे: तां अहांजो क्या मिलणा?”²⁸ यीशुये तिन्हांने बोलया, “हऊं तुहां लोकां ने सच्च बोलां भई नौये जुगा च ताहली जे माहुये रा पुत्र अपने प्रतापी सिंघासणा पर बिराजमान हुणा, तां तुहें बी सै जे मेरे पिछे आईरे, बारा संघासणां पर बैठीने इस्त्राएल रे बारा गोतां रा न्याय करना।²⁹ कने तिन्हे जे मेरे खातर अपना घर-बार, या भाईयां, या बहणां, या माता-पिता, या बच्चे, या खेतां जो छडी तरा, तिसजो सौ गुणा मिलणा, कने सै अनन्त जीवना रा हकदार हुणा।³⁰ पर मते सारे सै जे हुण पैहले, सै पिछले हुई जाणे; कने सै जे पिछले, सै पैहले हुई जाणे।

बगीचे रे मजदूरा रा द्रष्टान्त

20 “स्वर्गा रा राज इक जमीनदारा रे साई आ सै जे सुबह सबेरे अपने अंगूरा रे बगीचे खातर मजदूर लौणे जो निकलया।² तिने मजदूरं जो इक चान्दिया रा रपेईया रोज की दिहाडी तह किति कने तिन्हांजो अपने अंगूरां रे बगीचे च काम करने जो भेजी तया।³ नौ बजे रे करीब जमीनदार भीं घरा ते निकळीने आया कने तिने देखया भई किछ लोक बजारा च बेकार खडीरे थे,⁴ कने तिने तिन्हांने बोलया, ‘तुहें बी मेरे अंगूरां रे बगीचे च जावा, कने सै किछ जे तुहांरा बणगा, हऊं तुहांजो देंगा।’ तां सै बी बगीचे च काम्म करने जो चलीये।⁵ फेरी बारा बजे कने तिन बजे रे करीब तिने तेढा ई कित्या।⁶ तकरीबन पाँज बजे सै फेरी भीं अपने घरा ते गया कने किछ लोकां जो बजारा च खडीरा देखया, तिने तिन्हांते पुछया, ‘तुहें पूरा दिन येथी बेकार च कजो खडीरे रैयें?’⁷ तिन्हे तिसने बोलया, इस खातर भई अहांजो किन्हीये मजदूरिया पर नीं रखया।’ तिने तिन्हांने बोलया, ‘तुहें बी मेरे अंगूरां रे बगीचे च चली जावा।’

⁸ “संझा जो अंगूरा रे बगीचे रे मालके अपने भण्डारिये जो बोलया, ‘मजदूरं जो सद्दीने पिछलयां ते लेईने पैहलयां तक सबनीं जो पैसयां रा भुगतान करी दे।’⁹ फेरी सै मजदूर जे पाँज बजे ते इक घण्टा पैहले लगाईरे, तां तिन्हांजो चान्दिया रा इक-इक सिक्का मिलया।¹⁰ कने सै मजदूर जे पैहले ते काम्म करीरां थे सै आये, तिन्हे सोचया अहांजो किछ जादा पैसे मिलणे पर तिन्हांजो बी चान्दिया रा इक-इक सिक्का मिलया।¹¹ पैसे त तिन्हें लेईले पर जमीनदारा ने शकैत करदे हुये सै बोलणे लगे,¹² ‘सै मजदूर जे बाद बिच लगे थे, तिन्हें सिर्फ इक घण्टा काम्म कित्या पर तुहें अहांजो बी उतणा ई दित्या जितणा जे तिन्हांजो दित्या, जबकि अहें सारा दिन कड़कदिया धुपा च बडी मेहणत कित्ति।’¹³ जमीनदारे तिन्हां च ते इक्की जो जबाब दित्या, ‘दोस्त, मैं तेरने कोई बेन्याई नीं कित्ति। क्या अहें तह नीं कित्तिरा था भई मांह तुहांजो चान्दिया रा इक रपेईया देणा?’¹⁴ सै जे तेरा बणां, लै कने चली जा; हऊं बाद बिच रखीरे मजदूरा जो बी तितणी ई मजदूरी देणा चाँह जितणी जे तिजो देई करां।¹⁵ क्या हऊं अपने पैसे रा अपणिया इच्छा रे मुताबिक किछ बी करने रा हक नीं रखदा? क्या तू मेरिया इसा भलाईया ते जळन करां?’¹⁶ इस तरीके ने पिछले, पैहले हुई जाणे; कने सै जे पैहलके, सै पिछले हुई जाणे।”

अपणिया मौती रे बारे च यीशुये री तिञ्जी भविष्यवाणी

(मरकुस 10:32-34; लूका 18:31-34)

17 ताहली जे यीशु अपणे बारा चेलयां सौगी यरुशलेम जाई करां था तां सैं तिन्हांजो इक कनारं लेईया कने चलदे-चलदे तिन्हाने बोलणे लगया,
18 “देकरा, अहें यरुशलेम पुजणे औळे; कने माहुये रा पुत्र तिन्ही यहुदि नेतयां कने शास्त्रियां रे हात्थ पकड़वाया जाणा, कने तिन्हां तिस्रो मौती री सजा देणी। 19 फेरी तिसरा मजाक बनाणे कने कोडे लगवाणे जो तिस्रो गैर-यहुदियां रे हत्थ सौंपया जाणा, तिसते बाद तिस्रो कूसा पर टंगाया जाणा, पर तिञ्जे दिन तिस मूर्खियां ते ज्यन्दे हुई जाणा।”

इक्की मौवा री प्राथना

(मरकुस 10:35-45)

20 फेरी जब्दीये रे पुत्रां री माता अपणे बेटयां सौगी यीशुये ले आई कने तिसे तिसरे पैरां पर मत्था टेक्या कने किछ मंगणे लगी। 21 यीशुये तिसा ते पूछ्या, “तू कया चाई?” तिसे बोलया, “मिन्जो बचन दे भई मेरे ये दोनों पुत्र तेरे राजा च इक तेरे दांये कने इक तेरे बायें हत्था खा बैठो।” 22 यीशुये जबाब दित्या, “तुहें नीं जाणदे भई तुहें कया मंगी रांये। कया तुहें यातनां रा सैं प्याला पी सकां ये, तिस्रो जे हऊं पीणे औळा?” तिन्हें तिसने बोलया, “हां, अहें पी सकां ये।” 23 तिने तिन्हांने बोलया, “तुहें मेरा प्याला त पी लेंगे, पर मेरे दायें कने बायें बैठणे रा अधिकार देणे औला हऊं नीं आ, येथी बैठणे रा अधिकार त तिन्हांरा, तिन्हारे खातर जे ये मेरे पिते रे जरिये सुरक्षित करी तरा।

24 ताहली जे बाकी दस चेलयां येदा सुणया तां सैं तिन्हां दुई भाईयां पर गुस्से हुईये। 25 फेरी यीशुये तिन्हांजो अप्पू ले सद्दीने बोलया, “तुहें जाणां ये भई गैर-यहुदी राजा लोकां पर अपणी ताकत दसणा चायें; कने तिन्हारे खास नेता लोकां पर अपणा हक जताणा चायें। 26 पर तुहां च येदा नीं हुणा; बल्कि तुहां च सैं जे बड्डा बणना चाहो, सैं तुहांरा सेबक बणो; 27 कने तुहां च ते सैं जे कोई मुखिया बणना चाहो, तिस्रो तुहांरा दास बणने पौणा; 28 तुहांजो माहुये रे पुत्रा साई हुणा चाहिन्दा सैं जे सेवा टैहल करणे नीं, पर सेवा करने कने मते सारेआं रे छुटकारे खातर अपणे प्राणां रा बलिदान देणे आईरा।”

दो अन्हेयां जो अक्खीं रिया जाता रा दान

(मरकुस 10:46-52; लूका 18:35-43)

29 ताहली जे सैं यरीहों नगरा ते जाई करां थे, तां लोकां री इक बड्डी भीड़ तिन्हारे पिछे चलीपी। 30 कने दो अन्हे, सैं जे सड़का रे कन्डे बैठीरे थे, ताहली जे तिन्हे सुणया भई यीशु तिञ्जी चीयें जाई करां, सैं रड़ाये कने बोलणे लगे, “प्रभु, दाऊद रे पुत्र, अहां पर दया कर।” 31 लोकें सैं थिड़के कने बोलया तुहें चुप नीं रैई सकदे; पर सैं तिसते बी जादा राडां मारने लगे, “प्रभु, दाऊद रे पुत्र, अहां पर दया कर।” 32 फेरी यीशुये रुकीने सैं सद्दे कने बोलया, “तुहें कया चायें भई हऊं तुहांरे खातर कया करूं?” 33 तिन्हे तिसने बोलया, “प्रभु, अहें चायें भई देखी सको।” 34 यीशुये जो तिन्हां पर दया आई, सैं तिन्हा रियां अक्खीं ने छोया, कने सैं इकदम भीं ते देखणे लगे; कने सैं तिन्हारे पिछे चलीपे।

यरुशलेम च जीति ने औणे री खुशी

(मरकुस 11:1-11; लूका 19:28-40; यूहन्ना 12:12-19)

21 यीशु कने तिसरे चले ताहली जे यरुशलेम ले जैतून पहाड़ा रे नेडे बैतफगे पुजे, तां यीशुये अपणे दूई चेलयां जो ये हुकम देईने भेजया, भई 2 “अपणे ठीक सामणे रे गांवा च जावा कने तित्थी जान्दे ई तुहांजो इक गधी बझीरी मिलणी, कने तिसा सौगी तुहांजो तिसारा बच्चा बी मिलणा। तिन्हांजो खोलीने मेरले ली आवा। 3 जे कोई तुहांजो कुछ बोलो तां तिसने गलायां भई प्रभुये जो इन्हांरी जरूरत ई, तिस छोडे ई ये वापस करी देणे।” 4 येदा इस खातर हुया भई भविष्यवक्ते रा ये बचन पूरा ओ:

5 “सिय्योन री पुत्रिया ने बोला,

‘देख तेरा राजा तेरले आई करां;

सैं नम्र आ, कने सैं गधे पर स्वार आ;

हां गधिया रे बच्चे पर सैं जे इक मजदूरा रे पशुये रा बच्चा।”

6 इस खातर तिसरे चले चलीये कने तेदा ई कित्या तेदा जे तिन्हांजो यीशुये दस्सया था। 7 सैं गधिया कने तिसारे बच्चे जो ली आये, कने तिन्हा पर अपणे कपडे रखीते, कांभई यीशुये तिस पर बैठणा था। 8 भीड़ा चा ते मतयां लोकें अपणे कपडे बाटा च बछाई ते, कने कई लोक पेड़ा री डाळियां बड्डीने ली आये कने बाटा च बछाईते। 9 सैं लोक जे तिन्हारे अग्रे पिछे चलीरे थे सैं सब जणे जोरा-जोरा ने बोलणे लगे, “होशना! धन्न ओ दाऊद रे तिस पुत्रा जो, सैं जे परमेशरा रे नाँवा पर आई करां, धन्न ओ परमेशरा जो सैं जे स्वर्गा च बराज्या।” 10 ताहली जे सैं यरुशलेम च दाखल हुया, तां सारे नगरा च हलचल मचीगी, कने लोक पुछणे लगे, “ये कुण आ?” 11 लोकें बोलया, “ये गलील रे नासरत नगरा रा भविष्यवक्ता यीशु आ।”

मन्दरा ते दुकानदारां जो बाहर कड्डया जाणा

(मरकुस 11:15-19; लूका 19:45-48; यूहन्ना 2:13-22)

12 फेरी यीशुये परमेशरा रे मन्दरा च जाईने तिन्हां सारयां जो, सैं जे मन्दरा च लेण-देण करीरां थे, बाहर कडीत्या, कने पैसायां रा लेण-देण करने औलयां री चौकियां मुन्धियां करीती कने कबूतर बेचणे औळयां रे तखत पलटीते;

13 कने तिन्हाने गलाया, “शास्त्रां च लीखिरा, ‘मेरा घर प्रार्थना रा घर होणा’; पर तुहें इसजो चोरां रा अड्डा बणाई रांये।” 14 फेरी अन्हे कने लंगड़े, मन्दरा च तिसले आये, कने तिन्हाजो तिने ठीक कित्या। 15 पर ताहली जे मुखिये नेता कने शस्त्रीयें सैं चमत्कारा रे काम्म देखे, सैं जे तिने किते थे, कने मन्दरा च बचयां जो उच्चिया अवाजा च ‘होशना’ धन्न तिञ्जो दाऊद रे पुत्रा, बोलदे हुये सुणया: तां सैं बडे भरी गुस्सा हुईये, 16 कने तिसते पुछ्या, “तू सुणीरां ये कया बोलीरां ये?” यीशुये तिन्हाने बोलया, “हां; सुणीरां, कया तुहें लोकें ये कदीं नीं पढ़या: ‘तैं बालकां कने दूध पीन्दे बचयां रे मुंहा ते स्तुती कराई?’” 17 फेरी सैं तिन्हाजो छड्डीने यरुशलेम नगरा ते बाहर बैतनिय्याह जो गया तित्थी तिने रात बताई।

फळा ते बगैर दागले रा डाळ

(मरकुस 11:12-14, 20-24)

18 अगले दिन तडके ई ताहली जे सैं नगरा जो वापस आईरां था तां तिस्रो भूख लगी। 19 सड़का कन्डे तिने अंजीरा रा इक डाळ देखया सैं तिसरे नेडे गया, पर तिस डाळा पर पत्तयां जो छड्डीने होर किछ नीं मिलया, इस खातर तिने डाळा ने बोलया, “हुण ते तिञ्जो कदी फळ नीं लगे।” कने सैं अंजीरा रा डाळ इकदम सुक्कीया। 20 येदा देखीने चेलयां जो बडा चम्भा हुया कने तिन्हें बोलया, “ये अंजीरा रा डाळ इकदम कियां सुक्कीया?” 21 यीशुये तिन्हांजो जबाब दित्या, “हऊं तुहांने सच्च बोलां, जे तुहां च विश्वास आ कने तुहें शक नीं करदे, तां न सिर्फ सैं करी सकां ये सैं जे मैं अंजीरा रे डाळा रा कित्या, पर जे तुहें इस पहाड़ा ने बोलो, ‘उठ, कने समुद्रा च जाईने पैईजा’, तां तेदा ई हुई जाणा। 22 कने प्रार्थना करदे तुहें सैं किछ जे मंगो, जे तुहां च विश्वास आ तां सैं सब तुहांजो मिलणा।”

यीशुये रे अधिकारा रा स्वाल

(मरकुस 11:27-33; लूका 20:1-8)

23 ताहली जे सैं मन्दरा च जाईने उपदेश देईरां था, तां मुखिये याजक कने यहुदी बजुर्गो नेडे जाईने तिसते पुछ्या, “ये काम्म तू किस अधिकारा ने करां? कने ये अधिकार तिञ्जो किने दित्या?” 24 यीशुये तिन्हाजो जबाब दित्या, “हऊं तुहांते इक स्वाल पुछां, जे तिसरा जबाब तुहें मिन्जो देई दो तां मांह तुहांजो दस्सी देणा भई हऊं ये काम्म किस अधिकारा ने करां। 25 दस्सा यूहन्ने जो बपतिस्मा कितते मिलया? परमेशरा ते या माहुये ते?” सैं अप्पू चीये गन्न बात करदे हुये गलाणे लगे, “जे अहें बोलां ये ‘परमेशरा ते’ तां इस अहांते पुछणा ‘फेरी तुहें तिस पर विश्वास कां नीं करदे?’ 26 पर जे अहें बोलया, ‘माहुये ते’ तां अहांजो लोकां रा डर आ, कांभई सैं यूहन्ने जो इक भविष्यवक्ता मन्ना ये।” 27 फेरी तिन्हे यीशुये जो जबाब दित्या, “अहें नीं जाणदे।” तिने बी

तिन्हाने बोलया, “अच्छा तां फेरी हऊँ बी तुहांजो नीं दसदा भई ये काम्म हऊँ किस अधिकारा ने करां।

दुई पुत्रां रा द्रष्टान्त

28 “अच्छा दस्सा तुहें लोक इसरे बारे च क्या सोचां ये? इक्की माहुये रे दो पुत्र थे; सैं बड्डे ले गया कने बोलया, ‘बेटा आज मेरे अंगूरों रे बगीचे च जा कने काम्म कर।’ 29 पुत्रे जबाब दित्या, ‘मांह नीं जाणा’, पर बाद बिच तिसरा मन बदलिया कने सैं चलीआ। 30 फेरी सैं पिता दूजे पुत्रा ले गया कने तिसने बी तेदा ई बोलया, पुत्रे जबाब दित्या, ‘हां पिता जी हऊँ जां’, मगर सैं नीं गया। 31 दस्सा इन्हां दुई च ते किने पिते री इच्छा पूरी कित्ती?’ तिन्हे बोलया, ‘बड्डे!’ यीशुये तिन्हाने बोलया, “हऊँ तुहांने सच्च बोलां भई कर बसूलणे औळ्ळे कने वेश्यां परमेशरा रे राजा च तुहांते पैहले जाणा। 32 ये हऊँ इस खातर बोलीरां कांभई बपतिस्मा देणे औळ्ळा यूहन्ना तुहांजो जिन्दगिया रा ठीक रस्ता दसणे आया, कने तुहें तिस पर विश्वास नीं कित्या; पर कर लेणे औळ्ळ्यां कने बेश्यां तिस पर विश्वास कित्या: तुहें ताहली जे ये देखया तां बाद बिच बी अपण मन नी बदलया कने न ई तिस पर विश्वास कित्या।

बुरयां कर्षाणां रा द्रष्टान्त

(मरकुस 12:1-12; लूका 20:9-19)

33 “इक होर द्रष्टान्त सुणा: इक जमीनदार था, तिने अंगूरों रा इक बगीचा लगाया, कने तिसरे चहुँ पासयां बाड लाईती, फेरी अंगूरों रा रस नकाळणे जो इक खड्डा खुणया कने तिसरिया रखवालिया रे खातर इक उच्ची दवाल बणाई, फेरी बगीचा ठेकेदारां जो ठेके पर देईने अप्पूँ दूर प्रदेशा जो चलीआ। 34 ताहली जे अंगूर तोडने रा वगत आया तां बगीचे रे मालके ठेकेदारां ले अपणा दास भेजया ताकि तिन्हाते सैं अपणे हिस्से रे अंगूर ली आओ। 35 पर ठेकेदारें तिसरे दासां जो पकडील्या, किसी जो मारया कुटया, किसी पर पत्थर मारे कने कोई त जानी तेई मारीत्या। 36 इक बार भीं तिने पैहले ते होर जादा दास भेजे, कने तिन्हें ठेकेदारें तिन्हाने बी तेदा ई बर्ताव कित्या। 37 बाद बिच तिने मालके तिन्हाले अपणा बेटा ये सोच्चीने भेजया भई ‘सैं मेरे बेटे रा त मान रखगे ई।’ 38 पर तिन्हे ठेकेदारें ताहली जे मालका रे बेटे जो देखया तां सैं अप्पूँ चीयें गलाणे लगे, ‘ये त इसरा बारस आ, आवा इस्सो मारी दें कने इसरा सब किछ अहांरा हुई जाणा।’ 39 फेरी सैं तिस्सो पकडीने बगीचे ते बाहरा लेईये कने जानी ते खत्म करीत्या। 40 इस खातर ताहली जे अंगूरों रे बगीचे रे मालका औणा, तां सैं तिन्हा ठेकेदारां सौगी क्या करगा?’ 41 तिन्हें तिसने बोलया, “कांभई सैं निर्दई थे इस खातर तिस सैं बडिया बेरैहमिया ने मारने कने अंगूरों रे बगीचे रा ठेका दूजे ठेकेदारा ले देई देणा, सैं जे फसला रे औणे पर तिस्सो तिसरा हिस्सा देंगे।” 42 यीशुये तिन्हाने बोलया, “क्या तुहें शास्त्रा रा ये बचन नीं पढया:

‘तिस पत्थरा जो जे मकान बनाणे औळ्यां बेकार समझया,
सैं ई कुणे रा सबनीं ते खास पत्थर बणीया?’

‘येदा परमेशरा रिया तरफा ते हुया,

सैं जे अहां रियां नजरां च अदभुत आ।’

43 इस खातर हऊँ तुहांने बोलां परमेशरा रा राज तुहां ते खोया जाणा कने सैं तिन्हा लोकां जो देई दित्या जाणा सैं जे तिसरे राजा रे मुताबिक बर्ताव करगे। 44 सैं जे इस पत्थरा पर पौंगा, टुकडे-टुकडे हुई जाणा कने जे ये पत्थर किसी पर पौंगा, तां तिस चकनाचूर करी देणा।” 45 मुखिये याजक कने फरीसी यीशुये रे इस द्रष्टान्त जो समझीये भई सैं तिन्हारे बारे च ई बोलीरां। 46 कने तिन्हे तिस्सो पकडने रा जल्म कित्या, पर सैं लोकां ते डरां थे कांभई लोक यीशुये जो भविष्यवक्ता मन्नां थे।

ब्याह रिया धामा रा द्रष्टान्त

(लूका 14:15-24)

22 यीशु फेरी भीं तिन्हाने द्रष्टान्तं च गलाणे लगया, 2 “स्वर्गा रा राज तिस राजे साई आ तिने जे अपणे बेटे रे ब्याह च धाम दित्ति। 3 राजे अपणे दास्सां जो भेजया भई सैं तिन्हां लोकां जो सद्दीने ल्याओ तिन्हांजो जे

ब्याह री धामा च औणे रा नियुन्दा दित्तीरा; पर सैं लोक नीं आये। 4 तिने अपणे सेबक फेरी भीं भेजे, तिने बोलया भई सैं लोक जे ब्याह रिया धाम च सद्दीरे तिन्हांजो बोला, ‘देखा ब्याह री धाम बणीने त्यार हुईगरी, मेरे पाले हुये मोटे ताजे बकरे बड्डी तरे, कने सारा किछ बणीने त्यार आ; ब्याह री धाम खाणे जो आवा।’ 5 पर लोकें तिस पर कोई ध्यान नीं दित्या कने सैं चलीये: कोई अपणे खेता च काम्म करने जो चलीया, तां कोई अपणे काम्म धन्दे पर चलीया। 6 कने किछ लोकें त राजे रे सेबका जो पकडीने तिसने मार-कुट कित्ति कने जानी ते मारीते। 7 इस खातर राजे गुस्से च आईने अपणे सैनिक भेजे, तिन्हे तिन्हां खूनियां जो मारीत्या कने तिन्हारे नगरा च आग लाईती। 8 फेरी राजे सेबकां ने बोलया, ‘ब्याह री धाम त त्यार ई पर सैं लोक जे न्युन्दा देईने सद्दीरे थे सैं लोक इसा इज्जता रे लायक नीं हुये। 9 इस खातर तुहें गलियां कने चौकां पर जावा, तित्थी तुहां जो जितणे बी लोक मिलो, सब्बीं जो ब्याह रिया धामा च सद्दीने ली आवा।’ 10 सैं दास फेरी गलियां कने चौकां च गये कने सैं जे खरे बुरे लोक तिन्हाजो मिले तिन्हां सबनीं जो सैं कड्डा करीने ली आये, कने ब्याह रा घर मेहमानां ने भरीया।

11 “पर ताहली जे राजा मेहमानां जो देखणे अन्दर आया, तां तित्थी तिने इक येढे आदमिये जो देखया, तिने जे ब्याह रे कपडे नीं पैहनीरे थे। 12 राजे तिसते पुछया, ‘दोस्त, तू बिणा ब्याह रे कपडे पैहने येथी अन्दर कियां आईया?’ पर सैं आदमी चुप रैया। 13 फेरी राजे अपणे सेबकां जो बोलया, ‘इसरे हात्थ-पैर बन्हीने बाहर नेहरे च सद्दी देवा, तित्थी लोक रोन्दे कने दन्द किरडदे हो।’ 14 कांभई सद्दीरे त मते पर चुणीरे त थोड़े ई हाये।”

कैसरा जो कर देणा

(मरकुस 12:13-17; लूका 20:20-26)

15 फेरी फरीसियें जाईने इक सभा कित्ति, तिसा च तिन्हे ये विचार कित्या भई कियां यीशुये जो तिस रिया गलाई रियां गलां च फसाई सक्कां ये। 16 तिन्हे अपणे चले हेरोदियां सौगी तिन्हांले भेजे, तिन्हें लोकें यीशुये ने बोलया, “गुरु जी, अहें जाणां ये भई तु सच्चा, कने तु परमेशरा रा रस्ता सच्चाईया ने सखां, कने कोई क्या सोचां तू किसी री परवाह नीं करदा, कांभई तू माहुआं रिया हैसियता पर नीं जान्दा। 17 इस खातर अहांजो दस्स तू क्या सोचां? कैसरा जो कर देणा ठीक आ कि नीं?” 18 यीशु तिन्हारे बुरे इरादे जाणीने बोलया, “धोखेबाजो, तुहें मिन्जो कजो परखणा चायें? 19 मिन्जो कोई चान्दीया रा सिक्का दस्सा तिसने जे तुहें कर चुकायें।” फेरी सैं तिसले इक चान्दीया रा सिक्का ली आये। 20 तिने तिन्हाते पुछया, “इस पर किसरी मूरत कने नीं लिखिरा?” 21 तिन्हे तिसने बोलया, महाराज कैसरा रे।” फेरी तिने तिन्हाजो गलाया, “अच्छा तां फेरी सैं जे महाराज कैसरा रा, तिस्सो महाराज कैसरा जो देवा, कने सैं जे परमेशरा रा, तिस्सो परमेशरा जो देवा।” 22 ये सुणीने सैं चम्भे च पैईये कने तिस्सो छड्डीने चलीये।

मुईरियां ते जिन्दा हुणा कने ब्याह

(मरकुस 12:18-27; लूका 20:27-40)

23 तिस दिन किछ सद्की सैं जे मरने ते बाद जिन्दा हुणे जो नीं मनदे, तिसले आये कने तिसते पुछया, 24 “गुरु जी, मूसे बोलया था भई जे कोई माहु बिणा सन्ताण मरी जाओ, तां तिसरा भाई तिस रिया बिधवा ने ब्याह करीने अपणे भाईये रा बंश बढाणे खातर सन्ताण पैदा करी सक्कां। 25 हुण मन्ना अहें सात भाई ये; पैहले रा ब्याह हुया कने बाद च तिसरी मौत हुईगी, फेरी कांभई तिसरे कोई सन्ताण नीं हुई, इस खातर तिसरे भाईये तिसरिया बिधवा जो अपणाईल्या। 26 तदुआं तक जे भई सातो भाई मरी नीं गये, दूजे कने तिजे भाईये ने बी तेदा ई हुया। 27 सारयां ते बाद सैं जनाना बी मरीगी। 28 हुण अहांरे पुछणे रा मतलब ये आ भई अगलिया जिन्दगिया च तिन्हा सत्तां च ते सैं किसरी जनाना हुणी? कांभई तिसाजो सत्तें भाईयें अपणाया था।” 29 यीशुये तिन्हाजो जबाब दित्या, “तुहें पवित्रशास्त्रा कने परमेशरा री शक्तिया जो नीं जाणदे; इसा वजह ने तुहें भूला च पैईरे। 30 तुहांजो समझणा चाहिन्दा भई ज्युन्दे हुणे पर लोकां न त ब्याह करने कने न ई कोई ब्याह च दित्या जाणा, पर स्वर्गा च परमेशरा रे स्वर्गदूतां साई हुणे। 31 पर मूर्ईरियां च ते जिन्दा होणे रे बारे च क्या तुहें ये बचन नीं पढया सैं जे परमेशरे तुहांने

बोलया: 32 हऊँ अब्राहम रा परमेश्वर, इसहाक रा परमेश्वर, कने याकूब रा परमेश्वर आ? सै मूर्खियां रा नीं, पर जिन्द्यां रा परमेश्वर आ।" 33 ताहली जे लोकें ये सुणया तां तिसरे उपदेशा पर सै बडे रेहान हुये।

सब्वीते बड्डा हुक्म

(मरकुस 12:28-34; लूका 10:25-28)

34 जिस वगत फरीसियें सुणया भई यीशुये सदूकियां रा मुँह बन्द करीत्या, तां सै सब कट्टे हुईये। 35 तिन्हां च ते इक यहूदी धर्मशास्त्रिये तिस्सो परखणे खातर तिसते पुछया, 36 "गुरु जी, कनून व्यवस्था च सबनीं ते बड्डी आज्ञा क्या ई?" 37 यीशुये तिसने बोलया, "तू परमेश्वर अपणे प्रभु ने अपणे सारे मन कने सारे प्राण कने अपणी सारी बुद्धियां ने प्यार कर। 38 बड्डी कने खास आज्ञा त येई हाई। 39 फेरी येदी ई तुज्जी आज्ञा येई भई अपणे पड़ेसिये ने तियां ई प्यार कर जिआं जे तू अप्पू ने प्यार करां। 40 सारी कनून व्यवस्था कने भविष्यवक्त्यां रे ग्रन्थ इन्हां दूई हुक्मां पर टिकीरे।"

मसीह किसरा पुत्र आ

(मरकुस 12:35-37; लूका 20:41-44)

41 ताहली जे फरीसी हलित्यें कट्टे ई थे, भई यीशुये तिन्हांते इक स्वाल पूछया, 42 मसीह रे बारे च तुहें क्या सोचां ये भई सै किसरा पुत्र आ?" तिन्हे तिसने बोलया, "दाऊदा रा।" 43 यीशुये तिन्हांते पूछया, "तां दाऊद आत्मा च हुईने तिस्सो प्रभु कजो बोलां? 44 प्रभुये मेरे प्रभुये ने बोलया, मेरे दायें बैठीने राज कर, तदुआं तक जे हऊँ तेरे दुश्मणां जो तेरे पैरां हेठ नीं करी दूँ।" 45 भला, तां जे दाऊद तिस्सो प्रभु बोलां, तां सै तिसरा पुत्र कियां हुया?" 46 इसरे जबाबा च कोई बी तिसने किछ नीं बोली सकया। कने न ई तिस दिना ते बाद किसी जो तिसते कुछ होर पुछणे री हिम्मत हुई।

शास्त्रियां कने फरीसियां ते खबरदार

(मरकुस 12:38-39; लूका 11:43-46; 20:45,46)

23 फेरी यीशुये लोकां री भीडा ने कने अपणे चलयाने ने बोलया, 2 "शास्त्री कने फरीसी मूसा रे बिधान री ब्याख्या रे अधिकारी ये; 3 इस खातर सै जो किछ बोलो तिस पर चलयाने कने तिसरा पालन करयां, पर तिन्हारे साई काम्म मत करयां; कांभई सै बोलां त हाये पर करदे नीं ये। 4 सै लोकां रे कन्धयां पर इतणा सारा बोझ लट्टी दै भई सै तिस्सो चक्कीने चल्ली ई नीं सको कने लोकां पर दवाव पायें भई सै तिस्सो लेईने चलो; पर खुद तिस्सो अपणिया ऊंगलिया ने नीं सरकाणा चाहन्दे। 5 सै अपणे सारे काम्म लोकां जो दसणे खातर करां ये: सै अपणे ताबीजां कने कपड्यां री झालरां जो इस खातर बड्डे ते बड्डा करदे रैये ताकि लोक तिन्हांजो धर्मात्मा समझो। 6 धामां च खास-खास जगह कने धर्म सभां च तिन्हाजो खास-खास आसण चाहन्दे, 7 बजारां च सै आदरा सौगी नमस्कार करणा चायें, कने माहुआं ते रब्बी बलवाणा तिन्हांजो खरा लगां। 8 पर तुहें लोकां ते अप्पू जो रब्बी नीं बुलवायां, कांभई तुहांरा सच्चा गुरु त बस इक ई हाया; कने तुहें सारे सिर्फ भाई ये। 9 धरतिया पर लोकां जो अपणा पिता नीं बोलणा, कांभई तुहांरा इक ई पिता, सै जे स्वर्गा चा। 10 नां ई लोकां ते तू अप्पू जो स्वामी बोलणे देआं, कांभई तुहांरा स्वामी त बस इक इ हाया, कने सै आ मसीह। 11 सै जे तुहां च बड्डा ओ, सै तुहांरा सेबक बनो। 12 सै कोई जे अप्पू जो बड्डा बणांगा, सै छोटा कित्या जाणा; कने सै कोई जे अप्पू जो छोटा बणांगा, सै बड्डा बणाया जाणा।

शास्त्रियां कने फरीसियां रे पखण्डा री अलोचना

(मरकुस 12:40; लूका 11:39-42, 44,52; 20:47)

13 अरे कपटी शास्त्रियो कने फरीसीयो, तुहां पर लाणत ई! तुहें लोकां खातर स्वर्गा रे राजा रा दरवाजा बन्द करां ये, न त खुद तुहें तिस्सो प्रवेश करां ये कने नां ई तिन्हांजो जाणे दें सै जे तिसच प्रवेश करने री कोशिश करां ये। 14 ["ओ कपटी शास्त्रियो कने फरीसीयो, लाणत ई तुहां पर! तुहें विधमां री सारी दौलत चट्टी जायें, कने दिखावा करने खातर बड्डिया देरा तक लम्बी-

लम्बी प्रार्थनायें करां ये: इस खातर तुहांजो सख्त ते सख्त सजा मिलणी।] 15 "ओ कपटी शास्त्रियो कने फरीसीयो, तुहां पर लाणत ई! तुहें किसी जो अपणे पंथा च लौणे खातर धरतीया कने समुद्रा जो पार करी जायें, कने ताहली जे सै तुहारे पंथा च आई जां तां तुहें तिस्सो अपणे ते बी दुगणा नरका रा पात्र बनाई दे।

16 "अरे अन्हे अगबो, तुहां पर लाणत ई! सै बोलां ये भई जे कोई मन्दरा री सगन्द खाओ तां किछ नीं आ, पर जे कोई मन्दरा रे सोने री सगन्द खाओ तां तिस्सो तिसा सगन्दा रा पालन करना चाहिन्दे। 17 अरे अन्हे मूर्खो, बड्डा कुण आ; मन्दरा रा सोना या सै मन्दर तिने जे तिस सोने जो पवित्र बणाया? 18 तुहें ये बी बोलां ये भई जे कोई बेदिया री सगन्द खां तां किछ नीं आ, पर जे कोई बेदिया पर रखीरे चढावे री सगन्द खां, तां सै तिसा सगन्दी ने बड्डी जा। 19 ओ अन्हयो, बड्डा कुण आ; बेदी पर रखीरा चढावा या सै बेदी तिसाले जे सै चढावा पवित्र हुआ? 20 इस खातर जे कोई बेदीया री सगन्द खां, तां सै बेदीया सौगी बेदी पर सै जे कुछ रखीरा, तिस सारे री सगन्द खां। 21 सै जे मन्दरा री सगन्द खां, सै तिसरी कने तिसच रैहणे औळ्यां री बी सगन्द खां। 22 कने सै जे स्वर्गा री सगन्द खां, सै परमेश्वर रे संघासणा री कने तिस पर बैठणे औळे री बी सगन्द खां।

23 "अरे कपटी शास्त्रियो कने फरीसीयो, लाणत ई तुहां पर! तुहें पुदीने, कने सुँफा, कने जीरे रा दसवां हिस्सा त परमेश्वर जो दे, पर तुहें कायदे-कनूना री खास गलां जो यनि न्याय, दया कने विश्वास रा तिरस्कार करां ये; तुहां जो ये चाहिन्दे था भई इन्हांजो बी करदे रैहन्दे कने तिन्हांजो बी नीं छुडदे। 24 ओ अन्हे अगवयो, तुहें अपणे पाणिये ते मच्छरा जो त छापी लें पर ऊँटा जो निंगली जांये। 25 "ओ कपटी शास्त्रियो कने फरीसीयो, तुहां पर लाणत ई! तुहें अपणी कौलियां कने थालुआं जो बाहरा ते मांजीने साफ त करां ये पर सै अन्दरा ते छळ-कपट कने असंतोषा ने भरीरे। 26 अरे अन्हे फरीसीयो, पैहले कौलिया कने थालुये जो अन्दरा ते मांजा भई सै अन्दरा-बाहरा ते साफ हुई जाओ।

27 "ओ कपटी शास्त्रियो कने फरीसीयो तुहांजो लाणत ई! तुहें लिपाई-पुताई किन्तरी कब्रां साई ये सै जे गासा ते देखणे जो त बाकियां लगां ईयां, पर अन्दरा ते मुर्दयां री हड्डियां ने कने हर किस्मा री गन्दगिया ने भरीरी हुआं ईयां। 28 ईयां ई बाहरा ते त तुहें माहुआं जो धर्मात्मा दिखां ये, पर अन्दरा ते छलकपटा ने कने बुराईया ने भरीरे।

शास्त्रियां कने फरीसियां जो सजा री भविष्यवाणी

(लूका 11:47-51)

29 "अरे कपटी शास्त्रियो कने फरीसियो, लाणत ई तुहां पर! तुहें नबियां रे खातर मकबरे बणाये कने धर्मात्म्यां री कब्रां जो सजां ये। 30 कने बोलां ये, भई 'जे अहें अपणे बाप-दादयां रे दिनां च हुन्दे तां भविष्यवक्त्यां जो मारने च तिन्हांरा हात्थ नीं बटान्दे।' 31 मतलब ये आ भई तुहें मन्नां ये भई तुहें तिन्हारी औळद ये सै जे भविष्यवक्त्यां रे खूनी थे। 32 तां तुहें सै जे तुहांरया पुरखयां शुरु कित्या तिस्सो पूरा करा। 33 ओ सर्पो, ओ रेंगला रे बचयो, तुहें कियां सोचां ये भई तुहां नरक भोगणे ते बची जाणा? 34 तिसरे परिणाम स्वारूप निर्दोष हाबिल ते लेईने बिरक्याह रे बेटे जकरयाह तक तिस्सो जे तुहें मन्दरा कने बेदिया रे बिच मारया था, जितणे धर्मियां रा खून पृथ्वीया पर बहाया था सै सारा तुहारे सिरा पर पौणा। 35 हऊँ तुहांने सच्च बोलां, इन्हां सारियां गलां खातर इसा पीढीया रे लोकां जो सजा भुगतणे पौणी।" 36 हऊँ तुहांने सच्च बोलां, इन्हां सारियां गलां खातर इसा पीढीया रे लोकां जो सजा भुगतणे पौणी।"

यरुशलेम रे खातर बलाप

(लूका 13:34-35)

37 "ओ यरुशलेम, ओ यरुशलेम! तू सै आ सै जे भविष्यवक्त्यां रा खून करां, कने परमेश्वर रे भेजरीरे दूतां जो पत्थर मारां। मैं कितणी बार चाहया भई तियां जे कोई कुकड़ी अपणयां चूजयां जो अपणे फंगा हेठ कठेरी लेईं, तियां ई हऊँ बी तेरे बचयां जो कड्डा करी लूँ, पर तुहें लोकें नीं चाहया। 38 हुण तेरा मन्दर पूरा ई जवाडया जाणा। 39 कांभई हऊँ तुहांने बोलां भई तुहां मिन्जो

तदुआं तक भी नीं देखणा तदुआं तक जे ये नीं बोलगे, 'धन्य ये सैं, सैं जे परमेशरा रे नौंवा ते औंवा।'

मन्दरा रे बिनाशा री भविष्यबाणी (मरकुस 13:1,2; लूका 21:5-6)

24 ताहली जे यीशु मन्दरा ते निकळीने जाई करां था, तां तिसरे चले तिस्सो मन्दरा रा भवन दसणे जो तिसले आये।² पर यीशुये तिन्हाने बोलया, "तुहें इस भवना जो सिधा खडीरा देखीरां ये! हऊं तुहाने सच्च बोलां, येथी पत्थरा पर पत्थर टिकीरा नीं रैहणा सैं जे रुढ्या नीं जाणा।"

संकट कने कळेश (मरकुस 13:3-13; लूका 21:7-19)

3 ताहली जे यीशु जैतून पहाडा पर बैठीरा था, तां चेलयां चुपचाप तिसले आईने बोलया, "अहांजो ये दस्स भई ये गल्लां कदी हुणी? ताहली जे तू वापस औणा कने इस संसारा रा खात्मा हुणे रा वगत औणा तां तिसरे क्या संकेत हुणे?"⁴ यीशुये तिन्हांजो जबाब दित्या, "खबरदार! तुहां लोकां जो कोई भटकेरो नीं,⁵ हऊं ये इस खातर बोलीरां भई येदे कई ये तिन्हाजे मेरा नीं लेईने औणा कने बोलणा 'हऊं मसीह आ', कने तिन्हा मते लोक भरमाणे।⁶ तुहां नेडे री लड़ाईयां री गल्लां या दूरा री अफवायें सुणनियां, पर देख्वा तुहें घबरान्दे देख्वां कांभई येदा त होणा ई हाया, पर हल्लित्यें अंत नीं आईरा।⁷ हर इक्की जातिया दूजिया जातिया रे बरोधा च खडना, कने इक्की देशा दूजे देशा रे बरोधा च खडना, कने जगह-जगह नकाळ पौणे, कने हिल्लण हुणे।⁸ पर इन्हां सारियां गल्लां ते सिर्फ पीडां री ई शुरुआत हुणी।⁹ तिस वगत तिन्हां तुहें सजा दवाणे खातर पकडवाणे, कने तुहें मरवाई देणे, कांभई तुहें मेरे चले इस खातर सारी जातियां रे लोकां तुहाने बैर रखणा।¹⁰ तिस वगत मते लोकां च मोह-ममता नीं रैहणी, कने विश्वास कम हुई जाणा, कने तिन्हा इक दूजे जो अधिकारियां रे हत्थे पकडवाणा, कने अप्पू बाटियें बैर रखणा।¹¹ मते सारे झूठे भविष्यवक्ते उड्डिने खडी जाणे, कने तिन्हा लोक ठगणे।¹² हर तरफ अधर्म-ई-अधर्म फैली जाणा तिसते जे कई लोकां रा प्यार ठन्डा पैई जाणा,¹³ पर सैं जे अन्त तक हौंसला रखी रखगा, तिसरा ई उद्धार हुणा।¹⁴ स्वर्गा रे राजा री ये खुशखबरी सारे संसारा च सारी जातियां जो गवाईया रे रुपा च सणवाई जाणी, फेरी तांई अन्त औणा।

महांसंकटा री शुरुआत (मरकुस 13:14-23; लूका 21:20-24)

15 "इस खातर ताहली जे तुहें तिसा जवाडने औळिया खतरनाक बिनाषकारी चीजा जो पवित्र जगह खडी रिया जो देखगे तिसरी चर्चा जे दानियेल भविष्यवक्ते रे जरिये किति थी (पढने औळा खुद समझी लो भई इसरा क्या मतलब आ),¹⁶ फेरी सैं लोक जे यहूदिया च ओ तिन्हांजो पहाडा पर नड्डी जाणा चाहिन्दा।¹⁷ सैं जे अपने घरा रिया छत्ता पर ओ, सैं घरा ते बाहर किछ बी लेणे खातर थल्ले नीं उतरो;¹⁸ कने सैं जे बाहर खेतां च काम्म करयादा ओ, सैं पिछे मुडीने अपना कपडा लेणे जो नीं हटो।

19 तिन्हां जनानां खातर सैं जे भारहत्थियां हुणी कने तिन्हारे जे दुध पीन्दे बचे हुणे, सैं दिन बडी पीडा देणे औळे हुणे।²⁰ प्रार्थना करा भई तुहाजो ठण्डा रे दिन या सब्ब रे दिन नड्डणे नीं पौ।²¹ तिन्हें दिनें येदी बिपत्ति औणी, तऊंआं ते जे परमेशरे ये सृष्टी रची तेदी आज तक कदीं नीं आई कने न कदीं औणी।²² कने जे परमेशरे तिन्हां दिनां जो घटाणे रा निश्वा नीं करीलया हुन्दा तां कोई बी नीं बचदा पर चुणीरयां रिया बजह ने तिस सैं दिन कम करने।²³ तिन्हें दिनें जे कोई तुहाने बोलो, 'देख्वा, मसीह येथी आ!' या 'ओथी आ!' तां तिसरा विश्वास देख्वां करदे।

24 कांभई झूठे मसीह कने झूठे भविष्यवक्ते उड्डिने आई जाणे, कने तिन्हां येदे-येदे हरान करने औळे चिन्ह दसणे, कने अदभुत काम्म करने, भई जे हुई सक्को तां चुणी रयां जो बी चकमा देई दो।²⁵ देख्वा, मैं पैहले तेई ये सब किछ तुहाने गलाई तरा।²⁶ इस खातर जे सैं तुहाने बोलो, 'देख्वा, सैं जंगला चा',

तां तिन्ही देख्वां जान्दे; कने जे सैं बोलो, 'देख्वा, सैं तिन्हा कमरयां अन्दर लुक्खीरा', तां तिन्हांरा विश्वास नीं करना।

27 हऊं ये बोलीरां कांभई तियां जे बिजळ पूरवा ते शुरु हुईने पच्छमा रे समाणा तक चमकां ई, माळुये रे पुत्रा रा औणा बी तियां ई हुणा।²⁸ तिन्ही जे किति लाश हुणी ईलां बी तिसा ई जगह कडियां हुणी।

माळुये रे पुत्रा रा भीं ते औणा (मरकुस 13:24-27; लूका 21:25-28)

29 "तिन्हें दिनें सैं जे मुसीवत पौणी तिसते इकदम बाद सूरज काला हुई जाणा, कने चन्द्रमे री लोय जान्दी रैहणी, कने समाणा ते तारे पौणे लगणे, कने अम्बरा री शक्तियां हिलाई जाणियां।³⁰ तिस वगत माळुये रे पुत्रा रे औणे रा संकेत अम्बरा च परगट हुणा, कने फेरी धरतिया पर सारी जातियां रे लोकां छाती पिट देयां बलाप करना; कने तिन्हां माळुये रे पुत्रा जो बडिया शक्तिया कने महिमा सौगी स्वर्गा रे बदळा पर औन्दे देखणा।³¹ तिस जोरा रिया अवाजा च बजणे औळे बाजेयां सौगी अपने स्वर्गदूत भेजणे, कने तिन्हां समाणा रे इक कोणे ते दूजे कोणे तक, चहूँ पासयां ते अपने चुणीरे लोक कडे करने।

दागले रे डाळा रा उदाहरण (मरकुस 13:28-31; लूका 21:29-33)

32 अंजीरा रे डाळा ते शबक लेवा: ताहली जे तिसरे डाळु कोमल हुई जायें कने कुमळियां निकळणे लगां ईयां, तां तुहें जाणी लें भई गर्मियां रे दिन औणे औळे।³³ तियां ई ताहली जे तुहें इन्हां गल्लां जो होन्दे हुये देख्वा, तां समझी जायें भई सैं वगत नेडे आईगरा, बल्कि दरवाजे पर ई हाया।³⁴ हऊं तुहाने सच्च बोलां भई इसा पीडिया रे लोकां रे जीते जी ये सारियां गल्लां हुणीं।³⁵ चाये धरती कने अम्बर मिटि जाओ, पर मेरा बचन कदीं नीं मिटणा।

जागदे रौआ

(मरकुस 13:32-37; लूका 17:26-30, 34-36)

36 "तिस दिना कने तिसा घडिया रे बारे च कोई किछ नीं जाणदा, न स्वर्गा च दूत कने न खुद पुत्र, पर सिर्फ पिता जाणां।³⁷ तेदा जे नूह रे दिनां च हुया, तियां ई माळुये रे पुत्रा रा औणा बी हुणा।³⁸ कांभई तियां ई तियां जे लोक जलजला औणे ते पैहले रे दिनां तक खान्दे-पिन्दे रैये, ब्याह करदे रैये, तदुआं तक जे नूह जहाजा पर नीं चढया।³⁹ कने ताहलुआं तक जे जलजला आईने तिन्हां सब्बीं जो बहाई ने नीं लेईया, तदुआं तक तिन्हांजो कोई पता नीं चलया; तियां ई माळुये रे पुत्रा रा औणा बी हुणा।⁴⁰ तिस वगत खेतां च काम्म करदे दुई माळुआं च ते इक चक्कीने लेई जाणा कने दूजा उत्थी रैई जाणा।⁴¹ चकोडू फेरदियां दुई जनानां च ते इक चक्कीने लेई जाणी कने दूजी उत्थी रैई जाणी।⁴² इस खातर तुहें लोक साबधान हुई जावा कांभई तुहें नीं जाणदे भई तुहारे परमेशरा किस दिन औणा।⁴³ पर ये जाणी लवा भई जे घरा रा मालक जाणदा हुन्दा भई चोरा राती जो किसा घडिया आई जाणा तां सैं जागदा रैहन्दा, कने चोरा जो अपने घरें बडने नीं देन्दा।⁴⁴ इस खातर तुहें बी त्यार रौआ, कांभई तिसा घडिया रे बारे च तुहें सोचया बी नीं हुन्गा, तिसा घडिया माळुये रे पुत्रा आई जाणा।

बिश्वास लायक दास कने दुष्ट दास (लूका 12:41-48)

45 फेरी सोचा सैं भरोसे रे लैक सेबक कुण आ तिस्सो जे स्वामिये अपने घरा रे नोकरां-चाकरां रे उपर सरदार बणाया भई सही वगत पर तिन्हांजो रोटी देई दो?⁴⁶ धन्या तिज्रो ओ दास, ताहली जे तेरा स्वामी औवां तां तिज्रो काम्म करदे हुये देख्वां।⁴⁷ हऊं तुहाने सच्च बोलां, तिस स्वामिये तू अपणिया सारिया जायदाता पर अधिकारी बनाई लेणा।⁴⁸ पर जे सैं बुरा दास सोचणे लगे भई मेरे मालका रे औणे जो देर ई,⁴⁹ कने सैं अपने साथी सेबकां ने मार कुट करने लगां कने शराबियां सौगी खाणा-पीणा शुरु करी देआं।⁵⁰ तां तिस मालका येदे दिन औणा, तिस दिन जे सैं तिसरे औणे री सोचदा तक नीं आं,

कने तिसा घडीया जो सै जाणदा नीं हो, ⁵¹ कने तिसरे मालका तिस्सो बड़ी-बुरी सजा देणी कने कपटियां रे बिच तिसरी जगह तह करनी तिसा जगह लोक रोन्दे हुणे कने दान्द कीरडदे हुणे।

दस क्वारियां रा द्रष्टान्त

25 तिस दिन "स्वर्गा रा राज्ञ तिन्हां दस कन्यां साई हुणा सै जे मशालां लेईने लाडे ने मिलणे जो निकळियां। ² तिन्हां चा ते पांज लापरवाह थियां कने पांज समझदार थियां। ³ पंजें लापरवाह कन्यां अपणियां मशालां त लेई लियां, पर तिन्हां सौगी तेल नीं लेआ; ⁴ पर समझदार कन्यां अपणी मशालां सौगी कुप्पियां च तेल बी भरील्या। ⁵ ताहली जे लाडे जो औणे च देर हुईगी, तां सारी कन्यां जो झमाईयां लगियां कने तिन्हांजो निन्द पैईगी।

⁶ "पर अधिया राति जो बाजयां-गाजयां रा शोर हुया: 'देक्खा लाडा आया! तिसने मिलणे बाहरा चला।' ⁷ फेरी सै सारी कन्यां उड्डीने अपणियां मशालां ठीक करने लगिया। ⁸ लापरवाह कन्यां समझदार कन्यां ने बोलया, 'अपणे तेला च ते थोडा जेआ तेल अहांजो देई दवा, कांभई अहां रियां मशालां बुझणे लगी रियां।' ⁹ पर समझदारें जबाब दित्या, 'नां, अहें नीं देई सकदिया कांभई ये न त अहारे खातर पूरा हुणा न ई तुहारे खातर, इस खातर तुहें तेल बेचणे औळे ले जाईने अपणे खातर खरीदी ने ली आवा।' ¹⁰ ताहली जे सै खरीदी ने लौणे जो जाणे लगियां तां लाडा आई पुज्या, कने सै कन्यां जे त्यार थियां, सै तिस सौगी ब्याह रे घरा च चलीगियां कने दरवाजा बन्द करीत्या। ¹¹ इसते बाद सै दूज्जी क्वारियां बी आईने बोलणे लगियां, 'स्वामी जी, स्वामी जी, दरवाजा खोलहा अहां अन्दर औणा। ¹² तिने जबाब दित्या, 'हऊं तुहांने सच्च बोलां, हऊं तुहांजो नीं जाणदा।' ¹³ इस खातर साबधान हुईने रौआ, कांभई तुहें न तिस दिना जो जाणां ये, न तिसा घडिया जो ताहली जे माळुये रे पुत्रा वापस औणा।

तोडयां रा द्रष्टान्त

(लूका 19:11-27)

¹⁴ "स्वर्गा रा राज्ञ तिस माळुये साई हुणा तिने जे परदेश जान्दे हुये अपणे सेबकां जो सद्दीने अपणी जायदात तिन्हांले सौपीती। ¹⁵ तिने इक्की जो चान्दिया रे सिक्क्यां ने भरी रियां पांज थैलियां दित्ती, दूजे जो दो, कने तिजे जो इक; सै हर इक्की जो तिन्हांरी काबलियता रे मुताबिक देईने खुद परदेशा जो चलीया। ¹⁶ तिस्सो जे चान्दिया रे सिक्क्यां ने भरीरी पांज थैलियां मिली थी, तिने इकदम तिस पैसे जो कम्मा च लाईत्या कने पांज थैलियां होर कमाई लियां। ¹⁷ इयां ई तिस्सो जे दो थैलियां मिली थी, तिने बी तिस पैसे ने दो होर कमाई लियां। ¹⁸ पर तिस्सो जे इक मिलीरी थी तिने जाईने जमीना च खड्डा खुणया कने तित्थी अपणे मालका रा सै पैसा दब्बीत्या।

¹⁹ कई दिन बीतणे ते बाद तिन्हां सेबकां रा मालक बापस आया कने हर इक्की ने हिसाब-कताब करने लगया। ²⁰ सै माळु तिस्सो जे चान्दिया रियां पांज थैलियां मिलियां थी अपणे मालका ले गया कने चान्दिया री पांज होर थैलियां नेईने तिसने बोलया, 'मालिक, तुहें मिन्जो पांज थैलियां दित्ती थी, चान्दिया रे सिक्क्यां री ये पांज थैलिया होर इयां सै जे में कमाईयां।' ²¹ तिसरे मालके तिसने बोलया, 'शाबाश! तू भरोसे रे लायक खरा सेबक आ, तें थोडिया जेईया रकमा च मेरा विश्वास जीतील्या; मांह तिजो मतियां चीजां रा अधिकार देणा। अन्दर जा कने अपणे मालका रिया खुशिया च शामिल ओ।'

²² "कने तिस्सो जे दो थैलियां मिली थी, तिने बी आईने बोलया, 'मालिक, तुहें मिन्जो चान्दिया री दो थैलियां दित्ती थी, इन्हांने सौगी ये दो थैलियां होर ई सै जे में कमाईयां।' ²³ तिसरे मालके तिसने बोलया, 'शाबास! तू भरोसे रे लायक खरा सेबक आ, तें थोडिया जेईया रकमा च मेरा विश्वास जितील्या; मांह तिजो मतियां चीजां रा अधिकार देणा। अन्दर जा कने अपणे मालका रिया खुशिया च शामिल ओ।'

²⁴ फेरी सै तिस्सो जे चान्दिया रे सिक्क्यां री इक थैली मिलीरी थी अपणे मालका ले आया कने बोलया, 'मालक, हऊं जाणां भई तू बडा शख्त माळु आ, तू तिस्सो लुणां सै जे तें बाहीरा बी नीं हुन्दा, कने तित्थी जे तें कोई ब्यू नीं बाहीरा हुआं तित्थी ते तू फसल कडी करां। ²⁵ इस खातर हऊं डरिया

कने में जाईने चान्दिया रे सिक्क्यां री थैली जमीना च दब्बीती। देक्ख, सै जे तेरा, सै ये रैया।' ²⁶ तिसरे मालके तिस्सो जबाब दित्या, 'तू इक बुरा कने आलसी सेबक आ, तू जाणां भई हऊं बिणा बाहे लुणां कने तित्थी जे में ब्यू नीं बाहीरा, तित्थीते हऊं फसल कडी करां; ²⁷ तां तिजो मेरा पैसा सहकारा ले जमा करी देणा चाहिन्दा था, फेरी ताहली जे हऊं औन्दा तां सै जे मेरा था ब्याजा समेत त लेई लेन्दा।' ²⁸ इस खातर इसते चान्दिया रे सिक्क्यां री ये थैली लेई लो कने तिसले जे चान्दिया रे सिक्क्यां री दस थैलियां ईयां, इसा तिसजो देई दो। ²⁹ कांभई हर तिस माळुये जो, सै जे किछ तिसले था तिसरा ठीक इस्तेमाल कित्या; तिस्सो होर दित्या जाणा। कने जितणी तिस्सो जरूरत ई, तिस्सो तिसते जादा मिलणा: पर तिसले जे नीं आ, तिसरा ठीक इस्तेमाल नीं कित्या, तिसते सै बी सै जे तिसले आ, खोया जाणा। ³⁰ इस खातर तिस बेकार सेबका जो बाहर नेहरे च पाई दवा, तित्थी जे रोणा कने दन्द कीरडना हुणा।'

न्याय रा दिन

³¹ "ताहली जे माळुये रे पुत्रा अपणिया महिमा च औणा कने सारे स्वर्गदूत तिस सौगी औणे, तां तिस अपणे शानदार संघासणा पर बैठणा। ³² तां सारी जातियां तिसरे सामणे कडी किच्छि जाणियां कने तिस इक्की जो दूजे ते तियां लग करना, तियां जे इक चरवाहा अपणियां बकरियां जो भेड्डां ते लग करां। ³³ तिस भेड्डां जो अपणी दाई ओर कने बकरियां जो बाई ओर खडा करना। ³⁴ फेरी राजे अपणी दाई ओर औळयां ने बोलणा, 'मेरे पिते ते शीष पाईरे लोको, आवा कने सै राज जे तुहारे खातर सृष्टिया जो बनाणे ते पैहले त्यार कितीरा तिसरा अधिकार लेवा। ³⁵ ये राज्य तुहारा कांभई हऊं भूक्खा था कने तुहें मिन्जो किछ खाणे जो दित्या, हऊं त्याह्या था कने तुहें मिन्जो किछ पीणे जो दित्या। हऊं तुहारे नेडे ते जाणे औळा कोई अन्जाण था, कने तुहें हऊं अन्दरा जो नित्या। ³⁶ हऊं नंगा था, तुहें मिन्जो कपडे पैहनाये। हऊं बमार था, कने तुहें मेरी सेवा टहल किच्छि, हऊं बन्दी था, कने तुहें मेरले आये।'

³⁷ "फेरी जबाबा च धर्मी लोकां तिसते पुछणा, 'प्रभु, अहें तुहांजो कदी भूक्खा देखया कने खवाया या त्याह्या देखया कने पीणे जो दित्या? ³⁸ तुहांजो अहें कदी अपणे नेडे ते जान्दा हुआ कोई अन्जान देखया कने अन्दरा जो लेईये या बिणा कपडयां ते देखीने तुहांजो कपडे पैहनाये?' ³⁹ कने अहें कदी तुहांजो बमार या बन्दी देखया कने तेरले आये?' ⁴⁰ "फेरी जबाबा च राजे तिन्हांने बोलणा, 'हऊं तुहांने सच्च बोलीरां ताहली जे कदीं तुहें मेरे भोळे-भाळे भाईयां च ते किसी इक्की खातर बी कुछ कित्या हुंगा तां सै तुहें मेरे ई खातर कित्या।'

⁴¹ फेरी तिस राजे अपणे सजे पासे औळयां ने बोलणा, 'ओ अभागयो! मेरला ते चली जावा, कने सै अग जे शैतान कने तिस रेआं दूतां खातर त्यार किच्छिरी, तिसा अनन्त अगगी च जाईने पौआ। ⁴² येई तुहारी सजा ई कांभई हऊं भूक्खा था पर तुहें मिन्जो खाणे जो किछ नीं दित्या, ⁴³ हऊं अजनबी था पर तुहें हऊं अन्दरा जो नीं नित्या। हऊं कपडयां ते बिणा नंगा था, पर तुहें मिन्जो कपडे पैहनणे जो नीं दित्ते। हऊं बमार था कने बन्दी था, पर तुहें मेरा ध्यान नीं रखया।'

⁴⁴ फेरी तिन्हां बी जबाबा च तिसते पुछणा, 'प्रभु, अहें तुहांजो भूक्खा या त्याह्या या अनजाना या बिणा कपडयां ते नंगा या बमार या बन्दी कदी देखया कने तेरी सेवा नीं किच्छि।' ⁴⁵ फेरी तिस जबाबा च तिन्हांने बोलणा, 'हऊं तुहांने सच्च बोलीरां ताहली जे कदीं तुहें मेरे भोळे-भाळे चेलयां च ते किसी इक्की खातर बी किछ करने च लापरवाही बरती तां सै तुहें मेरे खातर ई किछ करने च लापरवाही बरती।' ⁴⁶ फेरी इन्हा बुरेयां लोकां अनन्त काल री सजा भुगतणी कने धर्मी लोकां अनन्त काल री जिन्दगी पाणी।'

यीशुये रे खलाफ चाल चलना

(मरकुस 14:1,2; लूका 22:1,2; यूहन्ना 11:45-53)

26 ताहली जे यीशु ये सारी गल्लां करी बैठया तां अपणे चेलयां जो बोलणे लगया, ² "तुहें लोक जाणां ये भई दुई दिनां बाद फसह रा

त्योहार आ, कने माह्ये रा पुत्र कूसा पर चढ़ाये जाणे खातर पकड़वाया जाणा।”

3 तां मुखिये याजक कने बजूरु नेता कैफा नौवा रे महायाजका रे घरा रे अंगणा च कड़े हुये, 4 तिन्हें किसी तरकीबा रे मुतानिक यीशुये जो पकड़ने कने मारने री योजना बनाई। 5 पर सैं बोलीरां थे, “अहांजो ये त्योहारा रे दिनां च नीं करना चाहिन्दा, नैत कित्ति येदा नीं ओ भई लोक कोई दंगा फसाद करो।”

बैतनिय्याह च यीशुये रा अभ्यंजन

(मरकुस 4:3-9; यूहन्ना 12:1-8)

6 यीशु ताहली जे बैतनिय्याह च शमोन कोढ़ीये रे घरें था, 7 जिस वगत सैं रोटी खाणे लगीरा था, ताहली इक जनाना संगमरमरा रिया कौलिया च बड़ा मैहन्गा सैंन्ट भरीने ल्याई, कने सैं तिसरे तिसरे सिरा पर मलीत्या। 8 तां जे तिसरे चेलयां देखया तां सैं गुस्सा हुईये, “इस सैंन्टा री बर्बादी कजो कित्ति? 9 ये सैंन्ट मतयां पैसयां च बिकी सकां था कने फेरी तिस पैसे जो दीन दुखियां च बंडया जाई सकां था।” 10 यीशु जाणिया भई ये क्या बोलीरां ये फेरी तिनै तिन्हाने बोलया, “तुहें इसा जनाना जो कजो परेशान करीरां ये? तिसे त मेरे खातर इक बांका काम्म कित्या। 11 कांभई दीन दुखियां त सदा जो तुहांले रैहणा, पर मांह सदा जो तुहां रिया सौगी नीं रैहणा। 12 तिसे मेरे शरीरा पर मुशकी सैंन्ट छिड़की ने मिन्जो गडणे री तयारी कित्ति। 13 हऊं तुहांने सच्च बोलां, भई सारे संसारा च तित्थी जे किति बी इसा खुशखबरिया रा प्रचार कित्या जाणा, तित्थी इसा रे इस कम्मा रा चर्चा तिसा रिया यादा च कित्या जाणा।”

यहूदा इस्करियोती रा विश्वासघात

(मरकुस 14:10,11; लूका 22:3-6)

14 फेरी यहूदा इस्करियोती सैं जे तिसरे चेलयां च ते इक था, प्रधान याजकां ले गया कने तिन्हाने बोलया, 15 “जे यीशुये जो हऊं तुहांजो पकड़वाई दूँ तां तुहें लोक मिन्जो क्या देंगे?” तिन्हें तिस्सो चान्दिया रे तीह सिक्के तोह्ली ने देईते। 16 कने यहूदा तिसा ई घड़िया ते यीशुये जो पकड़वाणे रा मौका देखणे लगया।

चेलयां सौगी फसह री अन्तिम धाम

(मरकुस 14:12-21; लूका 22:7-13,21-23; यूहन्ना 13:21-30)

17 बिणा मलेडे री रोटीया रे त्योहारा ते इक दिन पैहले यीशुये रे चेलयां नेडे आईने पुछया, “तुहें क्या चायें भई अहें तेरे खाणे खातर फसह रिया धामा री तयारी कित्ति जाईने करीये?” 18 तिनै बोलया, “गाँवा च तिस माह्ये ले जवा कने तिसने बोला, ‘गुरु चांह भई मेरा वगत नेडे आ, हऊं तेरे घरें अपणयां चेलयां सौगी फसह रा त्योहार मनाणे औळा।’ 19 फेरी चेलयां यीशुये री आज्ञा रा पालन कित्या कने फसह रे त्योहारा री तयारी कित्ति।

20 दिन ढलदे यीशु अपणे बारा चेलयां सौगी रोटी खाणे खातर बैठया। 21 ताहली जे सैं रोटी खाईरां थे तां तिनै बोलया, “हऊं सच्च बोलां भई तुहां च ते इक्की हऊं धोखे ने पकड़वाणा।” 22 इस पर सैं बडे दुखी हुये, कने तिन्हा च ते हर इक तिसते पुछणे लगया, “गुरु जी, क्या सैं हऊं त नीं आ?” 23 फेरी यीशुये जबाब दित्या, “सैं ई सैं जे मरने सौगी इक्की थालिया च खां तिस ई हऊं पकड़वाणा। 24 माह्ये रे पुत्रा त जाणा ई हाया, तियां जे भई शास्त्रां च तिसरे बारे च लिखीरा, पर लागत ई तिस माह्ये जो तिसरे जरिये जे माह्ये रा पुत्र पकड़वाया जां: तिस माह्ये रे खातर भला था भई तिसरा जन्म ई नीं हुईरा हुन्दा। 25 फेरी तिसरा पकड़वाणे औळा यहूदा बोलणे लगया, “हे रब्बी, क्या सैं हऊं आ?” यीशुये तिसने बोलया, “हां, येदा इ हाया तेदा जे तैं बोलया।”

प्रभु-भोज

(मरकुस 14:22-26; लूका 22:14-20; 1कुरिन्थियों 11:23-25)

26 ताहली जे सैं खाणा खाई ई करां थे तां यीशुये रोटी लेई, कने शीष देईने तोड़ी, फेरी सैं चेलयां जो देन्दे हुये तिनै बोलया, “लवा इसाजो खावा, ये मेरी देह ई।” 27 फेरी तिनै प्याला चक्कया कने धन्यावाद करने ते बाद तिस्सो तिन्हाजो देन्दे हुये बोलया, “तुहें सारे इस च ते थोड़ा-थोड़ा पिवा। 28 कांभई ये बाचा रा मेरा सैं खून आ, सैं जे मते लोकां खातर बगाया जाईरां, ताकि तिन्हारे पापां जो माफ करना सम्भव हुई सको। 29 हऊं तुहांने बोलां भई अंगूरां रा ये रस तिस दिन तक कदीं नीं चखणा, तदुआं तक जे अपणे पिते रे राजा च तुहां सौगी नौआं दाखरस नीं पी लूं।” 30 फेरी सैं फसह रा भजन गाईने जैतून पहाड़ा पर चलीये।

पतरसा रे इन्कार करने री भविष्यवाणी

(मरकुस 14:27-31; लूका 22:31-34; यूहन्ना 13:36-38)

31 फेरी यीशुये तिन्हाने बोलया, “आज राती जो तुहां सारयां रा मांह परा ते विश्वास टूटी जाणा, कांभई पवित्र शास्त्रा च लीखिरा: “मांह चरवाहा मारना, कने झुण्डा ते भेडुं बिखरी जाणियां।” 32 पर फेरी भीं ते ज्यूनदा हुणे ते बाद मांह तुहांते पैहले ई गलील चली जाणा।” 33 पतरसे जबाब दित्या, “चाहे सारयां रा विश्वास तुहां परा ते टूटी जांगा, पर मेरा विश्वास कदीं नीं टुटणा।” 34 यीशुये तिसने बोलया, “हऊं तेरने सच्च बोलां आज इसा राति कुकड़ा रे झांग देणे ते पैहले तू तिन बार मेरा इन्कार करना।” 35 फेरी पतरसे तिसने बोलया, “जे मिन्जो तेरिया सौगी मरने बी पौ, तां बी मांह तुहें कदीं नीं नकारने।” कने बाकी सारयां चेलयां बी येदा ई बोलया।

गतसमनी च प्राथना

(मरकुस 14:32-42; लूका 22:39-46)

36 फेरी यीशु तिन्हां सौगी गतसमनी नौवा री इक्की जगह च आया कने अपणे चेलयां ने बोलणे लगया, “येथी बैठीरे रैयां, तदुआं तक जे हऊं ओथी जाऊं कने प्रार्थना करूं।” 37 सैं पतरस कने जब्दिये रे दुई पुत्रां जो सौगी लेईया, कने दवास कने व्याकुल होणे लगया। 38 फेरी तिनै तिन्हाने बोलया, “मेरा मन बड़ा दुखी आ, येदा लगीरां भई मेरे प्राण निकलणे लगीरे। तुहें येथी रुका कने मेरे सौगी जागदे रौआ।” 39 फेरी थोड़ा अग्रे खिसकणे ते बाद सैं मुँहा रे भार पैईने, प्रार्थना करने लगया, “हे मेरे पिता, जे हुई सको तां दुखा रा ये प्याला माहला ते टाळी दे, तां बी तेदा जे हऊं चाँह तेदा नी, पर तियां जे तू चाँह तियां ई ओ। 40 फेरी सैं अपणे चेलया ले गया कने तिनै तिन्हाजो सुत्तीरा देखया, तिनै पतरसा ने गलाया, “क्या तुहें मेरिया सौगी इक घड़ी बी नीं जागी सके? 41 जागदे रौआ, कने प्रार्थना करा ताकि तुहें किसी मतेहाना च नीं पौ: तुहांरी आत्मा त तयार ई, पर शरीर कमजोर आ।” 42 फेरी इक बार भीं तिनै जाईने प्रार्थना कित्ति कने बोलया, “हे मेरे पिता, जे दुखा रा ये प्याला मेरे पिते बगैर नीं टली सकदा तां तेरी इच्छा पूरी ओ।” 43 फेरी तिनै आईने सैं भीं सुत्तिरे देखे, कांभई तिन्हा रियां अक्खीं निन्दा ने भरौई रियां थी। 44 तिन्हांजो छड्डीने सैं फेरी भीं चलीया, कने तिज्जी बार भीं पैहले साई तिन्हां ई शब्दां च प्रार्थना कित्ति। 45 फेरी यीशु अपणे चेलयां ले गया कने तिन्हांते पुछया, “क्या तुहें हुण बी रामा ने सुत्तिरे? सुणा, सैं घड़ी आई पुज्जीरी, ताहली जे माह्ये रा पुत्र पापियां रे हत्था च पकड़वाया जाणा। 46 उड्डा, आओ चलिये; देकरा, मिन्जो पकड़वाणे औळा नेडे आई पुज्जीरा।”

यीशुये रा धोखे ने पकड़वाया जाणा

(मरकुस 14:43-50; लूका 22:47-53; यूहन्ना 18:3-12)

47 यीशु ताहली जे गलाणे ई लगीरा था भई यहूदा सैं जे बारहां च ते इक था आया, तिस सौगी मुख्य याजकां कने यहूदी नेतयां री भेज्जी री इक बड्डी भीड़, तलवारां कने डन्डे लेईने आये। 48 तिसजो पकड़वाणे औळे तिन्हांजो ये संकेत दित्या: “तिसजो जे हऊं चुमगा सैं ई यीशु आ; तिस्सो पकड़ी लेआं।” 49 फेरी सैं यीशुये ले गया कने बोलया, “हे रब्बी, नमस्ते!” कने बस

तिने यीशुये ते चुम्मी लेई ली। 50 यीशुये तिसने बोलया, “दोस्त, जिस कम्मा रे खातर तू आईरा, तिस्सो करी लै।” फेरी तिन्हे तिसले आईने यीशु पकड़या कने बन्दी बणाईल्या। 51 फेरी सै लोक जे यीशुये सौगी थे तिन्हां च ते इक्की अपणी तलवार कड्डी कने महांयाजकारे रे सेबका पर बार कित्या कने तिसरा कान डवाईल्या। 52 फेरी यीशुये तिन्हाने बोलया, “अपणिया तलवारा जो म्याना च रख कांभई सै जे तलवार चलांये सै तलवारा ने ई मारे जाणे। 53 क्या तुहें नी सोचदे भई हऊँ अपणे पिते ने बिनती करी सक्कां कने तिन्हा इकदम स्वर्गदूतां री बारा पलटणां ते बी जादा सेना मेरले हुण भेजी देणी? 54 पर जे हऊँ येदा करूँ तां पवित्र शास्त्रा च लिखी रियां ये गळां कियां पूरी हुणियां, भई सारा कुछ इयां ई हुणा जरूरी आ? 55 तिस वगत यीशुये भीडा जो गलाया, “तुहें मिन्जो पकड़ने तलवारां कने इन्डयां लेईने इयां आये तियां जे किसी चोरा जो पकड़ने आईरे? हऊँ हर रोज मन्दरा च बैठीने उपदेश देआं था, पर ताहली तुहें हऊँ कां नी पकड़या। 56 पर ये सब किछ इस खातर हुया भई भविष्यवक्त्यां रा लीखिरा पूरा ओ।” फेरी तिसरे सारे चले तिस्सो छड्डी ने नड्डीये।

पंचेती रे सामणे यीशु

(मरकुस 14:53-65; लूका 22:54,55,63-71; यूहन्ना 18:13,14,19-24)

57 तिन्हे जे यीशुये जो पकड़या था, सै तिस्सो कैफा नौंवा रे महांयाजकारे सामणे लेईगे, तिन्हे शास्त्री कने बजुर्ग यहुदी नेता बी कडे हुईरे थे। 58 पतरस तिसते दूर-दूर रैईने तिसते पिछे-पिछे महांयाजकारे अंगणा तक चलीया, कने अन्त देखणे जो तिन्हे पैहरेदारां सौगी तिन्हांरे बिच बैठीया। 59 महांयाजकारे कने सारी महांसभा यीशुये जो मारने खातर तिसरे बरोधा च झुठी गबाहिया रिया खोजा च थे, 60 पर कई झूठे गवाह अग्गे आये कने तिन्हे बडे झूठ बोले। बाद बिच दो माहु अग्गे आये, 61 कने बोलया, “इने बोलया था भई हऊँ परमेशरा रे मन्दरा जो ढाई सक्कां, कने तिजे दिन भी बणाई सक्कां।”

62 फेरी महांयाजकारे खडे हुईने यीशुये ते पुछया, “क्या जबाबा च तू किछ नी बोलणा चाँह? भई ये लोक तेरे खिलाफ क्या गबाही देई करां ये?” 63 पर यीशु चुप रैया। फेरी महांयाजकारे तिसते पुछया, “हऊँ तिजो जिन्दे परमेशरा री सगन्द देआं भई जे तू परमेशरा रा पुत्र मसीह आ तां अहांने गलाईदे।” 64 यीशुये जबाब दित्या, “तैं अपूँ ई बोलया; पर हऊँ तुहां तुहांने बोलां भई तुहां माहुये रा पुत्र सर्वशक्तिमान परमेशरा रे सज्जे पासे बैठीरा कने स्वर्गा रे बदलां पर बडे छोड औन्दे देखणा।” 65 महांयाजकारे येदा सुणीने इतणा गुस्सा हुईया भई सै अपणे कपडे फाडदे हुये बोलणे लगया, “इने परमेशरा री निन्दा कित्ति, हुण अहांजो होर गबाह नी चाहिन्दे? तुहें सारयां इसजो परमेशरा रे बरोधा च बोलदे हुये सुणया। 66 तुहें क्या सोचां ये? तिन्हे जबाब दित्या, “ये अपराधी आ, इसजो मरना ई चाहिन्दा।” 67 फेरी तिन्हे तिसरे मुँहा पर थुक्कया कने तिस्सो मुक्के मारे, कुछ लोकें थप्पड मारया कने बोलया, 68 “ओ मसीह, भविष्यवाणी कर भई सै कुण आ तिने जे तु मारया?”

पतरसा रा इन्कार

(मरकुस 14:66-72; लूका 22:56-62; यूहन्ना 18:15-18,25-27)

69 पतरस हलित्ये बाहर अंगणा च ई नीचे बैठीरा था भई इक्क दासी तिसले आई कने बोलया, “तू बी त तिस गलीली यीशुये सौगी था।” 70 पर पतरस सबनी रे सामणे मुकरीया तिने बोलया, “मिन्जो नी आ पता भई तु क्या बोली राई।” 71 ताहली जे सै बाहर दरवाजे तक इ गया था भई इक होर जनाने सै देखया कने जितणे लोक उत्थी थे, तिन्हाने बोलया, “थे बी त यीशु नासरिये ने था।” 72 इक बार भी पतरसे नां कित्ति कने कसम खाईने बोलया, “हऊँ तिस माहुये जो नी जाणदा।” 73 थोडिया जेआ देरा बाद उत्थी खड़ीरे लोक पतरसा ले आये कने तिसने बोलया, “तेरी बोली साफ दस्सी राई भई तू असल च तिन्हां च ते इक आ।” 74 फेरी सै अपूँ जो धिक्कारने कने सगन्द खाण लगया: “हऊँ तिस माहुय जो नी जाणदा।” तिस ई वगत कुकडे झांग दित्ति। 75 ताहली ई पतरसा जो यीशुये री गलाई री गल्ल आद आईगी तिने बोलया था, भई “कुकड़ा रे झांग देणे ते पैहले तू तिन बार मेरा इन्कार करना।” फेरी पतरस बाहर जाईने बड़ा भरी रोया।

पिलातुस रे सामणे यीशु

(मरकुस 15:1; लूका 23:1,2; यूहन्ना 18:28-32)

27 सबरेके जुन्ना सारे मुखिया याजकें कने बजुर्ग नेतयां यीशुये जो मरवाणे री योजना बनाई। 2 फेरी सै तिस्सो बन्हीने लेईये कने राजपाल पिलातुसा रे हत्थे सौपील्या।

यहूदा रा आत्म हत्या करना

(पेरितां रे काम्म 1:18,19)

3 यीशुये जो पकड़वाणे ओळे यहूदे ताहली जे देखया भई यीशु अपराधी बणाईल्या तां सै बड़ा पछताया कने तिने मुखिया याजकें कने बजुर्ग नेतयां जो चान्दिया रे सै तीह सिक्के बापस देईते, 4 कने बोलया, “मैं इक बेदाग माहुये जो मरवाणे खातर पकड़वाईने पाप कित्या।” तिन्हे लोकें बोलया, “अहांजो क्या? तू ई जाण।” 5 इस पर यहूदे चान्दिया रे तिन्हां सारे सिक्कयां जो मन्दरा रे अन्दर सट्टीत्या कने चलीया, फेरी बाहर जाईने अपूँ जो फाँसी लाईली।

6 मुख्य याजकें सै सिक्के चक्कीले कने बोलया, “कायदे रे मुताबिक इस पैसे जो मन्दरा रे खजाने च रखणा ठीक नी आ, कांभई ये खूना रा मुल था।” 7 इस खातर तिन्हे अपूँ चीयें सहमत हुईने फैसला कित्या भई तिस पैसे ने तिन्हे यरुशलम च औणे ओळे लोकां रे मरने पर तिन्हाजो दबाणे जो कम्हारा ते खेत मुल्ले खरीदील्या। 8 इसा बजह ने सै खेत अज्जा तक ‘खूना रे खेता’ रे नौंवा रे जाणया जां। 9 फेरी सै बचन जे यिर्मयाह भविष्यवक्ते बोलया था सै पूरा हुया: “तिन्हे चान्दिया रे तीह सिक्के लै, सै रकम सै जे इस्राएल रे लोकें तिसरे खातर देणा तह कित्ति थी, 10 कने तियां जे प्रभुये मिन्जो हुक्म दित्या था तिस हुक्म रे मुताबिक तिस पैसे ने कम्हारा रा खेत खरीद्या।”

पिलातुस रे स्वाल

(मरकुस 15:2-5; लूका 25:3-5; यूहन्ना 18:33-38)

11 इस दौरान यीशु राजपाला रे सामणे पेश हुया तां राजपाले तिसते पुछया, “क्या तु यहूदियां रा राजा?” यीशुये तिसने बोलया, “तू खुद बोलीरां।” 12 दुजिया खा प्रधान याजकारे कने बजुर्ग यहूदी नेते तिस पर दोष लगाई रां थे, तां तिने कोई जबाब नी दित्या। 13 इस पर पिलातुस राजपाले तिसते पुछया, “क्या तू नी सुणीरां भई ये तूह पर कितणे इल्जाम लगाई रांये?” 14 पर तिने तिसजो इक्की गल्ला रा बी जबाब नी दित्या, पिलातुसा जो इस पर बड़ी रेहानी हुई।

मौती रिया सजा रा हुक्म

(मरकुस 15:6-15; लूका 23:13-25; यूहन्ना 18:39-19:16)

15 फसह रे त्योहार रे मौके पर राजपाला रा रवाज था भई सै किसी बी इक कैदिये जो, तिस्सो जे लोक चाँह थे, तिन्हांरे खातर छडी देआं था। 16 तिस बगत बरअब्बा नौंवा रा इक मन्नाया हुआ कैदी उत्थी था 17 ताहली जे लोक कडे हुये, तां पिलातुस राजपाले तिन्हांते पुछया, “तुहें किस्सो चाँये भई हऊँ तुहारे खातर किस्सो छड्डू? बरअब्बा जो, या तिस यीशुये जो सै जे मसीह कहलाया जां?” 18 कांभई सै जाणां था भई तिन्हे तिस्सो जलण रे कारण पकड़वाया था। 19 पिलातुस ताहली जे न्याय रे आसणा पर बैठीरा था तां तिस रिये जनाने तिसले इक संदेशा भेजया, “तिस सिधे-साधे कने सच्चे माहुये सौगी किछ बी देखां करदा, कांभई मैं तिसरे बारे च इक सपना देखया तिसरे कारण आज हऊँ बड़ी बेचैन रैई।”

20 प्रधान याजकें कने बजुर्ग यहूदी नेतयां लोकां जो बहकाया भई सै पिलातुसा ते बरअब्बे जो छडणे री कने यीशुये जो मारने री मांग करा। 21 राजपाले तिन्हांते पुछया, “इन्हां दुई कैदियां च ते तुहें माहते अपणे खातर किसजो छडवाणा चांये?” तिन्हे बोलया, “बरअब्बे जो।” 22 तां पिलातुसे तिन्हांते पुछया, “फेरी यीशुये जो, सै जे मसीह कहलाया जां, तिसरा क्या करूँ?” 23 पिलातुसे बोलया, “कां, तिने क्या अपराध कित्तिरा?” कने सै होर बी जोर-जोरा ने बोलणे लगे, “इसजो कूसा पर चढ़ावा।” 24 ताहली जे पिलातुसे देखया भई हुण कोई फैदा नी आ कने दंगा भडकदा ई चलीरा था,

तां तिने थोडा पाणी लेआ कने भीड़ा रे सामणे अपणे हात्थ धोये कने बोलया, "हऊँ इस धर्मी माहुये रे खूना ते निर्दोष आ, तुहें ई जाणा।" 25 सारयां लोके जबाब दित्या, "इसरिया मौती री जबाबदेही अहे कने अहारे बचे स्वीकार करां ये।" 26 ताहली जे पिलातुसे तिन्हारे खातर बरअब्बे जो छुडीत्या कने यीशुये जो कोडे लाईने क्रूसा पर चढाणे खातर सौपी तया।

सपाहियां रा यीशुये जो बेज्जत करना

(मरकुस 15:16-20; यूहन्ना 19:2,3)

27 फेरी पिलातुस राजपाला रे सपाई यीशुये जो किले च लेईये कने सपाईयां री सारी पलटन यीशुये रे चहूँ पासयां कडी हुईगी, 28 तिन्हे तिसरे कपडे खोलीते कने चमकदार लाल रंगा रे कपडे पैहनाये, 29 कने कन्डया ने बणीरा इक मुकट तिसरे सिरा पर रखीत्या, तिसरे सजे हत्था च इक सरकन्डा देईत्या कने तिसरे सामणे गोडयां रे भार बैठीने तिसरा मजाक डवाणे लगे कने बोलया, "यहूदियां रा राजा अमर रौ।" 30 फेरी तिन्हे तिसरे मूहा पर थुक्कया; कने सरकन्डा तिसरे हत्था ते खोईने तिसरे सिरा पर मारने लगे। 31 ताहली जे सै तिसरा मजाक बणाई बैठे तां तिसरा चोला खोलीत्या कने तिस्सो तिसरे कपडे पैहनाई ने क्रूसा पर चढाणे खातर लेई चले।

यीशुये रा क्रूसा पर चढाया जाणा

(मरकुस 15:21-32; लूका 23:26-43; यूहन्ना 19:17-27)

32 बाहर जान्दे हुये तिन्हांजो शमौन नौआ रा इक कुरैनी माहु मिलया। तिन्हे तिस पर जोर पाया भई सै यीशुये रा क्रूसा चक्कीने चलो। 33 फेरी ताहली जे सै गुलगुता यनिके खोपडी नौआ रिया जगह पर पुजे तां 34 तिन्हे यीशुये जो सिरका मिलीरा दाखरस पीणे जो दित्या, पर ताहली जे यीशुये सै चखया तां तिने तिस्सो पीणे जो मना करीत्या। 35 फेरी तिन्हे तिस्सो क्रूसा पर चढाईत्या, कने पर्चीयां पाईने तिसरे कपडे बन्डी ले, 36 कने तित्थी बैठीने तिसरा पैहरा देणे लगे। 37 तिन्हे तिसरा दोषपत्र लिखीने तिसरे सिरा गास टंगीत्या, भई "ये यहूदियां रा राजा यीशु आ।" 38 तिस ई वगत तिस सौगी दो चोर बी क्रूसा पर टगाये इक तिसरे सजे कने इक तिसरे खबे हत्था खा। 39 औन्दे-जान्दे लोक सिर हलाई-हलाई ने तिसरी बुराई करीरां थे, 40 कने बोलीरां थे, "अरे मन्दरा जो ढाईने तिजे दिन भी ते बनाणे औळे, अप्पू जो त बचा! जे तू परमेशरा रा पुत्र आ तां क्रूसा परा ते उतरीने थले औ।" 41 इयां इ महांयाजक, शास्त्री कने बजुर्ग यहूदी नेतयां सौगी तिसजो येदा बोलीने मजाक डवाईरां थे, 42 "इने होरीं जो बचाया, कने खुद अप्पू जो नीं बचाई सकदा। ये त 'इन्नाएल रा राजा आ'। ये हुण क्रूसा ते निचे उतरी जाओ जे तां अहे इस्सो मत्री जागे। 43 इने परमेशरा पर भरोसा रखया; जे सै इस्सो चाँह, तां हुण इसजो छडवाई लो, कांभई इने बोलया था, 'हऊँ परमेशरा रा पुत्र आ।' 44 तिन्हे चोरें बी सै जे तिसने सौगी क्रूसा पर चढाईरे, तिन्हे बी तिसरा येदा मजाक डवाया।

यीशुये रा प्राण छडणा

(मरकुस 15:33-41; लूका 23:44-49; यूहन्ना 19:28-30)

45 फेरी तिस सारे देशा च दपैहरा ते लेईने तिन बजे तक नेहरा ई छाईरा रैया। 46 कोई तिन बजे रे आस-पास यीशुये उच्चिया अवाजा च गलाया, "एली, एली, लमा शबक्तनी?" यनिके "मेरे परमेशर, मेरे परमेशर, तैं मिन्जो कजो छडीत्या?" 47 तित्थी खडीरे लोकां च ते किछ ये सुणीने बोलणे लगे भई ये एलियाह जो हाक पाईरां। 48 फेरी तिन्हां च ते इक माहु छोडचा ने दौडीने सिरके च चोक्कीरा कपडा सरकन्डे पर टंगाईने ल्याया कने सै यीशुये जो चुसणे जो दित्या। 49 पर होरीं लोके बोलया, "छड्ढा देखां ये भई एलियाह इस्सो बचाणे औआं कि नीं।" 50 यीशुये फेरी भीं ते इक बार जोरा ने हाक पाईने प्राण छडीते। 51 तिसा ई घडिया मन्दरा रा पड्डा उपरा ते लेईने थले तक फटीने दो टुकडे हुईया; धरती कम्बीगी कने चडानां फटणे लगी गियां, 52 कने कब्रां खुली गियां कने परमेशरा रे मरीरे पवित्र लोकां रे कई मुदें शरीर जिन्दा हुईये, 53 सै कब्रां ते बाहर निकली ने आईये कने यीशुये रे जिन्दा हुणे ते बाद पवित्र नगरा च जाईने मतयां जो दिस्से। 54 फेरी सुबेदार कने सै जे

तिस सौगी यीशुये रा पैहरा देई करां थे, हिल्लण कने सै जे कुछ तित्थी हुया था तिस्सो देखीने बडे भरी डरीये कने बोलया, "सच्चीजो ये परमेशरा रा पुत्र था।" 55 तित्थी मती सारी जनानां सै जे यीशुये री देखभाल करदियां गलील ते तिस सौगी आई रियां थी, दूरा ते ये सब देखीरां थियां। 56 तिन्हां च मरियम मगदलीनी, याकूब कने योसेस री माता मरियम, कने जबदिये रे पुत्रां री माता थी।

यीशुये रा कब्रा च रखया जाणा

(मरकुस 15:42-47; लूका 23:50-56; यूहन्ना 19:38-42)

57 सञ्जके जुन्ना अरिमतियाह नगरा ते यूसुफ नौवा रा इक सेठ आया, सै खुद ई यीशुये रा चेला बणीगरा था। 58 तिने पिलातुसा ले जाईने यीशुये री लाश मंगी। फेरी पिलातुसे हुक्म दित्या भई लाश तिस्सो देई दित्ती जाओ। 59 यूसुफे लाश लेई कने तिसाजो इक नौईयां चादरा च लपेटी ने, 60 तिस्सो अपणिया नौईयां कब्रा च रखया, सै कब्रा तिने चडान कटाई ने बणवाई री थी, कने कब्रा रे दरवाजे पर बड्डे पत्थरा ने ढक्कण देईने चलीया। 61 मरियम मगदलीनी कने दूजी जनाना मरियम तित्थी कब्रा रे सामणे बैठी रियां थी।

कब्रा पर पैहरा

62 अगले दिन ताहली जे शुक्रवार बीतिया, तां प्रधान याजक कने फरीसी पिलातुसा ने मिले। 63 तिन्हे बोलया, "महाराज, अहांजो याद आ भई तिने भरमाणे औळे ताहली जे सै ज्युन्दा था, बोलया था, 'मांह तिजे दिन ज्युन्दे हुई जाणा।' 64 तां हुक्म देवा भई तिजे दिना तक कब्रा री रखवाली कित्ति जाओ, येदा नीं ओ भई तिसरे चेले आईने तिस्सो चोरी ने लेई जाओ कने लोकां ने बोलणे लगे, 'सै मूर्ईरयां च ते ज्युन्दा हुईगरा।' फेरी पिछला धोखा पैहले ते बी बुरा होणा।" 65 पिलातुसे तिन्हाने बोलया, "तुहें पैहरे खातर सपाई लेई सकां ये। जावा अपणिया समझा रे मुताबिक रखवाळी करा।" 66 फेरी सै सपाईयां जो सौगी लेईने चलीये, कने पत्थरा पर मोहर लाईने कब्रा री रखवाळी कित्ति।

यीशुये मूर्ईरयां ते जिन्दा हुणा

(मरकुस 16:1-10; लूका 24:1-12; यूहन्ना 20:1-10)

28 शब्द रे दिना ते बाद हफते रे पैहले दिन पाँ फटदे ई मरियम मगदलीनी कने दूजी जनाना मरियम कब्रा जो देखणे आई। 2 कने देवखा, इक बडा भूचाल आया, कांभई परमेशरा रा इक स्वर्गदूत स्वर्गा ते उत्थी उतरया कने कब्रा रा पत्थर कन्डे करीने तिस पर बैठीया। 3 तिसरा रुप समाणा रिया बिजळिया साई चमकणे लगीरा था कने तिसरे कपडे बर्फा साई चिट्टे थे। 4 सै सपाही जे कब्रा रा पैहरा देई करां थे, उरा रे मारे कम्बणे लगे कने मूर्ईरयां साई हुईये। 5 फेरी स्वर्गदूते जनानां ने बोलया, "डरदियां मता, हऊँ जाणां भई तुहें यीशुये जो टोळी राईया सै जे क्रूसा पर चढाया गैईरा। 6 सै येथी नीं आ, पर थियां जे तिने बोलया था भई मांह मरने ते बाद तिजे दिन फेरी भीं ते ज्युन्दे हुई जाणा। आवा, तिसा जगह जो देवखां ये, तित्थी जे प्रभु रखीरा था, 7 कने छोडचा ने जाईने तिसरे चेलयां ने बोला भई सै मूर्ईरयां च ते ज्युन्दा हुईगरा, कने हुण सै तुहांते पैहले गलील जो जाई करा, तुहां सै उत्थी देखणा! सै जे मै तुहांने गलाया तिस्सो आद रखयो।" 8 सै जनानां डर कने खुशिया ने भरीगियां कने कब्रा ते मुडीने तिसरयां चेलयां जो खुशखबरी देणे खातर दौडीने गैईयां। 9 फेरी अचानक यीशु तिन्हांजो मिलया। "ओ तुहें!" सै तिसरे नेडे आईयां कने तिसरे पैर छुईने तिसजो प्रणाम कित्या। 10 फेरी अचानक यीशु तिन्हांजो मिलया। "ओ तुहें!" सै तिसरे नेडे आईयां कने तिसरे पैर छुईने तिसजो प्रणाम कित्या।

पैहरेदारां री सूचना

11 हल्लियें सै जनानां रस्ते ची थीयां भई किछ सपाई सै जे पैहरेदारां च थे, नगरा च गये कने जो किछ उत्थी हुया तिसरा सारा हाल प्रधान याजकां जो सुणाईत्या। 12 फेरी तिन्हे बजुर्ग यहूदि नेतयां ने मिलीने इक योजना बनाई कने सपाहियां जो मता सारा चान्दी देईने बोलया, 13 "येदा बोलयो भई राती

ताहली जे अहें सुत्तीरे थे, तां तिसरे चले आईने तिस्सो चोरी ने लेईये।¹⁴ जे तुहांरी ये गल्ल राजपाला रे कन्नां तक पुज्जी जांगी, तां अहें तिस्सो समझाई लेंगे कने तुहां पर कोई आँच नीं औणे देंगे।”¹⁵ पैहरेदारें पैसा लेईने तेढा ई कित्या, तेढा जे तिन्हांजो दस्सीरा था। येह गल्ल यहूदियां च आज्ञ तक इसी रुपा च फैली री।

यीशुये रा नजर औणा कने अन्तिम आज्ञा

(मरकुस 16:14-18; लूका 24:36-49; यूहन्ना 20:19-23; प्रेरितां रे काम्म 1:6-8)

¹⁶ फेरी ग्यारा रे ग्यारा चले गलील री तिसा पहाड़िया पर पुज्जीगे तिथि जाणे जो जे यीशुये तिन्हांजो बोलीरा था।¹⁷ ताहली जे तिन्हे यीशुये जो

देखया तिन्हे तिसजो प्रणाम कित्या, पर किछ चेलयां रे मना च सन्देह था।¹⁸ फेरी यीशुये चेलयां ले जाईने बोलया, “स्वर्गा रा कने पृथ्विया रा सारा अधिकार मिन्जो दित्तीरा ।¹⁹ इस खातर तुहें जाओ, सारी जातियां रे लोकां जो चेला बनावो; कने तिन्हांजो पिता, पुत्र, कने पवित्र आत्मा रे नौवा ते वपतिस्मा देवा,²⁰ कने तिन्हांजो ये सारी गल्लं तिन्हांरी जे में तुहांजो आज्ञा दित्तीरी, मनणा सखावो; कने देखा, मांह संसारा रे अन्त तक सदा तुहां सौगी हुणा।”

मरकुस

यूहन्ना बपतिस्मा देणे औळे रा प्रचार

(मत्ती 3:1-12; लूका 3:1-18; यूहन्ना 1:19-28)

1 परमेशरा रे पुत्र यीशु मसीह रे सुसमाचारा री शुरुआत। 2 तियां जे यशायाह नबीये रिया कताबा च लिखीरा भई: “सुण! हऊं अपने दूता जो तेरते पैहले भेज्या रांहा। तिस तेरे खातर रस्ता ठीक करना।” 3 जंगला च ते इक आदमी हाक पांदा हुआ सुणया रां भई प्रभुये रे आऊणे खातर रस्ता बणावा, कने तिसरे खातर बाटां सिधियां करा।” 4 यूहन्ना आया, सै जे जंगला च बपतिस्मा देयां था, कने पापां रिया माफिया खातर मना जो फेरने कने बपतिस्मे रा पचार करां था। 5 सारे यहुदिया जिले रे कने यरुश्लेम शहरा रे लोक यूहन्ने लौं गये। तित्थी तिने यरदन नदिया च तिन्हांजो बपतिस्मा दित्या तिने जे अपने पाप मन्नी ले।

6 यूहन्ना ऊंटा रे बालां ते बणी रे कपडे पेंहना था कने लक्का जो चमडे रिया पेटिया ने बन्हां था। सै जंगली फलियां कने जंगली शहत खावां था। 7 कने तिने सबनीं जो गलाया भई: “मेरे हुंदे हुये ई इक माहु सै जे जादा सामर्था औळा आई रां। हऊं इस जोगा बी नीआ भई झुकीने तिसरे जोडेयां रे तस्मेयां खोली सकूं। 8 हऊं तुहांजो पाणीये ने बपतिस्मा देयां पर तिस तुहांजो पवित्र आत्मा ते बपतिस्मा देणा।”

यीशुये रा बपतिस्मा कने परख

(मत्ती 3:13-4:11; लूका 3:21,22,4:1-13)

9 तिन्हां दिना च यीशु गलील जिले रे नासरता ते आईने, यरदन नदिया च यूहन्ना ते बपतिस्मा लया। 10 तियां जे सै पाणिये च ते निकलीणे बाहर आया, ता तिसजो समाण खुलिरा दुस्सया कने तिस परां कबुतरा साई पवित्र आत्मा उतरेया। 11 कने परमेशरे स्वर्गा ते गलाया भई, “तू मेरा प्यारा पुत आ, तिसने जे हऊं प्यार करां। हऊं तेरते बौहट खुश आ।” 12 फिरी परमेशरा रे आत्मे तिसजो ताहूँ ई बियाबान जंगला जो भेजीत्या। 13 तित्थी चालियां दिना तक शैतान तिस्सो परखदा रैया; सै जंगली जानवारां ने सौगी रैया, कने स्वर्गदूत तिसरी सेवा करदे रैया।

यीशुये रे सेवा रे काम्मां री शुरुआत

(मत्ती 4:12-17; लूका 4:14,15)

14 यूहन्ना रे जेल जाणे ते बाद, यीशु गलीला च आईने, परमेशरा रे राजा री खुशखबरी सुणवाई, 15 कने बोलया, “वगत पूरा हुईगरा, कने परमेशरा रा राज नेडे आई गरा; अपने मना जो फेरा कने खुशखबरिया पर विश्वास करा।

मच्छुआरयां रा सद्य्या जाणा

(मत्ती 4:18-22; लूका 5:1-11)

16 गलीला रिया झीला रे कनारे-कनारे जांदा हुये, तिने शमौन कने तिसरे भाई अन्द्रियासा जो झीला च जाल पान्दे देक्खया; कांभई सै मच्छियां पकडने औळे थे। 17 यीशुये तिन्हांजो गलाया, “मेरे पीछे औवा मांह तुहें माहुआं जो पकडने औळे बनाणे।” 18 सै झट-पट जालां जो छड्डी ने तिसरे पीछे चली पै।

19 किछ अग्गे बधीने, तिने जब्दीया रे पुत्र याकूबा, कने तिसरे भाई यूहन्ने जो, किस्तिया पर जालां जो सधेरदयां हुया देक्खया। 20 तिने झट-पट तिन्हांजो सद्य्या; कने सै अपने पिते जब्दीये जो काम करने औळियां सौगी किस्तिया पर छड्डी ने, तिसरे पीछे चलीगे।

बुरी आत्मा रे सताईरे माहुये जो चंगा करना

(लूका 4:31-37)

21 तां सै कफरनहुमा जो आये, कने सै अगले सब्ता रे दिन, आराधनालय च जाईने उपदेश देणे लगया। 22 कने लोक तिसरे उपदेशा जो सुणीने रेहान हुईगे; कांभई सै तिन्हांजो शास्त्रियां साई नी, पर सै अप्पु अधिकारा ने उपदेश देयां था। 23 तिस वगत, तिन्हांरे आराधनालय च इक माहु था, तिस च जे इक प्रेत आत्मा थी। 24 सै रडाया, “हे यीशु नासरी, अहांजो तेरने क्या काम्म आ? क्या तु अहांजो नाश करने आईरा? हऊं तिजो जाणां, भई तू कुण आ? परमेशरा रा पवित्र जन!” 25 यीशुये तिस्सो झाडी ने गलाया, “चुप रह! कने तिस च ते निकली जा।” 26 प्रेत आत्मा तिस्सो मरोडीने, कने चिगी ने तिस च ते निकलीगी। 27 येदा देक्खीने लोक बडे रेहान हुये कने अप्पु चियें गलाने लगे, “ये क्या गल ई? येत कोई नौवां उपदेश आ! ये तां भूता जो बी अधिकारा ते बोलां, कने सै तिसरे हुक्मा जो मन्नां ये।” 28 तिसरा नौं बडे छोड गलील कने सारे परदेसा च मसहूर हुईया।

मते सारे बमारां जो ठीक करना

(मत्ती 8:14-17; लूका 4:38-41)

29 सै आराधनालय ते निकली ने, सिधे ई याकूब कने यूहन्ना सौगी शमौन कने अन्द्रियासा रे घरा जो गया। 30 शमौना रिया सस्सा जो ताप था, तिने झट-पट तिसारे बारे च यीशुये जो गलाया। 31 तां तिने तिसारा हात्थ पकडी ने तिसा जो दुआलया; ताहलूँ ई तिसारा बुखार उतरीया, कने सै तिसरी सेवा करने लगी। 32 संझके जुन्ना तंजे सूरज घरीया तां लोकें सारेयां मरीजां जो, कने तिन्हां च जे प्रेत आत्मा थियां, तिस लौ ली आये। 33 कने सारा गांव दरवाजे पर कट्टा हुईया। 34 तिने मते जणयां जो सै जे बौहर्ती रोगां ते बमार थे, ठीक कित्या, मतियां प्रेत आत्मावां जो कड्या, कने प्रेत आत्मावां जो बोलने नीं दित्या, कांभई सै तिस्सो पछयाणां थियां।

एकान्त च यीशुये रा प्राथना करना

(लूका 4:42-44)

35 सवेरे तडका हुणे ते पैहले ई, सै उठी ने, ईक सुणसान जगह जो चलीया कने तित्थी प्रार्थना करने लगया। 36 फेरी शमौन कने तिसरे साथी तिसरिया टोला च गये। 37 तजे सै मिलया, तां तिसने गलाया, “सब लोक तिजो टोल्या रायें।” 38 तिने तिन्हांजो गलाया, “आवा; अहें नेडे-तेडे रे गौवां च जावां ये, कांभई हऊं तित्थी भी प्रचार करूं, हऊं इस खातर ई आईरा।” 39 इस खातर सै सारे गलीला च तिन्हांरे प्राथना रे घरां च जाई जाईने प्रचार करदा कने प्रेत आत्मा जो कडदा रैया।

कोढा रे रोगिये जो चंगा करना

(मत्ती 8:1-4; लूका 5:12-16)

40 इक कोढी तिस लौ आया, कने विनती करीने, तिस अग्गे जानुआं रे भार बैठीने बोलने लगया, “जे तू चाहो तां तू मिजां ठीक करी सकां।” 41 तिने तिस पर दया करी ने हात्थ रखया, कने तिस्सो छुई ने गलाया, “हऊं चाहां भई तू ठीक हुई जाओ।” 42 कने तिसरा कोढ ताहूँ ई ठीक हुईया, कने सै साफ हुईया। 43 फेरी तिने तिस्सो समझाई ने भेजीत्या, 44 कने तिने तिसने गलाया, “किसी ने भी देहां बोल्दा, पर जाईने याजका जो दस, भई तू ठीक हुईया, इस खातर मूसा रिया दस्सी रिया भंटा जो तित्थी दे, भई तिन्हां पर

गवाई हो।" 45 पर तिने जाईने इसा गला रा इतना प्रचार कित्या भई ये गल सारे खाँ पता लगीगी यीशु फेरी सारेयां रे सामने लोकां च जाई नी सकया, पर गावां ते बाहर बाहर उज्जड़ जगह च रैया; सारे खा ते लोक तिस्ला जो औंदे रैया।

लकबे रे रोगिये जो चंगा करना

(मत्ती 9:1-8; लूका 5:17-26)

2 कईयां दिनां ते बाद सै कफरनहुम गावां च आया, कने ये पता लगया भई सै घरा च था। 2 फेरी इतने लोक कड़े हुये भई दरवाजे पर भी जगह नी थी; कने सै तिन्हांजो वचन सुनाये रां था। 3 किछ माहूयें लकबे रे इक्की रोगिये जो चरुँ आदमियां रे जरिये चक्की ने तिस्लौ ली आन्देया। 4 पर सै मतेयां लोकां रिया बजह ते तिसलौ नी पुज्जी सके, तां तिन्हें तिथी जे सै था, तिथी री छत फाड़ी ती; कने तजे तिन्हें तिसा छत्ता जो फाड़ीत्या, तां तिसा मजोलिया पर जे सै लकबे रा रोगी था तिसा जो, थले खाँ लटकाई तया। 5 यीशुये तिन्हां रा विश्वास देखी ने तिस लकबे रे रोगिये जो बोलया, "हे पुत्र, तेरे पाप माफ हुईगे।" 6 तजे मते सारे शास्त्री ओथी बेठिरे थे, सै अपणे-अपणे मना च सोचने लगे, 7 "ये माहू येदा कां गलाया रां? ये तां परमेशरा री निन्धया करे रां! परमेशरा जो छड्डी ने कुण आ सै जे पाप माफ करी सकां?" 8 यीशुये ताहूँ ई अपणिया आत्मा च ये जाणी लेया भई ये अपणेयां मनां च येदा सोचया रां ये, कने तिने गलाया, "तुहें अपणेयां मनां च येदा कां सोचया रां ये? 9 खरा क्या? लकबे रे रोगिये ने ये बोलना भई तेरे पाप माफ हुये, या येदा बोलना भई उठ अपणिया मंजोलिया चक कने चलणे फिरने लगी जा? 10 पर इस खातर भई तुहांजो ये पता लगी जाओ भई माहूये रे पुत्रा जो धरतिया पर पाप माफ करने रा बी अधिकार आ।" तिने तिस लकबे रे रोगिये जो गलाया, 11 "हऊँ तेरने बोलां, उठ, अपणिया मंजोलिया चक्की ने अपने घरा जो चली जा।" 12 सै ताहूँ ई उठ्या कने तिने अपणी मंजोली सबी रे साहमणे चक्की ने चलीया; येदा देखीने सब रेहान हुये, कने परमेशरा री बडयाई करीने बोलणे लगे, "अहें येदा कदी मनी देखीरा था।"

लेबिये रा सदया जाणा

(मत्ती 9:9-13; लूका 5:27-32)

13 सै तिथी ते झीला रे कनारे जो गया, कने सारी भीड़ तिसरे पीछे आईगी, कने सै तिन्हांजो उपदेश देणे लगया। 14 तिने जांदे-जांदे हलफईये रे पुत्रा लेवीये जो चुंगी लेणे रिया जगह बैठिरे देखया, कने तिसने गलाया, "मेरे पीछे आई जा।" कने सै उठिने तिसरे पीछे चलीप्या।

15 तजे सै तिसरे घरें रोटी खाणे जो बेड्या, तां मते सारे चुंगी लेणे औळे कने पापी, यीशु कने तिसरे चेलयां ले रोटी खाणे जो बैठे; कांभई सै बौहत थे, कने सै तिसरे पीछे चलणे औळे थे। 16 शास्त्रियें कने फरीसियें देखी ने भई सै, तां पापियां कने चुंगी लेणे औळ्यां सौगी रोटी खायेरां, तिसरे चेलयां ने गलाया, "सै तां पापियां कने चुंगी लेणे औळ्यां ने सौगी खावाँ कने रह्यां;" 17 यीशुये ये सुणीने तिन्हांजो गलाया, "खरेयाँ-भलेयाँ जो बैदा री जरूरत नीं, पर बमारां जो ई: हऊँ धरमियाँ जो नी, पर पापियां जो सदणे आईरा।"

उपबासा रा स्वाल

(मत्ती 9:14-17; लूका 5:33-39)

18 यूहन्ना रे चले, कने फरीसी बरत करां थे; इस खातर तिन्हे आईने तिसने ये गलाया, "यूहन्ना रे चले, कने फरीसीयां रे चले तां बरत करां ये, पर तेरे चले बरत कें नी करदे?" 19 यीशुये तिन्हांजो गलाया, "तदुआं तकौ जे लाड़ा बरातियां ने सौगी आ, क्या सै बरत रखी सकां ये? इस खातर तदुआं तकौ जे लाड़ा तिन्हांरे सौगी आ, तदुआं तकौ जो तिन्हां बरत नी करना। 20 पर सै दिन आउने तजे लाड़ा तिन्हां ते लाग ; तिस वगत तिन्हां बरत रखने। 21 "नवे कपड़े रा पेवन्द पुराने कपड़े पर कोई मनी लान्दा; नहीं तां तिस पेवन्दा तिस रे तंद खीजी लने, यानि नवे, पुराने च ते, कने तिस पैहले ते जादा फटी जणा। 22 नवे दाखरस जो पुराणीयां मशकां च कोई नी रखदा,

नहीं तां दाखरसा मशकां फाड़ी देणीयां, कने दाखरस कने मशकां दुई नाश हुई जाणा; पर नवां दाखरस नवीयां मशकां च ई भरां ये।"

सबता रा प्रभु

(मत्ती 12:1-8; लूका 6:1-5)

23 येदा हुआ भई सै सब्त रे दिन खेतां च ते जाये रां था, कने तिसरे चले चलदे-चलदे बालियाँ जो तोड़ने लगे। 24 तां फरिसियें तिसने गलाया, "देख; ये सबता रे दिन येदा काम कें कराये सै जे ठीक निआ?" 25 तिने तिन्हां ने गलाया, "क्या तुहें ये कदी मनी पड़ेया भई तजे दाऊदा जो जरूरत भई, तां तजे तिस्सो कने तिसरे साथीयां जो भूख लगी, तां तिने क्या कितेया था? 26 तिने कियां अबियातार महायाजक रे वगत, परमेशरा रे भवना च जाईने भेंटा चड़ाई रियाँ रोटियां खादी, तिन्हांजो खाना याजका जो छड्डी ने किसी जो भी ठीक नीं था, कने अपनेयाँ साथीयां जो भी दितियाँ थीयां?" 27 तां तिने तिन्हांजो गलाया, "सब्त रा दिन माहूआं खातर बनाई रा, ना भई माहू सब्त रे दिना खातर। 28 इस खातर माहूये रा पुत्र सब्त रे दिना रा भी स्वामी आ।"

सुक्रे हत्था औळे माहूये जो चंगा करना

(मत्ती 12:9-14; लूका 6:6-11)

3 फेरी सै आराधनालय चा गया; तिथी इक माहू था तीसरा जे हात्थ सुकी गी रा था, 2 कने सै तिस पर दोष लाने खातर तिसरे पीछे पाईरे थे भई देखा ये, तिस सब्ता रे दिन तिस्सो ठिक करना कि नी। 3 तिने सुकीरे हत्था अउले ने बोलया, "खडा हुई जा।" 4 कने तिन्हां ने बोलया, "क्या सब्ता रे दिन भला करना ठीक आ कि बुरा करना, जानी जो बचाणा या मारना?" पर सै चुप रहे। 5 तिने तिन्हांरे मना री सख्तिया ते उदास हुई ने, तिन्हांजो गुस्से ने चहुँ पासियां देखया, कने तिस माहूरे ने बोलया, "अपणा हात्थ अगे कर।" तिने हात्थ अगे कित्या, कने तिसरा हात्थ ठीक हुईया। 6 तां फरिसिये बाहर निकणी ने ताहलु ई हेरोदियां ने मिली ने तिसरे विरोधा च करने लगे भई तिस्सो कियां खतम करना।

भीड़ा रा यीशुये रे पिछे हुणा

7 यीशु अपणेयां चेलयां सौगी झीला खा जो गया : कने गलीला ते इक बड़ी भीड़ तिसरे पिछे आई; 8 यहूदिया, यरुशलैमा कने इदुमिया, कने यरदना रे पारा ते, कने सूर कने सैदा रे अकखा-बकखा ते मती भीड़ ये सुणी ने भई सै केहड़े अचम्भे रे काम करां, तिसला जो आई। 9 तिने अपणेयां चेलयां ने गलाया, "भीड़ा रिया वजाह ते इक छोटी किस्ती मेरे खातर लेयावा भई सै मिंजो जिकी नी सको।" 10 कांभई तिने मतेयां लोकां जो बमारीया ते ठीक कितिरा था, इस खातर जितने माहू बमार थे, तिस्सो छुने खातर तिस परा जो पये करां थे। 11 गंदीयां आत्मा जो भी, तजे सै तिस्सो देखी कने तिसरे पैरां पर भई जां थी, कने रड़ाई-रड़ाई ने बोलां थी भई तु परमेशवरा रा पुत्र आ; 12 कने तिने तिन्हांजो थिड़केया भई मिंजो प्रगट नी करा।

बारा प्रेरितां जो नियुक्त करना

(मत्ती 10:1-4; लूका 6:12-16)

13 फेरी सै पहाड़ा पर कोहई गया, कने तिन्हांजो जे सै प्यार करां था तिन्हांजो अप्पु ला जो सदेया; कने सै तिसला जो आये। 14 फेरी तिने बारां माहूआं जो चुणेया भई सै तिसने सौगी रओ, कने सै तिन्हांजो भेजो भई सै प्रचार करो, 15 कने बुरीयां आत्मा जो नकालने रा भी अधिकार रखो। 16 सै यो ये: शमौन तिसरा नौं तिने पतरस रखेया, 17 कने जब्दी रा पुत्र याकूब कने याकूबा रा भाई यूहन्ना, तिसरा नौं तिने बुअनरगिस यनिके गजने औळे रा पुत्र रखेया, 18 कने अन्द्रियास, कने फिलिप्पुस, कने बरतुलमै, कने मत्ती, कने थोमा, कने हलफईया रा पुत्र याकूब, कने तद् , कने शमौन कनानी, 19 कने यहूदा इस्सकरियोति तिने जे तिस्सो पकड़वाई भी दित्या था।

यीशु कने बालजबूल

(मत्ती 12:22-32; लूका 17:14-23; 12:10)

20 तां सै घरा जो आया : कने येदी भीड़ कड़ी हुई गी भई सै रोटी भी नी खाई सके। 21 तजे तिसरे घरा रेयां ये सुणया, तां सै तिस्सो पकड़ने जो चली पे; कांभई सै बोलां थे भई तिसरा दमाग ठकाणे नी आ। 22 शास्त्री भी सै जे यरुशलेमा ते आईरे थे, येदा बोलणे लगे, “इसच भूत आ,” कने “सै बुरीयां आत्मांवां रे सरदारा रिया मद्दा ते ई बुरीयां आत्मांवां जो कड्डा।

23 इस खातर सै तिन्हांजो नेडे सदी ने तिन्हां ने उदाहरणा च गलाणे लगया, “शैतान कियों शैताना जो कड्डी सकां? 24 जे किसी राज्या च झगड़ा भई जाओ, तां सै राज कियों टिकी सकां? 25 कने जे किसी घरा च झगड़ा भई जाओ, तां सै घर कियों टिकी सकां? 26 इस खातर जे शैतान अपना ई वरोधी हुई ने अप्पु च फूट पाओ, तां सै कियों बणी रा रई सकां? तिसरा तां ई हुई जाणा था।

27 “पर कोई माहू किसी ताकता औळे रे घरा च घुसी ने तिसरा समान नी लुटी सकदा, तदुआ तकौ जो जे सै पैहले तिस ताकता औळे जो बन्ही नी लओ: कने तां ई सै तिसरे घरा जो लुटी सकां।

28 हऊं तुहां ने सच-सच बोलां भई माहूआं रिया ओलादा रे सारे पाप कने निन्दा सै जे सै करां ये, माफ हुई जणी, 29 पर सै जे कोई पवित्र आत्मा री निन्दा करीने वरोध करो, सै कदी बी माफ नी कित्या जाणा : पर सै सदा रे पापा रा अपराधी बणां। 30 कांभई सै बोलां थे भई तिसच बुरी आत्मा ई।

यीशुये री मौ कने भाई

(मत्ती 12:46-50; लूका 8:19-21)

31 तां तिसरे माता कने भाई आये, कने बाहर खड़ीने तिस्सो सदया। 32 लोकां री भीड़ तिसरे अक्खा-बक्खा बैठीरे थे, कने तिने तिस्सो गलाया, “देख, तेरी माता कने भाई बाहर तिजो टोलया रां ये।” 33 तिने तिन्हांजो जवाब दित्या, “मेरी माता कने मेरे भाई कुण ये?” 34 कने तिन्हां पर सै जे तिसरे अक्खा-बक्खा बैठीरे थे, देखरी ने गलाया, “देखा, मेरी माता कने मेरे भाई ये हये। 35 कांभई सै जे परमेशवरा रिया इच्छा पर चलायें, सै ई मेरा भाई, कने बेहण, कने माता ई।”

ब्यू बाहणे औळे रा द्रष्टान्त

(मत्ती 13:1-9; लूका 8:4-8)

4 फेरी सै झीला रे कनारे उपदेश देणे लगया : कने येदी मती भीड़ तिसले कड़ी हुई गी भई सै तिसा झीला च इक्की किस्तिया पर कोई ने बैठी गया, कने सारी भीड़ धरतिया पर झीला रे कनारे खड़ी रई। 2 कने सै तिन्हांजो उदाहरणा च मतियां सारियां गल्लां सखाणे लगया, कने अपणे उपदेशा च तिन्हां ने गलाया, 3 “सुणा ! इक बाहणे आउला बीउ बाहणे चलया। 4 बाहन्दे बगता किछ बीउ रस्ते रे कंडे पया कने तिस्सो पंछियें आई ने चुगी लया। 5 किछ बीउ पथरा आउलिया धरतिया पर पया तित्थी तिस्सो बौहत मिट्टी नी मिली, कने गेहरी मिट्टी नी मिलणे रिया बजहा ते सै छोडे ई जम्मी गया, 6 कने तजे सूरज निकली गया तां जली गया, कने जड नी पकड़ने रिया वजाह ते सुकी गया। 7 किछ झाड़ियां च पया, कने झाड़ियें बधीने तिस्सो दबी तया, कने तिसच फल नी आया। 8 पर किछ खरीया धरतिया च पया, कने सै जम्मेया कने बधीने फल आया; किसी च ती गुणा, किसी च साठ गुणा कने किसी च सौ गुणा फल आया।” 9 तां तिने गलाया, “तिसले जे सुणने खातर कान ये, सै सुणी लो।”

द्रष्टान्ता रा मकसद

(मत्ती 13:10-17; लूका 8:9-10)

10 तजे सै कला रई गया, तां तिसरे साथियें तिन्हा बारां समेत तिसते इन्हां उदाहरणा रे बारे च पुछेया। 11 तिने तिन्हां ने गलाया, “तुहांजो तां परमेशवरा रे राज्या री समझ दित्तीरी, पर बाहरा रेयां खातर सारियां गल्लां उदाहरणा च हुआं ई यां। 12 इस खातर भई “सै देखदे देखो कने तिन्हांजो सुझी नी सको

कने सुणदे हुये सुणो कने ना समझो; येदा नी हो भई सै मन फराओ, कने माफ किते जाओ।”

ब्यू बाहणे औळे द्रष्टान्ता री ब्याख्या

(मत्ती 13:18-23; लूका 8:11-15)

13 फेरी तिने तिन्हां ने गलाया, क्या तुहें इन्हां उदाहरणा जो नी समझदे? तां फेरी होरीं सर्बी उदाहरणां जो कियों समझणे? 14 बाहणे औळा वचन बाह्ण आ। 15 सै जे रस्ते रे कंडे रे तित्थी वचन बीजां ये, ये सै ये भई तजे तिने सुणया, तां शैतान ताहूँ ई आईने सै जे वचन तिन्हां च बाहीरा था, तिस्सो चकी ने लई जां। 16 तियां ई तिन्हां जे पथरां औळिया धरतिया पर बाह्ण ये, ये सैये सै जे वचना जो सुणीने ताहलूँ ई खुशिया ने मनी लेया ये। 17 पर तिन्हां अन्दर वचना जड नी पकड़ने रिया वजह ते थोड़े ई दिना खातर हुआं; इसते बाद तजे वचना रिया वजह ते तिन्हां पर सताव कने उपद्रव हुआं, तां सै इकदम ठोकर खावां ये। 18 सै जे झाड़िया च बाही रे, ये सैये तिने जे वचन सुणया, 19 कने संसारा री चिन्ता, कने पैसैयां रा धोखा, कने कनेसीं चीजां रा लोभ तिन्हां च वचना जो दबी दां कने वचन बिणा फला ते रई जां। 20 कने सै जे खरीया धरता च बीजी रे, ये सै ये सैजे वचना जो सुणी ने मनी लयें कने फल लयावां ये : किसी च ती गुणा, किसी च साठ गुणा कने किसी च सौ गुणा।”

दीये रा द्रष्टान्त

(लूका 8:16-18)

21 तिने तिन्हां ने गलाया, “क्या दीउवे जो इस खातर बालां ये भई तिस्सो तकड़िया या मंजोलिया हेठ रखीये? क्या इस खातर तिस्सो नी बाल्दे भई तिस्सो उच्चिया जगहह रखीये? 22 कांभई कोई बी चीज छीपीरी नी, पर इस खातर ई भई सै साह्णणे आई जाओ; कने ना किछ गुप्त आ, पर इस खातर आ भई सै साह्णणे आई जाओ। 23 जे किसी ले सुणने खातर कान ओ, सै सुणी लो।”

24 फेरी तिने तिन्हां ने गलाया, “चकन्ने रवा भई क्या सुणायें। तिस नापा ते जे तुहें नापां ये तिस ते ई तुहां खातर भी नापेया जाणा, कने तुहांजो कने जादा ई दित्या जाणा। 25 कांभई तिसले जे हया, तिस्सो कने देणा; कने तिसले जे निया, तिसले सै भी सै जे तिसले हया, सै भी लई लेणा।”

उगणे औळे ब्यूआ रा द्रष्टान्त

26 फेरी तिने गलाया, “परमेशरा रा राज येदा आ, तियां जे कोई माहू धरतिया पर बीज बाहूओ, 27 कने राति जो सओ कने दिना जो जागो, कने सै बीज येदा जम्मो कने बधो भई तिस्सो पता नी लगे। 28 धरत अप्पुं ते अप्पुं ई फल लेआवां ई, पैहले लुंग, तां बेल, कने तां बालियां च दाणा तयार हुआं आ। 29 पर तजे दाणा पक्की जां, तां सै डाटिया लई ने कटणे लगां, कांभई फसला जो लुणने रा बगत आई गरा।”

औहरिया रे दाणे रा द्रष्टान्त

(मत्ती 13:31,32; लूका 13:18,19)

30 फेरी तिने गलाया, “अहें परमेशरा रा राज्या जो किसने मलाईये, कने किस उदाहरणा ने तिसरा वर्णन करिये? 31 सै राई रे दाणे साई आ : तजे धरतिया च बीजां ये तां धरतिया रे सबनी बीजां ते छोटा हुआं, 32 पर तजे बाहूँ दें, तां जम्मी ने सारे सागापाता ते बड्डा हुई जावां, कने तिसरी येदी बड्डीयां डालियां निकळा ईयां भई आकाशा रे पंछी तिसरी छावां च बस्सी सकां ये।” 33 सै तिन्हा जो येदे मत्तैयां उदाहरणा दई दई ने तिन्हारिया समझा रे मताबक वचन सुणावां था, 34 कने बिना उदाहरणा ते सै तिन्हांने किछ मनी बोल्दा था; पर क च सै अपणे चलेयां जो सबी गल्लां रा मतलब दस्सां था।

आन्धिया जो शान्त करना (मत्ती 8:23-27; लूका 8:22-25)

35 तिस दिन तजे सांझ हुई, तां तिने चलेयां जो गलाया, "आवा, पारा जो चलीये!" 36 कने सैं भीड़ा जो छड्डीने तेढा जे सैं था, तियां ई तिस्सो किस्तिया पर सौगी लई चले; कने तिसने सौगी कने बी किस्तियां थियां। 37 तां मत्ता तुफान आया, कने लेहरां किस्तिया परा जो येढी यां आईयां भई सैं पाणीये ने भरेया रां थी। 38 पर सैं अप्पु पिछले हिस्से च गदिया पर सुती रा था। तां तिने तिस्सो जगहई ने तिसने गलाया, "हे गुरु, क्या तिजो चिन्ता नीं भई अहें नाश हुवे रां ये?" 39 तां तिने उठ्ठीने तुफाना जो थिडकेया, कने पाणिये जो गलाया, "शान्त रै, रुकी जा!" कने तुफान रुकी गेया कने पुरा चैन हुईया; 40 कने तिन्हां ने गलाया, "तुहें कें डर्राये? क्या तुहांजो अजे तकौ बी विश्वास नीआ?" 41 सैं बौहत डरी गे कने अप्पु चीयें गलाये, "ये कुण आ भई तुफान कने पाणी बी इसरे हुक्मा जो मन्नाये?"

बरी आत्मा रे सताईरे माहुये जो चंगा करना (मत्ती 8:28-34; लूका 8:26-39)

5 सैं झीला पार गिरासैनियां रे देशा च पुजे, 2 तजे सैं किस्तिया परा ते उतरे तां इक माहु तिस च जे दुष्ट आत्मा थी, कब्रां च ते निकली ने तिस्सो मिल्या। 3 सैं कब्रां च रह्हां था कने कोई बी तिस्सो संगलां ने भी नी बन्ही सकदा था, 4 कांभई तिस्सो बार-बार बेडियां कने संगलां ने बहन्ना थे, पर तिने संगलां जो तोड़ी तया कने बेडियां रे पीस-पीस करी ते, कने कोई तिस्सो अपणे बशा च नी करी सकदा था। 5 सैं दिन-रात कब्रां कने पहाड़ां च रड्डां कने अप्पु जो पत्थरां ने जख्मी करां था।

6 सैं यीशुये जो दूरा ते ई देक्खी ने दौड़ेया, तिस्सो नमस्कार कित्या, 7 कने उच्चिया आवाजा च रड्डाई ने गलाया, "हे यीशु, परमप्रधान परमेशरा रे पुत्र, मिजो तेरने क्या काम आ? हऊं तिजो परमेशरा री कसम देवां भई मिजो दुख नी दे।" 8 कांभई तिने तिसने गलाया था, "ओ गंदी आत्मा, इस माहुये च ते निकली जा!" 9 तिने तिसते पुछेया, "तेरा क्या नाँ आ?" तिने तिसने गलाया, "मेरा नाँ सैना आ : कांभई अहें बौहत ये।" 10 कने तिने तिसने बड़ी अरज किती भई, "अहांजो इस देशा ते बाहर नी भेज।"

11 तिन्ही पहाड़ा पर सुरां रा इक झुण्ड चरे रां था। 12 तिने तिसने अरज करी ने गलाया, "अहांजो इना सुरां च भेजी दे भई अहें तिन्हां च अन्दरा जो जाईये।" 13 इस खातर तिने तिन्हांजो हुक्म दित्या कने सैं गंदी आत्मा निकली ने सुरां च बड़ी गी कने झुण्ड, सैं जे कोई दुई हजारां रा था, डीह्मा ते रुडी ने झीला च भई गया कने डुबी गे।

14 तिन्हांरे चारने औळैयां जाईने शेहरा कने गांवां च जाईने ये खबर सुणाई, कने सैं जे हुईरा था, लोक तिस्सो देखने आये। 15 यीशुये लो आई ने तिने तिसच जे दुष्ट आत्मा थियां, मतलब तिस च जे सैना समाई री थी, कपडे पेहनी रे कने चतन्न बैठी रे जो देक्खी ने डरी गे। 16 देखणे औळैयां तिसरा, तिसच जे दुष्ट आत्मा थियां, कने सुरां रा हाल तिन्हा जो सुणुआया। 17 तां सैं तिसने अरज करीने बोलणे लगे अहारे देशा ते चली जा।

18 तजे सैं किस्तिया परा जो कोणे लगया तां सैं तिसच जे पैहले दुष्ट आत्मा थियां, तिसने अरज करने लगया, "मिजो अपणे सौगी रैहणे दे।" 19 पर तिने तिस्सो हुक्म नी दित्या, कने तिस्सो बोलया, "अपणे घरा जाईने अपणे लोकां जो दस भई तेरे पर दया करी ने प्रभुये तेरे खातर तिने कितने बड्डे-बड्डे काम कितीरे।" 20 सैं जाईने दिकापुलिस च इसा गला रा प्रचार करने लगया भई यीशुये मेरे खातर कितने बड्डे-बड्डे काम कितीरे; कने सारे लोक हरान हुई जां थे।

याईर री मूर्खी कुडी कने इक रोगी जनाना (मत्ती 9:18-26; लूका 8:40-56)

21 तजे यीशु फेरी भीं किस्तिया च दुजे कनारे जो गया, तां मती भीड़ तिस लौ कट्टी हुई गी। सैं झीला रे कनारे ई था भई 22 याईर नाँ रा आराधनालय रे सरदारां च ते था आया, कने तिस्सो देक्खी ने तिसरे पैरां ई भई गया, 23 कने

येढा बोली ने तिसले बड़ी अरज किती, "मेरी छोटी मुन्नी मरने ई आउली ई : तु आई ने तिसा पर हात्थ रख भई सैं ठीक हुई ने जिउंटी रओ।" 24 तां सैं तिसने सौगी चलया; कने बड़ी भीड़ तिसरे पीछे आई गी, येथी तकौ जो भई लोक तिस परा जो भई जां थे।

25 ईक जनाना थी, तिसा जो जे १२ सालां ते खुन निकलणे री बमारी थी। 26 तिसै मत्तेयां वैदां ते बड़ा दुःख मिलया, कने अपणा सारा पैसा लाई ने भी तिसा जो किछ फैदा नी हुआ था, पर सैं कने बी बमार हुई गरी थी। 27 सैं यीशुये रे बारे च सुणी ने भीड़ा च तिसरे पिछे आई कने तिसरे कपडेयां जो छुई लया, 28 कांभई सैं बोलां थी, "जे हऊं तिसरे कपडेयां जो छुई लेंगी, तां ठीक हुई जांगी।" 29 कने तालूं ई तिसा रा लहु बैहणा रुकी गया, कने तिसा जो अपणे शरीरा च पता लगी गया भई हाऊं तिसा बमारिया ते ठीक हुई गी। 30 यीशुये जो तालु ई अप्पु च पता लगी गया भई मेरे च ते सामर्थ्य निकली री, कने भीड़ा च पिछे मुडी ने पुछ्या, "मेरे कपडेयां ने कुण छुया?" 31 तिसरे चलेयां तिस्सो गलाया, "तु देख्या रां भई भीड़ तेरे पर पये रां ई, कने तु बोलां भई किने तिजो छुया?" 32 तां तिने तिस्सो देखणे खातर तिने जे ये काम किती रा था, चऊं पासैयां नजर घुमाई। 33 तां सैं जनाना ये जाणी ने भई मेरी कितनी भलाई हुई, डरदी कने कंबदी आई कने तिसरे पैरा भई ने तिस्सो सारियां गलां सच-सच दस्सी तियां। 34 तिने तिसा ने गलाया, "पुत्री, तेरे विश्वासै तिजो ठीक करी तया : निश्चिन्त हुई ने जा, कने अपणीया तिसा बमारिया ते बची री रैह।"

35 सैं येढा बोलया ई रां था भई आराधनालय रे सरदारा रे घरा ते लोकें आई ने बोलया, "तेरी मुन्नी तां मरी गी, हुण गुरुये जो दुःख कें देया रां?" 36 सैं तिसा गला जो जे बोलया रां थे, यीशुये तिसा जो अणसुणी करी ने, आराधनालय रे सरदारा ने बोलया, "मत डरदा, सिर्फ विश्वास रख।" 37 कने तिने पतरस कने याकूब कने याकूबा रे भाईये यूहन्ना जो छड्डी ने किसी जो भी अपणे सौगी आउणे नी दित्या। 38 आराधनालय रे सरदारा रे घरा च पुजी ने, तिने लोकां जो बौहत रोंदे कने रड्डां दे देख्या। 39 तां तिने अन्दर जाईने तिन्हांजो गलाया, "तुहें कें हला पाये रांये कने रोये रांये? कुडी मरी री नी, पर सुत्ती री ई।" 40 सैं तिसरी हासी उड़ाने लगे, पर तिने सब्बी जो बाहर कड्डी ने कुडीया रे माँ बाप जो कने अपणे सौगी अन्दरा जो, तिन्ही जे कुडी रखी री थी, गया। 41 कने तिसा कुडीया रा हात्थ पकडी ने तिसा जो बोलया, "तलीता कुमी!" इसरा मतलब आ, "हे लडकी, हाऊं तिजो बोलां, भई उठ!" 42 कने सैं कुडी ताहलूं ई उठी ने चलणे-फिरने लगी; कांभई सैं बाहरां सालां री थी। येढा देक्खी ने लोक बडे हैरान हुईगे। 43 फेरी तिने तिन्हांजो हुक्म दित्या भई ये गल्ल किसी जो पता नी लगी जाओ कने बोलया, "इसा जो किछ खाणे जो देवा।"

नासरत च यीशुये रा अपमान (मत्ती 13:53-58; लूका 4:16-30)

6 तिन्ही ते निकली ने सैं अपणे देसा च आया, कने तिसरे चले भी तिसरे पिछे गये। 2 सब्ता रे दिन सैं आराधनालय च उपदेश देणे लगया, "कने मते लोक सुणी ने हैरान हुये कने बोलणे लगे, "इसो ये गलां किता ते आईयां? ये केढा गयान आ सैं जे इसो दित्तिरा? कियो, सामर्था रे काम इसरेयां हाथां ते पर्गट हुआं ये? 3 क्या ये सैं ई लकड़िया रा काम करने आउला निंया, सैं जे मरिमा रा पुत्र, कने याकूब, योसैस, यहूदा, कने शमौना रा भाई आ? क्या इस रियां बेहना येथी आहा च नी रेंहदिया? 4 यीशुये तिन्हां ने गलाया, "भविष्यवगत रा अपणे देसा; कने अपणे टबरा, कने अपणे घरा जो छड्डी ने कने किती भी नरादर नी हुँदा।" 5 सैं तिन्ही कोई बी सामर्था रे काम नी करी सकया, बस थोडे जे बमारां पर हात्थ रखी ने तिन्हांजो ठीक कित्या। 6 कने तिस्सो तिन्हांरे अविश्वासा पर हैरानी हुई, कने सैं चऊं तरफा रे गांवां च उपदेश देदा रेया।

बारा प्रेरितां रा भेज्या जाणा (मत्ती 10:5-15; लूका 9:1-6)

7 तिने बाहरां जो अप्पु ला जो सदया कने तिन्हांजो दो-दो करीने भेजणे लगया; कने तिन्हांजो गन्दियां आत्मां पर अधिकार दित्या। 8 तिने तिन्हांजो

हुक्म दित्या, “रस्ते खातर सोतुये छड्डी ने कने किछ बी नी लवा; ना तां रोटी, ना झौला, ना बटुये च पैसै, 9 पर जोड़े पैहना कने दो-दो कुरते नी पेहना।” 10 कने तिने तिन्हां ने बोलया, “तिन्हीं जे तुहें किसी घरा च जाओ तां तदुआँ तकौ जे ओथी ते चली नी पौ तदुआँ तकौ तिस ई घरा च रुकी रे रवा। 11 तिसा जगह रे लोक जे तुहांजो नी मनो कने तुहां री नी सुणो, तां तिन्हीं ते चलदे ई अपने जोड़ेयां री मिट्टी बी झाड़ी दवा भई तिन्हां पर गवाई हो।” 12 तां तिने जाईने प्रचार कित्या भई मन फरावा, 13 कने बौहत दुष्ट आत्मां जो कडया, कने बौहत बमारां पर तेल मलीने ठीक कित्या।

यूहन्ना बपतिस्मा देणे औळे री हत्या

(मत्ती 14:1-12; लूका 9:7-9)

14 हेरोदेस राजे भी तिसरे बारे च सुणया, केंह भई तिसरा नौं फैली गी रा था, कने तिने बोलया, “यूहन्ना बपतिस्मा देणे आउला मरिरेयाँ च ते जिऊंदा हुई गरा, इस खातर इसते ये सामर्था रे काम प्रगट हुये रां ये।” 15 कनेसीं लोकें बोलया, “ये एलिय्याह आ।” पर कईयें होरीं बोलया, “भविष्यबक्ता या भविष्यगतवां च ते ईकी साई।” 16 हेरोदेसै ये सुणी ने बोलया, “तिस यूहन्ना रा सिर में कटवाया था, सै ई जीऊंदा हुई गरा।” 17 हेरोदेसै अपने भाई फिलिप्पुसा री जनाना हेरोदियासा रिया वजह ते, तिसा ने जे तिने ब्याह करी लरा था, लोकां जो भेजी ने यूहन्ना जो पकड़वाई ने जेला च पाई तरा था; 18 कांभई युहन्ने हेरोदेसा ने बोलया था, “अपणे भाई ये री जनाना जो रखणा तेरे खातर ठीक नी आ।” 19 इस खातर हेरोदियास तिसते बैर रखां थी कने येदा चांवां थी भई तिस्सो मरवाई देओ; पर येदा नी हुई सकया, 20 कें हेरोदेस यूहन्ना जो धर्मी कने पवित्र माहु जाणी ने तिसते डरां था, कने तिस्सो बचाई रखां था, कने तिसरीयाँ गलां सुणी ने बौहत घबरांवाँ था, पर मजा लई ने सुणां था।

21 ठीक बक्ता पर तजे हेरोदेसै अपने जन्म दिना पर अपने प्रधानाँ, कने सैनापतियाँ, कने गलीला रे बडेयाँ लोकां जो धाम खाणे सदया। 22 तां हेरोदियासा रिये मुन्नी ये अन्दर आई, कने नची ने हेरोदेसा जो कने तिसरे सौगी बैठणे औळेयां जो खुश कित्या। तां राजे लडकिया जो बोलया, “तु सै जे चावाँ ई मेरते मांग मांह तिजो देणा।” 23 कने तिसा ने कसम खादी, “हऊँ अपने अघे राज्य तकौ जो किछ तु मेरते मंगगी मांह तिजो देणा।” 24 तिसै बाहर जाईने अपणिया मावा ते पुछ्या, “हऊँ क्या मंगू?” तिसै बोलया, “यूहन्ना बपतिस्मा देणे औळे रा सिर।” 25 सै ताहलुं ई अन्दरा जो राजे ला जो गी कने तिसने अरज किती, “हऊँ चावाँ ई भई तु हुण ई यूहन्ना बपतिस्मा देणे औळे रा सिर येथी ईकी थाला च मेरे खातर मंगुवाई दे।”

26 तां राजा बौहत उदास हुआ, पर अपणिया कसमा रिया बजाह ते कने सौगी बैठणे औळेयां रिया बजाह ते इसा गला जो टालणा नी चाह्या। 27 इस खातर राजे तालु ई इक्की सपाईये जो हुक्म दई ने भेजेया भई तिसरा सिर कट्टी ने ली आओ। 28 तिने जेला अन्दर जाईने तिसरा सिर कट्या, कने इक्की थाला च रखी ने ली अंदेया कने लडकिया जो दई तया, कने लडकिये अपणिया मावा जो दित्या। 29 येदा सुणी ने यूहन्ना रे चले आये, कने तिसरिया लाहशा जो लई ने गये कने कब्रा च रखी तया।

प्रेरितां री बापसी कने एकान्त बास

(मत्ती 14:13,14; लूका 9:10)

30 प्रेरितें यीशुये ले कठेयां हुई ने, जो किछ तिने कित्या कने सखाया था, सब किछ तिस्सो दसया। 31 तिने तिन्हा ने बोलया, “तुहें अप्पु लग किसी कल्लिया जगह जाईने राम करा।” कांभई बौहत लोक आवां-जावां थे कने तिन्हांजो रोटी खाणे रा बी मौका नी मिलदा था। 32 इस खातर सै किस्तिया पर कोई ने कल्लिया जगह जो लग चली गये।

पांज हजार माहुआं जो ख्वाणा

(मत्ती 14:15-21; लूका 9:11-17; यूहन्ना 6:1-14)

33 बौहतीं लोकें तिस्सो जांदे देकखी ने पछयाणी लया, कने सबीं नगरा ते कट्टे हुई ने तिन्हीं जो पैदल ई दौड़ी गये कने तिन्हां ते पैहले ई पुज्जी गये।

34 तिने उतरी ने मती भीड़ देकखी, कने तिन्हां पर तिस्सो तरस आया, कांभई सै तिन्हा भेड्डां साई थे, तिन्हां रा जे कोई रखवाला नी हो; कने सै तिन्हांजो मतियाँ गलां सुनुआणे लगया।

35 तजे दिन बौहत घरी गया, तां तिसरे चले तिसले आई ने बोलणे लगे, “ये कल्लि जगह ई, कने दिन बौहत घरी गरा। 36 तिन्हा जो विदा कर भई सै आसै-पासै रेयां गांवां कने बस्तियां च जाईने, अपने खाणे जो रोटी मुल्ला री ली आओ।” 37 तिने जवाब दित्या, “तुहें ई तिन्हांजो खाणे जो देवा।” तिने तिस्सो बोलया, “क्या अहें सौ दीनारा रियां रोटियां खरीदी लीये, कने इना खवाइये?” 38 तिने तिन्हांजो बोलया, “जाईने देखा तुहां ले कितनी रोटियाँ ई याँ?” तिने पता लाई ने बोलया, “पांज रोटियाँ कने दो मछियाँ।”

39 तां तिने तिन्हा जो हुक्म दित्या भई सब्बीं जो घा पर बैठी च बठाली दवा। 40 सै सौ-सौ कने पँजाह-पँजाह री बैठ लाई ने बैठी गये। 41 तिने तिन्हां पँजां रोटियां जो कने दूई मछियां जो लया, कने स्वर्गा खा देकखी ने धन्यावाद दित्या, कने रोटियाँ तोड़ी-तोड़ी ने चलेयां जो देंदा गया भई सै लोकां जो खाणे जो देओ, कने सै दो मछियां बी तिन्हा सबनी च बन्डी तियाँ। 42 सब खाई ने रज्जी गये, 43 कने तिने टुकड़ेयां रे बारा छडोलू भरी ने चके, कने किछ मछियाँ भी। 44 तिने जे रोटियाँ खादियां सै पांज हजार माहु थे।

यीशुये रा पाणिये पर चलना

(मत्ती 14:22-33; यूहन्ना 6:15-21)

45 तां तिने ताहलुं ई अपनेयां चलेयां जो किस्तिया पर जबरदस्ति चढाया भई सै तिसते पैहले ई दुजे कनारे बैतसैदा जो चली जाओ, तदुआँ तकौ जे सै लोकां जो विदा करो। 46 तिन्हा जो भेजी ने सै पहाड़ा पर प्रार्थना करने जो गया। 47 तजे सांज हुई तां किस्ती झीला रे बिच थी, कने सै कला ई धरतिया पर था। 48 तजे तिने देख्या भई सै किस्तिया जो चप्पु मारदे-मारदे घबराई गीरे, कांभई हवा तिन्हारे सामणे री थी, तां राती रिया चौथिया घडिया शुरु हुंदे ई सै झीला पर चलदे-चलदे तिन्हां लौं जो आया; 49 पर तिने तिस्सो झीला पर चलदे देकखी ने समझेया भई सै भूत आ, कने रडाई पे; 50 कांभई सब तिस्सो देकखी ने घबराई गीरे थे। पर तिने झट ई तिन्हां ने गलां कितियां कने बोलया, “हौंसला रखा : हऊँ आ; डरदे मता।” 51 तां सै तिन्हां लौं जो किस्तिया पर आया, कने हवा रुकी गी : कने सै बौहत हैरान हुये। 52 सै तिन्हां रोटियाँ रे बारे च नी समझी रे थे, कांभई तिन्हारे मन कठोर हुई गये थे।

गन्नेसरत च रोगियां जो ठीक करना

(मत्ती 14:34-36)

53 सै पर उतरी ने गन्नेसरता च पुज्जे, कने किस्ती घाटा पर लाई। 54 तंजे सै किस्तिया परा ते उतरे, तां लोकें तिस्सो झट ई पछयाणी लया, 55 नेडे-तेडे रे सारेयां देसां च दौड़े, कने बमारां जो मंजोलिया पर रखी ने तिन्हीं-तिन्हीं जे खबर मिलां थी भई सै आ, तिन्हीं-तिन्हीं लई जां थे। 56 कने तिन्हीं किती जे गांवां, नगरां, बस्तियां च जाँवां था, लोक बमारां जो बजारां च भी रखी ने तिसले अरज करां थे भई सै तिन्हांजो अपने कपड़े जो ई छुणे देओ : कने सै जे तिस्सो छुआं थे, सारे ठीक हुई जां थे।

परम्परा रे पालना रा स्वाल

(मत्ती 15:1-9)

7 तां फरीसी कने शास्त्री सै जे यरुशलेमा ते आई रे थे, तिसले कट्टे हुये, 2 कने तिने तिसरे किछ चलेयां जो गन्दा मतलब बिना हात्थ धोये रोटी खान्दे देकख्या- 3 कांभई फरीसी कने सब यहूदी सयाणेयां रिया परम्परा पर चलाये कने तदुवां तकौ जे खरे ढंगा ने हात्थ नी धोदे तदुवां तकौ नी खांदे; 4 कने बजारा ते आई ने तदुआँ तकौ जे नहाई ने लेंदे, तदुआँ तकौ खांदे नीये; कने मतियाँ सारियाँ कने गलाँ ई यां, सै जे तिन्हां ले मनणे खातर पुज्जी रियां, तियां जे कटोरियां, कने लोटे, कने ताँबे रे बरतना जो धोणा कने माँजणा। 5 इस खातर तिने फरीसीये कने शास्त्रियें तिसते पुछ्या, “तेरे चले सयाणेयाँ रियाँ गलाँ पर के नी चलदे, कने बिना हात्थ धोये रोटी खावाँये?” 6 तिने तिन्हांजो बोलया, “यशायाह तुहां कपटियाँ रे बारे च ठीक भविष्यवाणी

कित्तिरि; तेढा जे लिखिरा : 'ये लोक मुंहां ते तां मेरा आदर कराये, पर इनारे मन मेरते दुर रवाये। 7 ये झुठी ई मेरी भक्ति कराये, कांभई माहुये रियां हुक्मां जो धर्मा रियां दस्सी ने सखाये। 8 कांभई तुहें परमेशरा रे हुक्मां जो टाली ने माहुये रियां रितियां जो मन्नाये।'

9 तिने तिन्हां ने बोलया, "तुहें अपणियां रितियां जो मनणे खातर परमेशरा रे हुक्मां जो कियां टाली दये! 10 कांभई मुसै बोली रा, अपणे पिता कने अपणियां माता रा आदर कर' कने 'जो कोई माता-पिता जो बुरा बोलो सै जरूर ई मारी तया जाओ।' 11 पर तुहें बोलां ये भई जे कोई अपणे माता या पिता ने बोलो, 'जो किछ तुहांजो मेरते फायदा मिली सकां था' सै दईत्या मतलब संकल्प करी तया।' 12 तां तुहें तिस्सो तिसरे पिते कने तिसरियां माता री किछ सैवा करने नी देंदे। 13 इयां ई तुहें अपणियां परम्परा ते, तिन्हांजो जे तुहें बणाईरियां, परमेशरा रा वचन टाली दे; कने येदे-येदे मते काम कराये।"

माहुये जो अशुद्ध करने औळी गलां

(मत्ती 15:10-20)

14 तां तिने लोकां जो अप्पु लॉ जो सद्दी ने तिन्हां ने बोलया, "तुहें सारे मेरी सुणो, कने समझो। 15 येदी कोई चीज़ नी सै जे माहुये च बाहरा ते आई ने तिस्सो अशुद्ध करो; पर सै जे किछ माहुये रे अन्दरा ते निकलां आ, सै तिस्सो अशुद्ध कराईयां। 16 जे किसी रे सुणने रे कान हो तां सुणी लो।" 17 तजे सै भीड़ा ते दूर इक्की घरा च गया, तां तिसरे चेलयां इस उदाहरणा रे बारे च तिसते पुछेया। 18 तिने तिन्हा जो बोलया, "क्या तुहें भी येढा नी समझदे? क्या तुहें नी समझदे भई सै चीज़ जे बाहरा ते माहुये रे अन्दर जाई, सै तिस्सो अशुद्ध नी करी सकदी? 19 कांभई सै तिसरे मना च नी, पर पेटा च जांवाई कने सण्डासा च निकली जाई?" येढा बोली ने तिने सब खाणे रियां चिजां जो शुद्ध ठहराया। 20 फेरी तिने बोलया, "सै जे माहुये च ते निकलां, सै माहुये जो अशुद्ध करां आ। 21 कांभई अन्दरा ते, मतलब माहुये रे मना ते, बुरे-बुरे बचार, व्यभिचार, चोरी, हत्या, परस्त्रीगमन, 22 लोभ, दुष्टता, छल, लुचपन, बुरी नज़र, निन्दा, घमण्ड, कने मुखता निकलांई। 23 ये सब बुरीयां गलां अन्दरा तेई निकलांई कने माहुये जो अशुद्ध कराईयां।"v

सुरुफिनीकी जाति रिया जनाना रा बिश्वास

(मत्ती 15:21-28)

24 फेरी सै तिन्ही ते उठीने सूर कने सैदा रे देसा जो आया; कने इक्की घरा च गया कने चाँवां था भई किसी जो पता नी लगे; पर सै लूक्खी नी सकया। 25 कने ताहलू इक जनाना तिसा रियां छोटीया मुन्नीया च अशुद्ध आत्मा थी, तिसरी चर्चा सुणी ने आई, कने तिसरे पैरा भई गी। 26 ये युनानी कने सुरुफिनीकी जातिया री थी। तिसै तिसले अर्ज किती भई मेरिया मुन्नीया जो च ते दुष्टात्मा जो कड्डी दे। 27 तिने तिसा जो बोलया, "पैहले बालकां जो रजणे दे, कांभई बालकां री रोटी लई ने कुत्तयाँ रे अग्रे सद्दी देणी ठीक नी।" 28 तिसै तिस्सो जवाब दित्या, "ये सच्च आ प्रभु; तां बी कुत्ते बी तां थल्ले खिंडीरी चुर चार खाई लें।" 29 तिने तिसा जो बोलया, "इसा गला रिया वजाह ते चली जा; तेरिया मुन्नीया च ते दुष्टात्मा निकली गी।" 30 तिसै अपणे घरा आई ने देखखा भई कुडी मंजोलिया पर भई री कने दुष्टात्मा निकली गी री।

बैहरे कने हकले माहुये जो चंगा करना

31 फेरी सै सूर कने सैदा रे देसां ते निकली ने दिकापुलिस चीयें गलीला री झीला पर पुजया। 32 तां लोकें इक्की टरुणे जो सै जे थथा बी था तिस लॉ लयाई ने तिसले अरज किती भई सै अपणा हात्थ तिस पर रखे। 33 तां सै तिस्सो भीड़ा ते लग लई गया, कने अपणीयां ऊंगलियां तिसरे कन्ना च पाईयां, कने थुकी ने तिसरिया जीभा जो फुया; 34 कने स्वर्गा खा देखखी ने आह भरी, कने तिसने बोलया, "इफ्तह!" मतलब "खुली जा!" 35 तिसरे कान खुली गये, कने तिसरी जीभा री गड्ड खुली गी, कने सै साफ-साफ बोलणे लगया। 36 तां तिने तिन्हांजो चिताया भई किसी ने देखां बोलदे; पर जितना तिने तिन्हांजो चिताया तितना ई सै कने प्रचार करने लगे। 37 सै

बौहत ई हैरान हुई ने बोलणे लगे, "तिने जो किछ कित्या सब खरा कित्या; सै टरुणेयां जो सुणने री, कने गुंगेयां जो बोलणे री ताकत देंवां आ।"

चार हजार लोकां जो ख्वाणा

(मत्ती 15:32-39)

8 तिन्हां दिना च तजे मती भीड़ कड्डी हुई, कने तिन्हां ले खाणे जो किछ मनी था, तां तिने अपणे चेलयां जो अप्पु लॉ सद्दीने तिन्हां ने बोलया, 2 "मिंजो इसा भीड़ा पर तरस आया रां, कांभई ये तीन्ना दिना ते मेरने सौगी ये, कने इना ले किछ बी खाणे जो निआ। 3 जे हऊं इना जो भुखा ई घरा जो भेजी दूँ, तां रस्ते च ई थक्की ने रई जाणा; कांभई इना च ते कोई-कोई दुरा ते आई रे।" 4 तिसरे चेलयां तिस्सो जवाब दित्या, "येथी जंगला च इतनी रोटी कोई बी किता ते लयाओ भई ये रञ्जी जाओ?" 5 तिने तिन्हां ते पुछया, "तुहांले कितनी रोटियां ई यॉ?" तिने बोलया, "सात।"

6 तां तिने लोकां जो धरता पर बैठणे रा हुक्म दित्या, कने सै सात रोटियां लईयां कने धन्यवाद करीने तोडियां, कने अपणेयां चेलयां जो देंदा गया भई तिन्हांजो खाणे जो देओ, कने तिने लोकां जो खाणे जो दितियां। 7 तिन्हां ले थोडियां छोटियां मछियां बी थियां; तिने धन्यवाद करीने तिन्हांजो बी लोकां जो देणे रा हुक्म दित्या। 8 सै खाई रञ्जी गये कने चेलयां बची रे टुकडेयां रे सात छडोलु भरी ने चक्के। 9 कने लोक चार हजारां ते बी जादा थे; तां तिने तिन्हांजो विदा कित्या, 10 सै तालुं ई अपणेयां चेलयां सौगी किस्तिया पर बैठी ने दलमनूता प्रदेशा जो चलीगे।

फरीसियां रिया तरफा ते स्वर्गा रे चिन्हा री मंग

(मत्ती 16:1-4)

11 फेरि फरीसी आई ने तिसने गलां-बातां करने लगे, कने तिस्सो परखणे खातर तिसते कोई स्वर्गा रा नशाण मंगया। 12 तिने अपणिया आत्मा च आह भरी ने बोलया, "इस वगत रे लोकां जो कोई नशाण नी दित्या जाणा।" 13 कने सै तिन्हा जो छड्डी ने किस्तिया पर कोई ने पारा जो चलीगे।

फरीसियां कने हेरोदेसा रा मलेड़ा

(मत्ती 16:5-12)

14 चले रोटी लेणा भुल्ली गीरे थे; किस्तिया च तिन्हां ले इक ई रोटी थी। 15 तिने तिन्हांजो चताया, "देखा, फरीसियां रे खमीरा कने हेरोदेसा रे खमीरा ते चत्तन रह्यो।" 16 सै अप्पु चीये बचार करीने बोलणे लगे, "अहां ले रोटी नी हई।" 17 ये जाणी ने यीशुये तिन्हा जो बोलया, "तुहें अप्पु चीये ये बचार कां करेया रॉ ये भई अहां ले रोटी नी? क्या हुणा तकां भी नी जाणदे कने नी समझदे? क्या तुहां रा मन कठोर हुई गरा? 18 क्या आक्खीं हूंदे हुये बी नी देखदे, कने कान हूंदे हुये बी नी सुणदे? कने क्या तुहांजो नी आ 19 भई तजे मैं पंजां हजारां खातर पाँज रोटियां तोडियां थीयां तां तुहें टुकडेयां रे कितने छडोलु भरी ने चके?" तिने तिसने बोलया, "बारह छडोलु।" 20 कने तजे चारां हजारां खातर सात रोटियां तोडियां थीयां तां तुहें टुकडेयां रे कितने छडोलु भरी ने चके?" तिने तिस्सो बोलया, "सात छडोलु।" 21 तिने तिन्हांजो बोलया, "क्या तुहें हुणा तकां भी नी समझदे?"

बैतसैदा च इक अन्हे जो चंगा करना

22 सै बैतसैदा च आये; कने लोक इक्की अन्हे जो तिसलॉ ली आये कने तिसने अरज किती भई तिस्सो छुओ। 23 सै तिस अन्हे रा हात्थ पकडी ने तिस्सो गाँवां ते बाहर लई गया, कने तिसरियां आक्खीं च थुक्की ने तिस पर हात्थ रखे, कने तिसते पुछया, "क्या तु किछ देख्या रां?" 24 तिने आक्खीं चकी ने बोलया, "हऊं माहुआं जो देख्या रां; सै मिंजो चली रेयां डालां साई दिसया रांये।" 25 तां तिने फेरी भीं तिसरियां आक्खीं पर हात्थ रखे, कने अन्हे बड़े गौरा ने देख्या। सै ठीक हुईया, कने सब साफ-साफ देखणे लगया। 26 तिने तिस्सो घरा भेजी तया कने येढा बोलया, "इस गाँवां च फेरी पैर देखां रखदा।"

पतरसा रा यीशुये जो मसीह स्वीकार करना

(मत्ती 16:13-20; लूका 9:18-21)

27 यीशु कने तिसरे चले केसरिया फिलिप्पिया रे गांवाँ च चली गये। रस्ते च तिनै अपणे चलेयां ते पुछ्या, "लोक मिंजो क्या बोलांये?" 28 तिनै जवाब दित्या, "यूहन्ना बपतिस्मा देणे आउला; पर कोई-कोई एलिय्याह, कने कोई-कोई भविष्यगतवाँ च ते इक आ।" 29 तिनै तिनहांजो पुछ्या, "पर तुहें मिंजो क्या बोलांये?" पतरसै तिससो जवाब दित्या, "तू मसीह आ।" 30 तां तिनै तिनहांजो समझाई ने बोलया भई मेरे बारे च येदा किसी ने देखां बोलदे।

अपणिया मौती रे बारे यीशुये री भविष्यवाणी

(मत्ती 16:21-23; लूका 9:22)

31 तां सै तिनहांजो सखाणे लगया भई माहुये रे पुत्रा खातर जरूरी आ भई सै बौहत दुःख पाओ, कने पुरनिये, कने प्रधान याजक, कने शास्त्री तिससो तुच्छ समझी ने मारी दओ, कने सै तीन्ना दिना ते बाद जिउंदा हुई जाओ। 32 तिनै ये गल्ल तिनहां ने साफ-साफ बोली ती। इस पर पतरस तिससो लाग नई ने थिड़कने लगया; 33 पर तिनै फिरी ने अपणेयां चलेयां खा देकख्या, कने पतरसा जो थिड़की ने बोलया, "हे शैतान, मेरे साहमणे ते दूर हुई जा; कांभई तु परमेशरा रियां गल्लां पर नी माहुये रियां गल्लां पर मन लावा।"

यीशुये रे पिछे चलणे रा मतलब

(मत्ती 16:24-28; लूका 9:23-27)

34 तिनै भीड़ा जो अपणे चलेयां समेत नेडे सद्धी ने तिनहांजो बोलया, "सै जे कोई मेरे पीछे आउणा चाओ, सै अपणे आपा रा इन्कार करो कने अपणा कुसा चकिने मेरे पीछे आई जाओ। 35 कांभई सै जे कोई अपणा प्राण बचाणा चाओ तिस तिससो खोई दणा, पर जे कोई मेरे कने सुसमाचारा खातर अपणा प्राण खोई देगा, तिस तिससो बचाई लेणा। 36 जे माहु सारे संसारा जो पाई लो कने अपणे प्राणा रा घाटा चको, तां तिससो क्या फायदा हुणा? 37 माहु अपणे प्राणा रे बदले क्या देगा? 38 जो कोई इस व्यभिचारि कने पापी जातिया च मेरते कने मेरियां गल्लां ते शर्म करणा, माहुये रे पुत्रा भी तजे तिस पवित्र दुतां ने सौगी अपणे पिते री महिमा सौगी आउणा तां तिसते भी शर्म करनी।"

9 तिनै तिनहा जो बोलया, "हऊं तुहां ने सच बोलां भई सै जे येथी खड़ी रे तिनहां च ते ई कोई-कोई येदा, भई तदुंआ तकाँ जे परमेशरा रे राज्या जो सामर्था सौगी आईरा नी देकखी लां, तदुंआ तकाँ मौता रा स्वाद नी चरखणा।"

यीशुये रा रूप बदलना

(मत्ती 17:1-13; लूका 9:28-36)

2 छेयाँ दिनां ते बाद यीशुये, पतरस कने याकूब कने यूहन्ना जो सौगी लया, कने कलिया जगह किसी उच्चे पहाड़ा पर लई गया तित्थी तिनहा रे सामणे तिसरा रूप बदली गया, 3 कने तिसरे कपडे येदे चमकणे लगे कने येथी तकाँ सफेद हुई गरा, भई धरतिया पर कोई बी धोबी तेदा सफेद नी करी सकदा। 4 कने तिनहांजो मुसा ने सौगी एलिय्याह दुसैया; सै यीशुये ने गल्लां करया ई रां थे। 5 तां पतरसै यीशुये जो बोलया, "हे रब्बी, अहां रा येथी रैहणा खरा आ : इस खातर अहें तीन मण्डप बनाणे; इक तेरे खातर, इक मूसा खातर, इक एलिय्याह खातर।" 6 कांभई सै नी जाणदा था भई क्या जवाब देओ, इस खातर भई सै बौहत डरी गरे थे। 7 तां इक्की बदले तिनहांजो ढकी तया, कने तिस बदला ते ये आवाज आई, "ये मेरा प्यारा पुत्र आ, इसरी सुणा।" 8 तां तिनै इकदम चऊं तरफा जो नजर घुमाई, कने यीशुये जो छड्डी ने अपणे सौगी कने किसी जो नी देकख्या।

9 पहाड़ा ते उतरदे वगत तिनै हुकम दित्या भई तदुंआ तकाँ जे माहुये रा पुत्र मरिरेयां च ते नी जी उठदा, तदुंआ तकाँ जो किछ तुहें देख्या सै किसी ने देहां बोलदे। 10 तिनै इसा गल्ला जो याद रखया; कने अप्पु चीयें गल्ल-बात करने लगे, "मरिरेयां च ते जी उठणे रा क्या मतलब आ?" 11 कने तिनै तिसते पुछ्या, "शास्त्री कें बोलां ये भई एलिय्याह रा पैहले आउणा जरूरी आ?"

12 तिनै तिनहांजो जवाब दित्या, "एलिय्याह सच मुच पैहले आई ने सब किछ सुधार करना, पर माहुये रे पुत्रा रे बारे च येदा कें लिखीरा भई तिससो बौहत दुःख मिलणा, कने बेकार मनया जाणा? 13 पर हऊं तुहां ने बोलां, भई एलिय्याह तां आई चुक्की रा कने तेदा जे तिसरे बारे च लिखीरा, तिनै जो किछ चाहा सै तिसने कित्या।"

बुरी आत्मा रे सताईरे मुन्दुये जो चंगा करना

(मत्ती 17:14-21; लूका 9:37-43)

14 तजे सै चलेयां लाँ आया, तां देकख्या भई तिनहारे चऊं पासैयां मती भीड़ लगी री कने शास्त्री तिनहां ने विवाद करया रां ये। 15 तिससो देखदे ई सब बौहत हेरान हुणे लगे, कने तिस खा दौड़ी ने तिससो नमस्कार कित्या। 16 तिनै तिनहां ते पुछ्या, "तुहें इन्हां ने क्या बेहस करेया रां ये?" 17 भीड़ा च ते इक्की तिससो जवाब दित्या, "हे गुरु, हऊं अपणे पुत्रा जो, तिस च गुंगी आत्मा ई, तेरलाँ ली आया था। 18 तित्थी किती जे सै तिससो पकड़ाई ई, तित्थी पटकी देई : कने तिसरे मुंहा च झाग भरी जां, कने दाँद पीह्लां, कने सुकदा ई जाये रां। मैं तेरेयां चलेयां ने बोलया था भई सै इसो कड्डी देओ, पर सै नी कड्डी सक्के।" 19 येदा सुणी ने तिनै तिनहां जवाब दई ने बोलया, "हे अविश्वासी लोको, मांहा कदुंआ तकाँ जो तुहां ने सौगी रेहणा? कने कदुआँ तकाँ तुहां री सैहन करनी? तिससो मेरे लाँ लेआवा।" 20 तां तिनै तिससो तसलाँ ली अंदेया : कने तजे तिनै तिससो देकख्या, तां तिसै आत्मे झट तिससो मरोडेया; कने सै धरतिया पर भई गया, कने मुंहा ते झाग नकालणे कने मरेलणे लगी गया।

21 तिनै तिसरे पिते ते पुछ्या, "इसरी ये दशा कदुआँ तेई?" तिनै बोलया, "बचपना ते। 22 तिनै इसो नाश करने खातर कदी आगा च कदी पाणिये च सटया; पर जे तु किछ करी सको, तां अहां परा तरस खाई ने अहांरा भला कर।" 23 यीशुये तिससो बोलया, "जे तू करी सका? ये क्या गल्ल ई! विश्वास करने औठे खातर सब किछ हुई सका।" 24 बालका रे पिते गिडगिडा ई ने बोलया, "हे प्रभु, हऊं विश्वास करां, मेरे अविश्वास रा लाज कर।" 25 तजे यीशुये देख्या भई लोक कट्टे हुया रां ये, तां तिनै अशुद्ध आत्मा जो येदा बोली ने झिड़केया, "हे गुंगी कने बैहरी आत्मा, हऊं तिजो हुकम देवां, इस च ते निकली जा, कने इस च फेरी भी कदी बी देखां जांदी।" 26 तां सै रडाया कने तिससो बौहत मरोडी ने, निकली गी; कने बालक मरीरे साई हुईग्या, येथी तकाँ भई बौहत लोक बोलणे लगे भई ये मरी गरा। 27 पर यीशुये तिसरा हात्थ पकडी ने तिससो टुआलेया, कने सै खडा हुईग्या। 28 तजे सै घरा च आया, तां तिसरे चलेयां तिसते कल्ले जाईने पुछ्या, "अहें तिससो कें नी कडी सक्के?" 29 तिनै तिनहा जो बोलया, "ये जाति बिना प्रार्थना ते किसी कनेसी तरीके ते नी निकली सकदी।"

अपणियां मौती रे बारे यीशुये री दूज्जी बार भविष्यवाणी

(मत्ती 17:22,23; लूका 9:43-45)

30 फेरी सै तित्थी ते चले, कने गलीला चीयें जायां रां था। सै नी चांहदा था भई किसी जो बी पता लगे, 31 कांभई सै अपणेयां चलेयां जो उपदेश देदा कने तिनहांजो बोलया रां था, "माहुये रे पुत्रा, माहुआं रे हाथा च पकड़वाया जाणा, कने तिनहां तिससो मारी देणा; कने तिस मरने ते तीन्ना दिना बाद जी उठणा।" 32 पर सै गल्ल तिनहां रिया समझा नी आई, कने सै तिसते पुछणे ते डरां थे।

सब्वीं ते बड्डा कुण आ?

(मत्ती 18:1-5; लूका 9:46-48)

33 पर सै कफरनहूम च आये; कने घरा च आई ने तिनै तिनहा ते पुछ्या, "रस्ते च तुहें किसा गल्ला पर बैहस करयां रां थे?" 34 सै चुप रहे, कांभई रस्ते तिनै अप्पु चीयें ये बैहस किती थी भई अहां च ते बड्डा कुण आ। 35 तां तिनै बैठी ने बाहराँ जो सदया कने तिनहा जो बोलया, "जे कोई बड्डा हुणा चाहओ, तां सबी ते छोटा कने सबी रा सैवक बणो।" 36 कने तिनै इक्की बालका जो लई ने तिनहा ले खडा कित्या कने तिससो गोदा च लई ने गलाया, 37 "जो

कोई मेरे नौं ते येदेयां बालका च ते इक्की जो बी ग्रहण करो, सै मिंजो ग्रहण करां; कने जो कोई मिंजो ग्रहण करां, सै मिंजो नी, पर मेरे भेजणे औळे जो ग्रहण करां।"

सै जो बरोधा च नीं आ, सै सौगी आ
(लूका 9:49-50)

³⁸ तां यूहन्ने तिसने बोलया, हे गुरु, अहें इक्की माळुये जो तेरे नौं ते दुष्मात्मा जो कडदे देवखया कने अहें तिस्सो रोकने लगे, कांभई सै अहांने सौगी नी आऊंदा था।³⁹ यीशुये बोलया, "तिस्सो मता रोकदे; कांभई येदा कोई नींआ सै जे मेरे नौं ते सामर्था रे काम करो कने फेरी मिंजो बुरा बोली सको, कांभई सै जे अहारे विरोधा च नीआ सै अहां खा जोआ।⁴¹ सै जे कोई इक गलास पाणी तुहांजो इस खातर पयाओ भई तुहें मसीह ये तां हऊं तुहों जो सच बोलां भई तिन्हां अपणा प्रतिफल किसी भी तरीके ने नी गवाणा।

ठोकरा री बजह बणना
(मत्ती 18:6-9; लूका 17:1, 2)

⁴² "सै जे कोई इना छोटेयां च ते किसी जो सै जे मेरे पर विश्वास करायें, किसी जो ठोकर खवाओ तां तिसरे खातर भला ये आ भई इक बड़ा घराटा रा बाट्ट तिसरे गले च लटकाया जाओ कने तिस्सो समुद्रा च सट्टी तया जाओ।⁴³ जे तेरा हात्थ तिजो ठोकर खवाओ तां तिस्सो बड्डी देओ। टुण्डा बणी ने जीवना च जाणा तेरे खातर भला आ भई दुई हाथां रेंहदेयां तु नरका री अग्गी च पाईतया जाओ सै जे कदी मनी बुझणी।⁴⁴ (तित्थी तिन्हां रा कीडा नी मरदा कने आग नी बुझदी।)⁴⁵ जे तेरा पैर तिजो ठोकर खवाओ तां तिस्सो बड्डी देओ। लंगडा बणी ने जीवना च जाणा तेरे खातर भला आ भई दुई पैरां रेंहदेयां तु नरका री अग्गी च पाईतया जाओ सै जे कदी मनी बुझणी।⁴⁶ तित्थी तिन्हां रा कीडा नी मरदा कने आग नी बुझदी।⁴⁷ जे तेरी आकख तिजो ठोकर खवाओ तां तिसा जो कड्डी देओ। काणा बणी ने जीवना च जाणा तेरे खातर भला आ भई दुई आकखीं रेंहदेयां तु नरका री अग्गी च पाईतया जाओ सै जे कदी मनी बुझणी।⁴⁸ तित्थी तिन्हां रा कीडा नी मरदा कने आग नी बुझदी।⁴⁹ कांभई हरके माळु अग्गी ते ई नमकीन कित्या जाणा।⁵⁰ लूण खरा आ, पर जे लूणा रा स्वाद चली जाओ, तां तिस्सो कज्जी ते लूणका करगे? अपणे च लूण रखो, कने अप्पु चीयें मेल-मलापा ने रहा।"

तलाकरे बारे च यीशुये री शिक्षा
(मत्ती 19:1-12; लूका 16:18)

10 फेरी सै तित्थी ते उठी ने यहूदिया री सीमा च कने यरदना ते पारा आया। भीड़ तिसले फेरी कट्टी हुई गी, कने सै अपणी रितिया ते फेरी उपदेश देणे लगया।² तां फेरीसियें तिसले आई ने तिस्सो परखणे खातर तिसले पुछ्या, "क्या ये ठीक आ भई पुरुष अपणी पत्नियां जो छड्डी दो?"³ तिने तिन्हांजो जवाब दित्या, "मूसै तुहांजो क्या हुकम दित्तिरा?"⁴ तिने बोलया, "मूसै त्याग पत्र लिखणे कने छड्डी देणे रा हुकम दित्तिरा।"⁵ यीशुये तिन्हां ने बोलया, "तुहों रे मना रे सख्त हुणे रिया वजाह ते तिन्हे तुहों रे खातर ये हुकम लिख्या।⁶ पर स्त्रिटिया रे शुरुआता ते ई परमेशवरे नर कने नारी करी ने तिन्हांजो बणाईरा।⁷ इस खातर माळुये अपणे माव-बुढ़े ते लग हुई ने अपणिया जनाना सौगी रेंहणा।⁸ कने तिन्हां दुई इक तन हुणा; इस खातर भई सै दो नी ये पर इक शरीर ये।⁹ इस खातर तिस्सो जे परमेशवरे जोडी रा तिस्सो माळु लग नी करो।"

¹⁰ घरा च चलेयां इसरे बारे च फेरी भीं पुछ्या।¹¹ तिने तिन्हां ने बोलया, "सै जे कोई अपणिया जनाना जो छड्डी ने दूजिया ने ब्याह करो तां सै तिसा पैहलिया रे वरोधा च व्यभिचार करां आ;¹² कने जे जनाना अपणे पतिये जो छड्डी ने दुजे ने ब्याह करो तां सै व्यभिचार करां।"

मुन्डुआं जो आशीर्वाद
(मत्ती 19:13-15; लूका 18:15-17)

¹³ फेरी लोक बालकां जो तिसलौं ली आउणे लगे भई सै तिन्हां पर हात्थ रखो, पर चलेयां तिन्हांजो झिडकया।¹⁴ यीशुये ये देवखी ने गुस्से च आई ने तिन्हा जो बोलया, "बालकां जो मेरलौं ओणे देवा तिन्हां नांह नी करा, कांभई परमेशरा रा राज्य येदेयां रा ई हा।¹⁵ हऊं तुहां ने सच बोलां भई जो किछ परमेशरा रे राज्य जो बालकां साई ग्रहण नी करी लेंदा, सै तिस च कदी बी जाई नी सकगा।"¹⁶ कने तिने तिन्हा जो गोदा च लई लेया, कने तिन्हां पर हात्थ रक्खी ने तिन्हांजो आशीष दित्ती।

अमीर मुन्डु कने अनन्त जीबन
(मत्ती 19:16-30; लूका 18:18-30)

¹⁷ तजे सै तित्थी ते निकली ने रस्ते च जाये रां था, तां इक माळु तिसलौं दौडदा-दौडदा आया, कने तिसरे सामणे गोडे टेकी ने तिस्सो पुछ्या, "हे उत्तम गुरु, सदा रे जीवना रा बारस बणने खातर हऊं क्या करु?"¹⁸ यीशुये तिसने बोलया, "तु मिंजो उत्तम कें बोलां? कोई उत्तम निआ, सिर्फ इक आ मतलब परमेश्वर।¹⁹ तु हुक्मां जो तां जांगा ई आ : 'हत्या नी करनी, व्यभिचार नी करनी, चोरी नी करनी, झुठी गवाई नी देणी, छल नी करनी, अपणे पिते कने माता रा आदर करना।'²⁰ तिने तिसने बोलया, "हे गुरु, इना सब्बी जो हऊं बचपना ते मनदा आये रां।"²¹ यीशुयरे तिस खा देवखी ने तिसने प्यार कित्या, कने तिस्सो बोलया, "इक्की गल्ला रा घाटा आ। जा, जो किछ तेरा आ तिस्सो बेची ने कंगालां जो दई दे कने तिजो स्वर्गा च धन मिलणा, कने आई ने मेरे पिछे आई जा।"²² इसा गल्ला ते तिसरे मुंहा पर उदासी छाई गी, कने सै दुःखी हुई ने चलीगे, कांभई सै बौहत धनी था।

²³ यीशुये चऊं तरफा देवखी ने अपणयां चलेयां ने बोलया, "अमीरां रा परमेशरा रे राज्य च प्रवेश करना कितना कठन आ!"²⁴ चले तिसरियां गल्लां ते हेरान हुये! तां यीशुये फेरी तिन्हां ने बोलया, "हे बालको, सै जे धना पर भरोसा रखाये, तिन्हां खातर परमेशवरा रे राज्य च जाणा कितना कठन आ।²⁵ परमेशरा रे राज्या च अमीरां रे जाणे ते ऊंटा रा सुईया रे नाके च ते निकली जाणा सान आ!"²⁶ सै बौहत ई हेरान हुई ने अप्पु चीयें बोलणे लगे, तां फेरी किसरा उधार हुई सकां?"²⁷ यीशुये तिन्हां खा देवखीने बोलया, "माळुआं ते तां ये नी हुई सकदा, पर परमेशरा ते ये हुई सकां।"²⁸ पतरस तिस्सो बोलणे लगया, "देख, अहें तां सब किछ छड्डी ने तेरे पीछे आई गे।"²⁹ यीशुये बोलया, "हऊं तुहां ने सच बोलां भई कोई येदा नीया, तिने जे मेरे कने सुसमाचारा खातर अपणा घर या भाईयां या बहणां माता या पिता या बाल-बच्चेयां या खेतां जो छड्डी तया हो,³⁰ कने हुण इस वगत सौ गुणा नी पाया हो, घरां कने भाईयां कने बहणां कने माता कने बाल बच्चे कने खेतां जो, पर सतावा ने सौगी कने परलोका च सदा रा जीवन नी पाया हो।³¹ पर मते सारे सै जे पैहले ये, पिछलेयां बणना; कने सै जे पिछले ये तिन्हा पैहलेयां बणना।"

अपणिया मौती रे बारे यीशुये री तिज्जी भविष्यवाणी
(मत्ती 20:17-19; लूका 18:31-34)

³² सै यरुशलैमा जो जाणे औळे रस्ते च थे, कने यीशु तिन्हां ते अग्गे-अग्गे जाया रां था : चले हेरान थे कने सै जे तिसरे पिछे-पिछे चली रे थे सै डरी रे थे। तां तिने फेरी तिन्हां बाहरां जो लई ने तिन्हां ने ये गल्लां बोलणे लगया, सै जे तिसने हुणे औळेयां रियां थीयां,³³ "देखा, अहें यरुशलैमा जो जाया रांये, कने माळुये रा पुत्र प्रधान याजकां कने शास्त्रियां रे हाथां पकड़वाया जाणा, कने तिन्हा तिस्सो मारने जोगा ठहराणा, कने अन्य जातियां रे हाथा च देणा।³⁴ तिन्हां तिस्सो हासीया च डुआणा, तिस पर थुकणा, तिस्सो कोड़े मारने कने तिस्सो घात करना, कने तिन्हा दिना ते बाद तिस जी उठणा?"

याकूब कने यूहन्ने री बिनती

(मत्ती 20:20-28)

35 तां जब्दीया रे पुत्र याकूबे कने यूहन्ने तिस लॉ आई ने बोलया, "हे गुरु, अहें चाह्वां थे भई जो किछ अहें तेरते मंगीये, सै तु अहां खातर करो!" 36 तिने तिन्हां ने बोलया, "तुहें क्या चाह्वांये भई हऊं तुहां खातर करूं।" 37 तिने तिसने बोलया, "अहां येदा दे भई तेरी महिमा च अहां च ते इक तेरे सज्जे कने दुजा तेरे खब्बे बैठो।" 38 यीशुये तिन्हां ने बोलया, "तुहें नी जाणदे भई क्या मगया रांये? सै कटोरा जे मांह पीणा, क्या तुहें पी सकांये?" 39 तिने तिस्सो बोलया, "अहां ते हुई सकां।" यीशुये तिन्हां बोलया, "सै कटोरा जो मांह पीणा, तुहां पीणा; कने सै बपतिस्मा जे हऊं लेणे जाये रां, तिस्सो लेणा। 40 पर तिन्हां खातर जे तैयार कित्तिरा, तिन्हां छड्डी ने कने किसी जो अपणे सजे कने खब्बे बठा लणा मेरा काम निआ।

41 येदा सुणी ने दसो याकूब, कने यूहन्ना पर रसियाणे लगे। 42 तां यीशुये तिन्हां सदीने तिन्हा बोलया, "तुहें जाणांये भई सै जे अन्यजातियां रे हाकम समझे जांवांये, सै तिन्हां पर राज करांये; कने तिन्हा च ते सै जे बड्डे ये, तिन्हां पर अधिकार जतांये। 43 पर तुहां च येदा नी आ, पर जो कोई तुहां च बड्डा हुणा चाओ सै तुहां रा सैवक बणो; 44 कने जो कोई तुहां च प्रधान हुणा चाहओ सै सबनी रा दास बणो। 45 कांभई माह्युये रा पुत्र इस खातर नी आया भई तिसरी सैवा किन्ती जाओ, इस खातर आया भई अप्पु सैवा करो; कांभई मतेयां जो छुड़ाने खातर अपणा प्राण देओ।"

अन्हे बरतिमाईये जो अक्खीं री लोय दान

(मत्ती 20:29-34; लूका 18:35-43)

46 ये यरीहो च आये, कने तजे सै कने तिसरे चले, कने इक बडी भीड़ यरीहो ते निकलया रां थी, तां तिमाई रा पुत्र बरतिमाई, इक अन्ना बिखारी, सड़का रे कनारे बैठी रा था। 47 सै ये सुणी ने भई यीशु नासरी आ, हाकां पाई-पाई ने बोलणे लगया, "हे दाऊद री सन्तान, यीशु, मेरे पर दया कर।" 48 तिस्सो मतेयां झिड़केया भई सै चुप रओ, पर सै कने बी हाकां पाणे लगया, "हे दाऊद री सन्तान, मेरे पर दया कर।" 49 तां यीशुये रुकी ने बोलया, "तिस्सो सद्दा।" कने लोकें तिस अन्ने जो सद्दी ने तिस्सो बोलया, "हॉसला रख! उठ सै तिज्जो सदया रां।" 50 सै अपणा कपड़ा सट्टि ने झट उठया, कने यीशुये लॉ आया। 51 तां यीशुये तिसने बोलया, "तु क्या चाह्वां आ भई हऊं तेरे खातर करूं?" अन्ने तिसने बोलया, "हे रब्बी, ये भई हऊं देखणे लगूं।" 52 यीशुये तिसने बोलया, "चली जा, तेरे विश्वासै तिज्जो ठीक करीतया।" सै ताहूँ ई देखणे लगी गया, कने रस्ते च तिसरे पिछे-पिछे चली पया।

यरुशलम च जीती ने औणे री खुशी

(मत्ती 21:1-11; लूका 19:28-40; यूहन्ना 12:12-19)

11 तजे सै यरुशलमेमा रे नेडे, जैतुन पहाड़ा पर बैतफगे कने बैतनियाह रे नेडे आये तां तिने अपणे चलेयां च ते बोली ने भेजेगा, 2 "सामणे रे गांवां च जावा कने तिसच पुजदे ई इक गधीया रा बच्चा, तिस पर जे कोई भी चढी रा नी हो, तुहां बज्जी रा मिलणा। तिस्सो खोली ने ली आवा। 3 जे कोई तुहांते पुछो, 'ये क्या करेया रां ये?' तां बोलयां, 'प्रभुये जो इसने मतलब आ, कने तिस छोड़े ई इसो येथी जो भेजी देणा।' 4 तिन्हा जाईने सै बच्चा बाहर ले दरवाजे ने सौगी चौका च बन्ही रा मिलया, कने खोलणे लगे। 5 तिन्हा च ते सै जे ओथी खड़ी रे थे, कोई-कोई बोलणे लगे, 'ये क्या करया रां ये गधिया रे बच्चे जो कें खोलया रां ये?' 6 तेदा जे यीशुये बोलया था, तेदा ई तिने तिन्हां ने बोली तया; तां लोकें तिस्सो जाणे दित्या। 7 तिने बच्चे जो यीशुये लॉ जो लयाई ने तिस पर अपणे कपड़े डवाये कने सै तिस पर बैठी गया। 8 तां मत्यां अपणे कपड़े रस्ते च बछाई कने होरी खेतां च ते डालीयां कड़ी-कड़ी ने बछाई तियां। 9 सै जे तिसते अग्गे-अग्गे चलया रां थे कने पिछे-पिछे ते आया रां थे, हांकां पाई-पाई ने बोलया रां थे, 'होशना! धन्य आ सै जे प्रभुये रे नौं ते

आवां! 10 अहां रे पिता दाऊदा रा राज्या आया रां; धन्या ये! आकाशा च होशना!"

11 सै यरुशलमेमा पुज्जी ने मन्दरा च आया, कने चऊं पासैयां सबीं चीजा जो देक्खी ने बाहरां ने सौगी बैतनिय्याह जो गया, कांभई सांज हुई गरी थी।

बगैर फळा ते दागले रा डाळ

(मत्ती 21:18,19)

12 दूजे दिन तजे सै बैतनिय्याह ते निकले तां तिस्सो भुख लगी। 13 सै दूरा ते दागले रा इक डाल देक्खी ने नेडे गया भई क्या पता तिस च किछ मिली जाओ : पर पत्तेयां जो छड्डी ने किछ नी मिलया; कांभई फला रा बक्त नी था! 14 इस पर तिने तिसने बोलया, "हुणा ते कोई बी तेरा फल नी खाओ!" कने तिसरे चले सुणयां रां थे।

मन्दरा ते दुकानदारां जो बाहर कड्डया जाणा

(मत्ती 21:12-17; लूका 19:45-48; यूहन्ना 2:13-22)

15 फेरी सै यरुशलमेमा च आये, कने सै मन्दरा च गया; कने तिन्ही सै जे लेन-देन करया रां थे तिन्हांजो बाहरा कड्डणे लगया, कने बेचणे औळैयां रियां चौकियां कने कबुतर बेचणे औळैयां रियां चौकियां रुडुआई तियां, 16 कने मन्दरा च ते किसी जो बर्तन लई ने आउणे नी दित्या। 17 कने उपदेश दई ने तिन्हांजो बोलया, "क्या ये नी लिखीरा भई मेरा घर सब्बीं जातियां खातर प्रार्थना रा घर बोलया जाणा? पर तुहें इसो डाकुआं री जगह बणाई तरी।" 18 ये सुणी ने प्रधान याजक कने शास्त्री तिस्सो खत्म करने रा मौका टोलणे लगे; कांभई सै तिसते डरां थे, इस खातर भई सब लोक तिसरे उपदेशा ते हेरान हुआं थे। 19 सांज हुं दे ई सब नगरा ते बाहर चली गये।

सुक्रे दागले रे डाळा ते शिक्षा

(मत्ती 21:20-22)

20 फेरी भयागा ई तजे सै तिन्ही ते जाया रां थे तां तिने तिस दागले रे डाला जो जडां तकां सुकी रा देक्खया। 21 पतरसा जो सै गल्ल याद आई, कने तिने तिन्हांजो बोलया, "हे रब्बी, देख! ये दागले रा डाल तिस्सो जे तैं शाप दित्या था, सुकी गरा।" 22 यीशुये तिस्सो जवाब दित्या, "परमेशरा पर विश्वास रखा। 23 हऊं तुहां ने सच बोलां भई जे कोई इस पहाड़ा जो बोला, 'तु उखड़ी जा, कने समुद्रा च जाईने लग, कने अपणे मना च शक नी करो, पर भरोसा करो भई सै जे बोलां सै हुई जां, तां तिस खातर सै ई हुणा। 24 इस खातर तुहां ने बोलां भई जो किछ तुहें प्रार्थना च मंगो, तां भरोसा करी लो भई मिली गया, कने तुहां खातर हुई जाणा। 25 कने तजे तुहें खड़ी ने प्रार्थना करांये तां जे तुहां रे मना च किसी, खातर कोई वरोध हो, तां माफ करा : इस खातर भई तुहां रा स्वर्गिय पिता भी तुहां री गल्लतियां माफ करो। 26 (कने जे तुहें माफ नी करो तां तुहां रा पिता भी सै जे स्वर्गा च आ, तुहां रियां गल्लतियां माफ नी करगा।)"

यीशुये रे अधिकारा रा स्वाल

(मत्ती 21:23-27; लूका 20:1-8)

27 सै फेरी यरुशलमेमा च आये, कने तजे सै मन्दरा च टेहलेयां रां था प्रधान याजक कने शास्त्री कने पुरनिये तिसलॉ आई ने पुछणे लगे, शास्त्री कने पुरनिये तिस लॉ आई ने पुछणे चले, 28 "तु ये काम किस अधिकारा ने करां? कने ये अधिकार तिज्जो किने दित्या भई तु इना कम्मां जो करो?" 29 यीशुये तिन्हांजो बोलया, "हऊं बी तुहां ते इक गल्ल पुछां; मिजो जवाब देवा तां मांह बी तुहांजो दसणा भई ये काम किस अधिकारा ने करां। 30 यूहन्ना रा बपतिस्मा क्या स्वर्गा खा ते था या माह्नुआं खा ते था। मिजो जवाब देवा।" 31 तां सै अप्पु चीयें बेहस करने लगे भई जे अहें बोलिये, 'स्वर्गा खा ते, तां इस बोलणा, 'फेरी तुहें तिसरा विश्वास कें नी कित्या?' 32 कने जे अहें बोलिये, 'माह्नुआं खा ते,' तां लोकां रा डर आ, कांभई सब जाणांये भई यूहन्ना सच-मुच भविष्यगत था। 33 इस खातर तिने यीशुये जो जवाब दित्या, "अहें नी

जाणदे।" यीशुये तिन्हांजो बोलया, "हऊँ भी तुहांजो नी दसदा भई ये काम किस अधिकारा ते करां।"

दुष्ट कर्षाणां रा द्रष्टान्त

(मत्ती 21:33-46; लूका 20:9-19)

12 फेरी सै उदाहरणा च तिन्हां ने गल्लां करने लगया : "किसी माळुये अँगुराँ रा बाग लाया, कने तिसरे चऊँ पासैयां बाड़ बन्ही, कने रसा रा कुण्ड भी खुण्या, कने गुम्मत भी बणाया; कने कसानां जो देई ने प्रदेशा जो चलीगे। 2 फेरी फला रे मौसमा च तिने कसानां लॉ जो इक दास भेजया भई कसानां ते अँगुराँ रे बागा रे फला रा हिस्सा लओ। 3 पर तिने तिस्सो पकड़ी ने कुटेया कने खाली हाथ भेजी तया। 4 फेरी तिने इक कने दास तिन्हां लॉ भेजया तिने तिसरा सिर फाड़ित्या कने तिसरी बेजती किती। 5 फेरी तिने इक्की होरी जो भेजया; तिने तिस्सो मारी तया। तां तिने कनेसीं मतेयां जो भेजया; तिन्हा च ते तिने कईयां जो कुटेया, कने थोड़े जो मारी तया। 6 हुण ईक ई रही गया था, सैह तिसरा प्यारा पुत्रा था; बादा च तिने तिस्सो भी तिन्हा लॉ ये सोची ने भेजया भई तिन्हा मेरे पुत्रा रा आदर करना। 7 पर तिने कसाने अप्पु चीयें बोलया, 'ये ई तां बारस आ; आवा, अहें इसो मारी दिये, तां सब किछ अहांरा हुई जाणा।' 8 कने तिने तिस्सो पकड़ी ने मारी तया, कने अँगुराँ रा बागा ते बाहर सट्टीतया। 9 "इस खातर अँगुराँ रे बागा रा मालक क्या करगा? तिस आईने तिन्हां कसाना रा नाश करना, कने अँगुराँ रा बाग दुजयां जो दई देणा। 10 क्या तुहें पवित्र शास्त्रा च ये वचन नी पढ़ेया : तिस पत्थरा जो जे राज मिस्त्रीये नक्कमा मनया था, सै ई कोणे रा सिरा हुईया; 11 ये प्रभुये रिया खा ते हुआ, कने अहांरी नजरां च नोखा आ।" 12 तां तिने तिस्सो पकड़ना चाह्या; कांभई समझी गये थे भई इने आहरे बारे च ये उदाहरण बोली रा। पर सै लोकां ते उरे, कने तिस्सो छड्डी ने चली गये।

कैसरा जो कर देणा

(मत्ती 22:15-22; लूका 20:20-26)

13 तां तिने तिस्सो गल्लां च फसाणे खातर किछ फरीसियां कने हेरोदियां जो तिस लॉ भेजया। 14 तिने आई ने तिस्सो बोलया, "हे गुरु अहें जाणांये, भई तु सच्चा, कने किसी री परवाह नी करदा कांभई तु माळुआं रा मुंह देख्खी ने गल्लां नी करदा पर परमेशरा रा रस्ता सच्चाईया ने दस्सा। तां क्या कैसर जो कर देणा ठीक आ के नी? 15 अहें दर्ईये के नी दर्ईये?" तिने तिन्हा रा कपट जाणी ने, तिन्हा जो बोलया, "मिंजो कें परखांये? इक दीनार मेरे लॉ लयाओ, भई हऊँ तिस्सो देखुँ।" 16 सै ली आये कने तिने तिन्हा जो बोलया, "ये मोहर कने नाँ किसरा आ?" तिने बोलया, "कैसरा रा।" 17 यीशुये तिन्हा जो बोलया, "सै जे कैसरा रा कैसरा जो, कने सै जे परमेशरा रा परमेशरा जो देओ।" तां सै तिस परा जो बौहत हेरान हुणे लगे।

मूर्खियां ते ज्युन्दा होणा कने ब्याह

(मत्ती 22:23-33; लूका 20:27-40)

18 फेरी सदुकिर्यें भी, सै जे बोलांये भई मरिरेयां च ते जीऊंदे हुणा नी आ, तिस लॉ आई ने तिसते पुछ्या, 19 "हे गुरु, मूसै अहां खातर लिखिरा भई जे किसी रा भाई बिना औळादा ते मरी जाओ कने तिसरी जनाना रई जाओ, तां तिसरा भाई तिसरिया जनाना ने ब्याह करी लौ कने अपणे भाई ये खातर बंश चलाओ। 20 सात भाई थे। पहला भाई ब्याह करीने बिना औळादा ते ई मरी गया। 21 तां दुजे भाईये तिसा जनाना ने ब्याह करी लया कने बिना औळादा ते मरी गया; कने तियां ई तिजे बी कित्या। 22 कने सत्तां री औळाद नी हुई। सभी ते पिछे सै जनाना भी मरी गी। 23 इस खातर जीऊंदे हुणे पर सै तिन्हां च ते किसरी जनाना हुंगी? कांभई सै सत्तां री जनाना हुई गरी थी।"

24 यीशुये तिन्हा ने बोलया, "क्या तुहें इसा वजाह ते भूला च नी भईरे भई तुहें ना तां पवित्र शास्त्रा ई जो जाणांये; कने ना ई परमेशरा री सामर्था जो? 25 कांभई तजे तिन्हां मरीरेयां च ते जीऊंदे यां हुणा, तां तिन्हां ना ब्याह करना कने ना ब्याह खातर दित्या जाणा, पर स्वर्गा च दुतां साई हुणें। 26 मरीरेयां च ते जीऊंदे हुणे रे बारे च क्या तुहें मूसा रिया कताबा च झाड़िया

री कथा च नी पढ़या भई परमेश्वरे तिस्सो बोलया, 'हऊँ अब्राहमा रा परमेश्वर, कने इसहाका रा परमेश्वर, कने याकूबा रा परमेश्वर आ?' 27 परमेश्वर मरीरेयां रां नी पर जीऊंदेयां रा परमेश्वर आ; इस खातर तुहें बडीया भूला च भई रे।"

सर्बीं ते बड्डा हुक्म

(मत्ती 22:34-40; लूका 10:25-28)

28 शास्त्रीयां च ते इक्की आई ने तिन्हांजो बैहस करदे सुणया, कने ये जाणी ने भई तिने तिन्हां खरे साहबा ने जवाब दित्या, तिसते पुछ्या, "सबी ते पेहला हुक्म कुण जे या?" 29 यीशुये तिस्सो जवाब दित्या, "सारेयां हुक्मा च ते ये पेहला आ : 'हे इस्राएल सुण! प्रभु अहां रा परमेश्वर इक ई प्रभु आ, 30 कने तु प्रभु अपणे परमेशरा ते अपणे सारे मना ते, कने अपणे सारे प्राणा ते, कने अपणियां सारिया अक्का ते, कने अपणिया सारिया ताकता ते प्रेम रखा।' 31 कने दुज्जी ये ई, 'तु अपणे पड़ोसीये ने अप्पु साई प्रेम रखा।' इसते बड्डा कने कोई हुक्म नी आ।' 32 शास्त्रीये तिसने बोलया, "हे गुरु, बौहत ठीक आ! तु ये सच बोलां भई ये इक्की ई हा, कने इसो छड्डी ने कने कोई नी आ। 33 कने तिसने अपणे सारे मना, कने सारिया अक्का, कने सारे प्राणां, कने सारिया ताकता सौगी प्रेम रखया; कने अपणे पड़ोसीये ने अप्पु साई प्रेम रखया, सारे होमबलि कने बलिदाना ते बदी ने आ।" 34 तजे यीशुये देक्खया भई तिने समझा ने जवाब दित्या, तां तिसने बोलया, "तु परमेशरा रे राज्य ते दूर नी आ।" कने किसी जो फेरी तिसते किछ पुछणे रा हौंसला नी हुआ।

मसीह किसरा पुत्र आ

(मत्ती 22:41-46; लूका 20:41-44)

35 फेरी यीशुये मन्दरा च उपदेश देंदे हुये ये बोलया, "शास्त्री किसो बोलांये भई मसीह दाऊदा रा पुत्र आ? 36 दाऊदे अप्पु ई पवित्र आत्मा च हुई ने बोली रा : 'प्रभुये मेरे प्रभुये ने बोलया, 'मेरे सज्जे खॉ बैठ, तदुआं तकां जे हऊँ तेरे बैरियां जो तेरे पैरां री थल्ले नी करी दओ।'" 37 दाऊद तां अप्पु ई तिस्सो प्रभु बोलां, फेरी सै तिसरा पुत्र किता ते हुआ?" कने भीडा रे लोक तिसरी मजे ने सुणां थे।

शास्त्रियां ते खबरदार

(मत्ती 23:1-36; लूका 20:45-47)

38 तिने अपणे उपदेशा च तिन्हां ने बोलया, "शास्त्रीयां ते चतन रहा, सै जे लम्मे-लम्मे चोगे पेहनी ने फिरना कने बजारां च नमस्कार, 39 कने आराधनालय च खरियां-खरियां जगह कने धामा च खरे-खरे जगह भी चाह्यां ये। 40 सै विधवा रे घरां जो खाई जांये, कने दसणे खातर बड्डीया देरा तकां जो प्रार्थना करदे रहांये। इन्हां जो मती सजा मिलणी।"

कंगाल विधवा रा दान

(लूका 21:1-4)

41 सैह मन्दरा रे भण्डारा रे साह्याणे बैठी ने देक्खया रां था भई लोक मन्दरा रे भण्डारा च कियां दान पांवांये; कने मते धना आऊलेयां बौहत किछ दित्या। 42 ताहलू ई इक कंगाल विधवा आईने दो दमड़ियां, सै जे इक्की धेले रे बराबर हुआं ई यां, पाईयां। 43 तां तिने अपणे चेलेयां जो अप्पु लॉ सदीने तिन्हां ने बोलया, "हऊँ तुहां ने सच बोलां भई मन्दरा रे भण्डारा च पाणे औळ्यां च ते इसै कंगाले विधवे सबी ते वधी ने दित्या; 44 कांभई सबी ई अपणे धना रे जादा हुणे च ते पाया, पर अपणिया कमीया च ते जो किछ तिसरा था, मतलब अपणियां सारी कमाई पाई तरी।"

मन्दरा रे बिनाशा री भबिष्यबाणी

(मत्ती 24:1-2; लूका 21:5-6)

13 तजे सै तिस मन्दरा च ते निकलेयां रां था, तां तिसरे चेलेयां च ते इक्की तिसने बोलया, "हे गुरु, देख, केड्डा बड्डा पत्थर आ कने कितना बड़ा भवन आ! 2 यीशुये तिसने बोलया, "क्या तुहें इना बड्डे-बड्डे

मकानां जो देखखा रांये : येथी पत्थरां पर पत्थर मनी बचणा सै जे रुडाय्या नी जाणा।"

संकट कने कळेश

(मत्ती 24:3-14; लूका 21:7-19)

3 तजे सै जैतुना रे पहाडा पर मन्दरा रे सामणे बैठी रा था, तां पतरस कने याकूब कने यूहन्ना कने अन्द्रियासै लग जाईने तिसते पुछ्या, 4 "अहां दस्स भई ये गल्लां काहलू हुणीयां? कने तजे ये सारियां गल्लां पुरियां हुणे पर अऊणीयां तिस बक्ता रा क्या नशाण हुणा?" 5 यीशु तिन्हा ने बोलणे लग्या, "चत्तन रह्वा भई कोई तुहांजो भरमाई नी सको। 6 मत्यां मेरे नौं ते आईने बोलणा, 'हऊँ सै ई आ।' कने मत्यां जो भरमाई देणा। 7 तजे तुहां लडाईयां, कने लडाईयां रे बारे च सुणना, तां देखां घबरांदे; कांभई इना रा हुणा जरूरी आ, तिस बक्ता अन्त नी हुई जाणा। 8 कांभई जातिया पर जातिया, कने राज्य पर राज्य चढाई करनी। हर जगह हिलण हुणे, कने अकाल पऊणे। ये तां पीडां री शुरुआत ई हुणी।

9 "पर तुहें अपणे बारे च चत्तन रैहणा; कांभई लोकां तुहांजो महासभा च देणा कने तुहांजो पंचयेतां च कुटणे जाणे, कने मेरिया वजाह ते हाकमा कने राजेयां रे साहणे खडे कित्ते जाणे, तां जो तिन्हां पर गवाई हो। 10 पर जरूरी आ भई पैहले खुशखबरी सबी जातियां च प्रचार नी हुई जाओ। 11 तजे तिन्हां तुहांजो नई ने पकडवाणा, तां पैहले ते चिन्ता देखां करदे भई अहां क्या बोलणा; कांभई बोलणे औळे तुहें नीये, पर पवित्र आत्मा आ। 12 भाईये जो भाईये, कने पिते जो पुत्रा मारने खातर देणा, कने बच्चेयां माता-पिता रे विरोधा च हुई ने तिन्हां मरवाई देणा। 13 कने मेरे नौं रिया वजाह ते सबी लोकां तुहां ते बैर करना; पर तिस जे अन्ता तकां जो हौंसला रखणा, तिसरा उद्धार हुणा।

महांसंकट-काल

(मत्ती 24:15-28; लूका 21:20-24)

14 "तां तजे तुहां तिसा उजाडणे आउलिया घणित चीजां जो तिन्ही जे ठीक नी आ तिन्ही खडी रिया देखो, (पढने औळे समझी लओ) तां सै जे यहूदिया च हो, सै पहाडा परा जो नी जाओ; 15 सै जे छत्ता पर हो, सै अपणे घरा ते किछ भी लेणे जो नी उतरो कने ना अन्दरा जो जाओ; 16 कने सै जे खेता च हो, सै अपणा कपडा लेणे खातर पिछे जो नी हटी। 17 तिन्हां दिनां च सै जे भारथी कने दुध पयाणे आउली हुंगी, तिन्हां खातर हाय-हाय। 18 कने प्रार्थाना करया करा भई ये ठण्डी व नी हो। 19 कांभई सै दिन येदे कष्टा रे हुणे भई स्रष्टिया रिया शुरुआता ते, सै जे परमेश्वरे रची री, हुणां तकां ना तां हुये कने ना फेरी कदी हुणे। 20 जे प्रभु तिन्हा दिना जो नी घटांदा तां कोई प्राणी नी बचदा; पर तिन्हा चुणिरियां रिया वजाह ते तिन्हा जे तिने चुणिरा, तिनां दिना जो घटाया। 21 तिस बक्ता जे कोई तुहां ने बोलो, 'देखा, मसीह येथी आ,' या 'देखा, तिन्ही आ, तां मत्रीं देखां लेंदें; 22 कांभई झुठे मसीह झुठे भविष्यगत हुणे, कने नशाण कने हैरानिया रे काम दसणे भई जे हुई सको तां चुणी रियां जो भी भरमाई दो। 23 पर तुहें चत्तन रह्वा, देखा, मैं तुहांजो सब गल्लां पैहले ई ते दस्सी तियां।

माहुये रे पुत्रा रा दुबारा औणा

(मत्ती 24:29-31; लूका 21:25-28)

24 "तिन्हां दिना च तिस क्लेशा ते बाद सुरज नेहरा हुई जाणा, कने चन्द्रमे लैट नी देणी; 25 कने आकाशा ते तारे पऊणे लगणे; कने आकाशा रियां ताकतां लयाईयां जाणीयां। 26 तां लोकां माहुये रे पुत्रा जो बडिया सामर्था कने महिमा सौगी बदलां च आऊदें देखणा। 27 तिस वगत सै अपणे दुतां जो भेजी ने पर्थविया रे इस कुणे ते उस कुणे तकां, चऊं तरफा ते अपणे चुणी रियां लोकां जो कडा करना।

दागले रे डाळा रा उदाहरण

(मत्ती 24:32-35; लूका 21:29-33)

28 "अंजीरा रे डाला ते ये उदाहरण सीखा : तजे तिसरियां डालियां नरम हुई जाईयां, कने पत्ते निकलने लगांये; तां तुहें पता लाई लये भई गर्मिया रा बक्त नेडे आ। 29 इया ई तजे तुहें इना गल्लां जो हुन्दें देखो, तां जाणी लावा भई सै नेडे आ पर दरवाजे पर ई आ 30 हऊँ तुहां ने सच बोलां भई तदुआं तकां जे ये सब गल्लां नी हुई जांगीयां, तदुआं तकां लोकां नी सकणा। 31 आकाश कने पर्थवी टली जाणी, पर मेरीयां गल्लां कदी भी नी टलनीयां।

जागदे रौआ

(मत्ती 24:36-44)

32 "तिस दिना या तिसा घडिया रे बारे च कोई नी जाणदा। ना स्वर्गा रे दूत कने ना पुत्र; पर सिर्फ पिता। 33 देखा, जागदे कने प्रार्थना करदे रह्वा; कांभई तुहें नी जाणदे भई सै बक्त काहू औणा। 34 ये तिस माहुये साई हई, सै जे परदेशा जान्दे बक्ता अपणा घर छडी जाओ, कने अपणे दासा जो अधिकार देओ : कने हर इक जो तिसरा काम दस्सी देओ, कने द्वारपाला जो जागणे रा हुक्म देओ। 35 इस खातर जागदे रह्वा, कांभई तुहें नी जाणदे भई घरा रे मालका काहू आउणा, संजा जो या अधिया राती जो या कुकडा रे झांगा देणे रे बक्ता या भ्यागा। 36 येदा नी हो भई सै इकदम आई ने तुहांजो सुत्तीरे यां पाओ। 37 कने सै जे हऊँ तुहां ने बोलां, सैई सबीने बोलां : जागदे रह्वा!"

यीशुये रे खलाफ चाल

(मत्ती 26:1-5; लूका 22:1,2; यूहन्ना 11:45-53)

14 दुई दिना ते बाद फसह कने अखमीरी रोटिया रा तओहार हुणे आउला था। प्रधान याजक कने शास्त्री इसा गल्ला रिया टोलां च थे भई तिस्सो कियां धोखे ने पकडी ने मारी देओ; 2 पर बोलां थे, "

बैतनिय्याह च यीशुये रा अभ्यंजन

(मत्ती 26:6-13; यूहन्ना 12:1-8)

3 तजे सै बैतनिय्याह च शमोन कोढिया रे घरा च रोटी खाणे बैठिरा था, तां इक जनाना संगमरमरा रिया शीशिया च जटांमांसी रा मत्तिया कीमता आउला शुद्ध इत्र लई ने आई; कने शीशि तोडी ने इत्र जो तिसरे सिरा पर लटी तया। 4 पर कोई-कोई अपणे मना च रिस्सीयाई ने बोलणे लगे, "इस इत्रा जो खराब कें करी तया? 5 कांभई ये इत्र तां तीन सौ दिनारा ते जादा कीमता रा बेचीने कंगालां च बन्डी सकां थे।" कने तिसा जो झिडकणे लगे। 6 यीशुये बोलया, "तिसा जो छडी दो; तिसा जो कें तंग करांये? इसैं तां मेरने भला कित्या। 7 कंगालां तुहां सौगी ई रैहणा; तुहें ताहलूं जे चाहो तां तिन्हा ने भलाई करी सकांये; पर मांह तुहां ने सौगी सदा नी रैहणा। 8 जो किछ सै करी सकी, तिसै कित्या; तिसै मेरे दबाये जाणे री तैयारिया ते पैहले ई मेरे शरीरा पर इत्र मली तया। 9 हऊँ तुहां ने सच बोलां भई सारे संसारा च तिन्ही जे खुशखबरी प्रचार कित्या जाणा, तिन्ही तिसा रे इस कम्मा री चर्चा बी इसा रिया यादा खातर कित्ती जाणी।"

यहूदा रा बिश्वासघात

(मत्ती 26:14-16; लूका 22:3-6)

10 तां यहूदा इस्करियोती सै जे बाहरां च ते इक था, प्रधान याजका लाँ गया भई तिस्सो तिन्हारे हत्था पकडवाई दो। 11 सै ये सुणी ने खुश हुये, कने तिस्सो पैसै देणा मत्री लये; कने सै मौका टोलणे लगे भई तिस्सो कियां पकडवाई दईये।

चेलयां ने फसह री अन्तिम धाम

(मत्ती 26:17-25; लूका 22:7-14; यूहन्ना 13:21-30)

12 अखमीरी रोटियां रे त्योहारा रे पैहले दिन, तिसच जे सै फसह रा बलिदान करां थे, तिसरे चेलयां पुछ्या, "तू कित्ती चाह्वां भई अहें तेरे खातर

फसह खाणे री तैयारी करिये?" 13 तिने अपणे चलेल्यां च ते दुई जो ये बोली ने भेजया, "नगरा च जावा, कने इक माह्नु तिने जे पाणिये रा घडा चक्री रा हुणा तुहांजो मिलणा, तिसरे पिछे जायों; 14 कने सै तिस घरा जे जाओ, तिस घरा रे मालका ने बोलयों, 'गुरु बोलां भई मेरी जगह किती ई तिस जे हऊँ अपणेयां चलेल्यां सौगी फसह खाऊँ?" 15 तिस तुहांजो इक सजी-सजाई री, कने तैयार किती री बड्डी बौहड दस्सी देणी, तिन्ही अहां खातर तैयार करेयों।" 16 चले निकली ने नगरा च आये, कने तेढा जे तिने तिन्हा ने बोली रा था, तेढा ई हुआ; कने फसह तयार कित्या।

17 तजे सांझ हुई तां सै बाहरां ने सौगी आया। 18 तजे सै रोटी खाया रां थे, तां यीशुये बोलया, "हऊँ तुहां ने सच बोलां भई तुहां च ते इक्की, सै जे मेरने सौगी रोटी खाया रांये, मिंजो पकड़वाणा।" 19 तिन्हां पर उदासी छाई गी कने सै इक-इक करी ने तिसने बोलणे लगे, "क्या सै हऊँ आ?" 20 तिने तिन्हां ने बोलया, "सै बाहरां च ते इक आ तिस जे मेरने सौगी थालीया च हात्थ पाणा। 21 कांभई माह्नुये रा पुत्र तां तेढा जे तिसरे बारे च लिखिरा, जाये ई रां; पर तिस माह्नुये पर हाय तिसते जे माह्नुये रा पुत्र पकड़वाया जांगा! जे तिस माह्नुये रा जन्म ई नी हुंदा, तां तिस खातर भला हुंदा।"

प्रभु-भोज

(मत्ती 26:26-30; लूका 22:14-20;1 कुरिन्थयों 11:23-25)

22 तजे सै खाये रां थे, तिने रोटी लई, कने आशीष मंगी ने तोडी, कने तिन्हा जो दिती, कने बोलया, "लवा, ये मेरी देह ई।" 23 फेरी तिने कटोरा लई ने धन्यावाद कित्या, कने तिनों जो दित्या; कने तिने सर्बी तिस च ते पीत्या। 24 कने तिने तिन्हा ने बोलया, "ये वायदे रा मेरा सै लहू आ, सै जे मत्यां खातर बहाया जावां। 25 हऊँ तुहां ने सच बोलां भई दाखा रा रस तिस दिना तर्को फेरी कदी मनी पीगा; तदुआ तर्को जे परमेशरा रे राज्य च नवां नी पीऊँ।" 26 फेरी सै भजन गाई ने बाहर जैतुना रे पहाडा पर गये।

पतरसा रे मुकरने री भविष्यबाणी

(मत्ती 26:31-35; लूका 22:31-34; यूहन्ना 13:36-38)

27 तजे यीशुये तिन्हां ने बोलया, "तुहां सर्बीं ठोकर खाणी कांभई लिखीरा : मांह रखवाले जो मारना, कने भेड्डां तितर-बितर हुई जाणा।" 28 पर मैं अपणे जी उठणे ते बाद तुहां ते पैहले ई गलीला जो जाणा।" 29 पतरस तिसने बोलया, "जे सब ठोकर खाओ तां खाओ, पर मांह ठोकर नी खाणी।" 30 यीशुये तिसने बोलया, "हऊँ तेरने सच बोलां भई आज ई इसा राति जो कुकड़ा रिया दो बारी झांग देणे ते पैहले तु तिन बार मेरते मुकरी जाणा।" 31 पर तिने कने भी जोर दई ने बोलया, "जे मिंजो तेरे सौगी मरना भी पओ तां भी मांह तेरा इन्कार कदी भी नी करना।" ईयां ई होरी सर्बीं भी बोलया।

गतसमनी च प्रार्थना

(मत्ती 26:36-46; लूका 22:39-46)

32 फेरी सै गतसमनी नौं रिया जगहा च आये, कने तिने अपणेयां चलेल्यां जो बोलया, "येथी बैठीरे रहा, तदुआ तर्को जे मांह प्रार्थना करनी। 33 कने सै पतरस कने याकूब कने यूहन्ना जो अप्पु सौगी लई गया; कने बडा ई अधीर कने व्याकुल हुणे लगया, 34 कने तिन्हां ने बोलया, "मेरा मन उदास आ, इतना भई हऊँ मरने पर आ : तुहें ऐथी ई रुका, कने जागदे रहा।" 35 फेरी सै थोडा अगे बदी ने कने धरतिया पर भई ने प्रार्थना करने लगया भई जे हुई सको तां ये घडी मेरे परा ते, टली जाओ, 36 कने बोलया, "हे अब्बा, हे पिता, तेरते सब किछ हुई सका; इस कटोरे जो मेरेला ते टाहई दे : तां भी तेढा जे हऊँ चाह्नां तेढा नी, पर सै जे तु चाह्नां सै ई हो। 37 फेरी सै आया कने तिन्हा जो सुत्तिरे देक्खी ने पतरसा ने बोलया, "हे शमौन, तु सया रां? क्या इक घडी भी नी सकया? 38 जागदे कने प्रार्थना करदे रहा भई तुहें परीखा च नी पौ। आत्मा तां तयार आ, पर शरीर कमजोर आ।" 39 कने सै फेरी चलीगे कने तिन्हां ई बोलां च प्रार्थना किती। 40 फेरी आई ने तिन्हा जो सुत्ती रा देक्खया, कांभई तिन्हां रियां आक्खीं नीदा ने भरी री थी : कने नी जाणदे थे भई तिस्सो क्या जवाब दर्ईये। 41 फेरी तिजी बारी आई ने तिने बोलया, "हुण

सुत्तिरे रहा कने आराम करा, बस, घडी आई गी; देखा माह्नुये रा पुत्र पापीयां रे हाथा च पकड़वाया जाणा। 42 उठा, चला! देखा, मेरे पकड़वाणे औळा नेडे आई गरा!"

यीशुये रा धोखे ने पकड़वाया जाणा

(मत्ती 26:47-56; लूका 22:47-53; यूहन्ना 18:3-12)

43 सै येढा बोलया ई रां था भई यहूदा सै जे बारां च ते इक था, अपणे सौगी प्रधान याजका कने शास्त्रियां कने पुरनियां रिया तरफा ते इक बडी भीड लई ने ताहलुं आई पुजया, सै जे तलवारा कने सोठयां लई ने आई रे थे। 44 तिसरे पकड़वाणे आऊले ये दस्सी तरा था भई तिस्सो जे मांह चुमणा सै ई आ, तिस्सो पकड़ी ने लई जायों। 45 सै आया, कने ताहलुं तिसलों जाईने बोलया, "हे रब्बी!" कने तिस्सो बौहत चुमया। 46 तां तिने तिस्सो घेरी ने तिस्सो पकड़ी लया। 47 तिन्हा च ते सै जे नेडे खडी रे थे इक्की तलवार खिजी ने महायाजका रे दासा पर चलाई, कने तिसरा कान बहडी तया। 48 यीशुये तिन्हा ने बोलया, "क्या तुहें डाकु जाणी ने मिंजो पकड़ने खातर तलवारां ने सोठियां लई ने निकली रे? 49 हऊँ तां हर दिन मन्दरा च तुहां सौगी ई उपदेश देवां था, कने तां तुहें मिंजो नी पकड़ेया : पर ये इस खातर हुआ भई पवित्र शास्त्रा री गलां पूरियां हो।" 50 इस पर सब चले तिस्सो छड्डी ने नट्टी गये।

51 इक जवान अपणे नंगे शरीरा पर चादर ओड्डी ने तिसरे पिछे आया; कने लोकें तिस्सो पकड़या। 52 पर सै चादर छड्डी ने नंगा ई नट्टी गया।

पंचैती रे सामणे यीशु

(मत्ती 26:57-68; लूका 22:54,55,63-71; यूहन्ना 18:13,14,19-24)

53 फेरी सै यीशुये जो महायाजका लॉ ली आये; कने सब प्रधान याजक कने पुरनिये कने शास्त्री तिस ले कड़े हुईगे। 54 पतरस दुरा-दुरा ते तिसरे पिछे-पिछे महायाजका रे आंगणा रे अन्दरा तर्को गया, कने प्यादेयां सौगी बैठी ने आग सैकणे लगया। 55 प्रधान याजक कने सारी महासभा यीशुये जो मारने खातर तिसरे बरोधा च गवाईया रिया टोला च थे पर नी मिली। 56 कांभई मते सारे तिसरे वरोधा च ये झुटी गवाई देया रां थे। पर तिन्हां रियां गवाईयां इको जी यां नी थियां। 57 तां किछ लोकें उठी ने तिस रे बरोधा च ये गवाई दिती, 58 अहें इसो ये बोलदे सुणी रा, मांह इस हत्था रे बणाई रे मन्दरा जो रुढाई देणा, कने तिन्हा दिना च दुजा बनाणा सै जे हत्था ते नी बणी रा हो।" 59 इस पर भी तिन्हा री गवाई इको जी नी निकली।

60 तां महायाजके बीच खड़े हुई ने यीशुये ते पुछया, "तु कोई जवाब नी देंदा? ये लोक तेरे बरोधा च क्या गवाई दे रांये?" 61 पर सै चुप-चाप रेया कने किछ जवाब नी दित्या। महायाजके तिस्सो फेरी पुछया, "क्या तु परम धन्य रा पुत्र मसीह आ?" 62 यीशुये बोलया, "हऊँ हया : कने तुहां माह्नुये रे पुत्रा जो सर्वशक्तिमाना रे सजे हत्था बैठीरे, कने आकाशा रे बदलों सौगी आउंदे देखणा।" 63 तां महायाजके अपणे कपड़े फाडी ने बोलया, "हुण अहां गवाहां ते क्या मतलब आ? 64 तुहें ये निन्दा सुणी। तुहां री क्या राय ई?" तिने सर्बीं बोलया भई ये मारने जोगा आ। 65 तां कोई ता तिस परों थूकणे, कने कोई तिसरा मूंह ढकणे कने घसून्ने मारने लगे, कने तिसने बोलणे लगे, "भविष्याणी कर!" कने पयादेयां तिस्सो पकड़ी ने थप्पड़ मारे।

पतरसा रा इन्कार करना

(मत्ती 26:69-75; लूका 22:56-62; यूहन्ना 18:15-18,25-27)

66 तां पतरस थल्ले आंगणा च था तां महायाजका री दासियां च ते इक तिन्ही आई, 67 कने पतरसा जो आग सैकदे देक्खया कने टकटकी लाई ने देख्या कने बोलणे लगी, "तु बी ता तिस नासरी यीशुये सौगी था।" 68 सै मुकरी गया, कने बोलया, "हऊँ नी जाणदा कने नां ई समझां भई तू क्या बोलया रां ई।" फेरी सै बाहर चलीगे; कने कुकड़े झांग दिती। 69 सै दासी तिस्सो देक्खी ने तिन्हा ने सै जे सौगी खडी रे थे, फेरी बोलणे लगी, "ये तिन्हा च ते इक आ।" 70 पर सै फेरी मुकरी गया। थोडीया देरा बाद तिने सै जे नेडे खडी रे थे फेरी पतरसा जो बोलया, जरुर तु भी तिन्हां च ते इक आ; कांभई तु गलीली भी आ।" 71 तजे सै धिकारने कने कसम खाणे लगया, हऊँ

तिस माह्ये जो, तिसरी जे तुहें चर्चा करया रां ये नी जाणदा।" 72 तां ताहलू दुजी बारी कुकडे झांग दिती। पतरसा जो सै गल्ल सै जे यीशुये तिसने बोली थी याद आई : "कुकड़ा रिया दो बार झांग देणे ते पैहले तु तीन बारी मेरा इन्कार करना।" कने सै जे इसा गल्ला जो सोची ने रोणे लगया।

पिलातुस रे सामणे यीशु

(मत्ती 27:1,2,11-14; लूका 23:1-5; यूहन्ना 18:28-38)

15 भयाग हुंदे ई ताहलू प्रधान याजकें, पुरनियें, कने शास्त्रियें कने सारिया महासभा च सलाह करी ने यीशुये जो बन्ही तया, कने तिस्सो लई ने पिलातुसा रे हत्था दई तया। 2 पिलातुसै तिसते पुछया, "क्या तु यहूदियां रा राजा आ?" तिने तिस्सो जवाब दित्या, "तु अप्पु ई बोलया रा।" 3 प्रधान याजक तिस परा मतियां लगाये रां थे। 4 पिलातुसै तिसते फेरी पुछया, "क्या तु किछ जवाब नी देदा देख ये तेरे पर कितनीयां गल्लां रा दोष लाये रां ये?" 5 यीशुये फेरी भी किछ जवाब नी दित्या; येथी तकौ भई पिलातुस बड़ा हेरान हुआ।

मौती रिया सजा रा हुक्म

(मत्ती 27:15-26; लूका 23:13-25; यूहन्ना 18:39-19:16)

6 पिलातुस तिस तयोहारा च किसी इकि केदिये जो तिस्सो जे सै चाह्नां थे, तिन्हां खातर छड्डी देयां था। 7 बरअब्बा नौं रा इक माह्लू तिन्हा बलवा करने औळियां सौगी कैदी था, तिने जे बलवे च हत्या कित्ती री थी। 8 कने भीड़ उपर जाईने तिसने विनती करने लगी, भई तेदा जे तु अहां खातर करदा आया तेदा ई कर। 9 पिलातुसै तिन्हांजो जवाब दित्या, "क्या तुहें चायें भई हऊं तुहां खातर यहूदियां रे राजे जो छड्डी दें?" 10 कांभई सै जाणां था भई प्रधान याजके तिस्सो डाह करी ने पकड़वाया था। 11 पर प्रधान याजके लोकां जो बहकाया भई सै बरअब्बा ई जो तिन्हां खातर छड्डी दो। 12 ये सुणी ने पिलातुसै तिन्हां ते फेरी पुछया, "तां तिस्सो जे तुहें यहूदियां रा राजा बोलाये, तिस्सो हऊं क्या करूं?" 13 सै फेरी रडाये, "तिस्सो कूसा पर चढाई दे!" 14 पिलातुसै तिन्हां ने बोलया, "कें, इने तुहां रा क्या बुरा कितीरा?" पर सै कने रडाये, "इसो कूसा पर चढाई दे!" 15 तां पिलातुसै भीड़ा जो खुश करने खातर, बरअब्बा जो तिन्हां खातर छड्डी तया, कने यीशुये जो कोड़े लगवाई ने देई तया भई कूसा पर चढाया जाओ।

फौजियें यीशुये रा अपमान कित्या

(मत्ती 27:27-31; यूहन्ना 19:2,3)

16 सपाई तिस्सो किले रे अन्दरा रे आन्गणा च लई गये तिस्सो जे प्रीटोरियम बोलां ये, कने सारिया पलटणा जो सदी लया। 17 तां तिने तिस्सो बैंगणी कपड़ा पहनाया कने कण्डेयां रा मुकट गुन्दी ने तिसरे सिरा पर रखया, 18 कने येदा बोली ने तिस्सो नमस्कार करने लगे, "हे यहूदियां रे राजा, नमस्कार!" 19 सै तिसरे सिरा पर सरकण्डे मारदे, कने तिस पर थूकदे, कने गोडे डाई ने तिस्सो प्रणाम करदे रहे। 20 तजे सै तिसरी हासी डुवाई चुके, तां तिस पर ते बैंगणी रंगा रा कपड़ा तुआरी ने तिसरे कपड़े पहनाये; कने तां तिस्सो कूसा पर चढाणे खातर बाहरा जो लई गये।

यीशुये रा कूसा पर चढाया जाणा

(मत्ती 27:32-44; लूका 23:26-43; यूहन्ना 19:17-27)

21 सिकन्दर कने रूफुस रा पिता शमौन, इक कुरेनी माह्लू, सै जे गांवां ते आया रां था तिखा ते निकलया; तिने तिस्सो बेकारा च पकड़ेया भई तिसरा कूस चकी ने लई चलो। 22 सै यीशुये जो गुलगुता नौं रिया जगह पर, तिसरा मतलब जे खोपड़ी री जगह आ, ली आये। 23 तिन्ही तिस्सो मुर्द मलयाई रा दाख रस देणे लगे, पर तिने नी लया। 24 तां तिने तिस्सो कूसा पर चढाया कने तिसरे कपड़ेयां पर चिट्टियां पाईयां, भई किस जो क्या मिलो, तिन्हां बन्ही लया। 25 कने इक पैहर दिन चढी गया था, तां तिने तिस्सो कूसा पर चढाया। 26 कने तिसरा दोष पत्र लिखी ने तिसते उपर लाई तया भई "यहूदियां रा राजा।" 27 तिने तिसने सौगी दो डाकु, इक तिसरे सजिया खा

कने इक तिसरे खबिया खा कूसा पर चढाये। 28 (तां पवित्र शास्त्रा रा सैह बचन भई सै अपराधियां सौगी गिणया गया, पूरा हुआ।) 29 सै कने रस्ते च जाणे आऊले सिर लिहाई-लिहाई ने येदा बोली ने तिसरी बेज्ती करां थे, "वाअ! मन्दरा जो रुढाणे औळे कने तीन्नां दिना च बनाणे औळे! 30 कूसा परा ते उतरी ने अप्पु जो बचाई ले।" 31 इसा रितिया ते प्रधान याजक भी, शास्त्रियां समेत अप्पु चीयें हासिया च बोलां थे, "इने होरीं जो बचाया पर अप्पु जो नी बचाई सकदा। 32 इस्राएला रा राजा, मसीह, हुण कूसा परा ते उतरी आओ भई देकखी ने विश्वास करीये।" कने सै जे तिसने सौगी कूसा पर चढाई रे थे, सै भी तिसरी निन्दा करां थे।

यीशुये रा प्राण छडणा

(मत्ती 27:45-56; लूका 23:44-49; यूहन्ना 19:28-30)

33 दपेहर हुणे पर सारे देशा च नेहरा छाई गया, कने तिजे पैहरा तक रेहया। 34 तीजे पैहर यीशुये बड़ीया आवाजा च बोलया, "इलोई, इलोई, लमा शबकनी?" तिसरा जे मतलब आ, "हे मेरे परमेश्वर, हे मेरे परमेश्वर, तैं मिंजो कें छड्डी तया?" 35 सै जे नेडे खडी रे थे, तिन्हां च ते कईयें ये सुणीने बोलया, "देखा, ये एलिय्याह जो सद्या रां।" 36 कने इक्की दौड़ी ने स्पंजा जो सिरके च डबोया, कने सरकण्डे पर रखी ने तिस्सो चुसाया कने बोलया, "ठहरी जावा, देखाये, एलिय्याह तिस्सो उतारने खातर आवां के नी आउंदा।" 37 तां यीशुये बड़िया आवाजा च रडाई ने प्राण छड्डी ते। 38 कने मन्दरा रा परदा उपरा ते बुना तकौ फटी न दो टुकड़े हुईया। 39 सै सूबेदार जे तिसरे सामणे खडी रा था, तजे तिस्सो तियां रडाई ने प्राण छडदे देकखया, तां तिने बोलया, "सचमुच ये माह्लू, परमेश्वर रा पुत्र था।" 40 कई जनाना भी दूरा ते देकखया रां थियां तिन्हां च ते मरियम मगदलीनी, छोटे याकूबा कने योसैसा री माता मरियम कने सलोमी थियां। 41 तजे सै गलीला च था तां ये तिसरे पिछे जांवां थियां कने तिसरे सैवा करां थियां; कने कने मतियां जनाना भी थियां सै जे तिसने सौगी यरूशलेमा जो आईयां थियां।

यीशुये रा कब्रा च रखया जाणा

(मत्ती 27:57-61; लूका 23:50-56; यूहन्ना 19:38-42)

42 तजे सांज हुई गी तां इस खातर भई तयारिया रा दिन था, सै जे सब्ता ते इक दिन पैहले हुआं 43 अरमतिया रा रैहणे औळा यूसुफ आया, सै जे महा सभा रा सदस्य था कने अप्पु भी परमेश्वर रे राज्य री बाट देकखया रां था। सै हौंसला करी ने पिलातुसा लाँ गया कने यीशुये री लाश मंगी। 44 पिलातुसा जो हेरानी हुई भई सै इतने छोड़े मरी गया; कने तिने सूबेदारा जो सद्दी ने पुछया, "क्या तिस्सो मरी रे जो बौहत बक्त हुईया?" 45 तजे तिने सूबेदारा ते सारा हाल जाणी लया, तां लाश यूसुफा जो दवाई ती। 46 तां तिने मलमला री इक चादर खरीदी, कने लाशा जो तुआरी ने तिसा चादरी च लपेटया, कने इक्की कब्रा च सै जे पत्थरा अन्दर खुणी री थी रखया, कने कब्रा रे दरवाजे पर इक पत्थर लाई तया। 47 मरियम मगदलीनी कने योसैसा री माता मरियम देकखया रां थियां भई सै किन्ती रखया गया।

यीशुये रा मूर्ईआं ते जी उठणा

(मत्ती 28:1-8; लूका 24:1-12; यूहन्ना 20:1-10)

16 तजे सब्ता रा दिन बीती गया, तां मरियम मगदलीनी कने याकुबा री माता मरियमे, कने सलोमी यें खुशबुआ आउलियां चीजां खरीदी लियां भई आई ने तिस पर मलो। 2 हफते रे पैहले दिन बडे भ्यागा ई तजे सूरज निकलया ई था, सै कब्रा पर आईयां, 3 कने अप्पु चीयें बोलां थियां, "अहां खातर कब्रा रे दरवाजे परा ते पत्थर किस टाह्ला।" 4 तजे तिने आक्खीं चक्कियां तां देकखया भई पत्थर हटी रा ई आ- सै बौहत ई बड़ा था। 5 कब्रा रे अन्दर जाईने तिने इक जवाना जो चिट्टे कपड़े पेहनी रे सज्जे पास बैठी रा देकखया, कने बौहत हेरान हुईयां। 6 तिने तिन्हां ने बोलया, "हेरान मता हुंदे, तुहें यीशु नासरिये जो सै जे कूसा पर चढाई रा था, टोलयां राईयां सै जीऊंदा हुई गरा येथी नी आ; देखा ये सै जगहह ई, तिन्ही जे तिने तिस्सो रखी रा था। 7 पर तुहें जावा, कने तिसरे चेलियां कने पतरसा जो बोलां भई तिस तुहां

ते पैहले गलीला जो जाणा। तेढा जे तिने तुहां ने बोलया था, तुहां तित्थी तिस्सो देखणा।" 8 कने सै निकलीने कब्रा ते नठी गियां; कांभई कंबणपात कने घबराणा तिन्हां पर छाई गरा था; कने तिने किसी ने किछ नी बोलया, कांभई डरां थियां।

मरियम मगदलीनी जो यीशुये रा दिसणा

(मत्ती 28:9,10; यूहन्ना 20:11-18)

9 हफते रे पैहले दिन भ्याग हुंदे ई सै जीऊंदा हुई ने सबते पैहले मरियम मगदलीनी जो तिसा च ते जे सात दुष्टात्मा कडियां थियां, दुसया। 10 तिसै जाईने यीशुये रे साथियां जो सै जे दुखा च डुब्बी रे थे कने रोया रां थे, समाचार दित्या। 11 तिने ये सुणी ने भई सै जीऊंदा कने तिसै तिस्सो देखी रा, सच नी मनया।

दुई चेलयां जो यीशुये रा दिखाई देणा

(लूका 24:13-35)

12 इसते बाद सै दुजे रुपा च तिन्हां च ते दुई जो तजे सै गांवां खा जाया रां थे, दिसया। 13 तिने भी जाईने कनेसीं जो समाचार दित्या, पर तिने तिन्हां रा बी सच नी मनया।

ग्यारां जो यीशुये रा दिखाई देणा

(मत्ती 28:16-20; लूका 24:36-49; यूहन्ना 20:19-23; प्रेरितां 1:6-8)

14 फेरी सै तिन्हां ग्याहरां जो भी तजे सै रोटी खाणे बैठिरे थे दुसया, कने तिन्हांरे अविश्वासा कने मना री कठोरता पर उलाहना दित्या, कांभई तिने तिसरे जी उठने ते बाद तिस्सो देखया था, इनें तिन्हा रा सच नी मनया था। 15 कने तिने तिन्हांजो बोलया, "तुहें सारे संसारा च जाईने सारिया स्त्रिया रे लोकां जो खुशखबरी प्रचार करा। 16 सै जे विश्वास करो कने बपतिस्मा लओ तिसरा ई उधदार हुणा, पर सै जे विश्वास नी करगा सै दोषी ठहराया जाण; 17 विश्वास करने ओळियां च ये नशाण हुणे भई तिन्हां मेरे नाँ ते दुष्ट आत्मा जो कडणा, नवीं नवीं भाषा बोलणी, 18 सप्पां जो चकी लेणा, कने जे जान लेणे आउली चीज भी पी लओ तां भी तिन्हांरा किछ नुकशान नी हुणा; तिन्हां बमारां पर हात्थ रखणे, कने तिन्हा ठीक हुई जाणा।"

यीशुये रा स्वर्गा जो जाणा

(लूका 24:50-53; प्रेरितां 1:9-11)

19 प्रभु यीशु तिन्हां ने गल्लां करने ते बाद स्वर्गा उपरा जो चकोई गया, कने परमेशरा रे सज्जे पासै खा बैठी गया। 20 कने तिने निकली ने सारियें जगें प्रचार कित्या, कने प्रभु तिन्हां ने सौगी काम करदा रेह्या, कने तिन्हा नशाणा ते सै जे सौगी-सौगी हुआं थे, वचना जो पक्का करदा रहया। आमीन।

लूका

भूमिका

लूका रिया लिखि रिया खुशखबरिया बिच इस्राएल रा छुटकारा करने औळा कने सारी माहु जाति रे मुक्तिदाता यीशु परमेशरा रे बारे च बखान कित्तिरा। लूका लिखां भई यीशु "कंगालां जो खुशखबरी सुनाणे खातर " परमेशरा रे आत्मे सदया था। इसा बजह ने ये खुशखबरी बनबनकियां परेशानियां च फसिरे लोकां रे फिकरां ने भरीरी। लूका री लिखि रिया खुशखबरिया जो सुनाणे रा इक अपणा ई मजा, खास कर शुरु रे पाठां च, तिन्हा च जे यीशुये रे औणे री गल्ल कित्तिरी, कने बाद बिच बी तिन्ही जे यीशुये रा स्वर्गा जो जाणे रा ब्योरा। प्रभु यीशुये रा स्वर्गा जो जाणे ते बाद मसीह च विश्वासा रे बधणे कने फैलणे रा ब्योरा। यीशुये रा स्वर्गा जो जाणे ते बाद मसीह च विश्वासा रे बधणे कने फैलणे रा ब्योरा इने लिखणे औळे 'प्रेरितां रे काम्म' नौवा रिया कताबा च दित्तिरा। दूजे कने छेऊये भागा च दस्सी रियां मतियां गल्लां सिर्फ इसा इ खुशखबरिया च मिलां इयां। उदाहरण रे तौर पर, यीशुये रे जमणे पर स्वर्गदूतां रा गीत गाणा, गदियां रा न्याणे यीशुये जो देखणे जाणा, यरूशलेम रे मन्दरा च बालक यीशु, कने दयालु सामरी कने बिगडैल मुन्दुये रा द्रष्टान्त बगैरा-बगैरा। सारिया खुशखबरिया च प्राथना, पवित्र आत्मा, यीशुये री लोक सेवा च जनानां रा काम्म, कने परमेशरा रिया तरफा ते पापां रिया माफिया पर जादा जोर दित्तिरा।

रूप रेखा:

भूमिका 1:1-4

यूहन्ना बपतिस्मा देणे औळा कने यीशुये रा जन्म कने बछपन 1:5-2:52

यूहन्ना बपतिस्मा देणे औळे री लोक सेवा 3:1-20

यीशुये रा बपतिस्मा कने परीक्षा 3:21-4:13

गलील च यीशुये री लोक सेवा 4:14-9:50

गलील ते यरूशलेम तक यात्रा 9:51-19:27

यरूशलेम च अन्तिम हफता 19:28-23:56

प्रभुये रा मरीरेआं चते जिन्दा हुणा, दुसणा कने स्वर्गा जो जाणा 24:1-53

परिचय

1 आदरणीय प्यारे मित्र थियुफिलुस जी! मतयां लोकें तिन्हां गल्लां रा ब्योरा लिखणे री कोशत कीति सै जे अहांरे बिच हुईयां। 2 ठीक सैई गल्लां सै जे अहांजो तिन्हां लोकां ते मिलियां, तिन्हें जे इन्हां गल्लां जो शुरु तेई देखया था कने सै जे परमेशरा रे वचना रे सेवक थे। 3 इस खातर शुरु तेई इन्हां सारियां गल्लां जो पूरी साबधानिया ने कने ठीक-ठाक जांच पड़ताल करने ते बाद, मिंजो ये ठीक लगया भई हऊँ बी इन्हां जो तेरे खातर बारी-बारी लिखूँ। 4 तिसते जे भई तू तिन्हां गल्लां री हकीकत जाणी लो तिन्हां री जे तिज्जो शिक्षा देई तरी।

यूहन्ने रे जन्मा री घोषणा

5 तिन्हें दिनें ताहली जे यहूदिया प्रदेशा च हेरोदेस राजे रा राज था। तिथि जकरयाह नौवा रा इक यहूदि याजक था, सै जे अबिय्याह री याजकां री मन्डलिया च था। कने तिस रिया जनाना रा नौ इलीशिबा था सै जे हारुन रे कुळा री थी। 6 जकरयाह कने इलीशिबा ये दोनों जणे परमेशरा री नजरां च धर्मी थे, सै बडे ध्याना ने प्रभुये रे हुक्मा जो कने कायदे-कानूना जो मन्नां थे। 7 पर इलीशिबा रे औत्र होणे रिया वजह ने तिन्हारे कोई न्याणा नीं था, कने हुण सै दोनों जणे बडे स्याणे हुईं गये थे। 8 ताहली जे जकरयाह अपणी मण्डलीया री बारी औणे पर परमेशरा रे सामणे याजकां रा काम्म करीरां था। 9 तां परोहतां रे रीति-रिवाजां रे मुताबिक तिसरे नौवा पर चिटठी निकळी कने तिसरा नौं आया भई प्रभु रे मन्दरा च जाईने तिसरिया हजूरिया च धूप बालो। 10 कने ताहली जे धूप बालणे रा वगत आया ताहली लोक मन्दरा रे बाहर कडे हुईने प्रार्थना करी करां थे। 11 ताहली जे जकरयाह प्रभु रे मन्दरा च था, तिस वगत तिने प्रभु रा इक स्वर्गदूत धूप बालणे री चौकिया रे सजे पासे खडीरा देखया। 12 जकरयाह तिस स्वर्गदूता जो देखीने घबराईया कने डरा रे मारे तिसरा बडा बुरा हाल था। 13 पर तिने स्वर्गदूते जकरयाह ने गलाया,

"जकरयाह डरदा मत, इक पुत्र पाणे रे खातर तैं सै जे प्रार्थना परमेशरा ने कितिरी, सै तेरी प्रार्थना परमेशरे सुणीलरी; कने तेरी जनाना इलीशिबा ते तिज्जो इक पुत्र जमणा! कने तू तिस पुत्रा रा नौं यूहन्ना रखयां। 14 तिज्जो त बडा नन्द कने खुशी हुणी, कने सौगी तिसरे जमणे ते मते सारेयां लोकां मौज करनी,

15 तिस प्रभुरिया नजरां च अब्बल हुणा। तिस कर्दी बी अंगूरी रस कने दारु नीं पीणा; कने तिस अपणी मौआ रे गर्भा ची पवित्र आत्मा ते भरी जाणा। 16 ताहली जे तिस बडडे हुई जाणा, ताहली तिस अपणे प्रचारा ते मते सारेयां इस्त्राइली लोकां जो तिन्हारे प्रभु परमेशरा पासे लैई औणा। 17 तिस परमेशरा रे सेबक एलिय्याह री आत्मा च कने समरथया च भरी ने तिसरे अगे-अगे चलणा। ताकि परमेशरा रे औणे ते पैहले लोकां रे मनां जो परमेशरा जो ग्रहण करने खातर तैयार करी सक्को। तेरे पुत्रा, मौ-बुडयां रा मन अपणे बचयां री तरफ फेरना, कने तिस हुक्मा जो नीं मनणे औळे लोकां जो हुक्म मनणे रा ज्ञान सरखाणा।" 18 जकरयाह स्वर्गदूता ते पुछ्या, "येदा किछ हुणा, इसा गल्ला जो हऊँ कियां जाणी सक्को? काँभई ये गल्ल बडी रेहान करने औळी कने भरोसा करने लायक नीं, काँभई हऊँ त बुडडा हुईगरा, कने मेरी जनाना बी बुडडी हुईगरी।" 19 फेरी स्वर्गदूते तिसजो जबाब दित्या, "मेरा नौं जिब्रायेल आ, हऊँ साक्षात परमेशरा रिया हजूरिया च खडीरा रेहां, तिने ई मिंजो तुन्हांने गल्ल बात करने कने ये खुशखबरी तिज्जो सुनाणे खातर भेजी रा। 20 कने इस बगत मैं जो किछ तेरेने गलाया, तिस पर तैं भरोसा नीं कित्या, इस खातर त्याहडूआं तक जे सै न्याणा नीं जमया, तिन्हां दिनां तक तू अपणे मुहां ते नीं बोली सकगा। काँभई सै गल्लां जे मैं गलाईयां सै गल्लां अपणे बगता च पूरी हूणी।" 21 इस सारे बगता च, लोक जकरयाह री मन्दरा ते बाहर औणे री बाट देखी रां थे, तिन्हां जो रेहानी हुई रां थी भई तिसजो मन्दरा रे अन्दर इतनी देर कां लगी राई। 22 ताहली जे सै बाहर निकली ने आया तां सै तिन्हा लोकां ने नीं गलाई सकया। कने सै जाणी गै भई तिने पक्का मन्दरा च कोई दर्शन देखया, सै तिन्हा जो ईशारा करदा रेहा, कने मुहां ते बोली नीं सकया। 23 ताहली जे जकरयाह री सेवा रे दिन पूरे हुईये, तां सै

अपणे घरा जो चलीया।²⁴ इन्हा दिनां ते बाद छोड़े ई तिसरी जनाना इलीशिबा भारहत्थी हुई; कने पंज्रा महीनेयां तक अप्पुं जो लुकोन्दी रेही,²⁵ कने गलाणे लगी, "प्रभु कितना दयालु आ! भई मेरे कोई न्याणा नीं था, पर तिने मांह पर किरपा करीने मिंजो लोकां च औत्तर होणे री बेईज्रतिया ते बचाया।"

यीशुये जन्मा री भविष्यवाणी

²⁶ इलिशिबा रे भारहत्थी होणे रे छेऊवें महीने, परमेशरे जिब्राईल नौंवा रे स्वर्गदूता जो गलील प्रदेश रे नासरत शहरा च, ²⁷ मरियम नौंवा री इक कुवारी कुडिया रे घरें भेजया। तिसारी सगाई युसूफ नौंवा रे माह्युये ने हुई थी, सै जे राजा दाऊद रे खानदाना रा था। ²⁸ जिब्राईल स्वर्गदूत मरियम रे सामणे खढीग्या कने तिसा री बडयाई करदे हुए बोलणे लगया, "नमस्कार! तेरे ऊपर प्रभुरी किरपा हुई, कने प्रभु तू सौगी आ। ²⁹ इसा गल्ला जो सुणी ने मरीयम डरीगी कने बड़ी रेहान हुईने सोच बिचार करने लगी भई स्वर्गदूता री गलाई रिया गल्ला रा क्या मतलब हुआ। ³⁰ स्वर्गदूते तिसा जो गलाया, "मरियम तू मत डरदी, कांभई परमेशरे तिज्जो शीष देणे रा निश्चा कितिरा। ³¹ तू बाल्थीया हुणा, कने तेरेते इक बालक जमणा; कने तू तिसरा नौं यीशू रखया। ³² तिस सबनीं च अब्बल होणा, कने परमप्रधान परमेशरा रा पुत्र कहलाणा। प्रभु परमेशरा तिसजो तिसरे बजुर्ग राजे दाऊदा री राजगद्दी देणी। ³³ कने तिस इस्राएली लोकां पर सदा खातर राज करना; कने तिसरा राज कदीं बी नीं मुकणा, सै जे सदा खातर बणी रा रेहणा!" ³⁴ मरियमे स्वर्गदूता ने बोलया, "हऊँ त इक कुवारी कुडी, मेरे न्याणा कियां हुणा ? ³⁵ इसा गल्ला पर स्वर्गदूते तिसा जो जबाब दित्या, "पवित्र आत्मा तेरे ऊपर उतरना, कने परमप्रधान परमेशरा री महान शक्ति तू पर छाणी। इस खातर तेरेते सै जे न्याणा जमणा सै पवित्र हुणा, कने सै परमेशरा रा पुत्र कहलाया जाणा। ³⁶ कने इक गल्ल होर दस्त्रूं, तेरी रिस्तेदार इलीशिबा, स्याणदे बगता च बी भारहत्थी हुईगी। लोक तिसा जो औत्र बोलां थे, पर ये तिसारे भारहत्थी हुणे रा छेऊआ महीना हुई गरा। ³⁷ कांभई परमेशरा रे खातर किछ बी मुशकल नीं आ!" ³⁸ इसा गल्ला पर मरीयमे बोलया, "हऊँ त प्रभुरी दास ई, सब किछ तेरे बोला मुताबिक ओ।" तिसते बाद स्वर्गदूत तिसा ला ते चलीग्या।

मरियम रा इलीशिबा ने मिलणे जाणा

³⁹ फेरी तिन्हां ई दिनां च मरियम उड्डीने इकदम पहाडी प्रदेशा च यहूदा रे इक नगरा जो गई। ⁴⁰ कने तिसा जगह जे जकरयाह रैयी करां था। तिसरे घरें जाईने तिसे तिसरिया जनाना इलीशिबा जो नमस्ते कित्ती। ⁴¹ येदा हुआ भई जियां जे इलिशिबे, मरियमा री नमस्ते सुणी, तियां ई न्याणा तिसारे गर्भा च फुरने लगया, कने इलिशिबा पवित्र आत्मा ने भरीगी। ⁴² कने सै खुश हुईने जोरा री अवाजा च मरियमा ने बोलां ई, "तू सारीयां जनानां च परमेशरे महान समझी, कने तेरा न्याणा बी महान हुआ। ⁴³ ये कितणी बड़ी ईज्रता री गल्ल इ भई मेरे प्रभु री अम्मा मेरे साई इक हल्की जनाना ने मिलने जो आई! ⁴⁴ तियां जे तैं मिन्जो नमस्ते कीति, तियां ई तेरी अवाज सुणी ने मेरे पेडा च न्याणा मौज्जा ने उछळणे लग्या! ⁴⁵ धन्न ई सै जनाना, तिसै जे भरोसा कित्या भई जो किछ प्रभुये तिसा जो गलाया सै पूरा हुणा।"

मरियम रा प्रभु रे खातर गीत गाणा

⁴⁶ फेरी मरियमे गलाया,
"हऊँ अपणे मना ते प्रभु री तारीफ करां ई।
⁴⁷ मेरी आत्मा च मेरे मुक्तिदाता
परमेशरा री मौज आईगी,
⁴⁸ भई तिन्हे अपणी दासिया रे हल्के मना पर नजर कित्ति,
कने अज्जा ते हर इक जुगा रे लोकां मिन्जो धन्य बोलणा।
⁴⁹ कने तिस सर्वशक्तिमान परमेशरा रा नौं पवित्र आ,
तिने मेरे खातर बडडे-बडडे कम्म कित्तीरे।
⁵⁰ कने तिन्हा री दया तिन्हा सबनीं पर,
सै जे तिन्हा रा डर मन्नांए, पुश्तां ते पुश्तां तक बणी रेआं ई।

⁵¹ परमेशरा रा शक्तिशाली सामर्थ बडडे-बडडे कम्म करां! देखवा,
सै लोक जे अपणियां समझा पर घमण्ड करां थे, परमेशरे तिन्हा जो तिणका-तिणका बखेरीत्या।

⁵² परमेशरे राजेयां जो तिन्हा रिया राजगद्दीयां ते थल्ले त्वारी दित्या;
कने दीन जनां जो परमेशरे ऊच्चे संघासणां पर बटाळया।

⁵³ तिन्हे भूखयां जो बधिया रोटी खवाई ने रजाया
कने सेठां जो खाली हत्थ बाहर कडया।

⁵⁴ परमेशरे इस्राएल रे लोकां री मदद किति
सै जे परमेशरा रे अपणे लोक थे

⁵⁵ तेदा जे परमेशरे अहारे बजुर्गा ते बोलया तेदा ई तिने सदा अब्राहम कने तिसरे कुलबे रे परती

अपणी दया जो याद कित्या कने अपणे सेवक इस्त्राइल री मदद कीति।

⁵⁶ मरियम तकरीवन तिन्न महीने इलीशिबा सौगी रैयी,
इसते बाद सै अपणे घरा जो बापिस आईगी।

वपतिस्मा देणे औळे यूहन्ने रा जन्म

⁵⁷ फेरी इलिशीबा रे न्याणा जमणे रा बगत पूरा हुआ, कने तिसे इक मुन्डुए जो जन्म दित्या। ⁵⁸ कने ये खबर इकदम तिसारे पडेसियां कने रिस्तेदारां च फैलीगी भई प्रभुये स्याणदिया बेला बी तिसा जो न्याणा देईने बड़ी किरपा कित्ती, इस खातर लोके तिसा सौगी मिली ने खुशी मनाई। ⁵⁹ ताहली जे सै मुन्नू अड्डां दिनां रा हुआ, तां यहूदी जातिया री रशमा रे मुताबिक सारे रिस्तेदार कने मित्र तिसरा खतना (नामकरण) करने खातर कडे हुए। सै तिस मुन्डुये रा नौं तिसरे पिते रे नौंवा रे मुताबिक जकरयाह रखणे लगे। ⁶⁰ पर इलिसिबे येदा नौं रखणे रे खातर मना कित्या कने बोलया, "इस मुन्डुये रा नौं यूहन्ना रखा।" ⁶¹ इसा गल्ला पर सारेयां लोके रेहान हुईने पूछया, "कां? तेरे परिवारा च इस नौंवा ते त कोई बी नीं आ! ⁶² फेरी तिन्हे तिस मुन्डुये रे पिते जो ईशारा करी ने पुछया भई तू इसरा क्या नौं रखणा चांह। ⁶³ तिने लिखणे रे खातर तख्ती मंगी, कने सारेयां लोकां जो रेहानिया च पाईने तिने लिखया, "इस मुन्डुये रा नौं यूहन्ना ई हाया।" ⁶⁴ इकदम ई तिसरा मुँह कने तिसरी जीभ खुलीगी, कने सै परमेशरा रा गुणगान करीने गलाणे लगया। ⁶⁵ कने तिसरे अखा-बखा रे रैहणे औळे सारे लोक रेहान हुईये; कने ऊथी केढी-केढी गल्लां हुईयां इसरा गलाण बोलण यहूदिया प्रदेशा रे सारे पहाडी लाके च फैलीग्या। ⁶⁶ सारे सुणने औळे लोक अपणे-अपणे मना च सोच-बिचार करने लगे, "ये मुन्डु केदा हुणा?" काँ भई ये पक्की गल्ल इ भई प्रभुये रा आशीर्वाद तिस मुन्डुये पर था।

जकरयाह रा भविष्यवाणी करना

⁶⁷ तिसरा पिता जकरयाह पवित्र आत्मा ने भरीग्या कने तिने येढी भविष्यवाणी कित्ती:

⁶⁸ "इस्राएल रा प्रभु परमेशर धन्न आ,
कांभई तिने अपणे लोकां पर भीं ते दया कित्ती कने तिन्हारा छुटकारा कित्या।

⁶⁹ कने अपणे सेबक दाउदा रे कुळा ते अहारे खातर
इक महान उद्धार करने औळे जो भेजया,
⁷⁰ तियां जे तिने पिछले जुगा च अपणे दास
पवित्र भविष्यबक्त्यां रे जरिये ब्योरा भेजीरा था।

⁷¹ हुण अहां अपणे बैरियां ते
कने अहांने दुश्मणी रखणे औळे हत्थां ते बची जाणा।

⁷² भई अहारे बाप-दादयां पर दया करीने
कने अपणे पवित्र करार जो याद करीने,

⁷³ सै सगन्द जे तिन्हे अहारे पिता
अब्राहम सौगी खादि थी।

⁷⁴ कने तिसरे बरदाना ते अहें अपणे दुश्मणां रे
चुंगळा ते छडवाई कने बिना डरे

⁷⁵ तिसरे सामणे पवित्रता कने प्रभुरी इच्छा रे मुताबिक

जिन्दगी भर तिसरी सेवा करदे रैईये।

76 कने ओ बालक तू, सर्वशक्तिमान परमेशरा री भविष्यबाणी करने औळा माळु पुकारया जाणा,
कांभई तू प्रभुरे अग्गे-अग्गे चलणा कने तिसरे खातर बाट तैयार करनी।"
77 तू तिन्हा रे लोकां जो येदा ज्ञान देणा भई
पापां रिया माफिया रे जरिये कियां छुटकारा मिलां
78 कने परमेशरा री दया री वजह ने,
स्वर्गा ते अहां रे ऊपर लोय चमकणी,
79 भई लोय नेहरे च कने मौता रे परछौये च बैठीरे लोकां तक पुज्जी जाओ,
कने अहांरे पैरां जो शान्तिया री बाटा च चलणे जो अगुआई करगी।"
80 कने सै बालक यूहन्ना बड्डा हुन्दा गया कने आत्मा रिया शक्तिया च मजबूत हुन्दा गया, कने बड्डा हुणे ते बाद तदुआं तक जे तिने इस्राएल रे लोकां च अपनी सेवा नी शुरु कित्ती, तालुआं तक सै जंगला च रैया।

यीशुये रा जन्म

(मत्ता 1:18-25)

2 जिस वगत रोम देशा रा बादशाह औगस्तुस कैसर था, तिस वगत तिने ये हुक्म दित्या भई तिसरे राजा च औणे औळे सारे लोकां री गिनती करी कने तिन्हा रे नौं लिखे जायें। 2 पहली दफा नौं लिखणे रा ये कम्म उस वगत हुया जिस वगत जे सीरिया लाके रा हाकिम क्विरिनियूस था। 3 तां बादशाह रे हुक्मा रे मुताबिक सारे लोक अपने नौंवा जो लखाणे खातर अपने-अपणे शहरा जो गये। 4 इस खातर भई युसूफ दाऊद रे टबरा कने कुलबे रा था, तां सै बी गलील प्रदेशा रे नासरत शहरा ते यहूदिया प्रदेशा बिच दाऊद राजे रे शहर बैतलहमा जो गया, 5 भई तिथी जाई कने अपनी भारहत्थी मंगेतर मरियम सौगी नौं लखाई सक्को। 6 जिस वगत सै बैतलहम शहरा बिच थे तां मरियम रे वाल्थी हुणे रा वगत आई आ, 7 कने तिसारे पहलौठे पुत्रा रा जन्म हुया कने तिसे अपने न्याणे जो कपड़े च लपटी ने इक्की गोयडा रिया खुरलिया च रखया, कांभई शहरा च तिन्हा जो किसी बी सराई बिच रैहणे जो जगह नीं मिली थी।

स्वर्गदूतां रा गद्वियां जो दर्शन देणा

8 तिस देशा बिच कई गद्वी थे सै जे राती रे वगत खुलीया जगह बिच अपनी भेडां जो कट्टा करी ने तिन्हा री रखवाली करां थे। 9 तिसा राती जो प्रभुरे रा इक स्वर्गदूत तिन्हा रे सामणे आई ने खड़ीया कने तिन्हारे चहू पासयां परमेशरा री लोय ई लोय हुई ई कने सै बडे भरी डरीये। 10 तां फेरी स्वर्गदूते तिन्हा जो गलाया, "मता डरदे!" हऊं तुहां रे खातर बडे मजे री खुशखबरी सुनाणे आईरा सै जे सारे लोकां खातर हुणी। 11 भई आज्ञा दाऊदा रे शहर बैतलहमा बिच तुहांरे खातर दुख, तकलीफ कने पापां ते छुटकारा देणे औळे मुक्तीदाते रा जन्म होया कने सै ई मसीहप्रभु आ। 12 कने तिसरी तुहांरे खातर ये पछयाण ई भई इक न्याणा कपड़े च लिपटी रा गोयडा री खुरलिया च रखी रा मिलणा। 13 ताहली इकदम तिस स्वर्गदूता सौगी मते स्वर्गदूतां री मण्डली हुई ई कने सै परमेशरा रा गुणगान करदे सुझया करां थे, सै येदा गया करां थे भई, 14 स्वर्गा च परमेशरा री बड्याई ओ कने जमीना पर तिन्हा माळुआं ते जे परमेशर खुश आ तिन्हा पर सुख-शान्ति ओ। 15 स्वर्गदूत गान्दे-गान्दे स्वर्गा जो चलीये तां फेरी गद्वीयें ईक्की-दूये ने गलाया, चला अहं बैतलहम चलीये कने ये जे गल्लां हुईयां कने तिन्हा जो प्रभुरे परगट कित्या, इन्हा जो जाईने देखिये 16 फेरी सै झट-पट गये कने गोयडा च मरियम कने युसूफ जो देखया कने खुरलिया च तिस न्याणे जो बी देखया। 17 तिन्हा जो देखी ने तिन्हे गद्वीयें न्याणे रे बारे च स्वर्गदूतां रे मुहां ते सुणी री सारी गल्लां रा जिकर कित्या। 18 कने सुणने औळे लोक गद्वीयां री गल्लां सुणी कने बडे हैरान हुये। 19 पर मरियमे सारीयां गल्लां जो अपने मना च रखी कने सोच-विचार कित्या। 20 कने गद्वीयां जो तेदा जे स्वर्गदूते गलाई रा था तेदा ई सब कुछ सुणी ने कने देखी ने सै परमेशरा री बड्याई कने गुणगान करदे वापस हटि ये।

यीशुये रा नामकरण संस्कार

21 अड्डां दिनां बाद, यहूदी रीति-रिवाजा रे मुताबिक तिस वगत जे तिस बच्चे रा खतना (नामकरण संस्कार) हुया, ताहली तिसरा नौं यीशू रखया। ये सै नौं था तिस न्याणे रा नौं जे पेदा च औणे ते पैहले स्वर्गदूते मरियमा जो दस्सी रा था। 22 किछ दिनां ते बाद, मूसा नबीये रे कायदे कनूना रे मुताबिक न्याणे जमणे रा सुतक होणे ते शुद्ध होणारा वगत पूरा हुया, तां युसूफ कने मरियम बच्चे जो प्रभुरे जो सोंपणे खातर यरुशलेम मन्दरा च ली आये, 23 (मूसा नबीये री व्यवस्था रे मुताबिक परमेशरा रा कानून बोलां: "जे कोई जनाना पैहलेहत्थे पुत्रा जो जनम देई तां तिस मुनुये जो प्रभुरे रे हत्था सोंपणा जरूरी आ")। 24 प्रभुरे रे कनूना रे मुताबिक कोकडेयां री जोड़ी या कबुतरां रे दुई बच्चयां रा बलिदान चढाणा जरूरी था।

शमौना रा गीत

25 यरुशलेम शहरा च शमौन नौंवा रा इक माळु रैई करां था। कने सै परमेशरा जो मनणे औळा कने तिसरा भगत था। सै परमेशरा री आत्मा ते भरीरा था, कने मसीह रे औणे कने इस्राएल रे लोकां जो छडवाणे री बड़ी आस लगाई ने बैठीरा था। 26 पवित्र आत्मे तिससो दर्शन दित्या था भई तालुआं तक जे सै प्रभु रिया तरफा ते भेजी रे मसीहे जो देखी नीं लेन्दा, तदुआं तक तिसरी मौत नीं हुणी। 27 पवित्र आत्मा री अगुवाईया ते सै मन्दरा जो गया कने तिस ई दिन मरियम कने युसूफ न्याणे यीशुये जो यहूदी कनूना रे मुताबिक परमेशरा ले अर्पण करने आईरे थे। 28 तिस बगत शमौन बी ऊथी मौजूद था, तिने तिस न्याणे जो अपनीया गोदा च लेआ कने परमेशरा री बड्याई करदे हुए बोलणे लगया,

29 "मेरे मालका,

हुण हऊं शान्तिया ने मरी सक्कां!

30 कांभई तियां जे तैं मेरने वादा कित्ती रा था,

तिसरे मुताबिक मैं तिस मुक्ति दाते जो देखीलिया,

31 तिसजो जे तैं

सबनीं लोकां री नजरां च तैयार कित्या।

32 सै इक जोत ई सै जे सारे देशां रे गैर-यहूदी लोकां सामणे परमेशरा जो दसगी,

कने इस्राएल रे सै लोक, सै जे तेरे अपने लोक ये, तिन्हा बिच तेरी बड्याई हो !"

33 बालक यीशुये रे बारे च शमौन सै जे किछ बोली रां था, तिसजो सुणी ने युसूफ कने मरियम दंग ई रैईये। 34 फेरी शमौने तिन्हा जो आशींवाद दित्या, कने तिने तिसरी माता मरियमा ने बोलया, "ये न्याणा परमेशरा री चुणी री नशाणी ई। इस्राएल प्रदेशा रे मतेयां लोकां तिसजो नकारी देणा, कने सैई गल्ल कईयां रे उजड़ने री वजह बणनी, पर तिस मतेयां रे खातर शीषा रा कारण बणना। 35 कने तलवारी तेरा ई प्राण आर-पार बिन्हणा कने मतेयां लोकां रे दिलां री गहराईया च सै जे गल्लां ईयां, सै निकळी ने सामणे औणीयां।

हन्नाह री गबाही

36 हन्नाह, परमेशरा री इक पक्की भगतणी थी, तिसा जो जे परमेशरा री भविष्यबाणी करने रा बरदान था, सै बी तिस बगत मन्दरा च हाजर थी। सै अशेर रे गोता च ते फनूएल री कुडी थी, कने सै बड़ी बुड्डी थी। ताहली जे तिन्हारे ब्याह जो हुईरे सिर्फ सात साल हुईरे थे तिस बगत तिसारे घरा औळे री मौत हुई गरी थी, तां सै बिधवा थी। 37 हुण सै चौरासियां सालां री थी। सै मन्दरा रे अंगणा जो छडी ने कित्ती जो नीं जान्दी थी, कने रात दिन ऊथी रैयां थी। सै बर्त कने प्रार्थना सौगी परमेशरा री अराधना करां थी। 38 ताहली जे शमौन, मरियम कने युसूफा ने गल्ल-बात करी रां था, तिस वगत हन्नाह बी ऊथी पुज्जी कने परमेशरा री स्तुति करने लगी। फेरी तिसे जाईने तिन्हा सारेयां जो यीशुये रे बारे च दस्या, सै जे तिस राजे री निहालपा च थे, कने सै आईने यरुशलेम शहरा जो छडवाणे औळा था।

नासरत जो वापस औणा

39 यीशुये रे मौ-बुडेयां प्रभुये रे विधि-विधाना रे मुताबिक सारी जरूरी गलां पूरी कितियां, तिसते बाद सै गलील प्रदेशा रे नासरत नगरा च अपने घरा जो बापस आईगे। 40 ऊथी सै न्याणा यीशु कद काठिया ते कने आत्मा रियां गलां जो समझणे च बधदा गया। सै ज्ञाना री गलां ने भरीरा था, कने परमेशरा रा तिस पर खास आशीर्वाद था।

मन्दरा च यीशुये रा धर्म गुरुआं ने गल बात करना

41 हर साल यीशुये रे माता- पिता फसह रा त्योहार मनाणे खातर यरुशलेम शहरा जो जां थे, येदा करना हर इक यहूदी खातर जरूरी था। 42 ताहली जे यीशु बारहां सालां रा हुईया, तां सै त्योहारा रिया रीतिया रे मुताबिक यरुशलेम जो गये। 43 जिस वगत त्योहार खत्म हुईया, तां सै नासरत नगरा जो बापस चलीपे, पर यीशु यरुशलेम च रुकिया। इसा गला जो तिसरे माता-पिता नीं जाणदे थे। 44 कांभई तिन्हे सोचया भई सै होरनीं जातरुआं सौगी हुणा, इक दिनां रा सफर हंडणे ते बाद तां जे सै तिन्हा जो नीं सूझया, फेरी सै तिससो अपने रिस्तेदारां कने मित्रां रे बिच टोळणे लगे। 45 कने तां जे यीशु तिन्हा जो किती नीं मिलया, तां सै तिससो टोळदे-टोळदे मुडी कने वापस यरुशलेम पुजे। 46 तिजे दिन यीशु तिन्हा जो मन्दरा च मिलया, तिथी सै यहूदी धर्म-गुरुआं सौगी बैठीरा था, कने तिन्हा री गलां सुणीने आत्मिक कने धार्मिक गलां रे बारे च स्वाल जवाब करी रां था। 47 सारयां लोकें, तिन्हे जे सै गलांदा सुणया, सै सब जणे तिसरी सूझबूझ कने सवाल-जवाबां जो सुणी ने हैरान हुईये। 48 तिसजो देखी ने यीशुये रे माता-पिता बडे हैरान हुए कने तिसरी माते तिसजो बोलया, "पुत्रा! तैं अहां सौगी येदा कां कित्या? तिजो टोळदे-टोळदे तेरे पिते रे कने मेरे प्राण त कहे हुईगरे थे!" 49 फेरी यीशुये तिन्हा जो गलाया, "तुहें मिजो कजो टोळी करां थे? क्या तुहां जो येदा पता नीं आ भई मेरा अपने पिते रे घरें हुणा जरूरी आ?" 50 पर सै क्या बोली रां था, तिन्हा रिया समझा च किछ नीं आया। 51 फेरी सै तिन्हा सौगी नासरत जो वापस आईया, कने तिन्हारा हुक्म मनदा रैया; कने तिसरी माते ये सारी गलां अपने मना च रखी। 52 यीशुये जो परमेशर कने माहुआं रा अनुग्रह मिलदा गया कने सै अक्का च कने डीळ-डौळा च बधदा गया।

यूहन्ना बपतिस्मा देणे औळे रा सन्देश

(मत्ती 3:1-12; मरकुस 1:1-8; यूहन्ना 1:19-28)

3 रोम देशा रे बादशाह तिबिरियूस कैसरा रे राजा रे पन्द्रहवे साला च ताहली जे पुन्तियूस पिलातुस यहूदिया प्रदेशा रा राज्यपाल था, कने तिस देशा रे चौथे हिस्से रे राजयां च हेरोदेश गलील रा कने तिसरा भाई फिलिप्पुस इतुरैया कने त्रखोनीतिस रा, कने लिसानियास अबिलेने प्रदेशा रे चौथे हिस्से बिच राज करां था। 2 तिन्हा दिनां च मुखिये याजक त हन्ना कने कैफा थे, तां तिस बेले परमेशरा रा बचन जंगला बिच जकरयाह रे पुत्र यूहन्ना ले पुज्रया। 3 तां सै फेरी यर्दन नदिया रे आसे पासे रे सारे लाकयां च जाईने लोकां च प्रचार करने लगया, भई अपने पापां ते माफी लेणे खातर बुरे कम्मा ते मन फेरा कने बपतिस्मा लौआ। 4 यशायाह भविष्यवक्ते यूहन्ना रे बारे च बडे पैहले ये सब गलाई रखीरा था भई,

"बियाबान लाके च इक माहुये रे हाक पाणे री आवाज सुणी करां ई भई प्रभुये रे खातर बाट तैयार करा, तिसरे खातर सडकां सिधियां बणावा।

5 हरेक खडडा खोला भरया जाओ, हरेक पहाड़ कने ऊची जगह पथरी कीति जाओ,

कने सै जे टेढा-मेढा सै सिधा कित्या जाणा कने सै जे ऊचा नीहठा रस्ता सै पधरा बणना।

6 होर हर माहुये परमेशरा री दीतिरी मुक्ति कने छुटकारा देखणा।"

7 सै जे मते लोकां री भीड़ यूहन्ना ते बपतिस्मा लेणे जो अंवा थी सै तिन्हा जो गलां था, "हे सर्पा रे बचयो तुहां जो किने दसया भई औणे औळिया क्रोपगीया ते दूर नडा। 8 इस खातर मन फेरने जोगा फळ बी तुहां च औणा चाहिन्दा, अपने मना च ये नीं सोचणा भई अहांरा पिता अब्राहम आ, कांभई

हऊं तुहांजो बोलां भई परमेशर इन्हा पत्थरां ते बी अब्राहमा खातर लुआद पैदा करी सकां।" 9 इस बेले परमेशरा रे क्रोपा री कुहाड़ी तुहांजो तुहारी जड़ां ते बडणे खातर ढक्का तां रखीरी, भई तिस डाळा च जे खरे फळ नीं लगेदे सै बडडी-टुक्की ने अग्गी च फुकया जां।" 10 तां लोकां री भीड़ तिसते पुछणे लगी, "अहांजो परमेशरा रे इस क्रोपा ते बचणे खातर क्या करने पौणा?"

11 यूहन्ने तिन्हा जो जवाब दित्या, "जे तुहां ले दो कुरते ओ, तां तिन्हा च ते इक कुरता तिसले जे नीं आ तिस जरूरतमन्द माहुये जो देई दो, कने जे तुहां ले रोटी ओ, तां तिसाजो तिन्हा सौगी बन्डी लो सै जे भुखे ओ।" 12 चुंगी लेणे औळे बेईमान लोक बी तिसले बपतिस्मा लेणे आये कने पूछणे लगे, "गुरु जी, अहें क्या करीये?" 13 तिने तिन्हा जो गलाया, "अपणे कम्मा च ईमानदार रओ। रोमि सरकारा रे मुताबिक जितणा टैक्स लेणे रा हुक्म हो, उतणा ई लेणा चाहिन्दा, इसते मता नीं।" 14 किछ सपाईये बी पूछया, "अहां जो क्या करना चाहिन्दा?" यूहन्ने तिन्हाजो जवाब दित्या, "किसी ते तिसरे पैसयां जो नीं खोयां, कने जाणदे हुए बी किसी पर झूठा इल्जाम नीं लगायां, कने तुहां जो जितणी मजदूरी मिलां ई तिस च ई सन्तोख रखयो।"

15 सारे लोक मसीह रे औणे री बाट देखी रां थे, सै येदा जाणने जो बडे इच्छुक थे भई क्या यूहन्ना ई सै मसीहा त नीं आ? 16 यूहन्ने येदा बोली ने तिन्हारे सवाल रा जवाब दित्या, "हऊं त तुहां जो पाणीये ने बपतिस्मा देआं, पर सै जे हुण जल्द औणे औळा सै सामथां च मेरेते बी शक्तिशाली आ, सै इतणा महान आ भई हऊं तिसरे जूटयां रे तशमे खोलणे औळा इक गुलाम बी बणने रे लायक नीं आ। तिस तुहां जो परमेशरा रे आत्मे ते कने अग्गी ते बपतिस्मा देणा। 17 सै माहु जाति रा न्याय करने आई करां, ठीक तियां ई जियां जे करसाण कणका जो छन्डी ने भूआ ते लग करां। फेरी तिस अपने खवाडे री साफ-सफाई खरे तरीके ने करनी कने कणका जो अपने पेडुए च कडा करी ने रखणा, पर भूआ जो तिस अग्गी च फुकणा सै जे कदीं बुझदी नीं हो।"

18 यूहन्ना इस तरीके ने लोकां जो कई गलां ते सचेत करदा रैया, कने मसीह रे औणे री खुशखबरी सणवांदा रेआं था। 19 राजा हेरोदेशे अपने भाईये री जनाना ने ब्याह करीलया था, इसते अलावा राजे होर बी मते सारे गलत काम कितीरे थे। यूहन्ना सारे लोकां रे सामणे हेरोदेस राजे जो तिसरे बुरे कम्मां रा लुहामा देन्दा रेहां था। 20 इस खातर हेरोदेस राजे यूहन्ने जो जेला च कैद करी लया। ये तिसरा इक होर गलत काम था।

प्रभु यीशु रा यूहन्ने ते बपतिस्मा लेणा

(मत्ती 3:13-17; मरकुस 1: 9-11)

21 जेला च जाणे ते पहले, इक दिन जिस वगत यूहन्ना लोकां जो बपतिस्मा देई करां था, ताहली यीशुये बी बपतिस्मा लेआ, कने बपतिस्मा लेईने ताहली जे यीशु प्रार्थना करी रां था, तां असमाण खुलीया। 22 कने पवित्र आत्मा कबूतरा रे शरीरा रे रुपा च तिस पर उतरया कने असमाणा ते अवाज आई भई, तू मेरा प्यारा पुत्र आ, हऊं तेरेते बड़ा खुश आ।"

यीशुये रा खानदान

(मत्ती 1:17)

23 जिस बगत यीशुये लोकां च अपनी सेवा शुरु किति, तिस वगत सै लगभग तिआं सालां रा था। कने लोक तिससो युसूफा रा पुत्र समझां थे, भई युसूफ त एली रा पुत्र था। 24 एली मत्तात रा पुत्र था, कने मत्तात लेवी रा पुत्र था। लेवी मलकी रा पुत्र था, कने मलकी यन्ना रा पुत्र था। कने यन्ना युसूफ रा पुत्र था। 25 युसूफ मत्तित्याह रा पुत्र था, कने मत्तित्याह आमोस रा पुत्र था। आमोस नहूम रा पुत्र था, कने नहूम असल्याह रा पुत्र था। असल्याह नोगह रा पुत्र था। 26 नोगह मात रा पुत्र था, कने मात मत्तित्याह रा पुत्र था। मत्तित्याह शिमी रा पुत्र था, कने शिमी योसेख रा पुत्र था। कने योसेख योदाह रा पुत्र था। 27 योदाह यूहन्ना रा पुत्र था, कने यूहन्ना रेसा रा पुत्र था। रेसा जरुब्बाबिल रा पुत्र था, कने जरुब्बाबिल शालतियेल रा पुत्र था। शालतियेल नेरी रा पुत्र था। 28 नेरी मलकी रा पुत्र था, कने मलकी अद्वी रा पुत्र था। अद्वी कोसाम रा पुत्र था, कने कोसाम इलमोदाम रा पुत्र था। कने इलमोदाम एर रा पुत्र था। 29 एर येशू रा पुत्र था, कने येशू इलाजार रा पुत्र था। इलाजार योरीम

रा पुत्र था, कने योरीम मत्तात रा पुत्र था। मत्तात लेवी रा पुत्र था।³⁰ लेवी शमोन रा पुत्र था, कने शमोन यहूदा रा पुत्र था। यहूदा योसेफ रा पुत्र था, कने योसेफ योनान रा पुत्र था। योनान इलयाकीम रा पुत्र था।³¹ इलयाकीम मलेआह रा पुत्र था, कने मलेआह मिन्नाह रा पुत्र था। मिन्नाह मत्तात रा पुत्र था, कने मत्तात नातान रा पुत्र था। नातान दाऊद रा पुत्र था।

³² दाऊद यिशै रा पुत्र था, कने यिशै ओबेद रा पुत्र था। ओबेद बोअज रा पुत्र था, कने बोअज सलमोन रा पुत्र था। सलमोन नहशोन रा पुत्र था।³³ नहशोन अम्मीनादाब रा पुत्र था, कने अम्मीनादाब अरनी रा पुत्र था। अरनी हिस्नोन रा पुत्र था, कने हिस्नोन फिरिस रा पुत्र था। फिरिस यहूदा रा पुत्र था।³⁴ यहूदा याकूब रा पुत्र था, कने याकूब इसहाक रा पुत्र था। इसहाक अब्राहम रा पुत्र था, कने अब्राहम तिरह रा पुत्र था। तिरह नाहोर रा पुत्र था।³⁵ नाहोर सरुग रा पुत्र था, कने सरुग रऊ रा पुत्र था। रऊ फिलिग रा पुत्र था, कने फिलिग एबिर रा पुत्र था। एबिर शेलाह रा पुत्र था।³⁶ शेलाह केनान रा पुत्र था, कने केनान अरफक्षद रा पुत्र था। अरफक्षद शेम रा पुत्र था, कने शेम नूह रा पुत्र था। नूह लिमिक रा पुत्र था।³⁷ लिमिक मथूशिलह रा पुत्र था, कने मथूशिलह हनोक रा पुत्र था। हनोक यिरिद रा पुत्र था, कने यिरिद महललेल रा पुत्र था। महललेल केनान रा पुत्र था।³⁸ केनान इनोश रा पुत्र था, कने इनोश शेत रा पुत्र था। शेत आदम रा पुत्र था, कने आदम परमेशरा रा पुत्र था (कांभई आदम जो परमेशरे अपने रूपा च बणाया था)।

प्रभु यीशुये रा परखया जाणा

(मत्ती 4:1-11; मरकुस 1:12-13)

4 पवित्र आत्मा ते भरपूर हुईने यीशु यर्दन नदिया ते वापस आया कने आत्मा री अगुआईया ते जंगला री तरफ चली पया।² तिथी शैतान चालीयां दिनां तक तिसजो परखदा रैया। तिन्हा दिनां च यीशुये किछ नीं खादया। ताहली जे सै दिन बितीगे तां तिसजो भुख लगी।³ फेरी शैताने तिसजो गलाया, "जे तू सच्ची जोई परमेशरा रा पुत्र आ तां इन्हां पत्थरां जो बोल भई ये रोटी बणी जाओ।" ⁴ पर यीशुये तिसजो जवाब दित्या, "पवित्र शास्त्रा च येदा लिखीरा भई माह्ये रे ज्यून्दा रैहणे खातर सिर्फ रोटी ही काफी नीं।" ⁵ फेरी शैतान यीशुये जो इक ऊंचीया ठारी लैईया कने इक्की पला च तिससो संसारा रे सारे राज पाठ दखाई ते। ⁶ कने तिसजो गलाया, "हऊं इन्हा सबनीं पर कव्जा कने इन्हा री सारी बडयाई तिजो देई देंगा, कांभई ये सब किछ माह्ये दित्तिरा, कने हऊं तिससो जे चाहूं तिससो देई सक्कां। ⁷ ये सब किछ तेरा हुई सक्कां जे तू मेरे सामणे मत्था टेकगा कने मेरी पूजा करगा।" ⁸ यीशुये तिससो जवाब दित्या, "पवित्र शास्त्रा च ये बी लिखीरा भई, तू सिर्फ अपने प्रभु परमेशरा रे सामणे मत्था टेक कने तिसरी ई सेवा टैहल कर।" ⁹ फेरी शैतान यीशुये जो यरुशलम च नेईने मन्दरा री सबीं ते ऊंचीया ठारी खड़ा कित्या कने बोलया, "जे तू परमेशरा रा पुत्र आ तां येथी ते छैळ मार। ¹⁰ कांभई पवित्र शास्त्रा च लिखीरा, 'सै अपने स्वर्गदूतां जो तेरे बारे च ये हुकम देंगा, भई सै तिजो नुकसाना ते बचाओ। ¹¹ कने तिन्हा इकदम तिजो अपने हत्था पर ईयां थम्मी लेणा, तिसते जे तेरे पैरां जो बी पत्थरां ते करोहड तक नीं लगणी।" ¹² पर यीशु होरी तिससो जवाब दित्या, भई पवित्र शास्त्रा च ये बी लिखीरा, "तू प्रभू अपने परमेशरा जो मत परखदा।" ¹³ जिस वगत शैतान यीशुये रे सारे इन्तेहान लेई बैठया, तां होर कोई मौका मिलणे तक तिससो छडीं ने चलीया।

प्रभु यीशु री सेबा रे कम्मां री शुरुआत

(मत्ती 4:12-17; मरकुस 1:14-15)

¹⁴ फेरी यीशु पवित्र आत्मा रिया समर्थय च गलील जो वापस आया, कने आस-पड़ोस रे सारेयां लाकयां च तिसरे कम्मां रे चर्चे होणे लगे। ¹⁵ कने सै यहूदियां रे प्रार्थना घरा च बचनां री शिक्षा देणे लगया, कने सुणीने सब लोक तिन्हा री जय-जयकार करने लगे।

नासरत च यीशुये रा निरादर

(मत्ती 4:12-17; मरकुस 1:14-15)

¹⁶ फेरी यीशु नासरत गाँवा च आये, तिथी जे सै पळया-बढ्या था, तां अपणी रीता रे मुताबिक सै बिश्राम रे दिन प्रार्थना घरा च गया कने ऊथी पवित्र शास्त्र पढने खातर खड़ा हुआ। ¹⁷ कने तिन्हा जो यशायाह भविष्यवक्ता री कताब पढने खातर दिती, सै कताबा जो खोली ने तिसा जगह ते पढने लगे तिथी जे येदा लिखीरा था,

¹⁸ प्रभु रा आत्मा मेरे ऊपर आ, कांभई तिने कंगाळां जो खुशखबरी सुनाणे रे खातर मेरा अभिषेक कितीरा।

तिने हऊं भेजीरा, भई हऊं कैदियां जो छुटकारे रा, कने अन्हेयां जो नजर पाणे री खुशखबरी देऊं,

कने दुख तकलीफां च दबोईरे लोकां जो छडबाऊं।

¹⁹ कने प्रभु रे खुश रैहणे रे साला रा प्रचार करुं।"

²⁰ फेरी तिने कताब बन्द करीने प्रार्थना घरा रे सेबका रे हत्था च देईती कने फेरी बैठीया कने प्रार्थना घरा रे सारे लोकां री नजरां तिस पर थी। ²¹ कने सै तिन्हाने गलाणे लगया, "जो किछ तुहें पवित्र शास्त्रा री गल्ल हण सुणी सै आज पूरी हुई!" ²² सै लोग जे तिथी हाजर थे, तिन्हे सारेयां यीशु जो सराह्या, कने तिसरे मुहा ते निकळणे औळे अनुग्रह रे वचन सुणीने सै सब हैरान हुईये कने गलाणे लगे, "क्या ये युसूफ रा पुत्र नीं आ? ²³ फेरी यीशुये तिन्हा जो बोलया, " शायद तुहां मेरे ऊपर ये कहाबत जरूर बोलणी, भई बैद अप्पुं जो ठीक कर! कने जो किछ अहें सुणया भई जिस तरीके ने जे तैं कफरनहूम च सामर्थय रे काम्म कित्ते, तिस तरीके ने येथी अपने शहरा च कां नीं करदा? ²⁴ पर हऊं तुहांजो सच्ची गल्ल दस्सां भई कोई बी भविष्यवाणी करने औळा माह्ये कदीं बी अपने नगरा च आदर नीं पान्दा।" ²⁵ पर हऊं तुहांने सच्च बोलां भई, "एलिय्याह रे वगत ताहली जे साढे तिन्हा साळां तक बरखा नीं हुई कने सारे देशा च बड़ा नकाळ पया; तां पक्का इस्त्राएल च येदीयां मतीयां जरूरत मन्द विधवां थियां, ²⁶ पर एलिय्याह नबीये जो तिन्हा च ते किसी ला नीं भेजया; पर तिससो सैदा प्रदेशा रे सारफत गाँवा री इक विधवा जनाना लेई भेजया। ²⁷ या फेरी एलीशा नबीये रे वगत इस्त्राएल रे विच इ मते सारे कोढी थे तिन्हा जो जे ठीक होणे री जरूरत थी।" पर नामान नाँा रे कोढीये ते अलावा कोई होर ठीक नीं कित्या, सै जे सीरिया प्रदेशा रा बसिन्दा था, ²⁸ ताहली जे प्रार्थना घरा च हाजर लोकें ये गल्लां सुणी तां तिन्हा जो बड़ा गुस्सा आया। ²⁹ कने तिन्हे उड्डीने तिसजो नगरा ते बाहर कड्डीने, तिस पहाड़ा री चोटीया पर लेइये तिस पर जे तिन्हारा नगर बसी रा था, सै यीशुये जो पहाड़ा रिया चोटिया ते थल्ले सट्टणा चांह थे, ³⁰ पर यीशु तिन्हा रे विद्या ते निकली ने चलीया।

बुरी आत्मा रे सताईरे माह्ये जो चंगा करना

(मरकुस 1:21-28)

³¹ फेरी सै गलील प्रदेशा रे शहर कफरनहूम जो गया, कने ऊथी हर विश्राम रे दिन प्रार्थना घरा च वचना री शिक्षा देन्दा रेहा। ³² ऊथी बी लोक तिस रिया शिक्षां ते हैरान हुईये, कांभई तिसरा वचन अधिकारा ने भरीरा था। ³³ इक दिन जिस वगत यीशु प्रार्थना रे घरा च था, ताहली इक माह्ये सै जे बुरी आत्मा ते जकडोईरा था, ऊचीया अवाजा च रडाणे लगया, ³⁴ हे यीशु नासरी मिजो तेरने कोई मतलब नीं आ, तू कजो अहां जो परेशान करने आईरा? हऊं तिजो जाणां भई तू कुण आ? तू परमेशरा रा भेजीरा पवित्र माह्ये आ!" ³⁵ यीशुये तिससो थिडकया कने गलाया, " चुप ओ! कने इस माह्ये च ते निकळी जा!" फेरी तिने बुरे आत्मे तिस माह्ये जो जमीना पर फोड़ी दित्या, लोक येदा सब किछ देखी रां थे। फेरी सै बुरा आत्मा तिस माह्ये जो होर जादा नुकसान किते बगैर, तिस चते निकली ई। ³⁶ लोक हैरान हुईने गलाणे लगे, "इस माह्ये रे वचना च क्या सामर्थ कने अधिकार आ! बुरी आत्मायें बी इसरे हुक्मा जो मन्ना ईयां कने निकली जाईयां!" ³⁷ यीशु रे इस कम्मा री खबर तिस लाके रे चहूं पासेयां फैलीगी कने जगह-जगह लोकां बीच इसा गल्ला री चर्चा होणे लगी।

यीशु कईयां लोकां जो चंगा करां (मत्ती 8:14-17 ; मरकुस 1:29-34)

38 फेरी यीशु उठया कने प्रार्थना रे घरा ते निकळणे ते बाद सै शमौना रे घरा जो गया। तिथी शमौना री सस्सा जो बड़ा भरी बुखार आईरा था। कने तिस घरा च रहणे औळयां सारयां तिसते बिनती कित्ति भई "इसा जो चंगा करी दे।" 39 यीशुये तिसा रे मंजे रे सराहणे खौ खड़ीने बुखारा जो थिडक्या, कने इकदम ई तिसा रा बुखार उतरी ग्या। सै झट ऊठी कने यीशु री सेवा टैहल करने लगी। 40 संझके जुन्ना दिन घरदे वगत, लग-लग किस्मा री बमारियां ते जकड़ीरे मरीजां जो लेईने लोक यीशु ले आये, कने तिने हरेक मरीजा पर हत्थ रखीने चंगा कित्या।

यीशु प्रचार करना जारी रखां (मरकुस 1:35-39)

41 कने मते लोकां च बुरी आत्मार्ये थीं; सै जे चींड़ां मारीने बोलां थी, "तू परमेशरा रा पुत्र आ" कने येदा बोलीने तिन्हा लोकां चते निकळी जां थी। यीशु तिन्हा जो थिडकां था कने बोलणे नीं देन्दा था कांहू भई दुष्टात्मा जाणा थियां भई सै, मसीह आ। 42 अगले दिन सबेरे, यीशु तिस नगरा ते निकली ने जंगला च इक सुणसान जगह च गया। कने लोकां री भीड़ तिस्सो टोलदी हुई तिसले पुज्जी ई कने सै तिस्सो येदा बोली ने रोकणे लगे भई तुहें अहां जो छड़ी ने मता जान्दे। 43 पर यीशु तिन्हा ने बोलां, "मेरा दूजयां गाँवा च बी परमेशरा रे राजा री खुशखबरी सुनाणे खातर जाणा जरूरी आ, कांभई हऊँ इस ई मकसदा खातर भेजीरा।" 44 सै यहूदिया प्रदेशा रे प्रार्थना घरां च प्रचार करदा रैया।

शुरु रे चलयां रा सद्दया जाणा (मत्ती 4:18-22; मरकुस 1:16-20)

5 इक वगत ताहली जे भई लोकां रा दंगल यीशुये जो चहुं पासयां ते घेरीने परमेशरा रा बचना सुणीरां था, कने सै गनेसरत नदिया रे कन्डे खड़ीरा था। 2 तिने नदिया रे कन्डे दो किशतियां खड़ी रियां देखी, कने मच्छुवारे तिन्हा किशतियां जो ऊथी छड़ी ने मच्छियां पकड़ने रे अपणे जाळा जो धोई करां थे। 3 यीशु तिन्हां किशतियां चते इक्की पर चढ़ीया, सै जे शमौना री थी, कने तिने तिसते बिनती कित्ती भई कशितया जो कन्डे ते थोडा जेआ खसकाई ने पाणीये च लेई चल। फेरी यीशु तिसच बैठी ने लोकां जो ऊथी ते बचन सुनाणे लगया। 4 जिस वगत सै बचन सुणाई बैठया, तां तिने शमौना जो गलाया भई, "तिसा जगह जे डुग्गा पाणी आ ऊथी लेईने चल, कने मच्छीयां जो पकड़ने खातर अपणे जाळ पाणीये च पाई दे। 5 शमौने जबाब दित्या, "गुरु जी, अहें पूरी रात इस खातर कड़ी मेहनत कीति पर इक बी मच्छी नीं पकड़ी सके, पर जे तुहें बोलां ए तां तुहारे बोलणे ते हऊं जाळ पाई देआं। 6 ताहली जे तिन्हे पाणीये च जाळ सट्टे तां इस बार तिन्हा रे जाळ मच्छीयां ने इतणे भरीये भई सै फटणे लगे। 7 इस खातर तिन्हें अपणे साथियां जो सै जे दूजिया किशतिया पर स्वार थे तिन्हांजो अपणी सहायता करने खातर इशारा करीने सदया। कने तिन्हे इकदम आईने, दोनों किशतियां मच्छीयां ने इतणीआं भरी लियां भई सै डुबणे लगियां। 8 येदा देखीने ताहली शमौन पतरस प्रभु यीशुये रे पैरां च पैरिया कने बोलया, "प्रभु जी, मेरे ला ते चली जावा, कां भई हऊं इक पापी माहु आ कने तुहारे सामणे रहणे लायक नीं आ।" 9 तिने येदा इस खातर गलाया भई इतणी जादा मच्छीयां पकड़ी जाणे ते तिस्सो कने तिसरे साथियां जो बड़ी हैरानी हुई। 10 तिसरे हिस्सेदार जब्दीये रे पुत्र, याकूब कने यूहन्ने जो बी येदा देखी ने बड़ी हैरानी हुई। फेरी यीशुये शमौना ने गलाया, "डरदा मत, हऊं तिज्जो नया काम्म देआ। इसते बाद तू मच्छीयां रे बजाये माहुआं जो पकड़ीने परमेशरा पास फेरया करगा।

प्रभु यीशुये रा इक कोढ़ी माहुये जो चंगा करना (मत्ती 8:1-4; मरकुस 1:40-45)

11 इसते बाद सै अपणी किशतियां जो नदिया रे कन्डे जो ली आए, कने सै अपणा सब किछ छड़ी ने प्रभु यीशुये रे पिछे चलीये। 12 किसी गावां च प्रभु यीशुये री मुलाकात इक कोढ़ी माहुये ने हुआई, तिसरा कोढ़ जे मता बधीगरा था। तियां जे सै माहु यीशुये जो देख्यां, तां सै मुंहा रे भार जमीना पर पैई जां कने इसा बमारिया ते ठीक होणे खातर अरज करी ने बोलां, "प्रभु जी, जे तुहें चाओ तां मिन्जो इस कोढ़ा ते ठीक करी सकां ये।" 13 तिस कोढ़ीये री अरज सुणीने यीशु अगे हुया कने तिस माहुये जो छुईने बोलया, "हां, हऊं चांह भई तू ठीक हुई जाओ!" फेरी इकदम तिसरा कोढ़ ठीक हुईया। 14 तिसते बाद प्रभु यीशुये तिस्सो हुक्म दित्या भई तू इसा गला रे बारे च किसी ने बी देख्यां गलांदा। फेरी यीशुये तिस माहुये जो गलाया, "सिधा यहूदि याजका ले जा, कने अपुं जो तिसले दरस्स, कने चंगाईया रे बारे च मूसे सै जे कनून बणाईरा, तिसरे मुताबिक अपणे सौंगी भेंट लेईने चढा भई तिन्हांजो तेरे ठीक होणे री गवाही मिलो।" 15 पर प्रभु यीशुये रे नीं चाहणे रे बाबजूद, तिन्हारे रेहान करने औळे कम्मां री गलां बडे छोडे फेली, कने दंगला रे दंगल तिन्हाजो सुणने रे खातर कने अपणी बमारियां ते ठीक होणे खातर औन्दे गये। 16 पर यीशु तिन्हाते दूर सुनसान वणा च जाईने प्रार्थना करां थे।

धरंगा रे रोगिये जो चंगा करना (मत्ती 9:1-8 ; मरकुस 2:1-12)

17 इक दिन जिस वगत यीशु बचनां री शिक्षा देईरां था, तां किछ फरीसी कने धरमा रे सासतरां री शिक्षा देणे औळे बी ऊथी बैठीरे थे, ये लोक गलील कने यहूदिया प्रदेशा रे हर इक गांवा ते कने यरुशलम ते आईरे थे कांभई चंगा करने औळी प्रभु री सामरथया यीशुये सौंगी थी। 18 किछ लोके धरंगा रे रोगा ते पीढ़ित इक माहुये जो पळंगा पर लेटाई ने अंदा कने तिसजो अन्दर यीशुये रे सामणे पज्वाणे रा तरीका टोळणे लगे, 19 पर तिस घरा च भीड़ा री वजह ने सै यीशुये तक नीं पुज्जी पाये। फेरी सै घरा रे पौटा पर चढे, कने खपरैल हटाईने छत्ता तेई अन्दरा जो तिस बमार माहुये जो पलंगा समेत लुआई ने यीशुये रे सामणे रखी दित्या। 20 येदा करने ते यीशुये तिन्हारे भरोसे जो देखीने तिस माहुये जो गलाया, "मेरे दोस्त, तेरे पाप माफ हुए। 21 तां शास्त्री कने फरीसी अपणे-अपणे मनां च बिचार करने लगे भई, "ये माहु अपणे आप जो क्या समझां? येत परमेशरा री निन्धया करीरां, परमेशरा रे अलावा होर कुण पापां जो माफ करी सकां?" 22 यीशु तिन्हारे मना री गलां जो जाणीया भई ये लोक क्या सोची रांये, तां तिने तिन्हांते बोलया, "तुहें येदा कां सोची करां ये भई ये परमेशरा री निन्धया ई? 23 क्या येदा बोलणा सान आ ? तेरे पाप माफ हुये या येदा बोलणा भई उठ कने चलणे लग? 24 पर इस खातर भई तुहें जाणी सको माहुये रे पुत्रा जो इसा जमीना पर पापां जो माफ करने रा बी अधिकार आ।" तिने तिस लकवे रे रोगिये जो गलाया, हऊं तिज्जो बोलां, उठ कने अपणे पलंगा चक्की ने अपणे घरा जो जा।" 25 कने इकदम ई सै माहु, सबनीं लोकां रे सामने उठी ने खड़ा हुया, कने अपणा पलंगा चक्की ने परमेशरा री बडयाई करदा हुआ अपणे घरा जो चलीया। 26 तिस्सो देखीने सारे लोक हैरान हुईये कने परमेशरा री बडयाई करने लगे, कने डरीने पले-पले येदा बोलणे लगे, "आज अहें नोखियां ई गलां देखी।"

यीशुये लेबिये जो अपणे पिछे चलणे रा हुक्म दित्या (मत्ती 9:9-13; मरकुस 2:13-17)

27 फेरी इसते बाद, जिस वगत यीशु शहरा ते बाहर जां, कने इक लेवी नौंवा रे चुंगी लेणे औळे जो चुंगीया री चौकिया पर बैठीरा देखां। तां यीशु तिस ने बोलां, "ओ, कने मेरा चेला बणी जा।" 28 फेरी सै माहु अपणा सारा किछ छड़ी ने तिसरे पिछे चली पौआं। 29 लेवी अपणे घरं प्रभु यीशुये खातर इक बड़ी धाम रखां तिथी तिन्हांजो तिसा धामा खातर खास मेहमान बणां, कने तिसा धामा च लेवीये अपणे साथी चुंगी लेणे औळयां ने होर मेहमानां जो बी नियून्दा देईने सद्या। 30 पर फरीसी कने तिन्हारे शास्त्रीयें, यीशु मसीह रे

चेलयां ने येढा बोली ने शकैत किती भई, "तुहें चुंगी लेणे औळ्यां ने कने पापीयां सौगी बेठीने कियां खाई पी सक्कां ये?" 31 यीशुये तिन्हा जो जवाब दित्या, " भले चंगे माळुये जो किसी बैदा री ज़रूरत नीं हुन्दी, पर किसी बमार माळुये जोई तिसरी ज़रूरत हुआं ई। 32 कने, हऊं तिन्हारे खातर नीं आईरा सैं जे अपणे अप्पुं जो धर्मी समझा यें, पर पापीयां जो बचाणे खातर आईरा!"

उपबासा रे बारे च स्वाल
(मत्ती 9:14-17; मरकुस 2:18-22)

33 धर्म गुरुयें यीशुये ते ये गल्ल बोली भई, "वपतिस्मा देणे औळा यूहन्ना कने फरीसियां रे चले त हर बार बरत रखांये, कने प्रार्थना करां ये पर तेरे चले बरत नीं रखदे, पर सैं हमेशा खांदे पीदे रैयें। 34 यीशुये तिन्हाते पुछ्या, "तदुआं तक जे लाड़ा सौगी आ, तां क्या तुहें बरातियां जो बरत करने खातर बोली सक्का ये? 35 कोई दिन औणा तिस बेले जे लाड़ा बरातियां ते लग कित्या जाणा फेरी तिस वेले तिन्हा बरत रखणा।" 36 फेरी यीशुये तिन्हा जो इक उदाहरण दस्सया, "कोई बी माळु नई कमीचा ते कपड़ा फाडीने पुराणी कमीचा पर तिसरी टल्ही नीं लगांदा, कने जे कोई येढा करां तां नवां त फटणा ई फटणा, सौगी जो तिस नौंये टुकडे पुराणे ने मेल नीं खाणा। 37 कने कोई बी अंगूरां रा नवां रस चमड़े री पुराणी थैलीया च नीं भरदा, कांभई नया दाखरस तिन्हा मशकां जो फाडीने बगी जाणा कने तिसते मशकां बी खत्म हुई जाणी। 38 अंगूरां रा नौंवा रस चमड़े री नई थैलीयां ची भरना चाहिन्दा। 39 दुखा री गल्ल ई भई सैं जे कोई पुराणे अंगूरां रा रस पीआं सैं ताजा कने नौंवा दाखरस नीं पीणा चाहिन्दा। सैं बोलांये, "पुराणा ई खरा!"

बिस्राम रे दिना पर स्वाल
(मत्ती 12-1-8; मरकुस 2:23-28)

6 इक विस्राम रे दिन यीशू खेतों-खेत जाई करां था, तिस वगत तिसरे चले कणका रे बुट्यां ते सिल्लुआं जो तोड़ी-तोड़ी ने कने हत्था च मळी-मळी ने तिन्हारे दाणे कड्डी ने खांदे जाईरां थे। 2 तिन्हा जो येढा करदे देखी ने किछ फरीसी गलाणे लगे, "तुहें येढा कम्म कजो करां ये सैं जे विस्राम रे दिन करना ठीक नीं आ? 3 यशू होरी तिन्हाजो जवाब दित्या, "क्या तुहें शास्त्रां च नीं पढ्या भई अहांरे पुरखे, दाऊद राजे, जिस वगत सैं कने तिसरे साथी भूखे थे ताहली तिन्हे क्या कित्या? 4 सैं मन्दरा च गये कने तिन्हे बड्डे पुजारीये रे जरिये चडाईरी रोटीयां लेईने खादि। इन्हा चडाईरी रोटीयां जो खाणे रा अधिकार सिर्फ पुजारीयां जोइ था। दाऊद राजे सैं रोटीयां अप्पुं बी खादि, कने अपणे साथियां जो बी खाणे खातर दिती। ये बी त कायदे कनूणा जो तोड़ना ई हुया।" 5 फेरी यीशुये तिन्हा जो गलाया, "हऊं, माळुआ रा पुत्र, विस्राम रे दिना रा बी प्रभु आ।" 6 विस्राम रे किसी होर दिन यीशु प्रार्थाना रे घरा च परमेशरा रे बचनां रा प्रचार करीरां था। ऊथी इक येढा माळु था तिसरा जे दांया हत्थ सुकीयरा था। 7 शास्त्री कने फरीसी येढा देखणे रिया ताका च थे भई सैं विस्राम रे दिन किसी माळुये जो चंगा करां कि नीं। कांभई सैं तिस पर मूसा रे कनूना रा पालन नीं करने रा इल्जाम लगाणे खातर बेचैन थे। 8 पर सैं तिन्हारे मना रियां गल्लां जो जाणा था; इस खातर तिने सुकीरे हत्था औळे माळुये जो गलाया, "उठीकने इसा जगह पर खड़ा हुई जा, तिथीते जे सारे लोक तिजो देखी सक्को।" कने सैं माळु उठीने खडीया। 9 फेरी यशू होरी तिन्हाजो गलाया, "हऊं तुहांते किछ पूछणा चांहा। विस्राम रे दिन क्या करना ठीक आ? भला करना कि बुरा करना? क्या इस दिन किसी री जान बचाणी चाहिन्दी, या नाश करना चाहिन्दा?" 10 तां तिने हर इक माळुये खा मुड़ी ने देखया। फेरी तिस माळुये जो बोलया, "अपणा हत्थ अगे कर।" तिने अपणा हत्थ अगे कित्या कने सैं चंगा हुईग्या! 11 येढा देखीने, यीशुये रे बरोधी गुस्से च लाल पीले हुईये कने इक दूजे जो गलाणे लगे भई अहें इस माळुये ने कियां निपटिये?

प्रभु यीशुये अपणे खास बारह चले चुणे
(मत्ती 10:1-4; मरकुस 3:13-19)

12 इसा घटना ते बाद इक दिन बडे छोडे इ यीशु पहाड़ा पर प्रार्थना करने जो निकलिया, कने सैं सारी रात पिता परमेशरा ते प्रार्थना करदा रेहा। 13 जिस वगत सबेर हुया, तिस वगत तिने अपणे सारे चेलेयां जो अप्पुं लौ सदया: तिन्हा चते बारहां जो हर पल सौगी रहणे औळे अपणे खास चले चुणीले और तिन्हाजो 'प्रेरित' बोलया। तिन्हारे नौंव इयां ये: 14 शमौन (इसजो सैं पतरस बोलां थे), अन्द्रियास (पतरसा रा भाई), याकूब, यूहन्ना, फिलिप्पुस कने बरतुलमै। 15 मत्ती, थोमा, याकूब नौंवा रा इक होर चला (सैं जे हलफई रा पुत्र था), शमौन नौंवा रा इक होर चला सैं जे जेलोतेस रा सदस्य था। 16 यहूदा (याकूब रा पुत्र) कने यहूदा इस्कारियोती (तिने जे यीशुये जो बाद विच पकड़वाया)।

शिक्षा देणा कने चंगा करना
(मत्ती 4:23-25)

17 फेरी सैं पहाड़ा ते उतरीने पधरिया जगह च खडीये, कने तिसरे चेलेयां री मती भीड़, कने सारे यहूदिया, यरुशलेम, कने उत्तरी हिस्से रे सूर कने सैदा रे समुद्रा रे कन्डे ते जादा लोक आईरे थे। 18 सैं यीशुये रा उपदेस सुणने कने अपणी बमारियां ते छुटकारा पाणे खातर आईरे थे, कने तिन्हा च सैं जे बुरी आत्मावां रे सताईरे थे, ठीक कित्ते जाई रां थे। 19 सारे यीशुये ने छोणा चांहा थे, कां भई तिन्हा ते सामर्थ निकलीने सारेयां जो चंगा करां थी, कने सैं कोई जे यीशुये जो छुई लेआं था सैं चंगा हुई जां था।

आशीष बचन
(मत्ती 8:1-12)

20 फेरी तिने अपणे चेलयां री तरफ देखी ने बोलया, "धन् ओ तुहें, सैं जे नम्र ये, कां भई परमेशरा रा राज तुहां जो दितीरा। 21 धन् हो तुहें, सैं जे हुण भुक्खे, कांभई तुहें तृप्त किते जाणे। धन्य हो तुहें सैं जे हुण रोया करदे हो, कां भई येढा वगत औणा ताहली जे तुहां खुश हुईने हसणा। 22 तुहें माळुये रे पुत्रा रे (मेरे) चले ओ इस खातर लोकां तुहां ने बैर रखणा, तुहांजो बुरा समझी ने बरादरिया ते नकाळी देणा, कने तुहांरी बुराई करनी, कने तुहांजो शाप देणे। 23 जिस वगत येढा तुहां सौगी हो तिस वगत खुश हुईने उछळ्यां, कां भई स्वर्ग राजा च तुहांरे खातर बड़ा फळ रखीरा। कने याद करा भई तिन्हारे बाप-दादेयां पुराणे भविष्यवक्तेयां सौगी बी येढा ई कित्या था।"

औणे औळे दुखा री भविष्यवाणी

24 यीशुये भीं ते गलाया, आज जे तुहें सेठ ये, तां हाय तुहां पर! कां भई तुहांजो अपणी सुख शांतिया रा फळ इस संसारा च मिली चुक्क्या। 25 अज्र जे तुहें तृप्त कने समृद्ध ये, तां हाय तुहां पर! कांभई तुहां पर भुक्खयां रैहणे रे दिन औणे। अज्र जे तुहें लापरवाह हुई ने हस्सया दे ओ, तां हाय तुहां पर! कांभई तुहां दुक्खी हुणा कने रोणा। 26 आज माळु जे तुहांरी बड्याई करदा हो, तां हाय तुहां पर! कां भई तिन्हारे बाप-दादे बी झूठा भविष्य दसणे औळ्यां री बड्याई करां थे।

अपणे दुश्मनां ने प्रेम-भौ रखा
(मत्ती 5:38-48; 7:12)

27 पर जे तुहें मेरी गल्लां सुणने रे खातर तैयार ओ, तां हऊं बोलां भई तुहें अपणे शत्रुआं ने बी प्यार करा। कने सैं जे तुहांने बिष-बरोद रखां ये, तिन्हा सौगी बी खरा व्यवहार करा। 28 सैं जे तुहां जो शराप देआं ये, तिन्हा जो तुहें शीष देवा। सैं जे तुहांरा अपमान करदे ओ, तिन्हारे खातर प्रार्थना करा। 29 जे कोई तुहांरे इक्की खाखा पर चपैड़ बाही दो तां तू तिसरे सामणे दूज्जी खाख बी फेरी देआं कने मुड़ीने तिस पर बार मत करयो। जे कोई तुहां ते तुहांरी शौल मंगां, तां तिस्सो खुशीया ने अपणी कमीज बी देई देआं। 30 सैं जे किछ तेरेले आ, जे तिसा जो कोई बी तेरेते मंगां तां सैं चीज तिस्सो देई देणी चाहिंदी।

कने जिस वगत सै चीज तुहां ते लेई ली ओ, तां तिसा जो वापस लेणे री कोशिश नी करयों।³¹ जेदा बताव जे तुहें लोकां ते चाहन्दे ओ भई सै तुहां सौगी करो, तुहें बी तिन्हां सौगी तेदा ई बताव करा।³² जे तुहें अपणे प्यार करने औळयां नेई प्यार करदे ओ, तां तुहें क्या सोचया भई तुहें कोई बड़ा काम करी तया ? कांह भई पापी लोक बी अपणे प्यार करने औळयां नेई प्यार करां ये।³³ सै जे तुहां सौगी भलाईया रे कम्म करां ये, जे तुहें तिन्हांरा ई भला करो, तां इस बिच अचरज करने औळी कुण जेई गल्ल ई ? येदा त पापी लोक बी करां ये।³⁴ जे तुहें सिर्फ तिन्हां लोकां नेई उधार-बदला करां ये, तिन्हांते जे वापस लेणे री उम्मीद रखां ये, तां इस बिच कुण जेई बडडी गल्ल ई ? पापी लोक तिन्हांरे बराबर लोकां जो रकम उधार देआं ये ताकि ब्याजा समेत वापस लेई सक्को।³⁵ सारेयां लोकां ने प्यार रखा, येथी तक भई अपणे शत्रुआं ने बी! तिन्हांने सौगी बी खरा राह-पोहार रखा। तिन्हां जो बी पैसा उधार देवा। कने तिन्हां तुहांरा पैसा मोडी ने वापस नी करना इसरी चिन्ता नी करा। तां स्वर्गा च परमेशरा ते तुहां जो बड़ा फळ मिलणा। कने तुहें सच्ची जो परमप्रधान परमेशरा रे पुत्रा साई अपणी जिम्मेवारी निभाया दे हुणे, कांभई सै तिन्हा पर बी किरपा करां सै जे धन्यवाद नी करदे, कने तिन्हा पर बी, सै जे बुरे।³⁶ तियां जे तुहांरा पिता सबनीं पर दया करां, तियां ई तुहें बी दया करने औळे बना।

दुज्यां पर दोष नीं मढ़ा

(मत्ती 7:1-4)

³⁷ दुज्यां जो दोषी बनाणा बंद करा, तां परमेशरा तुहें बी दोषी नीं बनाणे। किसी पर बी दोष मत लगावा तिसते जे तुहां पर बी दोष नीं लगणा। पर जे तुहें दुज्यां जो माफ करी दें, तां परमेशरा बी तुहां जो माफ करी देणा।³⁸ जे तुहें नम्र हुईने दान देंगे, तां नमरता सौगी तुहां जो बी दित्या जाणा। तिन्हां तुहां रिया गोदा च पूरा-पूरा नाप, जिक्की-जिक्की ने कने हिलाई-हिलाई ने उभरदा हुआ पाणा। कांभई जिस नापा ने तुहें दुज्यां खातर नाप्याये, तिस ई नापा ने तुहांरे खातर बी नापया जाणा।³⁹ फेरी तिने तिन्हांजो इक उदाहरण देईने येदा समझाने री कोशिश किती भई तां जे अहें अपणी बुराईया रे बारे च नी जाणदे ओ तां दुज्यां पर दोष लगाना ठीक नी आ: "क्या इक अन्हा दूजे अन्हे जो बाट दस्ती सक्को? क्या येदा करने ते दुई टोटे च नीं पई जाणा?"⁴⁰ चेला अपने गुरुये ते कदीं बडडा नीं हुन्दा। पर जे सै पूरी शिक्षा ग्रहण करो तां अपने गुरुये रे बराबर बणी सक्को।⁴¹ तू अपणे भाईये री अक्खीं च पईरे तिणके री चिन्ता कजो करां, तांजे तेरी अपणियां अक्खी चई सड्डे पैरैरा ओ?⁴² तां जे तू अपणियां ई अक्खीं रे सड्डये जो नीं देखी पान्दा तां येदा बोलणे जो तू सोची बी कियां सक्को भई, 'भाई जी, रूकयां हऊं तुहांरिया अक्खीं रे तिणके जो कडी देआं ? अरे ओ धोखेबाज माळुआ, पैहले तू अपणियां अक्खीं रे सड्डये जो कड, ताई शायद तिजो अपणे भाईये री अक्खीं रा तिनका सही ढंगा ने दुसणा।

डाळ कने तिसरा फळ

(मत्ती 7:16-20; 12:33-35)

⁴³ खरे फळा रे डाळा पर बुरे फळ नी लगदे, इस ई तरीके ने बुरे फळां रे डाळां पर बी खरे फळ नी लगदे।⁴⁴ हर इक डाळ अपणे फळा ते पछयाणयां जां; कांभई लोक नां त बुटडेयां ते दागले (अंजीर) तोडां ये नाई बराडियां ते अंगूर तोडां ये।⁴⁵ खरा माळु अपणे मना रे खरे भण्डारा ते खरियां ई गल्लां कड्डा, कने बुरे माळुये रे बुरे मना ते बुरे काम्म कने बुरे बिचार इ निकलां ये। सै जे किछ तुहारे मना च भरीरा हुआं सै वेई तुहारे मुहां च औवां।

इक पक्की निऊं बनाणा

(मत्ती 7:24-27)

⁴⁶ तुहें मिंजो हे प्रभु, हे प्रभु करीने कजो हाक पाये, सिर्फ येदा जताणे खातर भई हऊं तुहारी जिन्दगीया रा मालक आ, पर तुहें त मेरा बोल ई नीं मनदे ?⁴⁷ सै जे कोई मेरले औवां कने मेरी गल्लां सुणां, कने तिन्हांरा अमल करां, तां हऊं तुहांजो दस्सां भई सै किस रे बराबर हुया।⁴⁸ सै तिस माळुये

साई आ, तिने जे अपणा घर बणान्दे वगत जमीन दुग्गी खुणीने थल्ले सप्पड़ा पर निऊं रखी। कने जिस वगत बाढ़ आई तां पाणीये री छालियां घरा ने टकराणे लगी, पर तिस घरा जो हिलाई नीं सक्की; कांभई सै पक्का बणीरा था।⁴⁹ पर सै कोई जे मेरी गल्लां सुणां कने तिन्हाजो नीं मनदा, सै तिस माळुये साई आ तिने जे मिट्टीया पर बिणा निऊं बणाये घर बणाया। जिस वगत बाढ़ा ने पाणीये री छालियां घरा ने टकराई, तां सै इकदम रुढ़ीया कने तिसरा सत्यानाश हुईया!"

इक सुबेदारा रा बिश्वास

(मत्ती 8 : 5-13)

7 जिस वगत यीशू लोकां जो, जो किछ सुनाणा चांह था सै सब सुणाई बैठया, फेरी सै कफरनहूम शहरा जो मुडीने वापस चलीग्या।² तिथी रोम देशा री फौज्जारे सुबेदारा रा इक नोकर था, सै जे तिस सुबेदारा जो बड़ा प्यारा था, कने बमारिया री वजह ने मरने औळा था।³ ताहली जे तिने सुबेदारे यीशुये रे बारे च सुणया, तां सै तिन्हा ले यहूदी लोकां च ते किछ बजुर्गा जो भेजां, भई सै यीशुये ते बिनती करो भई सै आईने तिस सुबेदारा रे नोकरा जो बचाई लो।⁴ फेरी सै बजुर्ग यीशुये ले जाईने बडी बिनती करीने बोलणे लगे भई माहराज अहांने सौगी चलीने तिस माळुये री मदद करा। सै तिसने गलाये, "ये माळु बिल्कुल तुहांरी दया रे लायक आ,⁵ कांभई सै माळु अहांरे लोकां ने प्रेम भाव रखा, कने तिने ई अहांरे खातर प्रार्थना रा घर बनाणाईरा।"

⁶ फेरी यीशु तिन्हा सौगी गये। पर तिन्हा रे घरें पुजणे ते पैहले सै सुबेदार अपणे किछ मित्रां जो यीशुये ले येदा बोलणे खातर भेजां, "प्रभु जी, मेरे घरा तक औणे रा कष्ट नीं करा, कांभई हऊं इस आदरा जोगा नींआ भई तू मेरे घरा च आओ⁷ हऊं इस लायक बी नीं आ भई तुहांने आईने मिलूं। पर तुहें चाये किती बी ये, अगर ऊथी ते सिर्फ वचन ई बोली देंगे, तां मेरा नोकर ठीक हुई जाणा।⁸ हऊं जाणां भई तुहें ये काम्म करी सकदे, कांभई हऊं बी अपणे बड्डे साहबा रे अधीन आ; कने मेरे सपाईयां पर मेरा बी अधिकार आ, जे हऊं सिर्फ जाणे खातर बोलूं, तां सपाही जांये; औणे खातर बोलूं, तां सै आई जांये। जे हऊं अपणे नोकरां जो बोलां, 'येदा कर', या 'तेदा कर' तां सै तियां ई करां ये।⁹ जिस वगत यीशुये ये गल्लां सुणी, तां तिन्हाजो बड़ा चम्भा हुया। सै लोक जे तिन्हांरे पिछे चलीरे थे तिन्हारी तरफ मुडी ने यीशु बोलां, "हऊं तुहांने बोलां भई इस्राएल च बी मैं येडा-बड्डा बिश्वास नीं देखया।¹⁰ जिस वगत सुबेदारा रे भेजी रे मित्र घरें बापस गये, तिन्हें देखया भई सै नोकर त बिल्कुल ठीक हुई गरा।

बिधमा रे मुन्डुये जो जीवन-दान मिलणा

¹¹ इसते इकदम बाद, यीशु अपणे चेलयां सौगी नाईन नौवा रे इक गांवा जो गया। तिसरे सौगी माळुआं रा इक बड़ा दंगल बी जाईरां था।¹² ताहली जे सै गाँवा रे गेटा पर पुजे ता गाँवा रे लोक, इक मुडदे जो दफनाणे खातर गाँवा ते बाहर लेईने चलीरे थे। सै मरीरा माळु अपणी मौआ रा इक्को-इक पुत्र था कने तिसरी मौ इक विधवा थी होर गाँवा रे मते लोक तिसा सौगी थे।¹³ तिसा विधवा री हालत देखीने प्रभुये जो तिसा पर बड़ा तरस आया कने बोलया "रोन्दी मत!"¹⁴ सै तिसा अर्थीया रे नेडे गया कने तिसने छोया, होर तिस्सो चकणे औळे रुकीये। फेरी यीशुये बोलया, "नौजवान, हऊं तिजो बोलां उठ जा।"¹⁵ फेरी तिस मुडदे च जान वापस आईगी, कने सै उठीने बैठीया, कने गलाणे बोलणे लय्या! फेरी यीशुये तिस मुन्डुये जो तिस रिया मौआ ले सम्भाळित्या।¹⁶ इसा गल्ला जो देखी ने लोकां जो बड़ा डर हुईया, कने सै येदा बोली ने परमेशरा री जय- जय कार करने लगे, "अहांरे बिच इक महान भविष्यवक्ता आया कने परमेशरे अपणे लोकां पर मेहरबानी किती।"

¹⁷ तिस दिन यीशुये सै जे कित्या इसरी चर्चा सारे यहूदिया प्रदेशा च कने अखा बखा रे सारे लाकयां च बी फैली ई।

यूहन्ना बपतिस्मा देणे औळे रा स्वाल

(मत्ती 11:2-19)

18 यीशुये सैं जे किछ कित्या था तिसरे बारे च यूहन्ने रे चेलयां तिसजो सारीयां गल्लां री खबर देईती। 19 फेरी तिने अपणे दो चेलयां जो प्रभु ले येदा पुछणे खातर भेजया भई, "क्या तूई सैं मसीह आ तिससो जे अहें न्याहळ्या करां ये, या फेरी अहें किसी होरी री बाट देखीये?" 20 यूहन्ने रे सैं दो चले यीशुये ले आईकने तिन्हाने बोलां ये, "यूहन्ना सैं जे बपतिस्मा देआं, तिने अहां जो तुहांले येदा पुछणे खातर भेजया, भई "क्या तूई सैं मसीह आ तिससो जे अहें न्याहळ्या करां ये, या फेरी अहें किसी होरी री बाट देखीये?" 21 तिस वगत, तिन्हारे सामणे यीशुये मतेयां बमारां जो ठीक कित्या, कने बुरी आत्मा ते छडवाईने चंगा कित्या कने मते अन्हें लोकां रियां अक्खीं च जोत पाई। 22 तां यीशुये यूहन्ने रे चेलयां ने बोलया, "यूहन्ने ले मुडीने वापस जावा, कने तुहें सैं जे किछ देखया कने सुणया, सैं तिसजो दस्सा, भई अन्हें देखणे लगीपे, लंगडे हन्डणे फिरने लगीपे, बमार चंगे हुई करां ये, कने कोढी शुद्ध कित्ते जाई करां ये, टौणे सुणने लगीपे, मुदें ज्युन्दे कित्ते जाई करां ये, कने कंगाळां जो खुशखबरी सुणाई जाई करां ई। 23 कने धन्न आ सैं माळु तिने जे मेरे बारे च ठोकर नीं खाह्दी।"

24 जिस वगत यूहन्ना रे चले यीशुये ला ते चलीये तां, यीशु यूहन्ना रे बारे च लोकां ने बोलणे लगया, "ये माळु कुण आ तिससो जे तुहें जंगला च देखणे गये थे ? क्या तुहें तिन्हां च ते इक सरकन्दे साई कमजोर माळु देखया, सैं जे हवा रे हर लवाट ने हिळां ? 25 या क्या तुहें महंगे कपडे पहनीरे किसी माळुये जो देखणे गये थे ? नां, कांभई सैं जे महंगे कने चमकीले कपडे पहनां ये, कने मौज-मस्ती करां ये सैं महलां च रेहांये, जंगलां च नीं। 26 क्या तुहें किसी भविष्यवक्ते जो देखणे गये थे ? हां, हऊं तुहां कने बोलां, सैं भविष्यवक्ते ते बी बड्डा आ। 27 यूहन्ना सैंई भविष्यवक्ता आ तिसरे बारे च जे शास्त्रां च लिखीरा: परमेशर बोलां, 'देख, हऊं अपणे दूता जो तेरेते पैहले भेजीरां, कने तिस तेरेते पैहले जाईने तेरे खातर बाट बनाणी।'

28 हऊं तुहांने बोलां भई हुण तक येदा कोई माळु नीं जमया सैं जे यूहन्ने ते बड्डा ओ। पर परमेशरा रे राजा च सैं जे छोटे ते छोटा आ, सैं यूहन्ने ते बी बड्डा आ।" 29 जिस वगत सारेयां लोके कने चुंगी लेणे औळ्यां ये गल्ल सुणी तां फेरी तिन्हे यूहन्ना रा वपतिस्मा लेई कने परमेशरा री धार्मिकता जो मन्नील्या। 30 पर फरीसीये कने कायदे-कनूना री शिक्षा देणे औळ्यां यूहन्ना रा वपतिस्मा ना लेणे ते अपणे खातर परमेशरा री योजना जो ठोकर मारीती।

31 यीशुये फेरी पुछया, "हऊं इस जुगा रा बखान कियां करूं ? कने किस सौगी हऊं इस जुगा रे लोकां री तुलना करूं ?

32 कांभई सैं तिन्हा बच्चयां साई ये सैं जे किसी बजारा च बैठीरे रेंह कने इक्की दूये जो हक्कां पाईने बोलांये, "अहें तुहांरे खातर ब्याह रे गीत गाए, पर तुहें त नच्चे ई नीं ये, अहें त रोणे रा गीत गाया, पर तुहें त रोये ई नीं ये।"

33 बपतिस्मा देणे औळे यूहन्ने कवीं अंगूरां रा रस नीं पित्या, कने तिने हमेशा ब्रत कित्या। पर तुहें बोलां ये भई तिसच बुरी आत्मा ई। 34 हऊं माळुये रा पुत्र, खान्दा पिन्दा आ, तां तुहें बोलां ये भई हऊं पेटू कने शराबी आ, कने चुंगी लेणे औळ्यां कने पापीयां रा मित्र आ। 35 पर सैं जे परमेशरा रे ज्ञाना रे मुताविक चलां ये, तिन्हा रिया जिन्दगियां च ज्ञान सच्चा ठहराया जां।"

फरीसिये रे घरे पापी जनाना जो माफ कित्या जाणा

36 इक फरीसीये यीशुये जो अपणे घरें रोटी खाणे खातर न्युन्दा दित्या। यीशुये तिसरा नियुन्दा स्वीकार कित्या कने तिसरे घरें रोटी खाणे जो बैठीया। 37 तिस वगत तिस ई गाँवा री इक पापी जनाना जो ये पता लग्या भई यीशु फरीसिये रे घरें रोटी खाणे बैठीरा, तां सैं संगमरमरा री इक बांकिया कटोरीया च महंगा सेंट लेईने आई। 38 सैं यीशुये रे नेडे आईने रोन्दी हुई अपणे गोडेयां रे बल बैठां ई। तिसरे पैरां जो अक्खीं रे परौळ्यां ने सेडने लगां ई कने सिरा रे बाळां ने पैरां जो साफ करां ई, सैं तिसरे पैरां जो पले-पले चुमदी रही कने सेंट मळदी रही। 39 येदा देखीने सैं फरीसी तिने जे यीशुये जो नियुन्दा देईने सद्दीरा था, अपणे मना च सोचणे लगया, "इसते त येदा साबित

हुआं भई ये यीशु कोई भविष्यवक्ता नीं आ। कांभई जे सच्ची जो सैं परमेशरा री तरफा ते भेजीरा हुन्दा, तां येदा जाणी लेन्दा भई केढी जनाना ई सैं जे इसने छोड्रां ई कने सैं कितनी बडडी पापीन ई।" 40 मगर यीशुये तिस फरीसीये रे मना री गल्लां जो जाणीने जवाव दित्या कने बोलया, "शमौन हऊं तेरेने किछ बोलणा चांहा।" इस पर शमौन बोलां, "गुरु जी बोला।" 41 फेरी यीशु तिससो ये कहाणी सुणवां, "इक साहूकार था तिसरे दो कर्जदार थे, इक्की पर पंज सौ, कने दूजे पर पंजाह चान्दीया रे सिक्कयां रा कर्जा था। 42 पर तिन्हा दुई चते कोई बी तिस कर्जे जो बापस नीं करी पाया। तां साहूकारे तिन्हा पर दया करीने सारा कर्ज माफ करीत्या, तिजो क्या लगां, तिन्हा दूई चते तिसने कुण जेआ कर्जदार मता प्यार करा?" 43 फरीसी शमौन जवाब देआं, मेरीया समझा च, तिस मता प्यार रखणा, तिसरा जे मता कर्जा माफ हुया। "इसा गल्ला पर यीशुये शमौना ते बोलया, "तैं ठीक सोचया।" 44 फेरी तिसा जनाना खा मुडीने तिने शमौना जो गलाया, "इसा जनाना जो देख, सैं जे येथी गोडयां रे भार ई। जिस वगत हऊं तेरे घरे आया, ताहलुआं ते तैं मेरे पैरां धोणे खातर पाणी नीं दित्या; पर इसे जनाने मेरे पैर अपणे आक्खीं रे परौळ्यां ने सेडे, कने अपणे बालां ने पुंझे! 45 तैं मेरा स्वागत करने जो पवित्र चुम्बन नीं दित्या; पर तालुआं ते जे हऊं येथी आईरा, तिस वगता ते इसे मेरे पैरां रा चुम्बन करना नीं छडया। 46 तैं त मेरे सिरा पर मळणे जो तेल बी नीं दित्या पर इसा जनाना जो देख इसे मेरे पैरां पर सेंट तक मळया। 47 इस खातर तू समझी लै भई इसारे पाप, सैं जे मते थे, माफ हुईये, इस खातर इसे मता प्यार कित्या। पर तिस माळुये रे जे थोडे पाप माफ हुए, सैं थोडा प्यार दस्सा।" 48 फेरी प्रभु यीशुये तिसा जनाना जो गलाया, "तेरे पाप माफ हुये।" 49 सैं जे लोक तिन्हाने सौगी रोटी खाणे बैठीरे थे, सैं अपणे-अपणे मनां च विचार करने लगे, "ये माळु अपणे आप जो क्या समझां ? भई ये लोकां रे पाप माफ करवा फिरो? 50 यीशुये तिसा जनाना ने बोलया, " तेरे ई विश्वासे तिजो बचाईल्या, शान्तिया ने जा।"

यीशुये रिया चेलियां

8 इन्हां गल्लां ते बाद यीशु होरी नगर-नगर कने गाँवा-गाँवा जाईने परमेशरा रे राजा री खुशखबरीया रा प्रचार कने घोषणा करदे रहे। तिसरे बारह चले तिस सौगी थे। 2 किछ जनानां, तिन्हाजो जे तिने बुरी आत्मां कने बमारियां ते छडवाया था, तिन्हा च मरीयम सैं जे मगदलीनी रे नाँवा ते जाणी जां थी तिसा चते यीशुये सात बुरी आत्माये नकाळी; 3 कने हेरोदेस राजे रे भण्डारी खुज्रा री जनाना योअन्ना कने सुसन्ना कने होर मतियां जनानां बी इन्हा सौगी थिआं। ये सब जनानां अपणी कमाईया रे पैसयां ने यीशु कने तिसरे चेलियां री सेवा करां थिआं।

ब्यू बाहणे औळे रा द्रष्टान्त

(मत्ती 13:1-9; मरकुस 4:1-9)

4 इक दिन जिस वगत कईयां नगरां रे लोकां री मती भीड़ यीशुये ले आईने कडी हुई, ताहली यीशुये तिन्हांजो इक द्रष्टान्त सुणाया: 5 इक बार इक करसाण अपणे खेतां च ब्यू बाहणे खातर गया, जिस वगत सैं ब्यू बाहणे लगया, ताहली तिन्हां चते किछ ब्यू बाटा रे कन्डे पये, तिथीजे सैं पैरां येठ आईने दलोईये कने सैं पंछीये आईने चुगी ले। 6 इन्हां चते किछ ब्यू सपडा पर पये, कने सैं ब्यू बधणे त लगे, पर पाणीये री कमी होणे ते सैं इकदम ई मुरझाईये कने सुक्कीये। 7 किछ ब्यू बराडियां च पये, कने बराडियां ने सौगी-सौगी बधे, पर बराडिये तिन्हाजो ढक्कील्या। 8 कने किछ ब्यू खरीया जमीनां पर पये, सैं ब्यू उगे, जितना बाह्या था फसल तिसते सौ गुणा पज्जी।" इतणियां गल्लां बोलणे ते बाद, यीशुये उच्चीया अवाजा च बोलया, "तुहां च तिसले जे सुणने रे कान ओ, सैं सुणो कने समझो!"

द्रष्टान्ता रा मकसद

(मत्ती 10:13-17; मरकुस 4:10-12)

9 बाद विच तिसरे चेलियां यीशुये ते पुछया भई इसा कहाणीया रा क्या मतलब आ ? 10 जवाब दित्या, "तुहांजो परमेशरा रे राजा री छुपी री गल्लां जो

समझणे री अकल दितीरी। पर तिन्हां सारीयां गळां जो बाहरलेयां लोकां ते गुप्त रखणे खातर हऊं इन्हा द्रष्टान्तां रा इस्तेमाल करीरां, इस खातर पवित्र शास्त्रा च सै जे किछ लिखीरा, सै पूरा ओः सै देख्यां ये, पर असल च सै नीं देखी पान्दे; सै सुणा ये पर समझी नीं पान्दे।

ब्यू बाहणे औळे द्रष्टान्ता रा मतलब (मत्ती 13:18-23; मरकुस 4:13-20)

11 इस उदाहरणा रा मतलब त ये आ: सै जे ब्यू आ सै परमेशरा रा तुहांरे खातर सन्देश (बचन) आ। 12 बाटा च पैईरा ब्यू, तिन्हा लोकां जो दस्सां सै जे बचना/संदेशा जो सुणां ये, पर शैतान आईने तिस्सो चोरी ने लेई जां कने तिन्हाजो तिस संदेशा पर विश्वास करने ते कने बचाये जाणे ते रोकां। 13 सपडां री जमीना परा रे ब्यू तिन्हा लोकां जो दस्सां ये सै जे खुशीया ने संदेशा जो सुणां ये, पर सपडां री जमीना रे कोमल डाळां साई तिन्हारी जडां जादा अन्दर नीं जाई पान्दी। सै किछ समय तक विश्वास करां ये, पर जिस वगत परीक्षा री घडी औवां ई, तां सै भटकी जायें, 14 झाडीयां ने भरीरिया जमीना री बराबरी अहें तिन्हा लोकां ने करी सक्कां ये, सै जे बचनां जो सुणीने ग्रहण त करां ये, पर जिजां जे अगे बचनां च बघणे लगां ये तियां ई सै जिंदगीया रे फिक्रां च, धन-दौलत कने सुख सुबिदा रिया लालसा च फस्सी जायें तिसते जे तिन्हां रिया आत्मा रा बिकास नीं हुन्दा येद्वयां लोकां री फसल कदीं नीं पकदी। 15 पर खरी जमीन, तिस पर जे ब्यू पौवां, सै भले मना रे, ईमानदार लोकां जो दस्सां सै जे परमेशरा रा बचन सुणां ये, कने तिस्सो अपने जीबना च लागू करी लें, सै लगातार अच्छी फसल लेईने औवे।

दीये रा उदाहरण (मरकुस 4:21-25)

16 "कोई बी माळु दीया बालणे ते बाद तिस्सो ढकदा नीं आ, या तिस्सो मंजे रे थल्ले नीं रखदा ! पर दीये जो उच्चीया ठारी रखया जां, ताकि घरा रे अन्दर औणे औळे तिसरीया लोई च घुमी फिरी सक्को। 17 सै जे किछ हुणा तक छुपीरा, सै अंत तक सामणे लाया जाणा, कने सबनीं रे सामणे प्रगट कित्या जाणा। 18 इस खातर, जेडा किछ जे तुहें सुणदे ओ तिस पर अच्छे ढंगा ने मन लगावा। सै जे मेरी शिक्षा जो ग्रहण करने खातर तैयार ये, तिन्हा जो मती समझ दिती जाणी। पर सै जे सुणना नीं चाहन्दे, तिन्हाते सै बी लेई लित्या जाणा तिस ज्ञाना जो तिन्हे प्राप्त कित्या समझां ये।"

यीशुये री माता कने भाई (मत्ती 12:46-50; मरकुस 3:31-35)

19 इक दिन यीशुये री माता कने तिसरे भाई तिसने मिलणे आये। भीडा रीया वजह ने सै तिस तक पुज्जी नीं पाये। 20 फेरी किन्हीये यीशुये ने गलाया, "तुहांरी माता कने तुहांरे भाई लोक बाहर खडीरे; सै तुहांने मिलणा चांये।" 21 यीशुये तिस्सो जवाव दित्या, "मेरी माता कने मेरे भाई सै सब लोक ये सै जे परमेशरा रा बचन सुणां ये कने तिसरा पालन करां ये।"

आन्धिया जो शांत करना (मत्ती 8:23-27; मरकुस 4:35-41)

22 इक दिन यीशु अपने चेलयां ने बोलां ये, "आवा, अहें नदिया रे उस पार चलीये।" ताहली सै किश्तीया पर चढे कने चलीये। 23 जिस वगत सै जाई करां थे, तिस वगत यीशु सैई या, कने ताहली जे सै सुतीरा था, तिस वगत जोरा री हवा चलणे लगी। हवे तूफाना रा रूप लैई लया तिसते किश्तीया च पाणी भरने लगया कने सै डुबणे लगे। 24 चेलयां तिन्हा जो रडाई-रडाई ने जगहया कने बोलणे लगे, "गुरु जी! गुरु जी! अहें डुबी रांये!" यीशुये उठीने तूफाना जो, कने पाणीये च उठदी लैहरां जो फटकारया। तिसते बाद तूफान रुकिया, कने सब किछ शांत हुईया। 25 फेरी यीशुये तिन्हाते पूछया, "तुहांरा विश्वास किती आ?" सै डरीये कने हैरान हुईने अप्पुं चीं ये बोलणे लगे, "ये माळु हाया कुण आ? इन्हारा हुक्म तूफान कने पाणी बी मन्नां ये।"

बरी आत्मे रे सताईरे माळुये जो वंगा करना (मत्ती 8:28-34; मरकुस 5:1-20)

26 फेरी यीशु कने तिसरे चले गलील रे सामणे, गिरासेनियों रे प्रदेशा च पुजे, 27 यीशु जिस वगत किश्तीया ते उतरी करां था, तिस वगत तिस नगरा रा इक माळु तिन्हा जो मिलया तिसच जे बुरी आत्माये थी। सै किसी घरा च नीं रँहदा था, कने नंगा घुमदा फिरदा रेहां था। सै मतेयां दिनां ते कब्रिस्तान च रेहां था। 28 जिजां जे तिने यीशुये जो देखया, सै रडाया कने तिन्हारे सामणे जमीना पर पैईने जोरा रिया अवाजा च बोलणे लगया, "हे यीशु, परम प्रधान परमेशरा रे पुत्र, मिन्जो तुहांने क्या मतलब आ ? हऊं तुहांते बिनती करां भई मिंजो सजा नीं दे!" 29 कांभई यीशु पहले तेई तिन्हा बुरी आत्मा जो तिस माळुआ ते बाहर निकळने रा हुक्म देइ करां था। ये बुरी आत्मा तिस माळुये जो बार-बार अपने वशा च करां थी। येथी तक भई, लोक तिस्सो संगळां ने बन्हीने कने बेडीयां पाईने पैहरे च रखां थे पर सै संगळां कने बेडियां जो तोडी देआं था कने सै बुरी आत्मा री ताकत तिसजो जंगला च दौडाई रखां थी। 30 यीशुये तिस ते पूछया, "तेरा नों क्या?" तिने जवाव दित्या, "मेरा नों सेना" कांभई मती बुरी आत्माये तिस च बडी रियां थी। 31 सै बुरी आत्माये यीशुये ते बिनती करदी रेआंई भई अहांजो नरका च जाणे रा हुक्म नीं देवा। 32 नेडे ई पहाडा पर सूर्रां रा इक बड्डा झुंड चरने लगीरा था, कने तिन्हे बुरी आत्मे यीशुये ते बिनती किती भई अहांजो इन सूर्रां च जाणे दे। यीशुये तिन्हा जो इसा गल्ला री इजाजत देईती। 33 फेरी सै बुरी आत्माये तिस माळुये च ते निकळी ने तिन्हा सुअरां च चलीगियां, कने सै सारे रा सारा झुंड पहाडा परा ते रुढीने नदीया च पैईया, तिथी सै डुबीने मरीये।

34 जिस वगत सुअरां जो चरणे औळयां येदा देखया, तिसते बाद सै अखा-बखा रे नगर कने गाँवा च गये, कने तिन्हे इसा घटना रा ब्योरा दित्या। 35 इकदम ई यीशुये ले ईक भीड कडी हुईगी, कांभई सै जे किछ हुईरा था तिस्सो लोक अप्पुं देखणा चांह थे। तिन्हे तिस माळुये जो, तिसच जे बुरी अत्माये थी, यीशुये रे चरणां च कपडे पैहनी ने, होशा च बैठीरा देखया। कने सारे लोक हैरान हुई ये। 36 कने तिन्हे लोकें जे इसा घटना जो देखया, तिन्हे होरीं लोकां जो बी दस्सया भई कियां बुरी आत्मा ते सताईरा ये माळु ठीक हुया। 37 तिस गिरासेन इलाके च रहणे औळे सारेयां लोकें यीशु ते बिनती किती भई सै इस इलाके जो छडीने चली जाओ, कने तिन्हा जो तकलीफ नीं देवो, कांभई सै बडे भरी डरीगरे थे। फेरी यीशु किश्तीया ले वापस गये, कने ऊथी ते जाईने नदीया रे दूजे कन्डे चलणे लगे। 38 फेरी तिस माळुये चते जे बुरी आत्माये निकाली रिया थी, सै तिसते बिनती करने लगया भई मिंजो अप्पुं कने रहणे दे, पर यीशुये तिस्सो भेजीने बोलया, 39 'नां, अपने घरा जो वापस जा कने लोकां जो दस्स भई कियां परमेशरे तेरे खातर बडे हैरान करने औळे कम्म किते।" सै सारे नगरा च जाईने यीशुये तिसरे खातर सै जे महान कम्म कितेरे थे तिन्हारे बारे च लोकां जो दसणे लगया।

याईर री मुईरी कुडी कने इक रोगी जनाना (मत्ती 9:18-26; मरकुस 5:21-43)

40 यीशू कने तिसरे चले जिस वगत नदिया रे दूजे कन्डे पुजे, तिस वगत लोकां री भीडे तिन्हारा बडीया खुशिया ने स्वागत कित्या, कांभई सै तिन्हाजो निहाळी रां थे। 41 इतणे च याईर नौवा रा इक माळु आया, सै जे प्रार्थना रे घरा रा मुखिया था, सै आया कने आईने यीशुये रे पैरां पैईया, कने तिन्हाते बिनती करने लगया भई मेरे घरा जो चल, 42 कांभई तिसरी सै जे बारहां सालां री इको-इक कुडी थी, सै मरने औळी थी। तियां जे यीशु तिस सौगी चलणे औळा था, तां मती भीडा च लोक धक्का-मुक्की करदे तिस पर पैई करां थे। 43 तिसा भीडा च येढी जनाना थी तिसाजो जे बारह सालां ते खून बँहणे री बमारी थी। तिसा जनाना ले सै जे किछ था सै सारा तिसे बैदां ले जाई ने खर्चीं दितीरा था, तां बी किसी ते ठीक नीं हुई थी। 44 सै पिछे ते आई कने यीशुये रे चोले रिया इक कनारीया ने छोई। तिसते बाद इकदम तिसारा खून बँहणा बंद हुईया। 45 इस पर यीशुये पुछया, "मेरेने कुण छोया?" तां जे सारे मुकरने लगे, तां पतरस कने तिसरे साथियें बोलया, "स्वामी तिजो त सारीये भीडे ढकी लरा, कने पले-पले तेरे उपर रूडी करां ई।" 46 पर यीशुये

तिसने बोलया, "नहीं, किन्हीयें जाणी बूझी ने हऊँ छुया, कांभई मेरे चते सामर्थ निकली, कने मैं इसजो महसूस बी कित्या।" 47 जिस वगत सैं जनाना समझीगी भई यीशु जाणीया, फेरी सैं कम्बणे लगी कने अपणे गोडयां रे भार तिन्हारे सामणे पैईगी। सारी भीडे तिसारी गल्लां जो सुणया भई सैं यीशुये कने कजो छोई थी, कने कियां सैं इकदम चंगी हुईगी। 48 यीशुये तिसाजो गलाया, "बेटी, तेरे ई विश्वासे तिजो चंगा कित्या, शान्तिया ने चली जा।"

49 जिस वगत सैं तिसा जनाना ने गल्ल ई करी करां था भई प्रार्थना रे घरा रे मुखिये याईर रे घरा ते कोई ब्योरा लेईने आया, "तुहांरी बेटी मरीगी, हुण गुरुये जो दुख देणे री जरूरत नीं।" 50 पर ताहली जे यीशुये येदा सुणया भई क्या हुया, तिन्हे याईर ने बोलया, "डरदा मत, सिर्फ मेरे उपर विश्वास रख, कने तेरी बेटी ठीक हुई जाणी।" 51 जिस वगत सैं याइर रे घरे पुजे, तिस वगत यीशुये पतरस, याकूब, यूहन्ना कने कुडिया रे माता-पिता रे अलावा किसी होरी जो अपणीया सौगी घरा रे अंदर नीं औणे दित्या। 52 रोदे कने बिलाप करदे लोकां ने सैं घर भरीअरा था, पर यीशुये बोलया, "रोणा बंद करा! सैं मरीरी नीं; सुती री।" 53 पर सैं भीड़ तिन्हा पर हसणे लगी कांभई सैं सारे जाणां थे भई सैं मरी चुक्की री। 54 पर यीशुये तिसा कुडिया रा हत्थ पकड़या, कने हाक पाईने बोलया, "बेटी, उठ!" 55 तिस ई पल तिसारे प्राण वापस तिसा च आईये कने सैं इकदम उठीने बैठीगी! फेरी यीशुये तिसा कुडिया रे माता-पिता जो बोलया भई इसाजो किछ खाणे जो दित्या जाओ। 56 इस पर कुडिया रे माता-पिता येदा देखीने हैरान हुईये, पर यीशुये तिन्हाजो हुकम दित्या भई सैं जे किछ बी तुहें देखया सैं किसी ने नी गलाणा।

बारह चेलयां रा सेबा करने खातर भेज्या जाणा

(मत्ती 10:5-15; मरकुस 6:7-13)

9 फेरी यीशुये अपणे बारहां चेलयां जो सद्दी ने कड्डा कित्या कने तिन्हांजो सारी बुरी आत्मां कने बमारियां जो दूर करने री शक्ति कने अधिकार दित्या, 2 फेरी यीशुये तिन्हा जो परमेशरा रे राजा रा प्रचार करने कने बमार माहुआं जो तिन्हा रियां बमारियां ते चंगा करने खातर भेज्या। 3 तिने तिन्हांजो गलाया, "सफरा खातर किछ बी सौगी नी लेणा, नां सोठी, नां झोळा, नां रोटी, नां पैसा धेला नेणा कने होर त होर पैहनीरे कपड़ेयां ते इलावा इक कपड़ा बी सौगी नीं नेणा। 4 जिस किसी घरा च तुहें जांणे तिथि तुहें रुकयो, कने बिदा लेणे तक तिथि ठैहरेयो। 5 जिस गावां रे लोक तुहांजो कबूल नीं करो, तां तिसा जगह ते निकळदे वगत अपणे पैरां री धूड झाडी लेणी, तिसते जे तिन्हारे खलाफ गवाही हुई जाओ।" 6 फेरी सैं चले निकळिने गावां-गावां च जाईने खुशखबरी सुणांदे हुये हर जगह बमारां जो चंगा करदे रैये।

राजा हेरोदेश री परेशानी

(मत्ती 14:1-12; मरकुस 6:15-29)

7 यीशुये रे कित्तीरे चमत्कारां री खबर ताहली जे राजा हेरोदेस अन्तिपास ले पुज्जी, फेरी सैं डरीया कने उलझनां च पैईया, कांभई किछ लोक बोलीरां थे, ये त बपतिस्मा देणे औळा यूहन्ना सैं जे मूर्देयां चते ज्युन्दा हुईरा, 8 किछ लोक बोलां थे भई एलियाह नबी दिस्सा, कने होरनीं लोके येदा गलाया भई पुराणे जमाने रे भविष्यवक्तां चते कोई ज्युन्दा हुईया। 9 हेरोदेस राजे बोलया, "मैई त यूहन्ने रा सिर बढाईरा, तां फेरी ये माहु कुण आ तिसरे बारे च जे हऊँ येदी हैरान करने औळा गल्लां सुणीरां?" कने सैं यीशुये जो देखणे रा मौका टोलदा रेआ।

पांज हजार माहुआं जो रोटी खाणा

10 जिस वगत बारह प्रेरित वापस आये, तिस वगत तिन्हे अपणे कम्मा रा ब्योरा यीशु जो दित्या। फेरी यीशु ऊथी ते चुपचाप निकली ने तिन्हां जो बेतसैदा नाँवा रे नगरा जो लेईया। 11 पर लोकां री भीड़ ये जाणीगी भई सैं कित्तो जाई करां, कने भीड़ तिसरे पिछे चलीपी। यीशुये खुशी-खुशी तिन्हांरा स्वागत कित्या, कने तिन्हांने परमेशरा रे राजा रे बारे च गल्लां करने लगया कने तिन्हाजो जे चंगाईया री जरूरत थी तिन्हाजो चंगा बी कित्या। 12 ताहली

जे दिन घरने लगया तां सैं बारह प्रेरित तिसले आये कने बोलणे लगे, "इसा भीड़ा जो येथा ते भेजी दे तिसते जे यो नेडे री बस्तियां च कने गांवा च जाईकने अपणे खातर रहणे खाणे रा इन्तजाम करी सक्को कांभई अहें येथि सुनसान जगह पर ये।" 13 यीशुये तिन्हांने गलाया, "तुहें ई इन्हां जो खाणे जो देवा।" तिन्हें बोलया, "अहांले सिर्फ पांज रोटियां कने दो मच्छियां ईयां। इन्हा सबनीं रा गुजारा तां हुई सक्कां जे अहें जाईने इसा भीड़ा खातर रोटियां खरीदी ने ले आईये?" 14 कांभई तिसा भीड़ा च करीब-करीब पांज हजार मर्द थे।" यीशुये अपणे चेलयां ने गलाया, "तिन्हां जो पंजाह-पंजाह माहुआं रा झुण्ड बनाई ने बैठणे खातर बोला।" 15 चेलयां तियां ई कित्या, कने सारे लोक जमीना पर बैठी ये। 16 यीशुये तिन्हां पांज रोटियां कने दो मच्छियां जो लेया। होर तिने स्वर्गा री तरफा जो देखी ने परमेशरा रा धन्यवाद कित्या कने तिस खाणे पर बरकत मंगी। फेरी यीशु रोटियां तोड़ी-तोड़ी ने अपणेयां चेलयां गे लोकां च बंडणे खातर देन्दे गये। 17 सारेयां रक्की ने रोटी खादी कने बाद बिच तिन्हे बची रे टुकड़यां री बारह टोकरियां भरीने चक्रियां।

पतरसा रा यीशुये जो मसीह स्वीकार करना

18 इक दिन यीशु भीड़ा जो छड्डीने सुणसान जगह च प्रार्थना करने गये कने तिन्हा सौगी तिन्हारे चले बी थे, तां यीशुये तिन्हाते पुछया, "लोक मिंजो क्या बोलां ये?" 19 तिन्हे जवाव दित्या, "किछ लोक बोलायें भई बपतिस्मा देणे औळा यूहन्ना दबारा ज्युन्दा हुईया, कने कोई-कोई एलियाह बोलायें, कने किछ लोक येदा बोलायें भई पुराणे भविष्यबानी करने औळेआं चते कोई इक ज्युन्दा हुया।" 20 यीशुये तिन्हाते दोबारा पूछया, "पर तुहें मिंजो क्या समझां ये भई हऊँ कुण आ?" पतरसे जवाव दित्या, "तुहें परमेशरा रे भेजीरे मसीह ये!" 21 फेरी यीशुये चेलयां जो हुकम दित्या भई इस बारे च किसी ने देखां बोलदे।

अपणिया मौती रे बारे च यीशुये री भविष्यवाणी

22 फेरी यीशुये बोलया, "कांभई माहुये रे पुत्रा रे खातर ये जरूरी आ भई सैं मता दुःख सओ, कने यहूदी स्याणयां, मुखिये याजकां कने शास्त्रीयां हऊँ घटिया समझीने मारी देणा, पर तिज्जे दिन मांज दुबारा ज्युन्दा हुई जाणा।" 23 फेरी तिने सारेयां लोकां जो बोलया, "जे कोई मेरा चेला बणना चाह, तां अपणी ईच्छां रा इन्कार करे कने हर रोज अपणा क्रूस चक्कीने मेरे पिछे हुई लो। 24 जे तुहें अपणी जिन्दगी अपणे खातर जीणा चाहन्ने तां तुहां सैं खोई देणी, पर जे तुहें मेरे खातर अपणीया जिन्दगीया रा बलीदान करगे, तां तुहांजो सच्चा जीवन मिलणा। 25 कांभई जे माहु सारे संसारा जो पाईलो, कने येदा करदे हुये जे सैं अपणे प्राणां जोई गवाई दो, तां तुहांजो इसते क्या फायदा हुणा? 26 जे कोई माहु मेरेते या मेरियां गल्लां ते शर्म करां, तां मांह, माहुये रे पुत्रा, जिस वगत अपणी कने अपणे पिता री महिमा कने स्वर्गदतां री महिमा च दबारे औणा, ताहली मांह बी तिससो पछ्याणने ते नां करी देणी। 27 कने हऊँ तुहां जो विश्वास दिलां भई येथी खडीरेयां चते किछ माहु येदे भई तालुआं तक जे सैं परमेशरा रा राज देखी नीं लेन्दे तिस वगत तक तिन्हाजो मौत नीं औणी।"

प्रभु यीशुये रा दिव्य रूप

(मत्ती 17:1-8; मरकुस 9:2-8)

28 इन्हां गल्लां ते कोई अड्डां दिनां बाद यीशु, पतरस, याकूब कने यूहन्ना जो लेईने प्रार्थना करने खातर पहाड़ा पर गये। 29 ताहली जे यीशु प्रार्थना करी राई था, तां तिसरे चेहरे रा रूप बदलीया कने तिसरे कपड़े सफेद हुईने चमकणे लगे। 30 फेरी दो माहु मूसा कने एलियाह ऊथी परगट हुये कने यीशुये ने गलाणे लगे। 31 सैं स्वर्गा रिया महिमा री लोई सौगी दिस्सा करां थे कने परमेशरा री इच्छा पूरी करने खातर यरुसलेम च यीशुये रे मरने री गल्लां करी करां थे। 32 पतरस कने तिसरे साथियां जो नींद आईरां थी कने सैं सैंई बी गईरे थे कने तां जे सैं जागे तां तिन्हे यीशुये जो महिमा (लोई) सौगी देखया कने दूई माहुआं जो तिस सौगी खडीरा देखया। 33 जिस वगत मूसा कने एलियाह जाणे लगे तां पतरस नां जाणदे हुये ये क्या बोलीरां, "गुरु जी, ये

खरा हुआ भई अहें येथी थे! अहां येथी तिन मण्डप बनाणे, इक तेरे खातर, इक मूसा खातर कने इक एलिय्याह रे खातर।" 34 पर ताहली जे सैं येदा बोली ई करां था तां इक बदळ आईने तिन्हा पर छाईया; कने तियां जे सैं तिने बदळे घेरीले, तां सैं डरीये। 35 तिस वगत तिस बदला चते इक अवाज आई कने तिन्हाने गलाणे लगी, "ये मेरा बड़ा प्यारा पुत्र आ कने मैं इसजो चुणीरा, इसरी सुणां।" 36 ये आकाशवाणी हुणे ते बाद यीशु कल्हा दिखया; कने तिसरे चले चुप रहे, कने तिन्हे तेदा जे ऊथी देखया, तिसरी कोई बी गल्ल तिन्हे किसी जो नीं दस्सी।

बुरी आत्मा रे सताईरे मुण्डुये जो चंगा करना

(मत्ती 17:14-18; मरकुस 9:14-27)

37 दूजे दिन ताहली जे सैं पहाड़ा ते उतरी ने आये तां मतेयां लोकां री भीड़ तिसने मिलणे जो आई। 38 तिसा भीड़ा च ते इक माह्लु जोरां ने रड़ाया, "गुरुजी, हऊं तेरेते विनती करां भई मेरे मुण्डुये पर दया कर, कांभई सैं मेरा इक्को- इक ई बच्चा अ। 39 कने देख इक बुरी आत्मा तिससो बार-बार पकड़ां ई, कने तिस रिया वजह ने सैं इकलखत रड़ाणे लगी जां, सैं बुरी आत्मा तिससो इस तरीके ने मडेकां ई भई तिसरे मुहां ते चभूड निकलने लगां, कने तिससो मरोडी ने नाश करना चाई। 40 मैं तेरे चेलयां तें तिस बुरी आत्मा जो नकाळणे खातर विनती किती पर सैं येदा नीं करी पाये।" 41 यीशुये जवाब दित्या, "अविश्वासी कने अडीमूर लोको (पीढी) हऊं कदुआं तक तुहांरी सौगी रेंहगा कने तुहांरी सैंहंदा रेंहंगा ? अपने पुत्रा जो येथी लीओ।" 42 सैं मुण्डु हलित्यें आई ई करां था भई तिने बुरे आत्म तिससो पकडी ने जमीना पर पटकाया कने तिससो बुरे हालें मरोडने लगया, पर यीशुये बुरी आत्मा जो थिड़कया कने मुण्डुये जो ठीक करीने तिससो तिसरे पिता ले साम्भीत्या। 43 परमेशरा रे इस नोखे कम्मां जो देखी ने सारे लोक हैरान हुइये।

अपणिया मौती रे बारे यीशुये री दूजी भविष्यवाणी

44 यीशु सैं जे किछ करेआं रां था तिसजो देखीने सारे लोक ताह्ली जे रेह्यान हुई करां थे तिस वगत यीशुये अपने चेलयां जो गलाया, 45 "तुहें इन्हां गलां पर ध्यान देआं, कां भई माह्लुये रा पुत्र माह्लुये रेई हत्था च पकडवाया जाणे औळा आ।"

परमेशरा रे राजा च सबनीं ते बड़ा कुण आ

46 पर सैं इसा गला जो नी समझदे थे, कने सैंवे ई गलां तिन्हां ते छिपी री रैइयां भई सैं तिन्हां जो जाणी नी पाओ, कने सैं सब जणे इसा गला रे बारे च यीशुये ते पुछणे ते डरां थे। 47 यीशु तिन्हारे मनां री गलां जो जाणी लेआं, इस खातर तिने इक बच्चे जो लेआई ने अपने सौगी खड़ा कित्या। 48 फेरी तिने बोलया, "सैं जे कोई मेरे नौवां ते इस मुण्डुये जो अपनावां, सैं मिजो अपनावां, कने सैं जे कोई मिजो अपनावां सैं मेरे पिते जो तिन्हें जे हऊं भेजीरा, तिन्हां जो अपनावां, कांभई तुहां च सैं जे सबनीं ते छोटा आ, सैंई सबनीं ते बडडा आ।" 49 यूहन्ने यीशुये ने बोलया, "स्वामी जी, अहें इक्की माह्लुये जो बुरी आत्मा निकाळणे खातर तुहांरे नौवां रा इस्तेमाल करदे हुये देखया, सैं अहां रिया मण्डलीया रा नीं आ इस खातर अहें तिसजो मना करने री कोशत किती।" 50 पर यीशुये बोलया, "तिससो नां नीं देणी कांभई सैं जे तुहांरे खलाफ नीं ये सैं तुहां रिया तरफा जो आ।"

सामरियां रिया बजह ने यीशुये रा बरोध

51 जियां जे यीशुये रे स्वर्ग वापस जाणे रा वगत नेडे औंदा गया, तिस वगत तिन्हे यरुशलेम जाणे रा फैसला कित्या। 52 जाणे ते पैहले तिन्हे सामरियां रे गाँवा च दूता जो भेजया भई तिन्हारे खातर जगह तैयार करा। 53 पर तिस गाँवा रे लोकें तिन्हा जो वापस भेजीत्या कांभई तिन्हे लोकें जाणील्या भई यीशु ऊथी ते अगे यरुशलेम री तरफ जाणे औळा इस खातर तिन्हे ऊथी यीशुये रा स्वागत नीं कित्या। 54 येदा देखीने तिसरे चेलयां याकूब कने यूहन्ने बोलया, "प्रभु जी, क्या अहें हुकम देईये भई अम्बरा ते आग बहो कने ये लोक जलीने भस्म हुई जाओ ?" 55 पर यीशुये तिन्हारी तरफ मुडीनें तिन्हाजो

थिड़कया कने बोलया, "तुहें नीं जाणदे भई तुहें केदी आत्मा रे। 56 माह्लुये रा पुत्र लोकां रे प्राणां जो नाश करने नीं आईरा पर तिन्हांरा छुटकारा करने आईरा।" फेरी ऊथी ते सैं किसी होर गाँवा जो चलीगे।

प्रभु यीशुये रे पिछे चलणे रा मुल

(मत्ती 6:19-22)

57 जिस वगत यीशु कने तिसरे चले बाटो-बाट जाईरां थे फेरी किन्हीयें यीशुये ने गलाया, "तुहें, चाहे किती बी जांगे मांह तुहारे पिछे औणा।" 58 पर यीशुये तिससो जवाब दित्या, "गिदडियां जो रेंहणे खातर कुडार कने पंछियां जो रेंहणे खातर आलणे हुआयें पर मेरा यनि माह्लुये रे पुत्रा रा कोई घर नीं आ, कने सिर ढकणे खातर बी जगहा नी।" 59 तिन्हे दूजे माह्लुये ने बोलया, "औ, मेरा चेला बणी जा।" सैं माह्लु मन्त्रीया पर बोलणे लगया, "स्वामी जी, पैहले मिजो जाणे देवा भई हऊं अपने पिते रा अंतिम संस्कार करी लूं। 60 यीशुये तिसने बोलया, "सैं जे (आत्मा च) मरीरे तिन्हा जो अपने मुर्दे री परवाह अप्पुं जो करने दे, तेरी जिम्मेदारी येई भई जाईने परमेशरा रे राजा रा प्रचार कर।" 61 इक्की होर माह्लुये गलाया, "हां प्रभु, हऊं तुहारे पिछे चली पाँगा, पर पैहले मिजो अपने परिवार औळयां ते विदाई लेणे दे।" 62 यीशुये तिसने बोलया, "सैं जे कोई अपना हत्थ हल्ला पर रखी ने पिछे देखां सैं परमेशरा रे राजा जोगा नीं आ।

सत्तर चेलयां रा भेजया जाणा

10 कने इन्हां गलां ते बाद यीशु सत्तर होर चेलयां जो चुणांये कने तिस-तिस नगरा कने जगहां पर सैं अपने आप जाणे औळें थे, ऊथी जाणे ते पैहले तिन्हां चेलयां जो दो-दो करीने अपने अगे भेजया। 2 कने तिने तिन्हा जो येदा बोलया: "फसल त मती उगीरी, पर कटणे रे खातर मजदूर थोडे ई हाये; इस खातर प्रभु परमेशर, सैं जे फसला रा मालिक आ, तिन्हाने प्रार्थना करा भई खेतां च मते मजदूर भेजा। 3 हुण जावा; कने याद रखयो, भई हऊं तुहां जो भेडियां रे बिच भेडां रे बचयां सायी भेज्जारां। 4 तुहें जानदे वगत अपने सौगी न पैसे, न झोली लेयां; येथी तक भई जूतयां री दूजी जोडी बी न लेयां। कने बाटा च रुकी ने किसी जो नमस्ते बी नीं करयां। 5 जिस किसी बी घरा च तुहें जाओ, तां तिस घरा जो पैहले येदी शीष देआं भई परमेशरा री शान्ति तिस घरा रे लोकां पर बणी रहो! 6 जे तिन्ही कोई शान्ती पाणे रे लैक माह्लु हुंगा, तां सैं बरकत तिससो मिलणी; जे सैं इस जोगा नीं आ तां सैं बरकत तुहांले वापस आई जाणी। 7 ताहली जे तुहें किसी नगरा च पुज्जी जांगे, तां इक्की घरा च रेंआं, कने जेदा किछ तिन्हांते मिलो, सैं वेई खाओ पीओ। कांभई सैं माह्लु जे काम्म करां, तिससो मजदूरी त मिलणी ई चाहिन्दी: घरें-घरें नीं फिरना। 8 कने ताहली जे कदीं तुहें किसी नगरा च दाखल ओ कने तिस नगरा रे लोक खुशिया ने तुहांरा आदर-खातर करो, तां तुहांरे सामणे जेडहा किछ खाणे जो परोसया जाओ, तिससो खाई लेआं। 9 तिस नगरा रे बमारां जो चंगा करा, कने तिन्हा जो बोला भई, 'हुण परमेशरा रा राज तुहांरे नेडे आई पुज्जारा।' 10 पर जे किसी नगरा रे लोक तुहांरा स्वागत नीं करो, तां तिस नगरा री सडकां पर जाओ कने बोलो, 11 अहें तुहांरे नगरा री तिसा धूडी जो सैं जे अहां रे पैरां च लगीरी, तुहांरे सामणे झाडी दें, पर भूलणा मत भई परमेशरा रा राज तुहांरे नेडे आई पुज्जारा! 12 सच्ची गल्ल येदी भई न्याय रे दिन सदोम साई बुरे नगरा रे लोकां री हालत बी इस नगरा रे लोकां ते बधिया होणी।

अबिश्वासी नगरां जो फटकार

(मत्ती 11:20-24)

13 ओ खुराजीन शहर कने बैतसैदा शहरा रे लोको, लाणत ई तुहां पर! कांभई सैं चमत्कारा रे कम्म जे मैं तुहांरे शहरां च किते, जे मैं सैंवे ई चमत्कार सूर कने सैदा साई बुरे नगरा च किते हुन्दे तां ऊथी रे लोक बोरियां ने बणीरे कपडे पहनीने कने अपने जिस्मा पर राख मळिने कधकेयां पापां ते मन बदली लेया हुंदा। 14 हां, न्याय रे दिन सूर कने सैदा नगरां रे लोकां जो मिलणे औळी सजा ते तुहां जो मिलणे औळी सजा बड़ी बुरी हुणी। 15 अरे

कफ़रनहूम, क्या तु स्वर्गा तक उच्चा कित्या जाणा? नां, तुज त थल्ले नरका च पौण। 16 फेरी यीशुये अपणे चेलया ने बोलया, "सै जे कोई तुहारे संदेशे जो सुणां, सै मिंजो बी सुणां। कने सै जे कोई तुहारे संदेशे जो नकारां, सै मेरा बी इन्कार करां, कने सै जे कोई मेरा इन्कार करां, सै तिस परमेशरा रा तिन्हे जे हऊं भेज्ती रा, तिसरा इन्कार करां।"

सत्तर चेलयां रा बापस औणा

17 जिस वगत यीशुये रे सत्तर चले अपणी सेवा री यात्रा ते मौज मनांदे हुये वापस आईगे, तां यीशुये ने बोलणे लगे "प्रभू, जिस वगत अहें तुहारे नौंवा रा इस्तेमाल करांये, तां बुरी आत्मायें बी अहारां कैहणां मन्नां ईयां।" 18 यीशुये तिन्हांने बोलया, "ठीक आ, मै नां शताना जो स्वर्गा ते बिज्रळा साई पौंदे हुये देखया! 19 देख्या, मै तुहांजो सर्पा कने बिच्छुआं जो पैरां हेठ धरस्सणे रा, कने शैताना री सारी शक्तियां रे उपर अधिकार दितीरा; कने तुहांजो किसी बी चीजा ते कोई बी नुकसान नी हुई सकदा। 20 फेरी बी इन्हां गल्लां ते खुश नी हूणां भई बुरी आत्मायें तुहांरा हुक्म मन्नां ईयां; पर इस खातर खुश होणा भई तुहांरे नौं स्वर्गा च लिखी तरे।"

यीशुये रा आनन्द मनाणा

(मत्ती 11:25-27; 13:16-17)

21 तिस ई घड़ी सै पवित्र आत्मा रिया खुशीया च भरीने बोलणे लगे, "पिता जी, स्वर्ग कने जमीना रे मालक हऊं तेरा धन्याबाद करां भई तुहें इन्हा लोकां ते ये असलीयत छुपाई ने रक्खी, सै जे अपणे आप जो चलाक कने बुद्धिमान समझां ये, कने सै जे बच्चयां साई ये तिन्हा पर ये गल्लां परगट करां ये। हां, पिता, तुहांजो येदा करना ठीक लगया।" 22 फेरी यीशुये अपणे चेलयां ने बोलया, "मेरे पिते मिंजो सारी गल्लां पर अधिकार दितीरा। असल च पुत्रा जो कोई नीं जाणदा पर सिर्फ पिता ई जाणां होर इसा गल्ला बी कोई नीं जाणदा भई पिता कुण आ, सिर्फ पुत्र ई जाणां, या फेरी सै लोक बी जाणां ये तिन्हा पर जे पिते जो परगट करने खातर पुत्र चाहो।"

23 ताहली जे सै कल्हे थे, तां सै अपणे चेलयां खां मुडीने चुपचाप गलाया, "तुहें जो किछ बी देखया, तिस्सो देखणे औळे होर लोक बी धन्न हुईगे। 24 कांभई हऊं तिजो दस्सां, भई मते सारेयां नवियें कने राजयां बी इच्छा कित्ति भई सै तिन्हां गल्लां जो देखो कने सुणो, तिन्हा गल्लां जो जे तुहें मिंजो करदे हुये देखयां, कने मिंजो बोलदे हुये सुणीरा, पर सै तिन्हां गल्लां जो नां त देखी सके नां ई सुणी सके।"

दयालु सामरिये रा द्रष्टान्त

25 इक दिन कनून री शिक्षा देणे औळे इक जाणकारें यीशुये जो परखणे खातर पुछया, "अनन्त जीवन पाणे खातर हऊं क्या करु?" 26 यीशुये तिस्सो जवाब दित्या, "मूसा रा कनून क्या बोलां? तुहें तिस्सो किस तरीके ने समझां ये?" 27 तिने माहुये जवाब दित्या, "तू अपणे प्रभु परमेशरा ने अपणे सारे मन कने अपणे सारे प्राण कने अपणी सारी शक्ति कने अपणी सारी बुद्धिया समेत प्यार कर।" कने अपणे पड़ेसियां ने अप्पुं साई प्यार रख।" 28 यीशुये तिसने बोलया, "तै ठीक जवाब दित्या, येदा ई कर तिसते जे तू अनन्त जीवन जी सकां। 29 पर सै माहु अप्पुं जो धर्मी बनाणा चाह था, इस खातर तिने यीशुये ते दुबारा पुछया, "तां मेरा पड़ेसी कुण आ?" 30 प्रभु यीशुये इक्की कहाणिया च तिसरा जवाब दित्या, "इक यहूदी माहु यरुसलेम ते यरीहां नगरा जो जाई करां था। बाटा जान्दे हुये किछ डाकुर्यें तिस पर हमला करीत्या, तिन्हें तिसरे कपड़े खलवाईते कने तिसरा सारा समान लुटील्या कने तिस्सो मारया कुटया कने अधमुआ करीने वाटा रे कन्डे सट्टी ने चलीगै। 31 संजोगा ने इक यहूदी याजक तिस वाटे जाई करां था; पर जिस बेले तिने तिस माहुये जो वाटा च पर्ईरा देखया, तां सै वाटा छडीने दुजिया खा मुडिया कने तिस्सो छडी ने अग्रे निकली ने चलीया। 32 इक लेबी माहु सै जे मन्दरा री सेवा च इक सहायक रा कम्म करां था; तिस्सा वाटे गया कने सै बी तिस माहुये जो देखीने तिसा बाटा जो छडी ने दुजिया वाटे चलीया। 33 पर इक सामरी जातिया रा माहु बी तिसा वाटे गया कने जिस वगत तिने तिस जख्मी

माहुये जो देखया, कने तिस्सो तिस पर दया आईगी। 34 तिने सामरी माहुये नीहठे हुईने, तिसरे जख्मां पर दाखरस कने तेला औली दवाय मली, कने पट्टीयां बन्ही, फेरी तिने तिस्सो अपणे गधे पर बठालया, कने इक्की सराई च लेईया, तीथि तिने सारी रात जागी ने तिसरी सेवा कीति। 35 दूजे दिन तिने माहुये सराई रे मालका जो चान्दीया रे दो सिक्के दित्ते, कने तिसने गलाया भई इस माहुये री देखभाल रखयां, जे तिसरा खर्चा इसते जादा हुआं, तां अगली बार ताहली जे मांह औणा ताहली बचीरे पैसयां जो देई जागा।"

मार्था कने मरियमा रे घरें यीशु

36 फेरी यीशुये कनूना री शिक्षा देणे औळे ते पूछया, "हुण तू तिन्हा तिन्हां माहुआं चते किस जो तिस माहुये रा पड़ेसी समझणा तिस माहुये जो सै जे डाकुर्यें मारया-कुटया था?" 37 तिने माहुये जवाब दित्या, "सै माहु तिने जे तिस पर दया कीति, सैई तिसरा पड़ेसी हुआ।" यीशुये तिसने बोलया, "हां, तैं ठीक पछयाणया। हुण जा, कने तू बी येदा ई कर।" 38 ताहली जे यीशु कने तिसरे चले यरुसलेमा खौ जाई करां थे, तां सै इक्की गाँवा च गये, तीथि मार्था नौंवा री इक्की जनाने तिन्हा जो अपणे घरें औणे रा नियून्दा दित्या। 39 तिसारी इक बैहण थी तिसारा नौं जे मरियम था, सै प्रभु रे चरणां च बैठीने तिन्हारे उपदेशा जो सुणयां करां थी। 40 पर तिसा बडिया धामा री तयारी जे मार्था करीरां थी, सै तिस रिया चिन्ता च डुबी री थी। सै प्रभु ले आई कने बोळणे लगी, "प्रभु क्या ये ठीक आ भई मेरी बैहण येथी तुहांले बैठीरी रौ, कने सारा कम्म हऊं कल्ही करुं? क्या तुहांजो इसा गल्ला री फिक्र नीं? तिस्सा जो बोळ्ना भई आईने मेरी सहायता कर।" 41 पर प्रभुये तिसाजो बोलया, "मार्था! मार्था! तू मतियां गल्लां खातर फिक्र करां ई! कने घबराई। 42 पर इक गल्ल ई सै जे जरूरी ई। कने मरियमे तिस अब्बल हिस्से जो चुणी लेआ; कने सै तिसाते किसी नी खोळा।"

चेलयां जो प्राथना करना सखाणा

(मत्ती 6:9-13)

11 इक दिन यीशु इक्की जगह प्रार्थना करी रां थे। जिस वगत सै प्रार्थना खत्म करी बैठे, तां तिन्हारे चेलयां च ते इक्की तिन्हाले आईने बोलया, "प्रभु जी, तियां जे यूहन्ने अपणे चेलयां जो प्रार्थना करना सखाया, तियां ई अहां जो बी तू प्रार्थना करना सखा।"

- 2 यीशुये तिन्हाजो बोलया, "तुहें इस तरीके ने प्रार्थना करा; "पिता जी, तुहांरा नौं पवित्र मन्त्रया जाओ, तुहांरा राज आओ।
- 3 हर रोज अहांजो सै जे रोटीया री जरूरत ई, सै रोज के रोज तुहें अहांजो देई करा।
- 4 कने अहारे पापां जो माफ करा, तियां जे अहें तिन्हांजो माफ करां ये सै जे अहारे बरोधा च पाप करां ये, कने किसी मतेहाना च अहां जो पौणे ते बचा।"

प्रार्थना रे बारे च यीशुये री शिक्षा

(मत्ती 7:7-11)

5 फेरी यीशुये इक उदाहरण सणवाया: मन्त्रया तुहांरा इक मित्र आ कने तुहें अधिया राती जो तिस मित्रा रे घरें जाये, कने तुहें तिसजो बोलां ये, "मित्रा! मिंजो तिन्न रोटीयां दे 6 कांभई मेरा इक मित्र हुण ई मेरने मिलणे आया, पर इस बेले तिस्सो खाणा देणे खातर मेरले किछ बी नीं आ।" 7 कने जे सै अन्दरा ते येदा बोळो, मिंजो तंग नीं कर, हुण दरवाजा बंद हुई चुक्कीरा, कने विस्तरे च माह सौगी मेरे न्याणे सुत्तीरे इसा वजह ते उड्डीकने इस वगत हऊं तेरी कोई सहायता नीं करी सकदा। 8 पर हऊं तुहांजो ये दस्सां, भई तिस नीं उठणा कने नाई तुहांजो किछ देणा, पर जे तुहें मंगणे खातर बशरम बणी ने पले-पले दरवाजा खडकां दे रेहंगे, तां तिस जरूर उठणा कने सै जे किछ तुहांजो चाईन्दा सै तुहांजो देणा। 9 इस खातर हऊं तुहांने बोलां, भई परमेशरा ते मंगदे रेहा, कने सै जे किछ तुहें मंगीरां ये, सै तुहांजो दित्या जाणा। टोलदे रेहा, तां तुहांजो मिलणा। खडकां दे रेहा, कने तुहांरे खातर दरवाजा खोलया जाणा। 10 कांभई हर कोई सै जे परमेशरा ते मंगां, तिस्सो

मिलां, सैं जे कोई टोळां सैं पां, कने तिन्हारे खातर दरवाजा खोलया जां सैं जे खड़कांदे हो।¹¹ तुहां च ते येदा कुण पिता हुंगा, जे तुहांरा पुत्र तुहांते मच्छी मंगो, तां तुहें मच्छीया रे बदले तिस्सो सर्प देओ? ¹² या जे सैं अण्डा मंगो, तां क्या तुहें तिस्सो बिच्छू दित्या ओ? बिल्कुल नीं! ¹³ जे तुहें पापी हुईने बी इसा गल्ला जो जाणां ये भई अपने पुत्रा जो खरीयां चीजां देणी चाहिन्दी, तां तुहांरा पिता स्वर्गा रा परमेशर अपने मंगणे औळ्यां जो पवित्र आत्मा कां नीं देगा।

यीशु कने बालजबूल
(मत्ती 12:22-30; मरकुस 3:20-27)

¹⁴ इक दिन यीशुये बुरी आत्मा रा सताईरा इक माहू, सैं जे बोली नीं सकदा (गुंगा) था, तिस च ते बुरी आत्मा जो बाहर कडया, कने फेरी सैं गुंगा माहू बोलणे लगीया। येदा देखी ने लोकां जो रेहानी हुई। ¹⁵ किछ लोकें बोलया, "इस्सो ये ताकत, बुरी आत्मा रे मुखिये ते मिलां ई, सैं जे शैतान आ!" ¹⁶ किछ होरीं लोकें यीशुये रा मतेहान लेणे खातर तिन्हाते अंबरा रे चमत्कारी चिन्ह मंगे, भई इसा गल्ला जो साबित करा भई परमेशरे ई तिन्हा जो भेजीरा ¹⁷ यीशु तिन्हां सारेयां रे मना री गल्लां जो जाणी या, इस खातर तिने गलाया, "तिस प्रदेशा रे लोक जे अप्पुं बाटियें लडदे-घुलदे रौ, सैं कदी नीं बसदा बल्कि ऊजडी जां। कने तिस घरा च जे कळह (फूट) हुआई, सैं घर बी ऊजडी जां। ¹⁸ तुहें बोलांये भई मिंजो बुरी आत्मा रे मुखिये ते सामर्थ मिलां ई, पर जे शैतान मिंजो बुरी आत्मा जो नकाळणे री सामर्थ देईने, अपने ई खलाफ लडया रां, तां तिसरा राज कियां टिकी रा रेहणा? ¹⁹ कने जे मिंजो भूतां-प्रेतां रे मुखिये ते सामर्थ मिलांई, तां तुहांरे अपने चेलयां रे बारे च क्या? सैं जे तुहांरे बिचा ते भूत-प्रेत नकाळां ये सैं बी त भूतां-प्रेतां जो नकाळां ये, तां तुहें सैं जे गलाया, तिसरे मुताबिक सैं वेई तुहांरा फैसला करणे। ²⁰ कने जे हऊं परमेशरा रिया शक्तिया ने भूत-प्रेत नकाळां, तां समझीलवा भई परमेशरा रा राज तुहांरे बिच आई पुज्जीरा। ²¹ कांभई, (शैतान) सैं जे पूरे तरीके ने अस्त्रां-शस्त्रां ने सजी ने, अपने घरा री रखवाली करां, तां तिसरी धन-दौलत बचीरी रेआई, ²² पर ताहली जे कोई तिसते बी जादा ताकतवर तिस पर हमला करीने तिस्सो हराई देआं, तां तिसरे सारे अस्त्र-शस्त्रां जो तिन्हां पर जे तिसरा भरोसा था, खोई लेआं, कने तिस रिया सारीया जायदाता जो लूटीने बंडी लेआं। ²³ "सैं जे कोई मेरीया सौगी नीं आ, सैं मेरा बरोधी आ कने सैं जे मेरे सौगी कठेरदा नीं आ सैं बखोरने रा कम्म करां।

अधूरे सुधारा ते बिपत्ति
(मत्ती 12:43-45)

²⁴ ताहली जे कोई भूत-प्रेत किसी माहूये चते निकळी जां, ताहली सैं अराम पाणे खातर टोळदे-टोळदे सुणसान जगह च जां। पर ताहली जे तिस्सो अराम करने खातर येदी कोई जगह नीं मिलदी, तां सैं बोलां, 'हऊं तिस माहूये ले बापस चली जां तिथी ते जे हऊं आईरा।' ²⁵ तां सैं वापस आई जां, तां पुराणे घरा जो साफ-सुथरा कने ठीक ढंगा ने सजीरा सजाईरा पां। ²⁶ फेरी सैं जाईने, अपने ते बी खतरनाक सात भूतां-प्रेतां जो सौगी लेईने औवांइ कने तिस माहूये च बडीने ऊथी वास करां ई। तिसते बाद तिस माहूये री हालत पैहले ते बी बुरी हुई जाई।"

धन्य कुण आ

²⁷ जिस वगत यीशु इन्हां गल्लां जो बोली ई करां थे, तां भीड़ा च ते इक जनाना उठी कने जोरा री अवाजा च गलाई, "धन्न ई तेरी मौ तिसाते जे तू जम्मया, कने तिसारा जे तैं दुध पित्या!" ²⁸ फेरी यीशुये बोलया, "पर इन्हां ते बी जादा धन्न सैं माहू ये, जेहडे परमेशरा रा बचन सुणां ये, कने तिस पर चलां ये।"

स्वर्गा रे नशाणा री मंग
(मत्ती 12:38-42)

²⁹ जिस वगत जादा भीड़ बधदी गई, ताहली यीशुये बोलया, "ये बुरा वगत आ, कने इस बुरे जुगा रे लोक मेरते बार-बार पुच्छां ये भई हऊं तिन्हांजो कोई चमत्कार करने औळा नशाण दस्सू पर माह तिन्हांजो इक ओ ई नशाण देणा, कने सैं आ परमेशरा रिया तरफा ते भविष्यवाणी करने औळे माहू योने रा नशाण। ³⁰ सैं जे तिस सौगी हुया सैं बडडे नगर निनबे रे लोकां खातर इक चिन्ह बणया, तियां ई माहूये रा पुत्र बी इस जुगा रे लोकां खातर नसाण होणा। ³¹ न्याय रे दिन शेबा (दखणा) री राणिया इसा पीढीया रे लोकां रे खलाफ उठी ने तिन्हाजो दोषी बनाणा, कांभई सैं सुलैमाना रा ज्ञान सुणने खातर बडे दूरा ते आई थी, कने हुण येथी येदा कोई हाया सैं जे सुलैमाना ते बी बड्डा आ; फेरी बी ये पीढी तिसरी गल्ल सुणने जो नां करां ई। ³² फेरी न्याय रे दिन, निनबे रे लोकां बी इसा पीढीया रे लोकां रे खलाफ उठणा कने तिन्हाजो दोषी बनाणा, कांभई योना रे प्रचारा जो सुणीने तिन्हे पापां ते मन फेरया था। हुण येथी येदा कोई हाया, सैं जे योना ते बी जादा सामरथी आ, फेरी भीं ये पीढी तिसरी गल्लां सुणने जो नां करां ई।

शरीरा रा दीया
(मत्ती 5:15; 6:22,23)

³³ कोई बी माहू दयूआ बालीने लुखान्दा नीं आं, या तिस्सो डल्ला हेठ नीं रखदा, पर सैं तिस्सो उच्चीया ठारी रखां, ताकि सैं जे अन्दर आओ, तिन्हां जो लोय हुई जाओ। ³⁴ तेरी अख तेरे शरीरा रा दीया ई, खरी अख लोई जो तुहांरे प्राणां रे अन्दर औणे री ईजाजत देआं ई; पर इक बमार अख, लोई जो बाहर ई रोकां ई, कने तुहांजो नेहरे च धक्का देआं ई। ³⁵ तुहें सोचां ये भई तुहांरे अन्दर लोय ई, पर सैं किति नेहरा ई त नीं आ? इसा गल्ला जो पक्का करा! ³⁶ जे तुहें अपने अन्दरा ते लोई ने भरीरे, कने किति कुणिया च बी नेहरा नीं आ, तां तुहांरा सारा जीवन उजियाला हुणा, मन्त्रया भई इक तेज रोशनी तुहांरे उपर चमकया दी हो।"

शास्त्रियां कने फरीसियां जो फटकार
(मत्ती 23:1-36; मरकुस 12:38-40)

³⁷ जिस वगत यीशु होरी गलाई रां थे, फेरी किसी यहूदि याजके तिन्हांजो अपने घरें रोटी खाणे खातर नियून्दा दित्या। सैं अन्दर गये कने रोटी खाणे बैठे। ³⁸ तिस यहूदि याजका जो येदा देखी ने रेहानी हुई भई बिणा हत्थां धोये सैं रोटी खाणे खातर बैठीये। ³⁹ प्रभुये तिसजो बोलया, "यहूदि याजको, तुहें कौलियां कने थालियां जो उपरा-उपरा ते मांजणे च साबधानी वरतां ये, पर तुहांरे अन्दर हुण बी गन्दगी, तुहां च हुण बी लालच कने बुराई भरीरी! ⁴⁰ अरे मूरख लोको! क्या परमेशरे अन्दर बाहर, दोनों नीं बणाये? ⁴¹ तुहांले सैं चीजां जे हाईयां, तिन्हांजो गरीबां च बंडी देवा, कने तुहां पूरिया रीता ने शुद्ध हुई जाणा।

⁴² पर अरे यहूदि याजको, हाय तुहां पर! तुहें अपनी छोटी ते छोटी कमाईया रा यनि सौफ, जीरा, कने पुदीने रा बी दसबां हिस्सा बिणा भूले देआंये, पर तुहें न्याय कने परमेशरा रे प्यारा जो भूली जायें। ये ठीक आ भई तुहें दशमांश देआंये, पर सैं जे इसते बी जरूरी गल्ल ई, तुहें तिन्हां जो बी करना नीं भूलो। ⁴³ ओ यहूदि याजको, हाय तुहां पर! तुहें येदा चांये भई प्रार्थना रे घरा च तुहांजो आदर-भौं रा आसण मिलो कने बजारां ते टपदे वगत लोक तुहांजो नमस्ते करो। ⁴⁴ फिटलाणत ई तुहांजो! कांभई तुहें खेतां च दबोईरी तिन्हा कब्रां रे बराबर ये, तिन्हा पर जे लोक अनजाणे च चलां ये कने नीं जाणदे भई तिन्हां कब्रां च कितणी सडी रियां चीजां ईयां।"

⁴⁵ फेरी कनूना री शिक्षा देणे औळे जाणकारे बोलया, "गुरु जी, सैं किछ गल्लां जे तुहें हुण बोली तिन्हारे जरिये तुहें अहांरी बी निधया (बुराई) कीति। ⁴⁶ यीशुये गलाया, "न्याय रे पण्डतो, फिटलाणत ई तुहांजो! कांभई तुहांरे धर्मा री गरकी पण्ड, सैं जे चकणा मुश्किल हुआं ई; तिसाजो लोकां पर लदी दें, कने तिस बोझे जो चकाणे खातर तुहें इक गुडी बी नीं छुवांहेदे।

47 फिटलाणत ई तुहांजो! कांभई तुहें तिन्हां भविष्यवाणी करने औळ्यां पवित्र माळुआं खातर कन्न बणाये, तिन्हाजो जे तुहांरे बजुर्गे मारी दितीरा। 48 खूनीयो! तुहें अपने बजुर्गा रे कम्मा च सहमत हुआये भई सैं किछ जे तिन्हें कितीरा सैं ठीक कितीरा। कांभई तिन्हे त भविष्यवाणी करने औळ्यां जो मारया कने तुहें तिन्हारी कब्बां बनाईयां। 49 परमेशरे अपनीया बुद्धीया ने तुहांरे खातर येदा गलाया: हऊं तिन्हाले भविष्यवक्ता कने प्रेरितां जो भेजगह, तिन्हां जे इन्हा चते किछ मारी देणे कने किछ पर जुल्म करगे। 50 संसारा रे शुरु तेई जितणे बी भविष्यवक्तेयाँ री हत्या हुई, तिस खातर इस जुगा रे लोकां जो जिम्मेवार बणाया जाणा, 51 हाबिल री हत्या ते लेईने जकरयाह री हत्या तक, तिन्हारी हत्या जे परमेशरा जो अर्पण करने री बेदी कने परमेशरा रे मन्दरा रे बिच हुई, इन्हां सब्बी रे खातर इसा पीढीया रे लोकां जो ई इसरा लेखा-जोखा देणे पौणा। 52 कनूणा रे जाणकारो लाणत ई तुहांजो! कांभई तुहें ज्ञानां री चाबिया जो लोकां ते लकोईने रखांये। तुहें अपने आप त परमेशरा रे राजा च नीं जान्दे पर तुहें दूज्यां जो बी जाणे ते रोकां ये।"

53 यशु जिस वगत अपनी गल्ल बोली बैठे, तां यहूदि याजक कने कनूणा पढ़ाणे औळे मास्टर, तिन्हा रिया इसा गल्ला पर बड़ा नराज हुये। तिस ई घड़ी तिन्हे यशु होरे ते मते सारे स्वाल पूछे, 54 कने इसा कोशिश च लगीरे रेंये, भई तिन्हारे मुहां ते येदी गल्लां नकळवाये तिन्हा जो जे तिन्हा रेई बरुध इस्तेमाल करीने फसाई सकगे।

पखण्डा रे खलाफ चेताबनी

(मत्ती 10:26,27)

12 तिस बेले उत्थी हजारां रे हसाबे लोक कड़े हुये कने भीड़ इतणी अपने चेलयां खा मुडे कने बोलणे लगे, "यहूदि ब्राह्मणां रे मलेडे ते चत्तन्न रौवा, सैं जे तिन्हारा छल-कपट आ। 2 सैं वगत आई करां तिस वगत जे सारी गल्लां जो सामणे परगट कित्या जाणा; कने सैं किछ जे लकोईरा, सैं लोकां रे सामणे कडुया जाणा। 3 जितणियां बी गल्लां सैं जे तुहें नेहरे च गलाई रियां, सैं दिने दपैहरे सुणाई जाणीयां। कने सैं गल्लां जे तुहें दरवाजा बंद करीने गलाई रियां, तिन्हां गल्लां जो घरां री छतां पर खड़ीने जोर-जोरा ने सुणवाया जाणा, तिसते जे सारे लोक तिन्हांजो सुणी सकगे!"

किसते डरिये

(मत्ती 10:28-31)

4 प्यारे मित्रो, तिन्हाते मता डरदे सैं जे तुहांजो जान्नी ते मारना चायें, सैं सिर्फ तुहांरे जिस्मा जोई मारी सकाये; इसते जादा सैं किछ नीं करी सकदे। 5 पर हऊं तुहांजो दस्सां, भई किसते डरना चाहिन्दा: परमेशरा ते डरा तिसले जे लोकां जो मारने कने तिन्हा जो नरका च पाणे री बी समरथ्या ई। 6 पंजां चिडीयां रा क्या मुल आ? क्या सैं दूर्ई पैसयां च नीं बिकदी? फेरी बी तिन्हां चते इक्की जो बी परमेशर नीं भुलदा। 7 कने तुहांरे सिरा रे बाळ बी गिणीरे, इस करीने तुहें नीं घबरावा; कांभई तुहें परमेशरा खातर चिडीयां रे सारे ड्वारा ते जादा मुल रखां ये।

यीशु जे स्वीकार या अस्वीकार करना

(मत्ती 10:32,33; 12:32; 10:19,20)

8 हऊं तुहांजो इसा गल्ला रा भरोसा देयां भई इसा जमीना पर सैं जे कोई मिंजो माळुआं रे सामणे मन्नी लेंगा, तां हऊं माळुये रा पुत्र, तिस माळुये जो परमेशरा रे स्वर्गदूतां रे सामणे मन्नी लेंगा। 9 पर जे कोई माळु इसा जमीना पर माळुआं रे सामणे मिंजो मनणे ते नांह करो, तां मांह बी तिस माळुये जो परमेशरा रे स्वर्गदूतां रे सामणे मनणे ते नांह करी देणी। 10 सैं जे कोई माळुये रे पुत्रा रे बरोधा च बोलां, तिस्सो माफ कित्या जाणा, पर सैं जे कोई पवित्र आत्मा री निन्हा करां, तिस्सो कर्दी बी माफ नीं कित्या जाणा। 11 जिस वगत लोक तुहांजो प्रार्थना रे घरा च, मंत्रियां कने अधिकारियां रे सामणे तुहां पर मक्कदमा चलाणे खातर खड़ा करगे, तां येदा फिक्र नीं करयो भई अपने बचावा खातर तुहां कियां कने केदा जवाब देणा, 12 कांभई तुहें जिस वगत

उत्थी खड़ीरे होणे, तिस ई वगत पवित्र आत्मे तुहांजो सखाई देणा भई तुहांजो क्या जवाब देणा चाहिन्दा।"

इक अमीर मूर्खा रा द्रघान्त

13 फेरी भीड़ा चते किन्हीये माळुयें गलाया, गुरु जी, मेहरबानी करीने मेरे भाईये जो बोलयो, भई अपने पिते री जायदाता री बंड असूला मुताबिक मेरे सौगी करी लैं।" 14 यीशुये जवाब दित्या, "भले माणसा! येदियां गल्लां रा फैसला करने खातर मिंजो तुहांरा जज किने बणाया?" 15 फेरी तिन्हें बोलया, "चत्तन होआ! तुहांले सैं जे नीं आ, तिसरा लालच नीं करा। कांभई जादा धन-दौलत किसी रिया जिन्दगिया जो नी बचाई सकदी।" 16 यीशुये येह द्रघान्त सुणाया, "इक अमीर माळुये री जमीना पर बड़ी भारी फसल पज्जी। 17 तिने सोचया, "हऊं क्या करुं? इतणा अनाज रखणे खातर मेरे भण्डारा च त जगह ई नीं!" 18 तिने बोलया, "हां, इक कम्म करां! हऊं अनाजा रे इन्हां भण्डारां जो तोडी ने बड्डे भण्डार जे बणाऊं फेरी तां अनाजा कने सारे समाना जो रखणे खातर बथेरी जगह होणी। 19 तिसते बाद मांह चैना ने बैठणा कने अपने मना जो बोलणा, मेरीये जान्नी! औणे औळे कईयां सालां तक तेरले बथेरा अनाज हुईया, हुण अराम कर! खा-पी, कने नंद कर! 20 पर परमेशरे तिसजो गलाया, "मूर्ख! तूं इसा ई राती मरी जाणा! फेरी ये सारा किछ किसरा हुणा" 21 तिस माळुये ने बी येदा ई हुणा सैं जे अपने खातर दुनियां री धन-दौलत ता कड़ी करां, पर परमेशरा सौगी कीमती रिस्ता नीं रखदा।"

परमेशरा पर भरोसा रखा

(मत्ती 6:25-34)

22 फेरी अपने चेलयां खा मुडीने यीशुये बोलया, " इस खातर हऊं तुहांजो बोलां, हर रोजा रे गज्वारे रे खातर फिकर नीं करा भई क्या खाहगे कने अपने जिस्मा री फिक्र नीं करा भई क्या पहनगे। 23 कांभई जिन्दगी रोदिया ते जादा कने जिस्म कपडेयां ते जादा कीमती आ। 24 इन्हा कावां जो देखा, इन्हां जो ना त वाहणे री जरूरत ई ना ई लुणवाई करने री। नां ई सैं भंडारा च कने कोठयां च अनाज कड्डा करी ने रखां ये, कांभई परमेशवर इन्हां जो खाणा-दाणा देईने पालां, पर तुहें परमेशरा रे खातर इन्हां पंछीयां ते कई गुणा जादा कीमती ये! 25 क्या तुहांरे सारे फिक्र तुहांरिया जिन्दगीया रा इक पल बी बधाई सकां ये? बिल्कुल बी नीं! 26 जे फिक्र येदी इक छोटी जेई गल्ल बी नीं करी सकदी, तां बडीयां गल्लां रा फिक्र करने ते क्या फायदा? 27 जंगली फुलां रे डाळां (सोसनां) खा ध्यान देवा भई सैं कियां बधां ये, सैं त केडी बी मेहनत नी करदे कने नां ई कपडे बणवाये, फेरी बी सुलैमान बादशाह अपने राजा रे बगत, तिन्हां फुल्लां चते किसी रे बराबर बी बाका कपडा नीं पहनी सक्या। 28 तां जे परमेशर इतणे बधिया तरीके ने इन्हां फुलां री परवाह करी सकां, सैं जे अज ये कने कल अग्गी च फुकी देणे, तां क्या परमेशरा तुहांरी परबाह नीं करणी? तुहां च हल्लीं बी बिश्वासा री कमजोरी ई। 29 इसा गल्ला री खोजा च नीं रौवा भई अहें क्या खांगे कने क्या पींगे? कने इस रिया ई फिक्र च नीं फस्सीरे रौवा। 30 इस संसारा रे अविश्वासी लोक इन्हाई चीजां री खोजा च लगातार लगीरे रेंह, पर तुहांरा पिता पैहले तेई जाणां भई तुहांजो इन्हां चीजां री जरूरत ई। 31 जे तुहें परमेशवरा रे राजा री खोज करगे तां तिस्स तुहांरे हर रोज की सारी जरूरतां जो पूरा करना।

स्वर्गीय धन

(मत्ती 6:19-21)

32 इस खातर भेडां साई भोळे, मेरे छोटे झुण्डा! घबरांदा मत, कांभई तुहांजो स्वर्गा रा राज देणे च परमेशर पिते जो बड़ा नन्द औवां। 33 तुहांले सैं जे कोई चीज हाई, तिसा जो बेची दवा कने तिस्सो जे जरूरत ई तिस्सो दान करी दवा, येदा करने ते तुहें अपने खातर स्वर्गा च धन कठेरी करगे! कने स्वर्गा रे बटुए च कोई वी छेन्डा नीं आ, तुहांरा पैसा तिथी हिफाजता ने रेंहणा तिस पैसे जो न त कोई चोर चोरी सकां कने न ई तिस च कोई कीड़ा लगणा। 34 तिथी जे तुहांरा पैसा होणा, ऊथी तुहांरा मन कने सोच बिचार हुणा।

जागदे रौआ

35 परमेशरा री सेवा खातर सदा तैयार रौआ कने चौकस रौआ। 36 कने तिन्हां लोकां साई बणा सै जे ब्याह री धामा ते वापस आँदे अपणे मालका री बाट देखया दे ओ, भई सै ब्याह ते वापस आओ कने दरवाजा खड़काये तां सै इकदम तिस खातर दरवाजा खोली सक्को। 37 धन्य ये सै सेवक सै जे मालका रे औन्देई तिसजो जागदे कने तैयार हुई रे मिलां ये। हऊं तुहांजो सच्च बोलां, भई सै बी तिन्हा रिया सेवा खातर अपणी कमर बन्हीने तिन्हाजो रोटी खाणे बठाळगा, कने नेडे आईने तिन्हारी सेवा करगा। 38 सै मालक अधिया राती या सबेर हुणे ते पैहले बी आई सक्कां, पर जिस वगत बी सै आओ, तां तिन्हां सेबकां जो जे तैयार हुईने बैठीरा पांत्गा तां सै सेबक धन्य ये। 39 पर तुहें येदा जाणी लवा, भई जे घरा रे मालका जो येदा पता होन्दा भई चोर किस वगत औणे औळा तां सै जागदा रेहन्दा कने तिस्सो अपणे घरा च बड़ने नीं देन्दा। 40 इस खातर तुहें बी तैयार रेहा कांभई माहुये रे पुत्रा येदिया घड़िया औणा तिसरे बारे च तुहें सोची बी नीं सकदे।"

बिश्वासा रे लैक या अबिश्वासा रे लैक दास

(मत्ती 24:45-51)

41 फेरी पतरसे पुछ्या, "प्रभु जी, ये कहाणी तुहें अहारे खातर बोली रां ये; या सारयां रे खातर ई?" 42 प्रभुये गलाया; सै विश्वासा रे लायक कने समझा औळा भण्डारी कुण हुणा, तिसरा मालक जे तिस्सो नोकरां-चाकरां पर मुखिया बणाई नै घरा री रखवाली करने कने ठीक वगता पर तिन्हांजो रोटी देणे री जिम्मेवारी सम्भाले। 43 धन तिस सेवका जो, जे तिसरा मालक आईने देखदा ओ भई तिसरे सेबके ठीक ढंगा ने अपणी जिम्मेवारी नभाई, तां तिस्सो तिसरीया कमाईया रा फळ देंगा। 44 हऊं तुहांजो सच्च बोलां; भई तिस नोकरा जो अपणी सारी जायदाता पर निगरानि करने खातर भण्डारीये रा औहदा देणा। 45 पर जे सै सेवक सोचणे लगे, भई "मेरा मालक त औणे च बड़ी देर करीरां, कने सै दूजयां दास दासियां जो मारना-कुटणा शुरु करी दो कने धामां करयादा ओ, कने शराब पी ने टुन रहणे लगे, 46 तां तिस सेवका रे मालका येदे दिन आई जाणा तिसरे बारे जे तिने सोचया बी नीं ओ। तिस अपणे सेवका जो बुरे हालें फटकारना कने तिस्सो कडी ने अविश्वासियां रे बिच भेजी देणा। 47 कने सै सेवक जे अपणे मालका री इच्छा जाणदा था कने तिस खातर तैयार नीं रेआ केने मालका रिया इच्छा रे मुताविक नीं चलया तां तिस्सो शख्त सजा दिति जाणी। 48 पर तिस्सो जे अपणे मालका रिया इच्छा री समझ नीं कने येदा कोई कम्म करी बैठो सै जे मार खाणे लायक ओ तां तिस सेवका जो हल्की मार पौणी। इस खातर तिस्सो जे मत्ता दितीरा, तिसते जादा मंगया जाणा। तिस माहुये ते तिस्सो जे लोकें जादा दितीरा, तिसते लोकां जादा ई मंगणा।

यीशुये रे औणे रा परिणाम

(मत्ती 10:34-36)

49 हऊं जमीना पर आग लगाणे आया, कने मेरी कितणी इच्छा ई भई सै येबां तेई भडकी जान्दी। 50 पर औणे औळे दिनां च मिंजो इक खतरनाक बपतिस्मा लेणे पौणा, कने तदुआं तक जे सै पूरा नीं हुई जान्दा, तदुआं तक मेरा मन बड़ा व्याकुल रेहणा। 51 तुहें क्या सोचां ये भई हऊं इसा जमीना पर शान्ति बनाणे आईरा? नहीं, हऊं येथी लड़ाई झगड़े करणे कने बंडवारा करने खातर आईरा। 52 कांभई अज्जा ते परिवारा रे पंजां माहुआं रे बिच बरोध पैदा हुणे, तिन्न लोक मेरी ओर होणे, कने दो मेरे बरोधा च हुणे। 53 पिते कने पुत्रा रे बिच, मौआ कने धिया रे बिच, सस्सा कने बहुआ रे बिच इक्की दुये रे परति बरोधा च खढना।"

समय रे लक्षण

(मत्ती 16:2,3)

54 फेरी यीशुये भीड़ा जो गलाया, "ताहली जे तुहें पच्छमा च बदळां जो उठेदां देखां ये, ताहली बोलां ये, बर्खा हुणे औळी ई।" कने तेदा ई हुई जां।

55 जिस वगत दखणा ते हवा चलां ई, तां बोलां ये, भई लू चलणी, कने तेदा ई हुई जां। 56 धोखेवाजो, तुहें जमीनां कने अंवरा रे रंग रूपा च अन्तर करी सक्कां ये, पर तुहें इस जुगा रे बारे च कां अन्तर करना नीं जाणदे?

अपणे दुश्मणा ने समझौता

(मत्ती 5:25,26)

57 तुहें अप्पुं ई इसा गला रा फैसला कां नीं करी लेंदे भई क्या करना ठीक आ ? 58 ताहली जे तुहें अपणे दुश्मणा सौगी अधिकारियां ला जो जायादे ओ तां बाटा च ई तिस कने समझौता करने रा जतन करा। नैत किति येदा नी ओ भई सै तुहांजो जजा रे सामणे खिंजीने लेई जाओ कने जज तुहांजो जेलरा रे हत्था च देई दो। कने जेलर तुहांजो जेला च बंद करी दो। 59 में तुहांजो गलां भई तदुआं तक जे तुहें इक-इक पाई नीं देई बैठगे तदुआं तक फेरी तुहें छुट्टी नीं सकदे।

मन फरावा या नाश हुआ

13

तिस बेले किछ लोक, सै जे ऊथी थे तिन्हें यीशुये जो इसा गला रे बारे च दस्या भई ताहली जे गलील प्रदेशा रे किछ लोक यरुशलम रे मन्दरा च अपणे पाली रे पशुआं री बळि देई करां थे, ताहली पिलातुस राजपाले पशुआं रिया बळिया सौगी तिन्हाजो बी मरवाईतया था। 2 ये गलां सुणीने यीशुये जवावा दित्या, "क्या तुहें येदा समझां ये भई ये गलीली, बाकी सबनीं गलीलियां ते जादा पापी थे? क्या तांई इस खातर तिन्हा पर येदी आफत आई? 3 येदा विल्कुल बी नीं आ! पर जे तुसें बी बुरे कम्मां जो छड्डीने अपणा मन परमेशरा री तरफा जो नीं मोडगे, तां तुहां सारेयां बी येदीया इ मौती मरना तियां जे सै मरे थे। 4 तुहें तिन्हा ठारह माहुआं रे बारे च क्या सोचां ये, तिन्हा पर जे शीलोहाम लाके च पथरां री बणीरी सबनीं ते ऊची दवाल रुढ़ी कने सै तिसा हेठ दबोईने मरीग्ये; तां क्या सै यरुशलम च रैहणे औळयां चाते जादा पापी थे? 5 नहीं! पर हऊं तुहांने फेरी भीं बोलां भई जे तुहें अपणा मन नीं बदलगे, तां तुहां सारेयां बी तियां इ मरना।"

बिणा फळा रे दागले रे डाळा रा द्रष्टान्त

6 फेरी यीशुये इक उदाहरण देईने तिन्हाजो गलाया, "इक्की माहुये अपणे अंगुरां रे बगीचे च इक दागले रा डाळ लगाया; कने तिस पर फल लगे कि नीं लगे, येदा देखणे खातर सै मती बार तिथ्थी गया, पर तिस्सो किच्छ नी मिल्ल्या। 7 फेरी तिने बगीचे रे मालीये जो बोलया, "देख हऊं तिन्हां सालां ते इस डाळा पर फळ टोलदा आया पर अज्जा तक मिंजो इस डाळा पर इक बी फळ नीं मिलया! इस खातर इस्सो बड्डी दे। इने फालतू च जगह घेरीरी तिसते जे इसरीया जगह पर होर किछ लगाई सक्कूं।" 8 तिने मालीये जवाव दित्या, "मालक, 'इस डाळा जो इक साल होर मोका देई दे। हऊं इसरी खास देखभाल रखगा कने इसरी नन्दाई करीने इसजो मैल देंगा। 9 फेरी जे अगले साला तक इस डाळा पर दागले लगां ये तां ठीक आ, जे नीं लगेदे तां तुहें इस्सो बड्डी सक्कां ये।"

सब्द रे दिन कुबड़िया जनाना जो ठीक करना

10 इक विश्राम रे दिन यीशु इक प्रार्थना रे घरा च वचना रा प्रचार करी करां थे तिस बेले, 11 तिन्हे इक्की जनाना जो देखया तिसाजो जे बुरी आत्मे बमार करी तरा था। सै जनाना ठारहां सालां ते कुबड़ी थी, कने सीधी नीं खड़ी सकदी थी। 12 यीशुये ताहली जे सै देखी तां तिने तिसाजो अप्पुं ले सददी ने बोलया, "पुत्री, तू अपणीयां इसा बमारिया ते आजाद हुईगी!" 13 फेरी यीशुये तिसारे सिरा पर अपणे हाथ रखे, कने सै इकदम सीधी हुईगी कने परमेशरा रा गुणगान कने धन्यावाद करने लगी! 14 इस खातर तिस प्रार्थना रे घरा रा मुखिया यीशुये जो गुस्से हुईया भई यीशुये विश्रामा रे दिन तिसा जनाना जो रोगा ते ठीक कित्या था, सै लोकां जो गलाणे लम्या, "हफते च तुहां जो काम्म करने खातर छे दिन दितिरे, तां इन्हा ई दिनां च ठीक होणे खातर आई करा, पर विश्राम रे दिन नीं।" 15 पर येदा सुणीने प्रभुये जवाव दित्या, "कपटियो! क्या तुहां चाते सारे ई विश्राम रे दिन काम्म नीं करां ये! क्या तुहें इस दिन

अपणे बच्छुआं या गधे जो खुण्डा ते छड्डीने पाणी प्याणे नीं लेई जान्दे? 16 ये जनाना तां इब्राहिमा री धिय्यू ई तिसौं जे शैताने ठारहां सालां रे लम्बे बगता ते बन्हीने रखीरा था, क्या इसाजो तिसते छडवाणा विश्राम रे दिन जरूरी नीं था ?" 17 ताहली जे तिने येदा बोलया तां यीशुरा बरोध करने औळे सारे लोक शर्मिन्दा हुईये, कने सारी भीड़ तिसरे नोखे कम्मां जो देखीने खुशी मनाणे लगी।

राईया रे दाणे रा द्रष्टान्त

(मत्ती 13:31-32)

18 यीशुये बोलया, "परमेशरा रा राज्य किसरे बराबर आ ? हऊं इसरी तुलना किसने करूं? 19 परमेशरा रा राज्य बगीचे च बाईरे राईये रे इक दाणे रे बराबर आ; सै बधीने डाळ बणीजां, कने पंछी आईने तिसरीयां डाळियां पर रेळे लगा ये।"

मलेडे रा द्रष्टान्त

(मत्ती 13:33)

20 तिन्हे फेरी पूछया, "परमेशरा रा राज्य होर किसरे बराबर आ? तिसरी तुलना हऊं किसने करूं? 21 सै तिस मलेडे साई आ, तिसजो जे किसी जनाने पंद्रह सेर आटे च मेळया। ईयां त आटा मलेडे रे मुकाबले कई गुणा जादा था, पर तिने मलेडे तिस सारे आटे रा मलेडा ई बणाईत्या।"

तंग दरवाजा

(मत्ती 7:13, 14,21-23)

22 यीशु जिस बेले शहरां कने गाँवा च हुईने उपदेश देन्दे हुये यरुशलेम जो जाई रां था। 23 तां किन्हीये तिन्हाते पुछया, "प्रभु जी, क्या मुक्ति पाणे औळे थोडे जेई हाये ?" 24 यीशुये तिसजो जवाव दित्या, "स्वर्गा रा दरवाजा तंग आ। तिस अन्दर दाखल होणे खातर कोशिश करा, कांभई मते सारे हाये सै जे तिसच दाखल हुणा चाहें पर नीं हुई सकदे। 25 ताहली जे घरा रे मालका उठी ने सै दरवाजा बन्द करी देणा, तां मती देर हुई गरी हुणी, फेरी तुहां बाहर खडीने दरवाजा खडकान्दे हुये, कने गिडगिडान्दे हुये बोलणा, मालका, अहारे खातर दरवाजा खोल्ला! पर तिस अन्दरा ते जवाव देणा, 'हऊं तुहांजो नीं जाणदा।' 26 तुहां बोलणा, 'पर अहें त तुहां सौगी खादीरा पित्तीरा, कने तुहें अहांरी गलियां च प्रचार कितिरा।' 27 पर तिस तुहांने बोलणा, 'हऊं तुहांने बोलां, हऊं तुहांजो नीं जाणदा।' ओ बुरकरनयो, तुहें सब मेरते दूर चली जावा।' 28 जिस वगत तुहां अब्राहम, इसहाक, याकोब कने सारे भविष्यवक्त्यां जो परमेशरा रे राजा च देखणा फेरी तिथी तुहां रोणा कने दन्द कीरडने! पर तुहांजो उथीते बाहर कडी दित्या जाणा। 29 फेरी पूर्व-पश्चिम, कने उत्तर-दक्खणा ते लोकां आईने परमेशरा रे राजा री धाम्मा च शामिल हुणा। 30 इसा गल्ला पर गौर करा: इस संसारा रे लोकां रे जरिये तिन्हा लोकां री जे हुण बेजती किति जाई, तिन्हा जो परमेशरा रे राजा च आदर-मान दित्या जाणा; कने तिन्हारा जे इस संसारा च हुण आदर कित्या जां, तिन्हारा परमेशरा रे राजा च नरादर कित्या जाणा।

हेरोदेशा री शत्रुता

31 कुछ वगत गुजरने ते बाद यहूदि याजके आईने यीशुये जो गलाया, "जे तुहें जीणा चायें तां इथीते चली जावा, कांभई हेरोदेश अन्तिपास तुहांजो मरवाई देणा चाहं!" 32 यीशुये तिन्हाजो गलाया, "जाईने तिसा गिदडीया ने बोली दे भई हऊं आज कने कल बुरी आत्माओं जो नकाळां कने बमारां जो ठीक करां; कने तिजे दिन मांह अपणे मकसदा जो पूरा करना। 33 बस आज कल कने परसों मिंजो अपणे रस्ते चलणा जरूरी आ, कांभई हुई नी सकदा भई कोई भविष्यवक्ता यरुशलेम ते वाहर मारया जाये।

यरुशलेम रे खातर रोण-पिटण

(मत्ती 23:37-39)

34 "ओ यरुशलेम! ओ यरुशलेम! तू येदा नगर आ सै जे अपणे ई भविष्यवक्त्यां जो मारां, कने परमेशरा रा सन्देशा लौणे औळियां जो तू पत्थर मारां! जिस तरीके ने कुकडी अपणे बच्चयां जो अपणे फंगां हेठ ढक्की लेई, मैं बी कितणी बार चाहया भई तिस ई तरीके ने तेरे बच्चयां जो बी कड्डा करूं, पर तैं मिंजो येदा करने नीं दित्या। 35 कने हुण देखो, तुहांरा घर तुहांरे खातर उजड़ छडया जां, कने तुहें मिंजो ताहलूआं तक नीं देखी सकदे ताहलूआं तक जे तुहें येदा नीं गलादे, 'धन ओ सै, सै जे प्रभु रे नाँवा ते औंवा।'

फेरीसिये रे घरें यीशु

14 इक विश्राम रे दिन यीशु इक्की यहूदि याजका रे घरें रोटी खाणे खातर गये; सारेयां लोके यीशुये च कोई गलती टोलणे खातर तिन्हा पर नजर रखीरी थी। 2 तिसा जगह इक येदा माहू था तिसरे जे हाथ पैर सूजीरे थे। 3 यीशुये यहूदि याजकां कने शास्त्रीयां ते पूछया, "क्या कनून इसरी इजाजत देआं, भई विश्राम रे दिन लोकां जो ठीक करना चाहिन्दा?" 4 पर किन्हीये किछ नीं गलाया, फेरी यीशुये तिस बमार माहूये जो छूईने ठीक कित्या, कने भेजीत्या। 5 फेरी यीशुये लोकां खा मुडीने तिन्हाते पूछया, "तुहां चते कुण आ सै जे विश्राम रे दिन काम्म नीं करदा? जे तुहांरा मुण्डु या तुहांरी गाय किसी खड्डे च पैई जाओ तां क्या तुहें इकदम जाईने तिस्सो बाहर नीं कडदे?" 6 इस स्वाला रा तिन्हाले कोई जवाव नीं था।

नम्रता कने अतिथि सत्कार

7 ताहली जे यीशुये देखया भई सै जे परौळे धामा च शामिल हुणे आवें, सै कियां खास-खास जगह सम्भाली लें सै जे आदरा री जगह हुआई। फेरी यीशुये तिन्हाजो ये सच्चाई इक द्रष्टान्त देईने दस्सी: 8 "जे तुहें किसी ब्याह च न्युन्दा देईने सद्दीरे ओ, तां हर वगत खास-खास जगह पर बैठणे री कोशत नीं करयो। लोकां रिया नजरां च तिथी जे तुहांते बी जादा खास माहूये जो सद्दीरा ओ, तां फेरी क्या हुणा? 9 तां तिने जे तुहां जो नियुन्दा देईने सद्दीरा जे सै बोलगा, 'इसा जगह पर इन्हा जो बैठणे दे।' फेरी तुहांजो शर्मिन्दा हुईने उत्थीते उठणे पौणा, कने सबनीं ते घटिया जगह पर सै जे खाली हुणी, तिसा पर जाईने बैठणे पौणा! 10 इसरे बजाये तुहें येदा करा भई पैहले तेई सब्बीं ते छोटिया जगह पर जाईने बैठा। जिस वगत तुहांजो नियुन्दा देणे औळे देखणा, फेरी तिस तुहांले आईने गलाणा, 'मेरे दोस्त, अहांले तेरे खातर इसते बी खरी जगह ई।' तिस वगत दूजयां सारेयां मेहमानां रे सामणे तुहांरी इज्जत होणी। 11 कांभई सै जे कोई अप्पू जो बड्डा बणांगा तिस्सो छोटा कित्या जाणा, पर सै जे कोई अप्पू जो छोटा बणांगा, तिसरी इज्जत किति जाणी।"

12 फेरी यीशुये नियुन्दा देणे औळे जो गलाया, "ताहली जे तू दिना जो या राती जो कोई धाम रखो, तां अपणे मित्रां, भाईयां, रिश्तेदारां या फेरी अमीर पडेसियां जो नीं सदयां, कांभई बदले च तिन्हा तिजो धामा पर सद्दणा कने तेरा त्वाहर बदला हुई जाणा। 13 तां जे तू धाम करगा तां तू कंगालां, लंगडेयां, टूण्डयां कने अन्हयां जो सदयां। 14 फेरी तिजो आशीष मिलणी भई तैं येदे लोकां जो सद्दया सै जे तेरा त्वाहर बदला नीं करी सकदे। धर्मीयां रे ज्युन्दा होणे पर तिजो इस रा फळ मिलणा।

बड्डिया धामा रा द्रष्टान्त

(मत्ती 22:1-10)

15 येदा सुणी ने धामा खातर यीशुये सौगी बैठीरे इक माहणुये गलाया, "परमेशरा रे राजा रिया धामा च हिस्सेदार होणा ये कितणी आदरा री कने भागा री गल्ल हुणी! 16 फेरी यीशुये द्रष्टान्ता च जवाव दित्या, इक्की माहूये बड्डी धाम रखी, कने मतेयां लोकां जो नियुन्दा देईने सदया। 17 ताहली जे सारी चीजां बणीने तैयार हुईगी यां, फेरी तिने अपणे नोकरा जो अपणे मेहमानां ला जो येदा दसणे भेजया भई आवा हुण खाणा तैयार आ। 18 पर सारे बहाना बनाणे लगे। तिन्हां चते इक्की बोलया 'भाई, मैं त हुण ई इक खेत खरीदया

कने हऊं तिस्सो देखणे खातर जाई करां, किरपा करीने मिंजो माफ करी देआं।' इस खातर मेरते नीं आई हुणा।¹⁹ दूजे बोलया, 'मैं हुण पांज्र जोडियां बळदां री खरीदी कने मांज तिन्हारी देख-सुण करने जाणा, इस खातर मेरते नीं आई हुणा। किरपा करीने मिंजो माफ करी देआं।'²⁰ इक्की होरी बोलया, 'मेरा नवा-नवां ब्याह हुईरा इस खातर मेरते नीं आई हुणा।'²¹ सै नोकर मुडीने अपणे मालका ले आया कने सै जे किछ लोके बोलया था सै सारी गल्लां तिसजो दस्सी। तिने मालके गुस्से च आईने बोलया, 'नगरा रे बजारां कने गलियां च इकदम जाईने गरीबा, टुण्डयां, लंगडयां कने अन्हयां जो सद्दीने लीओ।'²² तिसते बाद तिसरे नोकरे तियां ई कित्या। फेरी तिने आईने मालका ने गलाया, 'अहांले होर बी लोकां रे खातर जगह ई।'²³ तां मालके तिस्सो गलाया, 'सडकां पर कने खेतां री बीडां तक जा कने तिथि सै जे कोई तिजो दिक्खो, तिन्हा लोकां ने औणे खातर विनती कर, तिसते जे मेरा घर भरी जाओ।'²⁴ तिन्हांजो जे मैं पैहले नियुन्दा देईने सद्दीरा था, तिन्हारे खातर इस खाणे चते किछ बी चखणे जो नीं मिलणा, सै जे मैं बणाईरा।"

चेला बणने रा मुल (मत्ती 10:37,38)

²⁵ यीशुये सौगी लोकां री मती भीड चलीरी थी, सै तिन्हारी तरफ मुडया कने बोलया, ²⁶ "जे कोई मेरा चेला बणीने मेरे पीछे औणा चाहो, तां तिस्सो अपणे माता-पिता, जनाना कने बच्चां, भाई कने बैहणां, कने अपणे प्राणा ते बी जादा मांहे प्यार करने पौणा। नैईता, तुहें मेरे चेले नीं बणी सकदे।²⁷ जे तुहें अपना क्रूस चक्कीने मेरे पिछे नीं चलदे, तां मेरे चेले नीं बणी सकदे।

²⁸ पर तदुआं तक जे तुहें इसरा मुल नीं जाणी लो, ताहलियां तक मेरे पिछे नीं औणा। कांभई येदा कुण आ सै जे खर्चे रा अन्दाजा लगाये बगैर मकान बनाणा शुरु करी दो, कने बाद बिच देखणे लगगा भई खर्च करने खातर इतणा पैसा हाया की नीं? ²⁹ नैत सिर्फ नियुंआं रे भरने तक ई तुहांरा सारा पैसा खत्म हुई जाणा। फेरी तजे मकाना रा कम्म पूरा नीं होणा तां देखीने सारयां लोकां तुहांरा मजाक बनाणा! ³⁰ तिन्हां बोलणा, 'ये माहु मकान त लगया था बनाणे, पर पूरा नीं करी सकक्या!' ³¹ येदा कोई राजा हाया, सै जे अपणे सलाहकारां ने गल्ल बात किते बगैर लडाईया पर जाणे रे बारे च सोचे? क्या तिसरी दस हजार सपाईयां री सेना, तिन्हां पर हमला करने औळी बिह हजार सपाईयां री सेना ते ताकतबर हाई की नीं, इसा गल्ला जो जाणे बगैर सै लडाईया पर जांगा क्या? ³² जे सै लडाई नीं करी सकदा, तां तदुआं तक जे दुश्मणा री सेना तिसते दूर ई, तिस लडाई रोकणे री शर्ता पर बचार करने खातर अपणे शान्ति दूत भेजणे। ³³ तियां ई तदुआं तक जे कोई अपना सब किछ छडी नीं देओ, तालुआं तक सै मेरा चेला नीं बणी सकदा।

कस्वादला लूण (मत्ती 5:13; मरकुस 9:50)

³⁴ लूण त स्वादा खातर ठीक आ। पर जे लूण ई अपना स्वाद छडी दो, तां सै किसा चीजा ने नमकीन कित्या जाणा? ³⁵ बिणा स्वादा ते लूण न त जमीना खातर कम्म देआं न ई खादा खातर कम्मा औवां। तिस्सो सट्टी दित्या जां। सै जे कोई सुणने खातर तैयार आ, सै सुणी लो कने समझी लो!"

गवाच्छी रिया भेडा रा द्रष्टान्त (मत्ती 18:12-14)

15 यीशु ताहली जे उपदेश देआं थे तां चुंगी लेणे औळे कने होर पापी लोक तिन्हारी गल्लां जो सुणने खातर तिन्हाले आई करां थे।
² इसजो देखीने यहूदि याजक कने शास्त्री बडबडाणे लगे, "येह माहु त पापी कने घटिया लोकां सौगी उठां बैठां कने तिन्हां सौगी रोटी बी खां!"

³ फेरी यीशुये तिन्हांजो ये द्रष्टान्त सणवाया: ⁴ "जे तुहां चते किसी ले सौ भेडां ओ, कने तिन्हां च ते इक बाट भूळीने गवाच्छी जाओ, तां तिस रखवाले क्या करना? क्या तिस बाकी नडिहनुये भेडां जो जंगला च छडी ने, तिसा गवाच्छी रिया भेडा जो तदुआं तक टोलदे नीं रैहणा? तदुआं तक जे सै तिसजो मिली नीं जाओ।⁵ ताहली जे सै भेड तिस्सो मिली जाणी तां, तिस

खुश हुईने तिसाजो अपणे मुन्डे पर चक्कीने लेई औणा, ⁶ कने घरे आईने तिस अपणे मित्रां कने पडेसियां जो बोलणा 'मेरे सौगी नन्द मनावा, कांभई मिंजो मेरी गवाच्छी री भेड मिली गरी!' ⁷ इयांइ, ताहली जे कोई इक पापी माहु, परमेशरा री ओर मुडीने औवां तां स्वर्गा च स्वर्गदूत इतणी खुशी मनार्ये जितणी जे भई तिन्हां नडिनवे लोकां खातर नीं हुन्दी सै जे धर्मी ये, तिन्हाजो जे मन फिराणे री जरूरत नीं।"

गवाच्छी रे सिक्के रा द्रष्टान्त

⁸ मन्त्रया भई किसी जनाना ले दस चान्दीया रे सिक्के ओ, कने तिन्हा चते जे इक गवाच्छी जाओ, तां क्या तिसा द्यूआ बालीने कने सूण देई-देई ने, तदुआं तक तिस सिक्के जो अपणे घरा रिया हर इक कुणियां च नीं टोळदिया रैहणा तदुआं तक जे सै तिसा जो मिली नीं जाओ? ⁹ ताहली जे सै सिक्का तिसा जो मिली जां, तां तिसा अपनी सहेलियां कने पडेसियां जो सद्दीने बोलणा, 'मेरे सौगी आईने खुशी मनावा कांभई मिंजो मेरा गवाच्छी रा सिक्का मिली आ!' ¹⁰ इस ई तरीके ने, जे इक पापी बी अपणे पापां जो छडीने पश्चाताप करी लेआं तां स्वर्गा च परमेशरा रे स्वर्गदूतां रे सामणे तिसरे खातर खुशी मनाई जाई।"

उडाऊ पुत्रा रा द्रष्टान्त

¹¹ यीशुये तिन्हांजो येह द्रष्टान्त बी सणवाया, "किसी माहुये रे दो मुन्डु थे। ¹² तिन्हां चते छोटे मुन्डुये पिते ने बोलया, 'पिता ! तुहांरी जायदाता च सै जे मेरा हिस्सा बणां सै मिंजो दे।' फेरी तिसरा पिता अपणे दुई मुन्डुआ च अपनी जायदात बन्डी देआं। ¹³ किछ दिनां ते बाद, तिने छोटे मुन्डुये अपना सारा समान बन्हील्या कने किती दूर देशा जो चलीया, कने तिसा जगह बुरे कम्मा च फसीने तिने अपना सारा पैसा गवाईल्या। ¹⁴ ताहली जे सै अपना सारा पैसा खर्च करीने खाली हुईया, तां फेरी तिस देशा च नकाळ पया, कने सै कंगाळ हुईने भुक्खा मरने लग्या। ¹⁵ फेरी सै काम्म टोळणे खातर तिस देशा रे इक्की करसाणा ले गया कने तिसने विनती किती भई सै अपणे सूरां जो चराणे खातर मिंजो रखी लो, तिने करसाणे सै रखील्या कने सूरां जो चराणे खातर भेजील्या। ¹⁶ तिस्सो इतणी जादा भूख लगीरी थी भई तिन्हां फळियां जे सूर खां थे सै तिन्हाजो खाईने अपना पेट भरना चाह था, पर तिन्हां चते बी तिस्सो किछ नीं मिलदा था। ¹⁷ ताहली जे सै अपणे होशा च आया, तां सै अपणे मना च सोचणे लगया, 'मेरे पिते रे घरे इतणे जादा मजदूर ये तिन्हांजो जे खाणे जो इतणी जादा रोटी मिलां ई भई सै खाई ने बी नीं मुकदी ! कने इथी मेरे इतणे बुरे हाल ये भई हऊं भूखा मरने लगीरा! ¹⁸ मांह अपणे पिते रे घरे जाणा कने तिन्हाजो गलाणा, 'पिता जी, मैं परमेशरा रे कने तेरे बरोधा च पाप कितिरा, ¹⁹ हुण हऊं तुहांरा मुण्डु बोलणे रे लायक त नीं आ, पर मेहवानी करीने मिंजो अपना इक मजदूर समझीने रखी लै।

²⁰ फेरी सै तिस देशा ते मुडीने वापस अपणे पिते रे घरे आया, कने ताहली जे सै हलित्ये अपणे घरा ते दूर ई था, तिसरे पिते सै औन्दा देखील्या, कने तिस पर तरस खाईने तिस खा जो दौडीने गया कने तिस्सो जप्पी पाई ने बडा प्यार कित्या। ²¹ तिने मुन्डुये पिते ने बोलया, 'पिता जी, मैं परमेशरा रे कने तेरे बरोधा च पाप कित्या, कने हुण हऊं तेरा मुन्डु कहलाणे रे लायक नीं आ।' ²² पर तिसरे पिते अपणे नोकरा जो हुक्म दित्या, 'छोडचा ने घरे जाईने सारेयां ते बधिया कपडे लेईने आवा कने इसजो पैहनाओ। इसरे हत्था च गूठी कने पैरां च जूते पैहनावा। ²³ कने अपना पाळीरा मोटा जेआ बकरा लाई ने बड्वा कने आवा तिस्सो खाई ने खुशियां मनावा, ²⁴ कांभई मेरा ये मुन्डु मरीअरा था कने हुण तियां जे फेरी ते ज्यून्दा हुईया। ये गवाच्छी अरा था, पर हुण मिलीगारा।' कने सै नन्द करने लगे।

²⁵ इस दौरान, तिसरा बड्वा मुन्डु खेतां च काम्म करी रां था। ताहली जे सै घरे वापस आया, तां तिने गाणे बजाणे कने नचणे री अवाज सुणी। ²⁶ तिने अपणे इक नोकरा ते पूछया 'येह क्या हुई करां?' ²⁷ फेरी तिस्सो दस्या भई, 'तेरा भाई वापस आईअरा कने तेरे पिते बड्डी धाम बनाणे खातर अपना पाळीरा बड्वा तगडा बकरा बड्डीरा। अहे नन्द मनाई रांये, कांभई सै ठीक ठाक वापस आईया।' ²⁸ येदा सुणीने बड्वा भाई बडा भारी गुस्से हुया, कने तिस

रिया वजह ने सै घरा रे अन्दर नीं गया। फेरी तिसरा पिता बाहर आईने तिस्रो अन्दर औणे खातर मनाणे लगया, 29 पर तिने अपणे पिते जो जवाव दित्या, 'इतणे सालां तक हऊं तुहांरी सेवा करदा रेआ, कने तुहें सै किछ जे मिंजो करने जो बोलया मैं सै हर इक काम्म कित्या। पर तुहें अज्जा तक मिंजो मेरे मित्रां सौगी मौज करने खातर इक बकरीया रा बच्चा तक नीं दित्या। 30 पर तां जे तुहांरा ये मुन्दु अपणा सारा पैसा कंजरियां जनानां पर लुटाईने वापस आईरा, तां तुहें सबी ते खरे कने तगडे बकरे जो बड्डी ने खुशियां मनाई रांये।' 31 तिसरे पिते तिसजो बोलया, 'मेरे पुत, हऊं कने तू सौगी रेआ ये, कने सै जे किछ मेरले आ, सै सारा तेरा ई त हाया। 32 अहां ये खुशीया रा दिन मनाणा। कांभई तेरा ये भाई सै जे मरीगरा था सै दुवारा ज्युन्दा हुईया। सै गवाच्छी गरा था, पर हुण सै मिलीया।'

चलाक भण्डारी

16 यीशुये अपणे चेलयां जो ये कहाणी सणवाई, "इक्की सेठे अपणे कारोबारा री देखभाळा खातर इक भण्डारीये जो रखया। पर बडे ई छोडे तिस पर ये इल्जाम लगीया भई सै अपणे मालका रे सारे पैसयां जो डवाणे लगीरा। 2 इस खातर तिसरे मालके सै सदया कने तिस्रो गलाया 'हऊं ये क्या सुणी करां भई तू मेरे सारे पैसयां जो पाणीये साई बहाया रां ? येदा तू अपणे भण्डारी हुणे रा हिसाब-कताब दे, कांभई तिजो हुण मांह भण्डारी नीं रखणा।' 3 भण्डारीये अपणे मना च सोचया: 'हुण मेरा क्या हुणा? मेरी त इथी ते छुट्टी हुईगी। कने मांह च इतणी ताकत नीं भई हऊं खड्डे खुणी सकूं। कने भीख मंगणे ते मिंजो शर्म लगणी। 4 मेरले इक तरकीव ई तिसरे मुताबिक जे हऊं करूं तां फेरी ताहली जे हऊं इस भण्डारीपना री नोकरिया ते कड्डी देणा तां लोक अपणे घरां च मेरा आदर करो।' 5 इस खातर तिने तिस हर इक माहुये जो सदया तिन्हेजे तिसरे मालका ते कर्जा लेईरा था, ताकि तिन्हा सौगी तिस बारे च बचार करी सक्रो। भण्डारीये पैहले कर्जदारा ते पूछया 'मालका ते तै कितणा कर्जा लेईरा?' 6 तिने जवाव दित्या, 'माह पर जैतून रे तेल रा सौ मणा रा कर्ज आ।' फेरी भण्डारीये तिस्रो गलाया, 'तिसा पर्चीया जो फाडी दे कने तिसरीया जगह पंजाह मणा री पर्ची बणाई ले।' 7 फेरी भण्डारिये दूजे कर्जदारा ते पूछया, 'तै मेरे मालका ते कितणा कर्ज लेईरा ?' तिने जवाव दित्या 'सौ मण कणका। फेरी तिने भण्डारिये बोलया, 'ये ले तेरी पर्ची कने तू इसरे बदले अस्सी मण री पर्ची बणाई ले।'

8 सेठे तिस बेईमान भण्डारिये री तारीफ कीति कांभई तिने चलाकीया ने कम्म कित्या। "फेरी यीशुये बोलया, "ये सच्ची गल्ल ई भई इस संसारा रे लोक सै जे परमेशरा जो नीं मनदे, सै सांसारिक गल्लां च धर्मी लोकां ते जादा चलाक ये। 9 हऊं तुहांने बोलां भई इस संसारा रे साधनां रा इस्तेमाल करीने दूजयां जो अपने मित्र बणावा, तिसते जे सांसारिक साधनां रे खत्म हुणे पर तुहांरा स्वर्गा रे अनन्त काल निवासां च बडीया खुशिया ने स्वागत हुणा। 10 ताहली जे तुहां छोटी ते छोटी गल्लां च भरोसे रे लायक रैहणा, तांई तुहें बड्डीयां गल्लां च बी भरोसे लायक हुई सक्कां ये। जे तुहें छोटी गल्लां च धोकेवाजी करगे, तां तुहां बड्डीया जिम्मेवारिया च बी ईमानदार नीं हुई सकदे। 11 कने जे तुहें संसारा रिया दौलता रे बारे चई भरोसे लायक नीं हुये तां स्वर्गा री सच्ची दौलत तुहांजो किस देणी? 12 कने जे तुसं दूजयां री दौलता सौगी विश्वास लायक नीं ये, तां तुहां पर तुंहारी अपणिया ई धन-दौलता रे बारे च कियां भरोसा कित्या जाई सक्कां ?

13 कोई बी माहु दुई मालकां री सेवा नीं करी सकदा। कांभई तुहां इक्की ने नफरत करनी, कने दूजे ने प्यार रखणा, या किसी इक्की ने ईमानदार रेहगे, कने दूजे जो तुकरांगे। तुहें परमेशर कने धना री सेवा कहे नीं करी सकदे।"

यीशुये रे किछ उपदेश

(मत्ती 11:12,13;5:31,32; मरकुस 10:11,12)

14 यहूदी याजक, सै जे दौलता ने बडा जादा प्यार करां थे, यीशुये री इन्हां गल्लां रा मजाक डवाणे लगे। 15 फेरी यीशुये तिन्हाने बोलया, "लोकां रे सामणे त तुहें बडे भले माणस दिखणा चाहें, पर परमेशर तुंहारे कपटी मनां जो जाणां

ये। ये संसार तिसा गल्ला रा जे आदर करां, सै परमेशरा रिया नजरां च नफरत करने लायक गल्ल ई।

16 तदुआं तक जे बपतिस्मा देणे औळे यूहन्ने प्रचार करना शुरु नीं कित्या था, तदुआं तक मूसे रे दीतिरे कायदे कनून कने भविष्यवक्त्या रे संदेशे रस्ता दर्स्सां थे। हुण परमेशरा रे राजा री खुशखवरिया रा प्रचार कित्या जां, कने परमेशरा रे राजा च दाखल हुणे औळ्यां री उतावली भीड दौडीने चली आवां ई। 17 पर इसरा मतलब ये नीं होन्दा भई कनूना रा महत्व खत्म हुई गरा, कनूना री छोटी जेईया गल्ला टळणे री बजाये स्वर्ग कने जमीना रा टलणा सान आ।

18 कोई बी माहु जे अपणीया जनाना जो छड्डीने किसी होर जनाना ने ब्याह करी लेआं, तां सै व्याभिचार (पाप) करां, कने सै जे कोई तलाक दितीरिया ने ब्याह करां, सै बी व्याभिचार करां।"

अमीर माहु कने गरीब लाजर

19 यीशुये फेरी भीं ते ये द्रष्टान्त दित्या, "इक अमीर माहु था सै जे बडे बांके कने बडे मंहगे कपडे पैहनीने हर रोज मौज मस्तिया ने जिन्दगी रा मजा लेआं था। 20 लाजर नाँवा रा इक कंगाळ तिसरा शरीर जे फोडयां ने फळीरा हुआं लोक तिस्रो अमीरा रे दरवाजे च छड्डी जां थे। 21 भूखा रा मारी रा लाजर चांह था, भई अमीरा रे रोटी खान्दे बगत जमीना पर पैरे तिसरे जुडे रोटिया रे किरुआं ने हऊं अपणा पेट भरूं; येथी तक भई कुत्ते बी आईने तिसरे जख्मां जो चट्टी जां थे। 22 बाद बिच, येदा हुआं भई लाजर मरी जां कने स्वर्गदूतें तिसरीया आत्मा जो लेईने अब्राहमा रिया गोदा च पज्रवाया। फेरी इक दिन सै अमीर माहु बी मरया; कने दबाई दित्या जां। 23 कने तिसरी आत्मा नरक च चली ई। तिथि पीडा च तडफदे हुये ताहली जे तिने दूर इक्की जगह लाजरा जो अब्राहम रे सौगी देखया। 24 तां तिने अमीर माहुये जोरा ने हाक पाई, 'पिता अब्राहम, दया करीने लाजरा जो मेरले भेज्जी दे, ताकि सै अपणिया ऊंगलिया जो पाणीये च सेडीने मेरिया जिभा जो ठण्डा करी सक्रो, कांभई हऊं इन्हां अंगी रियां लपटां च फुकरवीने तडफणे लगीरा।" 25 पर अब्राहमे तिसजो गलाया, 'मेरे पुत्र, याद कर, भई तू अपणी पूरी जिन्दगिया च खरी चीजां लैई चुक्कीरा, कने तियां ई लाजर बुरियां चीजां: पर हुण सै इथी सुख शान्तिया चा कने तू दुःख सही करां। 26 कने इन सारी गल्लां जो छड्डु अहारे कने तुहांरे बिच इक बड्डी कने डुग्धी खाई बणीरी भई सै जे कोई येथी ते उस पार तुहांले जाणा चाहो, सै जाई नीं सक्रो, कने न कोई ओथी ते इस पार अहांले आई सक्रो।' 27 अमीर माहुये जवाव दित्या, 'तां पिता अब्राहम, हऊं तेरेते बिनती करां, भई मेहरवानी करीने तू लाजरा जो मेरे पिते रे घरें भेज। 28 कांभई मेरे पांज भाई ये, सै उथी जाईने तिन्हारे सामणे इन्हां गल्लां री गवाही देओ, येदा नीं ओह भई सै बी इसा पीडा रिया जगह च आओ।' 29 पर अब्राहमे तिसजो बोलया, 'तिन्हाले त मूसा कने भविष्यवक्त्यां री कतावां ईयां, सै तिन्हारी सुणो।' 30 तिने बोलया, 'नां; पिता अब्राहम! पर जे कोई मरीरेआं चा ते तिन्हारे सामणे जाईने गल्ल करो तां तिन्हा अपणा मन फेरी लेणा।' 31 पर अब्राहमे तिसजो गलाया, 'भई तां जे सै मूसा कने नबियां री नीं सुणदे, तां जे मरीरेआं चा ते कोई ज्युन्दा हुई जाओ, तां बी तिन्हा तिस पर विश्वास नीं करना।'

ठोकरा री बजह बणना

(मत्ती 18:6,7,21,22; मरकुस 9:41)

17 फेरी इक दिन यीशुये अपणे चेलयां जो बोलया, "इस संसारा रे लोकां री पापां च फसीने मतेहान त होन्दे ई रैहणे। पर, लाणत ई तिन्हाजो, सै जे तिन्हाजो येदे मतेहाना च फसाये। 2 जे कोई माहु चाहे बडा खास बी नीं हो पर सै मांह पर विश्वास करदा हो कने तिस विश्वासिये रे खातर अगर जे कोई पापा रा कारण बणां तां परमेशरा तिसजो इसते बी खतरनाक सजा देणी, जितणी सजा जे माहुये रे गळा च घराटा रा बट्ट बन्ही ने तिसजो समुद्रा च सट्टीने नीं मिली सकदी। 3 हऊं तुहां जो खबरदार करां: जे तेरा भाई पाप करो, तां तिस्रो समझा; कने जे सै अपणे बुरे कम्मां ते मुडी ने पछतावा करी लो तां तिस्रो माफ करा। 4 जे दिना च सै सात्त बार तेरे

खलाफ पाप करो कने सात बार ई आईने तेरते माफी मंग्गो, तां तिस्सो माफ करी दो।

बिश्वास

5 प्रेरितें प्रभु जो गलाया, "अहांजो अपणा विश्वास पक्का करने री जरूरत ई, इस खातर मेहरवानी करीने अहांजो दस्सा भई अहें अपणा विश्वास कियों बधाईये?" 6 यीशुये जवाव दित्या, "अगर तुहांरा विश्वास राईया रे दाणे रे बराबर बी होन्दा, तां तुहें इस तूता रे डाळा जो बोलदे, 'तू जड़ां ते पटोईने समुद्रा च लगी जा, 'तां सैं बी तुहांरा हुक्म मन्त्री लेंदा!

इक दास्सा रा फर्ज

7 मन्त्रया ताहली जे कोई नोकर खेता ते हल बाही कने या भेड़ां जो चगुआईने आवां, तां क्या तिसरा मालक तिसजो गलांगा भई छोड़चा ने आईने रोटी खाणे बैठ ? 8 कने येदा नीं बोल्लो, भई पैहले मेरे खातर रोटी बणाईने तैयार कर: कने तदुआं तक जे हऊं रज्जिने नीं खाऊं-पीऊं तदुआं तक लक्क बन्ही ने मेरे खातर रोटी परोस कने पाणी रख। इसते बाद तू बी खाई पी लै? 9 अपणा हुक्म पूरा करने पर क्या मालक तिस नोकरा रा धन्यावाद करगा। 10 इस तरीके ने, ताहली जे तुहें मेरे हुक्मा रा पालन करां ये, तां तुहें येदा बोलयां, 'अहें इस लायक नीं ये भई अहांजो ईज्जत मान मिलो, अहें त सिधे-साधे माह्ये सैं जे सिर्फ अपणे फर्जा जो नभाई करां ये।

दस कोढ़ियां जो चंगा करना

11 यीशु अपणे चेलयां सौगी यरुशलैम शहरा री तरफ चलदे गये, कने गलील कने सामरिया प्रदेशा रे बन्ने रे नेडे पूज्जीगे। 12 तियां जे सैं इक्की गाँवा क दाखल हुये, तां तिन्हां ते थोड़े जे फासले पर दस कोढ़ी तिन्हांजो खढ़ीने निहाळी रां थे, 13 तिन्हें जोरा ने हाक्क पाई, "गुरु जी! यीशु, अहांरे मालक! अहां पर रहम कर!" 14 यीशुये तिन्हां खा देखया कने बोलया, "जावा; कने जाईने अप्पू जो याजकां ले दस्सा।" इकदम जान्दे-जान्दे बाटा ची सैं अपणे कोढ़ा ते विल्कुल ठीक हुईये! 15 ताहली जे तिन्हां चा ते इक्की कोढ़ीये देखया भई सैं चंगा हुईया, तां सैं मुडीने जोरा रिया अवाजा च ये बोलदे हुये यीशुये ले आया, "हऊं ठीक हुईया! परमेशरा री बडयाई ओ!" 16 सैं मुंहा रे भार यीशुये रे पैरां च पैईने धन्यावाद करने लगया। सैं इक सामरी माह्ये था। 17 फेरी यीशुये तिसते पूछया, "क्या मैं दस माह्ये जो नीं ठीक कितीरा? बाकी नौ माह्ये किति ये ? 18 क्या परमेशरा जो धन्यावाद देणे खातर सिर्फ तू ई परदेशी मुडीने आया? 19 यीशुये तिस माह्ये जो गलाया, "येब्बां उठ, कने चलीजा, तेरा सैं जे विश्वास आ, तिने ई विश्वासे तू चंगा कित्या!"

परमेशरा रा राज औणा (मत्ती 24:23-28, 37-41)

20 ताहली जे यहूदी याजकें यीशुये ते पूछया भई परमेशरा रा राज कर्दी औणा, तां तिने तिन्हां जो जवाव दित्या, "परमेशरा रा राज इस रूपा च नीं औन्दा भई सैं तुहांजो दिक्खी जाओ। 21 कने लोकां येदा नीं बोलणा, 'देखा, सैं येथी आ! या 'देखा सैं ऊथी आ!' कांभई परमेशरा रा राज तुहांरे अन्दर ई हाया।"

22 इस बारे च तिन्हे अपणे चेलयां ने गल्ल बात कीति, कने तिन्हांजो बोलया, "येदा वगत औणा ताहली जे तुहां माह्ये रे पुत्रा रे दिनां चा ते इक दिना जो देखणे खातर तरसणा, पर तिस्सो देखी नी पाणा। 23 फेरी लोकां तुहांने गलाणा, भई माह्ये आ रा पुत्र वापस आईया! 'देख्या, सैं ऊथी आ! या 'देख्या, येथी आ।' तुहां येदीयां गल्लां पर विश्वास नीं करना, कने नाई तिस्सो टोळणे रे खातर तिसरे पिछे जाणा। 24 कांभई तिस वगत जे माह्ये रे पुत्रा अपणिया समर्था सौगी वापस औणा, तां तुहां ये गल्ल जाणी लेणी। कांभई ये घटना उतणी ई स्पष्ट होणी, तियां जे बिज्जळ चमकी ने इक कोणे ते दूजे कोणे तक अम्बरा जो चमकाई देई। 25 पर इसते पहले माह्ये रे पुत्रा जो बड़ा जुल्म सैहणे पौणा, कने इसा पीढीया रे लोकां तिस्सो घटिया समझी ने तिसजो ठुकराई देणा। 26 ताहली जे माह्ये रे पुत्रा वापस औणा, तां लोकां रा जीवन

तेदा ई होणा तेदा जे नूह रे जमाने च हुया था। 27 तिन्हां दिनां च, जलप्रलय औणे ते पैहले, नूह रे जहाजा च बैठणे तक, लोक खां-पीं थे, कने तिन्हा च ब्याह-शादियां हुआं थी; फेरी बड़ा भारी जलप्रलय हुया तिसते जे सारी माह्ये जातिया रा खात्मा हुईया। 28 कने तियां जे लूत रे जमाने च हुया था, भई लोक खान्दे पिन्दे, लेण देण करदे, खेती करदे कने घर बणां थे; 29 पर तिस दिन जे लूत सदोम नगरा जो छड़ी ने चलीप्या तिस ई दिन अम्बरा ते आग कने गन्धका री बरखा बरही तिसते जे सबनीं रा खात्मा हुईया। 30 तियां ई तिस वगत जे माह्ये रे पुत्रा वापस औणा, तिस बेले बी इयां इ होणा कने लोकां जो अपणे कम्मा ते बेहल नीं हुणी।

31 तिस दिन जे कोई माह्ये घरा रिया छत्ता पर ओ; कने तिसरा समान कमरे च ओ, सैं तिसजो लेणे जो नीं उतरो, कने तियां ई सैं जे कोई खेता च ओ सैं हटि ने वापस नीं आओ। 32 याद करा भई लूता री जनाना सौगी क्या हुआ था। 33 सैं जे कोई अपणे प्राणा जो बचाणा चाहगा, सैं तिसजो अपणा प्राण ग्वाणे ई पौणा, कने सैं जे कोई अपणा प्राण परमेशरा खातर गवान्ना तिसरे प्राणा री हिफाजत परमेशरा अप्पू करनी। 34 हऊं तुहांजो बोलां, तिसा राती दो लोक सैं जे इक्की मंजे पर सुतीरे होणे, तिन्हां चाते इक परमेशरा लेई जाणा कने दूजा उथी छड़ी दित्या जाणा। 35 दो जनानां कड़ीयां चकोदूये पर किछ पीळे लगी रियां हुणी, इक ऊथी रेई जाणी कने दूज्जी परमेशरा लेई जाणी। 36 तियां ई दो माह्ये खेतां च कम्मा लगीरे होणे तिन्हा चाते इक परमेशरा लेई जाणा कने दूज्जा छड़ी जाणा। 37 येदा सुणी ने चेलयां यीशुये ते पूछया, "प्रभु जी, ये किती होणा?" यीशुये तिन्हाजो जवाव दित्या, "तियां जे ईलां रे कड्या होणे ते पता चलां भई किति नेडे ई मूर्ईरा पशु पैईरा, तियां ई इन्हां चिन्हा ते अहांजो पता लगणा भई न्याय री सैं घड़ी नेडे आईगी।"

अधर्मी जज कने बिधवा रा द्रष्टान्त

18 यीशुये अपने चेलयां जो इस बारे च दस्सया भई अहांजो हर बगत प्रार्थना करने री जरूरत ई कने निराशा च पैईने हिम्मत नीं हारनी चाहिन्दी, फेरी तिन्हांजो येह द्रष्टान्त बोलया: 2 किसी नगरा च इक जज हुआ था, सैं नां त परमेशरा ते उरां था कने नाई किसी माह्ये री परवाह करां था। 3 तिस नगरा च इक विधवा बी रैयां थी: सैं जे तिसले आईने बार-बार तिसजो बोलदी रेआं थी, भई 'मेरा दुश्मण तिने जे मेरने बेन्याई करीने मेरा नुक्सान कित्या, तिस माह्ये ते मिंजो न्याय मिलणा ई चाहिन्दा!' 4 तिने जज मतेयां दिनां तक तिसा विधवा रिया गल्ला री परवाह नीं किति, पर बाद बिच तिने मना च बिचार करीने बोलया, हऊं नां त परमेशरा ते उरां, कने नां ई माह्ये री कोई परवाह करां। 5 तां बी ये विधवा मिंजो तंग करदी रेआई, इस खातर मांहा तिसारा न्याय करी देणा किति येदा नीं ओ भई सैं घड़ी-घड़ी आईने मेरे नक्का च दम करी दो।"

6 प्रभुये गलाया, "इस दुष्ट जज्जा ते सबक सिखवा तिसरा जे कोई गुर पीर नीं आ। 7 तां क्या तुहांजो लगां भई परमेशरा अपणे चुणीरे लोकां रा ठीक न्याय नीं करना, सैं जे दिन रात परमेशरा ते विनती करदे रैं? क्या तिस तिन्हारे बारे च देर करनी? 8 हऊं तुहां ने बोलां; तिस इकदम तिन्हा रा न्याय करना! पर ताहली जे हऊं, माह्ये रा पुत्र मुडीने औंगा, तां क्या सैं धरतिया पर आईने विश्वास पाई लेंगा?"

फरीसी कने चुंगी लेणे औळे रा द्रष्टान्त

9 तिने तिन्हाते सैं जे खुद अप्पू पर धर्मी होणे रा भरोसा करां थे, कने होरनीं जो घटिया समझां थे, येह द्रष्टान्त सणवाया: 10 भई "इक बार दो माह्ये मन्दरा च प्रार्थना करने खातर गये। इक यहूदी याजक था कने दुज्जा चुंगी लेणे औळा था। 11 यहूदी याजक खड़ीने अपणे मना च इयां प्रार्थना करने लगया, भई परमेशर, हऊं तेरा धन्यावाद करां, कांभई हऊं दूज्जां लोकां साई अन्धेर करने औळा चोर, ठग कने पापी, नीं आ, खासकर इस चुंगी लेणे औळे साई, सैं जे उथी खढ़ीरा! मैं कर्दी किसी जो धोखा नीं दित्या, हऊं पाप नीं करदा, कने ना हऊं ब्याभिचार करां, 12 हऊं हफते च दो बार ब्रत रखां, कने अपणी सारी कमाईया रा दसवां हिस्सा बी देआं।"

13 पर तिने चुंगी लेणे औळे माह्ये दूर खडीने, स्वर्गा खा जो नजर करीने देखणा बी नीं चाह्या बजाय इसरे, सै अपणी छात्तिया पिटदे-पिटदे बडा दुकखी हुईने बोलणे लगया, 'हे परमेशर, माह पर दया कर, कांभई हऊं पापी आ। 14 हऊं तुहांने बोल्लां, भई सै दूजा नीं; पर येई पापी माह्ये परमेशरा रे सामणे धर्मी ठैईरया, कने अपणे घरा जो वापस गया; पर फरीसिये सौगी येदा नीं हुया, कांभई सै जे कोई अप्पू जो बड्डा समझां, सै छोटा कित्या जाणा, पर सै जे कोई अप्पू जो छोटा बणांगा, सै बड्डा कित्या जाणा।"

बालकां जो आशीष

(मत्ती 19:13-15; मरकुस 10:13-16)

15 इक दिन किछ माता पिता अपणेयां बच्चयां जो लेईने यीशुये ले औणे लगे, ताकि सै तिन्हा पर हत्थ रखीने शीष देओ। पर यीशुये रे चेलयां देकखीने तिन्हा जो डांटया। 16 फेरी यीशुये तिन्हा बच्चयां जो अप्पू ला सद्दीने अपणे चेलयां जो गलाया, "बालकां जो मेरले औणे ते मता रोकदे: कांभई परमेशरा रा राज येदयां राई हाया। 17 हऊं तुहांने सच्च बोलां, सै कोई जे परमेशरा रे राजा जो बालकां साई ग्रहण नीं करगा, सै तिसच कर्दी बी दाखल नीं हुई सकदा।"

अमीर माह्ये कने अनन्त जीवन

(मत्ती 19:16-30; मरकुस 10:17-31)

18 इक बार यहूदियां रे धार्मिक गुरुये यीशुये ते स्वाल कित्या, "हे पवित्र गुरु, अनन्त काल रा जीवन पाणे खातर मिजो क्या करना चाहिन्दा?" 19 यीशुये तिसते पूछया, "तू मिजो पवित्र कजो बोलीरां? पवित्र त सिर्फ परमेशर आ। 20 पर तिथि तक जे तेरे स्वाला री गल्ल ई, तां तू परमेशरा री आज्ञां जो त जाणां: भई व्याभिचार नीं करना, खून नीं करना, चोरी नीं करनी, झूठी गवाई नीं देणी कने अपणे माता पिता रा आदर करना।" 21 तिने माह्ये बोलया, "ताहली जे हऊं छोटा जेआ वच्चा था, ताहलुआं ते हऊं इन्हा आज्ञां जो मन्नदा आया।" 22 यीशुये तिसजो गलाया, "तेरे च हलित्ये बी इक्की गल्ला री कम्मी हाई। तेरले जितणी बी धन दौलत ई तू तिसा जो बेचीने सारा पैसा कंगाळां च बंडी दे, कने मेरे पिछे आई जा, तां तिजो स्वर्गा च धन मिलणा,।" 23 पर ताहली जे तिने माह्ये ये गल्लां सुणियां, तां सै बडा दव्वास हुईया कांभई सै बडा अमीर था।

24 ताहली जे यीशुये तिस्सो जान्दे हुये देखया, तां अपणे चेलयां ने बोलणे लगया, "अमीरां रा परमेशरा रे राजा च दाखल हुणा कितणा मुश्कल आ ? 25 परमेशरा रे राजा च अमीरा रे दाखल हुणे ते ऊटा रा सुईया रे नक्का ते निकळी जाणा सान आ। 26 तिन्हें तिन्हे जे येह गल्लां सुणियां, तिन्हे पूछया, "तां फेरी छुटकारा किसरा हुई सकां ? 27 यीशुये बोलया; "सै जे माह्ये तां ते नीं हुई सकदा, सै परमेशरा ते हुई सकां।" 28 पतरसे बोलया; "देख, अहें त अपणा घर बार छड्डीने तेरे पिछे आईगरे।" 29 यीशुये तिन्हाने गलाया, "तैं ठीक बोलया। पर हऊं तुहांने सच्च बोलां, भई कोई बी माह्ये तिन्हें जे परमेशरा रे राजा खातर अपणा घर बार, माता-पिता, बच्चे, जनाना, कने भाई बैहणां जो छडया ओ, 30 कने तिन्हें इस जुगा च चाहे कई गुणा जादा नीं पाया हुंगा, पर परलोका च जाईने तिन्हाजो अनन्त काल रा जीवन मिलणा।"

अपणिया मौती रे बारे यीशुये री तिज्जी भविष्यवाणी

(मत्ती 20:17-19; मरकुस 10:32-34)

31 फेरी यीशुये अपणे बारह चेलयां जो सौगी लेईने तिन्हाजो बोलया, "देवखा, अहें यरुशलेम जाई रां ये, कने तिस मौके जे अहां उथी पुजणा, फेरी जितणीयां गल्लां जे माह्ये रे पुत्रा रे बारे च भविष्यवक्त्यां रे जरिये लिखी रियां सै सब पूरी होणीयां। 32 तिस्सो रोमियां रे हत्था च पकडवाया जाणा। तिन्हा तिसरा मजाक डवाणा, कने तिसरी बेज्जती करीने तिस पर थूकणा। 33 तिन्हा तिस्सो कोडे मारी कने जानी ते खत्म करी देणा। पर तिस तिज्जे दिन फेरी भीं ते ज्युन्दे हुई जाणा।" 34 पर यीशु सै जे किछ बोली रां था, चले तिस रियां गल्लां रा मतलब नीं समझी पाये: कने ये गल्ल तिन्हाते छुपी री रैई, कने तिने जो किछ गलाया था सै तिन्हा रिया समझा च नीं बैठया।

अन्हे भिखारिये जो अकखीं री लोय देणा

(मत्ती 20:29-34; मरकुस 10:46-52)

35 जिस मौके जे यीशु यरीहो शहरा रे नेडे पुज्जे, तिथी इक अन्हा बाटा रे कन्डे बैठीने भिख मंगीरां था। 36 तिने मते लोकां जो अपणे नेडे ते जान्देयां जो सुणीने, लोकां ते पूछया भई ये क्या हुई रां? 37 तिन्हें तिस्सो दस्सया भई नासरत गांवा रा यीशु जाई रां। 38 येदा सुणीने सै रडाणे लगया, "हे यीशु, दाऊद रे पुत्र, माह पर दया कर!" 39 सै लोक जे अग्गे-अग्गे चलीरे थे, सै तिस्सो थिडकणे लगे, "चुप रह; पर सै होर बी जादा रडाणे लगया, "हे दाऊद रे पुत्र, माह पर दया कर!" 40 ताहली जे यीशुये तिसरी अवाज सुणी, तां सै रुकीया, कने तिस अन्हे जो अपणे सामणे लोणे रा हुक्म दित्या। ताहली जे सै नेडे आया, फेरी यीशुये तिस माह्ये ते पूछया, 41 "तू क्या चांह? भई हऊं तेरे खातर करुं?" तिने बोलया, "प्रभु, येदा भई हऊं देखणे लंगू।" 42 यीशुये तिसजो गलाया, "ठीक आ तू देकखी सकां! तेरे विश्वास तू ठीक करीत्या।" 43 कने सै तिस ई वगत देखणे लगीया, कने परमेशरा री जय-जय कार करदा हुआ सै यीशुये रे पिछे चलीप्या, कने सारेयां लोके देखीने परमेशरा रा गुणगान कित्या।

चुंगी लेणे औळा जक्कई

19 कने फेरी यीशु यरीहो नगरा च प्रवेश करीने ताहली जे उथीते जाई करां था। 2 तां तिथी जक्कई नौवा रा इक माह्ये था, सै जे रोमी सरकारा रे खातर चुंगी लेणे औळयां रा सरदार कने खूब पैसे धेले औळा था। 3 सै यीशुये जो देखणा चांह था, भई सै कुण जेआ। पर लोकां री भीडा रिया वजह ने सै तिन्हाजो देखी नीं सकया, कांभई सै कदा रा छोटा था। 4 फेरी तिस्सो देखणे खातर सै दौडीने सबनीं ते अग्गे गया कने गुलरा रे डाळा पर जाईने कोहीया कांभई यीशु तिसा ई बाटे जाणे औळा था। 5 ताहली जे यीशु तिसरे नेडे आया, तां तिन्हे डाला रे उपर जक्कईये जो बैठीरा देकखया कने तिसरा नीं लेईने हाक पाई, "जक्कई ! छोडचा ने थले औ! कांभई अज ये जरुरी आ भई हऊं तेरे घरे रहूं।" 6 जक्कई इकदम थले उतरया कने बडिया खुशिया ने यीशुये जो अपणे घरे लैईया।

7 पर मतेयां लोकां जो तिसरी येह गल्ल खरी नीं लगी। सै बुडबुड करने लगे, भई "ये त इक पापीये रे घरे मेहमान बणीने चलीरा !" 8 जक्कईये खडीने प्रभू ते बोलया; प्रभु जी, देवखा हऊं अपणीया धन-दौलता रा अधा हिस्सा कंगाळां च बंडी देआं, कने माहराज, तिन्हा-तिन्हा रा जे मैं धोखा करीने लैईरा तिन्हां जो मांह चार गुणा वापस करीने देणा। 9 यीशुये तिस्सो गलाया, "आज इस घरा च छुटकारा आया, इस खातर भई इने माह्ये अप्पू जो अपणे इस कम्मा रे जरिये अब्राहम रा पुत्र साबित कित्या। 10 कांभई हऊं, माह्ये रा पुत्र, इस माह्ये साई गवाच्छी रे लोकां जो टोळणे, कने तिन्हा जो बचाणे आईरा।"

दस मोहरां रा द्रष्टान्त

(मत्ती 25:14-30)

11 यीशु सै जे किछ बोलीरां था, तिस्सो लोकां री भीड सुणी करां थी, तां तिने इक्की द्रष्टान्ता च गल्ल कीति, सै यरुशलेम रे नेडे थे, कांभई लोकां री सोच थी भई परमेशरा रे राजा री शुरुआत येब्बां ई होणे औळी, 12 यीशुये फेरी इक द्रष्टान्ता च गलाया, "इक अमीर माह्ये किति दूर देशा च चलीया ताकि राजे री पदबी पाईने वापस अपणे देशा च आई जाओ। 13 उत्थी जाणे ते पैहले, तिने अपणे दस दास्सां जो अप्पू ले सद्दीने गलाया, 'ताहलुआं तक जे हऊं तुहां ने सौगी नीं आ, तदुआं तक तिने हर इक दास्सा जो लेण-देण करने खातर इक-इक सोने रा सिक्का दित्या। 14 पर तिसरे नगरा च रहणे औळे लोक तिसते नफरत करां थे, इस खातर तिन्हे तिसरे पिछे दूतां रे जरिये ब्योरा भेजया भई अहें नीं चाहन्दे भई सै अहांरा राजा बणो।

15 ताहली जे सै राजे री पदबी पाई ने वापस आया, फेरी तिने राजे तिन्हा नोकरां जो सद्दया, तिन्हाजो जे तिने सोने रे सिक्के दितीरे थे। सै जाणना चांह था भई तिस सिक्के ने लेण-देण करीने तिन्हे क्या-क्या कमाया। 16 फेरी पैहले

नोकरे आईने अपने जादा फायदे री गल्ल दस्सी 'महाराज, तुहारे दितारे सोने रे सिक्के ते मैं दस होर सोने रे सिक्के कमाये ! 17 राजे तिस्सो बोलया, 'शाबास, धन तिजो मेरे सच्चे पक्के दास ! तू इक विश्वास लायक सेबक आ। मैं तिजो सै जे थोड़ा जेआ दितारा था, तिस च तू विश्वासी निकळया। हुण तिजो नाम्मा च दस्सां नगरां रा राजपाल बणाया जा।' 18 दूजे सेबके अपने लाभा रे बारे च दस्सा 'स्वामी जी, तुहारे दितारे सिक्के ते मैं पाज गुणा होर कमाया !' 19 राजे तिस्सो बोलया, 'शाबास, तिजो मेरे सच्चे पक्के दास ! तिजो पंजां नगरां रा राजपाल बणाया जा।' 20 पर तिजो दास उतणे ई सिक्के वापस लेईने औंवा जितणे जे तिस्सो दितारे थे कने बोलां, मैं इस्सो सम्भाली ने रखणे खातर रुमाला च बन्हीने लकोईतरा था।' 21 कांभई हऊं तेरते डरां था। तू मजाजा ते इक शक्त माह्नु आ: कने सै चीज जे तेरी नीं, तिसा जो बी तू लेई लेआं, या सै जे तेरा बाहीरा नीं आ, तिस्सो बी तू लुणि लेआं।' 22 सै राजा तिस पर टूटी ने पैईया, 'ओ बुरे माह्नुआ ! क्या हऊं शक्त आ? जे तू मेरे बारे च इतणा किछ जाणां था भई हऊं कितणा शक्त आ, कने सै जे मैं नीं बाहीरा हुआं, हऊं तिस्सो बी बद्धां, 23 तैं मेरा सै सिक्का किसी जो ब्याजा पर कां नीं दित्या ताकि मेरे वापस औणे पर मिंजो तिसरा किछ ब्याज त मिलदा?' 24 सै दास जे नेडे खड़ीरे थे, राजे तिन्हाजो हुक्म दित्या, 'इस दास्सा ते सिक्का वापस लेई लो, कने सबनीं ते जादा फायदा तिसरा जे हुईरा, तिस्सो देई दवा।' 25 तिन्हे राजे ने बोलया, 'मालक, तिस दास्सा ले त पैहले तेई दस सोने रे सिक्के !' 26 इस पर राजे बोलया, 'तुहें ठीक बोलया, पर तिन्हाजो सै जे किछ दितारा जे तिसरा इस्तेमाल सै ठीक ढंगा ने करां ये, तिन्हाजो होर बी दित्या जाणा। पर सै जे येदा नीं करदे, तिन्हाले जे थोड़ा बी आ तां सै बी तिन्हाते लेई लित्या जाणा। 27 कने सै जे नीं चाहन्दे भई हऊं तिन्हा पर राज करं, तिन्हा बैरियां जो, मेरले लेआई ने मेरे सामणे खत्म करी दवा।' 1"

यरुशलम च बिजय प्रवेश

(मत्ती 21:1-11; मरकुस 11:1-11; लूका 12:12-19)

28 इस द्रष्टान्ता जो दसणे ते बाद, यीशु यरुशलम खौ गया। सै अपने चेलयां ते मूहरे-मूहरे चलीरे थे। 29 जिस मौके सै जैतून नौंवा रे पहाड़ा पर बसीरे बैतफगे कने बैतनियाह नगरा च पुजे, ताहली तिन्हे अपने दूई चेलयां जो अग्गे भेजया। 30 यीशुये तिन्हां चेलयां जो गलाया, "पारले गाँवा च जावा, कने गाँवा च दाखल हुंदे ई, तुहांजो इक गधीया रा बच्चा खुन्डा बझीरा मिलणा तिस पर जे हलित्ये तक किन्हीर्ये बी स्वारी नीं कितीरी हुणी। तिसजो खोली ने येथी ली आवा। 31 जे कोई तुहांते पूछो भई कजो खोली रांये, तां सिर्फ इतणा बोलयां, 'प्रभुये जो इसरी जरूरत ई।'

32 फेरी सै चले ऊथी गये कने तियां जे यीशुये दस्सी रा था, तियां ई गधीया रा बच्चा बझी रा मिलया। 33 कने जिस मौके जे सै तिस्सो खोली रां थे, ताहली तिसरे मालके आईने तिन्हा ते पूछया, "तुहें इस गधीया रे बच्चे जो कजो खोली रां ये?" 34 इस पर चेलयां तिस रियां गल्लां रा इतणा ई जवाव दित्या, "प्रभुये जो इसरी जरूरत ई।" 35 फेरी सै तिस गधीया रे बच्चे जो यीशुये ले ली आये कने अपने कपड़े तिस बच्चे पर रखे कने यीशुये तिसरी सवारी किति। 36 जिस मौके यीशु यरुशलम री तरफ जाईरां था, तां लोक अपने कपड़े यीशुये रीया बाटा च बछां दे जां थे।

37 नेडे औन्दे हुये ताहली जे सै जैतून नौंवा रे पहाड़ा री तरवाईया ले पुजे, तां चेलयां री सारी मण्डली तिन्हा सारयां चमत्कारा रे कम्मा रिया वजह ने सै जे तिन्हे अपणिया अर्खीं देखे थे, खुश हुईने ऊचिया अवाजा च परमेशरा रा गुणगान करने लगे।

38 "भला हो तिस राजे रा, सै जे प्रभुये रे नौंवा ते औंवां !

स्वर्गा च सुख शान्ति, कने उच्चे ते उच्चे समाणा च परमेशरा री जय- जय कार ओ!"

39 लोकां रे तिस दंगला च मौजूद किछ यहूदि याजकें गलाया, "गुरु जी, इस तरीके री गल्लां बोलणे खातर अपने चेलयां जो थिड़का।" 40 यीशुये तिन्हाजो जवाव दित्या, "जे सै चुपचाप रैये तां किति येदा नीं ओ भई बाटा रे पत्थर चीखणे लगी जाओ !"

यरुशलम रे खातर रोण पिट्टण

41 पर जिस मौके यीशु यरुशलम रे नेडे आईये कने ताहली जे तिन्हे तिस नगरा जो देखया तां सै रोन्दे हुये गलाणे लगे, 42 आज मेरी कितणी इच्छा ई भई तैं, हां तैंई, इसा शान्तिया री बाटा जो पछयाणी लैया हुन्दा। पर तिजो इसारी पछयाण आज बी नीं हुई! हुण त बड़ी देर हुई चुक्कीरी, कने हुण शान्ति तेरते लुकोई तरी। 43 कांभई सै दिन औणे तिस मौके जे तेरे दुशमणां तेरे खातर चहुं पासयां ते मुशिवतां खड़ी करनियां। 44 तिन्हा तेरा कने तेरे सौगी तेरे बच्चयां रा नौं मिट्टिया च मलाई देणा, कने तेरे बैरियां तिस रिया जगह पर इक बी पत्थरा पर पत्थर नीं छडणा, कांभई छुटकारा पाणे रा सै मौका जे परमेशरे तिजो दितारा था, तिसते तैं मुंह फेरया।"

मन्दरा रे बेपारियां रा निकाळया जाणा

(मत्ती 21:12-17; मरकुस 11:15-19; यूहन्ना 2:13-22)

45 फेरी यीशु मन्दरा च जाईने, तिथी मौजूद दूकानदारां जो बाहर नकाळी देआं। 46 तिने गलाया, "पवित्र शास्त्रा च लिखीरा, 'मेरा मन्दर प्रार्थना रा घर हुणा, 'पर तुहें ये चोरां रा अड्डा बणाई तरा।" 47 इसते बाद सै हर रोज मन्दरा च उपदेश करने लगया। पर मुखिये याजकां, धर्मशास्त्री कने मुखिये, यीशुये जो मारने री तरकीब सोचणे लगे। 48 पर कोई बी तरकीब नीं नकाळी सके; कांभई प्रभु सै जे किछ गलां थे, लोक तिन्हारी इक्की-इक्की गल्ला जो बडिया गौरा ने सुणां थे।

यीशुये रे अधिकारा रा स्वाल

(मत्ती 21:23-27; मरकुस 11:27-33)

20 इक दिन येदा हुया भई ताहली जे यीशु मन्दरा च लोकां जो उपदेश देईरा था कने खुशखबरी सपवाई करां था, तां तिस वगत मुखिये याजक कने शास्त्री, बजुर्गा सौगी तिन्हा ले आईने खडीये; 2 कने यीशुये ते पुछया, भई अहांजो दस्स तू इन्हां काम्मां जो किस अधिकारा ने करां, कने सै कुण आ, तिने जे तिजो ये अधिकार दितीरा? 3 तिने तिन्हांजो जवाव दित्या, "हऊं बी तुहांते इक स्वाल पूछां, पैहले तिसरा जवाव देवा ! 4 यूहन्ने जो वपतिस्मा देणे खातर किने अधिकार दित्या, परमेशरे दित्या था या माह्नुयें दित्या।" 5 फेरी सै अप्पू बाटियें गलाणे बोलणे लगे। "जे अहें इसने येदा गलां भई परमेशरे दित्या था, तां तिस बोलणा भई फेरी तुहें तिस पर कां नीं विश्वास कित्या। 6 कने जे अहें इसने गलां भई सै सिर्फ माह्नुयें दितीरा, तां तिन्हा लोकां अहां पर पत्थर मारने, कांभई ये सचमुच जाणां ये भई यहन्ना इक भविष्यवक्ता था।" 7 इस खातर तिन्हे जवाव दित्या, "अहें नीं जाणदे।" 8 तिन्हा रिया इसा गल्ला पर यीशुये गलाया, "तां तुहांजो हऊं बी नीं दस्सी सकदा, भई इस कम्मा जो हऊं किस अधिकारा ने करां।"

दुष्ट किसानां रा द्रष्टान्त

(मत्ती 21:33-46; मरकुस 12:1-12)

9 फेरी यीशुये लोकां जो येह द्रष्टान्त दित्या: "भई किसी माह्नुये अंगूरां रा बगीचा लगाया, कने किसानां जो तिसरा ठेका देईने कईयां दिनां खातर अप्पू दूजे मुलखा चली आ। 10 ताहली जे अंगूर चुगणे रा वगत आया, तां तिने अपने इक्की नोकरा जो अंगूरां चा ते अपना हिस्सा लेणे खातर भेजया। पर तिन्हे किसानें तिस्सो मारी कुट्टी ने खाली हत्थ भेजीत्या। 11 फेरी तिने जमीनदारे इक होर नोकर भेजया, कने तिस सौगी बी तिन्हे येदा ई बरताव कित्या, तिसजो बी मारया कुट्टया कने बेजत करीने खाली हत्थ वापस भेजीत्या। 12 बाद बिच तिने जमीनदारे अपना तिजो नोकर भेजया, पर तिन्हे किसानें तिसजो बी घायल करीने खाली हत्थ बाहर कडीत्या। 13 बगीचे रे मालके बोलया, हुण हऊं क्या करूं? हऊं अपने मुन्डुये जो तिन्हाले भेजगह, हुई सकां भई सै तिसरी ईजत करो।" 14 पर जिस मौके किसानें तिसरे मुन्डुये जो देखया, तां सै अप्पू चीं ये गलाणे लगे, 'देखरा, इस बगीचे रा वारस आई करां। जे अहें इस्सो मारी देईये तां इसरी सारी जायदात अहां री हुई जाणी ! 15 कने तिन्हे सै बगीचे ते रगडीने बाहर कडुया कने मारीत्या।" फेरी यीशुये

तिन्हाते पुछ्या, "तुहांजो क्या लगां? तिस बगीचे रा मालक तिन्हा किसानां ने केदा बरताव करा? 16 हऊं दस्सां, तिस आईने तिन्हा किसानां जो मारी ने खत्म करी देणा, कने अंगूरां रा बगीचा किसी होरी किसानां ले सम्भाली देणा।" येदा सुणीने तिन्हे बोलया, "परमेशर येदा कदी नीं करो।" 17 यीशुये तिन्हां खा देखया कने गलाया, "तां फेरी पवित्र शास्त्रा च ये क्या लिखीरा? तिस पत्थरा जो जे राज मिस्त्रियें बेकार समझी ने कन्डे करी तरा था, सैं ई पत्थर हुण कुणे रा सिरा हुई गरा।" 18 सैं जे कोई तिस पत्थरा पर रुहढगा तिस चकनाचूर हुई जाणा, कने तिसरे गास जे सैं पत्थर पौंहागा, सैं तिस जिगली देणा।"

कैसरा जो कर देणा

(मत्ती 22:15-22; मरकुस 12:13-17)

19 शास्त्रियें कने मुखिये याजकां तिस बेले जे येह द्रष्टान्त दित्या, तां सैं इकदम तिस्सो पकडना चांह थे, कांभई सैं जाणीये भई यीशु अहांरी तरफ इशारा करीरां भई इस द्रष्टान्ता रे करसाण अहें लोक ये, पर सैं लोकां ते डरां थे। 20 सैं सही मौके रिया तलाशा च थे, इस खातर तिन्हे अगवेयां किछ जसूसां जो धर्मी माळुआं रे भेषा च भेजया भई यीशुये री कोई येदी गल्ल पकडा तिसरी शिकायत जे अहें राज्यपाला ने करी सक्को ताकि सैं तिसजो गिरफतार करी लो। 21 तिन्हे जसूसें बोलया, 'गुरु जी, अहें जाणां ये भई तू ठीक बोलां कने सखां बी आ, कने न त किसी ने कोई भेद भाव रक्खां, पर तुहें सच्चाईया ने परमेशरा रा रस्ता दस्सां ये। 22 अहां जो येदा दस्सा: भई क्या कैसरा जो कर देणा ठीक आ कि नीं?' 23 यीशु तिन्हा रिया चलाकिया जो जाणीया कने तिन्हा जो गलाया, 24 "तुहें मिंजो इक सिक्का दस्सा। फेरी तिन्हा ते पूछ्या, "इस सिक्के पर किसरा नां कने फोटू आ?" तिन्हे बोलया, "कैसरा रा।" 25 यीशुये बोलया, तां ठीक आ, सैं जे कैसरा रा, सैं कैसरा जो दवा। पर सैं जे परमेशरा रा तिस्सो परमेशरा जो ई दवा।" 26 सैं लोकां रे सामणे इसा गल्ला च तिस्सो पकडी नीं सक्के, पर सैं जसूस यीशुये रे जवावां ते रेहान रेईने, चुप हुईये।

जिन्दा हुणा कने ब्याह

(मत्ती 22:23-33; मरकुस 12:18-27)

27 फेरी सदूकी सैं जे बोलां भई मरीरयां रा ज्यूनदा होणा त हाया ई नीं आ। तिन्हा चाते कितणयां तिसले आईने पूछ्या। 28 भई "गुरु जी, मूसे अहां जो ये कनून दितिरा भई जे किसी रा भाई अपणीया जनाना रे जिन्दा हुन्दे हुये बिणा सन्ताने मरी जाओ, तां तिसरा भाई तिसरिया विधवा जो ब्याई ने अपणे भाईये खातर, तिसाते बच्चा पैदा करी सक्कां।" 29 तां येदे ई सात्त भाई थे, सब्बीं ते बड्डे भाईये रा ब्याह हुया कने सैं बगैर बच्चायां तेई मरीया। 30 तिसरे दुजे भाईये तिसा विधवा ने ब्याह कित्या, पर सैं बी बिणा वच्चायां तेई मरीया। 31 फेरी तिजे भाईये बी तिसा विधवा ने ब्याह कित्या कने सैं बी बिणा संतान ई मरया इसा रितिया ने सत्तां रे सत्त भाईयें तिसा जनाना ने ब्याह कित्या पर सैं सब बिणा किसी बच्चे तेई मरी मुकीये। 32 बाद च सैं विधवा जनाना बी मरीगी। 33 हुण अहां जो येदा दस्सा, जिस मौके जे सैं सारे ज्यूनदे होणे, तां सैं किसरी जनाना मन्नी जाणी? कांभई सत्तें भाईयें तिसा ने ब्याह कित्या था!" 34 यीशुये तिन्हां ते बोलया, "ब्याह त इस संसारा च लोकां रे खातर आ। 35 पर औणे औळे जुगा च येदा किछ नीं होणा, कांभई सैं जे मरी मुकीगरे तिन्हां चाते ज्यूनदे होणे रे लायक लोक, ताहली जे ज्यूनदे होणे, तिस जुगा च लोकां ना त ब्याह करने, कने ना जनानां ब्याह च दित्तियां जाणियां। 36 कने तिन्हा फेरी कदी नीं मरना, कांभई येदिया हालता च सैं स्वर्गदूतां रे बराबर हुणे, कने नौये जीवना च भीं ते ज्यूनदे कितिरे परमेशरा रे पुत्र होणे। 37 पर इसा गल्ला जो भई मुईरे ज्यूनदे हुई जायें: मूसे बी बळदे हुये बुटडेयां री कहाणिया च प्रगट कित्या भई सैं प्रभुये जो 'अब्राहम रा परमेशर, कने इसहाक रा परमेशर कने याकूब रा परमेशर' बोलां। 38 परमेशर त मुडदयां रां नीं पर ज्यूनदया रा परमेशर आ: कांभई तिसरे निकट सारे ज्यूनदे ई हाये।" 39 फेरी ये सुणीने शास्त्रियां चा ते कितणयां बोलया, भई "गुरु जी, तुहें ठीक गलाया।" 40 इसते बाद दूजी दफा किसी जो प्रभुये ते किछ बी पूछणे री हिम्मत नीं पैई।

मसीह किसरा पुत्र आ

(मत्ती 22:41-46; मरकुस 12:35-37)

41 फेरी यीशुये तिन्हांते पूछ्या, "मसीह जो दाऊद री सन्तान कां करी ने बोलां ये? 42 कांभई दाऊद खुद भजन संहिता रिया कतावा च बोलां: भई 'प्रभुये मेरे प्रभु जो गलाया, 43 तू मेरे दायें हत्था खा बैठ, तदुआं तक जे हऊं तेरे दुशमणां जो तेरे पैरां रे हेठ नीं करी दूं।' 44 दाऊद मसीह जो अपना प्रभु बोलां; इस खातर मसीह केवल दाऊद री संतान ई नीं पर प्रभु बी आ

शास्त्रियां ते खबरदार

(मत्ती 23:1-36; मरकुस 12:38-40)

45 ताहली जे सारे लोक ये गल्लां सुणीरां थे, तां यीशुये अपणे चेलयां ने बोलया। 46 इन्हां शास्त्रियां ते चौकस रौआ, तिन्हांजो लम्मे-लम्मे चोगे पहनी ने घूमणा खरा लगां। कने तिन्हा जो जे बजारां च नमस्कार, कने प्रार्थना रे घरां च खास आसण, कने धाम्मां च खास जगह प्यारी लगां ई। 47 सैं विधमा रा घर बार लूटी लें, कने सैं लोकां जो दसणे खातर बडिया देरा तक प्रार्थना करदे रयें: कने इसा ई वजह ने तिन्हाजो बड्डी ते बड्डी सजा भुगतणे पौणी।"

कंगाळ विधवा रा दान

(मरकुस 12:41-44)

21 जिस वगत यीशु मन्दरा च था, तिन्हे अमीरां जो दान पेटिया च दान पांटे देखया। 2 कने तिने इक कंगाळ विधमा जो बी तिस च दो दमडियां पांटे देखया। 3 फेरी तिन्हे गलाया; हऊं तुहांने सच्च बोलां भई इस कंगाळ विधमे सब्बीं ते जादा दान दित्या! 4 कांभई तिन्हे सारयां अपणी तिसा कमाईया चा ते थोडा जेआ दान दित्या तिसरी जे तिन्हा जो जरूरत नीं थी, पर इस कंगाळ विधमे त, अपणी जिन्दगीया री सारी कमाई पाईती।"

मन्दरा रे बिनाशा री भविष्यबाणी

(मत्ती 24:1,2; मरकुस 13:1,2)

5 कुछ लोक मन्दरा रे बारे च गलाई रां थे भई येह कितणे बांकयां पत्थरां ने कने परमेशरा जो अर्पण किति री मन्त्रतां री भेटां ने कियां सजाई रा, तां यीशुये बोलया; 6 "सैं दिन औणे, तिन्हा च येह सब कुछ जे तुहें देखया रांये, तिन्हा चा ते इसा जगह पर इक बी पत्थर पत्थरां रे उपर नीं बचणा सैं जे रडवाहट्या नीं जाणा।"

संकट कने कळेश

(मत्ती 24:3-14; मरकुस 13:3-13)

7 तिन्हे यीशुये ते पुछ्या, "गुरु जी, येह सब गल्लां कदीं होणी? कने ताहली जे येह गल्लां पूरी होणे औळी होणी तां तिसरे क्या संकेत होणे?" 8 तिने बोलया, "चौकस रौआ, किति भरमाये नीं जाओ, कांभई मतेयां मेरे नाँवा ते औणा कने बोलणा भई 'हऊं मसीह आ' कने सौगी जो येदा बी बोळणा, 'वगत नेडे आई पुज्या।' पर तुहें तिन्हांरे पिछे देकरां चली जान्दे। 9 कने ताहली जे तुहें लडाईयां कने दगयां री चर्चा सुणो, तां डरी नीं जायों; कांभई इन्हा गल्लां रा पहले होणा जरूरी आ; पर तिस वगत इकदम अंत नीं होणा।"

10 फेरी तिने तिन्हाने बोलया, " भई जाति जातिया पर कने राज्य-राज्य पर हमला करना, 11 मतियां जगहां पर हिल्लण होणे, कने जगह-जगह नकाळ पौणे, महामारी फैलणी, कने अंबरा च डराबनियां गल्लां हुणीयां होर बड्डे-बड्डे चिन्ह प्रगट होणे। 12 पर इन्हा सारियां गल्लां ते पहले, तिन्हा मेरे नाँवा रिया वजह ते तुहें पकडने, कने सताणे, पंचैती च घसीटीने जेलां च पाणे, कने राजेयां कने हाकिमां रे सामणे लैई जाणे। 13 ये तुहां रे खातर गवाही देणे रा मौका हुई जाणा। 14 इस खातर अपणे-अपणे मना च ठाणी रखा भई अहांजो पहले ते ई उत्तर देणे री चिन्ता नीं करनी चाहिन्दी। 15 कांभई मांह तुहां जो येदे बोल कने येदा ज्ञान देणा भई तुहांरा कोई बी बरोधी तुहांरा सामना करी ने येदा नी बोली सक्को भई तुहें गलत ये। 16 येथी तक भई तुहांरे सगे सबन्धी, तुहां रे माता-पिता, भाई बैहण, रिश्तेदारां कने मित्रां बी तुहें पकडवाणे, कने

तुहां चा ते कुछ लोकां जो मारी बी दित्या जाणा। 17 मेरे नौवा रिया वजह ने सारे लोकां तुहां ते नफरत करनी। 18 पर तुहांरे सिरा रा इक बाळ तक बेंगा नीं होणा। 19 जे तुहें शत्र रखीने टिक्कीरे रैहन्ने तां तुहां अपणी जिन्दगी बचाई रखणी।

यरुशलेम रे खातमे री भविष्यबाणी (मत्ती 24:15-21; मरकुस 13:14-19)

20 कने ताहली जे यरुशलेम तुहांजो दुश्मनां री सेना ने घिरीरा दिखणा, तां जाणी लेओं भई तिसरे नाश हुणे रा दिन नेडे आई पुज्जी रा। 21 तिस बेले सै जे यहूदिया प्रदेशा च हुंमे, सै पहाडां पर नड्डी जायो, कने सै जे यरुशलेम बिच हुणे सै तिथि ते बाहर चली जायो, कने सै जे नगरा ते बाहर होणे सै नगरा च नीं जाओ। 22 कांभई सै दिन परमेशरा रे बदला लेणे रे येढे दिन होणे, तिन्हा च जे पवित्र शास्त्रा री लिखी रियां सारी गल्लां पूरी हुई जाणीयां। 23 तिन्हां जनानां खातर ये कितणी बुरी गल्ल होणी सै जे तिन्हां दिनां च भारहत्थी कने दुध प्यान्दी हुणियां, कां भई तिस देशा पर बडा कलेश कने यहूदी लोकां पर परमेशरा री बडी क्रोपगी होणी। 24 तिन्हा जो बेरहमिया ने तलवारा ने मारया जाणा या तिन्हा जो गुलाम बणाई ने सारयां देशां च भेजी दित्या जाणा; कने यरुशलेम पर दूज्जी जातिया रे लोकां तदुआं तक राज करना तदुआं तक जे तिन्हारा वगत पूरा नीं हुई लो, तिन्हां रे जरिये यरुशलेम दरड्या जाणा।

माह्ये रे पुत्रा रा भीं ते औणा (मत्ती 24:29-31; मरकुस 13:24-27)

25 अम्बरा च हेरान करने औळी गल्लां हुणी; सूरज चान्द कने तारयां च चिन्ह सुझणे, कने थल्ले जमीना री सारी जातियां पर विपत्तियां औणी कने समुद्रा री उथल-पुथला जो देखी ने लोकां डरी जाणा। 26 डरा रे कारण संसारा पर औणे औळी विपत्तियां जो देखी ने, मतयां लोकां री हिम्मत टुटी जाणी, कांभई अम्बरा री शक्तियां हिलणियां। 27 फेरी सारयां लोकां माह्ये रे पुत्रा जो अपणी शक्ति कने बड्डिया समर्था ने बदळां पर औंदे देखणा। 28 ताहली जे येह गल्लां होणे लग गियां, तां अपणा सिर चक्की ने अंबरा खा देखयो, कांभई ताहली तुहांरी मुक्ति नेडे हुणी।"

दागले रे डाळा रा उदाहरण (मत्ती 24:32-35; मरकुस 13:28-31)

29 फेरी यीशुये तिन्हाजो इक द्रष्टान्त बोलया, "दागले रे डाळा कने वाकी होरी डाळां जो देखा। 30 जिस मौके तिन्हा ते कुम्बळ निकलां ये, तां तुहें अपणे आप जाणी लेआंये भई गर्मीया रा मौसम औणे औळा। 31 तियां ई ताहली जे तुहें इन्हा गल्लां जो हुन्दे देखो, तां जाणी लेओं भई परमेशरा रा राज औणे औळा। 32 हऊं तुहाने सच्च बोलां, भई तदुआं तक जे येह सारी गल्लां पूरी नीं हुई जान्दी, इसा पीढीया रा खात्मा नीं होणा। 33 जमीन कने असमाण खत्म हुई जाणे, पर मेरा वचन कदीं नीं टळणा।

जागदे रौआ (मत्ती 24:36-44; मरकुस 13:32-37)

34 इस खातर साबधान हुई ने रौआ! किति तुहें इक लापरवाह, शराबा च डुब्बी रे, कने जिन्दगिया री फिक्रं च फसी रिया दशा च मिंजो नीं मिलयो, किति येढा नीं हो भई सै दिन इक फन्दे साई अचानक तुहां पर नीं आई पौ। 35 सै जे कोई इसा जमीना पर आ, तिन्हा पर सै दिन जरूर औणा। 36 हर पल चुशत रौआ कने प्रार्थना करदे रौआ भई तुहें इन्हा सारियां गल्लां ते, सै जे होणे औळियां, बचणे री ताकत पाई सक्को, कने अपणे आत्म विश्वासा सौगी माह्ये रे पुत्रा रे सामणे खडे होणे लायक बणी सक्को।"

37 हर रोज यीशु मन्दरा च जाईने उपदेश देआं था, कने संझके जुन्ना उथी ते निकली ने जैतून नौवा रे पहाडा पर रात वितां था। 38 हर रोज तडके उठी ने मते लोक तिन्हा जो सुणने खातर मन्दरा च कड्डे हुआं थे।

यीशुये रे खलाफ शाजिस रचना (मत्ती 26:1-5; मरकुस 14:1,2; यूहन्ना 11:45-53)

22 बिणा मलेडे औळा रोटियां रा त्योहार, तिसरी पैहल जे फसह उत्सव ते हुआं ई, नेडे आई गरा था। 2 तिस बेले मुखिये याजक कने शास्त्री यीशुये जो मारने री शाजिस रचणे च व्यस्त थे, पर सै लोकां ते डरां थे।

यहूदा रा धोखा देणा (मत्ती 26:14-16; मरकुस 14:10,11)

3 फेरी शैतान यहूदा इस्करियोती च समाईया, सै जे यीशुये रे बारा चेलयां चा ते इक चेला था। 4 सै मुखिये याजक कने मन्दरा री रखवाळी करने औळे मुखियां ले गया ताकि यीशुये जो पकडाणे रे सब्बीं ते बेहतर तरीके री गल्ल बात करी सक्को। 5 यहूदा री इस सहायता रे करने ते सै बडे खुश हुये, कने तिन्हें तिस्सो नाम्मां च पैसे देणे रा बी बाद कित्या। 6 सै तिन्हारे इस बादे ते सहमत हुईया, कने तदुआं ते ई सै यीशुये जो पकडाणे रे येढे मौकयां री तलास करने लगया भई जिस वगत जे यीशुये रे नेडे मते लोक नीं हो, तिस बेले हऊं यीशुये जो चुपचाप पकडवाई सक्को।

चेलयां सौगी फसह री अन्तिम धाम (मत्ती 26:17-25; मरकुस 14:12-21; यूहन्ना 13:21-30)

7 फेरी बिणा मलेडे री रोटिया रे त्योहारा रा सै दिन आया, तिस दिन जे फसह रे भेडुये री बळी चढाणा जरूरी था। 8 यीशुये पतरस कने यहून्ने जो येह बोली ने अग्गे भेजया, भई "जाईने अहां रे खातर फसह रे खाणे री तैयारी करा, ताकि अहें सौगी बैठी ने खाई सक्को।" 9 तिन्हे यीशुये ते पूछया, "तुहें कित्ती चायें भई अहें खाणा बणाईये?" 10 यीशुये जवाव दित्या, "तुहां रे यरुशलेम च दाखल होन्दे ई, उथी तुहां जो पाणीये रा घडा चक्की रा इक माह्ये मिलणा। तिस घरा च जे सै जाओ; तुहें तिसरे पिछे चली जायो। 11 तिस घरा रे मालका ते पूछयो, 'गुरुये तेरते पुछीरा, भई सै मेहमानां रा कमरा किति आ तिस च जे हऊं अपणे चेलयां ने फसह रा खाणा खाई सक्कू?' 12 तिस तुहांजो उपरलिया तरफा जो लेई जाणा तिथी जे इक बड्डा कमरा पहले ते ई सजी रा सजाई रा हुणा। तुहांरे खातर सै ई जगह होणी, कने तिथी तुहें फसह रा खाणा बणायो।" 13 फेरी सै चले तिस नगरा जो गये कने तेढा जे यीशुये तिन्हा ने बोलीरा था, सब कुछ तियां ई पाया कने तिथी तिन्हे फसह रा खाणा बणाया।

प्रभु-भोज (मत्ती 26:26-30; मरकुस 14:22-26; 1 कुरिन्थियां 11:23-25)

14 ताहली जे सही मौका आया, यीशु अपणे बारह चेलयां सौगी मेजा पर खाणा खाणे बैठे। 15 यीशुये तिन्हाने बोलया, "हऊं बड्डिया बेसवरिया ने इसा घडिया रिया निहाल्पा च था भई मेरा दुःख भोगणे रा वगत औणे ते पहले तुहांने सौगी बैठी ने फसह रा खाणा खाऊं। 16 कांभई हऊं तुहां ने सच्च बोलां, भई तदुआं तक जे परमेशरा रे राजा च फसह रे त्योहारा रा मकसद पूरा नीं हुई जाओ, तदुआं तक मांज इसजो नीं खाणा।" 17 फेरी यीशुये प्याल्ला लेया कने पिता परमेशरा रा धन्यावाद करने ते बाद बोलया, इस प्याल्ले जो लेईने इक दूजे च बन्डी लौआ। 18 ताहलियां तक जे परमेशरा रा राज नीं आओ, तदुआं तक मांज अज्जा ते अंगूरा रा रस कदीं नीं पीणा।" 19 फेरी तिन्हे रोटी लेई; कने परमेशरा रा धन्यावाद करी ने तोडी, फेरी अपणे चेलयां जो येढा गलां दे हुयां दिति, "येह मेरी देह ई सै जे तुहांरे खातर दिति जांयीं, इसाजो खावा कने मिंजो याद करने खातर येढा ई करया करा।" 20 खाणा खाणे ते बाद तिन्हे अंगूरां रे रस्सा रा इक होर कटोरा लेआ कने बोलया, "येह अंगूरा रा रस्स परमेशरा रिया तरफा ते, तिन्हा रे नये बादे रा प्रतीक आ, कने येह येढा करार आ तिस पर हऊं अपणा खून बगाई ने तुहांरे खातर मोहर लगाणे औळा। 21 पर इस मेजा पर अहां च इक येढा माह्ये बैठीरा, तिस जे हऊं पकडवाणा। 22 माह्ये रे मुण्डुये जो त परमेशरा रिया योजना रे मुताबिक

मरना ई हाया, पर लाणत ई तिस माह्ये पर तिस जे सै पकड़वाणा!" 23 फेरी सै चले अप्पू चिये इक दूजे ते पूछणे लगे भई अहां चा ते कुण आ सै जे येदा करी सकां?

बड्डा कुण? इस पर बैहस

24 सै अप्पू चिये येह बी स्वाल करने लगे भई तिन्हा चा ते सब्बीं ते बड्डा कुण आ? 25 यीशुये तिन्हा ने गलाया, "गैर यहूदियां रे राजा कने बड्डे-बड्डे नेते अपणे लोकां पर हक जमाई ने रखां ये, कने अप्पू जो लोकां रा मित्र बुलवाणा चायें।" 26 पर तुहें तेदे नीं हुयों बल्कि तुहां च सै जे सब्बीं ते बड्डा ओ तिस्सो सब्बीं ते छोटे साई बणी ने रैहणा चाहिन्हा कने सै जे मुखिया ओ तिस्सो सेवक बणी ने रैहणा चाहिन्हा। 27 आमतौर पर मालक मेचा पर बैठी ने रोटी खायें कने तिसरे सेवक तिसरिया सेवा च रयें, पर मेरने येदा नीं आ! कांभई हऊं तुहांरे बिच तुहांरे सेवका साई आ।

28 पर तुहें सै ये तिन्हे जे मेरयां मतेहात्रां च मेरा साथ दिति रा। 29 इस खातर तियां जे मेरे पिते मिंजो इक राज्य दिति रा, तियां ई हऊं बी तुहां जो हक देआं ताकि, 30 तुहें तिस राज्य च मेरे मेचा पर खाई पी सको, कने तुहें सिहासणां पर बैठी ने इस्त्राएल रे बारह गोतां रा फैसला करगे।

पतरस रे इन्कारा रा भविष्यवाणी

(मत्ती 26:31-35; मरकुस 14:27-31; यूहन्ना 13:36-38)

31 "प्यारे शमौन! देख, शैताने तुहां सारयां लोकां जो कणका साई छंडणे खातर मंगी लैईरा। 32 पर शमौन, प्रार्थना च मैं तेरे खातर बिनती किति भई तेरा विश्वास टूटी नीं जाओ, इस खातर ताहली जे तू पश्चाताप करी ने मेरले वापस आई जाओ, ताहली अपणे भाईयां जो बी विश्वास च मजबूत कने पक्का करयां।" 33 पर पतरसे गलाया, "प्रभु जी, हऊं तुहां ने जेल्ला जाणे कने तुहां सौगी मरने खातर बी तैयार आ।" 34 फेरी यीशुये तिसने गलाया, "पतरस, हऊं तेरने बोलां भई तदुआं तक जे तू तिन्न बार मेरा इन्कार नीं करी लेंगा भई हऊं तिस्सो नीं जाणवा", तदुआं तक आज्ञा कुकड़ा बांग नीं देणी।"

बटुआ, झोळी कने तलबार

35 फेरी यीशुये अपणे चेलयां ते पूछया, "जिस बेले मैं तुहां जो खुशखवरिया रा प्रचार करने खातर बाहर भेजया, कने तुहां ले पैसा नीं था, झोळी नीं थी, कने नां त कपड़यां री कोई होर जोड़ी थी; तां क्या तुहांजो किसी चीजा री कमी महसूस हुई?" तिन्हे बोलया, "किसी बी चीजा री नीं।" 36 फेरी यीशुये गलाया, "पर हुण, अप्पू सौगी झोळी कने पैसे रखी लौआ कने जे किसी ले तलवार नीं ता सै अपणे कपडे बेची ने इक तलवार खरीदी लो! 37 कांभई हऊं तुहां जो दस्सां भई पवित्र शास्त्रा च सै जे लिक्खीरा: तिस्सो अपराधियां ने सौगी गिणया, येह मेरे बारे च किति री भविष्यवाणी थी, हुण तिसारा मांह च पूरा होणा जरूरी आ; कांभई मेरे बारे च सै जे कुछ लिखीरा, सै सब कुछ पूरा होणा।" 38 चेलयां बोलया, प्रभु, अहां ले येथी दो तलवारां इयां।" यीशुये तिन्हा ने बोलया, "बडियां!

जैतून रे पहाड़ा पर यीशुये री प्रार्थना

(मत्ती 26:36-46; मरकुस 14:32-42)

39 फेरी सै उथी ते उठी ने हर रोजा साई जैतून पहाड़ा पर गया। कने तिसरे चले बी तिस रिया सौगी चलीपे। 40 ताहली जे सै तिसा जगह पूजे तां यीशुये तिन्हा ने गलाया, "प्रार्थना करा भई तुहां जो इम्तेहाना च नीं पोणे पौ।" 41 सै चेलयां ते थोड़े जे दूर गये कने गोडयां रे भार प्रार्थना करने लगे, 42 "परम पिता, जे तुहें चाहो ता, इस प्याल्ले जो माते दूर करी दे। तां बी मेरी नीं पर तुहांरी ई इच्छा पूरी ओ।" 43 फेरी स्वर्गा ते इक दूत आया, कने तिने यीशुये जो सामर्थ दिति। 44 यीशु बडे बेचैन हुई ने प्रार्थना करने लगे। तिन्हारे आत्मा रा दर्द इतणा बधी या भई तिन्हा रा परसीन्ना खून्ना रे टेपयां साई जमीना पर टपकणे लगया। 45 फेरी सै प्रार्थना ते उठीने अपणे चेलयां ले गये, पर दुखा रिया वजह ने सै दवांस हुई ने सुतिरे दिखे। 46 यीशुये तिन्हाते

पूछया, "तुहें कजो सुतिरे? उठा कने प्रार्थना करा, भई तुहें किसी इम्तेहाना च नीं पौ।"

प्रभु यीशुये जो धोखे च पकड़ना

(मत्ती 26:47-56; मरकुस 14:43-50; यूहन्ना 18:3-12)

47 यीशु हल्लिये बोली ई करां था, ताहली लोकां री इक बड्डी भीड़ तिस्सा जगह आई पूज्जी। तिन्हा बारह चेलयां चा ते इक, तिसरा नाँ जे यहूदा था, तिसा भीड़ा ते मूरे-मूरे चलीरा था। यहूदा यीशुये जो चूमणे खातर तिसरे नेडे आया। 48 फेरी यीशुये तिसने बोलया, "यहूदा, इक चूमने रे जरिये तू माह्ये रे पुत्रा जो कियां धोखा देई सकां?" 49 सै जे कुछ होणे ओळा था, तिस्सो देखी ने यीशुये रे साथिये बोलया, "प्रभु जी, क्या अहें इन्हाजो तलवारी ने वार करिये?" 50 कने तिन्हा चा ते इक्की अपणी तलवार मुखिये याजका रे दासा पर चलाई कने तिसरा दायां कात्र बड्डी तया। 51 पर यीशुये गलाया, "बस, हुण बडा हुईया!" कने यीशुये तिसरे कन्ना ने छोईने तिसजो ठीक कित्या। 52 फेरी यीशुये तिस पर हमला करने आईरे मुखिये याजकां, मन्दरा रे रखवाळयां रे मुखियां जो, कने बजुर्गा जो गलाया, "क्या हऊं कोई चोर या डाकु आ, भई तुहें मिंजो पकड़ने खातर तलवारां कने उन्डे लेईने आईरे? 53 ताहली जे हऊं हर रोज मन्दरा च तुहांने सौगी हुआं था, तां तुहें तिस वगत मिंजो कां नीं पकड़या? पर ये तुहांरा वगत आ, सै वगत, ताहली जे नेहरे री ताकत काम्म करां ई।"

पतरसा रा इन्कार

(मत्ती 26:57,58,69-75; मरकुस 14:53,54,66-72; यूहन्ना 18:12-18,25-27)

54 तिन्हे यीशु पकड़या कने मुखिये याजका रे घरें लेईये, कने पतरस दूर ई दूर तिन्हा रे पिछे चलीरा था। 55 पहरेदारें अंगणा च आग बाळी कने तिसारे चहुं पासयां बैठीये, कने पतरस बी तिन्हारे बिच जाईने बैठीया। 56 इक दासिये अग्गी रिया लोई च तिस्सो बैठीरा देखया, कने सै तिस खा निहारदी रैई। तिसे बोलया, "ये माह्ये त यीशुये रे चेलयां चा ते इक आ!" 57 पतरसे इसा गल्ला ते नां किति कने बोलया, "नारी, हऊं त तिस्सो जाणवा तक नीं आ!" 58 थोड़िया देरा बाद, इक होर माह्ये तिसखा देखया कने गलाया, "तू त तिन्हा चाते इक आ!" पतरसे तिसने बोलया, "भाई जी, हऊं तिन्हा चाते नीं आ!" 59 तकरीवन इक घन्टे बाद इक होर माह्ये जोर देईने बोलया, "पक्का, येह बी त तिस सौगी था; कांभई ये बी गलीली आ।" 60 पर पतरसे गलाया, "भाई जी, हऊं नीं जाणवा तू किसरे बारे च बोलीरां।" तियां जे तिन्हे ये शव्द बोले, तियां ई कुकड़े झांग देईती। 61 तिसा ई घडिया प्रभुये पतरसा खा जो मुडीने देखया, फेरी तिस्सो याद आया भई प्रभुये बोलया था, "आज्ञ ताहली जे कुकड़ा झांग देणी, ताह्युआं तक तिन्न दफा तू मेरा इन्कार करी चुक्या होणा।" 62 फेरी पतरस तिस अंगणा ते निकळीने बाहरौ चलीया कने बिलकी-बिलकी ने रोणे लगया।

प्रभु यीशुये रा आगमन

(मत्ती 26:67, 68; मरकुस 14:65)

63 हुण सै पहरेदार तिन्हेजे यीशु पकड़ीरा था, सै तिन्हा रा मजाक उवाणे लगे कने तिन्हा जो मारने कुटणे लगे। 64 तिन्हे यीशुये री अक्खीं पर पट्टी बन्हीती; कने तिन्हाजो कुटया कने तिन्हा ते पूछया, "भविष्यवाणी करने ओळ्ळे, हुण दस्स; तिज्जो किने कुटया?" 65 तिन्हे तिसरी वेज्जती करने खातर तिसजो होर बी मतियां गल्लां गलाईयां।

बड्डिया सभा रे सामणे यीशु

(मत्ती 26:59-66; मरकुस 14:55-64; यूहन्ना 18:19-24)

66 ताहली जे दिन हुया तां मुखिये याजकां कने शास्त्रीयां समेत लोकां रे बजुर्ग नेतयां री इक सभा हुई; फेरी सै लोक तिस्सो अपणी बड्डी सभा च ली आये। 67 सै यीशुये ने बोलणे लगे, "जे तू मसीह आ तां अहांने बोली दे!" पर यीशुये जवाव दित्या, "जे हऊं तुहां जो दस्सूं, तां तुहां विश्वास नीं करना। 68 कने जे हऊं तुहांते स्वाल पुछूं तां तुहां बी जवाव नीं देणा। 69 पर सै वगत

जल्द आइरां, ताहली जे माह्ये रे पुत्रा, सबनीं ते ताकतवर परमेशरा रे दार्ये पासे बैठणा।" 70 फेरी तिन्हे बोलया, "तां तुंहारे बोलणे रा मतलब ये आ भई तुहें परमेशरा रे पुत्र ये?" यीशुये तिन्हा जो जवाव दित्या, "तुहें ठीक गलाया, हऊं हाया।" 71 तिन्हे बोलया, "हुण अहांजो होर गवांही री क्या जरूरत ई? तिस्सो येदा गलांदे हुये अहें खुद सुणया!"

23 फेरी तिन्हारी सारी पचायत उठीने खडी हुई कने सैं तिस्सो पिलातुस राजपाळा रे सामणे लेईये। 2 सैं यीशुये पर इल्जाम लगाणे लगे, ये माहू अहांरे लोकां जो बहकाणे लगीरा, ये तिन्हारे राजे कैसरा जो कर देणे ते मना करां। कने ये येदा दावा करां भई हऊं मसीह आ, कने अप्पू जो इक राजा बोलदे हुये सुणया।" 3 इस पर पिलातुसे यीशुये ते पूछया, "क्या तू यहूदियां रा राजा आ?" यीशुये जवाव दित्या, "हां, तूंई त बोलीरां हऊं सैंई हाया।" 4 फेरी पिलातुस मुखिये याजकां कने लोकां खा मुडीने गलाया, "मिंजो इस माह्ये च कोई बी दोष नीं दिखदा।" 5 पर सैं इकदम बोलणे लगे, भई "इने सारे यहूदिया च लोकां जो अपणे उपदेशां ने भडकाया। ये इने गलील च शुरु कित्या था कने हुण येथी आईया।" 6 येदा सुणीने पिलातुसे पूछया, "क्या ये माहू गलील प्रदेशा रा?" 7 ताहली जे तिन्हे तिस्सो हां करदे हुये सुणया, फेरी पिलातुसे तिन्हा जो हेरोदेस अन्तिपास ले भेजया। कांभई गलील प्रदेश, हेरोदेस रे अधिकारा च था, कने तिन्हे दिनें सैं बी यरुशलम चई था। 8 हेरोदेशे ताहली जे यीशुये जो देखया तां सैं बडा खुश हुया कांभई कइयां बर्षां ते सैं तिस्सो देखणा चाया रां था। कांभई तिने यीशुये रे बारे च सुणी रखी रा था; कने मतयां दिनां ते सैं इसा आसा च था भई यीशुये जो कोई चमत्कार करदे हुये देखूं। 9 तिने यीशुये ते नेक बनेके स्वाल पूछे, पर यीशुये तिसरे किसी स्वाला रा बी जवाव नीं दित्या। 10 इस पर मुखिये याजक कने धर्म शास्त्री ऊथी खडीने जोरा-जोरा ने हल्ला पाईने यीशुये पर दोष लगाणे लगे। 11 हेरोदेसे बी अपणे सपाईयां समेत तिसने बुरा बरताव कित्या कने तिसरा मजाक चक्या। फेरी तिन्हे तिस्सो इक शाही कपडा पैहनाई ने वापस पिलातुस ले भेजी तया। 12 हेरोदेस कने पिलातुस सैं जे पैहले इक दूजे रे दुश्मन थे, तिस दिन सैं दोनों मित्र बणिजे। 13 पिलातुसे मुखिये याजकां, यहूदि नेतयां कने लोकां जो बी सद्दीने तिन्हांने बोलया, 14 पिलातुसे मुखिये याजकां, यहूदि नेतयां कने लोकां जो बी सद्दीने तिन्हांने बोलया, 15 हेरोदेस बी इस नतीजे पर पुज्या कने इस खातर तिने इस माह्ये जो वापस अहांले भेजीतया। इने माह्ये येदा कुछ बी नीं कितिरा, तिसा वजह ने जे इस्सो मौता री सजा दिती जाई सक्को। 16 इस खातर मांह सिर्फ इसजो कोडे लगवाणे, कने ये छडी देणा।" 17 ("पिलातुसा जो फसह रे इस त्योहारा रे मौके पर हर साल इक्की कैदिये जो लोकां खातर छडणे पौआं था।") 18 फेरी लोकें बडा हल्ला मचाया, सारे इक्की अवाजा च चिल्लाणे लगे, "इस्सो मारी देवा, कने बरअब्बा जो अहां रे खातर छडी देवा!" 19 बरअब्बा जो शहरा च मार कुट करने कने खून करने रे जु्रमा च जेला च बन्द कितीरा था। 20 पिलातुस यीशुये जो छडी देणा चांह था, इस खातर तिने लोकां जो फेरी भीं समझाया। 21 पर सैं येई नाहरा लान्दे रैये, इस्सो क्रूसा पर चढावा, इस्सो क्रूसा पर चढावा।" 22 पिलातुसे तिज्जी दफा तिन्हा ते पूछया, कां? इने माह्ये क्या जु्रम कितीरा? इस्सो मौता री सजा देणे लायक मिंजो इस च येदी कोई गल्ल नीं मिली। इस खातर मांह इसजो सिर्फ कोडे लवाई ने छडी देणा।" 23 पर लोक उच्चिया अवाजा च नाहरे लगाई-लगाई ने मांग करीरां थे भई इस्सो क्रूसा पर चढाई दित्या जाओ। पर तिन्हारे नाहरेयां रा शोर इतना बधीया भई 24 पिलातुसे लोकां री मांगा रे मुताविक फैसला देई तया भई इन्हारी मंग मन्नी ली जाओ। 25 पिलातुसे तिस माह्ये जो छडीतया सैं जे मार कुट करने कने खूना रे जु्रमा च जेला च बन्द कितीरा था, कने यीशुये जो तिन्हारे हत्था च सौपीतया भई सैं तेदा जे चांयें, करा। 26 ताहली जे यीशुये जो ले जाईरां थे, ताहली इक माहू तिसरा नों जे शमौन था, सैं कुरैन रा रैहणे औळा था, तिस वगत गाँवा ते आइरां था। सपाहियें सैं पकड़या कने तिस पर क्रूस लद्दी तया, कने यीशुये रे पिछे चलणे पर मजबूर करी तया। 27 लोकां री इक बड्डी भीड तिसरे पिछे चलीरी थी, तिन्हा च मतियां जनानां बी रोन्दी कने बलाप करदियां चली रियां थी। 28 पर यीशुये मुडी ने तिन्हांने गलाया, "यरुशलम री पुत्रियो, मेरे खातर मता बिलखदीयां; पर अपणे कने अपणे बचयां खातर रोआ। 29 कांभई येदे दिन आई रांये ताहली जे लोकां बोलणा,

धन तिन्हा जनानां जो सैं जे बांझ ईयां, कने सैं गर्भ तिने जे बच्चे नीं जणे, कने सैं चिचू तिन्हे जे दुध नीं प्याया।" 30 तिस वगत तिन्हा लोकां पर्वतां जो बोलणा भई 'अहां पर पई जाओ, कने पहाडियां ने बोलणा भई अहांजो दब्बी देवा।' 31 कांभई तांजे लोक हरे डाळा सौगी येदा करां ये, तां ना जाणे सुक्के डाळा सौगी क्या करगे?" 32 तिन्हा सौगी दो होर माह्युआं जो सैं जे अपराधी थे ले जाई रां थे, कांभई तिन्हा जो बी मौता री सजा दिति जाणी थी। 33 बाद बिच सैं तिस्सा जगह पुजे तिसा जो जे खोपडी बोलया जां था। तिसा जगह जे तिन्हा तिन्हां जो क्रूसां पर लटकाया, यीशु बिचले क्रूसा पर थे, कने तिसरे आजु बाजू रे क्रूसा पर सैं दोनों अपराधी थे। 34 यीशुये बोलया, "पिता जी, इन्हा जो माफ कर, कांभई ये नीं जाणदे भई ये क्या करी रांये।" फेरी सपाईयें पर्चीयां पाई ने अप्पु चींये तिसरे कपडेयां रा बन्दवारा कित्या। 35 तिथी लोक खडीने ये सरा कुछ देखदे रैये। मुखिये यीशुये रा मजाक चक्की ने बोलीरां थे, "इने होरीं जो त बचाया। जे ये परमेशरा रा मसीह आ कने तिन्हारा चुणीरा, तां अप्पू जो बचाओ।" 36 सपाईयें बी यीशुये रा मजाक चकया कने तिस्सो पीणे खातर सिरका दित्या। 37 तिन्हे यीशुये जो हाक पाई ने गलाया, "जे तू यहूदियां रा राजा, तां अप्पू जो बचा।" 38 यीशुये रे क्रूसा पर इक पट्टी लगाई तिस पर जे येदा लिखीरा था, "ये आ यहूदियां रा राजा।" 39 सैं अपराधी जे तिसरी अखा बखा रे क्रूसां पर लटकाये गइरे थे, तिन्हा चाते इक्की यीशुये री निंधया करदे हुये बोलया, "तां तूई मसीह आ, हाया ना? तां अप्पूजो बी बचा कने सौगी अहाजो बी बचा!" 40 पर दुजे, पहले अपराधिये रा वरोध करदे हुये बोलया, "क्या तू परमेशरा ते नीं डरदा? तिज्जो बी सैंई सजा मिली रांई। 41 मिंजो कने तिज्जो त अहांरे कितीरे जु्रमां री सजा मिली रांई, पर इने माह्ये त कोई बी जु्रम नीं कितीरा।" 42 फेरी तिने बोलया, "हे यीशु, ताहली जे तू अपणे राजा च आओ, ताहली मिंजो याद रखयो।" 43 यीशुये तिसने बोलया, "हऊं तेरने सच बोलां, आज तू मेरीया सौगी स्वर्गलोका च हुणां।" 44 दुपैहरा रा वगत था, बारह बजे ते लेईने तिन्हां बजे तक सारे देश च नेहरा छाईरा रैया। 45 सूरजा री रोशनी जान्दी रैई, इकदम ई, मन्दरा रा पडदा बिचा ते फटिया। 46 फेरी यीशुये जोरा ने बोलया, "हे पिता, हऊं अपणिया आत्मा जो तेरे हत्था च देआं।" इतणा बोलीने तिन्हे अपणे प्राण छडीते। 47 ताहली जे रोमी सपाईयां रे सुबेदारे, सैं जे तिस कम्मा री निगरानी करीरां था, तिने ये सब कुछ होन्दे हुये देखया, तां तिने परमेशरा री बड्याई करदे हुये बोलया, "सचमुच ये माहू बेकसूर था!" 48 लोकां रिये भीडे सैं जे क्रूसा रिया सजा जो देखणे खातर कडा हुई री थी, सैं जे कुछ हुया तिस्सो देखीने अपणी छाती पिटदे घरा जो वापस चलीये। 49 पर यीशुये रे मित्र, तिन्हा च जे गलील ते आई रियां जनानां बी शामिल थियां, थोडा दूर जे खडीने इन्हा गल्लां जो देखीरां थियां। 50 ऊथी युसूफ नाँवा रा इक भला कने धर्मी माहू था, सैं जे यहूदी पंचेती रा इक सदस्य था। 51 सैं तिन्हारे फैसले कने कार्यवाहिया ते सहमत नीं था, सैं यहूदियां रे इक नगर अरमतियाह रा निवासी था कने परमेशरा रे राजा रे ओणे री बाट देकरीरां था। 52 सैं माहू पिलातुस ले गया कने तिसते यीशुये रा शव लेणे री विनती किति। 53 तिने यीशुये रे शवा जो क्रूसा ते लवाही ने सणा रे बधीया कपडे ने लपेटया कने इक नाँईयां कब्रा च रखया, सैं जे सपडा जो खुणी ने बणाईरी थी। 54 ये शुक्रवारा रे दिन दुपैहरा रे बाद रा वगत था, कने विस्त्राम रे खातर तैयारिया रा दिन था। 55 ताहली जे यीशुये रे शवा जो ले जाई जाया रां था, ताहली सैं जनानां जे गलील ते आई रियां थी, तिन्हे युसूफा रे पीछे-पीछे जाईने सैं कब्र देखी कने होर येदा बी देखया भई यीशुये रा शव कब्रा च कियां रखया। 56 सैं अपणे घरों गइयां कने यीशुये रे शरीरा पर मळणे खातर मुशका औळियां चीजां कने सैंट तैयार कित्या। पर तिस समाना जो तैयार करदे-करदे विस्त्राम रा दिन आईया, कने कायदे कनूना रे मुताविक तिन्हे सारा दिन विस्त्राम कित्या।

24 रविवारा रे दिन तडके-तडके ई, सैं जनानां तिन्हे जे खुशबुदार चीजां तैयार किति रियां थी, तिन्हा जो लेई ने सैं कब्रा ले आईयां। 2 तिन्हे देखया भई तिस पत्थरा ने जे कब्रा रे दरवाजे जो ढकण दिति रा था, सैं इक्की खा जो रुढी गरा। 3 सैं अन्दरा जो गइयां, पर तिन्हा जो तिथि प्रभु यीशुये रा शब नीं सुझया। 4 सैं परेशानीया च पई गियां। ताहली इकदम ई दो माहू चमकदार कपडे पैहनीरे तिन्हाले आईने खडी ये। 5 डरा रे मारे सैं जनानां अपणे सिर झुकाई ने खडी रियां रैईयां। तिन्हे माह्युयें तिन्हाजो

गलाया, "तुहें जियून्दे माह्ये जो मरी रैयां च कजो टोळीरां इयां? 6 सैं येथी नीं ये! सैं मुईरयां चा ते ज्युदे हुईं गरे! क्या तुहांजो याद नीं आं भईं तिन्हे गलील च तुहांने क्या गलाईरा था, 7 भईं, माह्ये रे पुत्रा जो पापियां रे हत्थां च पकडवाया जाणा, फेरी सैं कूसा पर लटकाईं दित्या जाणा, कने तिज्जे दिन तिसस फेरी भीं ते जियून्दे हुईं जाणा, ये सब जरूरी आ?" 8 फेरी तिन्हाजो आद आया भईं यीशुये येदा ई बोलीरां था। 9 कने कब्रा ते वापस आईने तिन्हा गयारहौं चेलयां कने होरनीं भगतां जो ये सारी गल्लां दस्सियां। 10 सैं जनानां जे तिसा कब्रा ले गई रियां थियां, कने प्रेरितां जो ये सब दस्सीरां थियां तिन्हा च मरीयम मगदलीनी, योअन्ना, याकूब री अम्मा मरीयम कने होर जनानां बी थियां। 11 पर प्रेरितां जो ये कहाणी बकवास लगी, इस खातर तिन्हे इसा गल्ला पर विस्वास नीं कित्या। 12 तां पतरस दौडदा हुआ कब्रा ले पुज्यया, कने निहठा हुईं ने अन्दर देखणे लगया। तिससो उथी सिर्फ कफण ई सुझया; फेरी सैं जे हुईरा था तिसते सैं हैरान हुईने घरा जो वापस आईया। 13 तिस दिन यीशुये रे चेलयां चा ते दो माह्ये इम्माऊस नौवा रे गांवा जो जाईरां थे, सैं जे यरुशलेम ते तकरीबन ग्यारह किलो मीटर दूर था। 14 बाटा च चलदे हुये, सैं जे कुछ होया तिन्हा सारीयां गल्लां जो गलांदे हुये जाईरां थे। 15 ताहली जे सैं अप्पू चियें गल्ल बात कने सोच विचार करी ई करां थे, ताहली ईक दम यीशु ऊथी अपणे आप ई आईये, कने तिन्हाते जाईने मिले, कने तिन्हाने सौगी-सौगी चलने लगे। 16 पर सैं चले तिन्हाजो पछयाणी नीं सक्के, कांभईं परमेशरे सैं पछयाणने नीं दिते। 17 यीशुये तिन्हाने बोलया, "येदा लगां भईं तुहें किसी गल्ला पर बड़ा सोच विचार करी रां ये?" सैं तिसा ई जगह पर खड़ीये, कने उदासी तिन्हा रे चेहरे पर साफ सुझया रां थी। 18 तिन्हा च ते किलयूपास नौवा रे इक्की माह्ये तिसने बोलया, "यरुशलेम च रैहणे औळा तू कल्हा ई येदा माह्ये हुंगा, सैं जे नीं जाणदा भईं कुछ दिन पहले येथी क्या-क्या गल्लां हुईयां।" 19 यीशुये तिन्हा ते पुछया, "केदियां गल्लां?" फेरी तिन्हे तिसने गलाया, "येह गल्लां त नासरत गांवा रे यीशुये रे बारे च हुईयां। सैं इक येदा माह्ये था तिसने सैं जे कित्या कने बोलया तिसने परमेशर कने सारेयां लोकां च ये दस्सीत्या भईं सैं इक महान नवी था। 20 कने अहें इस बारे च गल्लां करीरां थे भईं अहारे मुखिये याजकां कने धर्म शास्त्रियें तिन्हा जो मौता रा हुक्म द्राईं ने कूसा पर लटकाईत्या। 21 अहें येदा सोचया था भईं सैं ई मसीह आ सैं जे इस्राएल जो छडवाणे खातर आईरे, इन्हा सारियां गल्लां जो हुई रियां जो आज्ञ तिज्जा दिन आ। 22 अहां रिया टोलिया रियां कुछ जनाने अहां जो चम्भे च पाई तया, आज्ञ दोत्तां ई सैं कब्रा पर गईयां। 23 सैं बोलणे लगीयां भईं तिन्हारा शब ऊथी नीं आ, कने तिन्हे स्वर्ग दूतां जो देखया, तिन्हाजो स्वर्ग दूतें दस्सया भईं यीशु जियून्दा हुईगरा! 24 अहारे साथियां चा ते कुछ दौडदे हुए कब्रा पर गये, कने तेदा जे तिन्हे जनाने बोलीरा था तिन्हा जो बी यीशुये रा शव नीं मिलया।" 25 यीशुये तिन्हांने बोलया, "तुहें कितने मुख लोक ये! पवित्र शास्त्रा च भविष्यवक्त्यां सैं जे लिखीरा, तिस पर तुहांजो विसवास करना कितना मुशकिल हुआं? 26 क्या मसीह रे खातर ये जरूरी नीं था भईं इसते पहले सैं इन्हा पीडा जो भुगत फेरी स्वर्गा च जाईने अपणे अधिकारा रिया गदिया पर बैठो?" 27 फेरी यीशुये मूसा ते कने सारे भविष्यवक्त्यां ते शुरु करीने सारे पवित्र शास्त्रा च ते अपणे बारे च लिखीरी गल्लां रा मतलब, तिन्हां जो समझाईत्या। 28 ताहली जे सैं तिस गांवा ले पुज्जी ये, तिथी जो जे सैं जाई रां थे, यीशुये येदा बताव कित्या, तियां जे भईं तिससो अगे जाणा हो। 29 पर

तिन्हे चेलयां तिसने जबरदस्ती विनती किति भईं, "आज्ज अहांले रुका, कांभईं दिन ढळी गरा था, कने रात हुईं गैरी थी!" इस खातर यीशु रैहणे जो तिन्हारे घरा जो गये। 30 तांजे सैं रोटी खाणे बईंटे, तां यीशुये रोटी लेईने परमेशरा रा धन्यावाद कित्या, फेरी सैं तोडी ने ताहली जे तिन्हा जो देणे लगया। 31 तां इकदम तिन्हा रियां आक्खीं खुली गैईयां, कने तिन्हे यीशुये जो पछयाणी लैया। तिस ई पल सैं छपन हुईं ये! 32 फेरी सैं चले अप्पुचीये बोलणे लगे, "तांजे सैं रस्ते च अहांने गल्लां करां थे; कने पवित्र शास्त्रा रां मतलब समझां थे, तां क्या अहांरे दिला च आग जेई नीं भडकी जान्दी थी?" 33 फेरी सैं इकदम खड़ीये कने वापस यरुशलेम जो चलीये। तीथि जे ग्यारह चले कने होर लोक कडे हुईरे थे। 34 ताहली जे सैं ऊथी पुज्जे ताहली तिन्हारे कुछ बोलणे ते पहले ई तिन्हारा इसा खबरा ने स्वागत कित्या भईं "प्रभु सच्ची जो ई जियून्दा हुईया! तिसने शिमौन्ना जो दर्शन दित्या!" 35 फेरी इम्माऊस रे तिन्हे दूईं माह्ये बी अपणी कहाणी सुणाईं भईं कियां बाटा जान्दे वगत यीशु परगट हुये, कने जिस मौके सैं रोटी तोडीरां थे, ताहली कियां तिन्हे यीशुये जो पछयाणया। 36 कने जिस मौके जे सैं इन्हां गल्लां करी रां ई थे भईं यीशु इकदम तिन्हारे विच आईया। तिन्हे बोलया, "तुहांजो सुख शान्ति मिलो।" 37 पर सैं किसी भूता जो देखी रांये येदा समझीने सैं सारे बुरे हालें बतरैहके कने बडे घवराईये। 38 तिन्हे पुछया, "तुहें कजो घवरायादे? हऊं कुण आ, इसा गल्ला रा तुहें अपणे मनां च बैहम कां करीरां ये? 39 मेरे हत्थां कने पैरां खा देखा, तुहें देखी सक्कां ये भईं हऊं सैं ई हाया। मेरने छोईं ने देखा भईं हऊं कोई भूत आ, कांभईं भूतां च कोई हाड मांस नीं हुन्दा, पर तियां जे तुहें देखी रांये भईं मेरा शरीर आ तिस च जे हड्डी कने मांस आ!" 40 येदा गलांदे हुये यीशुये अपणे हत्थ तिन्हा जो दस्सणे खातर अगे किते, कने तिन्हे अपणे पैर बी दस्से। 41 सैं खुशिया कने हैरानिया ने भरीये, पर तिन्हाजो तां बी विस्वास नीं हुई करदा था। फेरी यीशुये तिन्हाते पुछया, "क्या तुहांले खाणे जो कुछ हाया?" 42 तिन्हे यीशुये जो भुन्नी रिया मच्छीया रा इक टुकडु दित्या, 43 कने तिसने सैं टुकडु लेईने तिन्हा रे सामणे खादया। 44 फेरी यीशुये गलाया, "ताहली जे हऊं तुहांने ई था, तिस मौके मैं तुहांने बोलया था भईं मूसा री कने भविष्यवक्त्यां रियां कतावां च कने भजन संहिता च मेरे बारे च सैं जे लिखीरा, सैं सारी गल्लां पूरीयां होणीयां।" 45 फेरी यीशुये तिन्हारे डमाका रे दरवाजे खोलीते तिसते जे सैं पवित्र शास्त्रा री गल्लां जो समझी सक्को। 46 यीशुये फेरी भीं बोलया, "येदा बडे पैहले लिखीरा; भईं मसीहे जो दुख तकलीफां सैहणे पौणीयां कने मारया जाणा फेरी तिज्जे दिन मरीरेआं चा ते जियून्दे होणा। 47 कने पापां रिया माफिया खातर मन बदलणे री येह खबर यरुशलेम ते शुरु हुईने सारे देशां च प्रचार कित्ती जाणी, 48 तुहें इन्हा सारीयां गल्लां रे गवाह होणे। 49 कने तियां जे मेरे पिते माहने वादा कितिरा, तियां ई मांह बी तुहां रे खातर पवित्र आत्मा भेजणा पर तदुआं तक जे पवित्र आत्मा आईने तुहांजो स्वर्गा रिया समरथा ने भरी नीं देयो, तदुआं तक तुहें इस नगरा च ई रैयां।" 50 फेरी यीशु तिन्हा जो बैतनिय्याह तक लैईया, कने अपणे हत्थां जो स्वर्गा खौं चक्कीने, चेलयां जो शीष दित्ती। 51 तिन्हाजो शीष देन्दे हुये, सैं तिन्हाते लग हुईये, कने स्वर्गा जो चक्की ले। 52 फेरी चेलयां प्रभुये री अराधना किति कने बडे खुश हुईं ने यरुशलेम जो मुडीने वापस आई ये। 53 तिसते बाद सैं परमेशरा री स्तुति करदे हुये, अपणा सारा वगत मन्दरा च वताणे लगे।

यूहन्ना

बचन शरीरा रा रूप लेईने आया

1 सृष्टिया ते पैहले बचन था, कने बचन परमेशरा सौगी था, कने बचन ई परमेशर था। 2 येई शुरु च परमेशरा रिया सौगी था। 3 दुनियां री हर इक चीज तिसरे ई जरिये पैदा हुई, कने जो किछ पैदा हुया तिस बिचा ते कोई बी चीज तिसते बिना नीं पैदा हुई। 4 तिसच जीवन था कने सैई जीवन माहुआं रे खातर लोय (ज्ञान, भलाई) थी। 5 लोय नेहरे च चमकां ई पर नेहरा तिससो समझी नीं पाया। 6 परमेशरा रा भेजिरा इक माहु आया तिसरा नां जे यूहन्ना था। 7 सै गवाह बणीने आया भई सै लोकां जो लोई रे बारे च गवाही देई सक्को, ताकि सारे लोक तिसरे जरिये तिस पर विश्वास करी सक्को। 8 सै अप्पुं त सै जोति नीं था, पर तिसा जोतिया री गवाही देणे खातर आईरा था। 9 सच्ची जोति इस संसारा च औणे औळी थी सै जे हर इक माहणुये जो अपणे ज्ञाना च चमकाई। 10 सै संसारा ची था, कने संसार तिसरे जरिये पैदा हुया, कने तिने संसारे तिससो ई नीं पछयाणया। 11 सै अपणयां लोकां च आया, पर तिन्हें तिससो नीं ग्रहण कित्या। 12 पर जितणयां जे तिससो ग्रहण कित्या, तिने तिन्हांजो परमेशरा री सन्तान होणे रा हक दित्या, यनिके तिन्हांजो सै जे तिसरे नाँवा पर विश्वास रखां ये। 13 तिसरे अन्दर नां त खानदानी खून था, नां तिसरे जमणे च माता-पिता री कोई योजना थी, कने नां ई त मर्दा री कोई इच्छा थी, पर परमेशरा री इच्छा थी। 14 कने वचन शरीरा रा रूप लेईने आया; तिने दया कने सच्चाईया ने भरीने अहारे बिच बास कित्या, कने अहें तिसरी येढी महिमा देख्खी, तेढी जे पिते रे इकलौते पुत्रा री महिमा हुआं ई। 15 यूहन्ने तिसरे बारे च गवाही दिती, कने जोरा ने बोलया, “येई हा सै, तिसरा जे मै बखान कित्या भई सै जे मेरते बाद आई करां, सै समरथ्या च माहते बधीने आ, काँभई सै माहते पैहले था।” 16 तिसरे सिद्ध होणे रिया वजह ने अहें सब्बी अनुग्रह पर अनुग्रह पाये। 17 अहांजो व्यवस्था देणे औळा मूसा था, पर दया कने सच्चाई अहांजो यीशु मसीह ते मिले। 18 परमेशरा जो किने बी कदीं नीं देख्खया, इक्को-इक्क पुत्र सै जे पिते रिया गोदा चा, तिने ई अपणे पिते जो अहां सबनीं पर परगट कित्या।

यूहन्ना बपतिस्मा देणे औळे री गवाही

(मत्ती 3:1-12; मरकुस 1:1-8; लूका 3:1-18)

19 यूहन्ने री गवाही येई, भई ताहली जे यहूदियें यरुशलैम ते याजकां जो कने लेवियां जो तिसते ये पुछणे जो भेजिया भई “तू कुण आ?” 20 तां तिने ये मन्नील्या कने सै इसा गला ते नीं मुकरया, भई “हऊं मसीह नीं आं।” 21 फेरी तिन्हें यूहन्ने ते पुछ्या, “तां तू कुण आ? क्या तू एलिय्याह?” तिने जबाब दित्या, “नां, हऊं सै नीं आ।” यहूदियें इक होर स्वाल कित्या, “तां क्या तू भविष्यवक्ता?” तिने जबाब दित्या “नां।” 22 तां तिन्हें तिसते पुछ्या, “फेरी तू हाया कुण? अहांजो दस्स ताकि तिन्हें जे अहांजो तुहारे बारे च पता करने भेजीरा, अहें तिन्हांजो जबाब देई सक्को।” 23 तिने बोलया, “तियां जे यशयाह भविष्यवक्ते गलाईरा. “हऊं बीराने च इक हाक पाणे औळे री अवाज ई भई प्रभु रे खातर सिधा रस्ता बणावा।” 24 ये लोक फरीसियें भेजिरे थे। 25 तिन्हें तिसते ये स्वाल पुछ्या, भई “जे नां तू मसीह आ, न एलिय्याह, कने नां ई सै भविष्यवक्ता, तां फेरी लोकां जो वपतिस्मा कजो देआं?” 26 तिन्हां जो जबाब देन्दे हुये यूहन्ने बोलया, “हऊं त पाणिये ने वपतिस्मा देआं, पर तुहारे बिच इक माहु खडीरा तिससो जे तुहें नीं जाणदे। 27 ये सैई हाया सै जे मेरे बाद औणे औळा, कने हऊं इस लैक बी नीं आ भई तिसरे जुटयां रे तश्मे खोल्ही

सक्क।” 28 ये गलां यर्दन नदिया रे पार बैतनिय्याह च हुईयां, तित्थी जे यूहन्ना वपतिस्मा देआं था।

परमेशरा रा मेमना

29 दूजे दिन तिने यीशुये जो अपणी तरफ औन्दे देख्खीने बोलया, “देख्खा, ये परमेशरा रा मेमना सै जे संसारा रा पाप अपणे उप्पर लेई जां। 30 ये सैई आ तिसरे बारे च मै गलाया था, ‘इक माहु मेरे पिछे औणे औळा सै जे सामर्था च माहते बी बड्डा, काँभई सै माहते पैहले था।’ 31 हऊं त खुद बी तिससो नीं जाणदा था, पर इस खातर हऊं पाणिये ते वपतिस्मा देन्दा हुआ आया भई इस्राएल रे लोक तिससो जाणी लो। 32 फेरी यूहन्ने ये गवाही दिति: “मै आत्मा जो कबूतरा साई अम्बरा ते उतरदे देख्खया, कने सै तिस पर टिकिया। 33 हऊं त तिससो पछयाणदा नीं था, पर तिने जे मिन्जो पाणिये ते बपतिस्मा देणे जो भेजिरीरा, तिने ई माहे गलाया, ‘तिसरे उप्पर जे तू आत्मा जो उतरदे कने टिकदे देख्खो, सैई पवित्र आत्मा ते बपतिस्मा देणे औळा।’ 34 कने मै देख्खया, कने गवाई दिति भई येई परमेशरा रा पुत्र आ।”

प्रभु यीशु रे पैहले चले

35 दूजे दिन फेरी यहून्ना कने तिसरे चेलयां च ते दो लोक खडीरे थे, 36 कने तिने यीशुये जो सामणे जान्दे हुये देख्खया कने बोलया, “देख्खा ये परमेशरा रा मेमना।” 37 ताहली जे तिन्हें दूई चेलयां तिससो येढा गलान्दे हुये सुणया तां सै यीशुये रे पिछे चलीये। 38 कने ताहली जे यीशुये मुडीने देख्खया भई सै पीछे आई करां ये तां तिने तिन्हा ते पुछ्या, “तुहांजो क्या चाहिन्दा?” तिन्हें तिसजो जबाब दित्या, “गुरु जी, तुहारा रैहणे रा ठकाणा किति आ?” 39 तिने तिन्हाने बोलया, “आवा कने देख्खा।” फेरी तिन्हें जाईने यीशुये रे रैहणे री जगह देख्खी, तिस दिन सै तिसले ठैहरे। काँभई संजके जुन्ना रे तकरीबन चार बजी चुक्कीरे थे। 40 तिन्हां दूई च ते, सै जे यूहन्ने री गला सुणीने यीशुये रे पीछे चलीगरे थे, तिन्हा च ते इक शमौन पतरस रा भाई अन्द्रियास था। 41 तिने पैहले अपणे सके भाईये शमौना ने मिलिने तिसजो बोलया, “भाई अहांजो मसीह, मिलीग्या।” 42 फेरी अन्द्रियास शमौना जो यीशुये ले ली आया, तिने तिससो देख्खया कने बोलया, “तू यूहन्ना रा मुन्डु शमौन आ : तू कैफा यनि पतरस रे नाँवा ते पछयाणया जाणा।

फिलिप्पुस कने नतनएल जो सदया जाणा

43 अगले दिन यीशुये गलील जाणे रा निश्चा कित्या। सै फिलिप्पुस ने मिलया कने बोलया, “मेरे पिछे चली औ।” 44 फिलिप्पुस, अन्द्रियास कने पतरस रे नगर बैतसैदा रा बासी था। 45 फिलिप्पुस जो नतनएल मिलया कने तिने तिसते बोलया, “तिसरा बखान जे मूसे व्यवस्था च कने भविष्यवक्तयां लिखीरा, सै अहांजो मिलिग्या; सै यूसुफ रा मुन्डु, यीशु नासरी आ।” 46 फेरी नतनएले तिसते पुछ्या, “क्या कोई खरी चीज नासरत ते बी निकळी सक्कां ई?” फिलिप्पुसे तिसने बोलया, “जाईने देख्खी लें।” 47 यीशुये नतनएला जो अपणी तरफ औन्दे देख्खी ने तिसरे बारे च गलाया, “ये आ इक सच्चा इस्राएली तिसच जे कोई खोट नीं आ।” 48 नतनएले तिसते पुछ्या, “तू मिन्जो कियां जाणां?” यीशुये तिसजो जबाब दित्या, “इसते पैहले भई फिलिप्पुसे तू सद्या, ताहली तू दागले रे डाळा हेठ था, तां मै तिजो देख्खया था।” 49 नतनएले तिसजो जबाब दित्या, “गुरु, तू परमेशरा रा पुत्र आ, तू इस्राएल रा राजा।” 50 तिसरे जबाबा च यीशुये गलाया, “मै जे तेरने गलाया भई मै

तिजो दागले रे डाळा हेठ देख्या, क्या ताई तू इस खातर विश्वास करां? तू अगो इसते बी बड्डे-बड्डे काम्म देखणे।⁵¹ तिने तिसते भी बोलया, “हऊँ तेरने सच्ची-सच्ची बोलां भई तू स्वर्गा जो खुलदे कने परमेशरा रे दूतां जो माळुये रे पुत्रा रे उपर उतरदे कने उपर जान्दे देखणा।”

गलील रे काना च पैहला चमत्कार

2 फेरी तिजे दिन गलील रे काना च ब्याह था तिसच जे यीशुये री माता बी आईरी थी।² यीशु कने तिसरे चले बी तिस ब्याह च न्यूनदा देईने सद्दीरे थे।³ ताहली जे दाखरस घटणे लगया, तां यीशुये रिये मात तिसजो बोलया, “इन्हांले हुण होर दाखरस नीं आं।”⁴ यीशुये तिसाजो गलाया, “माता ये तू मिन्जो कजो बोलीरां ई? हल्लिये मेरा बगत नीं आईरा।”⁵ तिसरी माते सेबकां ने बोलया, “सै काम्म जे ये तुहांजो करने जो गलाओ तियां ई करयो।”⁶ ऊथी पाणी भरने रे पत्थरा रे छे मटके रखीरे थे, सै मटके तियां ई थे जियां जे यहूदि पवित्र स्नाना खातर कम्मा च इस्तेमाल करां थे। हर मटके च कोई बिह ते तिह लीटर तक पाणी औवां था।⁷ यीशुये सेबकां जो गलाया, “मटक्यां जो पाणिये ने भरी दो।” तिन्हें सारे मटके बिल्लां-बिल्लां तक भरीते।⁸ फेरी तिने तिन्हांजो गलाया, “हुण थोडा जेआ इन्हां च ते कड्डीने दाबता रा इन्तजाम कारणे औळे मुखिये ले लेई जवा।” कने सै तिस्सो तिसले लेईये।⁹ ताहली जे तिने मुखिये सै पाणी चख्या सै जे दाखरस बणीगरा था, सै नीं जाणदा था भई ये कित्ते आया (पर तिन्हां सेबकां जो पता था तिन्हे जे पाणी कड्डया था), तां तिने लाड़े जो सद्दीने तिसजो गलाया,¹⁰ “हर कोई पैहले बधिया दाखरस परोसां कने ताहली जे मेहमान पीने तृप्त हुई जांये तिसते बाद सै दाखरस जे परोसया जां सै इतना बधिया नीं होन्दा; पर तै बधिया दाखरस हुण तक संभाली ने रखीरा।”¹¹ यीशुये गलील रे काना च ये पैहला चमत्कारा रा काम्म करीने अपणी महिमा परगट कित्ति कने तिसरे चेलयां तिस पर विश्वास कित्या।¹² इसते बाद यीशु अपणी माता, भाईयां कने चेलयां सौगी कफरनहूम चलिया कने तिथि सै थोडे दिन रुके।

बपवारिआं रा मन्दरा ते बाहर कड्डया जाणा

(मत्ती 21:12; मरकुस 11:15-17; लूका 19:45,46)

13 यहूदियां रा फसह रा त्योहार नजदीक आईरा था, कने यीशु यरुशलेम जो गया।¹⁴ तिथी मन्दरा च यीशुये देख्या भई लोक बैलां, भेडां कने कबूतरां जो बेचणे लगीरे कने सिक्क्यां जो बदलणे औळे सौदागर अपणियां सीटां पर बैठीरे।¹⁵ फेरी तिने रस्सीयां रा कोडा बणाया कने सब्बीजो बैलां कने भेडां समेत मन्दरा ते बाहरौ खदेडीत्या, सिक्क्यां जो बदलणे औळे सौदागरां रे सिक्के खन्डेरीने तिन्हा रियां चौकियां मुन्धियां करीने सद्दीतियां,¹⁶ कबूतर बेचणे औळयां जो तिने बोलया, “इन्हांजो इत्थीते बाहर लेई जवा कने मेरे पिते रे घरा जो बजार मता बणान्दे।”¹⁷ फेरी तिसरे चेलयां जो याद आया भई पवित्र शास्त्रा च लिखीरा, “तेरे घरा खातर मेरा ये जनून मिंजो खाणे औणा।”¹⁸ इस पर यहूदिये तिसने गलाया, “तू जे ये काम्म करीरां तां अहांजो कुण जेआ नशाण दस्सी रां?”¹⁹ फेरी यीशुये तिन्हांजो जबाब दित्या, भई “इस मन्दरा जो ढाई दो, कने मांज ये तिन्हां दिनां ते अन्दर-अन्दर भीं खडा करी देणा।”²⁰ इस पर यहूदि गलाये, “इस मन्दरा बनाणे जो छतालि साल लगीरे कने तू इसजो तिन्हां दिनां च बनाणे री गल्ल करी रां।”²¹ पर अपणिया गल्ला च यीशुये तिस मन्दरा रा जे जिकर कित्या था सै तिसरा अपणा ई शरीर था।²² पर ताहली जे सै मूर्इरयां च ते भीं ते ज्यूनदा हुया तां तिसरे चेलयां जो याद आया भई यीशुये येदा बोलीरा था; कने तिन्हे पवित्र शास्त्रा कने यीशुये रियां गल्लां पर विश्वास कित्या।

यीशु माळुआं रे मना जो जाणां

23 ताहली जे सै यरुशलेम च फसह रे बगत त्योहारा च था, तां मतयां लोकें तिन्हां चमत्कारां जो जे सै दस्सां था देख्खीने तिसरे नौवा पर विश्वास कित्या।²⁴ पर यीशुये अप्पू जो तिन्हारे भरोसे नीं छड्डया, काँभई सै सारयां लोकां जो जाणां था।²⁵ तिस्सो इसा गल्ला री कोई जरूरत नीं थी भई कोई

आईने तिसजो लोकां रे बारे च दस्सो, काँभई लोकां रे मना च क्या, इसजो सै जाणां था।

यीशु कने नीकुदेमुस

3 तिथी फेरीसियां च ते निकुदेमुस नौवा रा इक माळु था, सै जे यहूदियां रा मुखिया था।² सै रात के वगत यीशुये ले आया कने तिस्सो बोलया, गुरु जी, हऊँ जाणां भई तू परमेशरा रिया तरफा ते अहांजो सखाणे आईरा, काँभई सै नशाण जे तू दस्सां तिस्सो परमेशरा री सहायता ते बगैर कोई बी नीं दस्सी सकदा।³ यीशुये तिसजो बोलया, येई सच्च आ, हऊँ तिजो बोलां भई जे कोई बन्दा नौये सिरें ते जन्म नीं लेओ तां सै परमेशरा रे राजा जो नीं देख्खी सकदा।⁴ निकुदेमुसे तिसजो गलाया, “तांजे इक माळु बुढा हुई जां तां फेरी तिसरा जमणा किया हुई सकां? क्या सै फेरी भीं अपणिया मौआ रे पेटा च जाईने दुज्जी बार जन्म लेई सकां? ⁵ यीशुये तिस्सो जबाब दित्या, “हऊँ तेरने सच्च बोलां, ताहलियां तक जे कोई माळु आत्मा ते कने पाणिये ते नीं जम्मो, तां सै कदीं बी परमेशरा रे राजा च नीं जाई सकदा। ⁶ काँभई सै जे शरीरा ते जम्मया, सै शरीर आ; कने सै जे आत्मा ते जम्मया, सै आत्मा हुया। ⁷ मेरिया बोली रिया गल्ला पर चम्भा मत करदा, काँभई तेरा नौयें सिरें ते जमणा जरूरी आ। ⁸ ये हवा री अपणी मर्जी तितखा जे सै बैहणा चाही तितखौ बैहणे लमां ई कने तू तिसारी अवाज सुणां, पर ये नीं दस्सी सकदा भई सै कितखा ते औई कने कितखौ जाई? सै जे कोई आत्मा ते जम्मी रा सै येदा ई आ।” ⁹ निकुदिमुसे तिस्सो जबाब दित्या, भई “ये गल्लां कियां हुई सकां ईयां?” ¹⁰ ये सुणीने यीशुये तिसने गलाया, “तू इस्राएलियां रा गुरु हुईने बी इन्हां गल्लां जो नीं समझदा? ¹¹ हऊँ तुहांने सच्च-सच्च बोलां, भई अहे सै से जाणां ये सै गलां ये, कने सै जे अहे देख्खीरा हुआं तिसरी गबाही दें, कने तुहें लोक सच्चिया गबाहिया जो मनदे नीं ये। ¹² तां जे मैं तुहांने संसारा रियां गल्लां कितियां तां तुहांजो विश्वास नीं हुया, पर जे हऊँ तुहाने स्वर्गा री गल्लां बोलू तां फेरी कियां विश्वास करगे? ¹³ ऊपर स्वर्गा जो कोई नी गया, सिर्फ सैई, सै जे स्वर्गा ते उतरीने आईरा; यनिके माळुये रा पुत्र। ¹⁴ कने तियां जे मूसे जंगला च सप्पा जो उच्चिया ठारी टंगाया, तियां ई माळुये रे पुत्रा रा बी उच्चिया ठारी टंगया जाणा जरूरी आ; ¹⁵ ताकि सै जे कोई विश्वास करो, तिस च अनन्त जीवन पाई लो।

16 “काँभई परमेशरे संसारा रे लोकां ने इतणा प्यार कित्या भई तिने अपणे इको-इक पुत्रा जो तिन्हारे खातर देईत्या, ताकि हर इक माळु सै जे तिस पर विश्वास करो, सै नाश नीं हो पर अनन्त जीवन पाई सको। ¹⁷ परमेशरे अपणे पुत्रा जो संसारा च इस खातर नीं भेजया भई सै संसारा जो पापी साबित करीने तिन्हा जो सजा रा हुक्म देओ, बल्कि इस खातर भेजया भई तिसरे जरिये सारी दुनियां रा छुटकारा हुई जो। ¹⁸ सै जे तिस पर विश्वास करां, तिस पर सजा देणे रा हुक्म नीं हुन्दा, पर सै जे तिस पर बिश्वास नीं करदा, सै दोषी हुई चुकीरा काँभई तिने परमेशरा रे इको-इक पुत्रा रे नौवा पर बिश्वास नीं कित्या। ¹⁹ सजा रे हुक्मा री वजह येई भई जोति इसा दुनिया च आई कने लोकें नेहरे जो जोतिया ते जादा प्यारा समझया, काँभई तिन्हारे काम्म बुरे थे। ²⁰ काँभई सै माळु जे पाप करां सै जोतिया ते नफरत करां, कने सै जोतिया रे नेडे तां नीं औन्दा भई किति तिन्हारे पाप सामणे नीं आई जो। ²¹ पर सै माळु जे सच्चाईया पर चलां सै जोतिया रे नेडे औवां ताकि तिसरे काम्म दिक्खी जाओ भई ये परमेशरा रिया तरफा ते हुईरे।

यीशु रे बारे च यूहन्ने री गबाही

22 इसते बाद यीशु अपणे चेलयां सौगी यहूदिया रे लाके च आईया; कने तिथि सै तिन्हां कने रहीने लोकां जो बपतिस्मा देणे लगया।²³ कने यूहन्ना बी शालेम रे नेडे एनोन च बपतिस्मा देआं था, काँभई मता पाणी होणे रिया वजह ने लोक तिथि आईने बपतिस्मा लेआं थे।²⁴ काँभई ये तिस टैमा री गल्ल ई ताहली जे यूहन्ने जो बन्दी बणाईने जेला च कैद नीं कित्तिरा था।²⁵ ऊत्थी यूहन्ने रे चेलयां रा किसी यहूदिये सौगी शुद्धीकरण रे बारे च बैहस बसाई हुईगी।²⁶ इस खातर सै यूहन्ने ले आये कने बोलया, “गुरु जी, सै माळु जे यरदन नदिया रे पार तुहां सौगी था, कने तिसरी जे तुहें गबाही दिति थी, सै

माह्नु बपतिस्मा देआं, कने हर इक माह्नु तिसलौ जाई रां।" 27 यूहन्ने जबाब दित्या, ताह्नुआं तक जे किसी माह्नुये जो स्वर्गा ते नीं दित्या जाओ, ताह्नुआं तक सै किछ नीं पाई सकदा। 28 तुहें सब मेरे गबाह ये भई मै बोलया था 'हऊँ मसीह नीं आ' पर मिन्जो तिसते अग्रे भेजीरा।' 29 लाडा सै आ, तिस्सो जे लाडी मिलां ई; पर लाडे रा मित्र सै जे खडीने तिसरी सुणां, कने तिस रिया अवाजा ते बड़ा खुश हुआं: मेरी ये खुशी हुण पूरी हुई। 30 जरूरी आ भई सै बधो कने हऊँ घट।

31 सै जे उपरा ते औवां सै सब्बीं ते अब्बल आ; कने सै जे धरतिया ते औवां, सै धरतिया ने जुडीरा, इस खातर सै धरतिया रियां ई गल्लां करां: कने सै जे स्वर्गा ते उतरीरा, सै सब्बीं ते उपर आ। 32 तिने सै जे किछ देकख्या, कने सुणया, सै तिसरी गबाही देआं, पर तिस रिया गबाहिया जो कोई ग्रहण नीं करदा। 33 तिने माह्नुये जे तिसरी गबाही ग्रहण करी ली तिने इसा गल्ला पर मोहर लाईति भई परमेशर सच्चा। 34 काँभई तिस्सो जे परमेशरे भेजीरा, सै परमेशरा रियां ई गल्लां बोलां; काँभई सै आत्मा नापी-नापी ने नीं देन्दा।

35 पिता अपने पुत्रा जो प्यार करां, कने तिने सारा किछ तिसरे अधिकारा च दित्तिरा। 36 इस खातर सै जे कोई तिसरे पुत्रा पर बिश्वास करां अनन्त जीबन तिसजो ई मिलणा; पर सै माह्नु जे परमेशरा रे पुत्रा री गल्ल नीं मनदा तिस्सो सै जीबन देखणे नीं मिलणा, पर परमेशरा रा कोप तिस पर बणी रा रहणा।"

यीशु कने सामरी जनाना

4 फेरी ताहली जे यीशुये जो पता लगया भई फेरीसियें सुणया भई यीशु यूहन्ने ते जादा लोकां जो चले बणाईरां कने तिन्हांजो बपतिस्मा (नोंईयां जिन्दगिया री डुबकी) देई करां - 2 यीशु खुद बपतिस्मा यनि डुबकी नीं दवाई करां था बल्कि ये काम्म तिसरे चले करीरां थे— 3 फेरी सै यहूदिया जो छड्डिने इक बार भीं ते मुडीने गलील प्रदेशा जो चलीप्या, 4 इस बार तिस्सो सामरिया हुईने जाणे पया। 5 इस खातर सै सामरिया रे इक नगर सूखार तक आया, ये नगर तिसा जमीना ले था सै जे याकूबे अपने मुन्डुये यूसुफा जो दित्तिरी थी; 6 तित्थी याकूबा रा खूह बी था। यीशु इसा यात्रा च बड़ा थकीगरा था इस खातर सै खूआ ले बैठीया। ये तिस बेले री गल्ल ई ताहली जे तकरीबन दपैहर हुई चुक्रीरे थे।

7 इतणे च इक सामरी जनाना पाणी भरने जो आई। यीशुये तिसाजो गलाया, "मिन्जो पाणी प्या।" 8 काँभई तिसरे चले त खाणा खरीदणे खातर नगरा जो गईरे थे। 9 तिसे सामरी जनाने तिस्सो बोलया, "तू त इक यहूदि आ, फेरी बी मांज सामरी जनाना ते पीणे खातर पाणी कै मंगया दा!" (यहूदि त सामरियां ने कोई बी सलबन्ध नीं रखदे।) 10 यीशुये जबाब दित्या, "जे तू परमेशरा रे बरदाना जो जाणदी, कने ये बी जाणदी भई सै कुण आ सै जे तेरने गलाई रां, 'मिन्जो पाणी प्या,' तां तू तिसते मंगदी, कने सै तिज्जो जीबना रा जल देन्दा।" 11 जनाने तिसजो गलाया, "प्रभु जी, तेरले त जल भरने जो कोई बर्तण बी नीं आ, कने खूह बड़ा डुग्घा, तां फेरी सै जीबना रा जल तुहले कित्खा ते आया? 12 क्या तू अहारे पिता याकूब ते महान आ, तिने जे अहांजो ये खूह दित्या; कने तिने अपने बच्चयां कने डंगरां सौगी खुद अप्पुं बी इसरा पाणी पित्या?" 13 यीशुये तिसाजो जबाब दित्या, "हर कोई तिस जे इस खूआ रा पाणी पीणा, तिसरी कदीं प्यास नीं बुझणी, 14 पर सै जे कोई तिस पाणिये जो पींहा, सै जे मांह तिस्सो देणा, तिस फेरी कदीं प्यासे नीं रेंहणा; बल्कि तिस पाणिये जे हऊँ तिस्सो देंगा, सै तिस च इक पाणिये रा सोता बणी जाणा सै जे अनन्त काल तक उमडदा रेंहणा।" 15 फेरी तिसे जनाने तिसने बोलया, "प्रभु जी, सै जल मिंजो दे ताकि हऊँ फेरी कदीं प्यासी नीं रऊँ कने नां ई मिन्जो इतणे दूर पाणी भरने जो औणे पौ।"

16 इस पर यीशुये तिसाजो गलाया, "जा अपने घरा- औळें जो सद्दीने इत्थी ली औ।" 17 जनाने जबाब दित्या, "मेरा कोई घरा-औळा नीं आ।" यीशुये तिसाजो बोलया, "तां जे तू बोलया रां ई भई 'तेरा कोई घरा-औळा नीं आ, तां तू ठीक ई बोलया दी। 18 तेरे पांज घरा-औळें थे, कने हुण तू जिस आदमिये सौगी रैई सै बी तेरा घरा-औळा नीं आ; इस खातर तैं सै जे बोलया, ठीक ई बोलया।" 19 इस पर जनाने तिसने गलाया, "प्रभु जी, मिंजो लगां भई तुहें जाणे-जाण ये। 20 अहारेयां पुर्वजें इस पहाड़ा पर अराधना कित्तिरी पर

तुहें बोलां ये भई यरुशलेम ई अराधना री जगह ई।" 21 यीशुये तिसा जो गलाया, "ओ नारी, मेरिया गल्ला पर बस्वास कर भई सै बगत आईरां ताहली जे तुहां पिते री अराधना नां त इस पहाड़ा पर करनी, कने नां ई यरुशलेम च करनी। 22 तुहें सामरी लोक तिस्सो जे नीं जाणदे, तिसरी अराधना करां ये; कने अहें यहूदि तिसरी अराधना करां ये, तिस्सो जे जाणां ये; काँभई छुटकारा यहूदियां चा ते ई आ। 23 पर सै टैम आई करां सै जे तकरीबन हुण बी आ, ताहली जे सच्चे भगत परमेशरा री अराधना आत्मा कने सच्चाईया ने करणे, काँभई पिता अपने खातर येदे ई भगतां जो टोलां। 24 परमेशर आत्मा आ, इस खातर जरूरी आ भई तिसरी अराधना करने औळें आत्मा कने सच्चाईया ने अराधना करो।" 25 जनाने तिसने गलाया, "हऊँ जाणां ई भई मसीह सै जे ख्रिस्तुस नौवां ते बी जाणया जां, औणे औळा; ताहली जे सै अऊंगा, तां तिस अहांजो सारियां गल्लां दसणियां।" 26 यीशुये तिसाने गलाया, "हऊँ जे तेरने गल्ल करीरां, हऊँ सै ई हाया।"

चेलयां री बापसी

27 इतणे च तिसरे चले आई पुजे, कने तिन्हांजो ये देकखीने सच्चीजो बडी रेहानी हुई भई सै इक जनाना ने गल्ल-बात करीरां; पर किन्हीये बी तिसते किछ नीं पूछया, भई "तू क्या चाँह यनि किस खातर इसाने गलाईरां?"

28 फेरी सै जनाना अपना घड़ा तिसा जगह छड्डिने गाँवा जो बापस चलीगी, कने लोकां ने बोलणे लगी, 29 आईने, इक्की येदे माह्नुये जो देकखा, तिने मेरे बारे च सब किछ दस्सीत्या सै जे मैं कित्तिरा था। किति येई मसीह त नीं आ?" 30 इस पर लोक नगरा निकळीने यीशुये ले औणे लगे। 31 इस बिच तिसरे चले तिसते बिनती करने लगे, "गुरु जी, किछ खाई लें।" 32 पर यीशुये तिन्हांते बोलया, "मेरले खाणे खातर येदा भोजन आ तिस्सो जे तुहें नीं जाणदे।" 33 इस पर तिसरे चले अप्पुं बाटियें इक दूजे ते पूछणे लगे, "क्या किन्हीये तिसजो खाणे खातर किछ लन्दीरा?" 34 यीशुये तिन्हांजो गलाया, "मेरा भोजन ये आ भई हऊँ तिसरिया इच्छा जो पूरा करूं, तिने जे हऊँ भेजीरा, कने तिसा जिम्मेदारिया जो पूरा करूं सै जे मिन्जो सौंपीरी। 35 तुहें अक्सर बोलां ये, 'बढाईया जो हल्लिये बी चार महीने पैईरे?' देकखा हऊँ तुहांजो गलाया दा, अपणियां अक्खीं खोल्ही ने खेतां खौं नजर मारा, भई ये पक्कीने बढाईया जो आईगरे। 36 बढाई करने औळा, अपनी मजदूरी पां कने अनन्त जीबना खातर फसल कठेरां, ताकि फसल बाह्ने औळा कने बढणे औळा ये दोनां मिलीने मौज करो। 37 काँभई इत्थी ये कहाबत ठीक बैठीरां ई: बाह्ने औळा कोई होर आ कने बढणे औळा कोई होर। 38 तिज्जो मैं तिस खेता रिया फसला बढणे जो भेजया, तिस च जे तैं मेहणत नीं कित्तिरी: होरीं तिस च मेहणत कीत्ति कने तुहें तिसरिया मेहणता रे फळा च हिस्सेदार हुये।"

सामरियां रा विश्वास करना

39 तिस नगरा रे कई सामरियें तिसा जनाना रे गलाणे पर यीशुये पर बिश्वास कित्या, तिसे ये गबाही दित्ति थी, भई तिने मेरे बारे च सारियां गल्लां दस्सी तियां जो किछ मैं कित्तिरा था।" 40 फेरी ताहली जे ये सामरी तिसले आये, तां तिन्हे तिसते रुकणे खातर बिनती कित्ति, कने सै तिन्हाले दो दिन तक रुकया। 41 कने तिसरयां बचनां ते प्रभावित हुईने होर मतयां सारयां लोके तिस पर बिश्वास कित्या, 42 तिन्हे तिसा जनाना ने बोलया, "हुण अहें सिर्फ तेरे बोलणे तेई बिश्वास नीं करदे; काँभई अहें अप्पुं ई तिस्सो सुणील्या कने हुण अहें ये जाणीगे भई सच्चीजो येई हाया सै जे संसारा जो बचाई सकां।" 43 फेरी दो दिन बाद सै उत्थीते निकळीने गलील जो चलीप्या; 44 काँभई यीशुये खुद गवाही दित्ति भई भविष्यवक्ते जो अपने लाके च आदर नीं मिलदा। 45 ताहली जे सै गलील च आया, तां गलीली बडिया मौजा ने तिसने मिले; काँभई जितणे काम्म तिने त्योहारा रे बगत यरुशलेम च कित्ते थे, सै सब तिन्हे देकखे थे, काँभई सै बी तिस त्योहारा च शामिल थे।

राजकर्मचारिये रे पुत्रा जो चंगा करना

46 फेरी सै भीं ते गलील रे काना च गया, तित्थी जे तिने पाणीये ते दाखरस बणाया था। इस बार तित्थी राजे रा इक नोकर था तिसरा मुन्डु जे

कफरनहूम च बमार था। 47 ताहली जे तिने सुणया भई यीशु यहूदिया ते गलील च आईगरा, सै तिसले गया कने बिनती करने लगया भई तुहें चल्लीने मेरे मुन्डुये जो ठीक करी दवा: काँभई सै मरने जो हुईगरा। 48 यीशुये तिसने गलाया, “तदुआं तक जे तुहें चिन्ह कने चमत्कारा रे काम्म नीं देखी लेंगे ताहुआं तक तुहां बिश्वास नीं करना।” 49 राजे रे नोकरे तिसने बोलया, “प्रभु जी, इसते पैहले भई मेरा मुन्डु मरी जाओ, तुहें मेरे सौगी चला।” 50 यीशुये तिसजो गलाया, “तू जा तेरा मुन्डु ज्युन्दा रैहणा।” तिने माहुये यीशुये री गलाई रियां गलां पर बिश्वास कित्या कने घरा जो चलीप्या। 51 सै घरा जान्दे हुये हलित्यें रस्ते ची था ताहली तिसरे दास तिस्सो मिले कने तिसजो ये खुशखबरी दिती भई हुण तेरा मुन्डु ठीक आ।” 52 तिने तिन्हांते पूछया, भई “किस टैम सै ठीक होणे लगया, तिन्हे जबाब दित्या, “पिछले कल दपैहरयां तकरीबन इक बजे तिसरा बुखार उतरीगरा।” 53 फेरी मुन्डुये रा पिता जाणीया भई ये ठीक तिस बगता री गल इ ताहली जे यीशुये तिसने बोलया था भई, “तेरा मुन्डु जिन्दा रैहणा,” तिसते बाद तिने अपने पूरे परिवारा सौगी बिश्वास कित्या। 54 ये दूज्रा चमत्कारा रा काम्म था सै जे यीशुये यहूदिया ते गलील च आईने दस्या।

उत्तियां सालां रे रोगिये जो चंगा करना

5 इन्हां गलां ते बाद यहूदियां रा इक उत्सव हुया, कने यीशु यरुशलेम जो गया। 2 यरुशलेम च भेड-फाटका ले इक कुण्ड आ सै जे इब्रानी बोलिया च बैतहसदा नाँवा ते जाणया जा; तिसरे कनारे पांज बराण्डे बणीरे। 3 इन्हा बराण्डयां च अन्हे, लंगडे, बमार कने लकबे रे रोगी (पाणिये रे हिलणे रिया आशा च) पैरै रें थे। 4 (काँभई इक येदा बगत हुआं था ताहली जे परमेशरा रे स्वर्गदूत कुण्डा च आईने पाणीये जो लकेहरां थे। पाणिये रे हिल्दे ई पैहले सै जे कोई कुण्डा च उतरां, सै अपणियां सारियां बमारियां ते ठीक हुई जां था, चाहे तिसरी कोई बी बमारी कैं नीं ओ। 5 इन्हां रोगियां च इक येदा रोगी बी था सै जे उत्तियां सालां ते बमार पैरैरा था। 6 ताहली जे यीशुये तिस्सो देखया कने तिसरे बारे च सारा हाल जाणीने भई ये कईयां सालां ते इसा हालता च पैरैरा, तां तिने तिसते पूछया, “क्या तू ठीक होणा चांह?” 7 तिने रोगिये तिस्सो जबाब दित्या, “प्रभु जी, मेरले कोई माहु नीं आ सै जे पाणिये रे हिलणे पर, मिन्जो कुण्डा च लेई जाओ; पर ताहली जे हऊँ पाणिये च जाणे लगां, तां मेरे पुजदे-पुजदे कोई दूज्रा माहु माहते पैहले पाणिये च उतरी जां।” 8 यीशुये तिसजो गलाया, “उड्डी ने खडा ओ, अपना बिस्तरा चक्क, कने चल फिर।” 9 सै माहु इकदम ठीक हुईया, तिने अपना बिस्तरा चक्कया कने चलणे फिरने लगया।

10 सै बिस्त्राम दिन था। इस खातर यहूदि तिस ठीक हुईरे माहुये जो गलाणे लगे, भई आज त बिस्त्राम दिन आ, तिजो अजके दिन अपना बिस्तर चकणे री इजाजत नीं।” 11 इस पर तिने जबाब दित्या, भई “तिने जे हऊँ ठीक कित्या, तिने ई मिन्जो बोलया, ‘अपणा बिस्तरा चक्क कने चल फिर।’” 12 तिन्हे लोके तिसते पूछया, “सै कुण माहु आ तिने जे तिजो बोलया, ‘बिस्तरा चक्क कने चल फिर?’” 13 पर सै माहु जे ठीक हुईरा था, सै नीं जाणदा था भई सै कुण आ, काँभई तिसा जगह मती भीड थी कने यीशु उत्थीते चुपचाप चलीया। 14 इन्हां गलां ते बाद सै माहु यीशुये जो मन्दरा च मिलया कने तिस्सो बोलया, “देख, हुण तू त ठीक हुईया: इस खातर भीं ते पाप देख्यां करदा, नैत किति येदा नीं ओ भई कोई इसते बड्डी मुसकल तूह पर आई जाओ।” 15 तिने माहुये जाईने यहूदियां ने बोलीत्या भई तिने जे हऊँ ठीक कित्या, सै यीशु आ। 16 इसा बजहा ने यहूदी यीशुये जो तंग करने लगे, काँभई सै येदे काम्म बिस्त्राम रे दिन करां था। 17 इस पर यीशुये तिन्हांजो गलाया, “मेरा पिता कर्दी काम्म बन्द नीं करदा, इस खातर हऊँ बी लगातार काम्म करां।” 18 इसा बजह ने यहूदी तिसजो मारने री होर बी जादा कोशत करने लगे, काँभई सै न सिर्फ बिस्त्राम रे दिना री बिधिया जो तोडां, पर परमेशरा जो अपना पिता बोलीने, अप्पूजो तिसरे बराबर समझां था।

पुत्रा रा अधिकार

19 यीशुये तिन्हांजो गलाया, “हऊँ तुहांजो सच्चाई दस्सां, भई पुत्र खुद अपने आप किछ मनी करी सकदा, सै सिर्फ तेदा करां तेदा जे सै पिते जो करदे देख्यां; काँभई तिन्हां-तिन्हां कम्मां जो जे सै करां तिन्हांजो पुत्र बी तियां ई करां। 20 काँभई पिता पुत्रा ने प्यार रक्खां कने जितने काम्म जे सै खुद करां तिन्हां सारयां कम्मां जो सै तिस्सो दस्सां, कने तिस इन्हाते बी बडे काम्म तिस्सो दसणे, ताकि तुहें रेहान हुई जाओ। 21 काँभई तियां जे पिता मूर्इरयां जो ठवाळीने तिन्हांजो नाँयी जिन्दगी देआं, तियां ई पुत्र बी तिन्हांजो जे चांह तिन्हां जिन्दगी देआं। 22 कने पिता किसी रा बी न्याय नीं करदा, पर तिने न्याय करने रा सारा काम्म पुत्रा जो सौपी तरा, 23 इस खातर भई सारे लोक तियां जे पिते रा आदर करां ये तियां ई पुत्रा रा आदर बी करो। सै माहु जे पुत्रा रा आदर नीं करदा, सै तिस पिते रा आदर बी नीं करदा तिने जे तिस्सो भेज्जिरा। 24 हऊँ तुहांने सच्च बोलां, सै जे मेरा बचन सुणीने मेरे भेजणे औले पर बिश्वास करां, सै अनन्त काल रा जीवन पां; कने तिस पर सजा रा हुक्म नीं हुन्दा पर सै मौती ते पार पाईने जिन्दगिया च दाखल हुई चुक्रीरा।

25 “हऊँ तुहांने सच्च-सच्च बोलां भई सै बगत औणे औळा बल्कि आई चुक्रीरा, तिसच मूर्इरयां परमेशरा रे पुत्रा रा बचन सुणना, कने सै जे सुणणे तिन्हां जीऊणा। 26 काँभई जिसा रीतिया ने पिता अप्पू च जीवन रखा, तियां ई तिने पुत्रा जो बी ये हक दित्या भई अप्पू च जीवन रखयां; 27 बल्कि तिस्सो न्याय करने रा बी अधिकार दित्या, इस खातर भई सै माहुये रा पुत्र आ। 28 इस ते चम्भा नीं करा; काँभई सै बगत आई करां भई जितने बी कब्रां चे, तिन्हां तिसरा बचन सुणीने बाहर निकली औणा। 29 तिन्हे जे खरे काम्म कित्तिरे तिन्हा मुडदयां चा ते उठीने ज्युन्दयां हुई जाणा, कने तिन्हे जे बुरे काम्म कित्तिरे तिन्हां बी मूर्इरयां चा ते उठीने इन्हा बुरयां कम्मां री सजा भुगतणे पौणी।

यीशुये रे सबन्धा च गबाही

30 “हऊँ खुद अप्पू ते किछ मनी करी सकदा; पर हऊँ सै जे किछ परमेशरा ते सुणां, सिर्फ तिसरे ई मुताबिक न्याय करां; कने मेरा न्याय सच्चा, काँभई हऊँ अपणिया इच्छा ते नीं बल्कि तिसरी इच्छा चांह तिने जे हऊँ भेज्जिरा। 31 जे हऊँ खुद अपनी गबाही देऊं तां मेरी गबाही सच्ची नीं। 32 मेरिया तरफा ते गबाही देणे औळा इक होर आ, कने हऊँ जाणां भई सै जे मेरी गबाही देआं सै सच्च ई। 33 तुहें लोकां जो यूहन्ने ले भेजया कने तिने सच्चाईया री गबाही दित्ति। 34 पर हऊँ अपने बारे च माहुआ री गबाही नीं चाहन्दा; तां बी ये गलां हऊँ इस खातर बोलां भई तुहांरा छुटकारा (बचाव) हुई सक्को। 35 यूहन्ना तिस दीये साई था सै जे बलीने रोशनी देआं, कने तुहांजो थोडिया देरा खातर तिस रिया जोता च मगन होणा ठीक लगया। 36 पर मेरले सै जे गबाही सै यूहन्ने रिया गबाहिया ते बी बड्डी; काँभई सै काम्म जे पिते पूरा करने खातर मिन्जो सौपीरा यनिके हऊँ तिन्हा ई कम्मां जो करीरां कने सै ई काम्म मेरे गबाह ये भई पिते मिन्जो भेज्जिरा। 37 कने पिता तिने जे हऊँ भेज्जिरा, तिने ई मेरी गबाही दित्ति। तुहें लोके न कर्दी तिसरा बचन सुणया, कने न तिसरा रूप देखीरा: 38 कने तिसरा बचन अपने अन्दर नीं रखदे, काँभई तुहें तिसरा बिश्वास नीं करदे तिस्सो जे पिते भेज्जिरा। 39 तुहें पबित्र शास्त्रा च पदां ये, काँभई तुहें समझां ये भई तिस च अनन्त जीवन तुहांजो मिलां, पर ये सारे शास्त्र मेरी ई गबाही दें; 40 फेरी भीं तुहें जीवन पाणे खातर मेरले नीं औणा चाहन्दे। 41 हऊँ माहुआं ते आदर नीं चाहन्दा। 42 पर हऊँ तुहांजो जाणां भई तुहांरे अन्दर परमेशरा रा प्यार नीं आ। 43 हऊँ अपने पिते रे नाँआं ते आईरा, कने तुहें मिन्जो ग्रहण नीं करदे; पर जे कोई होर अपने ई नाँआं ते आओ, तां तिसजो ग्रहण करी लेणा। 44 तुहें माह पर बिश्वास कियां करी सक्कां ये, काँभई तुहें त अप्पू बाटियें इक दूजे ते आदर लेणा पसन्द करां ये, कने तिस आदरा खा देखदे बी नीं ये सै जे इकमात्र परमेशरा ते औवां? 45 ये नीं सोच्चा भई मांह पिते रे सामणे तुहां पर दोष लगाणा; तुहां पर दोष लगाणे औळा त मूसा, तिस पर जे तुहें भरोसा रखीरा। 46 काँभई जे सच्चीजो तुहें मूसे पर बिश्वास करदे, तां तुहें मांह पर बी

बिश्वास करदे हुन्दे, इस खातर भई तिने मेरे बारे च लिक्खीरा। 47 पर जे तुसैं तिसरी लिक्खी रियां गल्लां पर ई बिश्वास नीं करदे, तां मेरियां गल्लां पर किया बिश्वास करोगे?”

पांज हजार मर्दा जो रोटी ख्वाणा
(मत्ती 14:13-21; मरकुस 6:30-44; लूका 9:10-17)

6 इन्हां गल्लां ते बाद यीशु गलील री तिबिरियास झीला ले गया। 2 कने लोकां री इक बड्डी भीड़ तिसरे पिछे चलीपी काँभई जो रेहान करने ओळे काम्म सै बमारां पर दस्सां था सै तिन्हा जो देख्वां थे। 3 फेरी यीशु पहाड़ा रे ऊपर गया कने तित्थी अपणयां चेलयां सोगी बैठया। 4 यहूदियां रा फसह रा त्योहार नजदीक आईरा था। 5 फेरी यीशुये मतयां लोकां री भीड़ अपणे खो ओन्दी देख्खी, कने फिलिप्पुसा ने बोलया भई “अहं इन्हारे खाणे खातर रोटी कितिते खरीदीने लौणी?” 6 पर तिने ये गल्ल तिससो परखणे खातर बोली, काँभई सै खुद जाणां था भई मांह क्या करना। 7 फिलिप्पुसे तिसजो जबाब दित्या, “दो सौ चान्दिया रे सिक्कयां ने तिन्हां रे खातर इतणी रोटी बी पूरी नीं हुणी भई इन्हां रोटियां च ते हर इक्की जो ग्राह ते जादा मिली जाओ।” 8 तिसरे चेलयां च ते शमौन पतरस रे भई अन्द्रियासे तिसने बोलया, 9 येथी इक मुन्डु आ तिसले जौआ रियां पांज रोटियां कने दो मच्छियां ई; पर इतणे सारेयां लोकां रा इन्हांने क्या बणना?” 10 यीशुये गलाया, “लोकां जो बटाळा।” तिसा जगह च जे सै बैठे तित्थी मता घा था: कने तिन्हां च तकरीबन पांज हजार रे करीब माह्लु थे। 11 फेरी यीशुये रोटियां लैई, कने धन्याबाद करीने तित्थी बैठीरे सारयां लोकां जो परोसणे जो देईती; कने तियां ई मच्छियां च ते जितणी सै लेणा चाँह थे बन्डी तियां। 12 ताहली जे सै रञ्जी ने खाई बैठे तां तिने अपणे चेलयां जो बोलया, भई “जितणे टुकड़े बचारे, तिन्हांजो कद्दा करी लो ताकि सै बेकार नीं जाओ।” 13 ताहली जे सारे खाई बैठे, तां फेरी तिन्हें पंजां रोटियां ते बचारे सारे टुकड़े कद्दे किते कने तिन्हा री बारह टोकरियां भरीयां। 14 यीशुये रे इस चमत्कारा जो देख्खीने लोक बोलणे लगे, भई “सै भविष्यबक्ता जे इस संसारा च औणे ओळा था, ये पक्का सैई हाया।” 15 यीशु ये जाणीया भई ये मिन्जो राजा बनाणे खातर आईने पकड़ना चाँये, इस खातर सै कल्हा ई पहाड़ा पर चलीया।

यीशुये रा पाणिये पर चलणा
(मत्ती 14:22-33; मरकुस 6:45-52)

16 फेरी ताहली जे सांझ हुई, तां तिसरे चले झीला रे कन्डे जो गये, 17 कने सै किश्तिया च बैठीने झीला पार कफरनहूम जो जाणे लगे। ताहली नेहरा हुई चुक्कीरा था, कने यीशु हलित्तियें तक तिन्हाले नीं पुञ्जीरा था। 18 तूफाना रिया बजह ने झीला च पाणिये रियां बडबडियां छालियां औणे लगियां। 19 ताहली जे सै किश्तिया चलान्दे चलान्दे तकरीबन तिन-चार मील चलीये, फेरी तिन्हे यीशुये जो पाणिये पर चलदे कने किश्तिया खो ओन्दे देख्खया, तां सै डरीये। 20 पर यीशुये तिन्हांजो बोलया, भई “हऊँ आ; मता डरदे।” 21 फेरी झटपट तिन्हें यीशुये जो किश्तिया च चढाईल्या कने थोड़िया ई देरा च किश्ती तिसा जगह पुञ्जीगी तित्थी जे सै जाईरां थे।

लोकां रा यीशुये जो टोळणा

22 दूजे दिन लोकां रिये तिसे भीड़े सै जे झीला रे दूजे कन्डे खड़ीरे थे, ये देख्खया भई तित्थी इक ई किश्ती थी कने यीशु अपणे चेलयां सोमी तिसा च नीं बैठया था, पर सिर्फ तिसरे ई चले गये थे। 23 फेरी किछ होर किश्तियां तिबिरियासा ते आईने तिसा जगह ले आईयां, तित्थी जे तिन्हे प्रभुये रा धन्यवाद करने ते बाद रोटी खादी थी। 24 इस खातर तां जे लोकें देख्खया भई नां त उत्थी यीशु आ, कने नां तिसरे चले, तां सै तिन्हां किश्तियां च बैठे कने यीशुये जो टोलदे-टोलदे कफरनहूम च पुञ्जीगे।

यीशु जीबना री रोटी

25 झीला रे दूजे कनारे तां जे सै तिसने मिले तां तिन्हें बोलया, गुरु जी, तुहें इत्थी किस बगत पुजे?” 26 यीशुये तिन्हांजो जबाब दित्या, भई “हऊँ तुहांने

सच्च बोलां, तुहें मेरे पिछे इस खातर नीं आये भई तुहें चमत्कार देखे, पर इस खातर आये भई तुहांजो खाणे जो पेट भरिने रोटी मिली। 27 तिसा रोटीया खातर मेहणत नीं करा सै जे सड़ी जाई, पर तिसा खातर मेहणत करा सै जे अनन्त जीवन देआं, सै जे माहणुये रे पुत्रा तुहांजो देणा; काँभई पिता परमेशरे तिस पर ई मोहर लाईरी।” 28 लोकें तिसते पूछ्छया, “तिन्हां कम्मां जे परमेशर चाँह, तिन्हाजो करने खातर अहें क्या करिये?” 29 यीशुये तिन्हांजो जबाब दित्या, “परमेशर सै जे चाँह सै ये आ, भई तिससो जे तिने भेजीरा, तुहें तिस पर बिश्वास करा।” 30 फेरी लोकें तिसने बोलया, “फेरी तू केढा जेआ नशाण दसणा भई अहें तिन्हांजो देख्खीने तूह पर बिश्वास करो? 31 अहारे पुरखयां जंगला च मन्ना खादया था; तियां जे पबित्र शास्त्रा च लिखिरा: भई ‘तिने तिन्हांजो खाणे खातर स्वर्गा ते रोटी दित्ति।’” 32 यीशुये तिन्हाजो गलाया, “हऊँ तुहांते सच्च सच्च बोलां भई मूसे सै रोटी तुहांजो स्वर्गा ते नीं दीत्ति, पर मेरा पिता तुहांजो सच्ची रोटी स्वर्गा ते देआं। 33 काँभई परमेशरा री रोटी सैई, सै जे स्वर्गा ते उतरीने दुनियां जो जीवन देई।” 34 फेरी तिन्हें तिसने बोलया, “प्रभू जी, ये रोटी अहां जो हमेशा देआ कर।”

35 यीशुये तिन्हांने बोलया, “जीवना री रोटी हऊँ ई: सै जे मेरले आंगा तिस कर्दी भूखे नीं रैहणा कने सै जे माह पर बिश्वास करगा, तिस कर्दी प्यासे नीं हुणा। 36 पर मैं तुहांने गलाया भई तुहें मिंजो देख्खी बी लया, तां बी मांह पर बिश्वास नीं करदे। 37 सै किछ जे पिता परमेशर मिंजो देआं सै सारा मेरलौं ई आणा, कने तिसजे मेरले आणा तिसजो मांह कर्दी नीं कडणा। 38 हऊँ स्वर्गा ते इस खातर नीं आईरा, भई अपणी इच्छा पूरी करुं, पर हऊँ इस खातर आईरा भई अपणे भेजणे औले री इच्छा जो पूरा करुं। 39 तिने जे हऊँ भेजया तिसरी इच्छा येई, भई सै जे किछ तिने मिंजो दित्तिरा तिससो हऊँ पूरा पूरा संभालीने रक्खुं, पर मांह तिन्हां सब्बीं जो न्याय रे दिन नौईं जिन्दगी देणी। 40 काँभई मेरे पिते री इच्छा येई, भई तिसजे पुत्रा जो देख्खीने तिस पर बिश्वास करना तिस अनन्त जीवन पाणा; कने मांह सै न्याय रे दिन भीं ते जिन्दा करी देणा।

41 इस खातर यहूदी यीशुये परां बडबडाने लगे काँभई तिने बोलया था, भई “सै रोटी जे स्वर्गा ते उतरीरी, सै हऊँ ई।” 42 कने सै बोलणे लगे, क्या ये सैई यीशु नीं आ, सै जे यूसुफा रा पुत्र आ, तिसरे पिते कने माता जो जे अहें जाणां ये? तां सै हुण किया बोलां, भई हऊँ स्वर्गा ते आईरा? 43 यीशुये तिन्हाजो जबाब दित्या, “अपूँ बाटियें मता बडबडान्दे। 44 तिने परमेशर जे हऊँ भेजीरा, बिना तिस रिया मर्जिया ते तदुआं तक मेरले कोई नीं आई सकदा, तदुआं तक जे पिता, तिसरे दिला च, मेरले औणे री इच्छा पैदा करीने तिससो खिजी नीं लो; कने मांह न्याय रे दिन सै मूर्ईरयां च ते फेरी भीं जिन्दा करीने उवाळना। 45 भविष्यबक्तयां अपणे लेक्खां च ये लिखीरा: भई ‘सै सारे परमेशरा रे सखाईरे होणे।’ तिन्हे किन्हिये जे अपणे कान्न पिता परमेशरा री दरसी रियां गल्लां सिखणे जो लाईरे, तिन्हां ई मेरलौं आणा। 46 ये नीं आ भई किन्हियें पिते जो देख्खया; पर सै जे परमेशरा रिया तरफा ते आ सिर्फ तिने ई पिते जो देख्खया। 47 हऊँ तुहांने सच्च बोलां भई सै जे बिश्वास करां अनन्त जीवन तिसरा ई हाया। 48 जीवना री सै रोटी हऊँ आ। 49 तुहांरयां बजुर्ग जंगला (बीराना) च मन्ना खाद्या कने सै मरी चुक्कीगरे। 50 ये सै रोटी सै जे स्वर्गा ते उतरां ई ताकि माह्लु तिसा च ते खाओ कने मरो नीं। 51 हऊँ स्वर्गा ते आईरी येदी रोटी सै जे जीवन देई; जे कोई इसा रोटिया चते खाओ, तां तिस हमेशा जिन्दे रैहणा; कने सै रोटी जे मांज संसारा रे लोकां खातर देणी, सै मेरा मास आ।

52 इसा गल्ला पर यहूदी ये बोलीने अपूँ बाटियें बैहसणे लगे, भई “ये माह्लु कियां अहांजो अपणा मास खाणे जो देई सकां?” 53 फेरी यीशुये तिन्हां बोलया, “हऊँ तुहांजो सच्च सच्च बोलां तदुआं तक जे तुहें माह्लुये रे पुत्रा रा मांस नीं खाओ, कने तिसरा खून नीं पीओ, तदुआं तक तुहां च जीबन नीं आ। 54 सै जे मेरा मांस खां कने मेरा खून पीओ, अनन्त जीवन तिसरा ई हाया; कने न्याय रे दिन मांह सै मूर्ईरयां चते भीं ज्युन्दा करीने उवाळणा। 55 काँभई हकीकत च मेरा मांस खाणे री, कने मेरा खून पीणे री चीज ई। 56 सै जे मेरा मांस खां कने मेरा खून पीओ सै मांह च बास करां, कने हऊँ तिसच। 57 बिल्कुल तियां ई जियां जे जिन्दा पिते हऊँ भेजीरा कने हऊँ परम पिते रिया बजह ने ज्युन्दा, तियां ई सै बी तिस जे हऊँ खाणा मेरिया बजह ने

जिन्दे रहणा। 58 ये सैई रोटी सै जे स्वर्गा ते उतरीरी, ये रोटी तिसा रोटिया साई नी सै जे बजुर्गे खाद्री कने मरीगे; सै जे कोई इसा रोटिया खाँगा, तिस हमेशा जिन्दे रहणा। 59 ये गल्लां तिने कफरनहूम च इक्की प्रार्थना रे घरा च उपदेश देन्दे बगत बोलीं।

अनन्त जीबना रे बचन

60 इस खातर तिसरे चेलयां च ते कईयें इन्हां गल्लां जो सुणीने बोलया, भई "ये शिक्षा त बड़ी कठण ई, इसा जो कृण सुणी सकां?" 61 यीशुये अपणे मना च जाणील्या भई मेरयां चेलयां जो मेरियां इन्हां गल्लां ते कोई शकैत ई, इस खातर तिने अपणे चेलयां ते पुछ्या, "क्या तुहें इन्हां गल्लां ते परेशान ये? 62 कने जे तुहें माह्ये रे पुत्रा जो तिसा जगह जे सै पैहले था, भी ते तित्थी उपर जान्दा देखगे, तां क्या हुणा? 63 आत्मा त जीवन देणे औळा, शरीरा ते कोई फेदा नी आ; सै गल्लां जे मैं तुहांने गलाईयां सै आत्मा इ, कने जीवन बी आ। 64 पर तुहां च येदे कितने लोक ये सै जे बिश्वास नीं करदे।" काँभई यीशु पैहले तेई जाणां था भई सै जे बिश्वास नीं करदे, सै कृण ये; कने मिन्जो पकड़वाणे औळा कृण आ? 65 कने तिने गलाया, "इस खातर मैं तुहांने बोलया था भई तदुआं तक मेरले कोई नीं आई सकदा तदुआं तक जे परम पिता तिस्सो मेरले औणे री अनुमति नीं देई दो।"

पतरसा रा बिस्वास

66 इस कारण यीशुये रे कईयें भगतें मुँह मोडील्या कने हटीने कदीं तिसले नीं आये। 67 फेरी यीशुये अपणे बारह चेलयां ने गलाया, "क्या तुहें बी जाणा चायें?" 68 शमौन पतरसे तिस्सो जबाब दित्या, "प्रभु जी, अहें किसलौ जाईये? अनन्त जीवन देणे औळियां गल्लां त तेरले ई हाया। 69 कने अहें बिश्वास कित्या कने ये जाणीये भई परमेशरा रा पवित्र माह्ये त तू ई हाया।" 70 यीशुये तिन्हांजो जबाब दित्या, "क्या तुहां बाहरां जो मैं ई नीं चुणीरा? फेरी भीं तुहां च इक माह्ये शैतान आ।" 71 सै शमौन इस्करियोती रे मुन्डुये यहूदा रे बारे च गल्ल करीरां था काँभई सै यीशुये रा बरोधी बणीने तिस्सो धोखा देणे औळा था, काँभई सै ई बाहरां चेलयां च ते इक था।

यीशु कने तिसरे भाई

7 इन्हां गल्लां ते बाद यीशु गलील च घुमदा रैया; काँभई यहूदी तिस्सो मारने रा जतन करीरां थे, इस खातर सै यहूदिया च घुमणा नीं चाहन्दा था। 2 यहूदियां रा झोंपडियां (डेरयां) रा त्योहार नजदीक आईरा था। 3 इस खतर यीशुये रे भाई बन्धुयें तिसने गलाया, "तुहांजो ये जगह छड्डीने यहूदिया चली जाणा चहिन्दा, ताकि तेरे भगत तेरे तिन्हां कम्मां जो उत्थी बी देखी सको तिन्हां जे तू करां। 4 काँभई येदा कोई नीं हुणा सै जे मशहूर होणा चाओ, कने लुक्खी ने काम्म करो। जे तू चमत्कारा रे काम्म करां, तां अप्पूँजो सारे संसारा रे सामणे परगट कर।" 5 काँभई यीशुये रे भाई बी तिस पर बिश्वास नीं करदे थे। 6 फेरी तिने तिन्हांने बोलया, "तुहांरे खातर सारा बगत ठीक आ, पर हल्लियें तक मेरा सही बगत नीं आईरा। 7 संसार तुहांने बैर नीं करी सकदा, पर सै माह्ने बैर रक्खां काँभई हऊँ तिसरे बरोधा च ये गबाई देआं भई तिसरे काम्म बुरे। 8 तुहें त्योहारा च जावा; हऊँ हल्लियें इस त्योहारा च नीं जाई सकदा, काँभई हल्लियां तक मेरा बगत पूरा नीं हुईरा।" 9 सै येदा गलाणे ते बाद गलील च रुकीग्या।

झोंपडियां रे त्वाहारा च यीशु

10 पर ताहली जे तिसरे भाई त्योहारा च चलीये तां सै अप्पूँ बी गया, पर सै सामणे नीं, छुपीने गया था। 11 यहूदि अगबे त्योहारा च तिस्सो ये बोलीने टोलणे लगे, भई "सै माह्ये किति आ?" 12 कने लोकां च तिसरे बारे गुप-चुप कई सारी गल्लां हुईयां: मते जणे बोलीरां थे, भई "सै बड़ा खरा माह्ये आ।" कने कई बोलां थे, "ना, सै लोकां जो भटकां।" 13 तां बी यहूदियां रे डरा रे मारे कोई बी माह्ये तिसरे बारे च खुल्हीने नीं बोली पायादा था।

त्वाहारा च यीशुये रा उपदेश

14 ताहली जे त्योहारा रे अघे दिन बीतीगे; तां यीशु मन्दरा च जाईने उपदेश करने लगया। 15 फेरी यहूदी चम्भा करीने गलाणे लगे, भई "ये माह्ये सै जे कदीं स्कूला नीं गया फेरी भीं इतणा किछ कियां जाणां?" 16 यीशुये तिन्हांजो जबाब दित्या, "सै उपदेश जे हऊँ देआं सै मेरा अपणा नीं आ, पर ये तिस रिया तरफा ते आ, तिने जे हऊँ भेज्जीरा। 17 जे कोई परमेशरा रिया मर्जीया पर चलणा चाओ, तां सै इस उपदेशा रे बारे च समझी जांगा भई जो उपदेश हऊँ देआं सै तिसरा या हऊँ अपणिया तरफा ते देई करां। 18 सै जे अपणिया तरफा ते किछ गलां, सै अपणी बडयाई करवाणा चाह; पर सै जे अपणे भेजणे औले री बडयाई चाह सैई सच्चा माह्ये आ, कने तिसच कोई खोट नीं आ। 19 मूसे त तुहांजो व्यवस्था दित्तीरी, पर तुहां चाते कोई बी तिस पर अमल नीं करदा। तुहें मिन्जो कजो मारना चायें?" 20 लोकें जबाब दित्या, "तू पर भूत स्वार आ। तिजो कृण मारना चाँह?" 21 यीशुये तिन्हांजो जबाब दित्या, भई "मैं इक काम्म कित्या कने तुहां सब्बीं जो हैरानगी हुईगी। 22 इसा वजह ने मूसे तुहांजो खतने रा हुक्म दित्या (ये नियम मूसे रा नीं था बल्कि तुहांयां पुरखयां ते चलदा आईरां), कने तुहें बिस्माम रे दिन माह्ये रा खतना करां ये। 23 बिस्माम दिना च माह्ये रा खतना इस खातर कित्या जां ताकि मूसे री व्यवस्था नीं टुटो, तां तुहें माह पर कजो इस खातर गुस्सा करां ये भई मैं बिस्माम रे दिन इक्की माह्ये जो बिल्कुल ठीक कित्या? 24 मुँह देक्खीने न्याय नीं करा, पर सच्चाईया रे मुताबिक ठीक न्याय करा।"

क्या यीशु ई मसीह आ?

25 बाद बिच यरुशलेम च रहणे औले लोक बोलणे लगे, "क्या ये सैई माह्ये नीं आ, तिस्सो जे लोक मारने रा जतन करी रांये? 26 मगर देख्खा, सै त सारयां लोकां ने निधडक गलाई बोलीरां कने कोई तिसजो किछ नीं गलाईरां। क्या यहूदी अगवयां सच्चीजो जाणील्या भई येई मसीह आ? 27 खैर अहें त इसजो जाणां ये भई ये माह्ये कितिते आईरा; पर ताहली जे सच्चे मसीह औणा तां किसी जो बी पता नीं चलणा भई सै कितिते आया।" 28 फेरी यीशुये मन्दरा च उपदेश देन्दे हुये जोरा ने बोलया, "तुहें मिन्जो जाणां ये, कने ये बी जाणां ये भई हऊँ कितिरा। हऊँ त अपणिया मर्जीया ते नीं आईरा, पर मिन्जो भेजणे औळा सच्चा, तिस्सो तुहें नीं जाणदे। 29 पर हऊँ तिस्सो जाणां काँभई हऊँ तिसरिया तरफा ते आ कने तिने ई हऊँ भेज्जीरा।" 30 तिस रिया इसा गल्ला पर सै तिस्सो पकड़ने रा जतन करने लगे, पर कोई बी तिसजो हात्थ नीं पाई सक्या काँभई तिसरा बगत हल्लियें नीं आईरा था। 31 फेरी भीं भीड़ा च ते मतयां लोकें तिस पर बिश्वास कित्या कने बोलणे लगे, "मसीह ताहली जे औणा तां तिस क्या इसते बी जादा चमत्कार दसणे सै जे इने दस्से?"

यीशुये जो पकड़ने री कोशिश

32 फेरीसियें लोकां जो यीशुये रे बारे च हौलयां-हौलयां ये गल्लां गलान्दे हुए सुणया; कने मुखिये याजकें कने फेरीसियें तिस्सो पकड़ने जो सपाही भेज्जे। 33 इस पर यीशुये गलाया, "हऊँ होर थोडिया देरा तक तुहां सौगी आ, तिसते बाद माह तिसलौ बापस चली जाणा तिने जे हऊँ भेज्जीरा। 34 तुहां हऊँ टोलणा, पर तुहांजो माह नीं मिलणा; कने तित्थी जे हऊँ आ, तित्थी तुहें नीं आई सकदे।" 35 फेरी यहूदी अगबे अप्पूँ बाटियें गलाणे लगे, "इस किति जो जाणा भई तित्थीजे अहें इस्सो टोली नीं पांगे? येदा लगां भई ये किति उत्थी त नीं जाई करां तित्थी जे अहारे लोक यूनानियां रे नगरा च तितर-बितर हुईने रैई रांये, क्या तिस यूनानियां जो बी उपदेश देंगा? 36 ये क्या गल्ल हुई सकां ई सै जे तिने गलाई, भई तुहां हऊँ टोलणा, पर माह तुहांजो नीं मिलणा; कने तित्थी जे माह हूणा, तित्थी तुहें नीं आई सकदे?"

जीबना रे पाणिये री नदियां

37 त्योहारा रे खत्म होणे औले दिन, सै जे खास दिन आ, यीशु उड्या कने जोरा ने गलाया, "जे कोई त्याह्या हो तां मेरले आईने पीओ। 38 सै जे माह पर

बिश्वास करगा, तियां जे पवित्र शास्त्र बोलां तिसरिया अंतरात्मा चते जीबना रे पाणिये री नदियां बहणे लगी जाणियां।³⁹ तिने ये बचन पबित्र आत्मा रे बारे च गलाया, तिसजो जे तिस पर बिश्वास करने औले पाणे औले ई थे; सै आत्मा हल्लिये किसी पर बी उतरीरा नीं था, काँभई यीशु हल्लिये अपणिया महिमा च नीं आईरा था।⁴⁰ फेरी भीडा च ते किछ लोके ये गल्लां सुणीने बोलया, “सच्ची जो येई सै भविष्यबकता।”⁴¹ होरनीं गलाया, “ये मसीह आ।” पर किन्हिये गलाया, “कां? क्या मसीहे गलीला ते औणा ?⁴² क्या पबित्र शास्त्रा च ये नीं लिखिरा भई मसीहा दाऊद री सन्तान होणा कने तिस बैतलहम गाँवा ते औणा, तिथी जे दाऊद रैयां था ?”⁴³ इस खातर तिस रिया वजह ने लोकां च फूट पैईगी।⁴⁴ तिन्हां च ते कितने तिससो पकड़ना चाहं थे, पर किन्हीयें तिसजो हात्थ नीं लाया।

यहूदी अगबयां रा अविश्वास

⁴⁵ इस खातर मन्दरा रे सपाही मुखिये याजकां कने फरीसियां ले बापस आये; तिन्हें सपाहियां ते पूछया, “तुहें तिससो कां नीं ल्याये?”⁴⁶ सपाहियें जबाब दित्या, भई “किन्हिये माहुये कदीं येदियां गल्लां नीं कितियां तियां जे सै बोलां।”⁴⁷ फरीसियें तिन्हाजो जबाब दित्या, “क्या तुहें बी तिसरे जाला च तनी फस्सीये? ⁴⁸ क्या यहूदी अगबयां या फरीसियां च ते किन्हियें तिस पर बिश्वास कित्या? ⁴⁹ पर ये लोक तिन्हांजो जे ब्यबस्था रा ज्ञान नीं आ, सापित ये।”⁵⁰ नीकुदेमुसे (सै जे पैहले तिसले आया था कने तिन्हां च ते इक था) तिन्हाने बोलया, ⁵¹ “क्या अहांरी ब्यबस्था, किसी माहुये जो बगैर तिसरी सुणे या जाणे भई सै क्या करां, गुनेहगार समझां ई?”⁵² तिन्हे तिसजो जबाब दित्या, “क्या तु बी गलीली आ? शास्त्रां जो पढ़ तां तिजो पता चलणा भई गलील ते कदीं कोई भविष्यबक्ता नीं औणा।”⁵³ [फेरी सारे अपणे-अपणे घरा जो चलीये।

कलंकणी जनाना जो माफ करना

8 पर यीशु जैतून पहाड़ा पर गया। ² कने अगले दिन तडके ई सै फेरी मन्दरा च आया; सारे लोक तिसलो आये कने सै बैठीने तिनां उपदेश देणे लगया। ³ फेरी शास्त्री कने फरीसी व्यभिचार करदी हुई इक्की जनानां जो पकड़ीने ली आये, कने तिसा जो लोकां रे बिच खडा करीने यीशुये ने बोलया, ⁴ “गुरु जी, ये जनाना बुरा काम्म करदी हुई पकड़ोई। ⁵ ब्यबस्था च मूसे अहांजो ये हुक्म दित्या भई येदियां जनानां जो पथराव करो। इस खातर तू इसा जनाना रे बारे च क्या बोलां?” ⁶ तिन्हे यीशुये जो परखणे रे खातर ये गल्ल बोली ताकि तिन्हाजो कोई येदा बहाना मिली जाओ तिसते जे सै तिस पर कोई दोष लगाई सक्को। पर यीशु थल्लेखां झुकीने अपणिया गुट्टिया ने जमीना पर लिखणे लगया। ⁷ काँभई सै तिसजो बार-बार पूछदे ई रये, इस खातर यीशु सीधा हुईन खड्या कने तिन्हांजो गलाया, “तुहां च सै जे पापी नीं आ सै सब्बोते पैहले इसा जनाना जो पत्थर मारो।” ⁸ कने सै फेरी भीं ते थल्लेखां झुकीने लिखणे लगया। ⁹ ताहली जे लोके येदा सुणया तां तिथीते बड्डयां ते लेईने छोटयां तक, हौलयां-हौलया इक-इक करीने खिसकणे लगे, कने यीशु कल्हा रैहीग्या, कने सै जनाना बी उत्थी बिच खडी रैई। ¹⁰ यीशु सिधा हुईने खड्या कने तिसाजो बोलया, “नारी, सै सब जणे कितौ गये? क्या तिजो किन्हीये सजा देणे रा हुक्म नीं दित्या?” ¹¹ तिसे बोलया, “प्रभु जी, नां किन्हीये नीं।” यीशुये गलाया, “हउं बी तिजो सजा देणे रा हुक्म नीं देंदा; जा, हुण भीं ते पाप देक्खां करदी।”

संसार री जोत प्रभु यीशु मसीह

¹² फेरी यीशुये भीं लोकां ने बोलया, “संसार री लोय हउं ई; सै जे मेरे पिछे चलगा कदीं नेहरे च नीं रैहन्गा, पर जीबना री लोय पांगा।” ¹³ इस पर फरीसीयें तिसने बोलया, “तू अपणी गबाही अप्पू देआं इस खातर तेरी गबाही ठीक नीं।” ¹⁴ यीशुये तिन्हांजो जबाब दित्या, भई “जे हउं अपणी गबाही अप्पू देआं, तां बी मेरी गबाही ठीक ई, काँभई हउं जाणां भई हउं कितिते आईरा कने कितिजो जां? पर तुहें लोक ये नीं जाणदे भई हउं कितिते आईरा कने कितिजो जां। ¹⁵ तुहें लोक शरीरा रे मुताबिक न्याय करां ये; हउं किसी

रा न्याय नीं करदा। ¹⁶ कने जे हउं न्याय करूं बी, तां मेरा न्याय सच्चा; काँभई हउं कल्हा नीं आ, पर हउं आ, कने पिता, तिने जे मिन्जो भेज्जिरा। ¹⁷ कने तुहां रिया व्यवस्था च बी लिखिरा भई दुई जणयां री गबाही मिलीने ठीक हुआ ई; ¹⁸ इक त हउं अपणी गबाही अप्पू देआं, कने दुजे पिता मेरी गबाही देआं तिने जे हउं भेज्जिरा।” ¹⁹ इस पर लोके तिसजो बोलया, “तेरा पिता किति आ?” यीशुये जबाब दित्या, भई “न तुहें मिन्जो जाणदे, न त मेरे पिते जो, जे तुहें मिन्जो जाणदे हुन्दे, तां मेरे पिते जो बी जाणी लेन्दे।” ²⁰ ये गल्लां तिने मन्दरा च उपदेश देन्दे हुये भण्डार घरा च बोली, कने किन्हिये बी तिससो नीं पकड़या, काँभई तिसरा बगत हल्लियें तक नीं आईरा था।

अपणे बारे च यीशुये री गलाईरी गल्ल

²¹ यीशुये तिन्हाने इक बार भीं बोलया, “मैं दूरां चलीरा कने तुहां हउं टोलणा कने तुहां अपणेयां पापां च मरना; तिथी जे हउं जां, तिथी तुहें नीं आई सकदे।” ²² इस पर यहूदियें गलाया, “क्या तुहें सोचां ये भई सै आत्महत्या करने औळा? काँभई तिने बोलया ‘तुहें तिथी नीं आई सकदे तिथी जे हउं जाईरां?’” ²³ तिने तिन्हाने गलाया, “तुहें थल्ले रे कने हउं उपरा रा; तुहें संसारा रे, हउं संसारा नीं आ। ²⁴ इस खातर मैं तुहांने बोलया भई तुहां अपणेयां पापां च मरना, काँभई जे तुहें बिश्वास नीं करगे भई हउं सैई आ, तां अपणेयां पापां च मरगे।” ²⁵ तिन्हे तिसते पूछया, “तू कुण आ? यीशुये तिन्हांजो जबाब दित्या, “हउं सैई आ सै जे शुरु ते तुहांजो बोलदा आया। ²⁶ तुहांरे बारे च गलाणे जो कने तुहांरा न्याय करने जो मेरले मता किछ आ; पर मेरा भेजणे औळा सच्चा, कने जो किछ हउं तिसते सुणां, सैई संसारा ने बोलां।” ²⁷ सै ये नी समझी पाये भई यीशु तिन्हां जो पिते रे बारे च गलाया दा। ²⁸ फेरी यीशुये बोलया, भई “ताहली जे तुहे माहुये रे पुत्रा जो उच्चिया ठारी चढांगे, तां जाणगे भई हउं सैई आ; कने हउं अपणिया तरफा ते किछ नीं करदा, पर तियां जे मेरे पिते मिन्जो सखाईरा, हउं तियां ई ये गल्लां गलां। ²⁹ कने मेरा भेजणे औळा मेरे कने आ; तिने हउं कल्हा नीं छड्डीरा काँभई हउं सदा सैई काम्म करां तिसते जे मेरा पिता खुश हुआं।” ³⁰ ताहली जे सै ये गल्लां गलाई करां था भई मतयां सारयां लोके तिस पर बिश्वास कित्या।

सच्चा तुहांजो छुटकारा देणा

³¹ फेरी यीशु तिन्हां यहूदी अगबयां ने गलाणे लगया सै जे तिस पर बिश्वास करां थे, “जे तुहें लोक मेरे बचनां पर बणीरे रैहंगे, तां सच्ची जो तुहें मेरे चले हुणे। ³² कने सच्चाईया जो जाणगे, कने सच्चाई तुहांजो अजाद करगी।” ³³ इस पर तिन्हे यीशुये जो जबाब दित्या, “अहें त अब्राहमा रे बंशा ते, कने कदीं किसी रे दास नीं हुये। फेरी तू कियां बोलां भई तुहां अजाद हुई जाणा?”

³⁴ यीशुये तिन्हा जो जबाब दित्या, “हउं तुहांने सच्च-सच्च बोलां भई सै जे कोई पाप करां सै पापा रा दास आ। ³⁵ कने दास सदा घरें नीं रैहंदा; पुत्र सदा रैयां। ³⁶ इस खातर जे पुत्र तुहांजो अजाद करगा, तां सच्चीजो तुहां अजाद हुई जाणा। ³⁷ हउं जाणां भई तुहें अब्राहम रे बंशा ते; तां बी मेरा बचन तुहांरे दिला च जगह नीं पान्दा, इस खातर तुहें मिन्जो मारी देणा चांये। ³⁸ हउं सैई बोलां सै जे मैं अपणे पिते ले देखया; कने तुहें बी सैई करदे रैं सै जे तुहें अपणे पिते ते सुणीरा।”

³⁹ तिन्हे तिसजो जबाब दित्या, भई “अहांरा पिता त अब्राहम आ।” यीशुये तिन्हाने गलाया, “जे तुहें अब्राहम री सन्तान हुन्दे, तां अब्राहमा रे बराबर काम्म करदे। ⁴⁰ पर तुहें त हुण मांह साई येदे माहुये जो मारी देणा चांये, तिने जे तुहांजो सै सच्चा वचन दस्सया सै जे परमेशरा ते सुणया; येदा त अब्राहमे मनीं कित्या। ⁴¹ तुहें अपणे पिते रे बराबर काम्म करां ये।” तिन्हे यीशुये ने बोलया, “अहें व्यभिचारा ने नीं जम्मे, अहांरा इक ई पिता यनि परमेशरा।” ⁴² यीशुये तिन्हाजो जबाब दित्या, “जे परमेशर तुहांरा पिता हुन्दा, तां तुहें मेरने प्यार रखदे; काँभई हउं परमेशरा रे बिच्चा ते निकलीने आईरा। हउं अपणिया मर्जीया ते नीं आईरा, पर तिने ई मिन्जो भेज्जिरा। ⁴³ तुहें मेरी गल्ल कां नीं समझदे? इस खातर भई तुहें मेरा बचन सुणी नीं सकदे। ⁴⁴ तुहें अपणे पिते शैताना री सन्तान ये कने अपणे पिते रियां इच्छां जो पूरा करना चांये।

सैं त शुरु ते खुनी आ कने तिने कदीं सचाईया रा पक्ष नीं लेआ, काँभई सच्च तिसच हाया ई नींआ। झूठ बोलणा त तिसरे स्वाभावा ची हाया; काँभई सैं झूठा कने सारयां झूठां जो जन्म देणे औळा पिता। 45 पर हऊं जे सच्च बोलां, इस खातर तुहें मेरा बिश्वास नीं करदे। 46 तुहां च ते कुण माह पर पापी हुणे रा लांछन लगाई सकां? जे हऊं सच्च बोलां, तां तुहें मेरा बिश्वास कां नीं करदे? 47 सैं जे परमेशरा रा आदमी आ, सैं परमेशरा रियां गलां सुणां; कने तुहें इस खातर मेरियां गलां नीं सुणदे भई तुहें परमेशरा रे नीं ये।”

यीशु कने अब्राहम

48 ये सुणीने यहूदियें तिसने बोलया, “क्या अहें ठीक नीं बोलदे भई तू सामरी आ, कने तूह पर दुष्टात्मा स्वार आ?” 49 यीशुये जबाब दित्या, “माह पर कोई दुष्टात्मा नीं आ: पर हऊं त अपणे पिते रा आदर करां, कने तुहें मेरा अपमान करां ये। 50 हऊं अपनी महिमा नीं चांह; इक हाया सैं जे मेरी महिमा चांह कने न्याय बी करां। 51 हऊं तुहांने सच्च बोलां भई जे कोई माळु मेरे बचनां पर चलगा, तां तिस अनन्त काल तक मौत नीं देखणी।” 52 यहूदियें तिसने बोलया, “हुण अहें जाणीगे भई तूह च दुष्टात्मा समाईरा। अब्राहम मरीया, कने भबिष्यवक्ते बी मरीये; कने तू बोलां, ‘जे कोई मेरे बचनां पर चलगा तां तिस अनन्त काल तक कदीं मौती रा स्वाद नीं चखणा।’ 53 अहांरा पिता अब्राहम त मरीया। क्या तू तिसते बड्डा? कने भबिष्यवक्ते बी मरीगे। फेरी तू क्या सोचां भई तू क्या?” 54 यीशुये जबाब दित्या, “जे अप्पू हऊं अपनी महिमा करूं, तां मेरी सैं महिमा किछ मनी; पर मेरी महिमा करने औळा मेरा पिता, तिससो जे तुहें बोलां ये भई ये तुहांरा परमेशर आ। 55 तुहें त तिससो कदीं नीं जाणया: पर हऊं तिससो जाणां। जे हऊं बोलूं भई हऊं तिससो नीं जाणदा, तां हऊं बी तुहां साई झूठा समझया जाणा; पर हऊं तिससो जाणां कने तिसरे बचनां रे मुताबिक चलां। 56 तुहांरा पिता अब्राहम मेरा दिन देखणे रिया आसा च मगन था; कने तिने देखया कने मौज किती।” 57 यहूदियें तिसने बोलया, “तू हलित्यें तक पंजाह सालां रा बी नीं आ, फेरी भीं तें अब्राहमा जो देखया?” 58 यीशुये तिन्हाने गलाया, “हऊं तुहांने सच्च-सच्च बोलां, भई पैहले इसते भई अब्राहम जम्मया, हऊं आ।” 59 फेरी तिन्हे तिससो मारने खातर पत्थर चक्के, पर यीशु तिन्हाते लुक्खीने मन्दरा ते निकलीया।

जन्मा रे अन्हे जो अक्खीं री रोशनी देणा

9 फेरी जान्दे हुये तिने इक माळुये जो देखया, सैं जे जन्मा ते अन्हा था। 2 कने तिसरयां चेलयां तिसते पुछया, “प्रभु जी, किने पाप कित्या था भई ये अन्हा जमय्या, इने माळुये या इसरे मौ-बुढयां?” 3 यीशुये जबाब दित्या, भई “न त इने पाप कित्तिरा था, न इसरे मौ-बुढयां; पर ये इस खातर अन्हा जमय्या भई परमेशरा रे काम्म इसच परगट हो। 4 तिने जे हऊं भेज्जीरा, अहांजो तिसरे काम्म दिने-दिने ई करी लेणा जरूरी आ; काँभई सैं रात औणे औळी तिसच जे कोई काम्म नीं करी सकदा। 5 तदुआं तक जे हऊं संसारा चा, तदुआं तक संसारा री जोत आ।” 6 येदा बोलीने तिने जमीना पर थुक्या, कने तिस थुक्का ने मिट्टी मलाई, कने तिस अन्हे रिया अक्खीं पर मळिने 7 तिसजो गलाया, “जा शीलोह रे कुण्डा च धोई ले” (शीलोह रा मतलब ‘भेज्जीरा’) इस खातर तिने जाईने धोया, कने देखदा हुआ बापस आईया। 8 फेरी तिसरे पडेसी कने सैं लोक तिन्हें जे तिसजो पैहले भीक्ख मंगदा देखया था, सैं बोलणे लगे, “क्या ये सैंई माळु नीं आ, सैं जे बैठीने भीक्ख मंगदा रैयां था?” 9 किछ लोके बोलया, ये सैंई हाया, “होरनी गलाया, “नां, ये सैं नीं आ, पर तिस साई लगया रां।” तिने बोलया, “हऊं सैंई हाया।” 10 फेरी सैं तिसते पुछणे लगे, “तिजो अक्खीं री जोत कियां मिली?” 11 तिने जबाब दित्या, “यीशु नाँवा रे इक माळुये गिल्ली मिट्टी मेरियां अक्खीं पर मळी कने मिन्जो बोलया, जा कने शीलोह च धोईने औ इस खातर तां जे हऊं जाईने धोई आया, तां मिन्जो दिखणे लगीया।” 12 फेरी लोके तिसते पुछया, “सैं कीति आ?” तिने बोलया, “हऊं नीं जाणदा।”

फेरीसियां रे जरिये चंगाईया री जांच पडताळ

13 लोक तिससो सैं जे पैहले अन्हा था फेरीसियां ले लेईगे। 14 तिस दिन जे यीशुये मिट्टी मलाईने तिसरी अक्खीं खोलियां थी, सैं बिस्राम रा दिन था। 15 फेरी फेरीसियें बी तिसते पुछया भई तें अक्खीं री जोत कियां पाई। तिने तिन्हाने बोलया, “तिने मेरियां अक्खीं पर गीली मट्टी लाई, फेरी में धोई ली कने हुण हऊं देख्खी सकां।” 16 इस पर किछ फेरीसी बोलणे लगे, ये माळु परमेशरा रिया तरफा ते नीं आ काँभई सैं बिस्राम रे दिना रा पालन नीं करदा।” होरीं बोलया, “कोई पापी माळु भला येदे चमत्कारा रे काम्म कियां करी सकां?” इसा गला पर सैं अप्पू बाटियें लडने लगे। 17 तिन्हे तिस अन्हे ने फेरी भीं बोलया, “तिसरे बारे च तू क्या बोलां? काँभई इसा सचाईया जो सिर्फ तू जाणां भई तिने तिजो अक्खीं दित्ती रियां, तिने बोलया, “सैं त भबिष्यवक्ता।”

18 पर यहूदियां जो बिस्वास नीं हुया भई सैं अन्हा था कने हुण देख्खी सकां, ताळुआं तक जे तिन्हे, तिसरे मौ-बुढयां जो सद्दीने 19 तिन्हांते नीं पुछया, “क्या ये तुहांरा मुन्डु आ, तिससो जे तुहें बोलां ये भई ये अन्हा जम्मरी था? फेरी हुण सैं कियां देख्खी सकां?” 20 तिसरे मौ-बुढयां जबाब दित्या, “अहें त जाणां ये भई सैं अहांरा मुन्डु आ, कने ये अन्हा जम्मरी था; 21 पर अहें ये नीं जाणदे भई हुण ये कियां देख्खां? कने न त ये जाणां ये भई किने इस रियां अक्खीं खोल्ही। इसते ई पुछी लवा; ये बडा सयाणा हुईरा; अपणे बारे च ये खुद बोली सकां।” 22 तिसरयां मौ-बुढयां ये गलां इस खातर बोली काँभई सैं यहूदियां ते डरां थे, काँभई यहूदियां च इसा गला रा एका हुई चुक्कीरा था, भई जे कोई यीशुये जो मसीह मन्ना, तां सैं प्रार्थना रे घरा ते बाहर कड्डी दित्या जाओ। 23 इस खातर तिसरे मौ-बुढयां बोलया, भई “सैं सयाणा हुई चुक्कीरा, इसते ई पुछी लवा।”

24 फेरी तिन्हें तिस माळुये जो दूजी बार भीं ते सद्दया सैं जे अन्हा था, कने बोलया, “सच्च बोल, तु जे ठीक हुया तां तू परमेशरा री स्तुती कर। अहें त जाणां ये भई सैं माळु पापी आ।” 25 तिने जबाब दित्या, “हऊं नीं जाणदा भई सैं पापी आ की नीं; हऊं इक गल्ल जाणां भई हऊं अन्हा था कने हुण देख्खी सकां।” 26 तिन्हें तिसने भीं बोलया, भई “तिने क्या कित्या? कने तिने तेरियां अक्खीं कियां खोल्ही?” 27 तिने तिन्हाने बोलया, “मैं तुहांजो दस्सी त दित्या, पर तुहें मेरी गल्ल सुणदे ई नीं ये; हुण दूजी बार कां सुणना चाये? क्या तुहें बी तिसरे चले बणना चाये?” 28 फेरी तिन्हे तिसरा अपमान कित्या कने बोलया, “तू ई तिसरा चेला, अहें त मूसा रे चले। 29 अहें जाणां ये भई परमेशरे मूसे ने गल्ल बात कीति; पर इस माळुये जो नीं जाणदे भई ये कितिरा।” 30 तिने तिन्हा जो जबाब दित्या, “ये त हैरानिया री गल्ल ई भई तुहें नीं जाणदे भई ये किति रा, पर तिने मेरी अक्खीं खोली। 31 अहें जाणां ये भई परमेशर पापियां री नीं सुणदा, पर जे कोई परमेशरा रा भगत ओ कने तिस रिया इच्छा पर चलदा री, तां सैं तिसरी सुणां। 32 संसारा रिया शुरुआता ते ये कदीं सुणने च नीं आया भई किन्हिये किसी जन्मा रे अन्हे माळुये रिया अक्खीं खोल्ही हो। 33 जे ये माळु परमेशरा रिया तरफा ते नीं हुन्दा, तां सैं किछ नीं करी सकदा था।” 34 तिन्हें तिसजो जबाब दित्या, “तू त तदका जे जम्मरी तदका ई पापी आ, कने हुण तू अहांजो क्या सखाणे लगीरा? कने तिन्हे तिसजो धक्के देईने बाहर कड्डीत्या।

आत्मिक अन्धापन

35 यीशुये सुणया भई तिन्हे तिससो धक्का देईने बाहर कड्डीत्या, कने ताहली जे तिसने मुलाकात हुई तां बोलया, “क्या तू परमेशरा रे पुत्रा पर बिश्वास करां?” 36 तिने जबाब दित्या, “प्रभु जी, सैं कुण आ भई हऊं तिस पर बिश्वास करूं?” 37 यीशुये तिसने बोलया, “तें तिससो देख्खीरा बी आ, कने तिसने जे तू इस बगत गल्ल बात करीरां सैं ई हाया।” 38 तिने गलाया, “प्रभु जी, हऊं बिश्वास करां।” कने तिसरे पैरां पर मत्था टेक्या। 39 फेरी यीशुये गलाया, “हऊं इस संसारा च न्याय करने आईरा, ताकि सैं जे नीं देखदे सैं देखणे लगे कने सैं जे देख्खां ये सैं अन्हे हुई जाओ।” 40 किछ फेरीसी सैं जे यीशुये सौगी थे तिन्हे ये गलां सुणीने तिसने गलाया, “क्या अहें बी अन्हे?”

41 यीशुये तिन्हांने बोलया, “जे तुहें अन्हे हुन्दे तां पापी नीं ठहरदे; पर तियां जे तुहें बोलां ये भईं तुहें देखी सकां ये, इस खातर तुहांरा पाप बणीरा रैयां।

गवाळा कने भेड्वां रा द्रष्टान्त

10 यीशुये बोलया, “हऊं तुहांने सच्च बोलां भईं सै जे कोई भेडशाला रे दरबाजे चीयें अन्दरों नीं जान्दा, पर किसी दूजे पासे ते चली जां, सै चोर कने डाकू आ। 2 पर सै जे दरबाजे ते अन्दरों जा सैई आ भेड्वां रा गवाला। 3 द्वारपाल तिसरे खातर दरबाजा खोल्ली देआं, कने भेड्वां तिसरी अवाज सुणां ईयां, कने सै अपणियां भेड्वां जो नौं लेईने सद्दां कने बाहरौं लेईजां। 4 ताहली जे सै अपणियां सारियां भेड्वां जो बाहर कडी लेआं, तां फेरी सै तिन्हांरे अग्गे-अग्गे चलां, कने भेड्वां तिसरे पिछे-पिछे चलां ईयां, काँभईं सै तिसरी अवाज पछयाणां ईयां। 5 भेड्वां कदीं किसी अनजाण माळुये रे पिछे नीं जान्दी, पर तिसते दूरों नड्वां ईयां, काँभईं सै तिस अनजाण माळुये री अवाज नीं पछयाणदी।” 6 यीशुये तिन्हांजो ये द्रष्टान्त दस्या पर सै नीं समझी पाये भईं सै अहाँ क्या दस्सी रां।

यीशु बधिया गवाळा

7 इस पर यीशुये तिन्हांने भीं बोलया, “हऊं तुहांजो सच्च दस्सां, भेड्वां रा दरवाजा हऊं आ। 8 सै जितणे जे मेरते पैहले आईरे थे, सब चोर कने डाकू ये, पर भेड्वां तिन्हारी नीं सुणी। 9 दरवाजा हऊं आ; जे कोई मेरे जरिये अन्दर जां, तिस्सो छुटकारा मिलणा, कने अन्दर बाहर औन्दा जान्दा रैहन्गा कने खाणे जो रोटी पांहगा। 10 चोर किसी होर कम्मा खातर नीं पर सिर्फ चोरी करने कने मारने कने तबाही करने खातर औवां; हऊं इस खातर आया भईं लोक भरपूर जीवन पाई सक्को। 11 अच्छा गवाला हऊं आ; अच्छा गवाला भेड्वां खातर अपणी जान देई देआं। 12 मजदूर सै जे न त गवाला कने न भेड्वां रा मालक आ, भेडिये जो औन्दा देखीने भेड्वां जो छड्डीने नट्टी जां; कने भेडिया तिन्हां पर हमला करीने तिन्हाजो बखेरी देआं। 13 मजदूर इस खातर नट्टी जां भईं सिर्फ तिस्सो मजदूरिया ने मतलब हुआं, कने सै भेड्वां री कोई परबाह नीं करदा। 14 अच्छा गवाला हऊं आ; हऊं अपणियां भेड्वां जो जाणां, कने मेरियां भेड्वां मिन्जो जाणां ईयां। 15 तियां जे पिता मिन्जो जाणां कने हऊं पिते जो जाणां - कने हऊं भेड्वां खातर अपणी जान देआं। 16 मेरियां होर बी भेड्वां ईयां, सै जे इसा भेडशाला री नीं। मिन्जो सै बी लौणे जरुरी आं। सै मेरी अवाज सुणियां, फेरी सब्बीरा इक ई झुण्ड कने इक ई गवाला हुणा। 17 पिता इस खातर माह्ने प्यार करां भईं हऊं अपणी जान देआं भईं तिस्सो भीं बापस लेई सक्क। 18 इससो माह्ते कोई लेन्दा नीं आ, पर हऊं इससो अपणिया इच्छा न देआं। मिन्जो इससो देणे रा बी अधिकार आ, कने तिस्सो फेरी भीं लेणे रा बी अधिकार आ: ये हुक्म मिन्जो मेरे पिते ते मिलीरा।”

19 इन्हां गलां रिया बजह ने यहूदियां च अप्पुं चीयें बिगडीगी। 20 तिन्हां च ते जादातर लोक बोलणे लगे, “तिस पर बुरी आत्मा स्वार ई, कने सै पागल आ; तुहें तिसरी परवाह कजो करां ये?” 21 होर किछ लोक बोलणे लगे, “ये गलां येदे माळुये रियां नीं हईं सकदियां तिस पर जे बुरी आत्मा स्वार हो। क्या बुरी आत्मा अन्हेयां री अक्खीं च जोत पाई सकां ई?”

यहूदियां रा अविश्वास

22 यरुशलम च मन्दरा री स्थापना रा त्योहार मनाया जाईरां था; कने ठण्डा रे दिन थे। 23 यीशु मन्दरा च सुलैमान रे बरान्डे च घुम्पणे फिरने लगीरा था। 24 तिस बगत यहूदियें आईने सै घेरील्या कने बोलणे लगे, “तू अहांजो कदुआं तक परेशान करदे रैहणा? जे तू मसीह आ, तां अहांने साफ-साफ बोली दे।” 25 यीशुये तिन्हांजो जबाब दिया, “मैं त तुहांजो दस्सील्या पर तुहें बिश्वास ई नीं करदे। सै काम्म जे हऊं अपणे पिते रे नौवा ते करां सैई मेरे गबाह ये, 26 पर तुहें इस खातर बिश्वास नीं करदे काँभईं तुहें मेरियां भेड्वां च ते नीं ये। 27 मेरी भेड्वां मेरी अवाज सुणां ईयां; हऊं तिन्हा जाणां, सै मेरे पिछे-पिछे चलां ईयां; 28 कने मांह तिन्हाजो अनन्त जीवन देणा। कने सै कदीं बी नाश नीं हुणा, कने कोई बी तिन्हांजो मेरे हत्था ते खोई नीं सकदा। 29 मेरे पिते, तिने जे, तिन्हांजो मिन्जो दित्तिरा, सबनीं ते बड्वा कने कोई तिन्हाजो

पिते रे हत्था ते खोई नीं सकदा। 30 हऊं कने मेरा पिता इक ये।” 31 फेरी यहूदियें तिसजो मारने खातर पत्थर चक्के। 32 इस पर यीशुये तिन्हांजो बोलया, “मैं तुहांजो अपणे पिते रिया तरफा ते कई भले काम्म दस्से; तिन्हा चाते किस कम्मा खातर तुहें माह पर पत्थर मारीरां ये?” 33 यहूदियें तिस्सो जबाब दिया, “भलाईया रे कम्मा खातर अहें तिजो पत्थर नीं मारया करदे पर परमेशरा री निन्दा करने रिया बजह ने; कने इस खातर भईं तू माळु हुईने अप्पूजो परमेशर बणाईरां।” 34 यीशुये तिन्हाजो जबाब दिया, “क्या तुहां रिया ब्यबस्था च लिक्खीरा नीं आ, मैं बोलया, तू परमेशर आ? 35 जे तिने तिस्सो परमेशर बोलया तिन्हाले जे परमेशरा रा बचन पूजया (कने पवित्र शास्त्रा री गल्ल झूठ नीं हईं सकदी), 36 तां तिस्सो पिते पवित्र करीने संसारा च भेजया, तुहें तिस्सो बोलां ये, तू अपमान करीरां, इस खातर मैं बोलया, हऊं परमेशरा रा मुन्डु आ? 37 जे हऊं अपणे पिते रा काम्म नीं करदा, तां तुहें मेरा बिश्वास नीं करा। 38 पर जे हऊं करां, तां चाहे माह पर बिश्वास करा या नां करा, पर तिन्हा गलां पर त बिश्वास करा ताकि तुहें जाणी सक्को कने समझी सक्को भईं पिता माह चा कने हऊं पिते चा।” 39 तां फेरी भीं तिन्हे तिस्सो पकडने री कोशिश कित्ति पर सै तिस्सो पकडी नीं सक्के।

40 फेरी सै यर्दन नदिया पार चलीग्या, तिसा जगह जे यहून्ना पैहले बपतिस्मा देआं था, कने तिन्ही रैया। 41 मते सारे लोक तिसले आईने तिसजो बोलां थे, “यूहन्ने त कोई बी चमत्कार नीं कित्ते पर यूहन्ने इस माळुये रे बारे च जो किछ बोलया था, सै सब सच्च निकलया।” 42 फेरी तिसा जगह मते सारयां लोके यीशुये पर बिश्वास कित्या।

लाजरा री मौत

11 मरियम कने तिसारी बेहन मार्था रे गांवां बेल्निय्याह रा लाजर नौं रा इक माळु बमार था। 2 ये सै ई मरियम थी तिसै जे प्रभुये परा जो इत्र लाई ने तिसरेयां पैरां जो अपणेयां बालां ने साफ कित्या था, इसा रा भाई लाजर बमार था। 3 इस खातर इसरिये बेहने तिस्सो दस्सी तया, “हे प्रभु, देख, तिसने जे तू प्रेम रखां था, सह बमार आ।” 4 ये सुन्नीने यीशुये बोलया, “ये बमारी मओता खातर नी; पर परमेश्वरा री महिमा खातर ई भईं इसते परमेश्वरा रे पुत्रा री महिमा हो।”

5 यीशु मार्था होर तिसा रिया बेहना कने लाजरा ने प्यार रखां था। 6 तां भी तजे तिने सुणेया भईं सह बमार आ, तां तिसा जगह जे सै था, तेथी दो दिन होर रुकी गया। 7 इसते बाद तिने चलेयां जो बोलया, “आंवा, आहें फेरी भी यहूदिया जो चलिये।” 8 चलेयां तिसीने बोलया, “रे रब्बी, थोडे वक्ता पैहले ही यहूदी तेरे पर पत्थराव करना चांवा थे, होर क्या तू फेरी भी तेथी जोई जांवां।” 9 यीशुये जबाब दिया, “क्या दिना रे बारह घन्टे नो हुंदे? जे कोई दिने चलो तां ठोकर नी खांदा, कें भईं सै इस संसारा रे उजाले जो देखां। 10 पर जे कोई राति जो चलो तां ठोकर खांवां, कें भईं तेथी प्रकाश नी या।” 11 तिने ये गलां बोलियां होर तिसते बाद तिन्हां ने बोलणे लगेया, “आहां रा दोस्त लाजर सई गरा, पर मांह तिस्सो जगहने जाणा। 12 तां चलेयां तिस्सो बोलया, “हे प्रभु, जे से सई गरा, तां तिस ठीक हुई जाणा।” 13 यीशुये तिसरिया मोता रे बारे च बोलया था, पर सै समझे भईं तिने नींदा ते सई जाने रे बारे च बोलया। 14 तां यीशुये तिन्हां ने साफ-साफ बोलित्या, “लाजर मरी गरा; 15 कने हऊं तुहां रिया वजह ते खुश आ भईं हऊं तेथी नी था तिसते जे तुहें विश्वास करो। पर हुण आवा, आहां तिस बला जाणा।” 16 तां थोमा तिस्सो जे दिन्नुस बोलां ये, तिने अपनेयां साथी चलेयां ने बोलया, “आवा, आहें भी तिसने मरने जो चलिये।”

यीशु जी उठना कने जीवन

17 तेथी पुज्जी ने यीशुये जो ये पता लगया भईं लाजरा जो कब्रा च रखी रे चार दिन हुई गरे। 18 बेल्निय्याह यरुश्लेमा रे नेडे ई दो मीला रिया दुरिया पर था। 19 मते सारे यहूदी मार्था कने मरियम ला जो तिन्हांरे भाईये रे मरने पर शान्ति देणे जो आईरे थे। 20 तजे मारथे यीशुये रे आउने री खबर सुणि तां तिसने मिलने जो आई, पर मरियम घरें ई बैठिरी रई। 21 मारथे यीशुये जो बोलया, “हे प्रभु, जे तू एथि हुंदा तां मेरा भाई नी मरदा। 22 कने हुण हऊं

जाणाई भई जो कुछ तू पिता परमेश्वरा ते मंगणा, परमेश्वरा तिज्जो दई देणा।" 23 यीशुये तिसा जो बोल्या, "तेरे भाई ये फेरी भी जिउंदे हुई जाणा।" 24 मारथे तिसने बोल्या, "हऊँ जाणाई भई न्याय रे दिन तिस भी जी उठने रे बक्ता जिउंदे हुई जाणा।" 25 यीशुये तिसा ने बोल्या, "भी जी उठाना कने जीवन हऊँ ई आ; तिस जे मेरे पर विश्वास करना जे सँ मरी भी जाओ तां भी जिउंदे हुई जाणा, 26 कने सँ जे जिउंदे कने मेरे पर विश्वास करायें, तिन्हां अनन्त वक्ता तक जो नी मरना। क्या तू इसा गल्ला पर विश्वास कराई?" 27 तिसे तिसने बोल्या, "हाँ हे प्रभु, हऊँ विश्वास कराई, भई परमेश्वरा रा पुत्र मसीह सँ जे संसारा च औणे आँखा था, सँ तू ही आह।"

यीशु रोया

28 येदा बोली ने सँ चली गई, कने अपणिया बैहणा मरियमा जो सद्दी ने तिसा जो बोल्या, "गुरु येथि आ, कने तिज्जो सदया रां।" 29 येदा सुणदे ई सँ तालूँ ई उठी ने तिस ला आई। 30 यीशु अजे तका गांवां च नी पूज्जी रा था पर तिसा ई जगह था तेथी जे मार्था तिसने मिली थी। 31 तां सँ जे यहूदी तिसा ने सोगी घरा च थे होर तिसा जो शान्ति देया रां थे, ये देखी ने भई मरियम उठी ने बाहर चली गई ये समझे भई सँ कब्रा पर रोणे जो गई, तां तिसा ते पीछे-पीछे चली पे। 32 तंजे मरियम तेथी पूज्जी तेथी जे यीशु था, तां तिस्सो देखदे ई तिसरे पैरा पर पई गी कने बोल्या, "हे प्रभु जे तू येथी हुदा तां मेरा भाई नी मरदा।" 33 तां यीशुये तिसा जो कने तिन्हां यहुदियां जो सँ जे तिसा ने सोगी आईरें थे, रोंदे देख्या, तां आत्मा च बौहत उदास हुआ कने घबराया, 34 कने बोल्या, "तुहें तिस्सो किती रखिरा?" तिन्हें तिस्सो बोल्या, "हे प्रभु, चली ने देखी ले।" 35 यीशु रोया। 36 तां यहूदी बोलणे लगे, "देखा, ये तिसने कितना प्यार करां था।" 37 पर तिन्हां च ते कइयें बोल्या, "क्या ये तिने जे अन्ने या रियां आक्खीं खोलियां, ये मनी करी सकया भई ये माहु नी मरदा?"

लाजरा रा जिन्दा कित्या जाणा

38 यीशु अपने मना च फेरी भी बौहत उदास हुई ने कब्रा परा जो आया। सँ इक गुफा थी कने ईक पत्थर तिस पर रखीरा था। 39 यीशुये बोलेय, "पत्थरा जो कंडे करा।" तिस पर सँ जे मरिरा था तिसरी बेहन मार्था तिसने बोलणे लगी, "हे प्रभु, तिस चा ते तां हुण बुरी बास आया राई, कें भई तिस्सो मरी रे जो चार दिन हुई गरे।" 40 यीशुये तिसा जो बोल्या, "क्या में तेरने नी बोल्या था भई जे तू विश्वास करगी, तां परमेश्वरा री महिमा जो देखगी।" 41 तां तिने तिस पत्थरा जो कंडे करी तया। यीशुये आक्खीं चक्की ने बोल्या, "हे पिता, हऊँ तेरा धन्यवाद करां भई तें मेरी सुनी लई। 42 हऊँ जाणा भई तू सदा मेरी सुणा आ। पर सँ जे भीड़ अखा-बखा खडीरी थी, तिन्हां रिया वजह ते में ये बोल्या, तिसते जे ये विश्वास करो भई तें मिंजो भेजी रा।" 43 येदा बोली ने तिने उचिया अवाज लाई, "हे लाजर, निकली आव।" 44 सँ जे मरी गरा था सँ कफना ते हाथ पैर बनोई रे ई बाहर निकली आया कने तिसरा मुंह पने कने लिपटी रा था। यीशुये तिन्हां ने बोल्या, "इसो खोली दो कने जाने देवा।"

यीशुये रे खलाफ साजिस

(मत्ती 26:1-5; मरकुस 14:1-2; लूका 22:1,2)

45 तां सँ जे यहूदी मरियमा ला जो आए थे कने तीसरा ये काम देखेया था, तिन्हां च ता बोहती तिस पर विश्वास कित्या, 46 पर तिन्हां च ते कइयें फरिसियाँ ला जो जाई ने यीशुये रे कमा रा समाचार दित्या। 47 तां प्रधान याजके कने फरिसियें महा सभा सद्दी, कने बोल्या, "अहें करां ई क्या ये? ये माहु तां बौहत चिन्ह दरसां आ। 48 जे अहें इसो ई छड्डी देओ, तां सभी इस पर विश्वास करी लेणा, कने रोमियाँ आईने आहारी जगह कने जातीय पर अधिकार करी लेणा।" 49 तां तिन्हां च ते काइफा नों रा इक माहु सँ जे तिस साला रा महायाजक था, तिने बोल्या, "तुहें कुछ मनी जाणदे; हुई ने भविष्यवाणी किती, भई तुहां खातर मरना; 50 कने ना ई ये समझा ये भई तुहां खातर क्या भला भई आहां रे लोकां खातर इक माहु मरो, होर सारी जाति नाश नी हो।" 51 ये गल्लं तिने अपनिया तरफा ते नी बोली, पर तिस साला रा महायाजक हुई ने भविष्यवाणी किती, भई यीशु तिसा जातिया

खातर मरना; 52 होर ना सिर्फ तिसा जातिया खातर, पर इस खातर भी भई परमेश्वरा रियां सन्ताना जो इक करी दो। 53 इस खातर तिस ई दिन सँ तिस्सो मारने री साजस रचने लगे।

54 इस खातर यीशु तिस वक्ता ते बक्ता ते यहुदियाँ रे साहमणे नी आउंदा था, पर तेथी ते जंगला चियें ईफराइम नगरा जो चली गया; कने अपणयां चेलयां सौगी तेथी रैह्ले लगया।

55 यहुदियां रा फसह रा त्यौहार नेडे था, कने बड़े लोक फसह ते पैहले ई गांवां ते यरुशेमा जो गये भई अप्पु जो शुध करो। 56 इस खातर सँ यीशुये जो टोलणे लगे कने मंदरा च खडी ने अप्पु चीयें बोलणे लगे, "तुहें क्या सोचयें? क्या तिस इस त्योहारा च नी औणा?" 57 प्रधान याजके कने फरिसियें ये आदेश देई तरा था भई जो कोई ये जानो भई यीशु किती आ तां दस्सो, भई सँ तिस्सो पकडी सक्को।

यीशुये रे पैरा पर इत्र मळणा

(मत्ती 26:6-13; मरकुस 14:3-9)

12 यीशु फसह ते छे दिन पैहले वेतनियाह जो आया तेथी जे लाजर था, तिस्सो जे यीशुये मरि रेआं ते जिउंदा किती रा था। 2 तेथी तिन्हें तिस खातर रोटियां बणाई; होर मार्था सेवा करेया रां थी, सँ जे रोटी खाणे बैठीरे थे तिन्हां च लाजर भी था। 3 तां मरियमे जटा मांसी रा अधा सेर इत्र लई ने यीशुये रे पैरा पर लट्टेया, कने अपणयाँ बालां ने तिसरे पैर साफ करी ते; होर इतरा रिया महका ते सारा घर महकी गया। 4 पर तिस रेयां चेलयां च ते यहुदा इस्क्रियोती नौवां रा ईक चेला सँ जे तिस्सो पकडवाणा चांवां था, बोलणे लगेया, 5 "ये इत्र 300 दीनार रा बेची ने कंगालां जो कें नी दित्या?" 6 तिने सँ गल्ल इस खातर नी बोली थी भई तिस्सो कंगला री चिंता थी पर इस खातर बोली थी भई सँ चोर था, होर तिसले तिन्हांरी थैली रवां थी कने तिस च सँ जो कुछ पावां थे, सँ कड्डी लेआं था। 7 यीशुये बोल्या, "तिस्सो रहणी देवा इसो मेरे मरने रे दिन खातर रखी लवा। 8 कांभई कंगालां तां तुहां ने सदा ई रैहणा, पर मांह तुहां ने सोगी सदा नी रैहणा।"

लाजरा रे खलाफ साजिस

9 तंजे यहुदियां री मती भीड़ जो ये पता लगेया भई सँ ओथी ई आ, तां सँ सिर्फ यीशुये जो ई देखण नी आये पर लाजरा जो भी देखण आये, तिस्सो जे तिने मरी रेयां ते जिउंदा कित्या था। 10 तां प्रधान याजके लाजरा जो भी मारने री साजस किती। 11 कें भई तिसरिया वजह ते बोहतीं यहुदियें यीशुये पर विश्वास कित्या।

यरुशल्लेम च यीशुये रा स्वागत

(मत्ती 21:1-11; मरकुस 11:1-11; लूका 19:28-40)

12 दूजे दिन बौहती लोकें त्योहारा रे आईरे थे सुणया भई यीशु यरुशल्लेमा जो आय रां। 13 इस खातर तिने खजुरा रियां डालियां लईयां कने तिसने मिलण जो चली पये, कने बोलणे लगे, "होसान्ना! धन्न इस्राएला रा राजा सँ जे प्रभुए रे नों ते आवां।"

14 तंजे यीशुये जो गधे रा इक बच्चा मिलया; तां सँ तिस पर बैठी गया, तेदा जे लिखीरा भी आ,

15 " हे सिथ्योन रि बेटी, मत डर;

देख, तेरा राजा गधे रे बच्चे पर बैठी ने आया रां।"

16 तिसरे चेले ये गल्लां पेले नी समझे थे, पर तजे यीशुये रि महिमा प्रगट हुई तां तिन्हां जो याद आया भई ये गल्लां तिसरे बारे च लिखी रियां थियां, होर लोके तिसने येदा ही बर्ताब कित्या था। 17 भीड़ा च ते तिने लोके गवाई दिति सँ जे तिस वक्ता तिस ने सोगी थे तालू जे लाजरा जो कब्रा च ते सद्दी ने जिउंदा कित्या था। 18 ताहि तां लोक तिने मिलने जो आए थे कें भई तिन्हें सुणेया था भई तिने ये चमत्कार दसेया था। 19 तां फरीसि अप्पु चियें बोलणे लगे, "सोचा तुहां ते कुछ मनी होय र दा। देखा, सारा ई संसार ईसरे ई पीछे चली परा।"

यूनानियां रा यीशुये जो टोळणा

20 सैं जे लोक इस त्योहारा च आराधना करने आई रे थे तिन्हां च ते कुछ यूनानी थे। 21 तिने गलीला रे बेतसेदा रे रेहने औळे फिलिपुसा ले जाई नै विनती कित्ती, “श्री मान, आहें यीशुये ने मिलणा चाहवां ये।” 22 फिलिपुसे आईने अन्द्रियासा ने बोल्या, तां अन्द्रियासे कने फिलिपुसे जाईन ने यीशुये जो ते बोलेया। 23 पर यीशुये तिन्हां जो बोल्या, “सैं वक्त आई गरा भई मनुष्या रे पुत्रा री महिमा हो। 24 हऊँ तुहां ने सच-सच बोलां भई तदुवां तको जे कणका रा दाणा मिट्टिया च पर्ई ने मरदा निंआ, सैं कल्ला ई रई जावां; पर तजे मरी जां, तां मता फल ल्यावां। 25 सैं जे अपने प्राणा ने प्यार करां, सैं तिस्सो गुवाई देवां; कने सैं जे इस संसारा च अपने प्राणा जो प्यार नीं करदा, सैं सदा रा जीवन पाणे खातर तिसरी संभाल करां। 26 जे कोई मेरी सेवा करना चाओ, तां मेरे पीछे आओ; होर तेथी जे हऊँ आ, तेथी मेरी सेवा करने औळे भी हुणा। जे कोई मेरी सेवा करो, तां पिते तिसरा आदर करना।

कूसा रिया मौती रा संकेत

27 “हुण मेरा जीउ घबराया रां। इस खातर हूँ हऊँ क्या बोलूं? हे पिता, मिंजो इसा घडिया बचा?’ नहीं, कें भई हऊँ इस ई खातर इसा घडिया तका जो पुजिरा। 28 हे पिता, अपने नौं री महिमा कर।” तां ये अम्बरा ते ये वआज आई, “में तिसरी महिमा कित्तीरी, कने फेरी भीं करनी।” 29 तां सैं जे लोक खड़ी रे थे कने सुणेया रां थे तिने बोल्या भई बदल गरजेया। होरसी बोल्या, “कोई स्वर्गदूत इसने गलाया।” 30 यीशुये बोल्या, “ये शब्द मेरे खातर नीं थे, पर तुहां खातर आईरा। 31 हुण इस संसारा रा न्याय हुणा, हुण इस संसारा रा सरदार कड्डी देणा; 32 कने जे मिंजो धरतिया परा ते उचे पर चढाया जांगा, तां मांह सबनी जो अप्पु खा खींजी लणा।” 33 येदा बोली ने तिने ये द्दिस्सतेया भई तिस्सो केहडी मोत मिलणी। 34 लोकें तिस्सो बोल्या, “आहें व्यवस्था री गल्ल सुणिरी भई मसीह सदा ई रेहणा, फेरी तू कें बोलां भई मनुष्या रे पुत्रा जो उचे पर चढाया जाणा जरूरी आ? ये मनुष्या रे पुत्रा कुण आ?” 35 यीशुये तिन्हां ने बोल्या, “जोत थोडीया देरा तका जो तुहां नै सोगी ई। तदुआ तका जे जोत तुहां नै सोगी ई तदेंया तका जो चलदे रहा, येदा नीं हो भई नेरा तुहां घेरी लओ; सैं जे नेहरे चलां सैं नीं जाणदा भई किखा जो जाये रां। 36 तदुआ जे जोत तुहां नै सोगी ई, जोता पर विश्वास करा तां तुहां जोता री सन्तान बणी जाणा।”

यहूदियां रा अबिस्वासी बणीरा रैहणा

ये गल्लां बोली ने यीशु चली गया होर तिन्हां ते लूखीरा रेया। 37 तिने तिन्हां रे सामने इतने जादा चिन्ह दस्से, तां भी तिन्हे तिस पर विश्वास नीं कित्या; 38 येदा इस खातर हुआ भई यशायाह भविष्यवक्ता रा वचन पूरा हो सैं जे तिने बोल्या था;

“हे प्रभु, आहारे समाचारा रा किने विश्वास कित्या कने प्रभुये री सामर्थ किस पर परगट हुई?” 39 सैं इस वजह ते विश्वास नीं करी सके, कें भई यशायाह ये लिखां:

40 “तिने तिह्वा रियां आक्खीं अन्रियां करी तियां, कने तिह्वा रे मन कठोर करी ते; किते येदा नीं हो भई सैं आक्खीं ने देखो कने मना ने समझो, कने हऊँ तिन्हां जो ठीक करूं।”

41 यशायाहे ये गल्लां इस खातर बोलियां भई तिने तिसरी महिमा देखी, कने तिने तिसरे बारे च गल्लां भी कितियां। 42 तां भी अधिकारियां च ते बोहतीं तिस पर विश्वास कित्या, पर फरिसियां रिया वजह ते साहमणे नीं आये, भई सैं किते आराधनाल्या च ते तिह्वा जो कड्डी नीं देओ; 43 कें भई माहुवा खा ते प्रशंसा तिह्वा जो खरी लगाई कने परमेश्वरा खा ते आदर मान तिन्हां जो खरा नीं लगदा।

यीशुये रे बचन न्याय रा आधार

44 यीशुये उच्चिया वाजा च बोल्या, “सैं जे मेरे पर विश्वास करां, सैं मेरे पर नीं पर मेरे भेजने औळे पर विश्वास करां। 45 कने सैं जे मिंजो देखां सैं मेरे

भेजने औळे जो देखां। 46 हऊँ संसारा च जोत बणी ने आईरा, इस खातर भई सैं जे मेरे पर विश्वास करणा सैं नेहरे च नीं सैं। 47 जो कोई मेरियां गल्लां सुणने नीं मनो, तां मांह तिस्सो दोषी नीं बनाणा; कें भई हऊँ संसारा च दोषी बनाने नीं आईरा, पर संसारा जो तारने खातर आईरा। 48 सैं जे मिंजो छोटा जानां सैं मेरियां गल्लां मन्दा निआ तिस्सो दोषी ठराने औळा तां इक आ; मतलब सैं जे वचन में बोल्या, तिस ई न्याय रे दिन तिस्सो दोषी ठराना। 49 कें भई में अपनिया खा ते गल्लां नीं कितियां; पर पिते तिने जे मिंजो भेजेया तिने ई मिंजो हुकम दितिरा भई क्या-क्या बोलूं कने क्या-क्या नीं बोलूं? 50 कने हऊँ जाणा भई तिसरा हुकम सदा रा जीवन आ इस खातर हऊँ जो कुछ बोलां, सैं तेदा जे पिते मिंजो बोल्या तेदा ई हऊँ बोलां।

यीशुये रा चलयां रे पैर धोणा

13 फसह रे त्योहारा ते पैहले, यीशुये पता लगी गया भई, सैं बक्त नेडे आ तजे तिस इस संसारा जो छड्डी ने पिता परमेश्वरा लो चली जाणा। तिने संसारा च सैं जे तिसरे अपणे थे कने सैं जे तिसने प्यार करां थे तिन्हां ने बोत सारा प्यार जताया। 2 तजे सैं संजके जुन्ना रोटी खाया रां थे तां शैताने शमौना रे पुत्र यहूदा इस्क्रियोती रे मना च ये पाई तरा था भई तिस यीशु ये जो धोखेने पकड़वाणा। 3 यीशु ये जाणा था भई पिता परमेश्वरे सब कुछ तिस्सो दई तरा कने सैं परमेश्वरा ते आई रा, कने पिता परमेश्वरा लो ई वापस जाए रां। 4 तां सैं रोटी खांदा उठी गया, कने अपना चोगा त्वारित्या कने ईक परना अप्पु जो लपेटी लया। 5 तां तिने ईकी बरतना च पाणी लया, होर अपणेयां चेलैयां रे पैर धोणे लगया कने सैं जे परना तिने लपेटिरा था तिसने तिन्हां रे पैर सुकुआणे लगया। 6 इस खातर सैं शमौन पतरसा लौ आया, पतरसे बोल्या, प्रभु, क्या तूझ मेरे पैर धोणे? 7 यीशु ये तिस्सो जबाब दितेया, जो कुछ हऊँ करेया रां सैं अजें तिज्जो पता नीं लगणा पर सैं वक्त औणे पर सारियां गल्लां रा पता लगी जाणा। 8 पतरसे बोल्या, मांह कदी भी अपना पैर तेरते नीं धुआने। यीशुये तिस्सो जबाब दित्या, जे हऊँ तुहां जो साफ नीं करूं तां तुहां रे कने मेरे बिच कोई भी रिश्ता निआ। 9 शमौन पतरसे बोल्या, प्रभु, तां तू मेरे पैरा ई नीं पर सिरा कने हत्था भी धोई दे। 10 यीशुये तिस्सो बोल्या, सैं जे नहाई गरा तिस्सो अपने पैरा ई धोने री जरूरत ई; तुहें सैं जे मेरे चले, ये साफ ये पर सारे ई नीं ये। 11 सैं जाणा था भई तिस जे तिस्सो पकड़वाणा, सैं इन्हां च ते ई आ, तां तिने बोल्या भई तुहां च ते सारे ई साफ नीं ये।

12 तजे सैं तिन्हां रे पैर धोई ने अपना चोगा पेह्नी ने फेरी भी अपनीया जगहा आई ने बैठी गया, तां तिन्हां ने बोल्या, क्या तुहें जाणाये भई में तुहां ने क्या कित्या? 13 तुहें मिन्जो स्वामी कने प्रभु बोलाये; तुहें ठीक बोलाये केंह भई हऊँ ह्या। 14 फेरी तजे में प्रभु कने स्वामी हुई ने भी तुहां रे पैर धोए, तुहें भी अप्पु चियें इक्की दूजे रे पैर धोए करा। 15 में तुहां खातर इक उदाहरण रखेया; इस खातर भई तुहें भी तेदा ई करा तेदा जे में तुहां ने कित्या? 16 हऊँ तुहां ने सच बोलां, दास अपने स्वामिये ते बदी ने नीं हुई सकदा, कने तिस्सो जे भेजी रा हुआ सैं अपने भेजने औळे ते बडा नीं हुई सकदा। 17 जे तुहां जो ये सब गल्ला पता लगी गियां, कने तुहें इन्हां पर चलां भी ये, तां तुहां सुखी रेहना। 18 हऊँ तुहां सबी रे बारे च येदा नीं बोल्या करदा; मिन्जो मेरियां चेलैयां रा पता आ, कें भई में तुहां जो चुनी लरा, पर इस खातर भई सैं जे लिखीरा सैं पूरा हुई जाओ, तिने जे मेरी रोटी खादी सैं मेरे वरोधा च हुई गया। 19 येदा सब हुणे ते पैहले ई हऊँ तुहां जो इस खातर दस्सेया रां भई ताह्नी जे ये गल्लां हुई जाओ तां तुहें विश्वास करो भई सैं “हऊँ आ।” 20 हऊँ तुहां ने सच बोलां भई तिस जे मेरे भेजी रे जो मनी लेणा, तिस मिंजो मनी लेणा; कने सैं जे मिंजो मनी लां, सैं तिस्सो मन्ना तिने जे मिंजो भेजी रा।

धोखे रा संकेत

(मत्ती 26:20-25; मरकुस 14:17-21; लूका 22:21-23)

21 तजे यीशुये ये गल्लां करी लियां तां सैं आत्मा च घबराया, होर येदा बोल्दे गवाई दिति, हऊँ तुहां ने सच बोलां भई तुहां च ते ई इक्की मिंजो धोखा देई ने पकड़वाणा। 22 चले मुढी मुढी ने इक्की दूजे खा जो देखने लगे, भई किस रे

बारे च तिस्रो सक आ कने किस रे बारे च सै बोल्या रां। 23 तेथी इक चेला यीशुये रे नेढे ई बेठिरा था, सै जे यीशुये रा प्यारा था, कने यीशुये रिया छातिया पर सिर रखी ने स्वां था। 24 तां शमौन पतरसे तिस्रो लाया भई सै यीशुये ते पूछे भई सै कुण आ, तिसरे बारे च जे यीशु बोल्या रां था। 25 तां तिनै ताहू यीशुये रिया छातिया पर सिर रखी रा था, पुछेया, प्रभु सै कुण आ? 26 यीशुये तिस्रो जवाब दित्या, तिस्रो जे मांह रोटिया रा टुकड़ा डबाई कने देणा, सै ई आ। फेरी यीशुये रोटिया रा टुकड़ा कटोरे च डबाया कने तिस्रो चक्की ने यहुदा जो दित्या सै जे शमौन इस्क्रियोती रा पुत्र था। 27 ताहू जे यहुदे सै रोटिया रा टुकड़ा लया शेतान तिस च समाई गया। तां यीशुये तिस्रो बोल्या, सै जे तू करना छोड़े कर। 28 सै जे तेथी बेठिरे थे तिन्हां च ते किसी जो भी ये समझ नी आया, भई यीशुये तिसने ये गलां कें कितियाँ। 29 कई ये सोचेया भई पेसेयाँ री थेली सै जे यहुदा ले ई इस खातर यीशुये तिस्रो बोल्या भई त्योहारा खातर समान खरीदी ले, या भई गरीबां जो कुछ दई दे। 30 इयाँ यहुदे रोटिया रा टुकड़ा लई लेयाँ, सै ताहू ई चली गया; ये राती रे बक्ता री गल्ल ई।

नोंई आज्ञा

31 तिसरे जाने ते बाद यीशुये बोल्या, हुण मनुष्या रे पुत्रा री महिमा हुन्गी कने टीसते परमेश्वरा री महिमा हुन्गी। 32 अगर जे तिसते परमेश्वरा री महिमा हुन्गी तां परमेश्वरा आप्पू ई तिस्रो महिमा देन्गी 33 ओ मेरे चलेओ हऊँ थोडीया देरा तका जो तुहां ने सोगी आ। इसते बाद तुहां मिजो टोलना कने तेदा जे में यहूदी नेतेयाँ ने गलाया था, तुहें तेथी नी आई सकदे तेथी जे हऊँ जाये रां, तेदा ई हऊँ तुहां ने बोलां। 34 हऊँ तुहां जो इक नवीं आज्ञा देवां भई तुहें इक्की दूजे ने प्यार करा; तियां जे में तुहां ने प्यार कित्या तियां ई तुहें इक्की दूजे ने प्यार करा। 35 जे तुहें इक्की दूजे ने प्यार करायें, इसते ई सबी जो ये पता लगी जाणा भई तुहें मेरे पीछे चलने औळे।

पतरसा रे इन्कार करने रा संकेत

(मत्ती 26:31-35; मरकुस 14:27-31; लूका 22:31-34)

36 शमौन पतरसे तिस्रो पुछेया प्रभु तू कितो जाये रां? यीशुये तिस्रो जवाब दित्या, तेथी जे हऊँ जाये रां तुहें तेथी मेरने सोगी नी आई सकदे, पर तुहां बाद च औणा। 37 पतरसे तिस्रो बोल्या, क्या हऊँ हुण भी तेरे पीछे नी आई सकदा? मांह तेरे खातर अपनी जान भी देई देंगी। 38 यीशुये जवाब दित्या, तू अपनी जान देंगी? हऊँ तिज्जो सच सच बोलां भई तवां तका जे तू तिन बारी मेरते मुकरना निआ तवां तका कुकड़ा झांग नी देंगी।

परमेश्वरा तक पुजणे रा रस्ता

14 तुहां रे दिल दुखी नी हो : परमेश्वरा च बिश्वास रखा होर मेरे पर बी बिश्वास रखा। 2 मेरे परमेश्वर रे घरा होर मती सारी रैहणे रीयां जगह ई यां ; अगर जे येंदा नी हुंदा तां मांह तुहां जो नी बोलणा था भई हऊँ जाया रां कने तुहां खातर रैहणे जो होर जगह बणाऊं। 3 जे हऊँ तेथी जाया रां, कने तुहां खातर रैहणे री जगह बणाया रां, तां मांह फेरी भी ऐथी औणा कने तुहां जो भी, तेथी जो लेई जाणां, कने भई तुहें भी तेथी रौआ तेथी जे हऊँ रौआं। 4 तेथी जे हऊँ जाया रां, तेथी रा रस्ता तुहें जाणा यें। 5 थोमे तिस्रो बोलया, हे प्रभु, अहें नी जाणदे, भई तु कित्ती जाया रां। फेरी तेथी रा रस्ता अहें कियां जाणी सका यें ? 6 यीशुये तिस्रो बोलया, " हऊँ सच आह होर जिन्दगी या रा रस्ता आ : कोई भी मेरे बिना पिता परमेश्वरा लौ नी पुज्जी सकदा। 7 जे तुहें मिजो जाणी लरा हुंदा तां पिता परमेश्वरा जो भी जाणदे : हुण तुहें तिस्रो जाणा यें, कने तुहें तिस्रो देखी रा भी आ।

8 फिलिपुसे तिस्रो बोलया, हे प्रभु, अहाँ जो पिता परमेश्वरा रे दर्शन कराई दे तां अहां जो सन्तोख हुई जाणां। 9 यीशुये तिस्रो बोलया, " फिलिपुस, क्या हऊँ तुहां ने सौगी नी रया, कने तुहे मेरे बारे च हुण मनी जाणदे ? तिनै जे मिजो देखी लया तिनै पिता परमेश्वरा जो देखी लया। तुहें केंह बोलां ये, भई अहां जो पिता परमेश्वरा जो दस ? 10 क्या तुहां जो ये बिश्वास नीआ भई हऊँ पिता परमेश्वरा चा होर पिता परमेश्वर मेरे चा ? सै जे बचन हऊँ तुहां ने

बोलां सै हऊँ अपणे खा ते नी बोलदा; पर पिता सै जे मेरे चा हर बक्त अपणा काम करदा रह्वाँ। 11 बिश्वास करा, हऊँ पिता परमेश्वरा चा होर पिता परमेश्वर मेरे चा; निआं तां जो कुछ मैं कित्या तिसरी बजहा ते बिश्वास करा।

12 हऊँ तुहां ने सच बोलां, जो कोई मेरे पर बिश्वास करगा तिस सै काम करने, तिन्हां जे हऊँ करां, इन्हां कमां ते भी बधी ने तिस बड्डे-बड्डे काम करने केंह भई हऊँ पिता परमेश्वरा लौ जाय रां। 13 जो कुछ तुहां मेरे नावां ते मंगणा सै मांह करना, इस खातर भई पुत्रा ते पिता परमेश्वरा री महीमा हो। 14 जो कुछ तुहां मेरे नावां ते मेरते मंगणा सै मांह करी देणां।

पवित्र आत्मा री प्रतिज्ञा

15 जे तुहां जो मेरने प्यार हुगां, तां तुहां मेरियां दस्सी रियां गलां मनणियां। 16 होर मांह तुहां खातर पिता परमेश्वरा रा ने बिनती करनी, कने तिस तुहां जो इक सहायक देणा तिस जे तुहां ने सदा रैहणा, 17 सच्चा रा आत्मा इसो ससारां रे लोका ग्रहण नी करना, केह भई सै नां तां इसो जाणां ये होर ना ई देखी सकां ये; पर तुहां तिसरा पता आ, केह भई तिस सदा तुहां ने रैहणां कने तुहां च बसणा।

18 मांह तुहां जो दोस्ता ते बिना नी छडणा: मांह ऐथी जो फेरी भी औणा। 19 थोडे बक्ता ते बाद, संसारां मिजो नी देखणा, पर तुहां मिजो देखणा, तुहां जीउदेयां रैहणा केह भई हऊँ भी जीउंदा आ। 20 तिस बक्ता ये साफ हुई जाण भई हऊँ अपणे पिता परमेश्वरा चा कने तुहें मांह चे कने हऊँ तुहां चा; कने तिस जे मिजो प्यार करना पिता परमेश्वरा भी तिस्रो प्यार करना। 21 तिस जे मेरी आज्ञा मनणियां, तिस जे तिन्हां रा पालन करना, तिस सचमुच मेरने प्यार; सै जे मेरने प्यार करां तिस्रो पिता परमेश्वरा प्यार करना मांह भी तिसने प्यार करना होर अप्पु जो तिसरे सामणे परगट करना।"

22 यहुदा सै जे इस्करियोति नी था तिसने बोलणे लगया, येह कियां हुई सकां भई तु अहां जो साफ-साफ दिसणा कने ससारा रे लोका जो नी दिसणा? 23 यीशुये तिस्रो जवाब दित्या, तिस जे मेरने प्यार करना, तिस मेरी आज्ञा मनणियां; होर तिस जे पिता परमेश्वरा रे प्यारे बणना, होर अहां तिस ला अऊणां कने तिसने सौगी रैहया करना। 24 सै जे मेरने प्यार नी करदा तिस मेरे उपदेशा जो नी मनणां; तिस बचना जे तुहें सुणा ये सै मेरा बचन नीआ पर पिता परमेश्वरा रा तिनै जे मिन्जो भेजी रा।

25 तदियां तका जे हऊँ तुहां ने सौगी आ तदियां तका ही मांह तुहां ने ये गलां करनीयां। 26 सहायका, जे पबित्रात्मा, तिस्रो जे पिता परमेश्वरे मेरे नावां ते भेजणां, तिस सब गलां तुहां जो सखाणीयां कने जो कुछ मैं तुहां जो बोलया सै सब गलां याद करणीयां। 27 तुहां शन्ति मिलो; मेरी शन्ति तिहा जे हऊँ तुहां तुहा देबां, हऊँ तुहां शन्ति देबां सै जे संसारा च तुहां नी मिलणी; तुहां रा दिल घबराओ नी कने जो डरना नी चाहिदां। 28 तुहें मिजो बोलदे, सुणयां रायें भई, हऊँ जाया रां, कने तुहां ला फेरी भी अऊणा; जे तुहें मेरने प्यार कित्या हुंदा तां तुहें खुश हुदे केह भई हऊँ पिता परमेश्वरा ला जाया रां केह भई पिता परमेश्वर मेरते महान हा। 29 ये सब गलां हुणे ते पैहले ही मैं तुहां दसित्यां केह भई तजे ये गलां पुरियां हुणे लगाए तां तुहा बिश्वास हुई जाओ। 30 होर ज्यादा हऊँ तुहां ने ये गलां नी करी सकदा केह भई इस संसारा रा शासक औणे होर; मेरे पर तिस रा कोई बस नी चलदा। 31 ये गलां इस खातर पुरियां हुणियां भई संसारा जो पता लगी जाओ भई हऊँ पिता परमेश्वरा ने प्यार करां। पिता परमेश्वरे तेढी जे आज्ञा मिजो दितिरि, हऊँ तेदा ही करां। " हुण उठा कने ऐथी ते चला।"

यीशु सच्ची दाखलता

15 यीशुये बोलया, "हऊँ सच्ची बेल ई होर मेरा पिता तिसरा माली आ। 2 सै जे डाली मेरे च हई कने फल नी लयोदी, तिस्रो सै बडी देयां। होर सै जे डालियां फल देवां ई यां, तिसा जो से छांगी देयां भई से होर बौहत फल लयाओ। 3 तुहां लोकां जो सै जे उपदेश मैं दित्तीरा, तिसरीयां वजह ते तुहें पैहले ते ही सुच्चे हुइगरे। 4 तिहां जे हऊँ तुहां ने आ तुहें बी मांह च बणी रह्वा। तिहां जे डाली बिणा बेला ते फल नी लियाइ सकदी, अगर जे सै बेली ने सौगी नी रेहन्दी, इहां इ तुहें जे मांह च नी ये तां कुछ नी करी सकदे। 5 सै

बेल हऊं ई होर तुहें तिसरीयां डालियां ई यां। सै जे मांह च बणी रह्वां, होर हऊं तिस च तां सै बौहत फल लयावां कें पई मेरते बिना तुहें कुछ नीं करी सकदे। 6 जे कोई मांह च नीं रेहंदा तां सै टुटी रिया डालिया सा ई, सटी देयें कने सै सुकी जांवां। फेरी तिन्हां डालियां जो कट्टेयां करी ने अगी च पाई ने फूकी देयें। 7 जे तुहें मेरे च कने मेरे उपदेशा रे मताबक चलदे रौ, तां जो कुछ तुहें चांहां ये, मंगा, सै तुहां जो मिली जाणा। 8 इसते मेरे पिता परमेशवरा री बडी बडयाई हूवां ई भई तुहें मेरे शिष्य बणी ने बौहत फला अऊले हूई जावा। 9 तियां जे मेरे पिता परमेशवरे मेरने प्यार कित्या, तियां ई हऊं बी तुहां ने प्यार करां। मेरे प्यार च बणी रह्वा। 10 जे तुहें मेरियां आज्ञा जो मनगे तां तुहां मेरे प्यारा च बणी रहणा। तियां जे हऊं पिता परमेश्वर रिया आज्ञा रा पालन करीने तिसरे प्यारा च बणीरा। 11 मैं तुहां ने ये गलां इस खातर बोलियां भई मेरी खुशी तुहां च बणी री रौ कने तुहां री खुशी पूरी हुई जाओ।

12 ये मेरी आज्ञा ई भई तुहें अप्पु चीयें प्यार रखा, इयां ई तियां जे मैं तुहां ने प्यार कितया। 13 बडे ते बडा प्यार ये आ भई कोई माणू अपणे दोस्तां खातर अपणी जान भी दर्ई दो, येडा प्यार करना किसी भी आदमिए रे बसा रा काम नी आ। 14 जे तुहें मेरिया दर्सी रिया ईसा आ पर चलां ये तां तुहें मेरे सच्चे दोस्त बणी जां ये। 15 हुणा ते बाद हऊं तुहां जो दास नी बोलदा; कें भई दास नी जाणदे भई तिन्हां रा मालक क्या-क्या करया रां, पर हऊं तुहां जो दोस्त बोलां आ, कें भई मैं तुहां जो सारी यां गलां बातां दर्सी रियां, सै जे मैं अपणे परम पिते ते सुणीरीयां। 16 तुहें मिंजो नी चुणया, पर मैं तुहां जो अपणे खातर चुणीरा; होर तुहें जावा कने सफल हुई ने आवा, हऊं चांहां भई तुहां री सफलता बणीरी रौ, कें भई ताहू जे तुहें पिता परमेश्वरा ते मेरे नौं ते जो कुछ मंगो तां तुहां जो मिली जाओ। 17 हऊं तुहां जो येह आ दये रां भई तुहें इक्की दुजे ने प्यार रखा।

संसार रा बैर

18 जे ये संसार तुहां ने बैर रखां तां याद रखा भई तिन्हें तुहां ते पैहले मेर कने बैर रखया। 19 जे तुहें इस संसारा रे हुंदे, तां संसारा रे लोक तुहां ने अपणयां साही प्यार करदे: पर तुहें संसारा रे नी ये, पर मैं तुहां जो संसारा च ते चुणी लया, इस खातर संसार तुहां ने बैर करां आ। 20 मेरीया बोली रियां गलां जो याद रखा भई इक दास अपणे मालका ते बडा नी आ। इस खातर जे तिन्हें मिन्जो सताया तां तिन्हां तुहां जो बी सताणा; जे तिने मेरे बचन मने तां तिन्हां तुहां रियां गलां भी मनणियां। 21 तिन्हां मेरिया बजहा ते तुहां ने ये सब कुछ करना, कें भई सै नी जाणदे भई मिंजो किने भेजी रा। 22 जे हऊं नी औन्दा होर तिन्हां ने गलां नी करदा, तां तिन्हां च ते किसी बी पापी नी ठेहरना था। पर हुण अपणे पापां खातर तिन्हा ले कोई बी बहाना निया। 23 सै जे मेरने बैर रखां आ, सै पिता परमेश्वरा ने बी बैर रखां आ। 24 जे हऊं तिन्हां च बडे-बडे काम्म (चमत्कार) नी करदा सै जे कदीं बी किनिये मनी कित्ते, तां सै पापां रे दोषी नी हुंदे; पर हुण तजे तिन्हें सब कुछ देखी ने बी मेरने कने पिता परमेश्वरा ने बैर रखया। 25 पर ये इस खातर हुआ भई तिन्हां रे विधाना च लिखीरा, सै सच हुई सको, 'तिन्हें बगैर किसी कारण ते मेरने बैर रखया।' 26 पर तिस बक्ता जे सहायता करने औळे आउणा, सै जे सच्चा रा आत्मा होर पिता परमेश्वरा री तरफा ते आ। तिस तुहां लो आउणा कें भई तिस्सो मांह परमेश्वरा रिया तरफा ते भेजणा, तिस तुहां जो मेरी गवाही देणी। 27 होर तुहां बी मेरी गवाही देणी कें भई तुहें बी शुरु ते ही मेरने सौगी रहे।

16 हऊं तुहां ने ऐ गलां इस खातर बोलां भई तुहां रा विश्वास नी डगमगाओ। 2 तिन्हां तुहां जो प्रार्थना सभा च ते कडी देणा: सचमुच ई सै बक्त आया रां तजे तुहां च ते किसी जो भी मारी ने तिन्हां येई सोचणा, भई सै परमेशवरा री ही सेवा करे रां ये। 3 सै इन्हां गलां कने कमां जो इस खातर करांये, कें भई सै ना तां पिता परमेशवरा जो जाणांये होर नाई मिजों जाणां ये। 4 हऊं तुहां जो ये गलां इस खातर दसया रां भई ताह्नी जे सै बक्त औणा, तां जो कुछ मैं बोलीरा हुणां सै तुहां जो याद औणा।

पवित्र आत्मा रे काम्म

"शुरु च ई मैं तुहां जो ये गलां नी गलाइयां कें भई हऊं तुहां ने सौगी था। 5 हुण हऊं अपणे भेजणे औळे लौ जाये रां; हुण तुहां च ते कोई बी मेरते ये नी पुछी सकदा, भई तु कितो जाये रां ? 6 तुहां रे दिल दुखा ने भरी गये कें भई मैं तुहां जो ये गलां दर्सी तीयां। 7 जो कुछ हऊं बोलये रां सै सच आ: मेरा जाणा तुहां रे भले रे खातर आ: जे हऊं तुहां ते दूर नी जांगा, तां मदद करने औळा तुहां लो नी आई सकदा; पर जे हऊं जा वां, मांह तिस्सो तुहां लौ भेजी देणा। 8 तांजे तिस आउणा, तां पाप, धार्मिकता होर न्याय रे बारे च संसारा रे सब्बी लोकां जो सचेत करी देणा। 9 पापा रे बारे च इस खातर भई सै मांह पर विश्वास नी रखदे; 10 धार्मिकता रे बारे च इस खातर कें भई हुण हऊं परमेश्वर पिता लौ जाया रां होर तुहां मिंजो नी देखणा। 11 न्याय रे बारे च इस खातर भई संसारा रा शासक दोषी ठहाई दितीरा।

12 मांह तुहां ने बौहत गलां बोलणियां पर तुहें तिन्हां जो सैह नी करी सकदे। 13 तांहु जे सच्चाईया रा आत्मा औणा तां तिस तुहां जो सच्चा रस्ता दसणा कां भई तिस अपणिया तरफा ते किछ नी बोलणा। तिस जो कुछ सुणना सैई दसणा। होर जो कुछ हुणे औळा हुंगा तिस दर्सी देणा। 14 कें भई जो कुछ मेरले आ तिस्सो तिस तुहां जो साफ-साफ दसणा ई आ तिस मेरी महिमा करनी। 15 जो कुछ पिता परमेश्वरा रा सै मेरा आ; इस खातर मैं बोलया भई जो कुछ मेरा आ सै तिस तुहां जो दसणा।

दुःख सुखा च बदली जाणा

16 थोडे बक्ता तक तुहां मिंजो नी देखी सकणा, होर तिसते बाद, थोडे बक्ता बाद तुहां मिंजो फेरी देखणे लगणा।" 17 तां तिसरे चले अप्पु ची ये गलाणे लगे, "ये क्या, सै जे आहां जो दसया रां, थोडे बक्ता तक तुहां मिंजो नी देखी सकणा; होर दवारा, थोडे बक्ता बाद तुहां मिंजो फेरी देखणे लगी जाणा ? होर हऊं पिता परमेश्वरा लो जाया रां" ? 18 फेरी सै बोलणे लगे, सै ये क्या बोलया रां भई, थोडे बक्ता बाद ? तिसरी बोली री गलां आहां जो समझा नी आया र दीयां। 19 यीशु समझी गया भई सै सवाल पुछणा चावां ये, इस खातर तिने तिन्हां जो बोलया, "हऊं तुहां ने ये जे बोलया रां, क्या इस पर सोच वचार करया रां ये, 'थोडे बक्ता तक तुहां मिंजो नी देखी सकणा, होर, थोडे बक्ता बाद तुहां मिंजो फेरी देखणे लगणा' ? 20 हऊं तुहां ने सच बोलया रां, तुहां रोणा होर दुखी होणा, पर इस संसारा रे लोकां खुश हुणा। तुहां जो दुख हुणा पर तुहां रा दुख खुशीया च बदली जाणा। 21 तजे जनाना बच्चा जणने लगा ई, तां तिसा जो बोत पीड हुँआ ई, कें भई तिसारी दर्दा लगने री घडी आई गरी हुँआ ई, पर तजे सै तिस बच्चे जो जणी दर्ई, कने तिसा ते संसारा च इक माहू ये रे आऊणे री खूशी च सै इतनी खुश हुई जां ई भई सै सारीयां पीडा जो भूली जां ई। 22 इस बक्ता तुहां जो दुख आ: पर मांह तुहां ने फेरी भी मिलणा, होर तुहां रे दिल खुशियां ने भरी जाणे, तिसा खुशिया जो तुहां ते कोई भी खोई नी सकदा। 23 तिस दिन तुहां मेरते कोई सवाल नी पुछणे। हऊं तुहां ने सच- सच बोलां आ, भई जो कुछ तुहां पिता परमेश्वरा ते मेरे नौं ते मंगणा, तिस्सो सै सब कुछ मिली जाणा। 24 हुणा तक मेरे नौं ते तुहें कुछ मनी मंगया: मंगा तां तुहां जो मिलणा, इस खातर भई तुहां जो दिला ते नन्द मिलो।

संसार पर जय

25 ये सब गलां मैं तुहां जो उधारणा रे जरिए दस्सियां: पर सै बक्त आया रां ताली जे मांह उधारणा च तुहां ने कुछ मनी गलाणा, पर पिता परमेश्वरा रे बारे च सारियां गलां साफ-साफ दसणियां। 26 तिस दिन तजे तुहां मेरे नौं ते मंगणा : तिस बक्त मांह तुहां ने ये नी बोलणा भई हऊं तुहां रिया तरफा ते पिता परमेश्वरा ले प्रार्थना करणा। 27 पिता परमेश्वर तुहां ने बोत प्यार करां, कें भई तुहें मेरने बोत प्यार कित्या, होर ये बी विश्वास करां ये भई हऊं पिता परमेश्वरा रिया तरफा ते आईरा। 28 हऊं पिता परमेश्वरा ते प्रगट हुई ने इस संसारा च आया; हुण फेरी भी, हऊं इस संसारा जो छड्डी ने पिता परमेश्वरा लौ जाया रां।

29 तिसरेयां चेलयां बोलया, "देख तु हुण बगैर उधारणां ते साफ-साफ बोलया रां। 30 हुण अहें समझी गे भई तु सब कुछ जाणां, हुण कोई बी इस कावल निया भई तरते सवाल करी सको। इसते आहां जो ये विश्वास हुई गया भई तु परमेश्वरा च ते आईरा। 31 यीशुये तिन्हां जो जबाब दित्या, "क्या तुहां जो हुण विश्वास हुआ ? 32 सुणो, बक्त आया रां, पर आई गया, तालू जे तुहां सबी लग-लग हुई जाणा, मिन्जो कल्ले जो छडी ने, अपणे-अपणे घरां जो चली जाणा; पर हऊं कल्ला निया, कें भई मेरा परम पिता मेरने सौगी आ। 33 मैं तुहां जो ये सब गल्लां इस खातर बोलियां भई तुहां जो मेरे ते शान्ति मिलो। संसार तुहां जो दुख देवां, हिम्मत रखा ! मैं संसारा जो जिती लया।"

यीशुये री खास याजकीय प्रार्थना अपणे खातर

17 यीशुये इन्हां गल्लां बोली ने, होर आसमाना खो देक्खी ने बोलणे लगया, "पिता सैं बक्त आईगरा अपणे पुत्रा जो महिमा दे, इस खातर भई पुत्रा रे दवारा तेरी महिमा हो। 2 तैं मिन्जो सारेयां आदमियां पर अधिकार दित्तिरा, भई सैं तिन्हा सबी जो सदा री जिन्दगी दयो, सैं जे तैं मिन्जो दर्ई दित्तिरे। 3 सदा री जिन्दगी ये ई, भई सैं तूझ, सच्चे परमेश्वरा जो, होर यीशु मसीह जो जाणो तिस्सो जे तैं भेजीरा। 4 सैं जे काम तैं मिन्जो दित्तिरे थे, तिन्हां सबी जो पूरा करीने, संसारा च मैं तेरी महिमा कित्ती। 5 होर हुण, हे पिता आप्पु सौगी मिन्जो बी महिमा दे, तेडी जे महिमा सृष्टीया रे रचणे ते पैहले मेरी हुआ थी।

अपणे चेलयां खातर

6 संसारा रे तिन्हां जे माहुआं जो, तैं मिन्जो दित्या, मैं तिन्हां तेरे बारे च दसया होर सखाया। सैं सारे तेरे थे पर तैं तिन्हां जो मिंजो दर्ईत्या, होर तिन्हें तेरे बचना रियां गल्लां मन्नीयां। 7 हुण सैं जाणां ये भई सारियां चीजां सैं जे तैं मिंजो दित्ती रियां, सैं तेरते ई आई रियां। 8 मैं तिन्हां जो सैं ई उपदेश दित्या सैं जे तैं मिंजो दित्तिरे थे, होर तिन्हें सब मन्नी ले। सैं सारे पक्के तरीके ने ये जाणा यें भई हऊं तेरते ई आईरा। होर तिन्हा जो विश्वास आ भई तैं ई मिंजो भेजीरा। 9 हऊं तिन्हां खातर प्रार्थना करया रां। हऊं संसारा खातर प्रार्थना नी करया करदा, पर तिन्हां खातर प्रार्थना करया रां सैं जे तैं मिंजो दर्ईतरे, कने सैं जे तेरे। 10 सब कुछ सैं जे मेरा सैं तेरा, होर सैं जे तेरा सैं मेरा। होर मिंजो तिन्हां ते महिमा मिली। 11 हऊं होर जादा हुण इस संसारा च नी रेहणा, पर सैं संसारा च ई हए, होर पवित्र पिता हऊं तेरे लौ आए रां, तु अपणे तिस नौं रे खातर सैं जे तैं मिंजो दित्तिरा तिन्हां री रक्षा कर, इस खातर भई तियां जे तु होर हऊं इक ये, सैं बी इक ही बणीरे रौ। 12 तंजे हऊं तिन्हां ने सौगी था तां मैं तेरे तिस ई नौं ते सैं जे तैं मिंजो दित्तिरा था तिन्हां री रक्षा कित्ती। मैं तिन्हां री रक्षा कित्ती होर तिन्हां च ते कोई बी नाश नी हुआ, तिसते सवाए सैं जे नाश करने आऊले रा पुत्र था, शास्त्रा रियां गल्लां पूरियां हुणे खातर येदा हुआ। 13 हुण हऊं तेरे लौ आए रां पर ये गल्लां हऊं संसारा च हुंदे हुए बोलया रां, कें भई हऊं दिला रीया खुशीया जो पुरी करी लूं। 14 मैं तेरा बचन तिन्हां जो दसया पर संसारा रयां लोके तिन्हां ते घ्रणा कित्ती, कें भई सैं संसारा रे नी ये, तियां जे हऊं संसारा रा नी आ। 15 हऊं ये प्रार्थना नी करदा भई तु तिन्हां जो संसारा ते कडी दे, पर ये प्रार्थना करया रां भई तु दुष्टा ते तिन्हां जो बचा ई लै। 16 सैं संसारा रे नि ये, इयां ई तियां जे हऊं संसारा रा नि आं। 17 तेरा बचन सच्चा आ, होर इस ई सच्चा ते तू तिन्हां जो अपणिया सेवा खातर लई ले। 18 तियां जे तैं मिंजो इस संसारा च भेजेया, तियां ई हऊं बी तिनों इस संसारा च भेजेया रां। 19 हऊं तिन्हां खातर अप्पु जो तेरिया सेवा च दये रां कें भई सैं बी सचा च हुई ने अप्पु जो तेरिया सेवा च दर्ई दो।

सारे विस्वासियां खातर

20 हऊं तिन्हां ई खातर प्रार्थना नी करया करदा, पर तिन्हां खातर बी सैं जे तिन्हां रे उपदेशा सुणीने मेरे पर विश्वास करगे। 21 सैं सब इक हुई जाओ। तियां जे हे पिता तु मेरे च आ होर हऊं तेरे च आ; सैं बी आहां सौगी इक हुई जाओ। कें भई संसार विश्वास करो भई मिंजो भेजणे औळा तु ही आ। 22 सैं सारी महिमा जे तैं मिंजो दित्ती, मैं तिनों दर्ईती, कें भई सैं बी इक हुई जाओ

तियां जे अहें इक ये। 23 मांह तिन्हां च रेहणा होर तु मेरे च, इसते तिन्हां री एकता पुरी हुई जाणी, होर संसारा जो पता लगी जाणा, भई मिंजो तैं भेजेया, होर तैं तिनों बी तेदा ई प्यार कित्या, तेदा जे तैं मिंजो कित्या।" 24 "हे पिता ! सैं लोक जे तैं मिंजो दित्तिरे, मेरी ये इच्छा ई भई तेथी जे हऊं आ तेथी सैं बी रहो, कें भई सैं मेरिया तिसा महिमा जो देखी सको सैं जे तैं मिंजो दित्ती। कें भई सृष्टीया रे रचणे ते पैहले तु मिंजो प्यार करां था। 25 हे पिता सारी धार्मिकता तेरते ई हई, हऊं तिजो सारिया रीतिया ने जाणां, पर ये संसार नी जाणदा, होर मेरे चले भी जाणां ये भई तैं मिंजो भेजीरा; 26 मैं तिनों तेरे नौं रा ई ज्ञान नी दित्या, होर तेरे नौं रा ई ज्ञान मांह दंदे भी रेहणा, कें भई सैं जे प्यार तें मेरने कित्या सैं तिन्हां च बी रौ, होर हऊं बी तिन्हां ने रहऊं।

यीशुये रा पकड़वाया जाणा

(मत्ती 26:47-56; मरकुस 14:43-50; लूका 22:47-53)

18 यीशु इन्हां गल्लां जो बोली ने अपणें चेलयां सौगी किद्रोन नाले रे पार इक्की बागा जो चली गया। 2 यहूदा भी, तिने जे तिस कने धोखा कित्या तिसा जगहहू जो जाणां था, कें भई यीशु तिसा जगह जो अपणे चेलयां समेत जांदा आउंदा रवां था। 3 तां ई यहूदा, अपणे सौगी सेना रे हथियारा औळे आदमियां, कने महायाजकां होर फरिसियां रे भेजी रे सपाईयां जो मशालां होर हथियारां समेत लईने, तेथी आई गया। 4 यीशु सैं जे सब कुछ जाणां था, भई तिसने सौगी क्या हुणे औळा आ, साहणे आया होर तिन्हां ते पुछेया, "तुहें किसो टोले रां ये ?" 5 तिन्हें तिस्सो जवाब दित्या, यीशु नासरिये जो। यीशुये तिन्हां जो बोलया, "सैं हऊं आ।" तेथी यहूदा तिने जे तिस्सो धोखा दित्या, खडी रा था। 6 तां तिने तिन्हां जो बोल्या, "सैं हऊं आ", तिनी धका लगया कने सैं धरतीया पर पई गे। 7 यीशुये फेरी भीं तिन्हां जो पुछेया, "तुहें किसो टोले रां ये ?" तिन्हें तिस्सो जवाब दित्या, यीशु नासरिये जो। 8 यीशुये जवाब दित्या मैं तुहां जो बोलया, "सैं हऊं ई आ; जे तुहें मिंजो टोलया रां ये, तां इन्हां सबी जो जाणे दवा। 9 ये तिने इस खातर बोल्या, भई तिसरि बोली रियां गल्लां सच हुई जाओ, 'मैं तिन्हां च ते किसी जो बी खोया नीं आ, सैं जे ते मिंजो दित्ती रे थे।' 10 फेरी शामौन पतरसे, तिसले जे इक तलवार थी, अपणिया तलवारा कडी, कने महायाजका रे दासा रा खब्बा कान बडी ने तिस्सो घायल करी तेया। तिस दासा रा नौं मलखुस था। 11 तां यीशुये पतरसा जो बोलया, "अपणिया तलवारा मयाना च रख : क्या हऊं पीड़ा रे तिस कटोरे जो नी पीऊं सैं जे पिते मिंजो दित्तिरा ?"

हन्ना रे सामणे यीशु

12 फेरी रोमी टुकटीया रे सपाईयें कने होर तिन्हां रे सुबेदारें कने यहूदियां रे मन्दरा रे पैहा देणे औळे यां यीशुये जो कैद करी लेया। 13 होर तिस्सो बन्ही ने पैहले हन्ना लो लई गे, सैं जे तिस साला रे महायाजका कैफा रा सऊरा था 14 कैफा सैं माहु था तिने जे यहूदी नेतेयां जो सलाह दित्ती थी भई सबी लोकां री बजाए एकी रा मरना ठीक आ।

पतरसा रा इन्कार

(मत्ती 26:69,70; मरकुस 14:66-68; लूका 22:55-57)

15 शामौन पतरस कने इक होर चेला यीशुये रे पीछे आईगे। महायाजक इस चले जो पछ्याणा था इस खातर सैं यीशुये सौगी महायाजका रे अंगणा तक आई गया। 16 पर पतरस दरवाजे बाहर ई रूकी गया। फेरी महायाजका रिया पछ्याणा औळा दुजा चेला बाहर गया, होर पैहरा देणे औळिया ने गलाईने, पतरसा जो अन्दर ली अन्दरया। 17 तां पैहरा देणे औळिये तिसे दासी ये पतरसा जो बोलया, मिंजो लगां भई तु बी यीशुये रा इक चेला आ? पतरसे जबाब दित्या, नई हऊं नी आ। 18 ठण्ड बौहत हुणे रिया वजह ते दास कने मन्दरा रे पैहरेदार आग बाळी ने खडी ने आग सेकया रां थे, पतरस बी तिन्हा ने खडी ने आग सेकया रां था।

महायाजका रे जरिये यीशुये री पूछताछ
(मत्ती 26:59-66; मरकुस 14:55-64; लूका 22:66-71)

19 फेरी महायाजके यीशुये ते तिसरे चलेयां कने तिसरिया शिक्षा रे बारे च पुछ्या। 20 यीशुये जबाब दित्या, मैं सदा लोकां च रई ने सारेयां ने खुली ने गल्ल-बात किती। सदा मैं प्रार्थना सभा होर मन्दरा च तेथी जे यहूदी कट्टे हुआं ये, उपदेश दित्या। मैं कदी बी लुखी-छिपी ने कुछ नी बोलया। 21 फेरी तु मेरते कें पुछ्या रां ? तिन्हां ते पुछ, मैं क्या-क्या बोलया, तिन्हें जे मिंजो सुणेया। मैं जो कुछ बोलया, मेरे सुणने औळे ही दस्सी सकां ये।" 22 तंजे तिने ऐदा बोलया तां मन्दरा रे पैहरेदारे सै जे तेथी खडीरा था, यीशुये जो इक थप्पड़ मारेया, होर बोलया तें महायाजका जो ईयां जबाब देणे री हिम्मत कियां किती। 23 यीशुये तिस्रो जबाब दित्या, " जे हऊं बुरा बोलया रां तां तु साबत कर होर दस भई इस च बुरा क्या था, होर जे मैं ठीक बोलया तां तु मिंजो केह मारेया रां। 24 फेरी हन्ने तिस्रो बन्ही रे जो ई महायाजक कैफा लौ भेजी तया।

पतरसा रा भीं ते इन्कार करना

(मत्ती 26:71-75; मरकुस 14:69-72; लूका 22:58-62)

25 तजे शामौन पतरस खडी ने आग सेक्या रां था, तां तिन्हें तिस्रो पुछ्या, क्या तु तिसरा चेला आ ? तिने नां दित्ती, होर बोलया हऊं नीं आ। 26 महायाजका रा इक सेवक सै जे तिस दासा रा रिशतेदार था, तिसरा जे पतरसे कान बडया था, पुछ्या, दस्स भई क्या मैं तिजो तसने सौगी बगीचे च नी देख्या था ? 27 तां फेरी भीं पतरसे नां दई ती। होर तालुं ई कुकड़े झांग दई ती।

पिलातुसे रे सामणे यीशु

(मत्ती 17:1,2,11-14; मरकुस 15:1-5; लूका 23:1-5)

28 फेरी सै सवेरे रे बक्ता यीशुये जो कैफा रे घरा ते रोमा रे राज्यपाला रे मेहला जो लई गये। यहूदी लोक राज्यपाला रे मेहला च आप्पु नी जाणा चाहंदे थे, भई से अपवित्र नी हुई जाओ होर फसह री रोटी खाई सको। 29 तां पिलातुसे बाहर आई कने तिनां पुछ्या, इस माह्णुए रा क्या दोष आ ? 30 तिने जबाब दित्या, जे ये अपराधी नी हुंदा तां अहें इसो तेरलौं नी लयां दे। 31 पिलातुसे तिन्हां जो बोलया। इसो तुहें लई जाओ कने आपणेयां कनुनां च ते ई इसरा नपटारा करां। यहूदीएं तिस्रो बोलया, अहें किसी जो भी मौता री सजा नी दई सकदे। 32 ये इस खातर हुआ भई यीशुये री आपणे मरने खातर बोली रियां गल्लां सच साबत हुई जाओ।

33 पिलातुसे राज्यपाला रे मेहला च वापस चली गया होर यीशुये जो सद्दी ने तिसते पुछ्या, क्या तु यहूदियां रा राजा आ ? 34 यीशुये जबाब दित्या, " ये गाल्ल तु आप्पु खा ते पुछ्या रां, या होरीं मेरे बारे च बोली री ? 35 पिलातुसे बोलया, क्या हऊं यहूदी आ ? तें ऐदा क्या कितिरा भई, तेरे लोके कने महायाजके तिजो मेरे हत्था दई तया ? 36 यीशुये जबाब दित्या, " मेरा राज इसा धरतिया रा नीआ। जे मेरा राज इसा धरतिया रा हुंदा, तां मेरी प्रजा मिंजो यहूदियां ते बचाणे खातर लडाई करदी, पर मेरा राज ईत्थी रा नी आ। 37 पिलातुसे तिस्रो बोलया, तां क्या तु राजा आ ? यीशुये जबाब दित्या, " तु बोलां भई हऊं राजा। हऊं इस खातर पैदा हुईने संसारा च आया भई सच्चा री गवाई बणु कने देऊं। सारे माह्णु सै जे सच्चा खा हये सै मेरा बचन सुणाए।" 38 पिलातुसे तिस्रो पुछ्या, सच क्या आ ?

मौती रिया सजा रा हुक्म

(मत्ती 27:15-31; मरकुस 15:6-20; लूका 23:13-25)

ऐदा बोली ने, तां पिलातुसे बाहर आई कने यहूदियां जो बोलया, हऊं तिस कोई खोट नी कड्डी सकेया। 39 तुहां री ये रीति भई फसह रे त्योहारा पर हऊं तुहां खातर किसी कैदीए जो छड्डी सकां। तां तुहें क्या चाहं ये भई हऊं तुहां खातर इस यहूदियां रा राजे जो छड्डी दूँ। 40 तां सै फेरी भीं जोरा-जोरा ने

रऊला पाणे लगे, इसो नी पर बरअब्बा जो छड्डी दे। बरअब्बा खुंखार मुजरिम था।

19 पिलातुसे यीशुये जो कोड़े मरवा ये। 2 फेरि सपाईयें कण्डे आउलियां डालियां बुणी ने एक मुकट बनाया, होर तसरे सिरा पर रखी तया कने तिस्रो जामनी रंगा रा बागा पहाया। 3 तिसलो आई आई ने बोलणे लगे, यहूदियां रा राजे री लम्बी उमर हो, होर तिस्रो थप्पड़ मारने लगे। 4 पिलातुसे इक बार फेरी बाहर आईने तिनां बोलया, देखा, हऊं तिस्रो भीं बार लयाये रां तिसते जे तुहें जाणी सको भई मिंजो तिसच कोई खोट नी मिल्या। 5 फेरी यीशु बार आया, तिने सिरा पर कण्डेयां रा मुकट कने जामणी रंगा रा बागा पेहनी रा था, ता पिलातुसे बोल्या, ये आ सै आदमी। 6 तांजे महायाजके कने मंदरा रे यां पैहरेदारे तिस्रो देख्या तां रउला पाया, कने बोल्या, इसो कुसा पर लटकाई दओ! इसो कुसा पर लटकाई दओ! पिलातुसे तिन्हां ने बोल्या, तुहें इसो लई जाओ कने कुसा पर लटकाई दओ, हऊं इसच कोई खोट नी देखदा। 7 यहूदियें तिस्रो जबाब दित्या, आहारे कनुना मताबक इसो मरने ई पउणा, कें भई इने परमेश्वरा रा पुत्र हुणे रा दावा कित्तिरा। 8 तांजे पिलातुसे तिन्हां जो ये बोलदा सुणेया तां सै बौहत डरी गया। 9 होर राज्यापाला रे मेहला रे अन्दर जाईने, यीशुये जो पुछ्या, तु किती ते आईरा ? पर यीशुये तिस्रो कोई जबाब नी दित्या। 10 पिलातुसे तिस्रो पुछ्या, क्या तु मेरने गलाणा नी चाहंदा ? क्या तु नी जाणदा भई मिंजो तिजो छडणे रा बी हक आ कने तिजो कुसा पर लटकाणे रा बी अधिकार आ। 11 यीशुये तिस्रो जबाब दित्या, " तिजो मेरे पर कोई अधिकार नी हुंदा जे तिजो पिता परमेश्वरा ते मिलीरा नी हुंदा। इस खातर, तिने माह्णुए जे मिंजो पकड़वाई रा सै तेरते बी बडा पापी आ।

12 ये सुणीने पिलातुसे तिस्रो छडणे रा कोई भी धुरपा नी कित्या। यहूदी रडाणे ई लगी गे, जे ते इसो छडेया तां तु कैसरा रा मित्र नी या, सै जे आप्पु जो राजा हुणे रा दावा करो तां सै कैसरा रा बरोधी आ। 13 तजे पिलातुसे ये गल्लां सुणीयां तां, यीशुये जो पत्थरा रे चबुतरे पर लई गया, तिस्रो जे इब्रानी भाषा च गब्वता या पत्थरा रा फर्ष बोलां ये, होर सै न्याय रे आसणा पर बैठी गया। 14 ये फसह री तयारिया रा दिन था। ये कोई छेवें घण्टे री गाल्ल ई। पिलातुसे यहूदियां जो बोल्या, ये आ तुहांरा राजा। 15 फेरी सै रडाए, इसो लई जाओ, इसो लई जाओ, इसो कुसा पर लटकाई दओ! पिलातुसे तिन्हां जो बोल्या, क्या तुहें चावां ये भई हऊं तुहां रे राजे जो कुसा पर चढाऊं ? इस पर महायाजके जबाब दित्या, कैसरा जो छड्डी ने आहां रा कोई दुजा राजा नी आ। 16 फेरी पिलातुसे तिस्रो कुसा पर चढाणे खातर तिन्हां जो दई त्या, होर सै तिस्रो बाहरो लई गये;

कुसा पर लटकाया जाणा

(मत्ती 27:32-44; मरकुस 15:21-32; लूका 23:26-43)

17 अपणा कुस चकी ने सै खोपडी नावां रिया जगहा तको गया। (इब्रानी भाषा च इसो गुलगुता बोलां ये।) 18 तेथी तिने तिस्रो दो होरी कैदीयां ने सौगी कुसा पर चढाया। इक तिसरे सजे कने इक तिसरे खब्वे हत्था, यीशु तिन्हां रे बीचा औळे कुसा पर चढाया। 19 दोष पत्र लिखी ने कुसा पर लगवाया। तिस च लिखीरा था, 'यीशु नासरी, यहूदियां रा राजा।' 20 बोहर्ती यहूदियें तिस दोष पत्रा जो पढेया कें भई तेथी जे यीशु ये जो कुसा पर था, सै जगहा तिस नगरा ते नेडे ई थी, होर ये पत्र इब्रानी, युनानी कने लतीनी भाषा च लिखी रा था। तां कुछ यहूदी नेतेयां पिलातुसा जो बोल्या- 21 यहूदियां रा राजा, मत लिखा, पर ये लिखा, तेदा जे तिने बोल्या था, भई हऊं यहूदियां रा राजा आ। 22 पिलातुसे तिन्हां जो जबाब दित्या, मैं सै जे लिखित्या, सै लिखित्या।

23 तजे सपाईयें यीशुये जो कुसा पर टंगी तया, तां तिने तिसरे कपडे अप्पु चीयें चऊं हिस्सेयां च बंडी लये। इक्की सपाईये खातर इक हिस्सा था, तिने तिसरा कुरता भी तुआरिलया कें भई सै उपरा ते थल्ले तको बिना किसी सलाई दई ने बुणीरा था। 24 इस खातर तिने बोल्या, भई इसो फाडना नीआ, पर परचियां पाई ने इक्की जो ई देणा। कें भई शास्त्रा च लिखिरा बचन पुरा हुई जाओ, तिन्हें मेरे कपडे बी अप्पु चीयें बंडी लये, होर मेरे कुरते खातर परचियां पाईयां।

25 यीशुये रे क्रुसा ले तिसरी माता, क्लोपासा री जनाना मरियम, कने मरियम मगदलिनी खड़ी रियां थियां। 26 तजे यीशुए अपणी माता कने अपणे प्यारे चले जो तेथी खड़ीरे देख्या तां, अपणिया माता ने बोल्या, ये तेरा पत्र आ। 27 फेरी तिने अपणे चले जो बोल्या, ये तेरी माता ई। तिस ई बक्ता ते सै चेला तिसा जो अपणे घरा जो लई गया।

यीशुये री मौत

(मत्ती 27:45-56; मरकुस 15:33-41; लूका 23:44-49)

28 इसते बाद तजे यीशुए जो पता लगी गया भई सब कुछ पुरा हुई गया, तां तिने बोल्या, भई मिंजो धयाए लगीरी, 29 तेथी सिरके ने भरी रा इक बरतण रखीरा था। इस खातर तिन्हें संपंजा जो सिरके च उबोया, होर तिसरे मुहां ने लाया। 30 फेरी तजे तिन्हें सिरके औळा काम करी तेया, तां बोल्या भई सब कुछ पुरा हुआ। तां तिने अपणा सिर थल्ले खो कित्या होर प्राण छड़ी ते।

भाले ने बिन्या जाणा

31 ये फसह री तयारिया रा दिन था। इस खातर भई तिन्हां रियां लाशां क्रुसा पर लटकिए रियां नि रौ, कें भई सब्ता रे दिन कोई बी काम नी हुई सकदा था, इस खातर यहुदियें पिलातुसा जो आ देणे जो बोल्या, भई तिन्हां रियां लतां तोड़ी ने तिन्हां जो क्रुसा परा ते थल्ले तुआरी दओ। 32 तां सपाई आये होर तिन्हां च ते तिन्हां दुई कैदियां रियां, लतां तोड़ी तियां, सै जे तिसने सौगी क्रुसा पर चढ़ाई रे थे। 33 तजे सै यीशुये लौ आए, तां तिने देख्या, भई सै पैहले ई मरी गरा था। इस खातर तिन्हें तिस रियां लतां नी तोड़ीयां। 34 पर तिन्हां च ते इक्की यीशुये रिया बखीया च अपणा भाला मारेया, तिसते जे तालु ई खुन होर पाणी निकल्लेया। 35 (तिने जे ये देखेया, तिने गवाई दित्ती, होर तिसरी गवाई साच्च ई, कने सै जाणां भई सै साच्च बोल्या रां, कें भई तुहां सब्बनी जो विश्वास हुई जाओ। 36 ये इस खातर हुआ भई, शास्त्रा च लिखिरा बचन पुरा हुई जाओ, " तिसरी कोई बी हड्डी नी टुटणी।" 37 होर धर्म शास्त्रा च लिखिरा भई, "तिसा तिन्हें भाले ने बिन्या, तिन्हां नी नज़र तिस खा ही रैणी।"

यीशुये रा कब्रा च रक्खया जाणा

(मत्ती 27:57-61; मरकुस 15:42-47; लूका 23:50-56)

38 इसते बाद अरमतियाह रे यूसुफे सै जे यीशुये रा चेला था, पर यहुदियां रे डरा ते इसा गल्ला जो नी दसदा था, तिने पिलातुसा ते विनती कित्ती, भई यीशुये रिया लाहशा जो तिथी ते नेणे री आ देओ। पिलातुसे तिस्सो दई ती। होर सै तेथी आई ने तिसरिया लाहशा जो लई गया। 39 निकुदेमुसे भी, सै जे यीशुये लौ राति रे बक्ता आया था, तेथी तीह किलो गन्धरस कने एलवा लई ने आया, फेरी सै यीशुये रिया लाहशा जो लई गये, 40 होर यहुदियां रिया लाहशा जो दबणे रिया व्यवस्था रे मानदेयां, तिस्सो खुशबुआ औळे समाना ने सौगी कफणा च लपेटितया। 41 तेथी जे यीशुये जो क्रुसा पर चढ़ाई रा था, तेथी इक बाग बी था, होर तिस बागा च इक नवी कब्र थी, तिस जे किसी जो बी रखी रा नी था। 42 कें भई सै सब्ता रिया तयारिया रा दिन था, होर सै कब्र बौहत नेडे थी, इस खातर तिने यीशुये जो तिस च रखी तया।

खाली कब्र

(मत्ती 28:1-8; मरकुस 16:1-8; लूका 24:1-12)

20 हफते रे पैहले दिन सवेरके नेहरे ई मरियम मगदलिनी कब्रा पर आई। कने तिसे देख्या भई कब्रा रा पत्थर हटीगरा। 2 फेरी सै दौड़ी ने शमौन पतरस होर दुजा चले लौ गई, सै जे यीशुये रा प्यारा था। होर तिन्हां ने बोलया, सै प्रभु ये जो कब्र ते बाहर कड्डी ने लई गे। आहां जो पता मनी या भई तिने तिस्सो कित्ती रखी तया। 3 फेरी पतरस होर दुजा चेला कब्रा खो दौड़े। 4 सै दोनों सौगी-सौगी दौड़े रां थे, पर दुजा चेला पतरसा ते आगे निकली गया, होर कब्रा पर पैहले ही पुज्जी गया। 5 तिने जुल्की ने कब्रा च देखया, भई तेथी कफणा रे कपड़े पई रे थे, पर सै अन्दर नी गया। 6 तां शमौन पतरस बी सै जे तिसरे पिछे आया रां था, पुज्जी गया, होर कब्रा रे

अन्दर चली गया। तिने देख्या भई तेथी कफणा रे कपड़े पई रे। 7 होर सै कपड़ा सै जे दबदे बक्ता तिसरे सिरा पर था, कफणा रे कपड़े ते लाग, दुजीया जगह तैह लाई कने रखीरा था। 8 फेरी दुजा चेला सै जे कब्रा पर पैहले पुज्जी रा था, कब्रा च गया, होर तिने देखी कने विश्वास कित्या। 9 सै अजे तक बी शास्त्रा रे तिस बचना जो नी समझे थे, भई, " तिसरा मरि रियां ते जी उठणा पक्का आ।" 10 फेरी सै चले आपणे यां घरा जो आईगे।

मरियम मगदलिनी जो दिखणा

(मत्ती 28:9,10; मरकुस 16:9-11)

11 मरियम रोंदी-रंडांती कब्रा ते बाहर खड़ी री थी, रोंदी-रोंदी सै कब्रा च अन्दरा खौं जुल्की। 12 तेथी जे यीशुये री लाहशा रखी री थी, तिसे चिट्टे कपड़े पेन्ही रे, दो स्वर्गदुत देखे, इक तिसरे सरहाणे खौं कने दुजा तिसरे पैदा खौं, बेठीरे थे। 13 तिन्हें तिसा जो पुछेया, ओ जनाने तु कें रोया रां ई ? तिसे जबाब दित्या, सै मेरे प्रभुए जो चक्की ने लई गये, होर पता मनी या भई तिने तिस्सो कित्ती रखी तया ? 14 येदा बोली ने सै घुम्मी कने तिसे यीशुये जो खड़ी रा देखया। पर सै पछयाणी नी सकी भई सै यीशु ई आ। 15 यीशुये तिसा जो बोलया, " तु कें रोया रां ई ? तु किसो टोल्या रां ई ? ये सोची ने भई सै माली आ, तिसे तिस्सो बोलया, जे ते तिस्सो चक्की लरा तां मिंजो दस्सी दे, तें तिस्सो कित्ती रखी रा, मांह तिस्सो लई जणा। 16 यीशुये तिसा जो बोलया, मरियम, सै पिछे खो घुम्मी कने तिसे इब्रानी भाषा च बोलया, रब्बुनी।(गुरु।) 17 यीशुये तिसा जो बोलया, मिंजो मत छोंदी, कें भई हऊं अजे तक पिता परमेश्वरा लौ ऊपरो नी गईरा, तु मेरे भाईयां लौ जा, होर तिन्हां जो दस हऊं अपणे परम पिता होर तुहां रे परम पिता, अपणे परमेश्वर होर तुहां रे परमेश्वरा लौ ऊपर जाया रां। 18 मरियम मगदलिनी ऐदा बोलदी-बोलदी चेलियां लौ आई, मैं प्रभु ये जो देखेया होर तिने मिंजो ये गल्लां दस्सीयां।

चेलियां जो दिखणा

(मत्ती 28:16-20; मरकुस 16:14-18; लूका 24:36-49)

19 तिस दिन संजके बक्ता, सेज जे हफते रा पैहला दिन था, तिसरे चेलियां यहुदियां ते डरा रे मारे दरवाजे बन्द कितिरे थे। तां यीशु तेथी आईने तिन्हां च खड़ी गया, होर तिन्हां जो बोलया, तुहां जो शान्ति मिलो। 20 ऐदा बोलणे ते बाद तिने आपणे हाथ होर बखिया रा जख्म तिन्हां जो दस्सेया। चेलियां तजे प्रभुए जो देखेया तां सै बौहत खुश हुई गये। 21 तां यीशुये तिन्हां जो फेरी भी बोलया तुहां जो शान्ति मिलो, तियां जे परम पिते मिंजो भेजेया तियां ई हऊं भी तुहां जो भेजेया रां। 22 येदा बोली ने तिने तिन्हां पर फुक मारी, होर बोलया, पवित्र आत्मा जो ग्रेहण करा। 23 तिस माहू ये रे जे पाप तुहां माफ करी दणे, तिन्हां जो माफी मिली जाणी होर तिन्हां रे जे पाप तुहां माफ नी करने, तिन्हां बगैर माफिया ते ई रैणा।

थोमा जो दिखणा

24 थोमा सै जे बाहरां च ते था, कने दिदिमस (जुडवां) बोलां थे। तजे यीशु आया था तां तिन्हां ने सौगी नी था। 25 होरीं चेलियां तिस्सो दस्सया भई, अहे प्रभुए जो देख्या। पर तिने तिन्हां जो बोलया, तंवां तका जे हऊं तिसरेयां हथ्यां च मेखां रे नशाण नी देखी लुं, कने तिन्हां च अपणी गुठी पाई ने नी देखी लुं, होर तिसरे पंजरा च हाथ नी पाई ने देखू, तंवां तको मिंजो विश्वास नी हुणा।

26 अड्डां दिनां बाद तिसरे चले फेरी भी घरा च कड्डे हुये, होर थोमा तिन्हां ने सौगी था। (दरवाजे पर ताला लगी रा था।) यीशु आया कने तिन्हां च खड़ी गया, होर तिन्हां जो बोलया, तुहां जो शान्ति मिलो। 27 फेरी तिने थोमा जो बोलया, आओ कने अपणी गुठी पाई ने मेरे हाथा देख, होर अपणा हाथ मेरे पंजरा च पाई ने देख। शक करना छड्डी ने विश्वास कर। 28 थोमे जबाब दित्या, हे मेरे प्रभु, हे मेरे परमेश्वर ! 29 यीशुये तिस्सो बोलया, तें मिंजो देखी ने मेरे पर विश्वास कित्या। सै धन्न ये सै जे बिना देखे करां।

इसा कताबा रा मकसद

30 होर बी बौहत चमत्कार अपणेयां चलेयां जो दस्से, सै जे इसा कताबा च नी लिखिरे। 31 होर सै जे गल्लां इस च लिखिरि यां सै इस खातर ई यां भई तूहें विश्वास करो भई यीशु ई परमेश्वरा रा पुत्र मसीह आ। इस खातर बी भई तूहें विश्वास करदे- तिसरे नौं ते जिन्दगी पाओ।

तिबिरियास झिला रे कन्डे चेलयां जो दिसणा

21 इसते बाद तिबिरियास झीला पर यीशुये अप्पु जो चलेयां रे सामणे दस्या तिने अप्पु जो ईयां दस्या भई- 2 शमौन पतरस, थोमा (तिस्सो जे जुड़वा बोलां ये), गलीला रे काना रा नतनएल, जबदी ये रे पुत्र होर यीशुये रे दो होर चले तेथी झीला रे कनारे पर थे। 3 शमौन पतरसे तिन्हां जो बोलया, हऊं मछियां पकड़ने जाये रां। तिन्हें तिस्सो बोलया अहें भी तेरने सौगी चलां ये। तां सै तिसने चली गे होर किस्तिया च बैठी गे। तिसा राती तिन्हां ते कुछ मनि पकडी सके।

4 भ्याग हुणे लगी गरी थी। तालूँ यीशु झीला रे कनारे आई ने खड़ी गया। तिसरे चलेयां जो ये पता नी लगया भई सै यीशु ई आ। 5 फेरी यीशुये तिन्हां जो पुछया, क्या तुहां ले मछियां हईयां ? तिने जबाब दित्या, आहां ले नीं आ। 6 फेरी यीशुये तिन्हां जो बोलया किस्तिया रे सज्जे हत्था खा जाल लावा, तां तुहां जो कुछ मिली जाणियां। तां तिन्हें जाल लाया होर बौहत जादा हुणे रिया वजह ते सै तिस्सो खिंजी नी सके। 7 फेरी यीशुये रे प्यारे चले पतरसा ने बोलया, ये तां प्रभु आ। तजे शमौने सुणेया भई सै प्रभु आ तां तिने पाणिये व छाल मारी ती, कने झट-पट अपणे कपडे पेह्नी ले (कें भई सै नंगा था।) 8 पर होर चले मछियां ने भरी रा जाल खीजदे-खीजदे किस्तिया च कनारे खो आई गे। (कें भई सै धरतिया ते कोई जादा दूर नी थे, तिन्हां री दूरी 100 मीटरां री थी)

9 तंजे सै कनारे पर आये तां तिने तेथी कोयलयां री आग बल दी देखी। तिस पर मछी कने रोटी पकणे जो रखी री थी। 10 यीशुये तिन्हां ने बोलया, तूहें हुण सै जे मछियां पकड़ी रियां, तिन्हां च ते खरीयां-खरीयां ली आवा। 11 शमौन पतरस किस्तिया परा जो गया होर 153 बड-बडियां मछियां ने भरी रा जाल कनारे खा खीजया। जाला च बौहत जादा मछियां थियां फेर भी बी सै जाल फटेया नीया। 12 यीशुये तिन्हां जो बोलया, ऐथी आवा कने रोटी खावा। तिसरे चलेयां च ते किसी जो बी ये पुछणे री हिम्मत नी हुई भई तु कुणा ? कें भई तिन्हां जो पता लगी गरा था भई सै प्रभु आ। 13 यीशुये आगे बधी ने रोटी कने मछियां लई होर तिन्हां जो दित्ती। 14 ये तिज्जी बारी थी तजे सै मरिरेयां च ते जीउंदा हुणे ते बाद यीशु अपणे यां चलेयां जो दुस्सया।

यीशु कने तिसरा चेला

15 तजे तिन्हें रोटी खाई ली तां यीशुये शमौन पतरसा जो बोलया, हे यूहन्ना रे पुत्र शमौन, तितना प्यार जे ये मेरने कराए क्या तु मेरने इन्हां ते जादा प्यार करां ? पतरसे यीशुये जो बोलया, हौं प्रभु तु जाणां भई हऊं तेरने प्यार करां। यीशुये पतरसा जो बोलया, मेरे मेन्नेयां री रखवाली कर। 16 सै तिसने फेरी भी बोलां, यूहन्ना रे पुत्र शमौन, क्या तु मेरने प्यार करां ? पतरसे यीशुये जो बोलया, हौं प्रभु तु जाणां भई हऊं तेरने प्यार करां। यीशुये पतरसा जो बोलया, मेरीयां भेड्डां री रखवाली कर। 17 यीशुये फेर तिज्जी बार पतरसा जो बोलया, यूहन्ना रे पुत्र शमौन, क्या तु मेरने प्यार करां ? पतरस बोहत परेशान हुई गया भई यीशुये तिस्सो तिज्जी बार ये पुछया, क्या तु मेरने प्यार करां ? तां पतरसे यीशुये जो बोलया, हे प्रभु तु सब कुछ जाणां, तु जाणां भई हऊं तेरने प्यार करां। यीशुये तिस्सो बोलया, मेरीयां भेड्डां जो चरा। 18 हऊं तेरने सच बोलां, भई तालुं जे तु जवान था, तां तु अपणे लका जो बन्ही ने तेथी जे दिल करां था तेथी जो चली जांवां था। पर हुण तु बुड्डा हुणे लगी गरा, तु हाथ पसारने कने, होरसी तिज्जो तयार करीने। तेथी जे तु नी चाह्दाँ तेथी तिज्जो लई जाणा। 19 तिने ये दसणे खातर बोलया, भई परमेश्वरा री महिमा तिसरे मरने ते कियां-कियां हुणी। ऐदा गलाई ने यीशुये तिस्सो बोलया, मेरे पीछे चल।

यीशु कने तिसरा प्यार चेला

20 पतरस पिछे मुडेया होर देखया भई, सै जे चेला, तिस्सो जे यीशु प्यार करां था, तिन्हां रे पिछे आये रां (ये सै ई था तिने जे रोटी तोड़दे बक्ता, यीशुये खा झुकी ने पुछेया था भई, हे प्रभु सै कुणां तिस जे तिज्जो धोखे ने पकड़वाणा।) 21 तजे पतरसे तिस्सो देख्या तां तिने यीशुये ते पुछेया प्रभु इसरा क्या हुंगा ? 22 यीशुये तिस्सो बोलया, जे हऊं चाहऊं तां तदुआं तको जे मांह औणा ऐह ऐथी ई रौ। तां इसते तिज्जो क्या आ ? पर तु मेरे पीछे चल। 23 ईयां ई ये गल्लां भाईयां (चलेयां) च ऐथी तको फैली गी यां भई, तिस चले नी मरना। पर यीशुये ऐदा नी बोली रा था भई, तिस चले नी मरना। पर ये बोली रा था, जे हऊं चाहऊं तां तदुआं तको जे मांह औणा ऐह ऐथी ई रौ। तां इसते तिज्जो क्या आ ?

उपसंहार

24 ये सै ई चेला सै जे इन्हां गल्लां री गवाई देया रां कने तिने जे ये गल्लां लिखियां; होर अहें जाणां ये भई तिसरी गवाई साच्च ई। 25 यीशुये होर भी मते सारे चमत्कारा औळे काम किते। जे इक-इक काम सै जे तिने किते, लिखी दित्ते जाओ, तां हऊं सोचां भई, सै जे कताबां लखों दियां सै इतनियां जादा हुणियां थीं यां भई धरतिया पर आई नी सकदियां थीयां।

प्रेरितों

परिचय

1 थियुफिलुस, मैं पेहली कताब तिन्हां सबीं गल्लां रे बारे च लिखी तिन्हां जो जे यीशु शुरू ते करदा कने सखांदा रेया, 2 तिस दिना तका, तदुंआं तका जे सैं तिन्हां प्रेरितां जो तिन्हां जो जे तिने चुणेया था पवित्र आत्मा रे हुक्मा ते ई उपरा जो चकोई नी गया। 3 तिने दुःख चकणे ते बाद बड़ेयां सारेयां पक्केयां सबूतां ते अप्पु जो तिन्हां ले ज्यूदा दसया, कने चाली दिनां तका सैं दुसदा रेया, कने परमेशरा रे राज्जा रियां गल्लां करदा रेया। 4 होर तिन्हां ने मिली ने तिन्हां जो हुक्म दित्या, "यरुशलेमा जो देहां छडदे, पर पिते रे तिस वादे रे पुरे हुणे जो निहालेयां, तिसरे बारे च तुहें मेरते सुणी चुकी रे। 5 कांभई यूहन्ने तां पाणिये ने बपतिस्मा दित्ती रा पर थोड़ेयां दिना ते बाद तुहां पवित्र आत्मा ते बपतिस्मा पाणा।"

यीशुये रा स्वर्गा जो जाणा

6 इस खातर तिन्हें कहेयां हुई ने तिसते पुछ्या, "हे प्रभु क्या इस ई बक्ता इस्त्राएला रा राज्ज फिरी जाणा?" 7 तिने तिन्हां ने बोलया, "तिसा काला या बक्ता जो जाणना तुहां रा काम निआ, तिन्हां जो जे पिते परमेशरे अपणे अधिकारा च रखीरा। 8 पर तां जे पवित्र आत्मा तुहां ला औणा तां तुहांजो सामर्थ मिलणी; होर यरुशलेमा कने सारे यहूदिया होर सामरिया च कने धरतिया रे कोणे-कोणे तका मेरे गवाह हुणे।" 9 येदा बोली ने सैं तिन्हां रे देखदे-देखदे उपरा जो चक्की लया गया, कने बदलां च सैं तिन्हां रिया आक्खीं ते लुखी गया। 10 तिसरे जान्दे बक्ता तां जे सैं आकाशा खा देखया रां थे, तां देखो, दो पुरुष चिटे कपड़े पहनी रे तिन्हां रे नेड़े आई ने खडी गे, 11 कने तिन्हां ने बोलया, "हे गलीली माह्नुओ, तुहें कें खडी ने आकाशा खा देखया रांये? सैं ई यीशु, सैं जे तुहां ला ते स्वर्गा परा चकी लई गईरा, तिसा रितिया जे तुहें तिस्सो स्वर्गा जो जांदे देखया तिसा रितिया तिस फेरी औणा।"

मत्तियाह जो यहूदा रा पद मिलणा

12 तां जे सैं जैतुन नावां रे पहाड़ा ते सैं जे यरुशलेमा रे नेड़े इकि सब्ता रे दिना रिया दूरिया पर आ, यरुशलेमा जो वापस हुये। 13 तां जे सैं तेथी पूजे तां तिस पऊड़े परा जो गे, तेथी जे पतरस कने यहून्ना होर याकूब कने अन्द्रियास कने फिलिप्पुस होर थोमा कने बरतुल्मै कने मत्ती होर हलफई रा पुत्र याकूब कने शमौन जेलोतेस होर याकूबा रा पुत्र यहूदा रह्नां थे। 14 ये सब कईयां जनानां कने यीशुये रिया माता मरियम कने तिसरे भाईयां ने सौगी इक मन हुई ने प्रार्थना च लगी रे रये। 15 तिन्हां ई दिनां च पतरस भाईयां रे बीच सैं जे इक सौ बी आदमियां रे लगभग थे, खड़ा हुई ने बोलणे लगया, 16 हे भाईयो, जरूरी आ भई पवित्र शास्त्रा रा सैं लेख पुरा हो सैं जे पवित्र आत्मा ने दाऊदा रे मुंहा ते यहूदा रे बारे च, सैं जे यीशुये रे पकड़वाणे औळेयां रा अगुआ था, पैहले ते बोलया था। 17 कांभई सैं तां अहां च गिणया गया, कने इस सेवा रे कमां च साथी बणया। 18 (तिने अर्धमा रिया कमाईया ते इक खेत मुल लेया, कने सिरा रे भार पया होर तिसरा पेट फटी गया कने तिसरियां सब आंतां निकली गईयां। 19 इसा गल्ला जो यरुशलेमा रे सब रैहणे औळे जाणी गे, येथी तका भई तिस खेता रा नौं तिन्हां रिया भाषा च 'हक्कदमा' मतलब 'खुना रा खेत' पई गया।) 20 भजन संहिता च लिखीरा, तिसरा घर उजड़ी जाओ होर तिस च कोई नी बसो', कने 'तिसरी जगह कोई दुजा लई लो'।

21 इस खातर जितने दिना तका जे प्रभु यीशु अहां ने सौगी औंदा-जांदा रेया-मतलब यहून्ना रे बपतिस्मे ते लई ने तिसरे अहां ला ते चकोई जाणे तका-सैह लोक जे हमेशा अहां ने सौगी रहे, 22 ठीक आ भई तिन्हां च ते इक आदमी अहां सौगी तिसरे ज्यूंदे हुणे रा गवाह बणी जाओ।" 23 तां तिन्हें दुई जो खड़ा कित्या, इक यूसुफ तिस्सो जे बर-सबा बोलांये, तिसरा उपनौं जे यूसतुस आ, दुजा मत्तियाह जो, 24 कने ये प्रार्थना कित्ती, "हे प्रभु, तु जे सबी रे मना जो जाणां, ये प्रगट कर भई इन्हां च ते तैं किसो चुणी रा, 25 भई सैं इस सेवा रे कमा कने प्रेरिता ते कमा री जगह लओ, तिस्सो जे यहूदा छड्डी ने अपणिया जगह जो चली गरा।" 26 तां तिन्हें तिन्हां रे बारे च चिड्डियां पाईयां, कने चिड्डी मत्तियाह रे नौंवा पर निकली। इस खातर सैं तिन्हां गयारहां प्रेरितां सौगी गिणया गया।

पवित्र आत्मा रा उतरना

2 तां जे पिन्तेकुस्त रा दिन आया तां सैं सब इक्की जगहह कहे थे। 2 इक दम आकाशा ते बड़े तुफाना साई सणसनाहटा री आवाज हुई, कने तिसते सारा घर तेथी जे सैं बेठी रे थे, गुंजी गया। 3 होर तिन्हां आग्नी साई जीभां फटदियां नजर आईयां कने तिन्हां च ते हर इक पर आई ने ठहरी गईयां। 4 सैं सब पवित्र आत्मा ने भरी गे, होर तियां जे आत्मा तिन्हां जो बोलणे री सामर्थ देयां था, सैं लग-लग भाषा बोलणे लगे।

5 आकाशा रे थल्ले री हर इक जातियां च ते भक्त यहूदी यरुशलेमा च रहयां रां थे। 6 तां जे ये आवाज हुई तां भीड़ कडी हुई गई कने लोक घबराई गे, कांभई हर इक जो ये ई सुणां था भई मेरी ई भाषा च बोलया रांये। 7 सैं सब हेरान-परेशान हुई ने बोलणे लगे, "देखा, ये जे बोलया रां ये क्या सब गलीली नीं ये? 8 तां फेरी अहां च ते हर इक अपणी-अपणी जन्म भूमिया री भाषा कियां सुणया रांये? 9 अहें सैं जे पारथी कने मेदी होर एलामी कने मसोपोटामिया होर यहूदिया कने कप्पदूकिया होर पुन्तुस कने आसिया, 10 कने फ्रूगिया होर पफूलिया कने मिस्र होर लीबिया देश सैं जे कुरेने रे अखा-बखा, 11 मतलब यहूदी कने यहूदी मत धारण करने औळे, क्रेती होर अरबी भी ये, पर अपणिया-अपणिया भाषा च तिन्हां ते परमेशरा रे बड़ेया-बड़ेयां कमां रे बारे च सुणया रां ये।" 12 कने सैं सब हेरान हुये कने धबराई ने इक्की दुजे ने बोलणे लगे ये क्या हुया रां?" 13 पर दुजयां हासी डुवाई ने बोलया, "ये तां नौंईया शराबा रे नशे च ये।"

पतरसा रा भाषण

14 तां पतरस तिन्हां ग्याहरां ने सौगी खड़ा हुआ कने बड़ी आवाजा च बोलणे लगया, "हे यहूदियो कने यरुशलेमा च सब रैहणे औळेयो ये जाणी लवा, कने कान लाई ने मेरियां गल्लां सुणा। 15 तेदा जे तुहें समझेया रांये ये लोक नशे च नीं ये, कांभई अजे तका दिन पैहले पैहर मनी चढी रा। 16 पर ये सैं गल्लां ई यां, सैं जे योयेल भविष्यवक्ता रे द्वारा बोलियां गईयां :

17 परमेशर बोलां, भई अन्ता रे दिना च येदा हुणा भई मांह अपणा आत्मा सब माह्नुआं पर भेजणा, कने तुहां रे पुत्रां कने तुहां रियां पुत्रियां भविष्यवाणियां करनियां, होर तुहां रे जवानां दर्शन देखणे कने तुहां रे पुरनिये सुफणेयां जो देखणा। 18 पर मांह अपणे दास कने दासियां पर भी तिन्हां दिना च अपणे आत्मा च ते भेजणा, कने तिन्हां भविष्यवाणी करनी।

19 होर मांह उपर आकाशा च नोखे काम कने थल्ले धरतिया पर नशाण, मतलब लहू कने आग होर धुयें रा बादल दसणा।
 20 प्रभुये रे महान कने तेजस्वी दिना रे औणे ते पैहले सुरज नेहरा कने चन्द्रमा खूना साई हुई जाणा।
 21 होर सै जे कोई प्रभुये रा नाँ लेंगा, तिस्सो उद्धार मिलणा।
 22 "हे इस्राएलियो, ये गल्लां सुणा : यीशु नासरी इक माळु था तिसरा परमेशरा खा ते हुणे रा सबूत तिन्हां सामर्था रे कमा कने रहानिया रे कमा होर नशाणां ते प्रगट आ, सै जे परमेशरे तुहां रे बीच तिसरे द्वारा करी ने दस्सै तिस्सो जे तुहें अप्पु ई जाणां ये। 23 तिस यीशुये जो, सै जे परमेशरा री बणाई रिया योजना कने पैहले रे ज्ञाना रे मताबक पकड़वाया गया, तुहें अर्धमियां रे हत्था ते क्रुसा पर चढवाई ने मारी दित्या। 24 पर तिस्सो ई परमेशरे मौता रे बन्धना ते छुड़ाई ने ज्यूदा कित्या; कांभई ये कदी मनी हुई सकदा था भई सै तिसरे बसा च रेहंदा। 25 कांभई दाऊद तिसरे बारे च बोलां, में प्रभुये जो सदा अपणे सामणे देखदा रेहां कांभई सै मेरे सज्जे पासै खो आ, इस खातर भई किते हऊं रुढी नाँ जाऊं।
 26 इस वजह ते मेरा मन खूश हुआ, कने मेरी जीभ मग्न हुई री; पर मेरा शरीर भी आशा च ई बणी रा रेहणा।
 27 कांभई तु मेरे प्राणा जो पताला च नी छडणा; होर ना अपणे पवित्र जना जो सडने ई देणा।
 28 तैं मिन्जो जीवना रा रस्ता दस्सी रा; तु मिन्जो अपणे दर्शना री खूशिया ने भरी देणा।"
 29 "हे भाईयो, हऊं कूलपति दाऊदा रे बारे च तुहां ने हौंसले ने बोली सकां भई सै तां मरी गया कने गड्डी भी दित्तिरा होर तिसरी कब्र अजो आज अहां ले येथी ई हई। 30 सै भविष्यक्ता था, सै जांगा था भई परमेशरे मेरे ने कसम खादी री भई मांह तेरे वंशा च ते इक्की आदमीये जो तेरे सिंहासना पर बठाणा; 31 तिने हुणे औळियां गल्लां जो पैहले ते ई देखी ने मसीह रे जी उठने रे बारे च भविष्याणी कित्ती भई नां तां तिसरा प्राण पताल लोका च छड्या गया कने ना तिसरी देह सडने पाई। 32 इस ई यीशुये जो परमेशरे जीऊंदा कित्या, तिसरे जे अहें सारे गवाह ये। 33 इयां ई परमेशरा रे सज्जे हत्था ते सबीते ऊची जगहह पाईने, होर पिते ते सै पवित्र आत्मा पाई ने तिसरी प्रतिज्ञा जे कित्ती री थी, तिने ये भेजी दित्ती रा सै जे तुहें देखया कने सुणया रांये। 34 कांभई दाऊद तां स्वर्गा परा हनी चढया; पर सै अप्पु बोलां, 'प्रभुये मेरे प्रभुये ने बोलया, मेरे सज्जे पासै बैठ, 35 तदुआं तका जे मांह तेरे बैरियां जो तेरे पैरां थल्ले री चौकी नी करी दूँ।' 36 इस खातर हुण इस्राएला रा सारा घराना पक्के तरीके ने जाणी ला भई परमेशरे तिस ई यीशुये जो तिस्सो जे तुहें क्रुसा पर चढया, प्रभु भी ठहराया कने मसीह भी।"
 37 तां सुणने औळियां रे दिला लगी गईयां, होर सै पतरस कने प्रेरितां ते पुछणे लगे, "हे भाईयो, अहें क्या करीये?" 38 पतरसे तिन्हां ने बोलया, "मन फिराओ, कने तुहां च ते सब अपणे-अपणे पापां री माफिया खातर यीशु मसीह रे नावां ते बपतिस्मा ला; तां तुहां पवित्र आत्मा रा दान पाणा। 39 कांभई ये वादा तुहां, कने तुहां रियां औळादां, होर तिन्हां सबनी दूरा-दूरा रे लोकां खातर भी हया तिन्हां जो जे प्रभु अहां रा परमेशर अप्पु ला सदगा।"
 40 तिने होर मतियां गल्लां ते बी गवाई दई-दई ने समझाया भई अप्पु जो इसा टेडिया जातिया ते बचाओ। 41 इस खातर तिने जे तिसरा वचन ग्रहण कित्या तिने बपतिस्मा लेया; होर तिस दिन लगभग तीन हजार माळु तिन्हां च मिली गे। 42 कने सै प्रेरितां ते शिक्षा पाणे, होर संगति रखणे, कने तोड़ने, होर प्रार्थना करने च लगीरे रये।

बिश्वासियां री संगती

43 होर सब लोकां पर भय छाई गया, कने मते सारे अद्भुत काम कने नशाण प्रेरितां ते परगट हुणे लगे। 44 कने सब विस्वास करने औळे कड़े रहलं थे होर तिन्हां रियां सब चीजा कडियां थियां। 45 सै अपणिया-अपणिया जयदादा कने समाना जो बेची-बेची ने तेहड़ी जे किसी री जरूरत हुआं थी बंडी देयां थे। 46 सै हर रोज इक मन हुई ने मन्दरा च कड़े हुआं थे, कने घरा-घरा रोटी तोड़दे हुये नन्दा कने मना रिया सीधयाईया ने रोटी खांवां थे, 47 कने

परमेशरा री स्तुति करां थे, होर सब लोक तिन्हां ते खुश थे : कने सै जे उद्धार पांवां थे, तिन्हां जो प्रभु हर रोज तिन्हां च मलाई देवां था।

लंगड़े भिखारिये रा चंगा हुणा

3 पतरस कने यूहन्ना तिज्जे पैहर प्राथना रे वक्ता मन्दरा च जाया रां थे।
 2 कने लोक इक्की जन्मा रे लंगड़े जो लयाया रां थे, तिस्सो जे सै हर रोज मन्दरा रे तिस दरवाजे पर तिस्सो जे 'सुन्दर' बोलांये, बठाली देयां थे भई सै मन्दरा च जाणे औळियां ते भिख मंगो। 3 तां जे तिने पतरस कने यूहन्ना जो मन्दरा च जान्दे देखया, तां तिन्हां ते भिख मंगी। 4 पतरसे यूहन्ना ने सौगी तिस खा ध्यान लाई ने देखी ने बोलया, "अहां खा देख!" 5 इस खातर सै तिन्हां ते किछ पाणे रिया आशा रखदे हुये तिन्हां खा देखणे लगया।
 6 तां पतरसे बोलया, "चाँदी कने सोना तां मेरले नी आ, पर जो किछ मेरले आ तिस्सो हऊं तिज्जे देवां; यीशु मसीह नासरिये रे नाँवा ते चल फिर।"
 7 कने तिने तिसरा सज्जा हाथ पकड़ी ने तिस्सो दुआलेया; होर झटपट तिसरे पैरां कने जनुआं च ताकत आई गई। 8 सै उटकी ने खड़ा हुई गया कने चलने-फिरने लगया; होर चलदा, कने छालीं मारदा, कने परमेशरा री स्तुति करदा तिन्हां सौगी मन्दरा च गया। 9 सबी लोके तिस्सो चलदा-फिरदा कने परमेशरा री स्तुति करदे देखया, 10 तिस्सो पछयाणी लया भई ये सही आ सै जे मन्दरा रे 'सुन्दर' फाटका पर बेठी ने भीख मंगां था; कने तिसा गल्ला ते सै जे तिस सौगी हुई थी सै बौहत हेरान हुये।

मन्दरा च पतरसा रा उपदेश

11 तां जे सै पतरस कने यूहन्ना जो पकड़ी रे थे, तां सब लोक बौहत हेरान हुई ने तिसा जगहह तिस्सो जे सुलेमाना रा आंगण बोलां ये, तिस लौ दऊडी ने आये। 12 येदा देखी ने पतरसे लोकां जो बोलया, "हे इस्राएलियो, तुहें इस माळुये पर हेरान के हुये रां ये, कने अहां खा इयां के देखया रांये भई मनो अहें ई अपणिया सामर्था या भक्तिया ते इस्सो चलने-फिरने जोगा बणाई तया हो। 13 अब्राहम कने इसहाक कने याकूब रे परमेशर, कने अहां रे बाप-दादेयां रे परमेशरे अपणे सेवक यीशु री महिमा कित्ती, तिस्सो जे तुहें पकड़वाई दित्या, कने तां जे पिलातुसै तिस्सो छडने रा बचार कित्या, तां तुहें तिसरे सामणे तिसरा इन्कार कित्या। 14 तुहें तिस पवित्र कने धर्मिये रा इन्कार कित्या, कने विनती कित्ती भई तिस हत्यारे जो तुहां खातर छड्डी तया जाओ, 15 कने तुहें जीवना रे देणे औळे जो मारी तया, तिस्सो जे परमेशरे मूर्खियां च ते ज्यूदा कित्या, कने अहें इसा गल्ला रे गवाह थे। 16 होर तिसरे नाँवा ते, तिस विस्वासा तेई सै जे तिसरे नाँवा पर आ, इस माळुये जो तिस्सो जे तुहें देखांये कने जाणां बी ये सामर्थ दित्ती। तिस विस्वासा ते सै जे तिसते आ, इस्सो तुहां सर्बी रे साहणे पूरा ठीक-ठाक करी तया।

17 "हुण हे भाईयो, हऊं जाणां भई ये काम तुहें अन्जाणगिया च कित्या, कने तेदा ई तुहां रे सरदारें भी कित्या। 18 पर तिन्हां गल्लां जो जे परमेशरे सब भविष्यक्तां रे मुहां ते पैहले ई दस्सी तरा था, भई तिसरे मसीह दुःख उठाणा, तिन्हां जो तिन्हें इसा रितिया ते पूरा कित्या। 19 इस खातर, मन फिरावा कने वापस आई जावा भई तुहां रे पाप मटयाई दिते जाओ, तिसते जे प्रभुये रे सामणे शान्तिया ने रमाना रे दिन आओ, 20 कने सै यीशुये जो भेज्जे तुहां खातर सै जे पैहले ई ते मसीह ठहराई रा। 21 जरूरी आ भई सै स्वर्गा च तिस वक्ता तका रओ तदुआं तका जे सबी गल्लां रा सुधार नी करी ला तिसरे बारे च जे पुराणे वक्ता ते परमेशरे अपणे पवित्र भविष्यक्तां रे मुहाँ ते दस्सी रा। 22 तेदा जे मूसै बोली रा, 'प्रभु परमेशरा तुहां रे भाईयां च ते तुहां खातर मेरे साही इक भविष्यक्ता बनाणा, जो किछ सै तुहां ने बोलो, तिसरी सुणयो।' 23 पर हरेक माळुये जो सै जे तिस भविष्यक्ता री सुणो, लोकां च ते नाश कित्या जाणा।"
 24 कने शमुएल ते लई ने तिसते बाद औणे औळियां तका तितने जे भविष्यक्ता बोले तिन्हें सर्बीं तिन्हां दिनां रे बारे च सन्देश दित्या। 25 तुहें भविष्यक्ता रियां औळादां कने तिस वादे रे सहभागी हुणे, तिस्सो जे परमेशरे तुहां रे बाप-दादेयां ने किच्चिरा, तां जे तिने अब्राहमा ने बोलया, "तेरे वंशा ते ई धरतिया रे यां सारेयां घरानेयां आशीष पाणी।" 26 परमेशरे अपणे सेवका जो पैहले तुहां

ला भेजया, भई तुहां च ते हर इक सैं जे तिसरियां बुराईयां ते फेरी ने आशीष देओ।"

पंचैती रे सामणे पतरस कने यूहन्ना

4 तां जे सैं लोकां ने येदा बोलया ई रां थे, तां याजक कने मन्दरा रे सरदार होर सद्कियें तिन्हां परा जो हमला करी तया। 2 कांभई सैं बौहत गुस्सैं हुये भई सैं लोकां जो सखावां थे कने यीशुये रा उदाहरण दई-दई ने मूर्खियां च ते जी उठणे रा प्रचार करां थे। 3 तिन्हें तिन्हां जो पकड़ी ने दूजे दिना तका जेला च रखेया कांभई संज हुई गरी थी। 4 पर वचना रे सुणने औळियां च ते बौहतीं विस्वास कित्या, कने तिन्हां री गिनती पाँज हज़ार आदमियां रे लगभग हुई गई।

5 दुजे दिन येदा हुआ भई तिन्हां रे सरदार कने पुरनिये होर शास्त्री 6 कने महायाजक हन्ना होर कैफा कने यूहन्ना होर सिकन्दर होर जितने महायाजका रे घराने रे थे, सब यरुशेमा च कड़े हुये। 7 सैं तिन्हां जो सबी रे बिच खड़ा करी ने पुछणे लगे भई तुहें ये काम किसा सामर्था ते कने किसरे नाँवा ते कित्या। 8 पवित्र आत्मा ते परिपूर्ण हुई ने तिन्हां ने बोलया, 9 "हे लोकां रे सरदारो कने पुरनियों, इस कमजोर माह्नुये ने सैं जे भलाई किती गई री, जे आज अहां ते इस बारे च पुछताछ किती जाये रां ई भई सैं किंयां ठीक हुई गया। 10 तां तुहें सब होर सारे इस्त्राएली येदा जाणी ला भई यीशु मसीह नासरिये रे नाँवा ते तिस्सो जे तुहें कुसा पर चढ़ाया, कने परमेशरे मूर्खियां च ते ज्युंदा कित्या, ये माह्नु तुहां रे साहणे भला-चंगा खड़ी रा। 11 ये सैं ई पत्थर आ तिस्सो जे तुहें राज मिस्त्रियें नकम्मा जाणेया कने सैं कुणे रे सिरे रा पत्थर हुई गया। 12 किसी दुजे ते उद्धार निआ; कांभई स्वर्गा ते थल्ले माह्नुआं च होर कोई दुज्जा नाँ नी दित्तिरा गईरा, भई तिसते जे अहां जो उद्धार मिली सको।"

13 तां जे तिन्हें पतरस कने यूहन्ना रा हाँसला देख्या, तां ये समझी ने भई ये अनपढ़ कने साधारण माह्नु ये, तां हेरान हुये; फेरी तिन्हें पछयाणी ने भई ये यीशुये ने सौगी रई रे। 14 तिस माह्नुये जो सैं जे ठीक हुई रा था, तिन्हां ने सौगी खड़ी रे देखी ने, सैं विरोधा च किछ नी बोली सके। 15 पर सैं तिन्हां जो सभा ते बाहर जाणे रा हुकम दई ने, सैं अप्पु-चीयें सोच-समझ करने लगे, 16 "अहें इन्हां माह्नुआं ने क्या करीये? कांभई यरुशेमा रे सब रहणे औळियां पर प्रगट आ, भई इन्हां ते इक बड्डी नशाणी दुस्सीरी; होर अहें तिसा ते मुकरी नी सकदे। 17 पर इस खातर भई ये गाल्ल लोकां च होर ज्यादा नी फैली जाओ, अहां तिन्हां जो धमकाणा, भई सैं इस नाँवा ते फेरी किसी माह्नुये ने गाल्ला नी करो।" 18 तां तिन्हां जो सदया कने चेतावनी दई ने बोलया, "यीशुये रे नाँवा ते किछ बी देखां बोलदे कने देखों सखांदे।" 19 पर पतरस कने यूहन्ने तिन्हां जो जवाब दित्या, "तुहें ई फैसला करा; क्या ये परमेशरा रे नेडे भला भई अहें परमेशरा रियां गल्लां ते बदही ने तुहां रियां गल्लां मन्त्रिये। 20 कांभई येदा तां अहां ते नी हुई सकदा भई सैं जे अहें देख्या होर सुणीरा, तिस्सो नी बोलिये।" 21 तां तिन्हें तिन्हां जो होर धमकाई ने छड्डी तया कांभई लोकां रिया वजह ते तिन्हां जो सजा देणे रा कोई दाव नी मिलया, इस खातर भई सैं जे घटना हुई री थी तिसरीया वजह ते सब लोक परमेशरा री बड्याई करे रां थे। 22 सैं माह्नु, तिस पर जे ठीक करने रा चमत्कार हुई रा था, चालीयां सालां ते जादा उम्रा रा था।

बिश्वासियां री प्राथना

23 सैं छुट्टी ने अपने साथियां ला आये, कने जो किछ प्रधान याजकें कने पूरनीयें तिन्हां ने बोली रा था, तिन्हां जो सुणाई तया। 24 येदा सुणी ने तिन्हें इक मन हुई ने ऊच्चिया आवाजा च परमेशरा ने बोलया, "हे स्वामी, तु सैं ई आ तिने जे स्वर्ग कने धरती होर समुद्र कने जो किछ तिस च आ बणाया। 25 तैं पवित्र आत्मा रे द्वारा अपने सेवक कने अहां रे पिते दाऊदा रे मुहों ते बुलाया,

'अन्यजातियें हुल्लड कैं मचाया

कने देशा-देशा रे लोकें कैं बेकार गल्लां सोचियां?

26 प्रभु होर तिसरे मसीह रे बरोधा च धरतिया रे राजे खड़े हुये,

कने हाकम सौगी कड़े हुई गे।'

27 कांभई सचमुच तेरे सेवक यीशुये रे बरोधा च, तिसरा जे तैं अभिषेक कित्या, हेरोदेसा कने पुन्तियुस भी अन्यजातियां कने इस्त्राएलियां ने सौगी इस नगरा च कड़े हुये, 28 भई जो किछ पैहले ते तेरिया सामर्था कने बुध्दिया ते उहाराई रा सैं ई करो। 29 हुण हे प्रभु तिन्हां रियां धमकियां जो देख; होर अपने दासा जो ये वरदान दे भई तेरा वचन बडे हाँसले ने सुणाईये। 30 चंगा करने खातर तु अपना हाथ अगे कर भई नशाणियां कने नोखे काम तेरे पवित्र दास यीशुये रे नाँवा ते कित्ते जाओ।" 31 तां जे सैं प्रार्थना करी चुके, तां जगहा तेथी जे सैं कड़े थे हिली गई, कने सैं सब पवित्र आत्मा ते भरी गे, कने परमेशरा रा वचन हिम्मत ने सुणांदे रहे।

बिश्वासियां रा कड्यां रा जीबन

32 विस्वास करने औळियां री मण्डली इक चित कने इक्की मना री थी, येथी तका भई कोई भी अपनी धन सम्पतिया जो अपना नी बोलदा था, पर सब किछ सांझा था। 33 प्रेरितें मतिया सामर्था ते प्रभु यीशु रे ज्युंदा हुणे री गवाही देंदे रहे कने तिन्हां सबी पर मता अनुग्रह था। 34 तिन्हां च ते कोई बी दरिद्र नी था; कांभई तिन्हां ले सैं जे जमीन या घर थे, सैं तिन्हां जो बेची-बेची ने, बिक्की रियां चिज्जा रा मुल लयावां थे, कने प्रेरितां रे पैरां पर रखां थे; 35 कने तेढी जे किसी जो भी जरूरत हुआ थी, तीतना ई सब बन्डी लेयां थे। 36 युसुफ नाँवा रा साईप्रस रा इक लेवी था तिसरा नाँ प्रेरितें बरनबास (शान्तिया रा पुत्र) रखया था 37 तिसरी थोड़ी जमीन थी, तिसा जे तिने बेचया, कने पैसै लयाई ने प्रेरितां रे पैरा पर रखी ते।

हनन्या कने सफीरा

5 हनन्याह नाँवा रे इक्की माह्नुये कने तिसरिये जनाने सफीरे, किछ जमीन बेची 2 होर तितरे पैसयां च ते थोडे जे अप्पु ला रखी ले; कने ये गल्ल तिसरी जनाना बी जाणां थी, होर तिसरा इक हिस्सा लई ने प्रेरितां रे पैरां अगे रखी तया। 3 पतरसे बोलया, "हे हनन्याह! शैताने तेरे मना च ये गाल्ल कैं पाई भई तु पवित्र आत्मा ने झूठ बोलो, कने जमीना रे पैसयां च ते थोडे जे रखी लो? 4 तदुंआ तका जे सैं तेरले थी, क्या तेरी नी थी? होर तां जे बीकी गई तां क्या तेरे वशा च नी थी? तैं ये गाल्ल अपने मना च कैं वचारी? तु माह्नुआं ने नी, पर परमेशरा ने झूठ बोला।" 5 ये गल्लां सुणदे ई हनन्याह थल्ले पई गया कने प्राण छड्डी ते, होर सब सुणने औळियां पर बड़ा डर हुई गया। 6 फेरी जवानें उठी ने तिसरी अर्थी बनाई कने बाहर नई ने दब्बी तया। 7 कोई तीनां घण्टेयां ते बाद तिसरी जनाना, हुई रियां गल्लां ते बेखबर हुई ने, अन्दरा जो आई। 8 तां पतरसे तिसा ने बोलया, "मिन्जो दस क्या तुहें सैं जमीन इतने ई पैसयां री बेची री थी?" तिसे बोलया, "हाँ, इतने ई पैसयां री बेची री थी।" 9 पतरसे तिसाने बोलया, "ये क्या गाल्ल ई भई तुहें दूई प्रभुये रिया आत्मा जो परखणे खातर ऐका कित्या? देख, तेरे लाडे रे दफन करने औळे दरवाजे पर ई पूजी रे, कने तिन्हां तिज्जो बी बाहरा जो लई जाणा।" 10 तां सैं इक दम तिसरे पैरां पर पई गई, कने प्राण छड्डी ते; होर जवानें अन्दर आई ने तिसा जो मरिरी देख्या, कने बाहर नई ने तिसारे लाडे सौगी दफन करी ती। 11 सारी कलीसिया पर कने इन्हां गल्लां रे सुणने औळियां पर बड़ा डर छाई गया।

चिन्ह कने चमत्कार

12 प्रेरितां रे हाथां ते मते नोखे काम्म कने नशाणियां लोकां च दुस्सां थियां, कने सब इक मन हुई ने सुलैमाना रे ओसारे च कड़े हुंदा रह्हा थे। 13 पर होरी च ते किसी जो बी ये हिम्मत नी हुंदा थी भई तिन्हां सौगी मिली जाओ; तां भी लोक तिन्हां री बड्याई करों थे। 14 विस्वास करने औळे मते मर्द कने जनानां प्रभुये री कलीसिया च मतिया तादाता च मिलदे रहे। 15 येथी तका भई लोक बमारां जो सडका पर लयाई-लयाई ने, मंजेयां कने मंजोलुआं पर सुआई देवां थे, भई तां जे पतरस आओ, तां तिसरा टहूरा ई तिन्हां च ते किसी पर पई जाओ। 16 यरुशेमा रे आसै-पासै रे नगरां ते बौहत लोक बमारां कने गन्दियां आत्मा रे सताई रेयां जो लयाई-लयाई ने, कड़े हुआं थे, होर सब ठीक करी दित्ते जावां थे।

प्रेरितों री गिरफ्तारी

17 तां महायाजक कने तिसरे सब साथी सै जे सदुक्तियां रे पंथा रे थे डह ने भरी गे 18 होर प्रेरितां जो पकड़ी ने जेलखाने च बन्द करी तथा। 19 पर राती जो प्रभुये रे इक्की स्वर्गदूते जेला रे दरवाजे खोली ने तिन्हां जो बाहर लयाई ने बोलया, 20 "जावा, मन्दरा च खड़े हुई ने जीऊणे रियां इन्हां सबीं गल्लां जो लोकां जो सुणावा।" 21 सै येदा सुणी ने सवेर हुन्दे ई मन्दरा च जाई ने उपदेश देणे लगे।

तां महायाजक कने तिसरे साथीयें आई ने महासभा जो कने इस्राएलियां रे सब पुरनियां जो कइया कित्या, कने जेलखाने जो प्यादेयां जो बोली ने भेजया भई तिन्हां जो लयावा। 22 पर प्यादेयां तेथी पूज्जी ने तिन्हां जो जेलखाने च नी पाया, कने हटी ने तिन्हां जो दसया, 23 "अहें जेलखाने जो पूरे चक्कने हुई ने बन्द कित्तिरा था, होर पैहरे देणे औळ्यां जो बाहर दरवाजे पर खड़ी रेया पाया; पर तां जे दरवाजे खोले, तां अन्दर कोई नी मिलया।" 24 तां जे मन्दरा रे सरदार होर प्रधान याजकें ये गल्लां सुणियां, तां तिन्हां रे बारे च मत्तिया सोचा च पई गे भई तिन्हां जो क्या हुआ हुंगा! 25 ताहलूं ई किन्नीये आई ने तिन्हां जो दसया, "देखा, तिन्हां जो जे तुहें जेलखाने च बन्द करीने रखी रा था, सै माहु मन्दरा च खड़ी ने लोकां जो उपदेश दये रां ये।" 26 तां सरदार, प्यादेयां ने सौगी जाई ने, तिन्हां जो ली आया, पर जबरजनाईया ने नी, कांभई सै लोकां ते डरां थे भई अहां परा पत्थर नी बाओ।

27 तिने तिन्हां जो लयाई ने महासभा रे सामने खड़ा करी तथा तां महायाजके तिन्हां ते पुछया, 28 "क्या अहें तुहां जो नी समझाई ने हुक्म नी दित्या था भई तुहें इस नाँवा ते उपदेश देहां देंदे? तां भी देखा, तुहें सारे यरुश्लेमा जो अपणे उपदेशा ते भरी तथा होर तिस माहुये रा लहु अहारे सिरा पर पाणा चाह्याये।" 29 तां पतरस कने होरीं प्रेरितें जवाब दित्या, "माहुआं रे हुक्मा ते बधीने परमेशरा रे हुक्मा जो मनणा अहारा काम्मा आ। 30 अहारे बापदादेयां रे परमेशरे जो ज्यूदा कित्या, तिस्सो जे तुहें क्रुसा पर लटकाई ने मारी तथा था। 31 तिस्सो ई परमेशरे प्रभु कने उद्धार करने औळा बणाई ने, अपणे सजे हत्था तका उच्चा करी तथा, भई सै इस्राएलियां जो मन फेरने री ताकत होर पापां री माफी देओ। 32 अहें इन्हां गल्लां रे गवाह ये होर तियां जे पवित्र आत्मा भी, तिस्सो जे परमेशरे तिसरा हुक्म मनणे औळ्यां जो दिती रा।"

33 येदा सुणी ने सै फुखी गे, होर तिन्हां जो मारी देणा चाह्यां थे। 34 पर गमलीएल नाँवा रा इक फरीसी सै जे व्यवस्थापक कने सबी लोकां च खरा था, कचेहरिया च खड़े हुई ने प्रेरितां जो थोड़िया देरा खातर बाहरा जो भेजणे रा हुक्म दित्या। 35 तां तिने बोलया, "हे इस्राएलियो, तुहें जो किछ इन्हां माहुआं ने करना चाह्यां ये सौची-समझी ने करयो। 36 कांभई इन्हां दिनां ते पैहले थियूदास ये बोलदा उठया, भई हऊं बी किछ हया; होर कोई चार सौ माहु तिसने सौगी चली पये, पर सै मारी दित्ता गया होर जितने लोक तिस्सो मन्नां थे, सब उरे-परे हुई ने खत्म हुई गे। 37 तिसते बाद नाँ लिखणे औळे रे दिनां च यहुदा गलीली उठया, होर किछ लोक अपणे खा जो करी ले; सै बी खत्म हुई गया कने जितने लोक तिस्सो मन्नां थे, सब उरे-परे हुईगे। 38 इस खातर हुण हऊं तुहां ने बोलां, इन्हां माहुआं ते दूर ई रह्ना कने इन्हां ने किछ काम्म नी रखा; कांभई जे ये धर्म या काम्म मानुआं खा ते हुंगे तां खत्म हुई जाणे; 39 पर जे परमेशरा खा ते हये, तां तुहें इन्हां जो कदी मनी खत्म करी सकदे। किती येदा नी हो भई तुहें परमेशरा ने बी लडने औळे बणो।"

40 तां तिन्हें तिसरी गल्ल मन्नी ली; कने प्रेरितां जो सद्दी ने कुटुआया; होर ये हुक्म दई ने छड़ी तथा भई यीशुये रे नाँवा ते फेरी कोई गल्ल देखा करदे। 41 सै इस गल्ला ते खुश हुई ने महासभा रे सामणे ते चली गे, भई अहें तिसरे नाँवा खातर बदनाम हुणें जोगे तां ठहरे। 42 सै रोज मन्दरा च कने घरें-घरें उपदेश देणे, कने इसा गल्ला रा सुसमाचार सुणाणे ते भई यीशु ई मसीह आ नी रूके।

सात सैबकां रा चुणना

6 तिन्हां दिना च तां जे चलेयां री संख्या बौहत बधणे लगी, तां युनानी भाषा बोलणे औळे इब्रानी भाषा बोलणे औळ्यां पर कुड़कुड़ाने लगे,

भई रोज किया सेवा च अहारियां विधवां री देख-भाल नी हुंदी। 2 तां तिन्हें बाहरें, चलेयां री मण्डलिया जो अप्पु ला सद्दी ने बोलया, "ये ठीक नीआ भई अहें परमेशरा रा वचन छड़ी ने खवाणे-पयाणे री सेवा करो। 3 इस खातर, हे भाईयो, अप्पु च ते सात खरे माहुआं जो सै जे पवित्र आत्मा कने बुद्धिया ने भरीरे हो, चुणी लवा, भई अहें तिन्हां जो ये काम दई दईये। 4 पर अहां तां प्रार्थना च कने वचना रिया सेवा च लगी रेयां रेहणा।" 5 ये गल्ल सारीया मण्डलिया जो खरी लगी, कने तिन्हें स्तिफनुस नाँवा रे इक्की माहुये जो सै विस्वास कने पवित्र आत्मा ने भरीरा था, कने फिलिप्पुस, कने प्रुखुरुस, कने नीकानोर, कने तीमोन, कने परमिनास, कने अन्ताकियावासी नीकुलाउस जो सै जे यहूदी मता च आई गरा था, चुणी लया। 6 इन्हां जो प्रेरितां रे सामने खड़ा कित्या होर तिन्हें प्रार्थना करी ने इन्हां परा जो हाथ रखे। 7 परमेशरा रा वचन फैलदा गया होर यरुश्लेमा च चलेयां री गिणती बौहत बददी गई; होर याजकां रा इक बड्डा समाज इस मता जो मनणे औळा हुई गया।

स्तिफनुसा री गिरफ्तारी

8 स्तिफनुस अनुग्रह कने सामर्था ते भरी ने लोकां च बड्डे-बड्डे काम्म कने नशाण दर्सां था। 9 तां तिस आराधनालय च ते सै जे लिबिरतीनों कहलावां थी, होर कुरेनी कने सिकन्दरिया होर किलिकिया कने एशिया रे लोकां च ते कई आई ने स्तिफनुसा ने बैहस करने लगे। 10 पर तिस ज्ञान कने तिसा आत्मा ने तिसने जे सै गल्लां करां था, सै साह्यणा नी करी सके। 11 तां तिन्हें कईयां लोकां जो भड़काई कने बोलणे लगे, "अहें इस्सो मूसा कने परमेशरा रे वरोधा च निन्दा रियां गल्लां करदे सुणीरा।" 12 कने लोकां होर प्राचीनां कने शास्त्रियां जो भड़काई ने तिस्सो पकड़ी ने महासभा च ली आये। 13 होर झुठे गवाह खड़े कित्ते, तिन्हें जे ये बोलया, "ये माहु इस पवित्र जगह कने व्यवस्था रे वरोधा च बोलणा नी छड़दा। 14 कांभई अहें तिस्सो येदा बोलदे सुणीरा भई यीशु नासरी ये इसा जगह जो रुड़ाई देणा, कने तिन्हां रितियां जो बदली देणा सै जे मूसे अहां जो दिती रियां।" 15 तां सबी लोके सै जे सभा च बैठी रे थे, तिस परा जो नजरां कितीयां तां तिसरा मुँह स्वर्गदूतां साई देखया।

स्तिफनुसा रा भाषण

7 तां महायाजके बोलया, "क्या ये गल्लां सच्च ईयां?" 2 स्तिफनुसै बोलया, "हे भाईयो, कने पित्रो सुणा। अहारा पिता अब्राहम हराना च बसणे ते पैहले मेसोपोटामिया च था; तिस्सो दर्शन दित्या, 3 होर तिसने बोलया, 'तू अपणे देश कने अपणे टबरा जो छड़ी ने निकल कने तिस देशा जो जा सै जे माह तिज्जो दसणा,' 4 तां सै कसदियां रे देशा ते निकली ने हराना च बसी गया, तिसरे पिते रिया मौता ते बाद परमेशरे तिस्सो तेथी ते इस देशा च लयाई ने बसाया तेथी जे तुहें हुण रह्याये, 5 होर तिस्सो किछ मीरास नी पर पैर रखणे री बी जगह नी थी, पर प्रतिज्ञा किती भई मांह ये देश तेरते बाद तेरे वंशा रे हत्था करी देणा; येथी तका भई तिस वक्ता तिसरे कोई पुत्र नी था। 6 होर परमेशरे येदा बोलया, 'तेरी औळादा रे लोकां पराये देशा च प्रदेशी हुई ने रेहणा, होर तिन्हां इन्हां जो दास बनाणा होर चार सौ सालां तका दुःख देणा।' 7 फेरी परमेशरे बोलया, 'तिसा जातिया रे तिन्हां दास हुणा, तिन्हां जो माह सजा देणी, होर इसते बाद तिन्हां निकली ने इसा जगहा मेरी सेवा करनी।' 8 होर तिने तिन्हां ने खतने री वाचा बन्ही; कने इसी दशा च इसहाक तिसते पैदा हुआ कने अठवें दिन तिसरा खतना कित्या; होर इसहाका ते याकूब कने याकूबा ते बारह कुलपति पैदा हुये।

9 कुलपतियें यूसुफा ते डह करी ने तिस्सो मिस्र देश जाणे औळ्यां रे हत्था बेचीतया। पर परमेशर तिसने सौगी था, 10 होर तिस्सो तिसरे सबी दुखा ते छुड़ाई ने मिस्र रे राजा फिरौना रियां नजरां च अनुग्रह कने बुद्धि दिती, होर तिने तिस्सो मिस्र पर होर अपणे सारे घरा पर हाकम बणाया। 11 तां मिस्र होर कनान रे सारे देशा च अकाल पया; तिसते मते दुख हुये, होर अहां रे बापदा देयां जो पैहली बार भेजया। 12 पर याकुबे येदा सुणी ने भई मिस्र च अनाज आ, अहां रे बापदादेयां जो पहली बार भेजया। 13 दुज्जी बार यूसुफे अप्पु जो अपणे भाईयां पर प्रगट करी तथा होर यूसुफा री जाति फिरौना जो पता लगी गई। 14 तां यूसुफे अपणे पिता याकूब होर अपणे सारे

घराने जो, सैं जे पचहतर आदमी थे, सद्दी लया। 15 तां याकूब मिस्र च गया; होर तेथी सैं कने अहां रे बापदादे मरीगे। 16 तिन्हां रियां लाशां शकेमा च पुजाई ने तिसा कब्रा च रखी तियां, तिसा जे अब्राहमे चाँदीये रे सिक्के दर्ई ने शकेमा च हमोरा रियां सन्तानां ते मूल लया था।

17 “पर तां जे तिसा प्रतिज्ञा रे पुरे हुणे रा बगत नेडे आया सैं जे परमेशरे अब्राहमा ने किन्ती थी, तां मिस्रा च सैं लोक बहदी ने बौहत हुई गे। 18 तां मिस्रा च दुजा राजा हुआ सैं जे युसुफा जो नी जाणदा था। 19 तिने अहां री जातिया ने चालाकी करी ने अहां रे बापदादेयां सौगी येथी तका बुरा वयोहार कित्या, भई तिन्हां जो अपणे बालकां जो सट्टणा पया, भई सैं ज्युदे नी रओ। 20 तिस बगत मूसा जम्या। सैं परमेशरा री नजरां च मता सुन्दर था। सैं तिन्हां महीनेयां तका अपणे पिते रे घरा च पलेया। 21 तां जे तिस्सो सद्दी तया तां फिरौना रिये मुन्नीये तिस्सो चकी लया, कने अपणा पुत्र बणाई ने पालेया। 22 मूसा जो मिस्रियां री सारी विद्या पढाई गई, कने सैं वचन होर कर्म दूई च सामर्थी था,

23 तां जे सैं चालियां सालां रा हुआ, तां तिसरे मना च आया भई हऊं अपणे इस्त्राएलियां भाईयां ने मिलू। 24 तिने इक्की माह्ये पर गलत हुंदा देखी ने तिस्सो वचाया, होर मिस्रिये जो मारी ने तिसरा बदला लेया। 25 तिने सोचया भई तिसरे भाईयां ये समझणा भई परमेशरा तिसरे हत्था ते तिन्हां रा उद्धार करना, पर तिन्हें नी समझेया। 26 दुजे दिन तां जे सैं अप्पु बाटियें लडया रां थे, तां सैं तिन्हु चीयें जाये रां था; कने येदा बोली तिन्हां जो मेल करने खातर तिन्हां जो समझाया, ‘हे माह्यो, तुहें तां भाई-भाई ये, इक्की दुजे पर कैं अन्याय करां ये।’ 27 पर सैं जे अपणे पड़ोसिये पर अन्याय करया रा था, तिने तिस्सो येदा बोली ने रोकी तया, ‘तिजो अहां पर हाकम कने न्यायी किने बणाया?’ 28 क्या तियां जे तैं कल मिस्रिये जो मारया मिन्जो बी मारना चाह्तां?’ 29 ये गल्ल सुणी ने मूसा नठेया कने मिद्यान देशा च परदेशी हुई ने रेहणे लगया, होर तेथी तिसरे दो बालक जम्मे।

30 “तां जे पूरे चाली साल बीन्ती गे तां इक्की स्वर्गदूते सीनै पहाड़ा रे जंगला च तिस्सो बल्लदिया झाड़िया रिया लैटा च दर्शन दित्या। 31 मूसा जो ये दर्शन देखी ने रेहानी हुई, होर तां जे देखणे खातर सैं नेडे गया तां प्रभुये री ये आवाज आई, 32 ‘हऊं तेरे बापदादेयां, अब्राहम, इसहाक कने याकूबा रा परमेशर आ,’ तां मूसा कम्बी गया, येथी तका भई तिस्सो देखणे री हिम्मत नी रई। 33 तां जे प्रभु तिसने बोलया, ‘अपणे पैरां ते जुते खोली दे, कांभई तिसा जगह जे तु खडी रा, सैं पवित्र धरती ई। 34 मैं सच-मुच अपणे लोकां री सैं जे मिस्र च ये बुरिया दशा जो देखी रा; कने तिन्हां रा रोणा सुणी रा; इस खातर तिन्हां जो छुड़ाणे खातर आई रा। हुण आओ, मांह तिजो मिस्र च भेजणा।’

35 “तिस मूसा जो जे तिने येदा बोली ने ना करी ती थी, ‘तिजो किने अहां पर हाकम कने न्यायी बणाई रा?’ तिस्सो ई परमेशरे हाकम कने छुड़ाणे औळा बणाई ने, तिस स्वर्गदुता ते तिने जे झाड़िया च दर्शन दित्या था, भेजया। 36 येई आदमी मिस्र होर लाल समुद्र होर जंगला च चाली सालां तका नोखे काम्म कने नशाणियां दस्सी-दस्सी ने तिन्हां जो तेथी ते ली आया। 37 ये सैंई मूसा आ, तिने जे इस्त्राएलियां ने बोलया, ‘परमेशरा तुहांरे भाईयां च ते तुहां खातर मेरे साई इक भविष्यचक्ता बणाणां।’ 38 ये सैंई आ, तिने जे जंगला च कलिसिया रे बीच तिस स्वर्गदुता ने सौगी सीनै पहाड़ा पर तिसने गल्लां कितियां होर अहांरे बाप-दादेयां ने सौगी था, तिस्सो ई ज्युदे वचन मिले भई अहां तका जो पुजाओ। 39 पर अहां रे बाप दादेयां तिसरी मनणी नी चाई, पर तिस्सो हटाई ने अपणा मन मिस्रा खा फेरील्या, 40 कने हारुना ने बोलया, ‘अहां खातर येदा देवता बना, सैं जे अहांरे अग्गे-अग्गे चलो, कांभई ये मूसा सैं जे अहां जो मिस्र देशा ते नकाली ने ली आया, अहें नी जाणदे तिस्सो क्या हुआ?’ 41 तिन्हां दिनां च तिन्हें इक बछडे री मूर्त बणाई ने तिसरे अग्गे बळी चढाई, कने अपणे हत्थां रे काम्मा च मगन हुणे लगे। 42 इस खातर परमेशरे अपणा मुँह तिन्हां ते फेरी ने तिन्हां जो छडील्या, भई अकाश रे गणां जो पुजो, तेदा जे भविष्यचक्तां रिया कताबा च लिखीरा, ‘हे इस्त्राएला रे घराने क्या तुहें जंगला च चाली सालां तका पशु बली कने अन्न बली मिन्जो ई चढांदे रये?’

43 तुहें मोलेक के रिफान देवता रे तारे जो लई ने फिरां थे,

मतलब तिन्हां मुर्तियां जो तिन्हां जो जे तुहें मत्था टेकणे खातर बणाई रा था।

इस खातर मांह तुहां जो बेबीलोना ते पार नई ने बसाणा।’

44 “साक्सि रा तम्बु जंगला च अहांरे बाप दादेयां रे बिच था, तेदा जे तिने ठहराईरा था तिने जे मूसा ने बोलया, “ सैं आकार जे तैं देखी रा, तिसरे मताबक इस्सो बणाया।’ 45 तिस तम्बुये जो अहांरे बाप दादेयां पुराणे बक्ता ते आई ने यहोशुये सौगी येथी ली आये; तिस वक्ता भई तिन्हें तिन्हां अन्यजातियां पर अधिकार पाया, तिन्हां जो जे परमेशरे अहांरे बापदादेयां रे सामणे ते कड्डील्या, कने सैं तम्बु दाऊदा रे वक्ता तका रैया। 46 तिस पर परमेशरे अनुग्रह कित्या; इस खातर तिने विनती किन्ती भई सैं याकूब रे परमेशरा खातर रैहणे री जगह बणाई सक्को 47 पर सुलैमाने तिसरे खातर घर बणाया। 48 पर परम् प्रधान हत्था रे बणाई रे घरा च नी रैहदा, तेदा जे भविष्यचक्ते बोली रा,

49 ‘प्रभु बोलां, स्वर्ग मेरा सिंहासण कने धरती मेरे पैर रखणे री चौकी।

मेरे खातर तुहां केदा जेया घर बणाणां? कने मेरे अराम करने री कुण जेई जगह हुंगी?

50 क्या ये सब चीजां मेरे हत्था री बणाई रियां नीं आ?’

51 “हे जिद्दी होर मना कने कन्नां रे बिना खतने औळे लोको, तुहें सदा पवित्र आत्मा रा बरोध करांये। तेदा जे तुहां रे बापदादे करां थे, तेदा ई तुहें भी करांये। 52 भविष्यचक्तावां च ते किसो तुहां रे बापदादेयां नी सताया? तिन्हें तिस धर्मिये रे औणे रा पुराणे बक्ता ते सन्देश देणे औळियां जो मारी तया; होर हुण तुहें भी तिसरे पकड़वाणे औळे कने मारने औळे बणे। 53 तुहें स्वर्गदुतां ते बणाई री व्यवस्था तां पाई, पर तिसारा पालन नी कित्या।”

स्तिफनुसा पर पथराव

54 ये गल्लां सुणी ने सैं फुक्खीगे कने तिस परा दन्द किरडणे लगे। 55 पर तिने पवित्र आत्मा ते परिपूर्ण हुई ने स्वर्गा खा देखया होर परमेशरा री महिमा जो कने यीशुये जो खबिया खा खडिरे देख्या, 56 कने बोलया, “देखा, हऊं स्वर्गा जो खुली रा, कने माह्ये रे पुत्रा जो परमेशरा रे सजे पासै खा खडी रा देख्या रां।” 57 तां तिन्हें बडिया आवाजा च रडाई ने कान बन्द करी ले, कने सारे ई तिस परा जो मारने पई गे; 58 होर तिस जो नगरा ते बाहर नकाली ने तिस परा जो पत्थर मारने लगे। गवाहें अपणे कपडे शाऊल नाँवा रे इक जवाना रे पैरां ले तुआरी ने रखी ते। 59 सैं स्तिफनुसा पर पत्थर मारदे रये, कने सैं येदा बोली ने प्राथना करदा रेआ, “हे प्रभु यीशु, मेरी आत्मा जो लई ले।” 60 फेरी गोडे टेकी ने उचीया आवाजा च गलाया, “हे प्रभु, ये पाप इन्हां पराजो मत लांदा।” कने येदा बोली ने सैं सई गया।

कलीसिया पर अत्याचार

8 शाऊल तिसरे मारने च सहमत था। तिस यरूशलेमा री कलीसिया पर बड़ा सताव शुरु हुआ कने प्रेरितां जो छड्डी ने सब यहुदिया कने सामरिया देशां च नहठी ने बिखरी गे। 2 किछ भक्ते स्तिफनुसा जो कब्रा च रखेया कने तिसरे खातर बौहत रोये कने दुख मनाया। 3 शाऊल कलीसिया जो उजाडे रां था; कने घरे-घरे गुस्सी ने जनाना कने मरदां जो घसीटी-घसीटी ने जेल खाने च पावां था।

सामरिया च फिलिप्पुसा रा प्रचार

4 सैं जे उरे-परे हुई गे थे, सैं सुसमाचार सुणांदे रहे; 5 होर फिलिप्पुस सामरिया नगरा च जाई ने लोकां जो मसीह रा प्रचार करने लगेया। 6 सैं जे गल्लां फिलिप्पुसै बोलीयां लोकें तिन्हां जो सुणी ने कने सैं जे नशाणियां सैं दरसां था तिन्हां जो देखी-देखी ने, इक चित हुई ने मन लगाया। 7 कांभई गन्धियां आत्मां मत्तेयां च ते बडिया आवाजा च रडांदियां निकली गईयां, कने बौहत लकवे रे रोगी होर लंगडे भी ठीक हुये; 8 कने तिस नगरा च बड़ी खुशी छाई गई।

जादूगर शमौन

9 इसते पहले तिस नगरा च शमौन नौवा रा इक माहु था, सै जे जादु-टोणा करी ने सामरिया रे लोकां जो हैरान करी ने अप्पु जो इक बड्डा आदमी दरसां था। 10 छोटेयां ते बड्डेयां तका सब तिसरा आदर करी ने बोलां थे, “ये माहु परमेशरा री सै ताकत ई तिसां जे महान बोलांये।” 11 तिने बौहतीं दिनां ते तिन्हां जो अपणे जादुये रे काम्मां ते रेहान किन्तीरा था, इस खातर सै तिस्सो बौहत मन्नां थे। 12 पर तां जे तिने फिलिप्पुसा रा विस्वास कित्या सै जे परमेशरा रे राजा कने यीशुये रे नौवा रा सुसमाचार सुणावां था तां लोक, क्या मरद, क्या जनानां बपतिस्मा लेणे लगे। 13 तां शमौने अपणे आप बी कित्या होर बपतिस्मा लई ने फिलिप्पुसा ने सौगी रैहणे लगया। सै नशाणियां कने बडे-बडे सामर्था रे काम हुं देखी ने रेहान हुआं था।

सामरिया च पतरस कने यूहन्ना

14 तां जे प्रेरितें सै जे यरुशलेमा च थे, सुणया भई सामरियें परमेशरा रा वचन मन्नी लई रा तां पतरस कने यूहन्ना जो तिन्हां ला जो भेजया। 15 तिन्हें जाई ने तिन्हां जो खातर प्राथना किन्ती भई पवित्र आत्मा पाओ। 16 कांभई पवित्र आत्मा हुणा तका तिन्हां च ते किसी परा मनी उतरया था; तिने तां सिर्फ प्रभु यीशुये रे नौवा च बपतिस्मा लई रा था। 17 तां तिन्हें तिन्हां जो परा हात्थ रखे कने तिन्हें पवित्र आत्मा पाया। 18 तां जे शमौने देखया भई प्रेरितां रे हाथ रखणे ते पवित्र आत्मा मिलां, तां तिन्हां ला जो पईसै लयाई ने बोलया, 19 “ये अधिकार मिन्जो भी देवा भई जिस किसी पर हाथ रखुं तिस्सो पवित्र आत्मा मिली जाओ।” 20 पतरसे तिसने बोलया, “तेरे पैसे तेरे सौगी नाश हुई जाओ, कांभई तैं परमेशरा रा दान पैसेयां च खरीदणे रा बचार कित्या। 21 इसा गला च ना तेरा हिस्सा आ ना मतलब आ; कांभई तेरा मन परमेशरा रे अगे सिधा नीआ। 22 इस खातर अपणिया इसा बुराईया ते मन फिराई ने प्रभुये ले प्राथना कर, हुई सकां भई तेरे मना रा बचार माफ कित्या जाओ। 23 कांभई हऊं देख्या रां भई तु पित्ता साई कऊडा आ कने अधर्मा रे बन्धना च पई रा।” 24 शमौने जवाब दित्या, “तुहें मेरे खातर प्रभुये ले प्राथना करा भई सै जे गलां तुहें बोलियां, तिन्हां च ते कोई भी मेरे परा नी पओ।”

25 इस खातर सै गवाई दई ने कने प्रभुये रा वचन सुणाई ने यरुशलेमा जो वापस हुये, कने सामरिया रे मत्तेयां गांवां च सुसमाचार सुणांदे गये।

फिलिप्पुस कने कूश देशा रा अधिकारी

26 फेरी प्रभुये रे इक्की स्वर्गदूते फिलीप्पुसा ने बोलया, “उठ कने दखणा खा रे तिस रस्ते परा जो जा, सै जे यरुशलेमा ते गाजा जो जावां।” 27 सै उठी ने चली पया, कने देखो, कूश देशा रा इक माहु आया रां था सै जे खोजा कने कूशियां री राणी कन्दाके रा मन्त्री कने खजान्ची था। सै आराधना करने जो यरुशलेमा च आया था। 28 सै अपणे रथां पर बैठी रा था, कने यशायाह भविष्यक्ता री कताब पढदा वापस हुया रां था। 29 तां आत्मे फिलिप्पुसा ने बोलया, “नेडे जाई ने इस रथा ने सौगी-सौगी चल।” 30 फिलिप्पुस तिस खा दौड़ेया कने तिस्सो यशायाह भविष्यक्ता री कताब पढदे सुणया, कने पुछया, “तु जो किछ पढेया रा क्या इस्सो समझां बी आ?” 31 तिने बोलया, “तदुआं तका जे मिन्जो कोई नी समझाओ तां मांह कियां समझणा?” कने तिने फिलीप्पुसा ने विनती किन्ती भई सै रथा पर तिसने सौगी बैठो। 32 पवित्र शास्त्रा रा सै अध्याय जे सै पढेया रां था, सै ये था :

“सै भेडां साई बडहोणे जो पुजाया गया,

कने तियां जे भेडा रा बच्चा अपणी ऊन कड्डणे औळ्यां रे सामणे चुप-चाप रवां,

तियां ई तिने भी अपणा मुंह नी खोलया।

33 तिसरे दीन हुणे पर बी तिसरा न्याय नी हुई सक्या।

तिसरे वक्ता रे लोकां रा हिसाब कुण दई सकां? कांभई धरतिया ते तिसरा प्राण चकोई जावां।”

34 इत पर खोजे फिलिप्पुसा ते पुछया, “हऊं तेरले विनती करां ये दस भई भविष्यक्ता येदा किसरे बारे च बोलया रां, अपणे या किसी होरसी रे बारे च?”

35 तां फिलिप्पुसे अपणा मुंह खोलया कने इस शास्त्रा ते शुरू करी ने तिस्सो यीशु मसीह रा सुसमाचार सुणाया। 36 रस्ते च चलदे-चलदे सै इक्की पाणिये रिया जगहा पुञ्जी गे। तां खोजे बोलया, “देख येथी पाणी आ, हुण मिन्जो बपतिस्मा लेणे च क्या रोक ई।” 37 फिलिप्पुसे बोलया, “जे तु सारे मना ते विस्वास करो तां लई सकां।” तिने जवाब दित्या हऊं विस्वास करां भई यीशु मसीह परमेशरा रा पुत्र आ।” 38 तां तिने रथ खडा करने रा हुक्म दित्या, कने फिलिप्पुस कने खोजा दोनो पाणिये च उतरी गे, कने तिने खोजे जो बपतिस्मा दित्या। 39 तां जे सै पाणिये च ते निकली ने उपर आये, तां प्रभुये रा आत्मा फिलिप्पुसा जो चक्की ने लई गया, कने खोजे तिस्सो फेरी नी देख्या होर खुशी मनांदा अपणे रस्ते च चली गया। 40 फिलिप्पुस अशदोदा च आई निकलया, होर तदुआं तका जे कैसरिया च नी पुजया, तदुआं तका नगर-नगर सुसमाचार सुणांदा गया।

शाऊला रे मना रा बदलना

(प्रेरितां 22:6-16;26:12-18)

9 शाऊल सै जे येबां तका प्रभुये रे चलेयां जो धमकाणे कने मारने रिया धुना च था, महाजका ला गया 2 कने दमिशक रे आराधनालयां रे नौवा पर इस मतलबा रियां चिडियां बुणुवाईयां भई क्या मर्द क्या जनाना, तिन्हां जो जे सै इस पथा पर पाओ तिन्हां जो बन्ही ने यरुशलेमा जो ली आओ। 3 पर चलदे-चलदे तां जे सै दमिशक रे नेडे पुञ्जया, तां इकदम आकाश ते चऊं पासैयां लोपे चमकी, 4 कने सै धरतिया पर पई गया होर ये आवाज सुणी, “हे शाऊल, तु मिन्जो कै सतावां?” 5 तिने पुछया, “हे प्रभु, तु कुण आ?” तिने बोलया, “हऊं यीशु आ, तिस्सो जे तु सतावां। 6 पर हुण उठी ने नगरा च जा, कने जो किछ तु करना सै तिजो दसया जाणा।” 7 सै माहु जे तिसने सौगी थे, सै रेहान हुये; कांभई आवाज तां सुणां थे पर किसी जो देखदे नी थे। 8 तां शाऊल धरतिया परा ते उठया, पर तां जे आक्खीं खोलियां तां तिस्सो किछ भी नी दुस्सया, होर सै तिसरा हाथ पकडी ने दमिशका जो लई गे। 9 सै तिन्हां दिनां तका ना देक्खी सकया, कने ना किछ खादया होर ना पितया।

10 दमिशका च हनन्याह नौवा रा इक चेला था तिसने प्रभुये दर्शना च बोलया, “हे हनन्याह!” तिने बोलया, “हां प्रभु।” 11 तां प्रभुये तिसने बोलया, “उठीने तिसा गलीया च जा तिसा जे ‘सीधी’ बोलांये, कने यहूदा रे घरा च शाऊल नौवा रा इक तरसुसा रा रहणे औळा आ तिसरे बारे च पुछ; कांभई देख सै प्राथना करय रां, 12 कने तिने हनन्याह नौवा रे इक्की माहुये जो अन्दर आऊंदे कने अपणे ऊपर हाथ रखदे देखी रा; इस खातर भई फेरी भी देखणे लगी जाओ।” 13 हनन्याह ये जवाब दित्या, “हे प्रभु, मैं इस माहुये रे बारे च बौहतीं ते सुणी रा भई इने यरुशलेमा च तेरे पवित्र लोकां ने सौगी बडी-बडी बुराईयां किती रियां; 14 कने येथी भी इस्सो प्रधान याजकां रिया तरफा ते अधिकार मिली रा भई जो लोक तेरे नां लेयांये तिन्हां सबनी जो बन्ही लो।” 15 पर प्रभुये तिसने बोलया, “तु चली जा; कांभई सै तां अन्याजातियां कने राजेयां कने इस्राएलियां रे सामणे मेरा नाँ परगट करने खातर मेरा चुणीरा पात्र आ। 16 कने मांह तिस्सो दसणा भई मेरे नौवा खातर तिस्सो केडे-केडे दुःख भुगतणे पऊणे।” 17 तां हनन्याह उठी ने तिस घरा च गया भई तिस पर अपणा हाथ रखो कने बोलया, “हे भाई शाऊल, प्रभु, मतलब यीशु, सै जे तिस रस्ते च, तिसते जे तु आया तिजो दुस्सया था, तिने ई मिन्जो भेजी रा भई तु फेरी भी देखणे लगे कने पवित्र आत्मा ते पूरा भरी जाओ।” 18 होर ताहलु ई तिसरे आखीं ते छिलके जे पये कने सै देखणे लगया, होर उठी ने बपतिस्मा लया; 19 फेरी रोटी खाई ने ताकत मिली,

दमिशक च शाऊला रा प्रचार

सै कईयां दिनां तका तिन्हां चलेयां ने सौगी रेया सै जे दमिशका च थे 20 होर सै तदीं आराधनालय च यीशुये रा प्रचार करने लगया भई सै परमेशरा रा पुत्र आ। 21 सब सुणने औळे हेरान हुई ने बोलणे लगे, “क्या ये सैई आदमिया सै जे यरुशलेमा च तिन्हां जो सै जे इस नौवा जो लंवां थे, नष्ट करां था; होर येथी भी इस खातर आया था भई तिन्हां जो बन्ही ने प्रधान

याजकां ला लई जाओ?" 22 पर शाऊल होर बी सामर्थी हूँदा गया इसा गल्ला रा प्रमाण दई-दई ने भई मसीह येई आ, दमिश्का रे रेहणे औळे यहूदियां रा मुंह बन्द करदा रैया। 23 तां जे बौहत दिन बिन्ती गे, तां यहूदियें मिली ने तिस्सो मारने रा षडयन्त्र रचया। 24 पर तिन्हां रिया योजना रा पता शाऊला जो लगी गया। सैं तां तिस्सो मारने खातर रात-दिन फाटकां पर घात लाई ने लगी रे र्हां थे। 25 पर राती जो तिसरे चेलियां तिस्सो टोकरे च बठाली ने, कने शहरपनाह परा ते लटकाई ने तुआरी तया।

यरुशलम च शाऊल

26 यरुशलमा च पुज्जी ने तिन्हें चेलियां ने मिलणे रा जतन कित्या; पर सब तिसते डरां थे, कांभई तिन्हां जो विस्वास हुंदा था, भई सैं भी चेला आ। 27 पर बरनबासे तिस्सो अप्पु सौगी प्रेरितां ला नई ने तिन्हां जो दसया भई इने कियां-कियां रस्ते च प्रभुये जो देखया, कने तिने इंसने गल्लां कितियां; फेरी दमिश्का च इने केडिया हिम्मता ने यीशुये रे नौवा रा प्रचार कित्या। 28 सैं तिन्हां सौगी यरुशलमा च औन्दा-जान्दा रेह्या 29 कने निधडक हुई ने प्रभुये रे नौवा रा प्रचार करां था; होर युनानी भाषा बोलणे औळे यहूदियां ने सौगी गल्ल-बात कने बाद-बवाद करां था; पर सैं तिस्सो मारने रा जतन करने लगे। 30 ये जाणी ने भाई तिस्सो कैसरिया जो ली आये, कने तरसुस जो भेजीत्या।

31 इयां सारे यहूदिया, कने गलीला, कने सामरिया री कलीसिया जो चैन कने तिन्हां री तरक्की हुई गी; कने सैं प्रभुये रे डरा कने पवित्र आत्मा रे शान्तिया च चलदी कने बहददी गई।

लुद्दा कने याफा च पतरसा

32 फेरी येदा हुआ भई पतरस कईयां जगहां चियें जान्दा-जान्दा, तिन्हां पवित्र लोकां ले बी पुज्जया सैं जे लुदया च र्हां थे। 33 तेथी तिस्सो एनियास नौवा रा इक माह्लु मिलया सैं जे लकवे रा रोगी था, कने अड्डां सालां ते मंजे पईरा था। 34 पतरसे तिस्सो बोलया, "हे एनियास! यीशु मसीह तिज्जो ठीक करां। उठ, अपणे बिस्तर बछा।" तां सैं झटपट उठी ने खड़ा हुई गया। 35 तां लुद्दा कने शारोन रे सब्बीं रेहणे औळेयां तिस्सो देखया कने प्रभुये खा जो फेरी गे।

36 याफा च तबीता मतलब दोरकास नौवा री इक विस्वासी जनाना र्हां थी। सैं बौहत भले-भले काम्म कने दान करां थी। 37 तिन्हां दिनां च सैं बमार हुई ने मरी गई; कने तिन्हें तिसा जो नुहाई ने भीतरा च रखी तया। 38 इस खातर भई लुद्दा याफा रे नेडे था, चेलियां येदा सुणी ने भई पतरस ता तेथी ई हाया, दो माह्लु भेजी ने तिसने विनती किती, अहां ले औणे खातर देर मत करदा।" 39 तां पतरस उठी ने तिन्हां सौगी चली गया, कने तां जे तेथी पुजया तां सैं तिस्सो तेथी लई गे। सब विधवें रोन्दीयें-रोन्दीयें तिसले खडीने, सैं कुरते कने कपडे जे दोरकासे तिन्हां ने सौगी रेंहदे बणाई रे थे, दसणे लगियां। 40 तां पतरसे सबीं जो बाहर कड्डी तया, कने गोडेयां टेकी ने प्राथना किन्ती कने लाशा खा देखी ने बोलया, "हे तबीता, उठ।" तां तिसे अपणिया आकर्खी खोली तियां; कने पतरसा खा देखी ने उठी ने बैठी गी। 41 तिने हत्था रे सहारे ने तिसा जो तुआलेया, कने पवित्र लोकें होर विधवां जो सद्दी ने तिसा जो ज्युंदा दस्सी तया। 42 पर ये गल्ल सारे याफा च फैली गई; कने बौहतीं प्रभुये पर विस्वास कित्या। 43 होर पतरस याफा च शमौन नौवा रे किसी चमेडे रे काम्म करने औळे रे घरा बौहत दिन रहया।

कुरनेलियुस रा पतरसा जो सदणा

10 कैसरिया च कुरनेलियुस नौवा रा इक माह्लु था, सैं जे इतालियानी नौवा रिया पलटना रा सुबेदार था। 2 सैं भक्त था, कने अपणे सारे घराने समेत परमेशरा ते डरां था, कने यहूदी लोकां जो बौहत दान कने लगातार परमेशरा ने प्राथना करां था। 3 तिने दिना रिया तिज्जिया घडिया दर्शना च साफ-साफ देखया भई परमेशरा रा इक स्वर्गदूत अन्दरा आया कने बोलया, "हे कुरनेलियुस!" 4 तिने तिस्सो बोलया, "तेरी प्राथना कने तेरे दान यादा खातर परमेशरा रे सामणे पुज्जी रे; 5 कने हुण याफा च माह्लु भेजी ने

शमौना जो, सैं जे पतरस आ, सद्दी ले। 6 सैं शमौन, चमडे रा काम्म करने औळे रे घरा परौणा, तिसरा घर समुद्रा रे कण्डे आ।" 7 तां जे सैं स्वर्गदूत तिने जे तिसने गल्लां कितियां थियां चली गया, तां तिने दो सेवक, कने सैं जे सपाई तिसरे सामणे खा थे तिन्हां च ते इक भक्त सपाईये जो सदया, 8 कने तिन्हां जो सब गल्लां दस्सी ने याफा जो भेजया।

पतरसा रा दर्शण

9 दुजे दिन सैं चलदे-चलदे नगरा रे नेडे पुज्जे, तां दपैहर के बगता पतरस लग प्राथना करने जो गया। 10 तिस्सो भुख लगी कने किछ खाणा चावां था, तां जे सैं तैयार करया रां थे तां सैं बेसुध हुई गया; 11 कने तिने देखया, भई आकाश खुली गया' कने इक बर्तन बड्डिया चादरा साई चउं पासैयां ते लटकदा-लटकदा, धरतिया खा उतरेया रां। 12 तिस च जे धरतिया रे सबी प्रकारां रे चउं पैरां औळे कने रेंगणे औळे जन्तु कने आकाशा रे पछी थे। 13 तिस्सो इक येदी अवाज सुणी, "हे पतरस उठ, मार कने खा।" 14 पर पतरसे बोलया, "नई प्रभु, येदा नीं हुई सकदा; कांभई मैं कदी भी कोई अपवित्र या अशुद्ध चीज नीं खाहदी री।" 15 फेरी दुजी बारी तिस्सो तेदा ई सुणेया, "जो किछ परमेशरे शुद्ध बणाई रा, तिस्सो तु अशुद्ध मत बोलदा।" 16 तिन बार येदा ई हुआ; तां ताहू ई सैं बर्तन आकाशा परा चकोई गया।

17 तां पतरस अपणे मना च परेशानिया च था, भई इस दर्शना जो सैं जे मैं देखी रा क्या मतलब हुई सकां तां देखो, सैं माह्लु तिन्हां जो जे कुरनेलियुसे भेजी रा था, शमौना रे घरा रा पता लाई ने दरवाजे पर आई ने खडी गे, 18 कने हाक पाई ने पुछणे लगे, "क्या शमौन तिस्सो जे पतरस बोलांये, येथी परौणा आ?" 19 पतरस सैं जे तिस दर्शना रे बारे च सोचया रां था, भई पवित्र आत्मे तिस्सो बोलया "देख, तिन माह्लु तिज्जो टोलया रांये। 20 इस खातर उठी ने थल्ले जा, कने निधडक हुई ने तिन्हां सौगी जायां; कांभई मैं ई तिन्हां जो भेजी रा।" 21 तां पतरसे थल्ले उतरी ने तिन्हां माह्लुआं ने बोलया, "देखा, तिस्सो जे तुहें टोलया रां ये, सैं हउं ई आ। तुहां रे औणे रा क्या मकसद आ?" 22 तिने बोलया, "कुरनेलियुस सुबेदार सैं जे परमेशरा ते डरने औळा कने सारी यहूदी जाति कने खरे नौवा औळा माह्लु आ, तिने इक पवित्र स्वर्गदूता ते ये गल्लां पाई आ भई तिज्जो अपणे घरा सद्दी ने तेरते वचन सुणो।" 23 तां तिने तिन्हां जो अन्दरा जो सद्दी ने तिन्हांरी सेवा किती।

कुरनेलियुस रे घरें पतरस

दुजे दिन तां जे सैं तिन्हां सौगी गया, याफा रे भाईयां च ते बी कई तिसने सौगी चली गे। 24 दुजे दिन सैं कैसरिया पुज्जे कने कुरनेलियुस अपणे टबरा रेयां कने प्यारे मित्रा जो कठा करी ने तिन्हां जो नह्यालया रां था। 25 तां जे पतरस अन्दरा जो आया रां था, तां कुरनेलियुस तिसने मिलया, कने तिसरे पैरां पर पई ने तिस्सो प्रणाम कित्या; 26 पर पतरसे तिस्सो तुआलिने बोलया, "खड़ा हो, हउं भी तां इक माह्लु आ।" 27 कने तिसने सौगी गल्ल बात करदा अन्दरा जो चली गया, कने मत्यां लोकां जो कड्डेयां देखी ने 28 तिन्हां ने बोलया, "तुहें जाणायें भई अन्यजातियां री संगति करना या तिन्हां ला जाणा यहूदियां खातर अधर्म आ, पर परमेशरे मिन्जो दस्या भई किसी माह्लुये जो अपवित्र या अशुद्ध नीं बोलूं। 29 इस खातर तां जे तुहें मिन्जो सदया तां बिना किछ बोले औणे री किन्ती। हुण हउं पुछां भई मिन्जो किस कम्मा खातर सद्दी रा?"

30 कुरनेलियुसे बोलया, "इसा घडिया, पुरे चार दिन हुये, हउं अपणे घरा च तिज्जे पैहर प्राथना करया रां था; तां देखो, इक माह्लु चमकीले कपडे पैहनी ने, मेरे सामणे आई ने खड़ा हुआ 31 कने बोलणे लगया, 'हे कुरनेलियुस, तेरी प्राथना सुणी लरी गई री कने तेरे दान परमेशरा रे सामणे याद किन्ते गई रे। 32 इस खातर किसी जो याफा भेजी ने शमौना जो तिस्सो जे पतरस बोलांये, सद्दी ले। सैं समुद्रा रे कनारे शमौन, चमडे रा काम्म करने औळे रे घरें परौणा।" 33 तां मैं तेरे ला झट-पट लोक भेजे, होर तैं भला कित्या भई आई गया। हुण येथी अहें सब परमेशरा रे सामणे ये, भई जो किछ परमेशरे तेरने बोली रा तिस्सो सुणीये।"

पतरसा रा उपदेश

34 तां पतरसे बोलया हुण हऊं पक्का जाणी गया भई परमेशर किसी रा पक्ष नी करदा, 35 पर हर जातिया च ते सैं जे तिसते डराये कने धर्मा रे काम्म कराये, सैं तिस्सो खरे लगायें। 36 सैं जे वचन तिने इस्त्राएलियां ला भेजेया, तां जे तिने यीशु मसीह रे जरिये (सैं जे सबीं रा प्रभु आ) शान्तिया रा सुसमाचार सुणाया, 37 सैं वचन तिस्सो जे तुहें जाणांये, सैं जे यहून्ना रे बपतिस्मे रे प्रचारा ते बाद गलीला ते शूरु हुई ने सारे यहूदिया च फैली गया : 38 परमेशरे कियों-कियों यीशु नासरिये जो पवित्र आत्मा कने सामर्था ते अभिषेक कित्या; सैं भलाई करदा कने सबीं जो सैं जे शैताने सताई रे थे, खरा करदा फिरया, कांभई परमेशर तिसने सौगी था। 39 अहें तिन्हां काम्मां रे गवाह ये; सैं जे तिन्हें यहूदिया रे देशा कने यरूशलेमा च बी कित्ते, कने तिन्हें तिस्सो लकड़िया पर लटकाई ने मारी तया। 40 तिस्सो परमेशरे तिजे दिन ज्युंदा कित्या, कने प्रगट बी करी तरा; 41 सबीं लोकां पर नी पर तिन्हां गवाह पर तिन्हां जो जे परमेशरे पैहले ते चुणी लरा था, मतलब अहां परा तिने जे तिसने मूर्ईरयां च ते जी उठणे ते बाद खादेया-पीतया; 42 कने तिने अहां जो हुक्म दित्या भई लोकां च प्रचार करा कने गवाही देवा भई ये सैं ई आ तिस्सो जे परमेशरे ज्युंदायां रा कने मूर्ईरयां रे यां रा जज बणाई रा। 43 तिसरी सब भविष्यवक्ता गवाई देवां ये भई जो कोई तिस पर विस्वास करगा, तिस्सो तिसरे नौवा ते माफी मिलणी।”

अन्यजातियां पर पवित्र आत्मा उतरना

44 पतरस ये गल्लां बोलया ई रां था भई पवित्र आत्मा वचना रे सब सुणने औळैयां परा उतरी गया। 45 कने तितने जे खतना कित्तिरे विस्वासी पतरसा ने सौगी गईरे थे, सैं सब रेहान हुये भई अन्यजातियां परा बी पवित्र आत्मा रा दान मिलया रां। 46 कांभई तिन्हें तिन्हां जो लग-लग भाषा बोलदे कने परमेशरा री बडयाई करदे सुणेया। इत पर पतरसे बोलया, 47 “क्या कोई पाणिये जो रोकी सकां भई इन्हां जो बपतिस्मा नी मिलो, तिन्हें जे अहां साई पवित्र आत्मा पाई रा?” 48 कने तिने हुक्म दित्या भई तिन्हां जो यीशु मसीह रे नौवा ते बपतिस्मा देवा। तां तिन्हें तिसने विनती कित्ती भई सैं किछ दिन होर तिन्हां सौगी रओ।

फतरसा रे जरिये अपणे कम्मां रा स्पष्टीकरण

11 फेरी प्रेरितें कने भाईयें सैं जे यहूदिया च थे ये सुणया भई अन्य जातियें भी परमेशरा रा वचन मन्त्री लरा। 2 इस खातर तां जे पतरस यरूशलेमा जो आया, तां खतना कित्तीरे लोक तिसने बहस-बाजी करने लगे, 3 तें बिना खतना औळे लोकां ले जाई ने तिन्हां ने कियों खादया।” 4 तां पतरसे तिन्हां जो शुरु ते बारो-बरतिया बोली ने सुणाया : 5 “हऊं याफा नगरा च प्राथना करया रां था, कने बेसुध हुई ने इक दर्शन देखया भई इक बर्तन बडिया चादरा साई चऊं कुणयां ते लटकाई रा, आकाशा ते उतरी ने मेरे ला आया। 6 तां जे मैं तिस पर ध्यान कित्या, तां तिस च धरतिया रे चऊं खुरां औळे कने जंगला रे पशु कने धरतिया पर रगड़ोई ने चलने औळे जन्तु कने आकाशा रे पछी देखे; 7 कने ये आवाज सुणी, ‘हे पतरस उठ, मार कने खा।’ 8 मैं बोलया, “नहीं प्रभु, नहीं; कांभई कोई अपवित्र कने अशुद्ध चीज मेरे मुंहा च कदी मनी गईरी।” 9 इसरे जवाबा च आकाशा ते दुज्जी बार आवाज आई, ‘जो किछ परमेशरे शुद्ध बणाईरा, तिस्सो अशुद्ध मत बोलदा।’ 10 तिन बार येदा ई हुआ; तां सब किछ आकाशा परा खजोईया। 11 कने देखो, ताहू ई तिन माहू सैं जे कैसरिया ते मेरे ला भेज्जिरे थे, तिस घरा च तिस जे अहें थे, आई ने खड़ी गे। 12 तां आत्मा ने मिन्जो तिन्हां ने बिणा शक किते जाणे जो बोलया, कने छे भाई बी मेरे सौगी-सौगी आये; कने अहें तिस माहूये रे घरा जो गये। 13 तिने अहां जो दसया, भई तिने इक्की स्वर्गदूता जो अपणे घरा च खड़ीरा देखया तिने जे तिसने बोलया, ‘याफा च माहू भेजी ने शमौना जो तिस्सो जे पतरस बोलांये, सद्दी ले। 14 तिस तुहां ने येदियां गल्लां बोलणियां, तिन्हां ते जे तु कने तेरे सारे घराने जो मुक्ति मिलणी।’ 15 तां जे हऊं गल्लां करने लगया, तां पवित्र आत्मा तिन्हां परा तिसा ई रितिया ते तियां ई उतरया

तियां जे शुरु च अहाँ परा उतरया था। 16 तां मिन्जो प्रभुये रा सैं वचन याद आया; सैं जे तिने बोलया, ‘यहून्ने त पाणिये ने बपतिस्मा दित्या, पर तुहां जो पवित्र आत्मा ते बपतिस्मा मिलणा।’ 17 इस खातर तां जे परमेशरे तिन्हां जो बी सैं दान दित्या, सैंजे अहां जो प्रभु यीशु मसीह पर विस्वास करने ते मिलया था; तां हऊं कुण था सैं जे परमेशरा जो रोकी सकुं?” 18 येदा सुणी ने सैं चुप रये, कने परमेशरा री बडयाई करी ने बोलणे लगे, “तां परमेशरे अन्य जतियां जो बी जीवना खातर मन फराणे रा दान दित्तिरा।”

अन्ताकिया री कलीसिया

19 सैं लोक सैं जे तिस दुःखा रे मारे सैं जे स्तिफनुसा रिया वज्रहा ते पया था, उरे-परे हुईगे थे, सैं फिरदे-फिरदे फीनीके कने साइप्रस कने अन्ताकिया च पुजे; पर यहूदियां जो छड्डी ने किसी होरी जो वचन नीं सुणांदे थे। 20 पर तिन्हां च ते किछ साइप्रसवासी कने कुरेनी थे, सैं जे यूनानियां जो भी प्रभु यीशुये रे सुसमाचारा रियां गल्लां सुणाणे लगे। 21 प्रभुये रा हाथ तिन्हां पर था, कने बौहत लोक विस्वास करी ने प्रभुये खा फिरे। 22 तां जे तिन्हां री चर्वा यरूशलेमा री कलीसिया च सुणणे जो आई, तां तिन्हें बरनबास जो अन्ताकिया भेजीत्या। 23 सैं तेथी पुज्जी ने कने परमेशरा रा अनुग्रह देकर्डी ने खुश हुआ, कने सबनीं जो ये उपदेश दित्या भई तन-मन लाई प्रभुये ने चिपकी रे रह्वा। 24 सैं इक भला माहू था, कने पवित्र आत्मा होर विस्वासा ते भरी रा था; कने होर मते सारे लोक प्रभुये च आईगे। 25 तां सैं शाऊला जो टोलणे खातर तरसुसा जो चलीग्या। 26 तां जे सैं तिसने मिलया तां तिस्सो अन्ताकिया जो ली आया; कने येदा हुआ भई सैं इक्की साला तका कलीसिया ने सौगी मिलदे कने बौहती लोकां जो उपदेश देंदे रहे; कने चेलयां जो सब ते पैहले अन्ताकिया च ई मसीह बोलया।

27 तिन्हां दिनां च बौहत भविष्यवक्ता यरूशलेमा ते अन्ताकिया जो आये। 28 तिन्हां च ते अगबुस नौवा रे इक्की खडी ने आत्मा रिया प्रेरणा ते ये दसया भई सारे संसारा च बडा नकाळ पौणा- सैं नकाळ कलौदियुस रे बक्ता च हुआ। 29 तां चेलयां ये सलाह दित्ती भई सब अपणे-अपणे धना रे मताबक यहूदिया च रेहणे औळे भाईयां रिया मददा खातर किछ ना किछ भेज्जो। 30 तिने येदा ई कित्या; कने बरनबास होर शाऊला रे हथें प्राचीनां ला किछ भेजीत्या।

पतरसा रा जेला ते छुटणा

12 तिस बगत हेरोदेस राजे कलीसिया रे कईयां आदमियां जो सताणे खातर तिन्हां पर बडा जुल्म कित्या। 2 तिने यहून्ना रे भाई याकुबा जो तलवारा ने मरुवाईत्या। 3 तां जे तिने देखया भई यहूदी लोक इस कम्मा ते खुश हुवां ये, तां तिने पतरसा जो बी पकड़ील्या। सैं दिन अखमीरी रोटिया रे दिन थे। 4 तिने तिस्सो पकडी ने जेलखाने च पाया, कने चार-चार सपाईयां जो चऊं वक्ता ते पैहरे पर रखया; येदा सोच्ची ने भई फसहा ते बाद तिस्सो लोकां रे सामणे लयाऊणा। 5 पतरस जेल खाने च बन्द था; पर कलीसिया तिस खातर पूरा दिल लाईने प्राथना करया रां थी।

6 तां जे हेरोदेसे तिस्सो लोकां रे सामणे लयोणा चाह्या, तिसा राति पतरस दुई जंजीरां ते बन्ही रा दुई सपाईयां रे बीच सुतीरा था; कने पैहरा देणे औळे, दरवाजे पर जेल खाने री रखवाली करया रां थे। 7 तां देखो, प्रभुये रा इक स्वर्गदूत तेथी आई ने खडा हुई गया कने तिसा ओवरिया च जोति चमकी, कने तिने पतरसा रिया बखिया पर हाथ मारी ने तिस्सो दुआली ने बोलया, “उठ, छोडे कर। कने तिसरे हत्था ते जंजीरां खुल्ही ने पई गियां। 8 तां स्वर्गदूते तिस्सो बोलया, “लक्का बन्ह कने अपणे जूते पैहनी ले।” तिने तेदा ई कित्या। फेरी तिने तिसने बोलया, “अपणे कपडे पैहनी ने मेरे पिछे आई जा।” 9 सैं निकली ने तिसरे पिछे चलीप्या; पर ये नी जाणदा था भई जो किछ स्वर्गदूत करया रां सैं सच आ, पर ये समझेया रां था भई हऊं दर्शन देखया रां। 10 तां सैं पैहले कने दूजे पैहरे ते निकली ने तिस लोहे रे फाटका पर पुजे, सैं जे नगरा खा था। सैं तिन्हां खातर अप्पु ई खुल्हीग्या, कने सैं निकली ने इक्की गलिया चीयें गये, कने ताहू ई स्वर्गदूत तिस्सो छड्डी ने चलीग्या। 11 तां पतरसे होशा च आई ने बोलया, “हुण मैं ये जाणीत्या भई प्रभुये अपणे

स्वर्गदूत भेज्जी ने मिन्जो हेरोदेसा रे हत्था ते छुड़ाईल्या, कने यहूदियां री सारी आशा तोडी ती।”

12 येदा जाणी ने सै तिस यहून्ना री माता मरियमा रे घरा आया तिस्सो जे मरकुस बोलां ये। तेथी मते सारे लोक कडे हुईने प्राथना करया रां थे। 13 तां जे तिने फाटका री खिडकी खडकाई, तां रुदे नौवा री इक दासी देखणे जो आई। 14 पतरसा री आवाज पछयाणी ने तिसे खुशिया री मारीये फाटक नी खोल्या, पर दौडी ने अन्दरा जो गई कने दस्सया भई पतरस दरवाजे पर खडीरा। 15 तिन्हें तिसा ने बोलया, “तु पागल त नी हुई गरी।” पर तिसे जोर दई ने बोलया भई येदा ई आ। तां तिन्हें बोलया, “तिसरा स्वर्गदूत हुंगा।” 16 पर पतरस खडकांदा ई रेआ : इस खातर तिन्हें खिडकी खोली, कने तिस्सो देखी ने रेहान हुये। 17 तां तिन्हें तिन्हां जो हत्था रा सहारा कित्या भई चुप रौआ; कने तिन्हां जो दस्या भई प्रभुये कियां-कियां तिस्सो जेला ते कड्या। फेरी बोलया, “याकूब कने भाईयां जो ये गल्ल दस्सी देयो।” तां निकली ने दूजिया जगह जो चलीग्या।

18 तडके ई सपाईयां च बडी हलचल मचीगी भई पतरसा जो क्या हुआ। 19 तां जे हेरोदेसे तिस्सो टोलया कने नी मिलया, तां पैहरा देणे औळ्यां री जांच करी ने हुक्म दित्या भई सै मारी दित्ते जाओ : कने सै यहूदिया जो छडी ने कैसरिया च जाई ने रैहणे लगया।

हेरोदेशा री मौत

20 हेरोदेस सूर कने सैदा रे लोकां ते बौहत नराज था। इस खातर सै इक मन हुई ने तिस ला आये, कने बलास्तुस जो सै जे राजे रा कर्मचारी था, मनाई ने मेल करणा चाह्वां थे; कांभई राजे रे देशा ते तिन्हारे देशा री पाळ हुआं थी। 21 पक्के कित्तिरे दिन हेरोदेस राजा कपडे पैहनी ने सिंहासना पर बैठया, कने तिन्हां जो प्रवचन देणे लगया। 22 तां लोक बोली उठे, “ये त माहुआं री नी परमेशरा री अवाज ई।” 23 ताहु ई प्रभुये रे इक्की स्वर्गदूते तिस्सो मारया, कांभई तिने परमेशरा जो महिमा नी दिती कने सै गुजे पई ने मरीग्या। 24 पर परमेशरा रा वचन बधदा कने फैलदा गया। 25 तां जे बरनबासे कने शाऊले अपणी सेवा पूरी करी ली तां यहून्ने जो तिस्सो जे मरकुस बोलां ये, सौगी लई ने यरुशलमेमा जो वापस आईगे।

बरनबास कने शाऊला जो भेजणा

13 अन्ताकिया री कलीसिया च कई भविष्यवक्ता कने उपदेशक थे; तियां जे : बरनबास कने शमौन तिस्सो जे नीगर बोलां ये; कने लूकियुस कुरेनी, कने चौथाई देशा रे राजे हेरोदेसा रा दूध भाई मनाहेम, कने शाऊल। 2 तां जे सै वरत रखी ने प्राथना करया रां थे, तां पवित्र आत्मे बोलया, “मेरे खातर बरनबास कने शाऊला जो तिस कम्मा खातर लग करा तिस खातर जे मैं तिन्हां जो चुपीरा।” 3 तां तिन्हें वरत करी ने तिन्हां परा हात्थ रखी ने विदा कित्या।

पौलुसा री पैहली प्रचार यात्रा

4 इस खातर सै पवित्र आत्मा रे भेजी रे सिलूकिया जो गये; कने तेथी जे जहाज पर चढी ने साइप्रसा जो चले; 5 कने सलमीसा च पुज्जी ने, परमेशरा रा वचन यहूदियां रे आराधनालया च सुणाया। यहून्ना तिन्हां रा सेवक था। 6 सै तिस सारे टापुये चिये जान्दे-जान्दे पाफुस तका पुजे। तेथी तिन्हां जो बार-यीशु नौवा रा इक यहूदी टोणा कने झुठा भविष्यवक्ता मिलया। 7 सै हाक्म सिरगियुस पौलुसा ने सौगी था, सै अक्का औळा माहु था। तिने बरनबास कने शाऊला जो अप्पु ला सद्दी ने परमेशरा रा वचन सुणना चाह्या। 8 पर इलीमास टोन्हा, कांभई तिसरे नौवा रा येई मतलब आ, तिन्हां रा बरोध करी ने हाक्मा जो विस्वास करने ते रोकणा चाह्या। 9 तां शाऊले तिसरा नौ जे पौलुस बी आ, पवित्र आत्मा ते भरी ने तिस खा घूरी ने देख्या कने बोलया, 10 “हे सारे कपट कने सारिया चलाकिया ते भरी रे शैताना री ल्वाद, सकल धर्मा रे बैरी, क्या तु प्रभुये रे सिधे रस्तेयां जो टेड्डा करना नी छडणा? 11 हुण देख, प्रभुये रा हात्थ तेरे बरोधा चा; कने तू किछ वक्ता तका अन्हे रैहणा कने सुरजा जो नी देखणा।” तां ताहु ई तिस रीयां आक्खीं धुंधलियां

कने फेरी नेहरियां हुई गियां, कने सै हत्था ने उरे-परे टोहणे लगीग्या भई कोई तिसरा हाथ पकडी ने तिस्सो चलाओ। 12 तां हाकमे, जो किछ हुआ तिस्सो देक्खी ने कने प्रभुये रे उपदेशा ते रेहान हुई ने विस्वास कित्या।

पिसिदिया रे अन्ताकिया च

13 पौलुस कने तिसरे साथी पाफुसा ते जहाज खोल्ही ने पंफूलिया रे पिरगा च आये; कने यहून्ना तिन्हां जो छडी ने यरुशलमेमा जो हटी गया। 14 पिरगा ते अगे बधी ने सै पिसिदिया रे अन्ताकिया च पुजे; कने सब्ता रे दिन आराधनालया च जाई ने बैठीगे। 15 कनुना कने भविष्यवक्ता री कताब पढ़ने ते बाद आराधनालया रे सरदार तिन्हां जो बोलया, “हे भाईयो, जे तुहारे मना च लोकां जो उपदेश देणे री कोई गल्ल ई तां बोला।” 16 तां पौलुसे खडे हुई ने कने हत्था रा सहारा करी ने बोलया, “हे इस्राएलियो, कने परमेशरा ते डरने औळ्यो, सुणा : 17 इन्हां इस्राएली लोकां रे परमेशरे अहां रे बापदादेयां जो चुणी लया, कने तां जे सै लोक मिस्र देशा च परदेशी हुई ने रह्वां थे, तां तिन्हां री संभाल लई; कने अपणे हत्था रे बला ते तिन्हां जो तेथी ते कडी लया। 18 कोई चाली सालां तका सै जंगला च तिन्हां जो सैहदा रैया, 19 कने कनान देशा च सत्तां जातियां रा नाश करीने तिन्हां रा देश कोई साढे चार सौ सालां च इन्हां जो दईत्या। 20 इसते बाद तिने शमुएल भविष्यवक्ता तका तिन्हां च न्यायी बणाये। 21 इसते बाद तिन्हें इक राजा मंगया : तां परमेशरे चाली सालां खातर बिन्यामीना रे गोत्रा च ते इक माहु; मतलब कीशा रे पुत्र शाऊला जो तिन्हां परा राजा बणाया। 22 फेरी तिस्सो लग करी ने दाऊदा जो तिन्हां रा राजा बणाया; तिसरे बारे च तिने गवाही दिती, ‘मिन्जो इक माहु, यिश्नै रा पुत्र दाऊद, मेरे मना साई मिली गरा; तिस ई मेरी सारी इच्छा पूरी करनी।’ 23 इसरे वंशा च ते परमेशरे अपणी प्रतिज्ञा रे मताबक इस्राएला जो इक उद्धार कर्ता, मतलब यीशुये जो भेजया। 24 तिसरे औणे ते पैहले यहून्ने सबर्नी इस्राएलियां जो मन फिरावा रे बपतिस्मे रा प्रचार कित्या। 25 तां जे यहून्ना अपणी सेवा पूरी करने पर था, तां तिन्हें बोलया, ‘तुहें मिन्जो सै जे समझायें हऊं सै नी आ! पर देखो, मेरते बाद इक औणे औळा, तिसरे पैरां रे जुते भी खोलणे रे हऊं जोगा नीआ।’

26 “हे भाईयो, तुहें अब्राहम री सन्तान हे; कने तुहें सै जे परमेशरा ते उरां ये, तुहां ला इस मुक्तिया रा वचन भेजी रा। 27 कांभई यरुशलमेमा च रैहणे औळे कने तिन्हां रे सरदारें, ना तिस्सो पछयाणेया कने ना भविष्यवक्ता रियां गल्लां समझियां, सै जे हर सब्ता रे दिन पढ़िया जावांईयां, इस खातर तिस्सो दोषी ठहराईने तिन्हां गल्लां जो पूरा कित्या। 28 तिन्हें मारी देणे जोगा कोई दोष तिस च नी पाया, तां बी पिलातुसा ने विनती किती भई तिस्सो मारीत्या जाओ। 29 तां जे तिन्हें तिसरे बारे च लिखी रियां सब गल्लां पूरियां कितियां, तां तिस्सो कुसा परा ते तुआरी ने कब्रा च रखया। 30 पर परमेशरे तिस्सो मूर्इरयां च ते ज्युंदा कित्या, 31 कने सै तिन्हां जो सै जे तिसने सौगी गलीला ते यरुशलमेमा जो आई रे थे, बौहतीं दिनां तका दुसदा रैया; लोकां रे सामणे हुण सै ई तिसरे गवाह ये। 32 अहें तुहां जो तिसा प्रतिज्ञा रे बारे च सै जे तिने अहां रे बापदादेयां ने कितीरी, ये सुसमाचार सुणावां ये, 33 भई परमेशरे यीशुये जो ज्युंदा करी ने, सै प्रतिज्ञा अहां रियां औळादां खातर पूरी किती; येदा जे दुजे भजना च लिखीरा,

‘तु मेरा पुत्र आ;
आज ई मैं तिजो जन्म दित्या।’

34 कने तिसरे इयां मूर्इरयां च ते ज्युंदे हुणे रे बारे च भई सै कदी मनी सडो, तिने येदा बोली रा,

‘हऊं दाऊदा परा री पवित्र
कने अटल किरपा तेरे पर करगा।’

35 इस खातर तिने इक्की होरी भजना च भीं बोलया,
‘तु अपणे पवित्र माहुये जो सडने नी देंगा।’

36 कांभई दाऊद त परमेशरा री इच्छा रे मताबक अपणे वक्ता च सेवा करी ने सईग्या, कने अपणे बापदादेयां च मिलीग्या, कने सडी भी गया। 37 पर तिस्सो जे परमेशरे ज्युंदा कित्या, सै सडया नीं आ। 38 इस खातर, हे भाईयो, तुहें जाणी लवा भई इसरे ई जरिये पापां री माफीया रा समाचार तुहां

जो दित्या जाये रां; 39 कने तिन्हां गल्लां च जे तुहें मुसा री व्यवस्था रे जरिये निर्दोष नी ठेहरी सकदे थे, तिन्हां ई सर्बीं च हर इक विस्वास करने औळा तिसरे दुआरा निर्दोष ठेहरेया। 40 इस खातर चकन्ने रह्या, येदा नी हो भई जो किछ भविष्यक्तावां रियां कतांवां च आई रा, तुहां परा बी पई जाओ :

41 'हे निन्दा करने औळेओ, देखा कने रेहान होआ, कने मिटी जावा; कांभई हऊं तुहां रे दिनां च इक काम करया रां, येदा काम सै जे कोई तुहां ने चर्चा करो, तां तुहां कदी बी विस्वास नी करना।' 11"

42 तिसरे बाहर निकलदे वक्ता लोक तिसने विनती करने लगे भई अगले सब्ता रे दिन अहां जो ये गल्लां फेरी भी सुणायो। 43 तां जे सभा उठीगी तां यहूदियें कने यहूदी मता च आई रे भक्तां च ते बौहत सारे पौलुस कने बरनबासा रे पिछे-पिछे आई गे; कने तिन्हें तिन्हां ने गल्लां करी ने समझाया भई परमेशरा रे अनुग्रह च बणी रे रह्या।

पौलुसे अन्यजातियां च प्रचारा री शुरुआत कीति

44 अगले सब्ता रे दिन लगभग सारे ई लोक परमेशरा रा वचन सुणने जो कड़े हुये। 45 पर यहूदी भीड़ा जो देखी ने डाह ते भरी गे, कने निन्दा करदे पौलुसा रियां गल्लां रे बरोधा च बोलणे लगे। 46 तां पौलुसे कने बरनबासे निडर हुई ने बोलया, "जरूरी था भई परमेशरा रा वचन पैहले तुहां जो सुणायो जान्दा; पर तां जे तुहें तिस्सो दूर करां ये, कने अप्पु जो सदा रे जीवना रे जोगे नी ठहरां, तां देखा, अहे अन्य जातियां खा फिरां ये। 47 कांभई प्रभुये अहां जो ये हुक्म दितीरा, 'मैं तुहां जो अन्यजातियां खातर ज्योति ठहराईरा, तां जो तुहें धरतिया रे कोणे-कोणे तका जाई ने उद्धरा री वजह बणो।' 48 ये सुणी ने अन्य जातियां खुशी हुये, कने परमेशरा रे वचना री बड़याई करने लगे होर जितने अन्नत जीवना खातर ठहराई रे थे, तिन्हें विस्वास कित्या। 49 तां प्रभुये रा वचन तिस सारे देशा च फैलणे लगया। 50 पर यहूदियें भक्त कूलीन जनानां जो कने नगरा रे ताकतबर लोकां जो भडकाया, कने पौलुसा कने बरनबासा रे वरोधा च उपद्रव कराई ने तिन्हां जो अपणिया सीमा ते कड़ी तया। 51 तां जे सै तिन्हां रे सामणे अपणियां पैरां री धूल झाडी ने इकूनियुमा जो चली गये। 52 कने चले खुशीया कने पवित्र आत्मा ते भरदे गये।

इकुनियुस च पौलुस कने बरनबास

14 इकुनियुस च येदा हुआ भई सै यहूदियां रे आराधनालय च सौगी-सौगी गये, कने इयां गल्लां कितियां भई यहूदियां कने यूनानियां च ते मतेयां विस्वास कित्या। 2 पर विस्वास नी करने औळेयां यहूदियें अन्जातियां रे मन भाईयां रे वरोधा च भडकाये कने वरोधा पैदा करी तया। 3 सै बौहत दिनां तका तेथी रये, कने प्रभुये रे भरोसे पर हिम्मत ने गल्लां करां थे; कने प्रभु तिन्हां रे हत्थां ते बड़े-बड़े नशाण दस्सी ने कने नोखे काम करवाई ने अपणे अनुग्रह रे वचना पर गवाई देवां था। 4 पर नगरा रे लोकां च फूट पईगी, तिसते कितने त यहूदियां खा कने कितने ई प्रेरितां खा हुई गे। 5 पर तां जे अन्यजाति कने यहूदी तिन्हां रा अपमान कने तिन्हां पर पत्थर मारने खातर अपणे सरदारों समेत तिन्हां रे पिछे दौड़े, 6 तां सै ये गल्ल जाणी गे, कने लुकाउनिया रे लुस्रा कने दिरबे नगरां च, कने नेडे-तेडे रियां जगहां जो नटी गे, 7 कने तेथी सुसमाचार सुनाणे लगे।

लुसा कने दिरबे च

8 लुस्रा च इक माहु बेंठी रा था, तिसरे पैरां च ताकत नी थी। सै जन्मा तेई लंगडा था कने कदी मनी चली रा था। 9 सै पौलुसा जो गल्लां करदे सुणया रां था पौलुसे तिस खा नजरां गड्डी ने देख्या भई तिस्सो चंगा हुणे रा विस्वास आ, 10 कने बड़िया अवाजा च बोलया, "अपणे पैरां रे भार सीधा खड़ा हुई जा।" 11 लोकें पौलुसा रा येदा काम्म देखी ने लुकाउनिया रिया भाषा च उच्चिया आवाजा च बोलया, "देवता माहुआं रे रूपा च हुई ने अहां ले उतरी गे।" 12 तिने बरनबासा जो ज्यूस, कने पौलुसा जो हिरमस बोलया कांभई सै गल्लां करने च माहिर था। 13 ज्यूस रे तिस मन्दरा रा पुजारी सै जे तिन्हां रे

नगरा रे सामणे था, बल्द कने फूलां रा हार फाटका पर लयाई ने लोकां सौगी बलि करना चाह्वां था। 14 पर बरनबाससे कने पौलुसे प्रेरिते तां जे ये सुणया, तां अपणे कपडे फाडे कने भीड़ा च जाई ने, जोरां ने गलाणे लगे, 15 "हे लोको, तुहें क्या करया रां ये? अहें बी तां तुहां साई दुःख-सुख भोगणे औळे आदमी ये कने तुहां जो सुसमाचार सुणायो रांये भई तुहें इन्हां बेकार चीजां ते लग्मा हुई ने जीवते परमेशरा खा फिरा, तिने ने स्वर्ग कने धरती कने समुद्र कने जो किछ तिस च आ बणायो। 16 तिने पिछले वक्ता च सर्बीं जातियां जो अपणे-अपणे रस्तेयां पर चलणे दित्या। 17 तां बी तिने अप्पु जो बिना गवाह ते नी छडया पर सै भलाई करदा रैया, कने आकाशा ते बरखा कने फलां औलयां मौसमां जो दई ने तुहां रे मना जो भोजन कने खुशिया ने भरदा रह्या।" 18 येदा बोली ने भई तिन्हें लोकां जो बड़िया मुस्कलें रोकया भई सै बलिदान नी करो।

19 पर किछ यहूदियें अन्ताकिया कने इकुनियुमा ते आई ने लोकां जो अप्पु खा करी लेया, कने पौलुसा पर पत्थर मारे, कने तिस्सो मरिरा समझीने नगरा ते बाहर घसीटीने लईगे। 20 पर तां जे चले तिसरे चऊं पासयां आई ने खड़े हुये तां सै उठी ने नगरा च गया कने दुजे दिन बरनबासा ने सौगी दिरबे जो चली गया।

सीरिया रे अन्ताकिया जो बापस औणा

21 सै तिस नगरा रे लोकां जो सुसमाचार सुणायो ने, कने बौहत सारे चले बणाई ने, लुस्रा कने इकुनियुमा कने अन्ताकिया जो वापस हटीगे, 22 कने चलेयां रे मना जो पक्का करदे रहे कने ये उपदेश देवां थे भई विस्वासा च बणी रे रह्या; कने ये बोलां थे, "अहां जो मते दुःख चक्की ने परमेशरा रे राजा च जाणे मिलणा।" 23 कने तिने सारियां कलीसियां च तिन्हां खातर प्राचीन ठहराये कने वरत कने प्राथना करी ने तिन्हां जो प्रभुये रे हत्था दई तया तिस पर जे तिन्हें विस्वास कितिरा था।

24 तां जे सै पिसिदिया चीयें पंफूलिया च पुजे; 25 फेरी पिरगा च वचन सुणायो ने अत्तलिया च आये, 26 कने तेथी ते सै जहाजा पर अन्ताकिया जो गे, तेथी सै तिस कम्मां खातर सै जे तिने पूरा कितिरा था परमेशरा रे अनुग्रह च दई ने गये। 27 तेथी पुज्जी ने तिन्हें कलीसिया कड़ी किन्ती कने दसया भई परमेशरे तिन्हां सौगी हुई ने कितने बड़े-बड़े काम्म कित्ते, कने अन्य जातियां खातर विस्वासा रा दरवाजा खोली तया। 28 कने सै चलेयां सौगी बौहत दिनां तका रहे।

यरुशलेम री सभा

15 फेरी किछ लोक यहूदिया ते आई ने भाईयां जो सखाणे लगे : "जे मुसा री रितिया पर तुहांरा खतना नी हुईरा हो तां तुहें उद्धार नीं पाई सकदे।" 2 तां जे पौलुसा कने बरनबासा ने तिन्हां री बौहत बेहस कने झगडा हुआ तां ये मन्नाया गया भई पौलुस कने बरनबास कने तिन्हां च ते किछ माहु इसा गल्ला रे बारे च प्रेरितां कने प्राचीनां ला यरुशलेमा जो जाओ। 3 इस खातर कलीसिया तिन्हां जो जो थोड़े दूरा तका पजुआणे आई; कने सै फिनीके कने सामरिया चीयें हुंदे हुये अन्यजातियां रे मन फिराणे रा समाचार सुणां दे गये, कने सब भाई बौहत खुश हुये। 4 तां जे सै यरुशलेमा पुजे, तां कलीसिया कने प्रेरितें कने प्राचीन तिन्हां ने खुशिया ने मिले, कने तिन्हां जो दसया भई परमेशरे तिन्हां ने सौगी हुई ने केढ़े-केढ़े काम्म किन्ती रे थे। 5 पर फरीसियां रे मता च ते तिन्हें जे विस्वास कित्या था, तिन्हां जो च ते कईयें उठी ने बोलया, "तिन्हां जो खतना कराणे कने मुसा री व्यवस्था जो मनणे रा हुक्म देणा चहिंदा।"

6 तां प्रेरित कने प्राचीन इसा गल्ला रे बारे च बचार करने खातर कड़े हुये। 7 तां पतरसे बौहत बेहस हुणे ते बाद खड़े हुई ने तिन्हां जो बोलया, "हे भाईयो, तुहें जाणांये भई बौहत दिन पैहले परमेशरे तुहां चते मिन्जो चुणी लरा भई मेरे मुहां ते अन्यजाति सुसमाचारा रा वचन सुणी ने विस्वास करो। 8 मना रे जांचणे औळे परमेशरे तिन्हां जो बी अहां साई पवित्र आत्मा दई ने गवाई दिती; 9 कने विस्वासा ते तिन्हां रे मन शुद्ध करी ने अहां च कन तिन्हां च किछ भेद नी रखया। 10 तां हुण तुहें कै परमेशरा जो परखां ये भई चलेयां

रिया गर्दना पर येदा जुंगड़ा रखो, तिस्सो जे अहां रे बापदादे बी चक्की नी सक्के ना अहें चक्की सक्काये? 11 हॉ, अहां रा ये निश्चा जरूर आ भई तियां-तियां ने प्रभु यीशुये रे अनुग्रह ते उद्धार मिलणा; तियां-तियां ई अहां जो बी मिलणा।"

12 तां सै सारी सभा चुपचाप बरनबासा कने पौलुसा री सुणने लगी, भई परमेशरे तिन्हां रे दवारा अन्य जातियां च कितने बड्डे-बड्डे नशाण, कने नोखे काम्म दरस्से। 13 तां जे सै चुप हुये तां याकूब बोलणे लगया, "हे भाईयो, मेरी सुणा। 14 शमौने दस्सा भई परमेशरे पेहेले अन्य जातियां पर केडी दया किन्ती भई तिन्हां च ते अपणे नौवा खातर लोक खड़े करी लो। 15 इसते भविष्यवक्तावां रियां गल्लां बी मिलां ई यां, तेदा जे लिखिरा,

16 'इसते बाद मांज फेरी आई ने दाऊदा रा रूढीरा डेरा खड़ा करना, कने तिसरे खण्डहरां जो फेरी बनाणा, कने तिस्सो खड़ा करना,

17 इस खातर भई बाकी माह्नु, मतलब सब अन्यजाति सै जे मेरे नौवा रे बोले जावां ये, प्रभुये जो टोलो,

18 येदा सै ई प्रभु बोलां सै जे जगता रिया उत्पतिया ते इन्हां गल्लां रा समाचार देंदा आया।'

19 इस खातर मेरा बचार येआ भई अन्यजातियां च ते सै जे किछ लोक परमेशरा खा फिराये अहें तिन्हां जो दुःख नी दर्ईये; 20 पर तिन्हां जो लिखी ने भेजिये भई सै मुर्ता रियां गन्देपना ते कने व्यभिचारा ते कने गला गुठीरे मासा ते कने खुना ते दूर रहो। 21 कांभई पुराणे वक्ता ते नगर-नगर मुसा री व्यवस्था रा प्रचार करने औळे ई चली आईरे, कने सै हर सब्ता रे दिन आराधनालया च पढ़ियां जावां ईयां।"

अन्यजाति बिश्वासियां जो चिढ़ी

22 तां सारी कलीसिया समेत प्रेरितां कने प्राचीनां जो ये खरा लगया भई अप्पु च ते किछ माह्नुआं जो चुणी ने, मतलब यहूदा तिस्सो जे बरसब्बा बोला ये, कने सीलासा जो सै जे भाईयां च मोहतबर आ; कने तिन्हां जो पौलुस कने बरनबासा सौगी अन्ताकिया भेजो। 23 तिन्हें तिन्हां रे हत्था येदा लिखी ने भेजया : "अन्ताकिया कने सीरिया कने किलिकिया रे रैहणे औळे भाईयां जो सै जे अन्य जातियां च ते हुये, प्रेरितां कने प्राचीन भाईयां रा नमस्कार। 24 अहें सुणी रा भई अहां च ते कईयें तेथी आई ने तुहां जो अपणियां गल्लां ते घबराई तरा; कने तुहां रे मन पुड्डे करी तरे, पर अहें तिन्हां जो हुक्म नी दित्तिरा था। 25 इस खातर अहें इक मन हुई ने ठीक समझेया भई चुणी रे माह्नुआं जो अपणे प्यारे बरनबासा कने पौलुसा सौगी तुहां ला भेजिये। 26 ये येदे माह्नु ये तिन्हें जे अपणे प्राण अहां रे प्रभु यीशु मसीह रे नौवा खातर मुसकला च पाई रे। 27 इस खातर अहें यहूदा कने सीलासा जो भेजया, सै जे अपणे मुहां ते बी इन्हां गल्लां जो बोलगे। 28 पवित्र आत्मा जो कने अहां जो ये ठीक लगया भई इन्हां जरूरी गल्लां जो छड्डी ने, तुहां परा होर बजन नी पाईये; 29 भई तुहें मुरतां पर बली किन्तीरे कने खुना ते, कने गला गुठीरे मासा ते, कने व्यभिचारा ते दूर रहो। इन्हां ते दूर रहो तां तुहां रा भला हुणा। अगे शुभा।"

30 फेरी सै विदा हुई ने अन्ताकिया पुजे, कने सभा जो कट्टी करी ने सै पत्री तिन्हां जो दर्ई ती। 31 सै तिसा पत्रिया पढी ने तिन्हां उपदेशां रियां गल्लां ते बौहत खुश हुये। 32 यहूदा कने सीलासे सै जे अप्पु बी भविष्यवक्ता ये, बौहत गल्लां ते भाईयां जो उपदेश दर्ई ने मजबूत कित्या। 33 सै किछ दिन रई ने, भाईयां ते शान्तिया ने विदा हुये भई अपणे भेजणे औळेयां ला जाओ। 34 (पर सीलासा जो तेथी रेहणा खरा लगया।) 35 पर पौलुस कने बरनबास अन्ताकिया च रईगे : कने होरी मतेयां लोकां ने सौगी प्रभुये रे वचना रा उपदेश देन्दे कने सुसमाचार सुणां दे रये।

पौलुस री दूजी प्रचार यात्रा, पौलुस कने बरनबासा च मतभेद

36 किछ दिना बाद पौलुसे बरनबासा ने बोलया, "तिन्हां-तिन्हां नगरां च जे अहें प्रभुये रा वचन सुणाई रा, आओ, फेरी भीं तिन्हां च चलिये कने अपणे भाईयां जो देखिये भई सै केढे हये।" 37 तां बरनबासे यहूदा जो तिस्सो जे मरकुस बोलां ये, सौगी नेणे रा बचार कित्या। 38 पर पौलुसे तिस्सो सै जे पंफूलिया च तिन्हां ते लाग हुई गरा था, कने कम्मा पर तिन्हां सौगी नी गया,

सौगी नेणा खरा नी समझेया। 39 मतलब येदी बैहस हुई भई सै इक्की दुये ते लग हुई गे; कने बरनबास, मरकुसा जो लई ने जहाजा पर साइप्रसा जो चली गया। 40 पर पौलुसे सीलासा जो चुणी लया, कने भाईयां ते परमेशरा रे अनुग्रह च दुआई ने तेथी ते चली गया; 41 कने सै कलीसिया जो मजबूत करदा सीरिया कने किलिकिया हुन्दे हुये निकलया।

पौलुसा रा तीमुथियुस जो सौगी लेणा

16 फेरी सै दिरबे कने लुस्त्रा च बी गया। तेथी तीमुथियुस नौवा रा इक चेला था, सै जे किसी विस्वासी यहूदिनी रा पुत्र था, पर तिसरा पिता यूनानी था। 2 सै लुस्त्रा कने इकुनियुम रे भाईयां च सुनाम था। 3 पौलुस री इच्छा थी भई सै तिसने सौगी चलो; कने सै जे यहूदी लोक तिन्हां जगहां च रहलं थे तिन्हां रिया वजह ते तिसने तिसरा खतना कित्या, कांभई सै सब जाणां थे, भई तिसरा पिता यूनानी था। 4 कने नगर-नगर जान्दे हुये सै तिन्हां विधियां जो सै जे यरूशलेमा रे प्रेरितें कने प्राचीन दस्सी रियां थियां, मनणे खातर तिन्हां जो दस्दे जावां थे। 5 इयां कलीसिया विस्वासा च पक्की हुँदी गई कने तादाता च हर दिन बधदी गई।

त्रोआस च: पौलुस रा दर्शन

6 सै फ्रुगिया कने गलातिया प्रदेशा च ते हुई ने गे, कांभई पवित्र आत्मे तिन्हां जो एशिया च वचन सुनाणे ते मना कित्या। 7 तिन्हें मूसिया रे नेडे पुज्जी ने, बितूनिया च जाणा चाह्या; पर प्रभु यीशुये रे आत्मा ने तिन्हां जो जाणे नी दित्या। 8 इस खातर सै मूसिया चीर्ये हुई ने त्रोआसा च आये। 9 तेथी पौलुसे राती जे इक दर्शन देखया भई इक मकिदुनी आदमी खड़ी रा कने तिसने विनती करी ने बोलया रां, "पार जाई ने मकिदुनिया च आवा, कने अहां री मदद करा।" 10 तिसरे येदा दर्शन देखदे ई अहें झट मकिदुनिया च जाणा चाह्या, येदा समझी ने भई परमेशरे अहां जो तिन्हां जो सुसमाचार सुनाणे खातर सद्दी रा।

फिलिप्पी च: लुदिया रा मन बदलना

11 इस खातर त्रोआसा ते जहाज खोल्ही ने अहें सीधे सुमात्राके कने दुजे दिन नियापुलिस च आये। 12 तेथी ते अहें फिलिप्पी पुजे, सै जे मकिदुनिया प्रान्ता रा खास नगर आ कने रोमियां री बस्ती ई, कने अहें तिस नगरा च किछ दिन तका रहे। 13 सब्ता रे दिन अहें नगरा रे फाटका ते बाहर नदिया रे कनारे येदा समझी ने गे भई तेथी प्राथना करने री जगहा हुंगी, कने बैठी ने सै जे जनानां तेथी कट्टियां हुई रियां थियां, गल्लां करने लगे। 14 लुदिया नौवा री शुआथीरा नगरा री बैजनी कपड़े बेचणे औळी इक भक्त जनाना सुणया रां थी। प्रभुये तिसा रा मन खोलया भई सै पौलुसा रिया गल्लां पर चित लगाओ। 15 तां जे तिसे अपणे घराने समेत बपतिस्मा लया, तां तिसे अहां ने विनती किन्ती, "जे तुहें मिन्जो प्रभुये री विस्वासी समझांयां तां, चली ने मेरे घरा च रह्या, "कने सै अहां जो मनाई ने लई गई।

पौलुस कने सीलास जेला च

16 तां जे अहें प्राथना करने रिया जगहा जाया रां थे, तां अहां जो इक दासी मिली तिस च जे भावी बोलणे औळी आत्मा थी; कने भावी बोलणे ते अपणे मालकां खातर मती कमाई करी लेयां थी। 17 सै पौलुसा रे कने अहां रे पिछे आई ने रडाणे लगी, "ये माह्नु परमप्रधान परमेशरा रे दास ये, सै जे अहां जो मुक्तिया रे रस्ते री कथा सुणावांये।" 18 सै बौहत दिनां तका येदा ई करदी रई; पर पौलुस दुःखी हुआ, कने मुडी ने तिसा आत्मा जो बोलया, "हऊँ यीशु मसीह रे नौवा ते हुक्म देवां भई इसा च ते निकली जा।" कने सै तिस ई वक्ता निकली गई।

19 तां जे तिसा रे मालकें देखया भई अहां रिया कमाईया रा साधन चली गया, तां पौलुस कने सीलासा जो पकडी ने चौका च प्रधाना ला खीजी ने लई गे; 20 कने तिन्हां जो फौजदारी रे हाक्मा ला लई गे कने बोलया, "ये लोक सै जे यहूदी ये, अहां रे नगरा च मता हो हल्ला मचाये रां ये; 21 कने येदियां रितियां दस्सया रां ये, तिन्हां जो ग्रहण करना कने मनणा अहां खातर

खरा निआ।" 22 तां लोकां री भीड़ तिन्हां रे बरोधा च कड़े हुई ने आये, कने हाकमे तिन्हां रे कपड़े तुआरी ने, कने तिन्हां जो बेंत मारने रा हुकम दित्या। 23 बौहत बेंत मरवाई ने तिन्हें तिन्हां जो जेल खाने च पाई तया कने दरोगे जो हुकम दित्या भई तिन्हां जो चौकसिया ने रखो। 24 तिन्हें येदा हुकम लई ने तिन्हां जो अन्दरलिया कोठरिया च रखया कने तिन्हां रे पैर लकड़िया च ठोकी ते।

पौलुस कने सीलासा रा जेला ते छुटणा

25 अधिया राती रे वक्ता पौलुस कने सीलास प्राथना करदे परमेशरा रे भजन गाये रां थे कने कैदी तिन्हां री सुणया रां थे। 26 इतने च अचानक बड्डा हिलण हुआ, येथी तका भई जेलखाने री नीयू तका हीली गी, कने ताहलुं ई सब दरवाजे खुली गे; कने सर्बी रे बन्धन खुली गे। 27 दरोगा जागी गया, कने जेलखाने रे दरवाजे खुले देखी ने समझया भई कैदी नड्डी गे, इस खातर तिने तलवार कड्डी ने अप्पु जो खत्म करना चाह्या। 28 पर पौलुसे उचिया आवाजा च बोलया, "अप्पु जो मत मारदा, कांभई अहें सब येथी ये।" 29 तां सै लम्फ बाली ने अन्दरा गया, कने कम्दा-कम्दा सीलासा रे अग्गे पैरां पई गया; 30 कने तिन्हां जो बाहर लयाई ने बोलया, "हे सज्जनो, मुक्ति पाणे खातर हऊं क्या करूं?" 31 तिन्हें बोलया, "प्रभु यीशु मसीह पर विस्वास कर तां तु कने तेरे घराने जो मुक्ति मिलणी।" 32 कने तिन्हें तिस्सो कने तिसरे सारे घरा रे लोकां जो प्रभुये रा वचन सुणाया। 33 राती जो तिन्हें तिस ई वक्ता तिन्हां जो नई ने तिन्हां रे जख्म धोये, कने तिने अपणे लोकां समेत ताहू ई बपतिस्मा लई लया। 34 तां तिन्हें तिन्हां जो अपणे घरा च नई ने तिन्हां जो रोटी खाणे दित्ती, कने अपणे सारे घराने समेत परमेशरा पर विस्वास करी ने खुशी मनाई।

35 तां जे दिन हुआ तां हाकमें सपाईयां जो येदा बोली ने भेजया भई तिन्हां माह्लुआं जो छड्डी दे। 36 दरोगे ये गल्लां पौलुसा ने बोलियां, "हाकमें तिजो छड्डी देणे रा हुकम दित्ती रा। इस खातर निकली ने चली जा।" 37 पर पौलुसे तिन्हां ने बोलया, "तिन्हें अहां रोमी माह्लुआं जो बिना दोषा ते लोकां रे सामणे मारेया कने जेला बी पाया। हुण अहां चुप-चाप कैं निकली जाणा? येदा नी करना; पर सै अप्पु आई ने अहां जो बाहर निकलो।" 38 सपाईये ये गल्लां हाकमा ने कित्तियां, कने सै येदा सुणी ने भई ये रोमीये डरी गे, 39 कने आई ने तिन्हां जो मनाया, कने बाहर नई ने विनती कित्ती भई नगरा ते चली जाओ। 40 सै जेलखाने ते निकली ने लुदिया रे घरा गे, कने भाईयां ने मिली ने तिन्हां जो शान्ती दित्ती, कने चली गे।

थिस्सलुनीके नगरा च

17 फेरी सै अम्फिपुलिस कने अपुल्लोनिया हुई ने थिस्सलुनीके च आये, तेथी यहूदियां रा इक आराधनालया था। 2 पौलुस अपणी रितिया रे मताबक तिन्हां ला गया, कने तीन सब्ता रे दिनां तका पवित्रशास्त्रा ते तिन्हां सौगी वाद-विवाद करदा रेह्या; 3 कने तिन्हां रा मतलब खोली-खोली ने समझावां था भई मसीह जो दुःख चकणा, कने मूर्ईरयां च ते ज्युंदा हुणा, जरुरी था; कने, "सै यीशु तिसरी जे हऊं तुहां जो कथा सुणाये रां, मसीह आ।" 4 तिन्हां च ते मतेयां, कने भक्त यूनानियां च ते बौहतीं। कने मतियें कुलीन जनानें मन्नी लया, कने पौलुसा होर सीलासा सौगी मिली गे। 5 पर यहूदियें डाह ने भरी ने बजारु लोकां च ते किछ बूरेयां माह्लुआं जो अप्पु सौगी लया, कने भीड़ कड्डी करी ने नगरा च हो-हल्ला मचाने लगे, कने यासोना रे घरा पर चढाई करी ने तिन्हां जो लोकां रे सामणे लयोणा चाह्या। 6 तेथी तिन्हां जो सै नी मिले तां यासोन कने किछ भाईयां जो नगरा रे हाकमा रे सामणे खींजीं ने ली आये कने रड्डीये, "ये लोक तिन्हें जे जगता जो पूठा-सीधा करी तरा, येथी भी आई गे। 7 यासोने तिन्हां जो अपणे घरा रखी रा। ये सब येदा बोलां ये भई यीशु ई राजा आ, कने कैसरा रे हुकमा रा बरोध करांये।" 8 तिन्हें लोकां जो कने नगरा रे हाकमां जो येदा बोली ने घबराई तया। 9 इस खातर तिन्हें यासोना कने बाकी लोकां ते मुचलका लई ने तिन्हां जो छड्डी तया।

बिरीया नगरा च

10 भाईये राती-राती पौलुसा कने सीलासा जो बिरीया भेजी तया; कने सै तेथी पुज्जी ने यहूदियां रे आराधनालया च गे। 11 ये लोक तां थिस्सलुनीके रे यहूदियां ते खरे थे, कने तिन्हें दिल लाई ने वचन ग्रहण कित्या, कने हर रोज पवित्रशास्त्रा च टोलदे रहे भई ये गल्लां येडियां ई हईयां की नी। 12 इस खातर तिन्हां च ते बौहतीं, कने कुलीन जनानां च ते कने आदमियां च ते बौहतीं विस्वास कित्या। 13 पर तां जे थिस्सलुनीके रे यहूदी जाणी गे भई पौलुस बिरीया च बी परमेशरा रा वचन सुणाये रां, तां तेथी आई ने बी लोकां जो भडकाणे कने हलचल मचाणे लगे। 14 तां भाईयें झट ई पौलुसा जो विदा कित्या भई समुद्रा रे कनारे चले जाओ; पर सीलास कने तीमुथियुस तेथी रई गे। 15 पौलुसा जो पुजुआणे ओळे तिस्सो एथेंस तका लई गे; कने सीलास होर तीमुथियुसा खातर येदा हुकम पाई ने विदा हुये भई सै तिस ला छोड़े-छोड़े आओ।

एथेंस नगरा च

16 तां जे पौलुस एथेंसा च तिन्हां जो निहालया रां था, तां नगरा जो मूर्तियां ने भरी रा देखी ने तिसरा जीऊ जली गया। 17 इस खातर सै आराधनालया च यहूदियां कने भक्तां ने, कने चौका च सै लिक जे तिस्सो मिले थे तिन्हां ने हर रोज वाद-विवाद करां था। 18 तां इपिकुरी कने स्तोईकी दार्शनिकां च ते किछ तिसने तर्क करने लगे, कने कईयें बोलया, "ये बकवादी क्या बोलणा चाह्या?" पर दुजेयां बोलया, "ये होरसी रा प्रचारक जाह्लां"- कांभई सै यीशुये रा कने फेरी जमणे रा सुसमाचार सुणावां था। 19 तां सै तिस्सो अप्पु सौगी अरियुपगुस जो लई गे कने पुछया, "क्या अहें जाणी सक्कायें भई ये नवां मत तिस्सो जे तु सुणावां, क्या आ? 20 कांभई तु अहां जो नोखियां गल्लां सुणावां, इस खातर अहें जाणना चावांये भई इन्हां रा क्या मतलब आ।" 21 (इस खातर भई सब एथेंस वासी कने सै जे प्रदेशी तेथी रवां थे, नवियां-नोईयां गल्लां बोलणे कने सुणने ते स्वाये होर किसी कम्मा व बगत नी बतां दे थे।)

अरियुपगुस रिया सभा च पौलुसा रा भाषण

22 तां पौलुसे अरियुपगुस च खड़े हुई ने बोलया, "हे एथेंस रे लोको, हऊं देखया रां भई तुहें हर गल्ला च देवतेयां रे बडे मनणे ओळें ये। 23 कांभई हऊं फिरदे-फिरदे तां जे तुहां रियां पुजणे रियां चीजां जो देखया रां था, तां इक येदी वेदी मिली, तिस पर लिखी रा था, 'अनजाणे ईश्वरा खातर।' इस खातर तिस्सो जे तुहें बिणा जाणे पूजांये हऊं तुहां जो तिसरा समाचार सुणावां आ। 24 तिने परमेशरे जे धरती कने धरतिया रियां सब चीजां जो बणाया, सै स्वर्ग कने धरतिया रा मालक हुई ने, हत्था रे बणाई रे मन्दरा च नी रैहदा; 25 ना तिस्सो किसी येदियां चीजां री जरुरत ई भई सै माह्लुआं रे हत्था रिया सेवा ते लेणी, कांभई सै अप्पु ई सर्बी जो जीवन कने सांसां कने सब किछ देणे ओळ्ळा आ। 26 तिने इक्की मूला ते सारे माह्लु सारिया धरतिया पर रैहणे खातर बणाये; कने तिन्हां खातर बगत कने रैहणे री जगहा री सीमा इस खातर बन्ही री, 27 भई सै परमेशरा जो टोलो, कने तिसरी टोल-टाल करी ने सै मिली जाओ, तां बी सै अहां च ते किसी ते दूर नीआ। 28 कांभई अहें तिस च ई ज्युंदे रह्याये, कने चलां-फिरांये, कने टिकी रे रह्याये; तेदा जे तुहां रे मतेयां कवियें बी बोली रा, 'अहें तिसरे ई वंशा रे ये।' 29 इस खातर परमेशरा रा वंश हुई ने अहां जो ये समझणा ठीक नीआ भई परमेशरा रा हुणा सोने, रूप-रंग, कने पत्थरा रे समान आ, सै जे माह्लुये री सोचा कने कारीगरिया ते घडी ने बणाई रे हो। 30 इस खातर परमेशरे तिस वक्ता पर तां जे सब अणजाण थे ध्यान नी दित्या, पर हुण हर जगह सर्बी माह्लुआं जो मन फिराणे रा हुकम देवां आ। 31 कांभई तिने इक दिन रखी रा, तिस च जे तिस माह्लुये रे द्वारा संसारा रा न्याय करना, तिस्सो जे तिने रखी रा, कने तिस्सो मूर्ईरयां च ते ज्युंदा करी ने ये गल्लां सर्बी जो दस्सी तरियां।"

32 मूर्ईरयां रे ज्युंदे हुणे री गल्ल सुणी ने किछ लोक हास्सी डुआणे लगे, कने कईयें बोलया, "ये गल्ल अहां तेरते फेरी कदी सुणगे।" 33 तां पौलुस तिन्हां च ते निकली गया। 34 पर किछ माह्लु तिसने सौगी मिले, कने विस्वास कित्या;

तिन्हां च ते सै जे अरियुपगुस रा सदस्य था, कने दमरीस नौं री इक जनाना थी, तिन्हां सौगी होर बी लोक थे।

कुरिन्थुस नगरा च

18 इसते बाद पौलुस एथेंसा जो छडी ने कुरुन्थुसा च आया।² तथी तिस्सो अक्विला नौवा रा इक यहूदी मिलया, तिसरा जन्म पुतियुस च हुई रा था। सै अपणी पत्नी प्रिसकिला ने सौगी इटली च हुण ई आई रा था, कांभई कलौदियुसे सबी यहूदियां जो रोमा ते निकलणे रा हुक्म दिती रा था। इस खातर सै तिन्हां ला गया।³ तिसरा कने तिन्हां रा इको जेया काम्म था, इस खातर सै तिन्हां सौगी रैह्या कने सै काम्म करने लगे; कने तिन्हां रा तम्बु बनाणे रा काम्म था।⁴ सै हर सब्द रे दिन आराधनालया च वाद-विवाद करी ने यहूदियां कने यूनानियां जो बी समझावां था।

⁵ तां जे सीलास कने तीमुथियुस मकिदूनिया च आये, तां पौलुस वचन सुनाणे रिया धुना च यहूदियां जो गवाई देणे लगया भई यीशु ई मसीह आ।⁶ पर तां जे सै बरोध कने निन्दा करने लगे, तां तिने अपने कपडे झाडी ने तिन्हां ने बोलया, "तुहां रा खून तुहां रे ई सिरा पओ! हऊं निर्दोष आ। हुणा ते मांह अन्यजातियां ला जाणा।"⁷ तथी ते चली ने सै तीतुस युसतुस नौवा रे परमेशरा रे इक्की भक्ता रे घरॉ गया; तिसरा घर आराधनालया सौगी था।⁸ तां आराधनालया रे सरदार क्रिसपुसे अपने सारे घराने समेत प्रभुये परा विस्वास कित्या। कने मते सारे कुसरन्थुस वासियें सुणी ने विस्वास कित्या कने बपतिस्मा लेया।⁹ प्रभुये इक्की राती दर्शन दई ने पौलुसा जो बोलया, "मत डर, बोली जा कने चुप मत रेह; ¹⁰ कांभई हऊं तेरे सौगी आ, कने कोई तेरे परा चडाई करी ने तेरा नुकसान नी करी सकदा; कांभई इस नगरा च मेरे मते सारे लोक ये।"¹¹ इस खातर सै तिन्हां च परमेशरा रा वचन सुणां-सुणां सै इक साल छेयां महीनेयां तका रेह्या।

¹² तां जे गल्लियो अखाया देशा रा हाकम था, तां यहूदी लोकें एका करी ने पौलुसा परा लडने आई गे। कने तिस्सो न्याय आसना रे सामणे लयाई ने बोलणे लगे; ¹³ "ये लोकां जो समझावां भई परमेशरा री उपासना इयां-इयां करा, सै जे व्यवस्था रे मताबक नीं आ।"¹⁴ तां जे पौलुसे बोलणे जो तैयार ई था, तां गल्लियो येदा यहूदियां ने बोलया, "हे यहूदियो, जे ये किछ अन्याय या दुष्ट गल्ल हुंदी, तां पक्का ई हऊं तुहां री सुणदा।"¹⁵ पर जे ये गल्ल वाद-विवाद, शब्दां, कने नौवा, कने तुहां रिया अपणिया व्यवस्था रे बारे ची तां तुहें ई जाणो; कांभई हऊं इन्हां गल्लां रा जज नी बणना चांह्दा।"¹⁶ कने तिने तिन्हां जो न्याय आसना रे सामणे ते बाहरॉ कुडुआई तया।¹⁷ तां सबी लोकें आराधनालया रे सरदार सोस्थिनेसा जो पकडी ने न्याय आसना रे सामणे गया। पर गल्लियो इन्हां गल्लां री किछ बी चिन्ता नी किती।

अन्ताकिया जो बापस औणा

¹⁸ पौलुस बौहतीं दिनां तका तेथी रैहया फेरी भाईयां ते विदा हुई ने किखिया च इस खातर सिर मुंडुआया कांभई तिने मन्नत मन्नी री थी, कने जहाजा पर सीरिया जो चली पया कने तिसने सौगी प्रिस्किल्ला कने अक्विला थे।¹⁹ तिने इफिसुस पुञ्जी ने तिन्हां जो तेथी छड्या, कने अप्पु आराधनालया च जाई ने यहूदियां ने वाद-विवाद करने लगया।²⁰ तां जे तिन्हें तिसने विनती किती, "अहां सौगी होर किछ दिन रैह।" तां सै नीं मन्नया; ²¹ पर सै येदा बोली ने तिन्हां ते विदा हुआ, "जे परमेशरे चाह्या तां हऊं तुहां ला फेरी आऊंगा।" तां सै इफिसुसा ते जहाजा खोली ने चली पया;

पौलुसा री तिञ्जी प्रचार यात्रा

²² कने कैसरिया च उतरी ने (यरुशलैमा जो) गया कने कलीसिया जो नमस्कार करी ने अन्ताकिया जो आया।²³ फेरी किछ दिन रई ने सै तेथी ते निकलया कने, इक्की तरफा ते गलातिया रे फ्रूगिय परदेशा रे सब चेलियां जो मजबूत करदा फिरया।

इफिसुस नगरा च अपुल्लोस

²⁴ अप्पुल्लोस नौवा रा इक यहूदी माह्यु, तिसरा जन्म जे सिकन्दरिया च हुई रा था, सै जे विद्वान आदमी कने पवित्रशास्त्रा जो खरे ढंगा ने जाणां था, इफिसुसा च आया।²⁵ तिने प्रभुये रे रस्ते री खरी शिक्षा पाई री थी, कने मन लगाई ने यीशुये रे बारे च ठीक-ठीक सणुआवां कने सखावां था, पर सै सिर्फ यहूदा रे बपतिस्मे री गल्ल जाणां था।²⁶ सै आराधनालया च निधडक हुई ने बोलणे लगया, पर प्रिस्किल्ला कने अक्विला तिसरियां गल्लां सुणी ने तिस्सो अप्पु ला लयाई ने परमेशरा रे रस्ते रे बारे च तिस्सो होर भी ठीक-ठीक दस्सया।²⁷ तां जे तिने येदा सोचया भई पार जो जाई ने अखाया जो जाओ तां भाईये तिस्सो हिम्मत दई ने चेलियां जो लिखया भई सै तिसने खरे ढंगा ने मिलो; कने तिने तेथी पुञ्जी ने तिन्हां लोकां री बडी मद किती तिन्हें जे अनुग्रह रिया वजह ते विस्वास कित्या था।²⁸ कांभई सै पवित्रशास्त्रा ते प्रमाण दई-दई ने भई यीशु ई मसीह आ, बडे जोरा-सोरा ते यहूदियां जो सबी रे सामणे लाजवाब करदा रेह्या।

इफिसुस नगरा च पौलुस

19 तां जे कुरिन्थुस च था, तां पौलुस प्रदेशा रे उपरले हिस्से चीयें हुई ने इफिसुसा च आया। तेथी किछ चेलियां जो देखी ने ² तिन्हां ने बोलया, "क्या तुहां विस्वास करदे वक्ता पवित्र आत्मा मिलया?" तिन्हें तिस्सो बोलया, "अहें ना तां पवित्र आत्मा रे बारे च हनी सुणी रा।"³ तिने तिन्हां ने बोलया, "तां फेरी तुहें किसरा बपतिस्मा लया?" तिन्हें बोलया, "यहूदा रा बपतिस्मा।"⁴ पौलुसे बोलया, "यूहन्ने ये बोली ने मन फिराणे रा बपतिस्मा दित्या भई सै जे मेरे बाद औणे औळा आ, तिस पर मतलब यीशुये पर विस्वास करयो।"⁵ ये सुणी ने तिन्हें प्रभु यीशुये रे नौवा रा बपतिस्मा लया।⁶ तां जे पौलुसे तिन्हां पर हाथ रखे, तां पवित्र आत्मा तिन्हां परा उतरेया, कने सै अन्य-अन्य भाषा बोलणे कने भविष्यवाणी करने लगे।⁷ ये सब तकरीबन बारह आदमी थे।

⁸ सै आराधनालया च जाई ने तिन्हां महीनेयां तका निडर हुई ने बोलदा रेह्या, कने परमेशरा रे राजा रे बारे च विवाद करदा कने समझांदा रेह्या।⁹ पर तां जे किछ लोक कठोर हुई ने तिसरी नी मन्नी पर लोकां रे सामणे इस रस्ते जो बुरा बोलणे लगे, तां तिने तिन्हां जो छडी तया कने चेलियां जो लग करी तया, कने हर रोज तुरन्तुसा रिया पाठशाला च वाद-विवाद करदा रेह्या।¹⁰ दुई सालां तका येदा ई हुदा रेह्या, येथी तका भई आसिया रे रैहणे औळे क्या यहूदी क्या यूनानी सबी प्रभुये रा वचन सुणी लया।

¹¹ परमेशर पौलुसा रे हाथा रिया सामर्था ते नोखे काम्म दस्सां था।¹² येथी तका भई रमाल कने पुआरने तिसरे शरीरा ने छुआई ने बमारां पर सट्टां थे, कने तिन्हां रियां बमारियां चली जांवां थियां; कने दुष्टात्मा तिन्हां च ते निकली जांवां थियां।¹³ पर किछ यहूदी सै जे झाड़-फूंक करां थे, येदा करने लगे भई तिन्हां च जे दुष्टात्मा हुआ थियां तिन्हां परा प्रभु यीशुये रा नौं येदा बोली ने फूको, "तिस यीशुये रा प्रचार जे पौलुस करां, हऊं तुहां जो तिसरी कसम दुआई दां।"¹⁴ कने स्क्रिवा नौवा रे इक यहूदी प्रधान याजकार रे सात पुत्र थे, सै जे येदा ई करां थे।¹⁵ पर दुष्टातमे तिन्हां जो जवाब दित्या, "यीशुये जो हऊं जाणार्, कने पौलुसा जो बी जाणार्, पर तुहें कुणये?"¹⁶ कने तिने माह्युये तिस च जे दुष्टात्मा थियां तिन्हां परौ लमखी ने कने तिन्हां जो अपने बसा च लयाई ने, तिन्हां परा येदा उपद्रव कित्य भई सै नंगे कने जखमी हुई ने तिस घरा ते नडे।¹⁷ ये गल्लां इफिसुसा रे रैहणे औळियां सब यहूदी कने यूनानी बी जणी गे, कने तिन्हां सबी परा भय छाई गया; कने प्रभु यीशुये रे नौवा री बड्याई हुई।¹⁸ तिन्हें जे विस्वास किती रा था तिन्हां च ते बौहतीं आई ने अपनेयां-अपणेयां कम्मां जो मन्नी लया कने प्रगट कित्या।¹⁹ जादु करने औळियां च ते अपनेयां-अपणी पोथियां कडियां करी ने सबी रे सामणे फुक्की तियां, कने तां जे तिन्हां रा मूल जोडया, तां पंजाह हजार चाँदिये रे सिक्केयां रे बराबर निकलया।²⁰ इयां प्रभुये रा वचन जोरां-सोरां ते फैलदा कने परबल हुन्दा गया।

21 तां जे ये गल्लां हुई चुक्रियां तां पौलुसे आत्मा च ये ठाणेया भई मकिदुनिया कने अखाया चीयें हुई ने यरुशलैमा जो जाऊं, कने बोलया, “तेथी जाणे ते बाद मिन्जो रोमा जो बी देखणा जरूरी आ।” 22 इस खातर अपणी सेवा करने ओळ्हेयां च ते तीमुथियुसा कने इरास्तुसा जो मकिदुनिया भेजी ने अप्पु जो किछ दिन आसिया च रई गया।

इफिसुस च उपद्रव

23 तिस वक्ता तिस पंथा रे बारे च बड़ा हुल्लड़ हुआ। 24 कांभई देमेत्रियुस नौवा रा इक सन्यार अरतिमिसा रे चाँदिये रे मन्दर बणवाई ने कारीगीरां जो बौहत काम्म दुआवां था। 25 तिने तिन्हां जो कने येदियां ई चीजां रे कारीगीरां जो कट्टा करी ने बोलया, “हे माह्लुओ, तुहें जाणां ये भई इस कम्मा ते अहां जो कितना पैसा मिलां। 26 तुहें देखां ये कने सुणया रां ये भई ना सिर्फ इफिसुसा च, पर तकरीबन सारे ई आसिया च इने पौलुसे येदा बोली-बोली ने सबी लोकां जो समझाया कने भरमाई रा बी आ, भई हत्थां री कारीगीरी ई, सै ईश्वर नीयें। 27 इसते हुण सिर्फ इसी गल्ला रा डर नीं आ भई अहां रे इस धंधे री प्रतिष्ठा चली जाणी, ये भी आ भई। महान देवी अरतिमिसा रा मन्दर बेकार समझेया जाणा, कने तिस्सो जे सारा आसिया कने जगत पुज्जां था तिसरा महत्व भी जान्दा रेहणा।”

28 सै येदा सुणी ने गुस्से च भरी गे कने सारे जोरा ने रड़ाई-रड़ाई ने बोलणे लगे, “इफिसुसा री अरतिमिस महान ई!” 29 कने सारे नगरा च बड़ा हल्ला मची गया, कने मकिदुनिया वासी गयुस कने अरस्तिखुसां जो सै जे पौलुसा सौगी यात्रा करया रां थे, पकड़ी लया, कने इक्की सौगी रंगमंचा खा दौड़ी गे। 30 तां जे पौलुसे लोकां ने सौगी अन्दरा जो जाणा चाह्या तां चेलैयां तिस्सो रोकी लया कने जाणे नी दित्या। 31 आसिया रे हाक्मा च ते बी तिसरे कईयें मित्रें तिस ला ये बोली भेजया कने विनती किन्ती भई नाटकशाला च जाई ने जोखम देखां चकदा। 32 तेथी कोई किछ रड़ाये रां था कने कोई किछ, कांभई सभा च बड़ी गडबड हुया रां थी, कने मते सारे लोक येदा जाणदे बी नी थे भई अहें किस खातर कट्टे हुई रे। 33 तां तिन्हें सिकन्दरा जो, तिस्सो जे यहूदियें खड़ा कितती रा था, भीड़ा च अगो कित्या। सिकन्दर हाथां ने सहारा करी ने लोकां रे सामणे जवाब देणा चाहवां था। 34 पर तां जे तिन्हां जो पता लगया भई सै यहूदी आ, तां सब कोई दुईं घन्टेयां तका रड़ादे ई रहे, “इफिसुसा री अरतिमिस महान ई।” 35 तां नगरा रे मन्त्रियें लोकां जो शान्त करी ने बोलया, “हे इफिसुसा रे लोको, कुण नी जाणदा भई इफिसियां रा नगर महान देवी अरतिमिसा रे मन्दरा, कने जीयुसा रिया तरफा ते खड़ी रिया मूर्तिया रा टहलूआ। 36 इस खातर तां जे भई इन्हां गल्लां री तोड़ नी हुई सकदी, तां ठीक आ भई तुहें शान्त रह्ना कने बिना सोचे बचारे किछ नी करा। 37 कांभई तुहें इन्हां माह्लुओ जो लंदी रा सै जे नां तां मन्दरा रे लूटणे ओळ्हे ये नां अहां रिया देवीया री निन्दा कराये। 38 जे देमेत्रियुस कने तिसरे साथी कारीगरां रा किसी ने झगडा हो तां कचहेरी खुली गी कने हाक्म भी ये; सै इक्की दुजे परा इलजाम लाओ। 39 पर जे तुहां किसी होरी गल्ला रे बारे च पुछणा चाह्यां ये, तां निश्चित सभा च फैसला कित्य जाणा। 40 कांभई अज्जा रे बलवे रिया वजह ते अहां परा दोष औणे रा डर आ, इस खातर भई इसरी कोई वजह नीं, कने अहां ले इसा भीड़ा रे कट्टे हुणे रा कोई जवाब नीं आ।” 41 येदा बोली ने तिने सभा जो विदा कित्या।

मकिदुनिया, यूनान कने त्रोआसा च पौलुस

20 तां जे हुल्लड़ रूकी गया तां पौलुसे चेलैयां जो सद्दी ने समझाया, कने तिन्हां ते विदा हुई ने मकिदुनिया खा चली पया। 2 तिस सारे प्रदेशा चीयें हुई ने कने चेलैयां जो हिम्मत ने भरी ने सै यूनाना जो आया। 3 तां जे तिन्न महीने रई ने सै तेथी ते जहाजा पर सीरिया खा जाणे पर था, तां यहूदी तिसरिया घाता च लगे, इस खातर तिन्हें ये फैसला कित्या भई मकिदुनिया हुई ने वापस हुई जाओ। 4 बिरीया रे पुरुस रा पुत्र सोपत्रुस कने थिस्सलुनीकियां च ते अरिस्तरखुस कने सिकुन्दुस, कने दिरबे रा गयुस, कने तीमुथियुस, कने आसिया रा तुखिकुस कने त्रुफिमस आसिया तका तिसने सौगी आये। 5 सै अगो जाई ने त्रोआसा च अहां जो नयाळणे लगे। 6 कने अहें

बिना मलेड़े री रोटिया रे दिनां ते बाद फिलिप्पीयां ते जहाजा परा चढी ने पंज्रां दिना च त्रोआसा च तिन्हां ला पुज्जे, कने सत्तां दिनां तका तेथी रहे।

त्रोआसा च यूतुखुस रा जिन्दा कित्या जाणा

7 हफते रे पैहले दिन तां जे अहें रोटी तोड़णे खातर कट्टे हुये, तां पौलुसे तिस जे दुज्जे दिन चली जाणा था, तिन्हां ने गल्लां कितियां; कने अधिया राती तका गल्लां करदा रेह्या। 8 तिस बरांडे जे अहें कट्टे हुई रे थे तिस च मते दीऊये बलया रां थे। 9 कने यूतुखुस नौवा रा इक जवाब दुआरिया च बैठीरा गैहरिया नींदा ने झुकया रां था। तां जे पौलुस मत्तिया देरा तका गल्लां करदा रेह्या तां सै नींदा रे झोखे च तिञ्जिया मंजला ते पई गया, कने मरिरा चकया। 10 पर पौलुसे उतरी ने तिसने गल्ले लगया, कने गल्ले लगाई ने बोलया, “मता घबरांदे; कांभई इसरा प्राण इस च ई आ।” 11 कने उपर जाई ने रोटी तोड़ी होर खाई ने इतनिया देरा तका गल्लां करदा रेया भई भ्याग हुणे लगी गया। फेरी सै चली गया। 12 कने सै तिस जवाना जो ज्युंदे ली आये कने बौहत शान्ति पाई।

त्रोआस ते मिलेतुस री यात्रा

13 अहें पैहले ई जहाजा पर कोहई ने अस्सुसा जो येदा सोची ने अगो गे भई तेथी ते अहां जो पौलुसा जो कुवाई लेणा, कांभई तिने ये इस खातर रखी रा था भई तिस अप्पु पैदल जाणा था। 14 तां जे सै अस्सुसा च अहां मिलणा तां अहें तिस्सो कुवाई ने मितुलेने च आये। 15 तेथी ते जहाजा खोली ने अहें दुजे दिन खियुस रे सामणे पुज्जे, कने अगले दिन सामुस च पुज्जी गे; फेरी दुजे दिन मिलेतुस च आये। 16 कांभई पौलुसे इफिसुसा रे नेडे चीयें जाणे रा फैसला कित्या था भई किन्ती येदा नी हो भई तिस्सो आसिया च देर लगे; कांभई सै छोड़ा च था भई जे हुई सको तां पिन्तेकुस्ता रे रोज यरुशलैमा च रहो।

इफिसुस रे बजुर्गा जो उपदेश

17 मिलेतुसा ते इफिसुसा जो बोली ने भेजया, भई कलीसिया रे प्राचीनां जो सद्दो। 18 तां जे सै तिसला आये, तां तिन्हां ने बोलया : “तुहें जाणां ये भई पैहले ई दिना ते तां जे हऊँ आसिया च पुज्जेया, हऊँ हर वक्ता तुहां सौगी कियां-कियां रेहया- 19 मतलब बड्डिया दीनता ने, कने आँसु बहाई-बहाई ने, कने तिन्हां परीक्षां च सै जे यहूदियां रिया साजिशा रिया वजह ते मेरे परा पईयां, हऊँ प्रभुये री सेवा करदा ई रेया; 20 कने सै-सै गल्लां जे तुहां रे फायदे रियां थीयां, तिन्हां जो दसणे कने लोकां रे सामणे कने घरे-घरे सखाणे च कदी मनी झिझकया, 21 पर यहूदियां कने यूनानियां रे सामणे गवाई देदा रेया भई परमेशरा खा मन फिरावा कने अहां रे प्रभु यीशु मसीह पर विस्वास करना चाहिंदा। 22 हुण देखो हऊँ आत्मा ते बड्डिरा यरुशलैमा जो जावा कने हऊँ नी जाणदा भई तेथी मेरे सौगी क्या-क्या हुंगा; 23 सिर्फ येदा जाणां आ भई पवित्र आत्मा हर नगरा-नगरा च गवाई देई ने मेरेने बोलया रां भई बन्धन कने क्लेश तेरे खातर तैयार ये। 24 पर हऊँ अपने प्राणां जो बी किछ बी नी समझदा भई तिस्सो प्यारा जाणु, पर येदा भई हऊँ अपणी दौड़ा जो कने तिसा सेवा जो पूरी करूँ, सै जे परमेशरा रे अनुग्रह ते सुसमाचारा री गवाई देणे खातर प्रभु यीशुये ते मिली री। 25 हुण देखो, हऊँ जाणां भई तुहें सब तिन्हां च जे हऊँ परमेशरा रे राजा रा प्रचार करदा फिरया, मेरा मूह फेरी नी देखणे। 26 इस खातर हऊँ अजो-आज तुहां ने गवाई देई ने बोलां, भई हऊँ सबी रे खुना ते नदोष आ। 27 कांभई हऊँ परमेशरा रियां सारियां गल्लां जो तुहां पूरिया रितिया ते दसणे जो कदी मनी झिझकया। 28 इस खातर अपणी कने पूरे झुण्डा री रखवाली करां तिस च जे पवित्र आत्मा ते अध्यक्ष बणाई रा, भई तुहें परमेशरा री कलीसिया री रखवाली करो, तिस्सो जे तिने अपने खुना ते मूल लई रा। 29 हऊँ जाणां भई मेरे जाणे ते बाद फाड़णे ओळ्हे भेडियां तुहां च ओणां तिस जे झुण्डा जो नी छड्णा। 30 तुहां रे ई च ते भी येद्वे-येद्वे माह्लु उठणे, तिन्हां जे चेलैयां जो अप्पु खा खींजणे खातर गलत फलत गल्लां करनियां। 31 इस खातर जागदे रह्ना, कने याद करा भई मैं तिन्हां सालां तका रात-दिन रोई-रोई ने हरिक जो चेतावनी देणा नी छड्या। 32 कने हुण हऊँ परमेशरा जो, कने तिसरे अनुग्रह रे वचना जो तुहां जो देई देदा; सै जे तुहां री

तरक़ी करी सकां कने सब पवित्र किती रे लोकां च कड़ी मीरास दई सकां आ। 33 मैं किसी जो चाँदी, सोने या कपड़े रा लालच नी कित्या। 34 तुहें अप्पु जाणां ये भई इन्हें इत्थं मेरी कने मेरे साथियां री जरूरतां पूरियां कित्तियां। 35 मैं तुहां जो सब किछ करी ने दस्सया भई इयां-इयां मेहनत करी ने निर्बलां जो संभालना कने प्रभु यीशुये रे वचन याद रखणे जरूरी ये, सैं जे तिने अप्पु ई बोली रा : 'लेणे ते देणा खरा आ।'।

36 येढा बोली ने तिने गोडे टेकी ने तिन्हां सर्बीं सौगी प्राथना किती। 37 तां सैं सब बौहत रोये कने पौलुसा रे गले लगी ने तिस्सो प्यार करने लगे। 38 सैं जादा जे इसा गल्ला ते दुःखी थे भई सैं जे तिने बोली री थी भई तुहां मेरा मुँह फेरी नी देखणा। तां तिन्हें तिस्सो जहाजा तका पजुवाया।

पौलुसा रा यरुशलम जो जाणा

21 तां जे अहें तिन्हां ते लग हुई ने जहाज खोलया, तां सीधे रस्ते ते कोसा च आये, कने दूजे रोज रुदूसा च कने तेथी ते पतरा च आये। 2 तेथी ते इक जहाज फिनीके जो जान्दा मिलया। कने अहें तिस परा चढ़ी ने तिस्सो खोली तया। 3 तां जे साइप्रस दूस्या, तां अहें तिस्सो खबिया खा छड़ी ने, कने सीरिया जो चली ने सूरा जो उतरे; कांभई तेथी जहाजा रा समान तुआरना था। 4 चेलोये ने मिली ने अहें तेथी सात दिन रहे। तिन्हें आत्मा रे सखाई रेयां पौलुसा ने बोलया भई यरुशलमेमा च पैर देखा रखदा। 5 तां जे सैं दिन पूरे हुई गे, तां अहें तेथी ते चली पे; कने जनानां कने बालकां समेत तिन्हें अहां जो नगरा ते बाहरा तका पुजुआया; कने अहें कनारे पर गोडे टेकी ने प्राथना किती, 6 तां इक्की दुजे ते विदा हुई ने, अहें तां जहाजा परा चढ़े कने सैं अपणे-अपणे घरां जो हटी गे।

7 तां जे अहें सुरा ते जल यात्रा पूरी करी ने पतूलीगईस च पुजे, कने भाईयां जो नमस्कार करी ने तिन्हां सौगी इक दिन रहे। 8 दुजे रोज अहें तेथी ते चली ने कैसरिया च आये, कने फिलिप्पुस सुसमाचार प्रचार करने औळे रे घरा च सैं जे सत्तां च ते इक था; जाई ने तेथी रहे। 9 तिस रियां चार कुआरियां कुडियां थियां सैं जे भविष्यवाणी करां थियां। 10 तां जे अहें तेथी मते दिन रई चुके, तां अम्बुस नाँवा रा इक भविष्यवक्ता यहूदिया ते आया। 11 तिने अहां ले नेडे आई ने पौलुसा रा परना लया, कने अपणे हत्था पैरां च बन्ही ने बोलया, "पवित्र आत्मा ये बोलां भई तिस माह्युये रा जे ये परना आ, तिस्सो यरुशलमेमा च यहूदियां इयां ई बनणा कने अन्यजातियां रे हत्था च देणा।" 12 तां जे अहें ये गल्लां सुणियां, तां अहें कने तेथी रे लोके तिसने विनती किती भई सैं यरुशलमेमा जो नी जाओ। 13 पर पौलुसे जवाब दित्या, "तुहें रोई-रोई ने मेरा दिल कै तोडया रां ये? हऊं बी तां यीशुये रे नाँवा खातर यरुशलमेमा च ना सिर्फ बनोणे पर मरने खातर बी तयार आ।" 14 तां जे सैं नी मन्या तां अहें येढा बोली ने चुप हुई गे, "प्रभुये री इच्छा पूरी हुई जाओ।"

15 इन्हां दिनां ते बाद अहें तयारी किती कने यरुशलमेमा जो चली पये। 16 कैसरिया ते भी किछ चले अहां सौगी गे कने अहें मनासोम नाँवा रे साइप्रस रे इक्की पुराणे चले रे घरों ली आये, भई अहें तेथी रुको।

पौलुसा री याकुबा ने भेंट

17 तां जे अहें यरुशलमेमा च पुजे, तां भाई बडिया खुशीया ने अहां ने मिले। 18 दुजे रोज पौलुस अहां जो लई ने याकुबा ला गया, तेथी जे सारे प्राचीन कहें थे। 19 तां तिने तिन्हां जो नमस्कार करी ने, जो-जो काम्म परमेशरे तिसरिया सेवा रे द्वारा अन्यजातियां च कितीरे थे, इक-इक करी ने सब दस्से। 20 तिन्हें ये सुणी ने परमेशरा री महिमा किती, फेरी तिसने बोलया, "हे भाई तु देखया रां भई यहूदियां च ते कई हजारें विस्वास कित्या; कने सब व्यवस्था खातर धुन लाई रे ये। 21 तिन्हां जो तेरे बारे च सखाई तरा भई ना अपणे बचेयां रा खतना करावा कने ना रिति-रिवाजां परा चला। 22 तां फेरी क्या कित्या जाओ? लोकां सुणना भई तु येथी आई रा। 23 इस खातर सैं जे अहें तेरने बोलांये, तेढा कर। अहा ले येथी चार माह्युये तिन्हें जे मन्नतां मन्त्री रियां। 24 तिन्हां जो सौगी नई ने अप्पु जो पवित्र कर; कने तिन्हां जो खर्चा दे भई सैं सिर मुंडुवाओ। तां सबी जो पता लगी जाणा भई सैं जे गल्लां तिन्हें तेरे बारे च दस्सी रियां, तिन्हां च किछ भी सच्चाई नीं पर तु अप्पु ई व्यवस्था जो

मन्त्री ने तिता रे मताबक चलां। 25 पर तिन्हां अन्जातियां रे बारे च तिन्हें जे विस्वास कित्तिरा, अहें ये फैसला करी ने लिखी भेजी रा भई सैं मुर्तियां रे सामणे बलि किती रे मासा ते, कने खुना ते कने गला घोटी रे मासा ते, कने व्यभिचारा ते बची रे रहो।" 26 तां पौलुसे तिन्हां माह्युआं जो लई ने, कने दुजे दिन तिन्हां सौगी पवित्र हुई ने मन्दरा च गया, कने तेथी दस्सी तया भई पवित्र हुणे रे दिन, मतलब कदुआं तका ये दिन पुरे हुणे, तदुआं तका तिन्हां च ते हरेका खातर चढ़ावा चढाणा।

मन्दरा च पौलुसा रा पकड़या जाणा

27 तां जे सैं सात दिन पूरे हुणे पर थे, तां आसिया रे यहूदियां पौलुसा जो मन्दरा च देखी ने सबी लोकां जो भडकाया, कने येढा रडाई ने तिस्सो पकड़ी लया, 28 "हे इस्राएलियो, मद्द करा; ये सैं माह्युआ, सैं जे लोकां रे, कने व्यवस्था रे, कने इसा जगहा रे बरोधा च हर जगहा सर्बीं लोकां जो सखावां, येथी तका भई यूनानियां जो बी मन्दरा च लयाई ने तिने इस जगहा जो अपवित्र कित्तिरा।" 29 तिने इसते पैहले इफिसुस वासी त्रुफिमसा जो तिसने सौगी नगरा च देखया था, सैं समझे थे भई पौलुस तिस्सो मन्दरा च लयाया। 30 तां सारे नगरा च हल्ला मची गया, कने लोक दौडी-दौडी ने कहे हुये कने पौलुसा जो पकड़ी ने मन्दरा ते बाहरा जो घसीटी ने ली आये, कने झट ई दरवाजे बन्द करी ते। 31 तां जे सैं तिस्सो मारी देवां चाह्लां थे, तां पलटना रे सरदारा जो समचार पुजेया भई सारे यरुशलमेमा च हल्ला मची रा। 32 तां सैं ताहलु ई सैनिकां कने सुबेदारां जो लई ने तिन्हां लौ थल्ले दौडी ने गये; कने तिन्हें पलटना रे सरदारां कने सैनिकां जो देखी ने पौलुसा जो मारना-कुटणा छड़ी तया। 33 तां पलटना रे सरदारे नेडे आई ने तिस्सो पकड़ी लया; कने दुई जंजीरां च बनणे रा हुक्म दई ने पुछणे लगया ये कुण आ कने इने क्या कित्तिरा?" 34 पर भीड़ा च ते कोई किछ कने कोई किछ गलांदे रहे। तां जे हल्ले रे मारे सैं ठीक ढंगा ने सच्चाई नी जाणी सकया, तां तिस्सो गडा च नेणे रा हुक्म दित्या। 35 तां जे सैं पैडियां परा पुजया, तां येढा हुआ भई भीड़ा रे दबाबा रिया वजह ते सैनिकां जो तिस्सो चक्की ने नेणे पया। 36 कांभई लोकां री भीड़ रडांदि तिसरे पिछे पई री थी, "इस्सो खत्म करी दवा।"

37 तां जे सैं पौलुसा जो गढां च लई ने जायें रां थे, तां तिने पलटना रे सरदारा ने बोलया, "क्या मिन्जो हुक्मा भई हऊं तेरने किछ बोलूं?" तिने बोलया, "क्या तु यूनानी भाषा जाणां? 38 क्या तु सैं ई मिस्त्री नीं आ, सैं जे इन्हां दिनां ते पैहले विद्रोही बणी ने, चार हजार कटारा औळ्यां लोकां जो जंगला च लई गया था?" 39 पौलुसे बोलया, "हऊं तां तरसुसा रा यहूदी माह्यु आ! किलकिया रे मन्ने-तन्ने नगरा रा रहणे औळा। हऊं तेरने विनती करां भई मिन्जो लोकां ने गल्लां करने दे।" 40 तां जे तिने हुक्म दित्या तां पौलुसे पैडियां पर खडी ने लोकां जो हत्था रा सहारा कित्या। तां जे सैं चुप हुई गे तां सैं इब्रानी भाषा च बोलणे लगया :

भीड़ा रे सामणे पौलुसा रा भाषण

22 "हे भाईयो कने पित्रो मेरा जवाब सुणा, सैं जे मांह हुण तुहां रे सामणे देणा।" 2 सैं ये सुणी ने भई इस अहां ने इब्रानी भाषा च गलाणा, होर बी चुप हुई गे। तां तिने बोलया : 3 "हऊं तां यहूदी माह्यु आ, सैं जे किलकिया रे तरसुसा च जम्मी रा; पर इस नगरा च गम्लीयेलार पैरां च बैठी ने पढेया, कने बापदादेयां री व्यवस्था जो खरिया रितिया पर सखाया गया; कने परमेशरा खातर येढी लगाई री थी, तेढी जे तुहां सबी जो आज लगी री। 4 मैं तां क्या आदमी क्या जनानां दुई जो बन्ही-बन्ही ने जेलखाने च पाई-पाई ने, इस पंथा जो येथी तका सताया भई तिन्हां जो मुराई भी दित्या। 5 इस गल्ला खातर महायाजक कने सब पुरनिये गवाह ये भई तिन्हां ते हऊं भाईयां रे नाँवा पर चिडियां लई ने दमिश्का जो जाया रां था, भई सैं जे तेथी हो तिन्हां जो बी सजा दुवाणे खातर बन्ही ने यरुशलमेमा जो लयाऊं।

अपणे मन बदलने रा बर्णन (प्रेरितों 9:1-19;26:12-18)

6 “तां जे हऊं चलदे-चलदे दमिशका रे नेडे पुज्या, तां येढा हुआ भई दपैहरा रे वक्ता इकदम इक बड्डी ज्योति आकाशा ते मेरे चऊं पासयां चमकी। 7 कने हऊं धरतिया पर पई गया कने येडी अवाज सुणी, ‘हे शाऊल, हे शाऊल, तु मिन्जो कै सताया रां?’ 8 मैं जवाब दित्या, ‘हे प्रभु, तु कुणा?’ तिने मेरने बोलया, ‘हऊं यीशु नासरी आ, तिस्सो जे तु सताया रां?’ 9 मेरे साथियें ज्योति चमकदी तां देखी, पर सैं जे मेरेने बोलया रां था तिसरी आवाज नी सुणी। 10 तां मैं बोलया, ‘हे प्रभु, हऊं क्या करूं?’ प्रभुये मेरने बोलया, ‘उठी ने दमिशका च जा, होर जो किछ तेरे करने खातर ठहराई रा तेथी तिज्जो सैं सब दस्सी तथा जाणा।’ 11 तां जे तिस ज्योतिया रे तेजा रे मारे मिन्जो किछ नी दुस्सया, तां मैं अपणे साथियां रे हाथां पकडी ने दमिशका जो आया।

12 “तां हनन्याह नौवा रा व्यवस्था रे मताबक इक भक्त माहू, सैं जे तेथी रेहणे औळियां सब यहूदियां च सुनाम था, मेरे ला आया, 13 कने खडे हुई ने मेरने बोलया, ‘हे भाई शाऊल, फेरी देखणे लग।’ तिस ई घडिया मेरियां आक्खीं खुली गईयां कने मैं तिस्सो देखया। 14 तां तिने बोलया, ‘अहां रे बाप दादेयां रे परमेशरे तिज्जो इस खातर ठहराई रा भई तु तिसरिया इच्छा जो जाणो, कने तिस धर्मिये जो देखो कने तिसरे मुँहा ते गल्लां सुणो। 15 कांभई तु तिसरिया खा ते सबी माहूआं रे सामणे तिन्हां गल्लां रा गवाह हुणा सैं जे तैं देखया कने सुणया। 16 हुण देर कै करया रां? उठ बपतिस्मा लें, कने तिसरा नौं लई ने अपणे पापां जो धोई ले।’

अन्यजातियां च प्रचार

17 “तां जे हऊं फेरी यरुशलेमा च आई ने मन्दरा च प्राथना करया रां था, तां बेसुध हुई गया, 18 कने तिस्सो देखया भई सैं मेरने बोलया रां, ‘छोडे करी ने यरुशलेमा ते झट निकली जा; कांभई तिन्हां मेरे बारे च तेरी गवाई नी मन्नाणी।’ 19 मैं बोलया, ‘हे प्रभु, सैं तां अप्पु जाणांये भई हऊं तेरे पर विस्वास करने औळियां जो जेलखाने च पान्दा कने जर्गे-जर्गे आराधनालया च कुटावां था। 20 तां जे तेरे गवाह स्तिफनुसा रा खुन बगया रां था तां हऊं बी तेथी खडी रांथा कने इसा गल्ला च सहमत था, कने तिस्सो मारने औळियां रे कपडेयां री रखवाली करया रां था।’ 21 तिन्हें मेरने बोलया, ‘चली जा : कांभई मांह तिज्जो अन्यजातियां ला दूरा-दूरा जो भेजणा।’

22 सैं इसा गल्ला तका तिसरी सुणदे रये तां बड्डिया अवाजा च रडाये, ‘येढे माहूये जो खत्म करो इसरा ज्यूदा रहणा ठीक नी आ।’ 23 तां जे सैं रडांदे कने कपडे सट्टे कने आकाशा च धूड्डे दुवांदे रये; 24 तां पलटना रे सरदार बोलया, ‘इस्सो गढा च लई जाओ, कने कोडे मारी ने पता लाओ, भई हऊं जाणूं भई लोक किस वजह ते इसरे विदरोहा च येढे रडाया रां ये।’ 25 तां जे तिने तिस्सो तसमेयां ने बन्देया तां पौलुसे तिस सुबेदारा जो सैं जे सौगी खडी रा था, बोलया, ‘क्या ये ठीक आ भई तुहें इक्की रोमी माहूये जो, कने सैं भी बिना दोष साबत हुये, कोडे मारो?’ 26 सुबेदारे ये सुणी ने पलटना रे सरदारा ला जाई ने बोलया, ‘तु ये क्या करेया रां? ये तां रोमी माहू आ।’ 27 तां पलटना रे सरदारे तिस ला आई ने बोलया, ‘मिन्जो दस्स क्या तु रोमी आ?’ तिने बोलया, ‘हाँ।’ 28 येढा सुणी ने पलटना रे सरदारे बोलया, ‘मैं तां रोमी हुणे रा पद मते पैसे दई ने लई रा।’ पौलुसे बोलया, ‘हऊं तां जन्मा ते ई रोमी आ।’ 29 तां सैं जे लोक परखणे लगे थे, सैं ताहू ई तिसला ते हटी गे; कने पलटना रा सरदार बी येढा जाणी ने भई ये रोमी आ कने मैं तिस्सो बन्ही रा डरी गया।

बड्डिया पंचैती रे सामणे पौलुस

30 दुजे दिन तिने असली गल्ला जाणने रिया इच्छा ते भई यहूदी तिस परा कैं दोष लाया रांये, तिसरे बन्धन खोल्ली ते; कने प्रधान याजकां होर सारी महासभा जो कड्डा हुणे रा हुकम दित्या, कने पौलुसा जो थल्ले नई ने तिन्हां रे सामणे खडा करी तथा।

23 पौलुसे महासभा खा नजरां गडाई ने देखया, ‘हे भाईयो, मैं अज्जा तका परमेशरा खातर पूरे सच्चे मना ने जीवन बिताई रा।’ 2 तां हन्हा महायाजके सैं जे तिसले खडी रे थे, तिन्हां जो तिसरे मुँहा पर थप्पड मारने रा हुकम दित्या। 3 तां पौलुसे तिसने बोलया, ‘हे चूना दित्तिरी कब्र, परमेशरा तिज्जो मारना तु व्यवस्था ते बाहर मिन्जो मारने रा हुकम देयां?’ 4 सैं जे नेडे खडी रे थे तिन्हें बोलया, ‘क्या तु परमेशरा रे महायाजका जो बुरा-भला बोलां आ?’ 5 पौलुसे बोलया, ‘हे भाईयो, हऊं नीं जाणदा था भई ये महायाजक आ; कांभई लिखिरा : ‘अपणे लोकां रे प्रधाना जो बुरा नी बोल।’

6 तां पौलुसे येढा जाणी ने भई इक दल सदूकियां रा कने दूज्जा फरीसियां रा, सभा च हाक पाई ने बोलया, ‘हे भाईयो, हऊं फरीसी कने फरीसियां रे वंशा रा आ, कने मेरा मकदमा मरीरेयां री आशा कने फेरी जमणे रे बारे च होया रां।’ 7 तां जे तिने ये गल्ल बोली तां फरीसियां कने सदूकियां च झगडा हुणे लगया; होर सभा च फूट पई गई। 8 कांभई सदूकी तां येढा बोलाये, भई ना फेरी ज्यूदा हुणा, ना स्वर्गदूत ना आत्मा ई; पर फरीसी इन्हां सबी जो मन्नां ये। 9 तां बडा हल्ला मचयां किछ शास्त्री सैं जे फरीसियां रे दला रे थे, उठी ने येढा बोली ने लडने लगे, ‘अहें इस माहूये च कोई बुराई नीं देखदे, जे कोई आत्मा या स्वर्गदूत तिसने बोलां तां फेरी क्या?’ 10 तां जे बौहत झगडा हुआ तां पलटना रे सरदारे इस डरा ते भई सैं पौलुसा रे टुकडे-टुकडे नी करी दो, पलटना जो हुकम दित्या भई तिस्सो तिन्हां च ते जबरदस्ती नकाली लओ, कने गढां च लई जाओ।

11 तिसा राती प्रभुये तिसले खडे हुई ने बोलया, ‘हे पौलुस, हिम्मत रख; कांभई तेडी जे तें यरुशलेमा च मेरी गवाई दित्ती, तेडी तिज्जो रोमा च बी गवाई देणी पौणी।’

पौलुसा रिया हत्या री चाल

12 तां जे दिन हुआ तां यहूदियें चाल खेल्ही कने कसम खादी भई तदुंआ तका जे पौलुसा जो मारी नीं देयो, तदुंआ तका जे खांगे या पींगे तां अहां पर फटकार पौणी। 13 तिने जे अप्पु चीयें ये कसम खादी थी, सैं चालीयां आदमियां ते जादा थे। 14 तिन्हें प्रधान याजकां कने पुरनियां ले जाई ने बोलया, ‘अहें ये ठाणी लरा भई तदुंआ तका जे अहां पौलुसा जो मारी नी देणा, तदुंआ तका जे अहें किछ चखणे बी तां अहां परा फटकार पौणी। 15 इस खातर हुण महासभा समेत पलटना रे सरदारा जो समझावा भई तिस्सो तुहां ला ली आओ, येढा मन्नी ने भई तुहां तिसरे बारे च होर बी ढंगा ने पडताल करना चाह्वाये; कने अहां तिसरे पुजणे ते पैहले ई तिस्सो मारने खातर तयार रहणा।’

16 पौलुसा रे भाणजे सुणया भई सैं तिस्सो मारने जोये, तां गढा च जाई ने पौलुसा जो दस्या। 17 पौलुसे सुबेदारां च ते इक्की जो अप्पु ला सट्टी ने बोलया, ‘इस जवाना जो पलटना रे सरदारा ला लई जाओ, ये तिसने किछ बोलणा चाह्वां आ।’ 18 इस खातर तिने तिस्सो पलटना रे सरदारा ला नई ने बोलया, ‘कैदी पौलुसे मिन्जो सट्टी ने विनती किती भई ये जवान पलटना रे सरदारा ने किछ बोलणा चाह्वां आ; इस्सो तिसला लई जाओ।’ 19 पलटना रे सरदारे तिसरा हाथ पकडी ने तिस्सो लग नई ने पुछया, ‘तु मेरने क्या बोलणा चाह्वां आ,’ 20 तिने बोलया, ‘यहूदियें साजस किती री भई तेरने विनती करो भई काब्र पौलुसा जो महासभा च लयाओ, मन्ना भई सैं होर बी ठीक ढंगा ने तिसरी जाँच करना चाह्वाये। 21 पर तिन्हां री देखां सुणदा कांभई तिन्हां च ते चाली आदमियें तिस्सो मारने खातर तयार ये, तिन्हें ये ठाणी लरा भई तदुंआ तका जे तिन्हां पौलुसा जो मारी नी देणा तदुंआ तका ना किछ खाणा ना पीणा। कने हुण सैं तयार ये कने तेरे वचना जो निहालया रां ये।’ 22 तां पलटना रे सरदार जवानां जो ये हुकम दई ने भेजी तथा, ‘किसी ने देखां बोलदा भई तैं मिन्जो ये गल्लां दस्सी रियां।’

पौलुसा जो फेलिक्सा ले भेजया जाणा

23 तां तिने दो सुबेदारां जो सट्टी ने बोलया, ‘दो सौ सैनिक, सत्तहर सवार, कने दो सौ भाले औळे, राति रे पैहले पैहरा ते बाद कैसरिया जो जाणे खातर तयार करी रखयो।’ 24 कने पौलुसा रिया सवारिया खातर घोडे तयार रखयो,

भई तिस्सो फेलिक्स हाकमा ला सई सलामत पुजुवाई ला।²⁵ तिन्हें येदी इक चिड्डी बी लिखी :

²⁶ “महामहिम् फेलिक्स हाकमा जो क्लौदियुस लूसियासा रा नमस्कार।
²⁷ इस माह्नुये जो यहूदिये पकड़ी ने मारना चाह्या, पर तां जे मैं जाणया भई सै रोमी आ तां पलटना लई ने तिस्सो छुडुवाई लया।²⁸ हऊं जानणा चाह्यां था भई सै किस वजह ते तिस परा दोष लाये रांये, इस खातर तिस्सो तिन्हां रिया महासभा च लई गया।²⁹ तां मैं जाणी लया भई सै अपणीया व्यवस्था रे बारे च तिस परा दोष लांवांये, पर मारी देणे खातर तिसच कोई दोष नी मिलदा।³⁰ तां जे मिन्जो पता लगया भई सै इस माह्नुये रिया घाता च लगीरे तां मैं ताहूं ई तिस्सो तेरेला भेजी तया; कने मुद्दईयां जो भी हुकम दई तया भई तेरे सामणे तिस परा इलजाम लाओ।”

³¹ इस खातर तेदा जे सैनिकां जो हुकम दित्तिरा था, तियां ई सै पौलुसा जो लई ने रातो-रात अन्तिपत्रिसा च आये।³² दुज्जे रोज सै सवारां जो तिसने सौगी जाणे खातर छड्डी ने अप्पु गढां च हटीं गे।³³ तिने कैसरिया पुज्जी ने हाकमा जो चिड्डी दित्ती; कने पौलुसा जो भी तिसरे सामणे खड़ा कित्या।³⁴ तिने चिड्डी पढी ने पुछ्या ये किस प्रान्ता रा?³⁵ कने तां जे पता लगया भई सै किलकिया रा आ तां तिसने बोलया, “ तां जे तेरे मुद्दईयां औणां तां हऊं तेरा मुक्कदमा सुणगा।” कने तिने तिस्सो हेरोदेसा रे किले च पैहरे च रखणे रा हुकम दित्या।

हाकिम फेलिक्सा रे सामणे पौलुस

24 पंजां रोजां ते बाद हन्ना महायाजके कई पुरनियां कने तिरतुलुस नाँवा रे किसी वकीला जो सौगी लई ने आया तिन्हें हाकिमा रे सामणे पौलुसा पर नालिस कित्ती।² तां जे सै सद्या गया तां तिरतुलुस तिस परा दोष लाई ने बोलणे लगया : “हे महामहिम फेलिक्स, तेरते अहां जो बड़ा कुशल हुआ; कने तेरे प्रबन्धा ते इसा जातिया रियां कई बुराईयां सुधरेयां रां ईयां।³ तिन्हां जो अहें हर जगहा कने हर ढंगा ने धन्यवादा सौगी मन्ना ये।⁴ पर इस खातर भई तिजो होर दुःख नी देणा चाहन्दे, हऊं तेरने विनती करां भई मेहरबानी करी ने अहां रियां इक दो गल्ला सुणी ले।⁵ कांभई अहें इस माह्नुये जो पद्रवी कने जगता रे सारेयां यहूदियां च बलवा करने औळा, कने नासरियां रे कुपन्था रा मुखिया देखया।⁶ तिने मन्दरा जो अशुद्ध करना चाह्या, पर अहें तिस्सो पकड़ी लया। (अहें तिस्सो अपणिया व्यवस्था रे मताबक दण्ड दित्या हुंदा; ⁷ पर पलटना रे सरदार लूसियासे तिस्सो जबरदस्ती अहां रे हत्था ते खोई लया, ⁸ कने मुद्दईयां जो तेरे सामणे औणे रा हुकम दित्या।) इन्हां सबी गल्लां जो तिन्हां रे बारे च जे अहें तिस परा दोष लगाये रांये, तु अप्पु ई तिस्सो जाँची ने जाणी लेणा।”⁹ यहूदिये भी तिसरा साथ दई ने बोलया, “ये गल्लां येदियां ई हईयां।

पौलुसा रा जबाब

¹⁰ तां जे हाकमे पौलुसा जो बोलणे रा सहारा कित्या तां तिने जवाब दित्या : “हऊं ये जाणी ने भई तू बौहती सालां ते इसा जातिया रा न्याय करया रां, खुशिया ने अपणा जवाब देयां आ।¹¹ तु अप्पु जाणी सकां भई तदुआ ते जे हऊं यरुशलेमा च आराधना करने जो आया, मिन्जो बाहरां दिनां ते जादा नी हुये।¹² तिन्हें मिन्जो ना मन्दरा च ना आराधनालया च, ना नगरा च किसी ने बी बेहस करदे या भीड़ लांदे पाया; ¹³ होर ना तां सै इन्हां गल्लां जो, तिन्हां रा जे हुण मेरे परा दोष लाया रां ये, तेरे सामणे सच साबित करी सकां ये।¹⁴ पर मैं तेरे सामणे ये मन्त्री लया भई तिस पन्था जो जे ये कुपन्थ बोलांये, तिसा रितियां पर हऊं अपणे बाप दादेयां रे परमेशरा री सेवा करया रां; कने सै जे गल्लां व्यवस्था कने भविष्यवक्ता री कताबां च लिखी रियां, तिन्हां सबीं पर विस्वास करां।¹⁵ कने परमेशरा ते आशा रखां तेदी जे ये अप्पु बी रखांये, भई धर्मी कने अधर्मी दुई जो जी उठणे पौणा।¹⁶ इस खातर हऊं अप्पु भी कोशिश करया रां भई परमेशरा खा, कने माह्नुआ खा मेरा मन सदा निर्दोष रहो।¹⁷ बौहत साल बीतणे ते बाद अपणेयां लोकां जो दान पुजुआणे, कने भेंट चढाणे आया था।¹⁸ तिन्हें मिन्जो मन्दरा च, पवित्र दशा च, बिना भीड़ा ते, कने बिना दंगा करदे हुये भेंट चढांदे पाया - हां, आसिया रे कई यहूदी थे -

तिन्हां जो जरूरी था ¹⁹ भई जे मेरे वरोधा च तिन्हा ले कोई गल्ल हो तां येथी तेरे सामणे आई ने मेरे पर लगांदे।²⁰ या ये अप्पु ई दस्सो भई तां जे हऊं महासभा रे सामणे खडी रा था, तां इन्ं मेरे च कुण जेया अपराध पाया?²¹ इसा इक्की गल्ला जो छड्डी ने सै जे मैं इन्हां रे बिच खडे हुई ने बोली थी : “मूर्इरेयां च ते जी उठणे रे बारे च आज्ज मेरा तुहां रे सामणे मुक्दमा होया रां।”²² फेलिक्से सै जे इस पन्था रियां गल्लां ठीक-ठीक जाणां था, तिन्हां जो येदा बोली ने टाळीत्या, “तां जे पलटना रे सरदारा लूसियासा औणा, तां तुहां रियां गल्लां रा फैसला करगा।”²³ कने सुबेदारा जो हुकम दित्या भई पौलुसा जो किछ छूट रखी ने रखवाळी करा, कने तिसरे मित्रां च ते किसी जो बी तिसरी सेवा करने ते देहां रोकदे।

फेलिक्स कने दुसिला रे सामणे पौलुस

²⁴ किछ दिनां ते बाद फेलिक्स अपणी पत्निया दुसिला जो, सै जे यहूदिनी थी, सौगी लई ने आया कने पौलुसा जो सद्दी ने तिस विस्वासा रे बारे च सै जे मसीह यीशुये पर आ, तिसते सुणया।²⁵ तां जे सै धर्म, कने संयम, कने औणे औळे न्याय रे बारे च सै जे चर्चा करया रां था, तां फेलिक्से डरा रे मारे जवाब दित्या, “हुण तू जा; मौका देखी ने हऊं तिजो फेरी सदया।”²⁶ तिस्सो पौलुसा ते किछ पैसे मिलणे री भी आश थी, इस खातर सै होर बी तिस्सो सद्दी-सद्दी ने तिसने गल्लां करां था।²⁷ पर तां जे दो साल बितीगे तां पुसकियुस फैस्तुस, फेलिक्सा रिया जगहा पर आया; कने फेलिक्स यहूदियां जो खुश करने खातर पौलुसा जो कैदी रणी तया।

पौलुसा रा सम्राटा री दुहाई देणा

25 फेस्तुस तिस प्रान्ता च पुजणे ते तीनां दिनां बाद कैसरिया ते यरुशलेमा जो गया।² तां प्रधान याजके कने यहूदियां रे प्रमुख लोकें तिसरे सामणे पौलुसा री नालिश कित्ती; ³ कने तिसने विनती करी ने तिसरे बरोधा च ये वर मंगया भई सै तिस्सो यरुशलेमा च सद्दी, कांभई सै तिस्सो रस्ते च ई मारने खातर घाता च लगी रे थे।⁴ फेस्तुसे जवाब दित्या, “पौलुस कैसरिया च पैहरे चा, कने मांह अप्पु ई छोडे ई तेथी जो जाणा।”⁵ फेरी बोलया, “तुहां च ते तिस्सो जे अधिकार आ सै सौगी चलो, कने जे इने माह्नुये किछ गलत काम्म कित्तीरा तां तिस परा दोष लगावा।”⁶ तिन्हां रे बिच कोई आठ-दास्स रोज रई ने सै कैसरिया जो चली गया; कने दुज्जे रोज न्याय आसना पर बैठी ने पौलुसा जो लयाऊणे रा हुकम दित्या।⁷ तां जे सै आया तां सै जे यहूदी यरुशलेमा ते आई रे थे, तिन्हें नेडे खडे हुई ने मत्ते सारे इलजाम लगाये, तिन्हां रा जे सै सबूत नी दई सकदे थे।⁸ पर पौलुसे जवाब दित्या, “मैं नां तां यहूदियां री व्यवस्था कने ना मन्दरा रे कने ना ई कैसरा रे बरोधा च कोई अपराध कित्तिरा।”⁹ तां फेस्तुस यहूदियां जो खुश करने रिया इच्छा ते पौलुसा जो बोलया, “क्या तु चाह्यां भई यरुशलेमा जो जाओ; कने तेथी मेरे सामणे तेरा ये मक्कदमा लडेया जाओ?”¹⁰ पौलुसे बोलया, “हऊं कैसरा रे न्याय आसना रे सामणे खडि़रा; मेरे मक्कदमे रा येथी ई फैसला हुणा चाहिंदा। तेदा जे तू खरे ढंगा ने जाणां आ, यहूदियां रा मैं किछ अपराध नी कित्तिरा।¹¹ जे हऊं अपराधी आ कने मारी जाणे जोगा कोई काम्म कित्तीरा, तां मरने ते नी मुकरदा; पर तिन्हां गल्लां रा जे मेरे पर दोष लांवांये, जे तिन्हां च ते कोई भी गल्ल सच्च नी ठहरो, तां कोई भी मिन्जो इन्हां रे हाथा नीं दई सकदा। हऊं कैसरा री दोहाई दवां आ।”¹² तां फेस्तुस मन्त्रियाँ रियां सभा सौगी गल्लां करी ने जवाब दित्या, “तैं कैसरा री दुहाई दित्तिरी, तु कैसरा ला ई जाणा।”

राजा अग्रिप्पा रे सामणे पौलुस

¹³ किछ दिन बीतणे पर अग्रिप्पा राजा कने बिरनीके कैसरिया च आई ने फेस्तुसा ने मिले।¹⁴ तिन्हां रे बौहत दिन तेथी रैहणे ते बाद फेस्तुसे पौलुसा रे बारे च राजे जो दस्या : “इक माह्नु आ, तिस्सो जे फेलिक्स कैदी रखी गरा।¹⁵ तां जे हऊं यरुशलेमा च था, तां प्रधान याजके कने यहूदियां रे पुरनिये तिसरी नालिश कित्ती कने चाह्या भई तिस्सो दण्डा रा हुकम दित्या जाओ।¹⁶ पर मैं तिन्हां जो जवाब दित्या भई रोमियां री ये रिति नीं भई किसी माह्नुये

देणे खातर दई दईये, तदुंआ तका जे मुदालेह जो अपणे मुदईयां रे सामणे खडा हुई ने दोषा रा जवाब देणे रा मौका नी मिलो। 17 इस खातर तां जे सैं येथी कड्डे हुये, तां मैं किछ देर नीं किती, पर दुज्जे ई दिन न्याय आसणा पर बैठी ने तिस माळुये जो लयाऊणे रा हुकम दित्या। 18 तां जे तिसरे मुदई खडे हुये, तां तिने येदी गलत गल्लां रा दोष नीं लगाया, तेदा जे, हऊं समझां था। 19 पर सैं अपणे मता रे कने यीशु नौंवा रे किसी माळुये रे बारे च, सैं जे मरी गरा था कने पौलुस तिस्सो ज्युंदा दस्सां था, बैहस करां थे। 20 हऊं उलझना च था भई इन्हां गल्लां रा पता कियों लाऊं? इस खातर मैं तिसते पुछ्या, 'क्या तु यरुशलेमा जाणां तेथी इन्हां गल्लां रा फैसला हो?' 21 पर तां जे पौलुसे दुहाई दिती भई तिसरे मुकदमे रा फैसला महाराजाधिराजा ले हो, तां मैं हुकम दित्या भई तदुंआ तका जे तिस्सो कैसरा ला नी भेजूं, इस्सो हिरासता च रख्या जाओ।" 22 तां अग्रिप्पे फेस्तुसा ने बोलया, "हऊं भी तिस माळुये री सुणना चाह्वां।" तिने बोलया, "तू कल सुणी लेयां।"

23 इस खातर दुज्जे रोज अजे अग्रिप्पा कने बिरनीके बडिया धूमा-धामा ने आये कने पलटना रे सरदारों कने नगरा रे प्रमुख लोकां सौगी दरबारा च पुज्जे। तां फेस्तुसे हुकम दित्या भई सैं पौलुसा जो ली आओ। 24 फेस्तुसे बोलया, "हे राजा अग्रिप्पा, कने हे सब माळुओ सैं जे येथी अहां सौगी ये, तुहें इस माळुये जो देख्या रांये, तिसरे बारे च सबीं यहूदियें यरुशलेमा च कने येथी बी रडाई-रडाई ने मेरने विनती किती भई इसरा ज्युंदा रहणा ठीक नींआ। 25 पर मैं जाणी लया भई इने येदा किछ नीं कितीरा भई मारी तया जाओ; कने तां जे तिने अप्पु ई महाराजाधिराजा री दोहाई दिती, तां मैं इस्सो भेजणे रा फैसला कित्या। 26 मैं इसरे बारे च कोई पक्की गल नीं पाई भई अपणे स्वामिये ला लिखुं। इस खातर मैं इस्सो तुहां रे सामणे कने खास करी ने हे राजा अग्रिप्पा, तेरे सामणे लयाई रा भई जांचणे ते बाद मिन्जो किछ लिखणे जो मिलो। 27 कांभई कैदिये जो भेजणा कने सैं जे दोष तिस परा लगे, तिन्हां नीं दसणा मिन्जो बेकार जाणां।"

अग्रिप्पा रे सामणे पौलुसा री सफाई देणा

26 अग्रिप्पे पौलुसा ने बोलया, "तिज्जो अपणे बारे च बोलणे रा हुकम आ।" तां पौलुसे हत्था रा सहारा करी ने जवाब देणे लगया, 2 "हे राजा अग्रिप्पा तितनियों गल्लां रा जे यहूदी मेरे परा दोष लांवांये, आज्ज तेरे सामणे तिन्हां रा जवाब देणे ते हऊं अप्पु जो धन्य समझां, 3 खाश करी ने इस खातर भई तु यहूदियां रे सबीं व्यवहारां कने विवादां जो जाणां आ। इस खातर हऊं विनती करां, धीरजा ने मेरी सुण।

4 "मेरा चाल-चलन शुरू ते ई अपणी जातिया रे बीच कने यरुशलेमा च तेदा जे था, तिस्सो सब यहूदी जाणांये। 5 जे सैं गवाई देणा चाओ, तां शुरू ते मिन्जो पछ्याणांये भई हऊं फरीसी हुई ने अपणे धर्मा रे सबते खरे पन्था रे मताबक चलया। 6 कने हुण इसा प्रतिज्ञा रिया आशा रिया वजह ते सैं जे परमेशरे अहां रे बापदादेयां ने किती थी, मेरे पर मकदमा चलया रां। 7 तिसा प्रतिज्ञा रे पुरे हुणे री आशा लाईने, अहां रे बारह गोत्र अपणे सारे मना ते रात दिन परमेशरा री सेवा करदे आया रां ये। हे राजा, इसा ई आशा रे बारे च यहूदी मेरे परा दोष लांवांये। 8 तां जे परमेशर मूर्इरयां च ते ज्युंदा करां, तां तुहां ले ये गल्लां विस्वासा जोगी कैं नीं समझी जान्दियां?

9 मैं बी समझेया था भई यीशु नासरी रे नौंवा रे बरोधा च मिन्जो बौहत किछ करना चाहिंदा। 10 कने मैं यरुशलेमा च येदा ई कित्या; कने प्रधान याजकां ते अधिकार लई ने मते सारेयां पवित्र लोकां जो जेलखाने च पाया, कने सैं तां जे तिन्हां जो मारने खातर हूआं थे तां हऊं भी तिन्हां रे बरोधा च अपणी सहमति देवां था। 11 हर आराधनालय च हऊं तिन्हां जो ताड़ना लाई-लाई ने यीशुये री निन्दा करवावां था, येथी तका भई गुस्से रे मारे येदा पागल हुई गरा था भई बाहर ले नगरां च बी जाई-जाई ने तिन्हां जो सतावां था।

अपणे मन बदलने रा बर्णन

(प्रेरितों 9:1-19; 22:6-16)

12 "इसा ई धुना च तां जे मैं प्रधान याजकां ते अधिकार कने हुकम पत्र लई ने दमिशका जो जाया रां था; 13 तां हे राजा, रस्ते च दपैहरा रे वक्ता मैं आकाशा ते सुरजा रे तेजा ते बी बद्ही ने इक ज्योति, अपणे कने अपणे सौगी चलणे औळियां रे चऊं पासयां चमकदी देखी। 14 तां जे अहें सारे धरतिया पर पई गे, तां मैं इब्रानी भाषा च, मिन्जो येदा बोलदे इक आवाज सुणी, 'हे शाऊल, हे शाऊल, तू मिन्जो कैं सतावां? पैने हिस्से पर लात मारने पर तेरे खातर कठन आ।' 15 मैं बोलया, 'हे प्रभु, तु कुण आ?' प्रभुये बोलया, 'हऊं यीशु आ तिस्सो जे तु सताया रां। 16 पर तू उठ अपणे पैरां पर खडा हो कांभई मैं तिज्जो इस खातर दर्शन दित्या भई तिज्जो तिन्हां गल्लां रा भी सेवक कने गवाह बणाऊं, सैं जे तें देखी रियां, कने तिन्हां रा भी तिन्हां खातर जे हऊं तिज्जो दर्शन देवां आ। 17 कने मांह तिज्जो तेरे लोकां ते कने अन्जातियां ते बचांदे रहणा, तिन्हां ला जे हुण तिज्जो इस खातर भेजां आ 18 भई तु तिन्हां रियां आकर्षीं खोलो भई सैं नेहरे ते लोई खा, कने शैताना रे अधिकारा ते परमेशरा खा फिरो; भई पापां री माफी कने तिन्हां लोकां सौगी सैं जे मेरे पर विस्वास करने ते पवित्र हुई गरे, मीरास पाओ।'

अपणेयां कम्मां रा बर्णन

19 "इस खातर हे राजा अग्रिप्पा, मैं तिस स्वर्गीय दर्शना री गल्ल नीं टाली, 20 पर पैहले दमिशका रे, फेरी यरुशलेमा रे कने तां यहूदिया रे सारे देशां रे रहणे औळियां जो, कने अन्ज्यातियां जो समझांदा रेहा, भई मन फिरावा कने परमेशरा खा फिरी ने मन फिरावा जोगा काम्म करा। 21 इन्हां गल्लां रिया वजह ते यहूदी मिन्जो मन्दरा च पकडी ने मारी, देणे रा जतन करां थे। 22 पर परमेशरा री मद्दा ते हऊं अज्जा तका बची रा कने छोटे बड्डे सबी रे सामणे गवाई देवां आ, तिन्हां गल्लां जो छड्डी ने किछ नीं बोलदा सैं जे भविष्यवक्तावां कने मूसे भी बोलया भई हुणे औळियां ईयां, 23 भई मसीह जो दुःख चकणे पौणा, कने तिस ई सबी ते पैहले मूर्इरयां च ते ज्युंदा हुई ने, अहां लोकां च कने अन्ज्यातियां च ज्योतिया रा प्रचार करना।"

24 तां जे सैं इसा रीतिया ते जवाब देया रां था, तां फेस्तुसे उच्चिया अवाजा च बोलया, "हे पौलुस, तू पागल आ। बौहती विध्या ते तू पागल हुई गरा।" 25 पर पौलुसे बोलया, "हे महामहीम फेस्तुसे हऊं पागल नींआ, पर सच्चाई कने बुध्दिया रियां गल्लां बोलां आ। 26 राजा भी हऊं तिसरे सामणे जे हऊं निडर हुई ने बोलया रां, ये गल्लां जाणां आ; कने मिन्जो विस्वास आ भई इन्हां गल्लां च ते कोई भी इसते छीपी री नीं, कांभई ये घटना किसी कुणे च नीं हुई री। 27 हे राजा अग्रिप्पा क्या तु भविष्यवक्तावां रा विस्वास करां? हाँ, हऊं जाणां भई तू विस्वास करां।" 28 तां अग्रिप्पे पौलुसा ने बोलया, "तू थोडे ई समझाणे ते मिन्जो मसीह बनाणा चाह्वां?" 29 पौलुसे बोलया, "परमेशरा ने मेरी प्राथना ई भई क्या थोडे च क्या मते च, सिर्फ तू ई नीं पर तितने लोक जे आज्ज मेरी सुणया रांये इन्हां बन्धनां जो छड्डी ने सैं मेरे साई हुई जाओ।"

30 तां राजा कने हाकम कने बिरनीके कने तिसने सौगी बैठणे औळे; 31 थोडे परे जाई ने अप्पु चीयें बोलणे लगे, "ये माळु येदा किछ नीं करदा, सैं जे मरने रे दण्डा या जेला पाणे जोगा हो।" 32 अग्रिप्पे फेस्तुसा ने बोलया, "जे ये माळु कैसरा री दुहाई नीं देंदा, तां छुट्टी सकां था।"

पौलुसा री रोमा री यात्रा: क्रेते तक

27 तां जे पक्का हुई गया भई अहां जहाजा ते इटलिया जाणां, तां तिने पौलुस कने किछ होरीं कैदियां जो भी यूलियुस नौंवा रे औगस्तुसा रिया पलटना रे इक्की सुबेदारा रे हाथा दई तया। 2 अद्रमुतियुस रे इक्की जहाजा पर सैं जे आसिया रे कनारे रियां जगहां जो जाणे पर था, कोहई ने तिस्सो खोली लया, कने अरिस्तरखुस नौंवा रा थिस्सलुनिके रा इक मकिदुनी अहां ने सौगी था। 3 दुज्जे रोज अहें सैदा च जहाजा रा लगर सटया, कने यूलियुसे पौलुसा पर दया करी ने तिस्सो दोस्तां ला जाणे दित्या भई सैं तिसरा सतकार करी सको। 4 तेथी ते जहाजा जो खोली ने बरोधा री हवा

हुणे रिया वजह ते अहें साइप्रसा रे आडे-आडे हुई ने चले; 5 कने किलकिया कने पंफुलिया रे नेडे रे समुद्रा च ते हुई ने लुसिया रे मूरा च उतरे। 6 तेथी सुबेदारा जो सिकन्दरिया रा इक जहाज इटलिया जान्दा मिलया, कने तिने अहां जो तिस परा कुवाई तया। 7 तां जे अहें बौहतीं दिनां तका मठेयां-मठेयां चली ने मुश्कला ते कनिदुस रे सामणे पुज्जे, तां इस खातर भई हवा अहां जो अग्रे नीं बदणे देंदी थी, अहें सलमोना रे सामणे चीयें हुई ने क्रेते री आड लई ने चले; 8 कने तिसरे कनारे-कनारे मुश्कला ते चली ने 'शुभलंगरबारी' नौवा रिया जगहा पुज्जे, तेथी ते लसया नेडे था।

9 तां जे बौहत दिन बिच्ची गे कने जल यात्रा च जोखम इस खातर हुआ था भई वरता रे दिहाडे हुणे बौहत बिच्ची चुकी रे थे। इस खातर पौलुसे तिन्हां येदा बोली ने समझाया, 10 "हे सज्जनों, मिन्जो येदा जाह्नां भई इसा यात्रा च विपत्ति कने मता नुक्सान, ना सिर्फ समाना रा कने जहाजा रा पर अहां रे प्राणा रा भी हुणे ओळा आ," 11 पर सुबेदारे पौलुसा रिया गल्लां ते कसान कने जहाजा रे मालका रियां गल्लां जो बदही ने मन्नया। 12 सैं बन्दरगाह जाड़ा कटणे खातर खरा नीं था, इस खातर मत्तेयां रा बचार हुआ भई येथी ते जहाजा जो खोली ने जे किसी रितिया हुई सको तां फिनिकसा पुज्जी ने जाड़ा कट्टिये। ये तां क्रेते रा इक बन्दरगाह हया सैं जे दखण-पश्चिम कने उत्तर-पश्चिमा खा खुलां आ।

समुद्रा च तूफान

13 तां जे थोड़ी-थोड़ी दखणा री हवा बगणे लगी, तां ये समझी ने भई अहां रा मतलब पूरा हुई गया, लंगर चकया कने कनारा दबी ने क्रेते रे बखा ते जाणे लगे। 14 पर थोड़िया देरा च जमीना खा ते इक बड्डी नेहरी आई, तिस्सो जे 'युरकलीन' बोलाये। 15 तां जे नेहरी जहाजा परा लगी तां सैं तिसरे सामणे टिकी नीं सकया, इस खातर अहें बगणे दित्या कने इयां ई बगदे-बगदे चली गे। 16 तां कौदा नौवा रे इक्की छोटे जे टापुये रिया आडा च बगदे-बगदे अहें मुश्कला ते डोंगिया जो वशा च करी सके। 17 फेरी मल्लाहे तिसा जो चक्की ने मत्तेयां कोशियां ते जहाजा जो थल्ले ते बन्या, कने सुरतिसा रे चोर बालुये परा टिकी जाणे रे डरा ते पाल कने समान तुआरी ने बैहदें ई चली गे। 18 तां जे अहें नेहरिया ते मते हिचकोले कने धक्के खादे, तां दुज्जे दिन सैं जहाजा रा समान सटणे लगे; 19 कने तिजे दिन तिन्हें अपणे हत्था ते जहाजा रा साज समान भी सट्टी तया। 20 तां जे बौहती दिनां तका ना सुरज, ना तारे दुस्से कने बडी नेहरी चलदी रई, तां आखरा च अहां रे बचणे री आशा जान्दी रई।

21 तां जे सैं बौहती दिनां तका भूखे रई चुके तां पौलुसे तिन्हां रे बीच खडे हुई ने बोलया, "हे लोको, चईदा था भई तुहें मेरी गल्ल मन्नी ने क्रेते च ते ना जहाजा जो खोलदे कने ना संकट आँदा कने ना ये नुक्सान हुन्दा। 22 पर हुणे तुहां जो समझावां भई हिम्मत रखा, कांभई तुहां च ते भी किसी रे प्राणा रा नुक्सान नीं हुणा, पर सिर्फ जहाजा रा हुणा। 23 कांभई परमेशर तिसरा जे हऊं आ, कने तिसरी सेवा करां, तिसरे स्वर्गदूते आज राती मेरे ला आई ने बोलया, 24 "हे पौलुस, मत डर! तिज्जो कैसरा रे सामणे खड़ा हुणा जरूरी आ, देख, परमेशर सबी जो सैं जे तेरे सौगी सफर करया रां ये, तिज्जो दई तरा।" 25 इस खातर, हे सज्जनों, हिम्मत रखा; कांभई हऊं परमेशरा रा विस्वास करां, भई तेदा जे तिने मेरने बोलिआ तेदा ई हुणा। 26 पर अहां जो किसी टापुये पर जाई ने टिकणे पौणा।"

जहाजा रा टुटणा

27 तां जे चौहदवीं रात आई, कने अहें अद्रिया समुद्रा च भटकदे फिरया रां थे, अधिया राती रे नेडे तां मल्लाहें ये अनुमान ने जाणया भई अहें किसी देशा रे नेडे पुजया रां ये। 28 थाह लेणे पर तिने बीह पुरसा गेहरा पाया, कने थोड़ा अग्रे बदही ने फेरी थाह लई तां पनद्रह पुरसा पाया। 29 तां जे पत्थरां औळियां जगहं ते बचणे रे डरा ते तिन्हें जहाजा री पछाडिया खा चार लंगर सट्टे, कने सबेर हुणे री नयालप करदे रये। 30 पर तां जे मल्लाह जहाजा परा ते नठणे चाह्नां थे, तां गलहिया ते लंगर सटणे रे बहाने डोंगी समुद्रा च तुआरी ती; 31 तां पौलुसे सुबेदार कने सैनिकां ने बोलया, "जे ये जहाजा पर नीं रहे तां तुहें भी नीं बची सकदे।" 32 तां सैनिकें रस्सी कट्टी ने डोंगी सट्टी ती।

33 तां जे सवेर हुई तां, पौलुसे ये बोली ने, सबीं जो रोटी खाणे खातर समझाया, "आज चौदा रोज हुये भई तुहें आश न्हालदे-न्हालदे भूखे रये कने किछ रोटी नीं खादी। 34 इस खातर तुहां जो समझावां भई रोटी खाई लवा, तिसते जे तुहां रा बचाव हुई सको; कांभई तुहां च ते किसी रे सिरा रा इक बाल भी नीं पौणा।" 35 येदा बोली ने तिने रोटी लई ने सबी रे सामणे परमेशरा रा धन्वाद कित्या कने तोडी ने खाणे लगया। 36 तां सैं सब हिम्मत बन्ही ने रोटी खाणे लगे। 37 अहें सब मिली ने जहाजा पर दो सौ छियतर आदमी थे। 38 तां जे सैं रोटी खाई ने रझी गे, तां कणकां जो समुद्रा च सट्टी ने जहाजा जो हल्का करने लगे।

39 तां जे दिन निकलया तां तिन्हें तिस देशा जो नीं पछयाणेया, पर इक खाड़ी देखी तिसरा कनारा चौरस था, कने बचार कित्या भई जे हुई सको तां इस पर जहाजा जो टकाईये। 40 तां जे तिन्हें लंगरा जो खोली ने समुद्रा च छड्डी तया कने तिस बगत पतवारां रे बन्धन खोली ते, कने हवा रे सामणे रा अगला पाल चढ़ाई ने कनारे खा चले। 41 पर दुई समुद्रां रे संगमा रिया जगहा जो पकडी ने तिने जहाजा जो टकाया, कने गलही तां धक्का खाई ने पई गई कने टली नीं सकी; पर पछाडी लैंहरां रे बल्ला ते टुटणे लगी। 42 तां सैनिकां रा ये बचार हुआ भई कैदियां जो मारी दो, येदा नीं हो भई कोई तैरी ने नटी जाओ। 43 पर सुबेदारे पौलुसा जो बचाणे रिया इच्छा ते तिन्हां इस बचारा ते रोकया कने ये बोलया, भई सैं जे तैरी सकांये, पैहले छाल मारी ने कनारे पे निकली जाओ; 44 कने बाकी कोई पटडेयां परा कने कोई जहाजा री होरीं चिजां रे सहारे निकाली जाओ। इसा रितिया ते सब जमीना परा बची ने निकलो।

माल्टा दवीपा च पौलुस

28 तां जे अहें बचीगे, तां पता लगया भई ये माल्टा दीप आ। 2 येथी रे नवासियें अहां परा नोखी दया किन्ती; कांभई बरखा बरसणे ते ठण्ड थी, इस खातर तिन्हें आग बाली ने अहां सबीं जो सकाया। 3 तां जे पौलुसे लकडियां रा आंगडु कट्टा करी ने अग्गी पर रखया, तां इक सप्प सैका ते निकलया कने तिसरे हाथा च लपेठि गया। 4 तां जे तिन्हें नवासियें सप्पा जो तिसरे हत्था ने लटकई रा देखया, तां अप्पु चीयें बोलया, "सच मुच ये माळू हत्यारा आ भई समुद्रा ते तां बची गया, तां बी न्याये ते ज्युंदा रहणे नीं दित्या।" 5 तां तिने सप्पा जो अग्गी च झड़की तया, कने तिस्सो किछ नुक्सान नीं पुज्जया। 6 पर सैं न्हालदे रहे भई तिस सुजणा या इक दम पई ने मरी जाणा, पर तां जे सैं मतिया देरा तका देखदे रहे कने देखया भई तिसरा किछ नुक्सान नीं बिगडेया, तां अपणा बचार बदली ने बोलया, "ये तां कोई देवता।"

7 तिसा जगहा रे नेडे तेडे तिस टापुये रे प्रधान पुबलियुस री जमीन थी। तिने अहां अपणे घरा नई ने तिन्हां दिनां तका दोस्तां साईं आओ-बैठ किन्ती। 8 पुबालियुसा रा पिता बुखारा कने खुन बगणे रा रोगी था। इस खातर पौलुसे तिस ला घरा च जाई ने प्राथना किन्ती कने तिस परा हाथ रखी ने तिस्सो ठीक करी तया। 9 तां जे येदा हुआ तां तिस टापुये रे बाकी बमार आये कने चंगे हुई ने गे। 10 तिन्हें अहां रा बौहत आदर कित्या, कने तां जे अहें चलणे लगे तां जो किछ अहां खातर जरूरी था, जहाजा पर रखी तया।

माल्टा दवीपा ते रोमा रिया तरफा

11 तिन्नां महीनेयां बाद अहें सिकन्दरिया रे इक्की जहाजा पर बैठी ने चले सैं जे तिस टापुये पर सारियां ठन्ठी रई रा था, कने तिसरा नशाण दियुसकुरी था। 12 सुरकुसा च लंगर सट्टी ने अहें तिन्नां दिनां तका टिकी रे थे। 13 तेथी ते अहें घूमूनी ने रेगियुमा च आये; कने इक्की दिना ते बाद दखणा री हवा चली, तां अहें दुज्जे रोज पुतियुली च आये। 14 तेथी अहां जो भाई मिले, कने तिन्हां रे कैहणे ते अहें तिन्हां ले सत्तां रोजां तका रहे; कने इयां-इयां अहें रोमा जो चले। 15 तेथी ते भाई अहां रा समाचार सुणी ने अपियुस रे चौका कने तिन्न सराये तका अहां ने भेंट करने जो आये, तिन्हां देखी ने पौलुसे परमेशरा रा धन्ववाद कित्या कने हिम्मत बन्ही।

16 तां जे अहें रोमा च पुजे तां पौलुसा जो इक्की सैनिका सौंगी सैं जे तिसरी रखवाली करां था, कल्ले रैहणे रा हुक्म मिली गया।

रोमा च पौलुस

17 तिन्नां दिनां ते बाद तिने यहूदियां रे प्रमुख लोकां जो सद्या, कने तां जे सैं कट्टे हुये तां तिन्हां ने बोलया, "हे भाईयो मैं अपणे लोकां रे या बापदादेयां रे व्यवहारा रे बरोधा च किछ भी नी कित्या तां बी कैदी बणी ने यरुशलेमा ते रोमियां रे हत्था दित्या गया। 18 तिन्हें मिन्जो परखी ने छड्डी देणा चाह्या कांभई मेरे च मरने रे दण्डा जोगा कोई दोष नी था। 19 पर तां जे यहूदी इसरे बरोधा च बोलणे लगे, तां मिन्जो कैसरा री दुहाई देणी पई : इस खातर नी भई मांह अपणे लोकां पर कोई दोष लाणा था। 20 इस खातर मैं तुहां जो सदया भई तुहां ने मिलूं कने गल-बात करूं; कांभई इस्त्राएला री आशा खातर हऊं इस जंजीरा च जकड़ी रा।" 21 तिन्हें तिसने बोलया, "ना अहें तेरे बारे च यहूदियां ते चिड्डी पाईयां। कने ना भाईयां च ते किसी आई ने तेरे बारे च किछ दसया या बुरा बोलया। 22 पर तेरा विचार क्या? तिस्सो ई अहें तेरते सुणना चाह्यां ये, कांभई अहें जाणांयें भई हर जगहा इस मता रे बरोधा च लोक गल्लां करां ये।"

23 तां तिने तिस खातर इक दिन ठहराया, कने मते लोक तिसले कट्टे हुये, कने सैं परमेशरा रे राजा री गवाई देंदा हुआ। कने मुसा री व्यवस्था कने भविष्यवक्तावां री कताबां च ते यीशुये रे बारे च समझाई-समझाई ने सवेरे ते

संझा तका दसदा रेया। 24 तां किछ लोकें तिन्हां गल्लां जो मनी लया, कने कईयें लोकें विस्वास नीं कित्या। 25 तां जे सैं अप्पु चीयें इक मत नीं हुये, तां पौलुसा रिया इसा गल्ला रे बोलणे पर चली गे : पवित्र आत्मा ने यशायाह भविष्यवक्ता ते तुहां रे बापदादेयां ने ठीक ई बोलया,

26 जाई ने इन्हां लोकां ने बोल,
भई सुणदे तां रैहंगे, पर नीं समझगे,
कने देखदे तां रैहंगे, पर नीं बुझगे;
27 कांभई इन्हां लोकां रा मन मोटा
कने इन्हां रे कान भारी हुई गरे,
कने इने अपणियां आकर्षी बन्द किती रियां,
येढा नीं हो भई सैं कदी आकर्षी ते देखो
कने कनां ते सुणो कने मना ते समझो
कने फिरो, होर हऊं तिन्हां जो चंगा करूं।'

28 इस खातर तुहें जाणो भई परमेशरा रे इस उद्दारा री कथा अन्यजातियां ला भेजी गई री, कने तिन्हां सुणनी।" 29 तां जे तिने येढा बोलया तां यहूदी अप्पु चीयें बौहत बैहस करने लगे कने तेथी ते चली गे। 30 सैं पूरे दुई सालां तका कराये रे घरा च रेया, 31 कने सैं जे तिस ला आवां थे, तिन्हां सर्बीं ने मिलदा रेया कने बिना रोक टोक बौहत निडर हुई ने परमेशरा रे राजा रा प्रचार करदा कने प्रभु यीशु मसीह री गल्लां सखांदा रेया।

रोमियो

अभिवादन

1 पौलुसा रिया तरफा ते सैं जे यीशु मसीह रा सेबक आ, कने चेला होणे रे खातर सद्वया था, कने तिसजो जे परमेशरा रिया खुशखबरिया रा प्रचार करने खातर चुणया 2 तिसरी पैहले ते ई तिने अपणे भविष्यवक्त्यां रे जरिये पवित्र शास्त्रा च, 3 अपणे पुत्र अहारे प्रभु यीशु मसीह रे बारे च प्रतिज्ञा कित्तिरी थी; सैं जे माळुये रे रूपा च दाऊद रे बंशा ते पैदा हुया 4 कने पवित्र आत्मा रे जरिये मूर्ईरेआ च ते जिन्दा हुईने समरथया सौगी परमेशरा रा पुत्र ठैहरया। 5 इसरे तैई मिन्जो अनुग्रह कने चेला होणे रा गौरब मिलया भई तिसरे नौवा रिया वजह ने सारी जातियां रे लोक विश्वास करीने तिसरे हुक्मा जो मन्नो, 6 तिन्हां च ते तुहें लोक बी यीशु मसीह रे होणे खातर सद्दीरे। 7 तिन्हां सब्बीं रे नौ सैं जे रोम च परमेशरा रे प्यारे कने पवित्र होणे खातर सद्दीरे: अहारे पिता परमेशरा कने प्रभु यीशु मसीह रिया तरफा ते तुहांजो अनुग्रह कने शान्ति मिलदी रौ।

धन्यवादा री प्राथना

8 पैहले हऊं तुहां सबनीं रे खातर यीशु मसीह रे जरिये अपणे परमेशरा रा धन्यवाद करां, कांभई तुहारे विश्वासा री चर्चा सारे संसारा च हुई राई। 9 परमेशर तिसरी सेवा जे हऊं अपणिया आत्मां ते तिसरे पुत्रा री खुशखबरिया रे बारे च करां, सैई मेरा गवाह भई हऊं किया तुहांजो हमेशा याद करदा रुं, 10 कने हऊं अपणिया प्रार्थनां च सदा येई विनती करां भई परमेशरा रिया इच्छा ते, तुहां ले ओणे री मेरी ये यात्रा, कियां बी पूरी ओ। 11 कांभई मेरी बडी इच्छा ई भई हऊं तुहांने मिलीने तुहांजो किछ आत्मिक उपहार देऊं, तिसते जे तुहें मजबूत हुई सक्को; 12 यनि मिन्जो बोलणा चाहिन्दा भई ताहली जे हऊं तुहाले होऊं, तां अहें तिस विश्वासा रे जरिये सैं जे मांह च कने तुहां चा, इक्की दुजे ते प्रेरणा पाओ। 13 मेरे भाईयो, हऊं नीं चाहन्दा भई तुहें इसते अन्जाण रओ भई मैं तुहांले बार-बार औणा चाह्दा भई तेदा फल जे मिन्जो होरीं जातियां ते मिलया, तेदा ई फळ तुहांते बी पाऊं, पर हुण तक मुशकलां आऊन्दी ई रैईयां। 14 हऊं यूनानियां कने गैर-यूनानियां, समझदारां कने नासमझां, रा कर्जदार आ। 15 इस खातर हऊं तुहां रोम वासियां जो बी खुशखबरिया रा सन्देश सुनाणे जो त्यार आ।

खुशखबरिया री सामर्थ

16 हऊं खुशखबरिया ते नीं शर्मान्दा, कांभई सैं हरेक विश्वास करने औळे जो छुटकारे रे खातर परमेशरा री सामर्थ ई, फेरी चाहे पैहले सैं यहूदी ओ या फेरी यूनानी। 17 कांभई खुशखबरिया च ये दस्सीरा भई परमेशर माळुये जो अपणे प्रति सही कियां बणां; सैं शुरु ते लेईने अंत तक विस्वासा पर टिकीरा; तियां जे भई शास्त्रा च लिखीरा, "धर्मी माळु विस्वासा ते ज्युन्दा रैहणा।"

माळु जाति रा पाप

18 परमेशरा रा गुस्सा स्वर्गा ते तिन्हा सारे अविश्वासी कने पापी लोकां रे ऊपर भडकणा सैं जे सच्चाईया जो बुराईया ने दब्बी रखांये। 19 इस खातर भई परमेशरा रे बारे च सैं सारा किछ जाणां ये, कांभई परमेशरे तिन्हा पर परगट कित्तिरा। 20 कांभई तिसरे छिपीरे गुण यनिके अनन्त शक्ति कने परमेश्वरत्व, संसारा रिया रचना रे टैमा ते, तिसरयां कित्तिरयां कम्मां ते साफ-साफ दिखणे च औवां, इस खातर लोकां ले कोई बहाना नीं आ। 21 जबकि सैं

परमेशरा जो जाणां ये पर सैं तिस्सो परमेशरा रे रूपा च आदर या धन्यावाद नीं देन्दे, बल्कि सैं उट-पटांग सोचणे लगे कने तिन्हांरे नासमझ मन नेहरे ने भरीगरे। 22 सैं समझदार होणे रा दावा करीने मुख ई रैईये, 23 कने अविनाशी परमेशरा री महिमा, नाश हुणे औळे माळुआं, चिडियां, पशुआं कने सर्पां ने मिलदी जुलदी मूर्तियां बणाईने तिन्हांजो देईती।

24 इस खातर परमेशरे सैं मनां री बुरी इच्छां रे बशा च करीते; तिस रिया वजह ते जे सैं बुरयां कम्मां च पैईने इक्की-दूये रे शरीरां रा अनादर करने लगे। 25 कांभई तिन्हे झूठा सौगी परमेशरा रिया सच्चाईया रा सौदा कित्या कने तिन्हे सृष्टिया जो बनावणे औळे जो छड्डीने तिसरी बणाई री सृष्टिया री पूजा अर्चना कने सेवा कित्ती, पर तिस परमेशरा री सेवा नीं कित्ति तिने जे सारिया सृष्टिया री रचना कित्ति, कने सैं जे सदा खातर धन्य! आमीन।

26 इसा वजह ने परमेशरे तिन्हांजो बासनां रे बश करीत्या; येथी तक भई तिन्हां रियें जनानें अपणा सिधा-साधा स्वाभाव छड्डीने बासना रा बुरा स्वाभाव अपनाईल्या। 27 इस तरीके ने आदमियें जनानां सौगी अपणा स्वाभाविक संभोग छडीत्या कने सैं अप्पु चीयें बासना रिया अग्गी च जलणे लगे, कने आदमी आदमिये ने शर्मनाक काम्म करने लगे तिन्हांजो अपणे बैहमा रा ठीक फल मिलणे लगया।

28 कने कांभई तिन्हे परमेशरा जो पछ्याणने ते मना करीत्या, इस खातर परमेशरे सैं मूर्खां रे हत्था च सौंपीते, कने सैं येदे बुरे काम्म करने लगे सैं जे तिन्हांजो नीं करने चाहिन्दे थे। 29 इस खातर सैं कई तरह रे अधर्म, पाप, लालच, कने बैरभावा ने भरीये; सैं हिरख, खून करना, लडाई झगडे, छल-कपट कने बुरयां विचारां ने भरीये; कने दूज्यां रा सदा बुरा ई सोचया। सैं कहाणियां मद्दे रें, 30 सैं निन्दा करने औळे, कने परमेशरा ते नफरत करने औळे, दूज्यां रा अपमान करने औळे, बिगडीरे, घमण्डी, डींग मारने औळे, बुरा करने औळे कने माता-पिता रा हुक्म नीं मनणे औळे, 31 निहरे मूर्ख, विस्वास तोडने औळे, निर्दयी माळु हुईगरे। 32 सैं त परमेशरा री विधी जाणां ये सैं जे दस्सां ई भई सैं जे येदियां गल्लां करां ये, सैं मौता रिया सजा रे लायक ये, तां बी न सिर्फ सैं खुद इस तरीके रे काम्म करां ये, पर येदे काम्म करने औळया ते सैं बडे खुश हुआं ये।

परमेशरा रा न्याय

2 इस खातर दोष मढ़णे औळे मेरे मित्र, तू चाहे कोई बी ओ, तेरले कोई बहाना नीं आ; कांभई जिसा गल्ला खातर जे तू किसी जो दोषी बणां, तिसा गल्ला खातर तू अप्पू बी दोषी बणां, इस खातर जिन्हां कम्मां रा जे तू न्याय करां तिन्हां कम्मां जो तु खुद बी करां। 2 कने हुण अहें जाणां ये भई सैं लोक जे इस तरीके रे काम्म करां ये तिन्हांजो परमेशरा रिया तरफा ते सजा रा हुक्म आ। 3 कने ओ मेरे मित्र, क्या तू सोचां भई तिन्हां कम्मां खातर जे तू दूज्यां जो दोषी मन्ना कने अप्पू खुद सैई काम्म करां; तां क्या तैं ये समझया भई तू परमेशरा रिया सजा ते बची जाणा? 4 क्या तू तिस रिया किरपा जो, कने सहनशक्तिया, कने धैर्य रुपी दौलता जो घटिया जाणां? क्या तू ये नीं समझदा भई परमेशरा री किरपा तिजो पश्चाताप करना सखाई? 5 पर तू तिसरे गुस्से जो अपणे पत्थर दिल कने अडियल सभावा रिया वजह ने, तिस दिना रे खातर कड्डा करीरां तिस दिन जे परमेशरा रा सच्चा न्याय सामणे ओणा। 6 तिस हरेक माळुये जो तिन्हांरे कर्मां रे मुजब फल देणा: 7 सैं जे हर घडी खरा काम्म करदे हुये महिमा, आदर कने अमरता रिया खोजा च रैये, तिन्हांजो तिस इन्हारे बदले अनन्त जीवन देणा; 8 पर सैं लोक जे अपणे स्वार्थ रे कारण सच्चाईया जो छड्डीने झूठा पर चलां ये, इसरे बदले च तिन्हां

पर गुस्सा कने क्रोपगी पौणी। 9 कने तिस हर इक माह्ये पर दुख कने संकट औणे सै जे बुरा करां यें, पैहले यहूदिये पर फेरी यूनानिये पर; 10 पर सै जे कोई अच्छाईया पर चलां, तिस्सा महिमा, आदर कने शान्ति मिलणी, पैहले यहूदिये जो कने फेरी यूनानिये जो। 11 कांभई परमेशर किसी ने मतभेद नीं करदा।

12 इस खातर भई तिन्हें जे बिणा व्यवस्था पाये पाप कित्या, तिन्हां बगैर तिसते ई मरी बी जाणा; कने तिन्हेजे व्यवस्था रे जाणदे हुये पाप कित्या, सै व्यवस्था रे मुताबिक ही सजा रे हकदार हुणे; 13 (कांभई सै लोक जे व्यवस्था जो कथा साई सुणां यें, सै परमेशरा रिया नजरा च धर्मी नीं ये, पर सै जे व्यवस्था पर चलां ये सैई धर्मी समझे जाणे। 14 फेरी तां जे होर जातियां रे लोक तिन्हांले जे व्यवस्था नीं, सै सभावा तेई व्यवस्था रियां गलां पर चलां यें, पर चाहे तिन्हांले व्यवस्था नीं, तां बी सै अपणी व्यवस्था खुद ये। 15 सै व्यवस्था रियां गलां अपणे-अपणे मनां च लिखी रियां दस्सां ये कने तिन्हारे मन बी इसा गला री गवाई दें, कने तिन्हारा सोच-बचार अप्पू बाटियें तिन्हांजो दोष लगां; या निर्दोष बणां) 16 ये गलां तिस दिन हुणियां ताहली जे परमेशरा मेरिया खुशखबरिया रे मुताबिक यीशु मसीह रे जरिये माह्ये रियां गुप्त गलां रा न्याय करना।

यहूदी कने व्यवस्था

17 पर जे तू खुद अप्पू जो यहूदी बोलां, कने व्यवस्था पर भरोसा रक्खां, कने अपणे परमेशरा रे बारे च घमण्ड करां, 18 कने तिस रिया इच्छा जो जाणां कने व्यवस्था रा ज्ञान पाईने खरियां-खरियां गलां जो ग्रहण करां; 19 कने अप्पू पर भरोसा रक्खां भई हऊँ अन्हेयां रा अगुवा, सै जे नेहरे च भटकीरे तिन्हा लोकां रे खातर ज्योति आ, 20 कने नासमझां जो सखाणे औळा, कने बालकां रा उपदेशक आ; कने ज्ञान, कने सच्चाईया रा इक नमूना, सै जे व्यवस्था च मिन्जो मिलीरा। 21 फेरी तू सै जे होरीं जो सखां, अप्पू खुद कां नीं सिखदा? क्या तू जे चोरी नीं करने री सीख देआं, खुद अप्पू चोरी करां? 22 तू त बोलां, “व्यभिचार नीं करयो, “क्या तू व्यभिचार करा? तू त मूर्तियां ते नफरत करां, फेरी क्या अप्पू ई मन्दरा जो लुट्टां? 23 तू त व्यवस्था रे बारे च घमण्ड करां, क्या व्यवस्था जो तोडीने परमेशरा रा नरादर करां? 24 “कांभई तुहां रिया वजह ने होर जाति रे लोकां च परमेशरा रे नाँवा रा अपमान हुआ, “तियां जे शास्त्रा च लिखीरा।

25 जे तू व्यवस्था रा पालन करां, तां खतने रा मतलब हाया, पर जे तू व्यवस्था जो तोडां, तां तेरा खतना बिणा खतने ते गिणया गया? 26 इस खातर जे बिणा खतने ते माह्ये व्यवस्था री बिधियां जो मन्नां, तां क्या तिसरी ये दशा खतने रे बराबर नीं गिणी जाणी? 27 कने सै माह्ये तिसरा जे शरीरा ते खतना नीं हुईरा, कने जे सै व्यवस्था रा पालन करो, तां क्या तिजो तिसले जे लिखीरी व्यवस्था ई कने खतना होणे ते बाद बी व्यवस्था जो तोडां, दोषी नीं हुणा? 28 सै जे बाहरा ते यहूदी आ कने हकीकत च सै यहूदी नीं आ; शरीरा रा खतना हकीकत च खतना नीं आ। 29 पर सच्चा यहूदी सैई हाया सै जे मना ते यहूदी आ; कने सच्चा खतना आत्मा रे जरिये मना रा खतना हुआं, नां कि लिखीरी व्यवस्था रा: येदे माह्ये री तारीफ माह्ये नी, बल्कि परमेशरा रिया तरफा ते किति जाई।

3 तां यहूदी होणे रा क्या फायदा या खतने रा क्या मुल आ? 2 हरेक तरफा ते बड़ा किछ। कांभई पैहले हत्थे परमेशरा रे बचन तिन्हांजो ई साँपे। 3 जे तिन्हां च ते किछ धोखेबाज हुई बी गये तां क्या हुया? क्या तिन्हांरे धोखेबाज होणे ते परमेशरा री सच्चाई बेकार हुई जाणी? 4 कदी मनी! जे हर कोई झूठा बी हुई जांगा, तां बी परमेशर सच्चा ई रैहणा, तियां जे शास्त्रा च लिखीरा:

भई “जिसते तू अपणियां गलां च धर्मी रौ

कने न्याय करदे वगत तेरी जय-जयकार ओ।”

5 इस खातर जे अहांरा अधर्म परमेशरा री धार्मिकता सिद्ध करी दो, तां अहें क्या बोलिये? क्या ये भई परमेशर सै जे अपना गुस्सा अहां पर जाहिर करां, अन्यायी आ? (हऊँ अपणी ये गल्ल माह्ये रे सभावा पर बोलीरां)।

6 कदी मनी! नै त परमेशर संसारा रा न्याय कियां करगा? 7 जे मेरे झूठा रिया

वजह ने परमेशरा री सच्चाई होर जादा उजागर हुआई तां इसते तिसरी महिमा ई हुआई, तां फेरी कै मिन्जो पापिये साई सजा रे लैक समझया जां? 8 “अहें कजो बुरे काम्म नीं करीये भई तिसते जे भलाई प्रगट हुई जाओ?” तियां जे भई अहांरे बारे च निन्दा करदे हुये किछ लोक अहां पर दोष लगायें, भई अहें येदा बोलां ये। पर येदे लोक त दोषी होणे चाहिन्दे।

कोई धर्मी नीं आ

9 तां फेरी क्या हुया? क्या अहें यहूदी होरनीं जातियां ते खरे? नां बिल्कुल नीं, कांभई अहें दस्सी चुक्री भई चाहे यहूदी हो या यूनानी, सारे पापा रे बशा चे। 10 शास्त्र बोलां :

“कोई बी धर्मी नीं आ, इक बी नीं।

11 कोई समझदार नीं आ;

कोई परमेशरा जो जाणने औळा नीं आ।

12 सारे भटकीरे, सारे रे सारे नकम्मे बणीगरे;

कोई भलाई करने औळा नीं आ, इक बी नीं।

13 तिन्हारे मुँह खुल्ही कन्न बणीरे,

सै अपणिया जबानी ते छल-कपट करां ये,

तिन्हारे हाँटां पर नागां रा बिष रैयां।

14 तिन्हारे मुँह शरापा ने कने बुरियां गलां ने भरीरे रैं।

15 सै किसी रा खून करने जो मिनट नीं लगान्दे,

16 सै तिन्ही जे किति जायें नाश ई करां ये कने दुख ई दें,

17 तिन्हे शान्ती पाणे औळे रस्ते जो कदी जाणया ई नीं आ।

18 तिन्हां रियां अक्खीं च परमेशरा रा डर नीं आ।”

19 हुण अहें ये जाणां ये भई व्यवस्था सै जे किछ बोलां ई सै तिन्हांने ई बोलां ई, सै जे व्यवस्था रे मुताबिक चलां ये; इस खातर भई हर इक मुँह बन्द कित्या जाओ कने सारा संसार परमेशरा री सजा रे लायक ठैहरो; 20 कांभई व्यवस्था रे कम्मा ते कोई बी माह्ये परमेशरा रे सामणे धर्मी नीं ठैहरना, कांभई व्यवस्था ते जो किछ मिलां, सै आ पापा री पछ्याण करना।

बिस्वासा रे जरिये धार्मिकता

21 पर हुण बिणा व्यवस्था ते परमेशरा री सै धार्मिकता परगट हुई तिसरी गवाही जे व्यवस्था कने भविष्यवक्ता दें, 22 यनिके सारे विश्वासियां खातर यीशु मसीह पर विश्वास करने ते परमेशरा री धार्मिकता बिणा किसी भेदभावा रे परगट हुई; 23 इस खातर भई सारयां पाप कित्तिरा कने सारे परमेशरा रिया महिमा ते दूर ये, 24 पर तिसरे अनुग्रह ते तिस छुटकारे रे जरिये, सै जे यीशु मसीह चा, सै इक मुख्ता रे उपहारा रे रुपा च धर्मी बणी जायें। 25 तिस्सो परमेशरे तिसरे लहुये रिया वजह ने इक येदा पश्चाताप ठैहराया, सै जे विश्वास करने ते काम्म करां, भई सै पाप जे पैहले कित्तिरे थे कने तिन्हां पर जे परमेशरे अपणी सहनशीलता रे कारण ध्यान नीं दित्या। तिन्हारे बारे च सै अपणी धार्मिकता परगट करो। 26 बल्कि आज तिसरी धार्मिकता परगट हो भई तिसते सै खुद धर्मी ठैहरो, कने सै जे यीशुये पर विश्वास रक्खो तिसरा बी धर्मी ठैहराणे औळा हो।

27 तां फेरी घमण्ड करना किति रैया? तिसरी त जगह ई नीं। किसा जेईयां व्यवस्था रिया वजह ने? क्या कर्मा री व्यवस्था ने? नां, बल्कि विश्वासा रिया व्यवस्था रे बजह ने। 28 इस खातर अहें इस फैसले पर पुजे भई माह्ये व्यवस्था रे कम्मां रे मुताबिक चलीने नीं, पर विश्वासा रे जरिये ई धर्मी बणी सकां। 29 क्या परमेशर बस यहूदियां रा ई हाया? क्या सै होरनी जातियां रा नीं आ? हाँ, सै होरीं रा बी आ। 30 कांभई परमेशर इक आ, सै जे खतना औलयां जो विश्वासा ने कने बिणा खतना औलयां जो बी विश्वासा रे जरिये धर्मी बणां। 31 तां क्या अहें व्यवस्था रे अधारा पर विश्वासा जो बेकार ठैहराई रांये? कदी मनी! पर अहें त व्यवस्था जो होर बी जादा शक्तिशाली बणाई रांये।

अब्राहमा रा उदाहरण

4 तां क्या अहें व्यवस्था रे अधारा पर विश्वासा जो बेकार ठैहराई रांये? कदी मनी! पर अहें त व्यवस्था जो होर बी जादा शक्तिशाली बणाई रांये। 2 कांभई जे अब्राहमा जो तिसरे कम्मां रिया वजह ने धर्मी बणाया हुन्दा, तां ये तिसरे खातर घमण्डा री गल्ल थी; पर परमेशरा रे सामणे सैं घमण्ड नीं करी सकदा। 3 पवित्र शास्त्र क्या बोलां? “अब्राहमे परमेशरा पर विश्वास कित्या कने सैं विश्वास तिसरे खातर धर्म गणोया।” 4 काम्म करने औंले जो मजदूरी देणा कोई दान नीं आ, पर हक समझया जां। 5 पर जे कोई काम्म करने रे बजाये नास्तिक माह्ये जो धर्मी समझीने विश्वास करां, तां तिसरा विश्वास तिसरे धर्मी हुणे रा कारण हुई जां। 6 तिस्सो जे परमेशर बिणा कर्मा ते धर्मी बणां, तिस्सो दाऊद बी धर्मी बोलां:

7 भई “धन्य सैं ये तिन्हारे जे बगैर व्यवस्था रे कम्मां जो माफी मिली, कने तिन्हारे पाप जे ढक्की तरे।

8 धन्य सैं माह्ये आ तिसरे पापां जो जे परमेशरे गिणया नीं आ।”

9 तां सैं धन्य वचन, क्या खतना करने औंलयां जोई आ या तिन्हारा बी जिन्हारा जे खतना नीं हुईरा? अहें येदा बोलां ये, “अब्राहमे रे खातर तिसरा विश्वास धार्मिकता गिणया गया।” 10 तां सैं कियों गणोया? ताहली जे तिसरा खतना हुई चुक्रीरा था या ताहली जे सैं बिणा खतने ते था? नां खतना होणे ते बाद नीं, पर खतना होणे रिया दशा ते पैहले। 11 कने फेरी इक नशाणा रे रूपा च तिने खतना करवाया, सैं जे तिस विश्वासा रे मुजब धर्मी हुणे री इक छाप थी सैं जे तिने तिस वगत दस्सया था ताहली जे तिसरा खतना नीं हुईरा था, इस खातर सैं तिन्हा सारयां रा पिता हुई जाओ सैं जे हलांकि बिणा खतने ते आ, पर विश्वासी आ। 12 कने सैं तिन्हारा पिता बी आ, तिन्हारा जे खतना हुईरा, पर सैं जे न सिर्फ अहारे पुर्वज अब्राहमा रे विश्वासा रा अनुशरण करां ये, तिस्सो जे तिने खतना होणे ते पैहले परगट कित्या था।

बिश्वासा रे जरिये प्रतिज्ञा रा मिलणा

13 कांभई ये वचन अब्राहम या तिसरे वंशां जो व्यवस्था ते नीं मिलया था भई सैं संसारा रे बारस हुणे, पर तिसा धार्मिकता ते मिलया था सैं जे विश्वासा रे जरिये पैदा हुआं इ। 14 जे व्यवस्था जो मनणे औंले संसारा रे बारस ये, तां विश्वासा रा कोई मतलब नीं रैई जान्दा कने वचन बी बेकार हुई जां। 15 लोक व्यवस्था रा पालन नीं करदे तिसते जे परमेशरा जो गुस्सा औंआं, पर तिन्ही जे व्यवस्था नीं तिन्ही व्यवस्था रा तोड़ना बी नीं आ।

16 इस खातर ये सिद्ध आ भई परमेशरा रा वचन विश्वासा रा फल आ कने ये मुख्ता च ई मिलां। इस तरीके ने तिसरा वचन अब्राहम रे सारे वंशां खातर तह आ; न सिर्फ तिन्हा खातर सैं जे व्यवस्था जो मन्नां ये बल्कि तिन्हां सारयां खातर बी सैं जे अब्राहमे रे बराबर विश्वास रखां ये, सैं अहां सारयां रा पिता, 17 शास्त्र दस्सां, “मैं तिन्ही कई राह्यां रा पिता बणाया।” तिस परमेशरा रिया नजरां च सैं अब्राहम अहारा पिता तिस पर जिसरा विश्वास आ, परमेशर सैं जे मूर्ईरयां जो जिन्दगी देआं कने सैं गल्लां जे हाईयां ई नींआं तिन्हांरा नौं ईयां लेआं भई मन्ना सैं हाया। 18 अब्राहमे सारी मानवीय आस्सां रे खलाफ अपणे मना च आस लेईने तिस पर विश्वास कित्या, इस खातर तिस बोला रे मुताविक “तेरा वंश येदा होणा,” भई तू कई जातियां रा पिता हुणा। 19 सैं सौआ साला रा था, अपणे मूर्ईरे शरीरा कने सारा रे मूर्ईरे गर्भा रिया दशा जो जाणीने बी विश्वासा च कमजोर नीं हुया, 20 परमेशरा रे बचना पर विश्वास बणाईने रक्खया, इतणा ई नीं, अपणे विश्वासा जो होर जादा मजबूत करदे हुये परमेशरा जो आदर कने महिमा दित्ति। 21 तिस्सो पूरा विश्वास था भई परमेशरे सैं वचन जे तिस्सो दित्या, तिस्सो पूरा करने च सैं पूरी तरह सामर्थी आ। 22 इस खातर ये विश्वास तिसरे खातर धार्मिकता गिणया गया। 23 कने पवित्र शास्त्रा रा ये वचन, भई “विश्वास तिसरे खातर धार्मिकता गिणया गया,” न सिर्फ तिसरे खातर, 24 बल्कि अहारे खातर बी तिन्हारे खातर जे विश्वास धार्मिकता गिणया जाणा, यनिके अहारे खातर सैं जे तिस पर विश्वास करां ये तिने जे अहारे प्रभु यीशुये जो मूर्ई रेआं चते ज्युन्दा कित्या। 25 यीशु तिस्सो

जे अहारे पापां रे खातर मारने जो सौपीरा कने अहांजो धर्मी बनाणे रे खातर भीं ते ज्युन्दा कित्या।

परमेशरा ने मेल

5 कांभई अहें अपणे विश्वासा रिया वजह ने परमेशरा खातर धर्मी हुईये, तां अपणे प्रभु यीशु मसीह रे जरिये अहारा परमेशरा ने मेल हुईया, 2 तिसरे जरिये विश्वासा रे कारण तिस अनुग्रह तक तिसच जे अहें बणीरे, तिस तक अहारी पहुँच हुईगरी, कने परमेशरा रिया महिमा रिया आशा पर घमण्ड करां। 3 सिर्फ इतणा ई नीं आ, अहें अपणियां मुसीबतां च बी मौज करां ये, कांभई अहें जाणां ये भई मुशीबत सैहण-शक्तिया जो जन्म देई, 4 कने सैहण-शक्तिया ने परखया हुआ चरित्र निकलां, कने परखया हुआ चरित्र आशा जो जन्म देआं; 5 कने आशा अहांजो निराश नीं होणे देन्दी, कांभई पवित्र आत्मा सैं जे अहांजो दित्तिरा, तिसरे जरिये परमेशरा रा प्यार अहारे दिला च पाई दित्तिरा हुआं।

6 कांभई अहें ताहली जे कमजोर थे तां ठीक समय पर मसीहे अहां भक्तिहीनां खातर अपणा बलीदान दित्या। 7 किसी धर्मी माह्ये रे खातर कोई अपणी जान देई दो, ये त बड़ा मुश्कल आ; पर हुई सकां किसी अच्छे माह्ये रे खातर अपणे प्राण देणे री कोई बी हिम्मत करी सकां। 8 पर परमेशर अहा पर अपणे प्यारा री भलाईया जो इस तरीके ने परगट करां भई ताहली जे अहें पापी थे ताहली मसीह अहारे खातर मरया। 9 कांभई हुण तां जे अहें तिसरे लहूये रिया वजह ने धर्मी हुईये, तां हुण तिसरे जरिये परमेशरा रे कोपा ते जरूर बची जांगे। 10 कांभई ताहली जे अहें तिसरे दुश्मन थे तिने अपणिया मौती रे जरिये परमेशरा ने अहारा मेल-मलाप करवाया, तां हुण त तां जे अहारा मेल-मलाप हुई चुक्रीरा तां तिसरे जीवना ते अहारी होर कितणी जादा रक्षा हुणी। 11 सिर्फ इतणा ई नीं अहें अपणे प्रभु यीशुये रे जरिये परमेशरा री भगती पाईने हुण तिसच मौज करां ये।

आदमा रे जरिये मौत - मसीह रे जरिये जीवन

12 इस खातर तियां जे इक माह्ये रे जरिये पाप संसारा च आया, कने पापा रे कारण मौत आई, कने इस तरीके ने मौत सारयां लोकां खातर आई कांभई सारयां पाप कित्तिरे थे। 13 हुण तुहें देखा व्यवस्था रे औणे ते पैहले संसारा च पाप था, पर तिन्ही जे व्यवस्था नीं हुन्दी तिन्ही किसी रा बी पाप नीं गिणया जान्दा। 14 पर आदम ते लेईने मूसा रे समय तक मौत सब्बीं पर राज करां थी, मौत तिन्हां पर बी तियां ई हाबी रैई तिन्हें जे पाप नीं कित्तिरे थे तियां जे आदमा पर, आदम बी तियां ई था तेदा जे औणे औळा सैं मसीह था।

15 पर परमेशरा रा बरदान आदमा रे अपराधा साई नीं था, कांभई जे तिस इक्की माह्ये रे अपराधा रिया वजह ने सारयां लोकां री मौत हुई, तां तिस इक्की माह्ये यनि यीशु मसीह री दया रिया बजह ने मिलीरे परमेशरा रे अनुग्रह कने बरदान त सारयां लोकां री भलाईया खातर कितणा जादा हुया। 16 तेदा जे इक माह्ये रे पाप करने रा फल हुया, तेदी इ दाना री दशा नीं, कांभई इक्की रिया बजह ने सजा रे हुक्मा रा फैसला हुया, पर मतयां अपराधां रिया वजह ने येदा बरदान पैदा हुया भई लोक धर्मी ठैहरो। 17 कांभई ताहली जे इक्की माह्ये रे अपराधा रिया वजह ने मौती तिस इक्की रे जरिये राज कित्या, तां सैं लोक जे अनुग्रह कने धर्मरूपी बरदान कई गुणा पाई लें सैं त जिन्दगिया च तिस इक्की माह्ये, यनिके यीशु मसीह रे जरिये जरूर अनन्त जीवना च होर बी जादा राज करना।

18 इस खातर इक्की अपराधा रिया वजह ने सारयां लोकां जो दोषी बणाया गया, तियां ई इक्की धर्मा रे कम्मा रे जरिये सारयां रे खातर तिसरा नतीजा अनन्त जीवन देणे औली धार्मिकता मिली। 19 कांभई तियां जे तिस इक्की माह्ये रे हुक्म न मनणे रिया वजह ने सारे लोक पापी बणाई दित्ते, तियां ई इक्की माह्ये रे आज्ञा मनणे रिया वजह ने सारे लोक धर्मी बणाई दित्ते जाणे। 20 व्यवस्था रा औणा इस खातर हुया भई अपराध बधी जाओ, पर तिन्ही जे पाप बधया तिन्ही परमेशरा रा अनुग्रह होर बी जादा बधया, 21 भई तियां जे पापे मौत फैलान्दे हुये राज कित्या, तियां ई अहारे प्रभु यीशु मसीह रे जरिये

अनन्त जीवन लौणे खातर परमेशरा रा अनुग्रह धार्मिकता रे जरिये राज करो।

पापा रे खातर मूर्खरा: मसीह च जिन्दा

6 तां फेरी अहें क्या बोलिये? क्या अहें पाप ई करदे रहिये ताकि परमेशरा रा अनुग्रह बधदा रौ? 2 कदी मनी! अहें तांजे पापा रे खातर मरीगरे तां पापा च किया ज्यूनो? 3 क्या तुहें नीं जाणदे भई अहें सारयां तिन्हें जे यीशु मसीह रा वपतिस्मा लेआ, तिस रिया मौती रा वपतिस्मा लेईरा। 4 तां तिसा मौती रा वपतिस्मा लेणे ते अहें बी तिस रिया सौगी गड्डी तरे, ताकि तियां जे मसीह पिते री महिमा रे जरिये मूर्खरां च ते ज्यूनदा कित्या, तियां ई अहें बी इक नौई जिन्दागी पाई सक्को।

5 कांभई ताहली जे अहें तिसरिया मौती च तिसरे सौगी रये, तां पक्का तिसरे साई ज्यूनदा होणे च बी तिस रिया सौगी रहणा। 6 अहें ये जाणां ये भई अहारी परवाणी जिन्दागी यीशुये रे सौगी कूसा पर चढाई तरी ताकि पापा ने भरीरा अहारा शरीर खत्म हुई जाओ, कने अहें अग्गे जो पापा रे गुलाम नीं बणीरे रौ। 7 कांभई सै जे मरीया, सै पापा रे बन्धना ते छुट्टीने धर्मी बणिया। 8 इस खातर जे अहें मसीह सौगी मरीगे, तां अहारा ये विश्वास आ भई अहां तिस सौगी जिन्दा बी होणा। 9 अहें जाणां ये भई मसीह तिस्सो जे मूर्खरां च ते ज्यूनदा कित्या था सै अमर आ; तिस पर मौती रा वश कदी मनी चलणा। 10 तिसा मौती जे सै मरया, सै सदा जो पापा खातर मरीया पर जो जिन्दागी सै जी करां, सै जिन्दागी परमेशरा रे खातर ई। 11 इस तरीके ने तुहें अपने खातर बी सोचा भई तुहें पापा रे खातर मरी चुक्कीरे पर यीशु मसीह च परमेशरा रे खातर जिन्दा ये।

12 इस खातर तुहारे नाशवान शरीरां पर पापां रा वश नीं चलो, ताकि तुहें पापां रिया इच्छां पर कदी नीं चलो; 13 कने अपने शरीरां रे अंगां जो अधर्मा री सेवा खातर पापां रे हवाले नीं करा, वल्कि मरीयां च ते जिन्दा हुणे साई परमेशरा रे हवाले करा, कने अपने शरीरा रे अंगां जो धार्मिकता री सेवा रे साधना रे रुपा च परमेशरा रे हवाले करा। 14 फेरी तुहां पर पापां रा राज नीं हुणा, कांभई तुहें व्यवस्था रे सहारे नीं जिन्दे वल्कि परमेशरा रे अनुग्रह रे सहारे जीआं ये।

धार्मिकता रे दास

15 तां अहें क्या करिये? क्या अहें पाप करिये? कांभई अहें व्यवस्था रे अधीन नीं ये, वल्कि परमेशरा रे अनुग्रह रे अधीन जीआं ये? कदी मनी! 16 क्या तुहें नीं जाणदे भई ताहली जे तुहें किसी रा हुक्म मनणे खातर अप्पूँ जो सेबका रे रुपा च तिस्सो सौपी दें, तां तुहें सेबक हुये: फेरी चाहे तुहें पापा रे दास बणा, तिसरा जे अन्त मौत ई, कने चाहे तुहें हुक्मा रा पालन करा, सै जे तुहांजो धार्मिकता री ओर लेई जान्ना। 17 पर परमेशरा रा धन्याबाद ओ भई तुहें चाहे पापां रे दास थे पर तुहें अपने मना ते तिस उपदेशा जो मनणे औळे हुईये सै जे तुहांजो सौपीरा था। 18 तुहांजो पापां ते छुटकवारा मिलीया कने तुहें धार्मिकता रे सेवक बणीगरे। 19 मैं तुहारे शरीरा री कमजोरियां रे कारण माहुआं रिया रीता रे मुताबिक बोलां। तियां जे तुहें अपने शरीरा रे अंगां जो बुरयां कम्मां खातर अपवित्रता कने बुराईया रे दासा रे रुपा च सौपीत्या था, तियां ई ठीक हुण तुहें लोक अपने शरीरां रे अंगां जो पवित्रता खातर धर्मा रे दासा रे रुपा च सौपी देवा।

20 कांभई ताहली जे तुहें पापां रे दास थे, तां धार्मिकता रिया तरफा ते तुहां पर कोई बन्धन नीं था। 21 कने देख्वा तिस वगत तुहांजो क्या फल मिलया? तिसरे खातर जे आज तुहें शर्मिन्दा ये, तिन्हांरा अन्त जे मौत आ। 22 पर हुण तुहांजो पापा ते छुटकारा मिली चुक्कीरा कने परमेशरा रे दास बणाईने तुहांजो फल मिलया तिसते जे पवित्रता मिलां ई, कने तिसरा अन्त अनन्त काल रा जीवन आ। 23 कांभई पापा री मजदूरी त मौत ई, पर परमेशरा रा बरदान अहारे प्रभु मसीह यीशुये च अनन्त जीवन आ।

बिबाहित जीबना रा द्रष्टान्त

7 मेरे भाईयो क्या तुहें नीं जाणदे - हऊं तिन्हां लोकां ने बोली करां सै जे व्यवस्था जो जाणां ये - भई व्यवस्था रा राज किसी माहुये पर तदुआं तक ई हाया तदुआं तक जे सै जिन्दा हाया? 2 इक ब्याहीरी जनाना अपने पतिये सौगी विधी-विधाना रे मुताबिक तदुआं तक ई बझीरी तदुआं तक जे सै जिन्दा ई, पर जे तिसारा पति मरी जाओ, तां सै पतिये री व्यवस्था ते छुटी जाई। 3 इस खातर जे पतिये रे जिन्दा हुन्दे सै किसी दूजे माहुये ने रिस्ता बणाई लो, तां तिसा जो बुरे चरित्रा औली जनाना बोला ये, पर जे तिसा रा आदमी मरी जाओ, तां सै तिसा व्यवस्था ते छुटी जाई, येथी तक भई जे सै किसी दूजे घरा बी बैठी जाओ तां बी सै व्यभिचारिणी नीं हुई। 4 तियां ई हे मेरे भाईयो, तुहें बी मसीह रिया देहा रे जरिये व्यवस्था खातर मूर्खरे बणिये, इस खातर हुण तुहें बी किसी दूजे ने नाता जोडी सक्कां ये, सै जे मूर्खरां च ते जिन्दा हुईया: ताकि अहें परमेशरा खातर कर्मा री उत्तम खेती करी सक्को। 5 कांभई ताहली जे अहें शरीरा रे मुताबिक जी रां थे, तां पापां री बासनाओं, सै जे व्यवस्था रे जरिये आई थीं, कने अहारे शरीरा रे अंगा पर हावी थी। ताकि अहें कर्मा री येढी खेती करिये तिसरा अन्त जे मौत हुआं। 6 पर हुण अहें व्यवस्था रे बन्धना ते छुट्टीये कांभई तिस व्यवस्था रे अधीन जे अहांजो बन्दी बणाईरा था, अहें तिसा खातर मरी चुक्कीरे, कने हुण लेखां री पुराणी व्यवस्था ते नी, पर आत्मा री नौई रीतिया ते प्रेरित हुईने अहें अपने स्वामी परमेशरा री सेवा करां ये।

व्यवस्था कने पाप

7 तां फेरी अहें क्या बोलें? क्या अहें बोलिये भई व्यवस्था पाप आ? कदी मनी। कुछ बी हो, जे व्यवस्था नीं हुन्दी तां हऊं पछ्याणी नीं पान्दा भई पाप क्या? जे व्यवस्था नीं बोलदी, भई लालच नीं कर तां हऊं लालचा जो नीं जाणी पान्दा। 8 पर पापे मौका मिलदे ई व्यवस्था रा फायदा लेन्दे हुये मांह च हर तरह रा लालच पैदा कित्या, कांभई बगैर व्यवस्था ते पाप त मुर्दा। 9 हऊं बगैर व्यवस्था ते पैहले जिन्दा था, पर हुण आज्ञा आई, तां पाप जिन्दा हुईया, कने हऊं मरीया। 10 सै ई व्यवस्था रा आदेश सै जे जिन्दागी देणे खातर था, मेरे खातर मौत ली आया। 11 कांभई पापा जो मौका मिलीया कने तिने तिस ई व्यवस्था रे आदेशा रे जरिये हऊं बहकाया, कने तिसरे ई जरिये हऊं मारी बी दित्या।

12 इस खातर व्यवस्था पवित्र ई, कने आदेश बी पवित्र, धर्मी कने उत्तम आ। 13 तां फेरी इसरा क्या ये मतलब आ, भई सै जे उत्तम था, सै ई मेरिया मौती री वजह बणया? बिल्कुल नीं! पर पाप तिस उत्तमा रे जरिये मेरे खातर मौती री इस खातर वजह बणया भई पापा जो पछ्याणया जाई सक्को, कने आदेशा रे जरिये पाप हद ते बी जादा दिखणे लगे।

माहुये री अन्दरूनी लडाई

14 कांभई हऊं जाणां भई व्यवस्था त आत्मिक ई कने हऊं हाड कने मासा रा भौतिक माहु आ सै जे पापा रा दास बणीने बिकीगरा। 15 हऊं नीं जाणदा भई हऊं क्या करीरां; कांभई हऊं सै जे करना चाँह, नीं करदा, बल्कि मिन्जो सै करने पाँआ, तिसते जे हऊं नफरत करां। 16 कने हऊं सै ई करां सै जे हऊं नीं करना चाहन्दा तां हऊं मन्त्री लेआं भई व्यवस्था उत्तम ई। 17 तां येदियां दशा च तिसरा करने औला हऊं नीं आ, सै जे ये सब कुछ करीरां, बल्कि ये मेरे अन्दर बसीरा पाप आ। 18 कांभई हऊं जाणां भई मांह च यनिके मेरे शरीरा च किसी खरिया चीजा रा वास नीं आ। नेकी करने री इच्छा त मांह च हाई पर नेक काम्म माहते नीं हुन्दे। 19 कांभई सै खरा काम्म जे हऊं करना चाँह, तिस्सो त हऊं हैनी करदा, पर जिस बुरे कम्मा री इच्छा नीं करदा, माहते सै ई हुई जां। 20 कने जे हऊं सै ई काम्म करां तिन्हांजो जे करना नीं चाहन्दा, तां तिसरा करने औला हऊं नीं आ, पर सै पाप आ सै जे मांह च बसीरा।

21 इस खातर हऊं अपने च ये व्यवस्था पां भई हऊं ताह्ली जे खरा करना चाँह, तां अप्पूँ च बुराईया जो ई पां। 22 अपनी अन्तरात्मा च हऊं परमेशरा

रिया व्यवस्था ते बड़ा खुश रेआं। 23 पर मिन्जो अपणे शरीरां रे अंगां च इक दूजे ई नियमा जो काम्म करदे देखां, ये मेरे चिन्तन पर राज करने औली व्यवस्था ने लड़ाई करां ई कने मिन्जो पापा री व्यवस्था रे बन्धना च पाई सै जे मेरे अंगां ची। 24 हऊँ केदा बदनसीब माळु आ। मिन्जो इस शरीरा ते सै जे मौती रा निवाला तिसते कुण छडवांगा? 25 अहारे प्रभु यीशु मसीह रे जरिये हऊँ परमेशरा रा धन्यवाद करां। इस खातर अपणे हाड मांसा रे शरीरा ते हऊँ पापा रिया व्यवस्था रा गुलाम होन्दे हुये बी अपणिया बुद्धिया ते परमेशरा रिया व्यवस्था रा सेवक आ।

पवित्र आत्मा रे जरिये जीवन

8 इस तरीके ने हुण सै जे यीशु मसीह चे, तिन्हां पर सजा रा कोई हुक्म नीं आ। [कांभई सै शरीरा रे मुताबिक नीं बल्कि आत्मा रे मुताबिक चलां ये।] 2 कांभई आत्मा रिया व्यवस्था ते सै जे यीशु मसीह च जिन्दगी देई, तिन्जो पापा री व्यवस्था ते छडवाई देआई सै जे मौती रिया तरफा लेई जाई। 3 तिसजो जे मूसा री सै व्यवस्था सै जे माळुये रे शारीरिक स्वाभावा रिया वजह ने कमजोर हुईने नीं करी सकी, तिसजो परमेशरे कित्या, यनिके अपणे पुत्रा जो अहारे साई शरीरा च भेज्जीने -तिसते जे अहें पाप करां यें- तिसरे शरीरा जो पाप बली बणाईने पापा जो खत्म करीने पूरा कित्या। 4 इस खातर भई व्यवस्था री बिधी अहां च सै जे शरीरा रे मुताबिक नीं बल्कि आत्मा रिया बिधिया ने चलां ये, व्यवस्था री जरूरतां पूरी कित्ति जाई सक्को। 5 कांभई सै जे अपणे मानव स्वाभावा रे अनुशार जीआं ये, तिन्हांरी बुद्धी माळुआं रे स्वाभावा रिया इच्छां पर टिकीरी रैई, पर सै जे आत्मा रे अनुशार जीं ये तिन्हांरी बुद्धी सै जे आत्मा चाई तिन्हां इच्छां च लगीरी रैई। 6 शरीरा पर मन लगाणा त मौत ई, पर आत्मा पर मन लगाणा जीवन कने शान्ति आ। 7 कांभई शरीरा पर मन लगाणा त परमेशरा रा विरोध करना हुया, कांभई सै न त परमेशरा रे नियमा रे अधीन आ कने न हुई सक्कां; 8 कने सै जे शरीरा रे स्वाभावा अनुशार जीं ये सै परमेशरा जो खुश नीं करी सकदे।

9 पर तां जे भई परमेशरा रा आत्मा तुहां च निवास करां, तां तुहें शरीरा रिया दशा च नीं पर आत्मा रे अधीन हुआंये। जे किसी च मसीह रा आत्मा नीं आ तां सै मसीह रा जन नींआं। 10 जे मसीह तुहां चा, तां देह पापा रिया वजह ने मरीगरी; पर आत्मा परमेशरा सौगी तुहांजो धर्मी बणाईने खुद तुहारे खातर जीवन बणी जाई। 11 कने जे सै आत्मा तिने जे यीशुये जो मूर्इरयां च ते ज्युन्दा कित्या, तुहारे अन्दर वास करां ई; तां सै परमेशर तिने जे यीशुये जो मूर्इरयां च ते ज्युन्दा कित्या था, तुहारे नाशवान शरीरा जो अपणी आत्मा ते सै जे तुहारे अन्दर बसां ई, जीवन देगा।

12 इस खातर मेरे भाईयो, अहें शरीरा रे कर्जदार नीं ये भई शरीरा रे मुताबिक दिन बिताओ, 13 कांभई जे तुहें शरीरा रे मुताबिक दिन बितांगे तां मरगे, पर जे तुहें आत्मा रे जरिये शरीरा रे बर्तावा रा अंत करी दंगे तां तुहें जी जांगे। 14 इस खातर भई जितणे लोक परमेशरा रिया आत्मा रे चलणे ते चलां ये, सै ई परमेशरा रे पुत्र ये। 15 कांभई सै आत्मा जे तुहांजो मिलीरी, तुहांजो फेरी भीं दास बणीने उरने खातर नीं, वल्कि सै आत्मा सै जे तुहें पाई तुहांजो परमेशरा री गोद लेईरी सन्तान बणाई, तिसते जे अहें 'हे अब्बा, हे पिता बोला ये। 16 ये पवित्र आत्मा खुद अहांरी आत्मा सौगी मिलीने गवाही देई, भई अहें परमेशरा री सन्तान ये; 17 कने कांभई तांजे अहें तिसरी सन्तान ये, तां अहें तिसरे बारस बी ये, यनिके परमेशरा रे बारस कने मसीह सौगी संगी बारस, भई ताहली जे अहें तिस सौगी दुक्ख भोगां यें तां तिस सौगी महिमा बी पाणी।

भबिष्य च परगट हुणे औळी महिमा

18 कांभई हऊँ समझां भई इसा घडिया रे दुख कने कळेश तिसा महिमा रे सामणे, सै जे अहां पर परगट होणे औळी, कुछ बी नीं। 19 कां भई ये सृष्टी बडिया आस्सा ने तिसा घडिया रा इन्तजार करी राई ताहली जे परमेशरा रिया सन्ताना जो परगट कित्या जाणा। 20 कांभई सृष्टी अपणिया मर्जिया ते नीं, बल्कि तिसरिया मर्जिया ते तिने जे इसाजो इस आस्सा रे अधीन कित्या, 21 भई सृष्टि बी अप्पू ई बिनाश रे इस दासत्व ते छुटकारा पाईने, परमेशरा रे

बचयां री महिमा री आजादिया रा नन्द लेंगी। 22 कांभई अहें जाणां ये भई अजा तक सारी सृष्टि पीडा ने बिलखदी कने तडफदी रैई। 23 न सिर्फ ये सृष्टि बल्कि अहें बी तिन्हांजो जे आत्मा रा पैहला फळ मिलया, खुद अन्दरा ते बिलखां ये; कांभई अहांजो तिसरे जरिये पूरे तरीके ने अपनाये जाणे रा इन्तजार आ भई अहांरी देह छुटी जाओ। 24 अहांरा उद्धार हुईरा, इसते अहारे मना च आस ई पर ताहली जे अहें तिसरी आस करां ये, तिस्सो देक्खी लें, तां सै आस नीं रैहन्दी, सै जे दुस्सी रां तिसरी आस कुण करी सक्कां। 25 पर तिसा चीजा जो जे अहें नीं देखदे, जे तिसरी आस रक्खो, तां धीरज कने सहनशीलता सौगी तिसरी बाट देख्वां ये।

26 इस तरीके ने आत्मा बी अहांरी कमजोरियां च मदद करां इ: कांभई अहें नीं जाणदे भई प्रार्थना किस तरीके ने करनी चाहिन्दी, पर आत्मा खुद ई येदे सुसकार भरी-भरीने, तिन्हारी जे शब्दां च अभिव्यक्ति नीं कित्ति जाई सकदी, अहारे खातर विनती करां; 27 पर सै मना जो जांचणे औला जाणां भई आत्मा री मनसा क्या ई? कांभई सै पवित्र लोकां रे खातर परमेशरा री इच्छा रे मुताबिक विनती करां ई।

28 अहें जाणां ये भई सै लोक जे परमेशरा ने प्यार रखां ये, तिन्हारे खातर सारियां गलां मिलीने भलाई ई पैदा करां ईयां; यनिके तिन्हारे खातर सै जे तिस रिया मर्जिया रे मुताबिक सद्दीरे। 29 कांभई तिन्हांजो जे तिने पैहले ते चुणीरा तिन्हांजो पैहले ई अपणा पुत्र होणे रा दर्जा दित्या, ताकि मतेयां भाईयां च सै सबनीं ते बड्डा भाई बणी सक्को। 30 फेरी तिन्हांजो जे तिने पैहले ते तह कित्या, तिन्हाजो बी तिने सद्दया, कने सै जे तिने सद्दे, सै तिने धर्मी ठहराये, कने तिन्हाजो जे तिने धर्मी बणाया, तिन्हाजो महिमा बी दित्ती।

परमेशरा रा प्यार

31 कने अहें इन्हां गलां रे बारे च क्या बोलिये? जे परमेशर अहारे सौगी आ, तां अहांरा बिरोध करने औला कुण हुई सक्कां? 32 तिने जे अपणा पुत्र तक नीं छड्या, बल्कि तिस्सो अहां सारेयां रे खातर मरने जो देईत्या, तिस भला अहांजो तिस सौगी होर कुछ कां नीं देणा? 33 परमेशरा रे चुणीरे लोकां पर येदा कुण आ सै जे दोष लांगा? परमेशर ई हाया सै जे तिन्हाजो धर्मी बनाणे औळा। 34 येदा कुण आ सै जे तिन्हांजो दोषी बणांगा? मसीह यीशु सै आ सै जे मरीया कने मुर्दयां च ते जिन्दा बी हुईया, कने परमेशरा रे सज्जे हत्था खा बैठीरा, कने अहां रिया तरफा ते विनती बी करां। 35 कुण आ सै जे अहांजो मसीह रे प्यारा ते लग करगा? क्या कलेश, या संकट, या अत्याचार, या नकाळ, या नंगापन, या जोखिम, या तलवार? 36 तियां जे शास्त्र बोलां:

“तेरे खातर सारा दिन अहें मौती जो सौपे जायें;
अहें बडणे औळी भेड्वां साई समझे जायें।”

37 फेरी भीं तिसरे जरिये तिने जे अहांने प्यार कित्या, इन्हां सारियां गलां च अहें इक शानदार जीत पाई रांये। 38 कांभई हऊँ पक्का जाणां भई न मौत, कने न जीवन, न स्वर्गदूत कने न राज करने औळियां आत्मां, न वर्तमान री कोई चीज, न आत्मिक शक्तियां, 39 न कोई अहांते उपरला कने न अहांते थलडा, न सृष्टिया री कोई होर चीज अहांजो प्रभुरे तिस प्यारा ते, सै जे अहारे अन्दर प्रभु यीशु मसीह रे प्रति आ, अहांजो लग करी सकगी।

परमेशर कने तिसरे चुणीरे लोक

9 मसीह च हऊँ सच्च बोलां, हऊँ झूठ नीं बोलदा कने मेरा विवेक बी पवित्र आत्मा री लोय पाईने मेरे कन्ने मेरी गवाही देआं 2 भई मिन्जो बड़ा दुख आ, कने मेरे मना च सदा री पीड ई, 3 कांभई हऊँ इतणा चाँह था भई अपणे भाई बन्धुआं रे खातर सै जे शरीरा रे मुताबिक मेरे सगे सम्बन्धी ये, खुद तिन्हारे खातर मसीह रा शाप अपणे उपर लेई लेन्दा कने तिन्हांते लग हुई जांन्दा। 4 सै जे इस्राएली ये, कने तिन्हांजो जे परमेशरे गोद लेईरा कने पुत्र होणे रा अधिकार दित्तीरा, सै जे परमेशरा रिया महिमा रा दर्शन करी बैठीरे, सै जे परमेशरा रे करारा रे भागीदार ये, तिन्हांजो जे मूसा री व्यवस्था, सच्ची अराधना कने बचन प्रदान कित्तीरा। 5 पुरखे बी तिन्हांने सम्बन्ध रखां ये कने मसीहे बी शरीरा रे रूपा च तिन्हां च ते जन्म लैया। सै जे सबनीं रा परमेशर आ कने सदा तक धन्य। आमीन।

6 पर येदा नीं आ भई परमेशरे अपणा बचन पूरा नीं कित्या कांभई सै जे इस्राएल रे बंशज ये, सै सारे इस्राएली नीं ये; 7 कने न ई अब्राहम रे वंशज होणे रिया वजह ने सै सचमुच सारे अब्राहम री सन्तान ये, पर (तियां जे परमेशरे बोलया) “तेरे वंशज इसहाक रे जरिये अपणी परम्परा बधाने।” 8 यनिके ये नीं आ भई शरीरा ते पैदा होणे औळे बच्चे परमेशरा री सन्तान ये, पर परमेशरा रे वचना ते प्रेरित हुणे औळे तिसरे वंशज मन्ने जायें। 9 कांभई वचन इस तरीके ने बोलया गया था: “मांह इसा घडिया रे मुताविक औणा, कने सारा रे पुत्र हुणा।” 10 इतणा ई नीं पर ताहली जे रिबका बी इक माळुये ते यनिके अहारे पिता इसहाक ते गर्भवती हुई, 11 कने बेटयां रे जमणे ते पैहले, कने न तिन्हें कुछ भला बुरा कित्या था; इस खातर भई परमेशरा री इच्छा सै जे तिसरे चुणने रे मुताबिक ई, कर्मा रिया वजह ने नीं पर सवणे औळयां रिया वजह ने ई, बणीरी रो: 12 तिने बोलया, “बड्डा बेटा छोटे बेटे री सेवा करगा।” 13 शास्त्र बोलां, “मैं याकूब ने प्यार कित्या कने इसहाक रा इन्कार कित्या।” 14 इस खातर अहें क्या बोलिये? क्या परमेशर अन्यायी आ? कदी मनी। 15 कांभई सै मूसा ने बोलां, “हऊँ जिस किसी पर बी दया करने री सोचगा तिस पर दया करगा, कने जिस किसी पर किरपा करना चांहगा तिस पर बी किरपा करगा।” 16 इस खातर ये न त किसी री इच्छा पर निर्भर करां कने न किसी रे दौड-धुप करने औळे पर वल्कि दयालु परमेशरा पर निर्भर करां। 17 कांभई पवित्र शास्त्रा च परमेशरे फिरौना ने बोलया था, “मैं तिज्जो इस खातर खडा कित्या था भई तूह च अपणी शक्ति दस्सी सकूँ, कने मेरा नौं सारिया पृथिविया पर प्रचार कित्या जाई सक्को।” 18 इस खातर परमेशर जिस पर चांह तिस पर दया करां कने तिस्सो जे चांह उस्सो कठोर बणाई देआं।

परमेशरा रा कोप कने तिसरी दया

19 तां फेरी तू हुई सक्कां माहते बोलो, जे अहारे कम्मां रा नियन्त्रण करने औला परमेशर आ, तां फेरी भीं सै तिसच अहारा दोष कजो समझां?” आखिरकार तिस रिया इच्छा रा बरोध कुण करी सक्कां? 20 ओ माळुआ तू कुण हुआं सै जे परमेशरा रा सामना करा? क्या कोई रचना अपणे रचणे औळे ते पुछी सक्कां ई, “तैं हऊँ येदा कजो बणाया?” 21 क्या किसी कन्हारा जो मिट्टिया पर ये अधिकार नीं आ भई मिट्टिया रे इक्की ढेरा च ते इक भान्डा आदरा खातर कने दूजे जो अनादरा रे खातर बनाये? 22 तां इसच कुण जेई रेहानिया री गल्ल ई भई परमेशरे अपणा गुस्सा दसणे कने अपणी शक्ति जताने खातर तिन्हा भान्डयां री सै जे गुस्से रे पात्र थे, कने सै जे बिनाशा खातर बणाईरे थे, बडे धीरजा सौगी सही; 23 कने तिने तिसरी सही ताकि सै तिन्हां भान्डयां रे फायदे खातर सै जे दया रे पात्र थे कने तिन्हांजो जे तिने अपणी महिमा पाणे खातर बणाया था, तिन्हां पर अपणी महिमा परगट करी सक्को। 24 यनिके अहें तिन्हांजो जे तिने न सिर्फ यहूदियां च ते सदया, वल्कि गैर-यहूदियां च ते बी सदया। 25 तियां जे सै होश रिया कताबा च बी बोलां, “सै लोक जे मेरे नीं थे, तिन्हांजो मांह अपणे लोक बोलणा; कने सै जनाना जे प्यारी नीं थी, मांह तिसाजो प्रिय बोलणा। 26 कने येदा होणा भई तिसा जगह च जे तिन्हाने ये बोलया था भई तुहें लोक मेरी प्रजा नीं ये, तिसा जगह सै जिन्दा परमेशरा री सन्तान कहलाणे।” 27 कने यशायाह इस्राएल रे बारे च हाक पाईने बोलां, “चाहे इस्राएल री सन्तान समुद्रा रे रेता रे कणां बराबर हो तां बी तिन्हां च ते सिर्फ थोडे इ बचणे। 28 कांभई प्रभु पृथिविया पर अपणा न्याय पूरे तरीके ने कने छोड़े ई पूरा करगा।” 29 तियां जे यशायाह पैहले बी बोलया था, “जे सर्वशक्तिशाली प्रभु अहारे खातर बंशज नीं छडदा, तां अहें सदोम साई कने अमोरा साई हुई जान्दे।”

इस्राएल रा अबिश्वास

30 तां फेरी अहें क्या बोलिये? अहें इस नतीजे पर पुजे भई होर जातियां रे लोक सै जे धार्मिकता रिया खोजा च नीं थे, तिन्हे धार्मिकता पाई ली यनिके सै जे विश्वासा रिया वजह ने धर्मी बणाये गये, 31 पर इस्राएल रे लोक, सै जे येदिया व्यवस्था पर चलणा चांह थे सै तिन्हांजो धर्मी बणान्दी, तिसरे मुताबिक नीं चली सक्के। 32 किस खातर? कांभई सै इसरा पालन विश्वासा ने नीं वल्कि अपणे कर्मा ने करी करां थे, तिन्हे तिस पत्थरा ने ठोकर खादी सै जे ठोकर देआं, 33 पवित्र शास्त्रा च लिखीरा, “देकरा, हऊँ सिय्योन च इक ठोकर देणे औळा पत्थर रखां, कने ठोकर खाणे औळी चट्टान रखां, कने सै जे तिस पर विश्वास करगा तिस शर्मिन्दा नीं हुणा।” 10 हे भाईयो, ये मेरे दिला री इच्छा ई कने हऊँ परमेशरा ने तिन्हां सारयां रे खातर प्रार्थना करां भई तिन्हांरा उद्धार ओ। 2 कांभई हऊँ गवाही देआं भई तिन्हां च परमेशरा री धुन ई, पर सै ज्ञाना पर नीं टिकीरी। 3 कांभई सै तिसा धार्मिकता जो नीं जानदे थे सै जे परमेशरा ते मिलां ई, कने सै अपणिया ई धार्मिकता री स्थापना रा जतन करदे रये इस खातर तिन्हे परमेशरा री धार्मिकता नीं स्वीकार कित्ति। 4 मसीहे व्यवस्था रा अन्त कित्या ताकि सै जे कोई विश्वास करां परमेशरा खातर धर्मी ओ।

छुटकारा सबनीं रे खातर

5 धार्मिकता रे बारे च सै जे व्यवस्था ते मिलां ई, मूसा लिखां, “सै जे व्यवस्था रे नियामा पर चलणा तिस तिसरिया वजह ने जिन्दा रहैणा। 6 पर विश्वासा ते मिलणे औली धार्मिकता रे बारे च, शास्त्र ये बोलां, “तू अप्पू ते येह मत पूछदा भई स्वर्गा जो किस जाणा?” (यनिके मसीह जो थल्ले लौणे खातर!) 7 या, “थल्ले पताला च किस जाणा?” (यनिके मसीह जो मूर्इरयां च ते जिन्दा करीने उपर लौणे खातर।) 8 पर शास्त्र ये बोलां, “बचन तेरले आ, तेरे मुँहा पर आ कने तेरे मना चा, “यनि विश्वासा रा सै वचन, तिसरा जे अहें प्रचार करां ये, 9 भई जे तू अपणे मुँहां ते बोलो, “यीशु मसीह प्रभु आ, कने तू अपणे मना ते ये विश्वास करो, भई परमेशरे तिस्सो मूर्इरयां च ते जिन्दा कित्या तां तेरा उद्धार हुणा। 10 कांभई अपणे मना ते विश्वास करने ते माळु धर्मी बणां कने अपणे मुँहा ते तिसरे विश्वासा जो स्वीकार करने ते तिसरा उद्धार हुआं। 11 कांभई पवित्र शास्त्र ये बोलां, “सै जे कोई तिस पर विश्वास करगा तिस शर्मिन्दा नीं हुणा।” 12 ये इस खातर आ भई यहूदियां कने यूनानियां च कोई फर्क नीं आ कांभई सारेयां रा प्रभु त इक इ हाया कने तिसरी दया तिन्हां सारेयां खातर सै जे तिसरा नौं ले अपरम्पार ई। 13 कांभई, “हर कोई सै जे प्रभु रा नौं लेंगा, सै उद्धार पांगा।”

14 पर सै जे तिस पर विश्वास नीं करदे, तिसरा नौं कियां लेंगे? कने सै तिन्हेजे तिसरे बारे च सुणया इ नींआ, तिस पर कियां विश्वास करी पांगे? कने फेरी भला तदुआं तक जे कोई तिन्हांजो उपदेश देणे औळा नीं हो, सै कियां सुणी पांगे? 15 कने उपदेशक तालुआं तक उपदेश कियां देई पांगे, तदुआं तक जे तिन्हांजो भेजया नीं जाओ? तियां जे पवित्र शास्त्रा च लिखीरा, “सुसमाचार लौणे औळयां रे चरण कितने छैळ ये, सै जे खरिआं गल्लां रा सुसमाचार सणवायें।” 16 पर सारेयां तिस सुसमाचारा जो स्वीकार नीं कित्या: यशायाह बोलां, “हे प्रभु, किने अहां रिया खुशखबरिया पर विश्वास कित्या?” 17 इस खातर उपदेश सुणने ते विश्वास पैदा हुआं कने उपदेश ताहली सुणया जां ताहली जे कोई मसीह रे बारे च उपदेश देआं। 18 पर हऊँ बोलां, क्या तिन्हें अहारा उपदेश नीं सुणया?”

सुणया त जरूर आ: कांभई शास्त्रा च लिखीरा, “तिन्हांरी अवाज सारिया धरतिया पर फैलीगी, कने तिन्हारे वचन संसारा रे इक कोणे ते दूजे कोणे तक पुज्गीगे।” 19 पर हऊँ पुछां, “क्या इस्राएली नीं जानदे थे? मूसा बोलां, “पैहले मांह तुहां लोकां रे मना च येदे लोकां रे जरिये सै जे सचमुच कोई जाति नीं ये, जलण पैदा करनी; मांह विश्वासाहीन जाति रे जरिये तुहांजो गुस्सा दिलाणा।”

20 फेरी यशयाह बड़िया हिम्मत ने बोला, "सै जे मिन्जो नीं खोजां थे, तिन्हें हऊँ पाईलया: कने सै जे मिन्जो पुछदे बी नीं थे, तिन्हां पर हऊँ प्रगट हुईया।"

21 पर परमेशरे इस्राएल रे बारे च बोलया, "हऊँ सारा दिन आज्ञा न मनणे औळे

कने अपने विरोधियां रे अग्रे हात्थ फैलान्दा रैया।"

इस्राएल पर परमेशरा री दया

11 तां हऊँ पुछां, क्या परमेशरे अपणयां लोकां जो छडीत्या? विल्कुल नीं! कांभई हऊँ बी इक इस्राएली आ; अब्राहम रे वंशा ते कने बिन्यामीन रे गोता च ते आ। 2 परमेशरे अपने सै लोक नीं छड्डे, सै जे तिने पैहले ते चुणीरे थे। क्या तुहें नीं जानदे भई एलियाह रे बारे च पवित्र शास्त्र क्या बोला, भई सै इस्राएल रे बिरोधा च परमेशरा ने विनती करां? 3 "प्रभु जी, तिन्हे तेरे भविष्यवक्ते मारीते, कने तेरी बेदियां तोड़ीने तहस-नहस करीतियां; कने हऊँ इ कल्हा भविष्यवक्ता बचीरा, कने सै मिन्जो बी मारने रा जतन करीरां ये।" 4 पर परमेशरे तिस्सो क्या जबाब दित्या? "मैं अपने खातर सात हजार लोक बचाईने रखे, तिन्हेजे बाल रे अग्रे मत्था नीं टेकया।" 5 तियां इ आजकल बी कुछ येदे लोक बचीरे सै जे तिसरे अनुग्रह रिया वजह ने चुणीरे। 6 कने जे सै परमेशरा रे अनुग्रह रा नतीजा, तां लोक सै जे कर्म करां ये, ये तिन्हां कर्मां रा फळ नीं आ; नै त परमेशरा रा अनुग्रह, अनुग्रह नीं ठैहरदा।

7 इस खातर नतीजा क्या हुया? ये भई इस्राएल रे लोक तिस्सो जे टोळीरां थे, सै तिन्हांजो नीं मिलया; पर चुणी रेआं जो सै मिलीया, कने बचीरे लोकां रे मन कठोर बनाईते। 8 पवित्र शास्त्रा च लिखीरा,

"परमेशरे तिन्हांजो बेहोशिया री आत्मा दित्ती, येदियां अक्खीं दित्ती सै जे देखी नीं सकदियां थी कने येदे कात्र दित्ते सै जे सुणी नीं सकदे थे, कने ठीक ये ई दशा आज तक बणीरी।"

9 कने दाऊद बोलां, "तिन्हांरी रोटी तिन्हारे खातर जाळ कने फन्दा बणी जाओ,

सै उजड़ी जाओ कने तिन्हांजो सजा मिलो।

10 तिन्हा रियां अक्खीं धुन्धली हुई जाओ ताकि सै देखी नीं सक्रो, कने तू तिन्हां री कमर पीडां ने हमेशा खातर झुकाईने रख।"

11 इस खातर हऊँ बोलां क्या तिन्हे इस खातर ठोकर खादि भई सै रूढ़ीने मरी जाओ? विल्कुन नीं! वल्कि तिन्हारे गलती करने ते गैर-यहूदी लोकां जो छुटकारा मिलया ताकि यहूदियां च जळण पैदा हो। 12 इस खातर तिन्हारे गलती करने रा मतलब सारे संसारा रा बड्डा फायदा हाया कने जे तिन्हारे भटकणे ते गैर-यहूदिआं रा लाभ आ, तां तिन्हां रिया भरपूरिया ते त बडा किछ हुई सक्रां।

अन्य जातियां रा छुटकारा: कलम लगाणे रा उदाहरण

13 यह हुण हऊँ तुहाने बोली करां, सै जे यहूदी नीं ये, कांभई हऊँ खासकर होरीं जातियां रे खातर प्रेरित आ, तां हऊँ अपने कम्मा रे प्रति पूरा प्रयत्नशील आ, 14 इस आशा ने भई हऊँ अपने लोकां च बी जळण पैदा करी सकूँ कने तिन्हां च ते कइयां लोकां रा उद्धार करी सकूँ। 15 कांभई जे परमेशरा रे जरिये तिन्हारे इन्कार कित्ते जाणे ते संसारा च परमेशरा सौंगी मेल-मलाप पैदा हुआं तां फेरी तिन्हारा अपनाया जाणा क्या मूर्खियां च ते ज्युन्दा कित्या जाणा नीं हुणा? 16 तां जे भेन्टा रा पैहला पेडा पवित्र आ, तां गुन्होरा पूरा अट्टा बी पवित्र हुया; जे डाळा री जड़ पवित्र ई, तां तिस रियां डाळिया बी पवित्र हुईयां।

17 जे कुछ डाळियां तोड़ी दित्तियां जाओ, कने तू जे इक जंगली जैतूना री इक डाळी ओ तिस पर कलम करी दित्ती जाओ कने सै जैतून रे खरेयां डाळां री जडां री शक्तिया रा हिस्सा हुईया, 18 तां तिजो तिन्हा डाळियां रे अग्रे, सै जे तोड़ीने सट्टी तरियां घमण्ड नीं करना चाहिन्दा; कने जे तू घमण्ड करां तां याद रखयां ये तू नीं आ सै जे जडां जो पालीरां, वल्कि येत सै जड़ ई सै जे तिजो पाळी राई। 19 हुण तू बोलणा, "हां, पर डाळियां इस खातर तोड़ियां भई

मेरी कलम लगी जाओ।" 20 ये सच्च आ, सै अपने विश्वासा रिया वजह ने तोड़ीने सट्टी तियां, पर तुहें अपने विश्वासा रे दमा पर अपणिया जगह टिकीरे रैयां, इस खातर इसरा घमण्ड देखां करदा बल्कि डरदा रैयां, 21 कांभई तां जे परमेशरे स्वाभाविक डाळियां जो नीं छडया तां तिस तिजो बी नीं रैहणे देणा। 22 इस खातर तू परमेशरा रिया कोमलता जो देख कने तिस रिया कठोरता पर ध्यान दे। सै कठोरता तिन्हांरे खातर ई सै जे रूढ़ीगे पर तिसरी करुणा तेरे खातर ई, तू अप्पू पर तिसरा अनुग्रह बणीरा रैहणे दे नैत डाळा ते तू बी बड्डी ने सट्टी दित्या जाणा। 23 सै बी जे अविश्वासा च नीं रओ तां सै बी डाळा ने जोड़ी दित्ते जाणे; कांभई परमेशर तिन्हांजो भीं ते जोड़ने च सामर्थी आ। 24 कांभई जे तू तिस जैतूना रे डाळा ते, सै जे स्वाभावा च जंगली आ, बड्डया कने तिसरे स्वाभावा रे बिरुद्ध खरे जैतूना रे डाळा पर लगाया, तां ये जे तिस डाळा री अपणियां ई डालियां ईयां, अपने ई डाळा ने सानिया ने फेरी भीं कां नीं जोड़ी जाणियां।

सारे इस्राएल रा छुटकारा

25 मेरे भाईयो हऊँ तुहां जो इस छुपीरे सच्चा ते अन्जाण नीं रखणा चाहन्दा। (भई तुहें अप्पू जो बुद्धीमान समझणे लगे) भई इस्राएल रे कुछ लोक येदे ई कठोर बनाई दित्तिरे, कने येदे इ कठोर बणीने रैहणे तदुआं तक जे भई कई गैर-यहूदी लोक परमेशरा रे परिवारा रे अंग नीं बणी जान्दे। 26 कने इस तरीके ने सारे इस्राएला रा उद्धार होणा। तियां जे शास्त्रा च लिखीरा, "उद्धार करने औळा सिंय्योन ते औणा, कने तिस याकूब रे परिवारा ते सारी बुराईयां दूर करनियां; 27 कने तिन्हां सौंगी मेरी ये वाचा तां हुणी, ताहली जे हऊँ तिन्हांरे पापां जो दूर करी देंगा।" 28 तित्थी तक जे खुशखबरिया रा सबन्ध आ, सै तुहारे हिता च परमेशरा रे दुश्मण ये, पर तित्थी तक जे परमेशरा रे चुणे जाणे रा सबन्ध आ, सै तिन्हांरे पुरखयां जो दित्तिरे बचना रे मुताबिक परमेशरा रे प्यारे हुये। 29 कांभई परमेशर तिस्सो जे सदां कने तिस्सो जे सै देआं तिस रिया तरफा ते अपना मन कदीं बीं देखां बदलदे। 30 कांभई तियां जे तुहें लोक पैहले कदी परमेशरा री आज्ञा नीं मनदे थे, पर हुण तिसरे आज्ञा नीं मनणे ते तुहां पर दया हुई; 31 तियां ई तिन्हें बी हुण आज्ञा नीं मन्नी, भई तुहां पर सै जे दया हुआं ई इसते तिन्हां पर बी परमेशरा री दया ओ। 32 कांभई परमेशरे सारियां लोकां जो अबज्ञा रिया जेला च इस खातर पाईने रखीरा भई सै तिन्हां पर दया करी सक्रो।

परमेशरा री स्तुती

33 ओह! परमेशरा री करुणा, बुद्धी कने ज्ञान कितणे अपरम्पार ये। तिसरे विचार कितणे बडे, कने तिसरे रस्ते कितणे गूढ ये। शास्त्र बोलां:

34 "परमेशरा रे मना जो कुण जाणां?

कने तिस्सो सलाह देणे औळा कुण हुई सक्रां?

35 परमेशरा जो किन्हीये क्या दित्या भई

सै किसी जो तिसरे बदले कुछ देओ?"

36 कांभई सब्बीरा रचणे औळा सै ई हाया। तिसते इ सारे स्थिर ये कने ये तिसरे इ खातर आ, तिसरी सदा महिमा ओ: आमीन।

परमेशरा रिया सेवा रा जीबन

12 इस खातर मेरे भाईयो, परमेशरा रिया दया री आद दिलाईने हऊँ तुहाने विनती करां भई अपने जीवना जो इक जिन्दा बलिदाना रे रुपा च परमेशरा जो खुश करदे हुये अर्पण करा। ये तुहारी आत्मिक सेवा ई सै जे तुहां तिसरो चुकाणी। 2 हुण होर अग्रे इस दुनिया रिया रीता पर मता चलदे बल्कि अपने मनां जो नौवा करीने अप्पू जो बदला ताकि तुहांजो पता लगी जाओ भई परमेशर तुहां खातर क्या चाँह। यानि सै जे उत्तम आ, सै जे तिस्सो खरा लगां कने सै जे पूरा।

3 इस खातर तिसरे अनुग्रह रिया वजह ने सै उपहार जे तिने मिन्जो दित्या, तिस्सो ध्याना च रखदे हुये हऊँ तुहां च ते हर इक्की ने बोलां, भई तेढा जे समझणा चाहिन्दा तिसते बधीने कोई खुद अप्पू जो नीं समझे; यनिके जितणा विश्वास तिने तुहांजो दित्या, तिसरे मुताबिक अप्पू जो समझणा

चाहिन्दा। 4 कांभई तियां जे अहां च ते हर इक्की रे शरीरा च मते सारे अंग ये, चाहे सारे अंगां रा काम्म इक्को जेआ नीं आ; 5 तियां इ अहें कर्ई ये, पर मसीह च अहें इक शरीरा रे रूपा च हुई जायें, इस तरीके ने हर इक अंग इक दूजे अंगा ने जुडी जां। 6 तां फेरी तिसरे अनुग्रह रे मुताबिक अहांजो लग-लग बरदान मिलीरे, अहें तिन्हांरा इस्तेमाल करिये, जे किसी जो भविष्यवाणिया रा दान मिलीरा, तां सै अपने विश्वासा रे मुताबिक भविष्यवाणी करे; 7 जे किसी जो सेवा करने रा बरदान मिलीरा, तां सै अप्पू जो सेवा रे खातर अर्पण करे; जे कोई सखाणे औळा हो, तां सै सखाणे च लगीरा रौ; 8 जे कोई सलाह देणे जो आ, तां तिस्सो सलाह देणी चाहिन्दी; जे किसी जो दान देणे रा उपहार मिलीरा, तां तिस्सो दिल खोल्हीने दान देणा चाहिन्दा; जे किसी जो अगुआई करने रा उपहार मिलां, तां सै मन लाईने अगुआई करे; सै जे दया करो, सै खुशिया ने करो।

9 तुहांरा प्यार सच्चा ओ; बुराईया ते नफरत करा; भलाई करदे रौआ। 10 भाईचारे रे प्यारा च इक्की दूजे रे प्रति समर्पित रौआ, अप्पू चियें इक्की दूये जो आदरा सौगी अपने ते जादा मन्ना। 11 कोशिश करने च आलसी नीं होआ; आत्मा रिया लोई च चमका; परमेशरा री सेवा करदे रौआ। 12 अपणिया आस्सा च खुश रौआ; परेशानियां च हौंसला रखा; हमेशा प्रार्थना करदे रौआ। 13 परमेशरा रे लोकां री जरूरतां च हात्थ बटावा; परौणयां रे आदर सत्कारा रे मौके खोजदे रौआ।

14 अपने सताणे औळ्यां जो शीश देवा; तिन्हांजो श्राप नीं देवा, शीश देवा। 15 खुश रहणे औळ्यां सौगी खुश रौआ, रोगे औळ्यां ने रोआ। 16 मेल मिलाणा ने रौआ, घमण्ड मता करदे, पर दीनां सौगी संगती रखा; अप्पू जो बुद्धीमान नीं समझा। 17 बुराईया रा बदला किसी जो बुराईया ने मता देन्दे; सारेआं लोकां रिया नजरां च सै जे ठीक आ तिसजो इ करने री सोचा। 18 तिन्थी तक जे बणी जाओ सारेयां माहुआं सौगी शान्तिया ने रौआ। 19 किसीने खुद अप्पू बदला नीं लेणा मेरे मित्रो, पर इस्सो परमेशरा रे कोपा पर छडी देवा कांभई पवित्र शास्त्रा च लिखीरा: प्रभुये बोलया बदला लेणा मेरा काम्म आ, मांह ई बदला देणा।" 20 पर "जे तेरा दुश्मण भूक्खा ओ तां तिस्सो खाणे जो रोटी दे, जे सै त्याहा तां तिस्सो पीणे जो पाणी दे; कांभई जे तू येदा करां तां सै तेरते शर्मिन्दा हुणा।" 21 बुराईया ते मत हार पर अपणिया नेकिया ते बदिया जो हरा।

राज्य रे परति कर्तव्य

13 हर इक्की माहुये जो अधिकारियां रे अधीन रहणा चाहिन्दा, कांभई कोई अधिकार येदा नीं आ सै जे परमेशरा रिया तरफा ते नीं आ; कने सै जे अधीकार हाये, सै परमेशरे दित्तीरे। 2 इस खातर सै जे सत्ता रा बिरोध करां सै परमेशरा रिया आज्ञा रा बिरोध करां, कने सै लोक जे परमेशरा रिया आज्ञा रा बिरोध करां ये, तिन्हांजो सजा भुगतणे पौणी। 3 कांभई देख्वा राजा तिस माहुये जो, सै जे नेकी करां, तिस्सो नीं डरान्दा, पर तिस माहुये जो डरां, सै जे बुरे काम्म करां। जे तुहें राजे ते नीं डरना चाहन्दे ओ, तां भले काम्म करदे रौआ, तुहांजो राजे रिया तरफा ते सराहना मिलणी; 4 सै जे राजा सै परमेशरा रा सेवक आ, सै तेरा भला करने खातर आ, पर जे तू बुरा करां तां तिसते डर कांभई तिसरी तलवार वेकार नीं; सै परमेशरा रा सेवक आ सै जे बुरा काम्म करने औळ्यां पर परमेशरा रा कोप ल्यावां। 5 इस खातर समर्पण जरूरी आ न सिर्फ डरा रिया वजह ने बल्कि तुहांरी अपणी चेतना रे कारण। 6 इस खातर तुहें टैक्स बी दें कांभई अधिकारी परमेशरा रे सेवक ये सै जे अपने फर्जा जो पूरा करने च लगीरे रैंये। 7 जिस किसी माहुये री देणदारी जे तिजो देणे जो ई, तिसाजो तू चुकता कर; सै कर जे तिजो देणे जो आ, तिस्सो दे। तिसरी चुँगी जे तूह पर निकलां ई, तिसजो चुँगी दे; तिसते जे तिजो डरना चाहिन्दा, तू तिसते डर; तिसरा जे आदर करना चाहिन्दा, उसरा आदर कर।

इक-दूजे रे परति कर्तव्य

8 इक्की दूजे रे प्यारा ते इलावा किसी गल्ला च किसी रे कर्जदार नीं हुआ; कांभई सै जे अपने साथियां ने प्यार करां, सै येदा करीने व्यवस्था जो ई पूरा

करां। 9 हऊँ ये इस खातर बोली करां, "व्यभिचार मत कर, खून मत कर, चोरी नीं कर, लालच मत रख।" कने इन्हांजो छडी ने होर कोई बी आज्ञा ओ तां सब्बीं रा निचोड इसा गल्ला च पाया जां, "अपणे पडेसिये ने अप्पू साई प्यार कर।" 10 प्यार अपने साथिये रा बुरा कर्दी नीं करदा, इस खातर प्यार करना व्यवस्था रे विधाना जो पूरा करना हुया।

11 ये सब कुछ तुहें इस खातर करा भई तेदे जुगा च जे तुहें जीं करां ये, तिस्सो जाणा ये, तुहें जाणां ये भई तुहांरे खातर अपणिया नींदा ते जागणे रा वगत आईगरा, कांभई जिस वगत अहें विश्वास कित्या था, तिसा घडिया रे विचारा ने अहांरा उद्धार हुण तिसते होर नेडे आ। 12 रात तकरीबन पूरी हुई चुक्कीरी, कने दिन सिरने जो आ; इस खातर आवा अहें तिन्हां कम्मां ते छुटकारा पाई लेईये सै जे अन्धकारा रे काम्म ये, आवा अहें लोई रे हथियारां जो पैहनी लेईये। 13 इस खातर अहें तियां ई ठीक तरीके ने रैईये, तियां जे दिने रैंये, मती सारी धाम्मां च जाईने खाई पी ने टक्की नीं हुई जावा, लुच्चा पन, दुराचार, व्यभिचारा च नीं पौवा, न झगडे कने न ई हिरख करा। 14 बल्कि प्रभु यीशु मसीह जो पछ्याणा, कने शरीरा री इच्छां जो पूरा करने ची नीं लगीरे रौआ।

अपणे भाईये पर दोष मता लगान्दे

14 तिसरा विश्वास जे कमजोर आ तिसरा बी स्वागत करा, पर तिस रियां शंका पर लडाई करने खातर नीं। 2 कोई मन्नां भई सै सब किछ खाई सकां, पर कोई कमजोर माहु बस साग-पत्ते ई खां। 3 तां सै सै जे हर किस्मा रा खाणा खां, तिस्सो सै माहु घटिया नीं समझणा चाहिन्दा सै जे कुछ चीजां नीं खान्दा, तिस्सो सब किछ खाणे औळे जो बुरा नीं बोलणा चाहिन्दा; कांभई परमेशरे तिसजो ग्रहण कित्या। 4 तू किसी दूजे घरा रे सेवका पर इल्जाम लगाणे औला कुण हुआं? तिसरा टिकीरा रहणा या गलत होणा तिसरे स्वामिये पर निर्भर करां; बरना सै पक्का करी दित्या जाणा, कांभई प्रभु इ तिस्सो पक्का करीने टिकी रहणे री ताकत देई सकां। 5 कोई त इक्की दिना जो दूजे दिना ते बधीने मन्नां, कने दूजा तिस्सो सारेयां दिनां रे बराबर मन्नां। तां हर इक अपने मना च निश्चा करी लो। 6 सै जे किसी खास दिना जो मन्नां सै तिस्सो प्रभुये जो आदर देणे खातर इ मन्नां। कने सै जे सब किछ खां, सै बी प्रभु जो आदर देणे खातर इ खां, कने सै जे नीं खान्दा, सै बी येदा इस खातर करां कांभई सै बी प्रभु जो इ आदर देणा चाँह। सै बी परमेशरा जो इ धन्यवाद देआं। 7 अहां च ते कोई बी न त अपने खातर जीआं, कने न अपने खातर मरां। 8 जे अहें जिन्दा ये, तां प्रभु खातर जिन्दा ये; कने जे मरां ये, तां बी प्रभु रे खातर मरां ये; इस खातर चाहे जीयें या मरें, अहें हाये त प्रभुरे इ। 9 कांभई मसीह इस इ खातर मरया कने जिन्दा बी हुया भई सै मुईरियां कने ज्युन्दयां दूईं रा प्रभु हुई सको।

10 तू अपने भाईये पर कजो दोष लगा? या तू अपने विश्वासा च कमजोर भाईये जो घटिया कजो मन्नां? अहां सारेयां जो परमेशरा रे न्याय रे संघासणा रे अगे खदने पौणा। 11 कांभई लिखीरा:

"प्रभुये बोलया, मेरी जिन्दगीया री सगन्द

भई हर किसी जो मेरे सामणे घुटने टेकणे पौणे, कने हर जुबान परमेशरा जो पछ्याणगी।" 12 इस खातर अहां च ते हर इक्की जो परमेशरा रे अगे अपना लेखा-जोखा देणे पौणा।

अपणे भाईये रे उजडने रा कारण मता बणदे

13 इस खातर अहांजो अप्पू चीयें दोष लगाणा बन्द करी देणा चाहिन्दा, कने ये निश्चा करिये भई अपने भाईये रिया बाटा च अहें कोई मुशीबत नीं खडी करिये कने न ई तिस्सो पाप करने खातर मजबूर करिये। 14 हऊँ जाणां कने प्रभु यीशुये च मिन्जो निश्चा हुया भई अपने आप च कोई चीज अपवित्र नीं, सै सिर्फ तिसरे खातर अपवित्र ई, सै जे तिस्सो अपवित्र मन्नां; तिसरे खातर तिसरा खाणा ठीक नीं आ। 15 जे तेरे भाईये जो तेरे खाणे रिया वजह ने चोट लगां ई, तां फेरी तेरे बतावा च प्यार नीं आ; तिसरे खातर जे मसीह मरया, तिसजो तू अपने खाणे रे खातर मत खत्म करदा। 16 इस खातर सै जे तेरे खातर ठीक आ तिसरी निन्दा नीं होणे दे। 17 कांभई परमेशरा रा राज

सिर्फ खाणा पीणा ई नीं आ, वल्कि सै त धर्म, शान्ति कने पवित्र आत्मा ते मिली रा आनन्द आ। 18 सै जे कोई इस तरीके ने मसीह री सेवा करां, तिसते परमेशर खुश रैयां कने लोक तिससो इज्जत दें। 19 इस खातर अहें तिन्हां गल्लां च लगीरे सै तिन्हांते जे शान्ति मिलदी सै कने तिसते इक दूजे री आत्मिक बढ़ौतरिया च सहायता मिलां ई। 20 खाणे रे खातर परमेशरा रे कम्मा जो नीं बगाडा। हरेक किस्मा रा खाणा पवित्र आ, पर तिस माहुये रे खातर बुरा सै जे किसी होर भाईये जो पापा रे रस्ते पर लेई जां। 21 बधिया त ये आ भई तू नां त मास खाओ, नां त शराब पीओ, कने नां होर कुछ बी येदा करना ठीक आ सै जे तेरे भाईये जो पापां च धकेल्लां। 22 अपणे विश्वासौ, परमेशरा रे सामणे अपणे ई मना च रख। धन्य सै आ सै जे तिसा गल्ला च, तिसाजो जे सै ठीक समझां, खुद अप्पू जो दोषी नीं बगान्दा। 23 पर सै जे बैहम करीने खां सै सजा रे लायक आ, कांभई सै विश्वासा ने नीं खान्दा; कने सै सब किछ सै जे विश्वासा पर नीं टीकिरा, सै पाप आ।

दूज्यां री उन्नति करा

15 अहें जे आत्मिक रुपा च मजबूत ये, तां अहांजो तिन्हा रियां कमजोरियां सैहणी चाहिन्दी सै जे विश्वासा च मजबूत नीं ये, नां कि सिर्फ अप्पू जो ई खुश रखिये। 2 अहां च ते हर इक अपणे पडेसिये जो तिसरी अच्छाईयां रे खातर इस भावना ने भई तिसरी आत्मिक उन्नती ओ, तिन्हांजो खुश करिये। 3 येथी तक भई मसीहे बी खुद अप्पू जो खुश नीं कित्या था, पर तियां जे भई मसीह रे बारे च पवित्र शास्त्र बोलां: “तिन्हांरा अपमान तिन्हे जे तेरा अपमान कित्या, माह पर आईया।” 4 हर सै गल्ल सै जे पवित्र शास्त्रा च पैहले ते लिखीरी, सै अहांजो शिक्षा देणे खातर थी ताकि जो धीरज कने बढ़ावा पवित्र शास्त्रा ते मिलां, अहें तिसते आशा पाई सक्को। 5 धीरज कने शान्तिया जो देणे ओळा परमेशर तुहांजो ये बरदान देओ भई मसीह यीशुये रे मुताबिक अप्पू चीयें इक मन हुईने सै। 6 ताकि तुहें सारे इक मन कने इक्की अवाजा च अहारे प्रभु यीशु मसीह रे पिता परमेशरा री जय-जय कार करो।

सबनीं रे खातर खुशखबरी

7 इस खातर तियां जे मसीहे परमेशरा री महिमा खातर तुहांजो ग्रहण कित्या, तियां ई तुहें बी इक्की दूजे जो ग्रहण करा। 8 इस खातर हऊं तुहां लोकां जो दरसां भई सै बचन जे बाप दादयां जो दित्तीरे थे तिन्हांजो मजबूत करने खातर मसीह, परमेशरा रिया सच्चाईया रा प्रमाण देणे खातर, खतना कित्तिरे लोकां रा सेवक बणया; 9 ताकि होर जातिं रे लोक बी परमेशरा जो तिस रिया दया खातर महिमा देई सक्को; पवित्र शास्त्रा च लिखीरा: “इस खातर हऊं जाति-जाति रे लोकां बिच तेरा धन्यवाद करगा, कने तेरे नौवा रे भजन गांगा।” 10 कने ये बी बोलया, “हे जाति-जाति रे सारे लोको, परमेशरा रे चुणीरे लोकां सौगी खुश सैआ।” 11 फेरी पवित्र शास्त्र ये बी बोलां, “हे जाति-जाति रे सारे लोको, तुहें प्रभुरा गुणगान करा: कने लग-लग प्रदेशा रे सारे लोको, तिसरी सराहना करा।” 12 कने फेरी यशायाह बी बोलां, “यिश्शै रा इक वंश परगट होणा, सै जे जाति-जाति रा हाकिम होणे रे रुपा च उभरना, तिस पर होरी जातियां रे लोकां आस रखणी।” 13 सारियां आसां रा देणे ओळा परमेशर तुहांजो सारे आनन्द कने शान्तिया ने भरी दो, तियां जे भई तिसच तुहांरा विश्वास आ, ताकि पवित्र आत्मा रिया शक्तिया ते तुहें आसा ने भरी जाओ।

हौंसले ने लिखणे री बजह

14 मेरे भाईयो, मिन्जो खुद तुहारे उपर भरोसा भई तुहें अच्छाईयां ने कने परमेशरा रे ज्ञाना च पूरे भरीरे, कने इक्की दूये जो शिक्षा देई सक्कां ये। 15 पर तुहांजो भी ते आद करवाणे खातर मैं किछ विषयां रे बारे च बडे हौंसले ने

लिखया। ये तिस अनुग्रह ने हुया सै जे परमेशरे मिन्जो दित्तिरा, 16 भई हऊं होरीं जातियां रे खातर यीशु मसीह रा सेवक बणीने परमेशरा रिया खुशखबरिया खातर इक याजका रे रुपा च काम्म करूँ, ताकि गैर-यहूदी परमेशरा रे अग्रे स्वीकार करने लायक भेन्ट बणी सक्को, कने पवित्र आत्मा रे जरिये परमेशरा रे तैई पूरे तरीके ने पवित्र बणो। 17 इस खातर यीशु मसीह च इक माहु होणे रे नाते परमेशरा रे प्रति अपणिया सेवा रा मिन्जो गर्व आ। 18 कांभई हऊं सिर्फ तिन्हां ई गल्लां जो बोलणे री हिम्मत करी सक्कां तिन्हां जे मसीहे गैर-यहूदीयां जो परमेशरा री आज्ञा मनणे रा रस्ता दसणे रा काम्म मेरे वचनां, मेरे कम्मां, 19 कने चिन्ह कने चमत्कारां रे कम्मां री शक्तिया कने परमेशरा रिया आत्मा री सामर्थ्य ने, मेरे जरिये पूरा कित्या; येथी तक भई यरुशलेम ते लेईने इल्लुरिकुम रे चहुँ पासयां मसीह री खुशखबरिया रे उपदेशा रा काम्म मैं पूरा कित्या। 20 पर मेरे मना च सदा येह इच्छा रैई भई हऊं यीशु मसीह रिया खुशखबरिया रा प्रचार तिसा जगह करूँ, तिन्ही जे कोई मसीह रा नाँ तक नीं जाणदा हो; ताकि हऊं किसी दूजे माहुये री नीऊआं पर घर नीं बणाई सक्को। 21 पर पवित्र शास्त्र बोलां: “तिन्हांजो जे तिसरे बारे च नीं दरस्सीरा, सै तिसजो देखगे कने तिन्हेजे सुणीरा तक नीं आ, सै समझगे।”

रोम यात्रा री पौलुसा री योजना

22 मेरे ये फर्ज मिन्जो तुहांले ओणे ते बार-बार रोकदे रैये। 23 पर हुण इन्हां प्रदेशां च कोई जगह नीं बचीरी, कने कईयां बरसां ते हऊं तुहांने मिलणे री इच्छा करदा रैया। 24 इस खातर ताहली जे हऊं स्पेन जांगा ता उम्मीद करां भई तुहांने जरुर मिलगा, मिन्जो पक्की उम्मीद ई भई स्पेन जान्दे हुये तुहांने मुलाकात हुणी, तुहां सौगी कुछ दिन रुकणे रा नन्द लेणे ते बाद मिन्जो आस ई भई उत्थी रिया यात्रा खातर मिन्जो तुहांरी सहायता मिलगी। 25 पर हुण त हऊं परमेशरा रे पवित्र लोकां री सेवा करने खातर यरुशलेम जाई करा। 26 कांभई मकिदुनिया कने अखया री कलीशिया रे लोकें यरुशलेम च परमेशरा रे पवित्र लोकां च सै जे गरीब ये, तिन्हांरे खातर कुछ चन्दा देणे रा निश्चा कित्या। 27 हां, तिन्हांरे प्रति तिन्हांरा फर्ज बी बणां कांभई जे होर जाति रे लोक तिन्हां रिया आत्मिक गल्लां च भगीदार हुये, तां तिन्हा जो बी जरुरी आ भई तिन्हांरे खातर बी भौतिक सुख जुटाणे चाहिन्दे। 28 इस खातर हऊं ये सारा काम्म निपटाईने कने तिन्हांजो कड्डा कित्तीरा ये चन्दा सम्भाली ने तिन्हांरे हत्था च देई औवां, फेरी हऊं तुहारे नगरा चीयें औन्दा हुआ स्पेन जो चली जान्गा। 29 कने हऊं जाणां भई ताहली जे मांह तुहांले ओणा, तां तुहारे खातर मसीह रे पूरे आशीवादां सौगी ओणा। 30 मेरे भाईयो, अहारे प्रभु यीशु मसीह कने पवित्र आत्मा ते सै प्यार जे अहांजो मिलां, तिसरी गवाही देईने प्रार्थना करां भई तुहें मेरिया तरफा ते परमेशरा रे प्रति सच्ची प्रार्थनां च मेरा साथ देवा 31 भई हऊं यहूदिया च अविश्वासियां ते बचीरा रऊं, कने यरुशलेम रे खातर मेरी सेवा जो परमेशरा रे पवित्र लोक स्वीकार करो; 32 ताकि परमेशरा रिया इच्छा रे मुताबिक हऊं खुशिया ने तुहांले आईने तुहां सौगी खुशी मनाई सक्को। 33 शान्ति देणे ओला परमेशर तुहां सौगी रओ। आमीन।

ब्यक्तिगत अभिवादन

16 हऊं किस्त्रिया री कलीशिया री खास भगतणिया अहांरी बैहण फीबे री तुहांने सपारस करां 2 भई तुहें, तिसा जो प्रभु च इसा रीता ने ग्रहण करा; तेदा चाल-चलन जे परमेशरा रे लोकां रे लायक ओ; तिसाजो तुहांते जिस् बी चीजा री जरुरत ओ सबी किछी ने तिसारी सहायता करा कांभई सै मेरे सौगी कईयां रा उपकार करने ओली थी।

3 प्रिस्का कने अक्विला जो मेरी नमस्ते। सै यीशु मसीह च मेरे साथी ये। 4 तिन्हे मेरा प्राण बचाणे खातर अपणी जिन्दगी बी दावा पर लगाईती थी; कने सिर्फ हऊं इ नीं, पर होर जातियां री सारी कलीशियां बी तिन्हांरा धन्यवाद करां ईयां। 5 तिसा कलीशिया जो बी मेरा नमस्कार सै जे तिन्हांरे घरें ई। मेरे प्यार मित्र इपनितुस जो मेरा नमस्कार सै जे आसिया च मसीह जो अपनाणे ओळा पैहला था। 6 मरियमा जो, तिसै जे तुहारे खातर कडी मेहणत कित्ति, नमस्ते। 7 मेरे रिस्तेदार अन्द्रनीकुस कने यूनियास जो, सै जे

मेरे सौगी जेला च थे, खास कने मसहूर प्रचारक थे, कने सै माहते बी पैहले मसीह च थे, नमस्कार।⁸ अम्पलियातुस जो, सै जे प्रभु च मेरा प्यारा, नमस्कार।⁹ मसीह च अहारे साथी उरबानुस कने मेरे प्यारे मित्र इस्तुखुस जो नमस्कार।¹⁰ मसीह च खरे कने सच्चे निकले अपिल्लेस जो नमस्कार। अरिस्तुबुलुस रे परिवारा जो नमस्कार।¹¹ मेरी रिस्तेदार यहूदी साथी हिरोदियोन जो नमस्ते। नरकिस्सुस रे परिवारा रे तिन्हां लोकां जो नमस्ते सै जे प्रभु पर विश्वास करां ये।¹² त्रुफेना कने त्रफोसा जो सै जे प्रभु च मेहणती सेबिकां इयां, नमस्कार। मेरी प्यारी परसिस जो, तिने जे प्रभु च कड़ी मेहणत कीत्ति, मेरा नमस्कार।¹³ प्रभु रे असाधारण सेवक रुफुस जो कने तिस रिया मौआ जो, सै जे मेरी बी मौ रई, नमस्कार।¹⁴ असुंक्रितुस, फिलगोन, हिर्मोस कने तिसरे साथी भाईयां जो नमस्कार।¹⁵ फिलुलुगुस, यूलिया, नेर्युस कने तिसरी बैहण उलुम्पास कने तिन्हारे सारे साथी सन्तां जो नमस्कार।¹⁶ तुहें लोक गळे लगिने इक्की दूये रा स्वागत करा। तुहांजो मसीह री सारी कलीसीयां रिया तरफा ते नमस्कार।

आखरी निर्देश

¹⁷ हुण मेरे भाईयो, हऊं तुहांते विनती करां, भई तुहें सै जे शिक्षा लेई, तिसरे उलट तुहां च सै जे फूट पां कने दूज्यां रे विश्वासा जो बगाडां ये, तिन्हांते साबधान हुई जावा कने तिन्हांते दूर रौआ।¹⁸ कांभई ये लोक अहारे प्रभु यीशु मसीह री नीं बल्कि अपने पेटा री सेवा करां ये; कने अपणी चिकनी चुपड़ी गल्लां ते सिधे-साधे मना रे लोकां जो बहकार्ये।¹⁹ तुहांरी आज्ञाकारिता

रे चर्चे बाहर हर किसी तक पुज्जी चुक्कीरे, इस खातर तुहांते हऊं बड़ा खुश आ, पर हऊं चॉह भई तुहें भलाईया खातर बुद्धीमान बणीरे रौ पर बुराईया खातर भोले बणीरे रौ।²⁰ शान्तिया रे परमेशरा इकदम शैतान पैरां हेठ दली देणा। अहारे प्रभु यीशु मसीह रा तुहां पर अनुग्रह ओ।

²¹ मेरने काम्म करने औळे मेरे साथी तीमुथियुस कने मेरे यहूदी दोस्त लूकियुस, यासोन कने सोसिपत्रुस रिया तरफा ते तुहांजो नमस्कार।²² इसा पत्रिया रे लेखक हऊं तिरतियुस रा प्रभु च तुहांजो नमस्कार।²³ मेरे कने सारी कलीसीयां रा आदर सत्कार करने औळे गयूस रा तुहां जो नमस्कार। इरास्तुस सै जे नगरा रा खजान्ची आ कने अहारे बन्धु क्वारतुस रा तुहांजो नमस्कार।²⁴ अहारे प्रभु यीशु मसीह रा अनुग्रह तुहां सबनीं ने रौ। आमीन।

परमेशरा री स्तुति

²⁵ तिसरी महिमा ओ सै जे तुहांरे विस्वासा रे मुताबिक यनिके यीशु मसीह रे समाचारा री तिसा खुशखबरिया रा जे हऊं प्रचार करां तिसरे मुताबिक तुहांजो मजबूत बनाणे च सामर्थ ई; परमेशरा रे भेदा री ये लोय सै जे युगां-युगां तक छुपीरी थी, ²⁶ पर तिसजो अनन्त परमेशरा रे हुक्मा ते भविष्यवक्तयां रे लेखां रे जरिये हुण अहांजो कने गैर-यहूदियां जो परगट करीने दस्सीत्या, तिसते जे विश्वासा ते पैदा होणे औली आज्ञाकारिता पैदा हुई जाओ।²⁷ तिस इकलौते ज्ञानवान परमेशरा री महिमा यीशु मसीह रे जरिये युगां-युगां तक हुन्दी रौ। आमीन।

1 कुरिन्थियों

अभिवादन

1 पौलुसा रिया तरफा ते सैं जे परमेशरा रिया इच्छा ते यीशु मसीह रा प्रेरित हुणे खातर सद्विरा कने भाई सोस्थिनेसा रिया तरफा ते, 2 परमेशरा रिया तिसा कलीसिया रे नौं सैं जे कुरिन्थुस च हई, मतलब तिन्हां रे नौं सैं जे मसीह यीशु च पवित्र कित्ते गईरे, कने पवित्र हुणे खातर सद्दी रे; कने तिन्हां सर्बी रे नौं भी सैं जे हर जगहा आहां रे कने अपणे प्रभु यीशु मसीह रे नौं ते प्राथना करां ये। 3 अहां रे पिता परमेशर कने प्रभु यीशु मसीह रिया तरफा ते तुहां जो अनुग्रह कने शान्ति मिलदी रहो।

मसीह च अशीषां

4 हऊं तुहां रे बारे च अपणे परमेशरा सदा धन्यवाद करां, इस खातर भई परमेशरा रा ये अनुग्रह तुहां पर प्रभु यीशु मसीह च हुआ 5 भई तिस च हुई ने तुहें हर गला च, मतलब सारे वचन कने सारे ज्ञाना च धनी कित्ती रे- 6 भई मसीह री गवाई तुहां च पक्की निकलो- 7 येथी तका भई किसी वरदाना च तुहां जो घटी नीं हो, कने तुहें आहां रे प्रभु यीशु मसीह रे प्रगट हुणे रा रस्ता नद्यालय रां ये। 8 तिस तुहां जो आखरा तका पक्के भी करना भई तुहें आहां रे प्रभु यीशु मसीह रे दिना च निर्दोष ठहरो। 9 परमेशर सच्चा आ, तिन्हें जे तुहां जो अपणे पुत्र आहां रे प्रभु यीशु मसीह रिया संगतिया च सदी रा।

कलीसिया च फूट

10 हे भाईयो, हऊं तुहां ने आहां रे प्रभु यीशु मसीह रे नौं ने विनती करां भई तुहें सब इक ई गल्ल बोलो, कने तुहां च फूट नीं पओ, पर इक मन, कने इक ई मत हुई ने मिली ने रओ। 11 काँ भई हे मेरे भाईयो, खलोए रे घराने रे लोकें मिन्जो तुहां रे बारे च सद्दी रा भई तुहां च झगडे हुये रांये। 12 मेरे कैहूँ रा मतलब येदा आ भई तुहां च ते कोई अप्पु जो, "पौलुसा रा," कोई "अप्पुलोसा रा," कोई "कैफा रा," तां कोई "मसीह रा" बोलां आ। 13 क्या मसीह बन्दोई गरा? क्या पौलुस तुहां खातर कूसा पर चढी रा? या तुहां जो पौलुसा रे नौं पर बपतिस्मा मिलया? 14 हऊं परमेशरा रा धन्यवाद करां भई क्रिस्पुस कने गयुसा जो छड्डी ने मैं तुहां च ते किसी जो भी बपतिस्मा नीं दित्या। 15 कित्ती येदा नीं हो भई कोई बोलो तुहां जो मेरे नौं ते बपतिस्मा मिलया। 16 होर हाँ, मैं स्तिफनासा रे घराने जो भी बपतिस्मा दित्या; इन्हां जो छड्डी ने हऊं नीं जाणदा भई मैं होरी किसी जो बपतिस्मा दित्या। 17 डकाँ भई मसीह ने मिंजो बपतिस्मा देणे जो नीं, पर सुसमाचार सुनाणे जो भेजी रा, होर ये भी शब्दां ने ज्ञाना रे मताबक नीं, येदा नीं हो भई मसीह रा कूस बेकार ठहरो।

मसीह परमेशरा रा ज्ञान कने सामर्थ ई

18 काँ भई कूसा री कथा नाश हुणे औळ्यां खातर मूर्खता ई पर अहां मुक्ति पाणे औळ्यां खातर परमेशरा री सामर्थ ई। 19 काँ भई लिखीरा, "मांह ज्ञान-वानां रे ज्ञाना जो नाश करना, कने समझदारां रिया समझा जो बेकार करी देणा।"

20 कित्ती रेह्ला ज्ञान-वान? कित्ती रेह्ला शास्त्री? कित्ती रेह्ला इस संसारा रा विवादी? क्या परमेशरे संसारा रे ज्ञाना जो मूर्खता नीं ठहराया? 21 काँ भई तजे परमेशरा रे ज्ञाना रे मताबक संसारे ज्ञाना ते परमेशरा जो नीं जाणेया, तां परमेशरा जो ये खरा लगया भई इस प्रचारा री मूर्खता ते विस्वास करने

औळ्यां जो मुक्ति दो। 22 यहूदी तां नशानियां चाह्यां, कने यूनानी ज्ञाना रिया खोजा च ये, 23 पर अहें तां तिस कूसा पर चढाई रे मसीह रा प्रचार करांये, सैं जे यहूदियां खातर ठोकरा रा कारण कने अन्यजातियां खातर मूर्खता ई; पर सैं जे सद्दी रे, क्या यहूदी क्या यूनानी, तिन्हां रे नेडे मसीह परमेशरा री सामर्थ कने ज्ञान आ। 24 पर सैं जे सद्दी रे, क्या यहूदी क्या यूनानी, तिन्हां रे नेडे मसीह परमेशरा री सामर्थ कने परमेशरा रा ज्ञान आ। 25 काँ भई परमेशरा री मूर्खता आदमियां रे ज्ञाना ते ज्ञान-वान ई, कने परमेशरा री निर्बलता माह्लुआ रे बला ते बौहत बलवान ई।

26 हे भाईयो, अपणे सद्दे जाणे जो तां सोचा भई नां शरीरा रे मताबक बौहत ज्ञान-वान, कने नां बौहत सामर्थी कने नां बौहत कुलीन सद्दे गईरे। 27 पर परमेशरे जगता रे मुखीं जो चुणी लया, भई ज्ञा वानां जो शर्म हो, कने परमेशरे जगता रे निर्बलां जो चुणी लया भई बलवानां जो शर्म हो; 28 कने परमेशरे जगता रे छोटेयां कने बेकारां, पर सैं जे गिणतिया च मनी ये तिन्हां भी चुणी लया भई तिन्हांजो सैं जे बौहत किछ ये, बेकार ठहराओ। 29 भई कोई प्राणी परमेशरा रे सामणे घमण्ड नीं करी पाओ। 30 पर तिसरिया ई तरफा ते आहां खातर ज्ञान ठहराया, मतलब धर्म कने पवित्रता, कने छुटकारा; 31 भई तेदा जे लिखीरा, तेदा ई हो, "सैं जे घमण्ड करो सैं प्रभुये च घमण्ड करो।"

कूसा पर चढाईरे मसीह रे बारे च संदेश

2 हे भाईयो, तजे हऊं परमेशरा रे बारे सुणांदा-सुणांदा तुहां ला आया, तां शब्दां कने ज्ञाना रियां खरियां गलां ने नीं आया। 2 काँ भई मैं ये ठाणी लरा था भई तुहां रे बिच यीशु मसीह पर कूसा पर चढाई रे मसीह जो छड्डी ने होर किसी गलां जो नीं जाणो। 3 हऊं निर्बलता कने डरा सौगी, कने बौहत कम्दा-कम्दा तुहां रे सौगी रेहया; 4 कने मेरे वचन, होर मेरे प्रचारा च ज्ञानां रियां लुभाणे औळियां गलां नीं थियां, पर आत्मा कने सामर्था रा प्रमाण था, 5 इस खातर भई तुहां रा विस्वास आदमियां रे ज्ञाना पर नीं, पर परमेशरा री सामर्था पर हो।

परमेशरा रा ज्ञान

6 फेरी भीं सिध्द लोकां च अहें ज्ञान सुणावांयें, पर इस संसारा रा कने संसारा रे नाश हुणे औळे हाक्मां रा ज्ञान नीं; 7 पर अहें परमेशरा रा सैं गुप्त ज्ञान, भेदा रिया रितिया पर दसांये, तिस्सो जे परमेशरे सनातन ते अहां रिया महिमा खातर ठहराया। 8 तिस्सो जे इस संसारा रे हाक्मां च ते किने मनी जाणेया, काँभई जे सैं जाणदे तां तेजोमय प्रभुये जो कूसा पर नीं चढांदे। 9 पर तेदा जे लिखीरा,

"सैं गलां जे आक्खीं नीं देखियां कने कन्नं नीं सुणियां,

कने सैं जे माह्लुये रे चित्ता नीं चढियां,

सैं ई हईयाँ सैं जे परमेशरे अपणे प्रेम करने औळ्यां खातर तयार कित्ती रियां।"

10 पर परमेशरे तिन्हांजो अपणे आत्मा रे जरिये अहां पर प्रगट कित्या, काँ भई आत्मा सब गलां, पर परमेशरा रियां गूढियां गलां भी जांचाँ। 11 आदमियां च ते कुण किसी आदमिये रियां गलां जाणां, सिर्फ माह्लुये रा आत्मा सैं जे तिस चा? तियाँ ई परमेशरा रियां गलां बी कोई नीं जाणदा, सिर्फ परमेशरा रा आत्मा। 12 पर अहें संसारा रा आत्मा नीं पाया, पर सैं आत्मा पाया सैं जे परमेशरा खा ते आ भई अहें तिन्हां गलां जो जाणिये सैं जे परमेशरे अहां जो दित्ती रियाँ। 13 तिन्होँ जे अहें माह्लुये रे ज्ञाना ते सखाई रियां गलां च नीं, पर

आत्मा रियां सखाई रियां गल्लां च, आत्मिक गल्लां ने मलाई-मलाई ने सुणावांये। 14 पर शारीरिक आदमी परमेशरा रे आत्मा रियां गल्लां ग्रहण नीं करदा, काँ भई सै तिसरियां नजरां च मुखता रियां गल्लां ई यां, कने ना सै तिन्हांजो जाणी सकां काँ भई तिन्हां री परख आत्मिक रीतिया ने हुआं ई। 15 आत्मिक जन सब किछ परखां, पर सै अप्पु किसी ते भी परखया नीं जांदा। 16 “काँ भई प्रभुये रा मन किने जाणया भई तिस्सो सखाओ?” पर अहां च मसीह रा मन आ।

कलीसिया च गुटबन्दिया री अलोचना

3 हे भाईयो, हऊं तुहां ने तिसा रीतिया ने गल्लां नीं करी सकया तेडियां जे आत्मिक लोकां ने हुआंईयां, पर तियां जे शारीरिक लोकां ने, कने तिन्हां ने सै जे मसीह च बालक ये। 2 में तुहां जो दुध प्याया, अन्न नीं खवाया; काँ भई तुहें तिस्सो नीं खाई सकदे थे; पर क्या हुणा तका मनी खाई सकदे, 3 काँ भई दाम दर्ई ने मूल लई रे, इस खातर अपणे शरीरा ते परमेशरा री महिमा करा। 4 तिन्हां गल्लां रे बारे च सै जे तुहें लिखियाँ, ये खरा भई आदमी किसी जनाना जो नीं छुओ।

5 पर व्यभिचारा रे डरा ते हरेक माळुये री लाडी कने हरेक जनाना रा खस्म हो। 6 काँ भई हुणां तका शारीरिक थे, इस खातर भई तजे तुहां च डाह कने झगडा आ, तां क्या तुहें शारीरिक नीं ये? कने क्या माळुये रियां रीतियां पर नीं चलदे? 7 काँ भई तजे इक बोलां, “हऊं पौलुसा रा,” कने दुज्जा, “हऊं अपुलोसा रा,” तां क्या तुहें शारीरिक नींये? 8 अपुलोसा क्या? कने पौलुस क्या? सिर्फ सेवक, तिन्हां ते जे तुहें विस्वास कित्या, तेदा जे हरेक जो प्रभुये दित्या। 9 मैं बाह्या, अपुलोसे सेडेया, पर परमेशरे बधाय।

10 इस खातर ना तां बाळे औला किछ आ नां सेडणे औला, पर परमेशर ई सब किछ आ सै जे बधाणे औला। 11 लागे औला कने सेडणे औला दोनों इक ये; पर हरेक आदमी अपणिया ई मेहनता रे मताबक अपणी मजदूरी पांगा। 12 काँ भई अहें परमेशरा रे सहकर्मी ये; कने तुहें परमेशरा री खेती कने परमेशरा री रचनाये। 13 परमेशरा रे तिस अनुग्रह रे मताबक सै जे मिन्जो मिलीरा, मैं बुद्धिमानीया ने राजमिस्त्रियां साई नींयू रखी, कने दुजे तिस पर रद्दा लाया। पर हरेक माळु चक्रे रओ भई तिस पर केडा रद्दा रखोया। 14 काँ भई तिसा नींऊं आ जो छडी ने सै जे पर्ई री, कने सै यीशु मसीह आ, कोई दुज्जी नींऊं नीं पाई सकदा। 15 जे कोई तिसा नींऊंआ पर सोने या चाँदी या कीमती पत्थरां या लकडिया या घा या भुआ रा रद्दा रखो;

16 तां हरेक रा काम्म प्रगट हुई जाणा; काँ भई तिस दिना तिस्सो दसणा, इस खातर भई अग्गी ने सौगी प्रगट हुणा कने तिसा अग्गी हरेक रा काम्म परखणा भई सै केडा आ। 17 तिसरा काम्म जे तिस पर बणीरा पक्का रेंहगा, तिस मजदूरी पाणी। 18 जे किसी रा काम्म फुखी जाओ, तां तिस्सो नुक्सान हुणा; पर तिस अप्पु बची जाणा पर फुखदे-फुखदे। 19 क्या तुहें नीं जाणदे भई तुहें परमेशरा रा मन्दर ये, कने परमेशरा रा आत्मा तुहां च बसा? 20 जे कोई परमेशरा रे मन्दरा जो नाश करगा तां परमेशरा तिस्सो नाश करना; काँ भई परमेशरा रा मन्दर पवित्र आ, कने सै तुहें ये। 21 कोई भी अप्पु जो धोखा नीं देओ। जे तुहां च ते कोई इस संसारा च अप्पु जो ज्ञानी समझो, तां मूर्ख बणो भई ज्ञानी हुई जाओ। 22 काँ भई इस संसारा रा ज्ञान परमेशरा रे नेडे मूर्खता ई, तेदा जे लिखीरा, “सै ज्ञानियां जो तिन्हां री चतुराईया च फसाई देवां,” 23 कने फेरी प्रभु ज्ञानियाँ रे बचारां जो जाणां भई सै बेकार ये।”

मसीह रे प्रेरित

4 इस खातर आदमियाँ पर घमण्ड नीं करो, काँ भई सब किछ तुहां रा आ : 2 क्या पौलुस, क्या अपुलोस, क्या कैफा, क्या जगत, क्या जीवन, क्या मरण, क्या वर्तमान, क्या भविष्य, सब किछ तुहां रा, 3 कने तुहें मसीह रे ये, कने मसीह परमेशरा रा आ। 4 माळु आहां मसीह रे सेवक कने परमेशरा रे भेदां रे भण्डारी समझो। 5 फेरी येथी भण्डारिये च ये गल्ल देखी जाई भई सै विस्वासा जोगा हो।

6 पर मेरियां नजरां च ये बौहत छोटी गल्ल ई भई तुहें या आदमियां रा कोई न्यायी मिंजो परखो, पर मैं अप्पु अपणे आपा जो नीं परखदा। 7 काँ भई मेरा

मन मिंजो किसी गल्ला च दोषी नीं ठहरांदा, पर इसते हऊं निर्दोष नीं ठेहरदा, काँ भई मेरा परखणे औला प्रभु आ।

8 इस खातर तदुंआ तका जे प्रभु नीं आओ, बगता ते पैहले किसी गल्लां रा न्याय नीं करा : सै ई नेहरे रियां छिपि रियां गल्लां जो लैटा च दसगा, कने मना रे गल्लां जो प्रगट करगा, तां परमेशरा रिया तरफा ते हरेक री प्रशंसा हुणी, 9 हे भाईयो, मैं इन्हां गल्लां च तुहां खातर अपणी कने अपुलोसा री चर्चा दृष्टान्ता रिया रीतियां पर किच्ची री, इस खातर भई तुहें आहां ते येदा सिखो भई लिखिरियां गल्लां ते अग्गे नीं बदणा, कने इक्की रे हक्का च कने दुजे रे बरोधा च घमण्ड नीं करना। 10 काँ भई तेरे च कने दुजे च कुण भेद करी सकां? कने तेरले क्या सै जे तिज्जो नीं मिलया? कने तजे तिज्जो मिली रा, तां येदा घमण्ड कें करां आ भई मन्त्रो दुज्जियां ते नीं मिलिरा? 11 तुहें तां रञ्जी गरे, तुहें अमीर हुई गरे, तुहें आहां ते बिना राज कित्या; पर भला हुंदा भई तुहें राज करदे भई अहें भी तुहां सौगी राज करदे। 12 मेरिया समझा च परमेशरे आहां प्रेरितां जो सबीं ते बाद लोकां रे बराबर ठेहराई रा, तिन्हांजो जे मरने रा हुक्म हुई चुकी रा हो; काँ भई अहें जगत कने स्वर्गदूतां कने माळुआं खातर इक तमाशा ठहरी रे। 13 अहें मसीह खातर मुख थें, पर तुहें मसीह च बुद्धिमान ये; अहें निर्बल थे, पर तुहें बला औळे ये। तुहां जो ये। तुहां आदर मिलां, पर अहां री इज्जत नीं हुंटी।

चेताबनी

14 अहें इसा घडिया तका भूखे, त्याये, कने नंगे, कने मुक्के खावांये, कने मारे-मारे फिरां ये; 15 होर अपणे ई हाथा ते काम्म करी ने मेहनत करांये। लोक आहां जो बुरा बोलांये, अहें आशीष देवांये; सै सतावांये, अहें सही लयें। 16 सै बदनाम करांये अहें विनती करांये। अहें अज्जा तका जगता रा कुडा-कचरा, कने सबीं चीजां री घरोडीया साई ठेहरांये। 17 हऊं तुहां जो शर्म देणे खातर ये गल्लां नीं लिखदा, पर अपणे प्यारे बालक जाणी ने तुहां जो चितावां। 18 काँ भई जे मसीह च तुहां रे सखाणे अऊले 10 हजार बी हुदे, तां भी तुहां रे पिता बौहत सारे नींये; इस खातर भई मसीह यीशु च सुसमाचारा ते हऊं तुहां रा पिता हुवां आ। 19 इस खातर हऊं तुहां ने विनती करां भई मेरे साई चलो। 20 इस खातर मैं तीमुथियुसा जो सै जे प्रभुये च मेरा प्यारा कने विस्वासा जोगा पुत्र आ, तुहां ला भेजया। तिस तुहां जो मसीह च मेरा चरित्र याद दुआणा, तियां जे हऊं हर जगहा हरक कलीसिया च उपदेश देवां। 21 किछ तां येदे फुली गरे, मन्त्रो मांह तुहां ला औणा ई नीं आ।

कलीसिया च अनैतिकता

5 पर प्रभुये चाहेया तां मांह तुहां ले छोडे ई औणा, कने तिन्हां फुलणे औळियां गल्लां जो नीं, पर तिन्हां री सामर्था जो जाणी लणा। 2 काँ भई परमेशरा रा राज्य गल्लां च नीं पर सामर्थ च आ। 3 तुहें क्या चाह्यां ये? क्या हऊं उन्डा लई ने तुहां ला आऊं, या प्यार कने नम्रता रिया आत्मा सौगी? 4 येथी तका सुणने च आवां भई तुहां च व्यभिचार हुआं, पर येदा व्यभिचार सै जे अन्यजातियां च भी नीं हुंदा भई ओक माळु अपणे पिते रिया जनाना जो रखी लवां। 5 कने तुहें दुःख नीं मनांदे, तिसते जे येदा काम्म करने औला तुहां रे बीचा ते निकली ने चली जान्दा, पर घमण्ड करांये।

6 हऊं तां शरीरा रे भावा ते दूर था, पर आत्मा रे भावा ते तुहां सौगी हुई ने मनो ओथी ई हुणे रिया दशा च येदे काम्म करने औळे रे बारे च ये हुक्म दर्ई चुक्की रा 7 भई तजे तुहें कने मेरी आत्मा, आहां रे प्रभु यीशुये री सामर्था ने सौगी कडे हो, तां येदा माणु आहांरे प्रभु यीशु मसीह रे नौं ते 8 शरीरा रे बनाशा खातर शैताना जो दित्या जाओ, भई तिसरी आत्मा प्रभु यीशुये रे दिना च मुक्ति पाओ।

9 तुहां रा घमण्ड करना खरा नीं आ; क्या तुहें नीं जाणदे भई थोडा जेया खमीर पूरे गुन्नी रे आटे जो खमीर करी देओ। 10 पुराणा खमीर नकाली ने अप्पु जो शुद्ध करा भई नवां गुन्नी रा आटा बणी जाओ; काँ भई तुहें अखमीरी हुई जाओ। काँ भई अहां रा भी फसह, सै जे मसीह आ, बलिदान हुई रा। 11 इस खातर आवा, अहें उत्सव कने नन्द मनाईये, ना तां पुराणे खमीरा ते कने ना बुराई कने दुष्टता रे खमीरा ते, पर सीधाई कने सखाईयां रिया

अखमीरी रोटिया ते। 12 में अपनी पत्रियाँ च तुहां जो लिखीरा भई व्यभिचारियां री संगति नी करनी। 13 ये नी भई तुहें बिल्कुल ई इस जगता रे व्यभिचारियां, या लोभियां, या अन्धेर करने औळियां, या मूर्ति पूजकां री संगति नी करो; काँ भई इसा दशा च तां तुहां जो जगता च ते निकली ई जाणा पऊंदा।

मसीहियां च मुकदमेबाजी

6 पर मेरा बोलणा ये आ भई जे कोई भाई कहांवां, कने व्यभिचारी, या लोभी, या मूर्ति पूजक, या गाली देणे औला, या पियकड, या नेहर करने औलाहो, तां तिसरी संगति देहां करदे; पर येढे माळ्ये सौगी रोटी भी देहां खांदे। 2 काँ भई मिन्जो बाहरा औळियां रा न्याय करने औळियां ते क्या काम्म आ? क्या तुहें आसे-पासेयाँ औळियां रा न्याय नीं करदे? 3 पर बाहरा औळियाँ रा न्याय परमेशर करां। इस खातर तिस कुकर्मियां जे अपने बिचा ते नकाली दो। 4 क्या तुहां च ते किसी जो ये हिम्मत ई भई तजे दुज्जे ने झगडा हो, तां फैसले खातर अधर्मियां ला जाओ कने पवित्र लोकां ला नीं जाओ? 5 क्या तुहें नीं जाणदे भई पवित्र लोक जगता रा न्याय करगे? इस खातर तजे तुहां जगता रा न्याय करना, तां क्या तुहें छोटे-छोटे झगडियाँ रा भी न्याय करने रे जोगे नीं ये? 6 क्या तुहें नीं जाणदे भई अहां स्वर्गदूतां रा न्याय करना? तां क्या संसारिक गल्लां रा न्याय नीं करीये? 7 जे तुहां संसारिक गल्लां रा न्याय करना हो, तां क्या तिन्हांजो बठालणा सै जे कलीसिया च किछ नीं समझी जान्दे? 8 हऊं तुहां जो शर्म देणे खातर येदा नीं बोलदा। क्या सच-मुच तुहां च इक भी बुद्धिया आऊला नीं आ, सै जे अपने भाईयां रा निर्णय करी सक्रो? 9 तुहां च भाईयां-भाईयां च मकदमा हुआं, कने सै भी अविस्वासियां रे सामणे। 10 पर सच-मुच तुहां च बड़ा दोष तां ये आ भई अप्पु चीरें मकदमा करांये। अन्याय कै नीं सैहदे? 11 पर तुहें तां अप्पु ई अन्याय करांये कने नुकसान पजुवांये, सै भी भाईयां जो।

देह परमेशरा रिया महिमा खातर

12 क्या तुहें नीं जाणदे भई अन्याई लोक परमेशरा रे राजा रे बारस नीं हुणे? धोखा नीं खाओ; ना वेश्यागामी, ना मूर्ति पूजक, ना परस्त्रीगामी, ना लुचे, ना पुरुषगामी, 13 ना चोर, ना लोभी, ना पियकड, ना गाली देणे औळे परमेशरा रे राजा रे राज्य रे बारस हुणे। 14 कने तुहां च ते कितने येदे ई थे, पर तुहें प्रभु यीशु मसीह रे नीं ते कने आहां रे परमेशरा रे आत्मा ते धोई रे कने पवित्र हुये होर धर्मी ठेहरे। 15 सब चीजा मेरे खातर ठीक तां आईयां, पर सब चीजां मेरे फायदा रिया नीं आ; सब चीजां खातर ठीक ई आ, पर मांह किसी गल्लां रे अधीन नी हुणा। 16 रोटी पेटा खातर, कने पेट रोटिया खातर आ, पर परमेशरा इसो कने तिससो दुई जो नाश करना। पर देह व्यभिचारा खातर नीं, पर प्रभुये खातर ई। कने प्रभु देहा खातर आ। 17 परमेशरे अपणिया सामर्था ते प्रभुये जो ज्युंदा कित्या, कने अहां जो भी ज्युंदा करना। 18 क्या तुहें नीं जाणदे भई तुहां री देह मसीह रा अंग ये? तां क्या हऊं मसीह रे अंग लई ने तिना जो वेश्या रे अंग बणाऊं? कदीमनी। 19 क्या तुहें नीं जाणदे भई सै जे कोई वेश्या री संगति करां, सै तिसा ने सौगी इक तन हुई जां? कैं बई लिखीरा : "तिन्हां दूई इक तन हूणां।" 20 कने सै जे प्रभुये री संगति च रह्यां, सै तिसने सौगी इक आत्मा हुई जां।

ब्याह रे सम्बन्धा च स्वाल

7 व्यभिचारा ते बची रे रह्या। तितने जे होर पाप माळ्ये करां सै शरीरा ते बाहरा रे, पर व्यभिचार करने औला अपने ई शरीरा ते बरुध पाप करां। 2 क्या तुहें नीं जाणदे भई तुहां री देह पवित्र आत्मा रा मन्दर आ, सै जे तुहां च बसी रा कने परमेशरा खा ते मिली रा; कने तुहें अपने ई नींये? 3 खस्म अपनी लाडिया रा हक पूरा करो; कने तियां ई लाडी अपने खस्मा रा। 4 लाडिया जो अपणिया देहा पर कोई हक नीं आ पर तिसा रे खस्मा रा हक आ; तियां ई खस्मा जो भी अपणिया देहा पर कोई हक नीं आ, पर तिसरिया जनाना रा। 5 तुहें इक दुज्जे ते लग्न नीं रह्या; पर सिर्फ किछ बगता तका इक्की दुज्जे रिया सहमतिया ते प्राथना खातर बगत मिलो, कने फेरी सौगी रहो; येदा

नीं हो भई तुहां रे असंयमा रिया वजह ते शैतान तुहां जो परखो 6 पर हऊं तजे येदा बोलया रां तां ये हुकम नीं आ पर मेरा मनणा आ। 7 हऊं येदा चाह्यां भई तेदा जे हऊं आ, तेडे ई सब माळ्ये हो; पर हरेक जो परमेशरा खा ते खास-खास वरदान मिली रे; किसी जो केडा, कने किसी-किसी जो होर जेया।

8 पर हऊं कुवारेयां कने विधवावां रे बारे च बोलां भई तिन्हां खातर तेदा ई खरा रंगा तेदा जे हऊं आ। 9 पर जे सै संयम नीं करी सक्रो, तां ब्याह करो; काँ भई ब्याह करना कम्मातुर रेहणे ते भला आ।

10 पर तिन्हां रा जे ब्याह हुई गरा, तिन्हांजो हऊं नीं, पर प्रभु हुकम देवां भई लाडी अपने खस्मा ते लग नीं हो- 11 कने जे लग हुई भी जाओ, तां बिना ब्याह किचे रओ; या अपने खस्मा ने फेरी मेल करी लो- कने ना खस्म अपणिया लाडिया जो छड्यो।

12 दूज्यां जो प्रभु नीं पर हऊं बोलां, जे किसी भाईये री लाडी विस्वास नीं करदी हो कने तिसने सौगी रेहणे ते खुश हो; तां सै तिसा जो नीं छड्यो। 13 तिसा जनाना रा जे खस्म विस्वास नीं करदा हो कने तिसने सौगी रेहणे ते खुश हो; सै खस्मा जो नीं छड्यो। 14 काँ भई येदा खस्म सै जे विस्वास नीं रखदा हो, सै लाडिया रिया वजह ते पवित्र ठेहरां आ; कने येदी जनाना सै जे विस्वास नीं रखदी, खस्मा रिया वजह ते पवित्र ठेहरां ई; नहीं तां तुहां रे बाल-बच्चे अशुद्ध हुन्दे, पर हुण तां पवित्र ये। 15 पर सै आदमी जे विस्वास नीं रखदा, जे सै लग हुई जाओ तां लग हुणे देओ, येडिया दशा च कोई भाई या बैहण बन्धना च नीं ये। परमेशरे अहां जो मेल-मलापा खातर सदी रा। 16 काँ भई हे जनाना, तू क्या जाणाई भई तू अपने खस्मा रा उद्धार कराई लेंगी? कने हे आदमी, तू क्या जाणां भई तू अपणिया लाडिया रा उद्धार कराई लेंगा?

परमेशरा रिया बुलाहटा रे मुताबिक चला

17 तेदा जे प्रभुये हरेक जो बंडी रा, कने तेदा जे परमेशरे हरेक जो सदी रा, तेदा ई सै चलो। मैं सर्बी कलीसियां च येदा ई ठेहराई रा। 18 सै जे खतना किती रा सदया गया, सै बिना खतने औला नीं बणो। सै जे बिना खतने औला सदी रा हो, सै खतना नीं कराओ। 19 ना खतना किछ आ कने ना बिना खतने आऊला, पर परमेशरा रे हुकमा जो मनणा ई सब किछ आ। 20 हरेक माळ्ये तिसा दसा च जे सदया गया, तिसा च ई रहो। 21 जे तू दासा रिया दसा च सद्या गया हो तां चिन्ता नीं कर; पर जे स्वतन्त्र हुई सक्रो, तां येदा ई काम्म कर। 22 काँ भई सै जे दासा रिया दशा च प्रभुये ला सदया गया, सै प्रभुये रा मुक्त किती रा आ। तियां ई सै जे मुक्त दसा च सद्या गया सै मसीह रा दास आ। 23 तुहें दाम दई ने मूल लई रे; माळ्ये रे दास नीं बणा। 24 हे भाईयो, जो कोई किसी दसा च सद्या गया हो, सै तिस च परमेशरा ने सौगी रहो।

कुवारियां कने बिधमां

25 कुवारियाँ रे बारे च प्रभुये रा कोई हुकम नीं मिलया, पर विस्वासा जोगे हुणे खातर तेदि दया जे प्रभुये मेरे पर कितीरी, तिसारे मताबक येदा दस्सां। 26 मेरिया समझा च ये खरा आ भई आज कल क्लेशा रिया वजह ते, माळ्ये तेडे जे हये तेडे ई रओ। 27 जे तेरी लाडी हई तां तु तिसा ते लग हुणे रा जतन नीं कर; कने जे तेरे लाडी नीं, तां जनाना खातर मत टोल-टाल करदा। 28 पर जे तू ब्याह भी करो, तां पाप नींआ; कने जे कुवारी ब्याई जाओ तां कोई पाप नीं आ। पर येदियां जो शारीरिक दुःख हुणा, कने हऊं बचाणा चाह्यां। 29 हे भाईयो, हऊं ये बोलां भई बगत घटेरी तरा, इस खातर चईदा भई तिन्हां रे जे जनाना हो, सै येदे रहो मनो भई तिसरी जनाना नीं; 30 रोणे औळे येदे हो, भई मन्नो रोदें नीं ये; कने खुश करने औळे येदे हो मन्नो खुश नीं करदे; कने मोल लेणे औळे येदे हो, मन्नो तिन्हां ले किछ हया ई नींआ। 31 कने इस संसारा ने वयोहार करने औळे येदे हो, भई संसारा रे ही नीं हुई जाओ; काँ भई इस संसारा रिया रीतियां कने वयोहार बदलदे जांवांये।

32 इस खातर हऊं चाह्यां भई तुहां जो चिन्ता नीं हो। कुवारे आदमी प्रभुये रियां गल्लां री चिन्ता च रहो भई प्रभुये जो कियां खुश रखो। 33 पर ब्याही रे

माहू संसारा रियां गल्लां री चिन्ता च रह्याये भई अपणिया लाडियां जो कियां-कियां खुश रखो। 34 ब्याई रियां कने कुवारियां च भी फरक आ : कुवारी प्रभुये री चिन्ता च रह्याई भई सै शरीर कने आत्मा दुईच पवित्र हो, पर ब्याई री संसारा रिया चिन्ता च रह्याई भई सै अपणे खस्मा जो किया खुश रखो। 35 में ये गल्ल तुहां रे ई भले खातर बोलां आ, ना की तुहां जो फसाणे खातर, पर इस खातर भई तेदा जे खरा लगां तेदा ई कित्या जाओ, भई तुहें इक मन हुई ने प्रभुये रिया सेवा च लगी रे रओ।

36 जे कोई ये समझो भई हऊँ अपणिया तिसा कुवारिया रा हक मारेया रां, तिसा री जवानी ढलया रां ई, कने जरूरत भी हो, तां तेदा जे चाओ तेदा ई करो, इस च पाप नीआ, सै तिसाने ब्याह करी लओ। 37 पर सै जे मना च पक्का रह्यां, कने तिस्सो जरूरत नी हो, पर अपणिया इच्छा पर अधिकार रखदा हो, कने अपणे मना च ये गल्ल ठाणी लरी हो भई सै अपणिया कुवारिया जो कुवारी ई रखणी, सै खरा करां। 38 इस खातर सै जे अपणिया कुवारिया ने ब्याह करया रां, सै खरा करां, कने सै जे ब्याह नीं करदा, सै भी खरा करां।

39 तदुंआ तका जे किसी जनाना रा खस्म ज्युंदा, तदुंआ तका सै तिसने बज्जी री; पर जे तिसा रा खस्म मरी जाओ तां तिसने जे चाओ ब्याह करी सकाई, पर सिर्फ प्रभुये च। 40 पर तेदि जे हई तेदि ई रओ, तां मेरे बचारा च होर भी धन्य हे; कने हऊँ समझेया भई परमेशरा रा आत्मा मेरे च भी आ।

मूर्तियां रे अगे चढाईरी चीजां

8 हुण मूर्तां रे सामणे बली किन्ती रियां चीजां रे बारे च - अहें जाणांये भई तजे अहां सर्बीं जो ज्ञान आ। ज्ञान घमण्ड पैदा करां, पर प्रेमा ते तरक्री हुआं ई। 2 जे कोई समझो भई हऊँ किछ जाणां, तां तेदा जाणनां चहिन्दा तेदा जे आज्ञा तका नीं जाणदा। 3 पर जे कोई परमेशरा ने प्यार रखां, तां परमेशर तिस्सो पछयाणां।

4 इस खातर मूर्तियां रे सामणे बली किन्ती रिया चीजां रे खाणे रे बारे च - अहें जाणांये भई मूर्ती जगता च कोई चीज नीं, कने इक्की जो छुडी ने होर कोई परमेशर नीआ। 5 फेरी भी आकाशा च कने धरतिया पर मते सारे ईश्वर कहावांये - तेड़े जे मते सारे ईश्वर कने मते सारे प्रभुये - 6 तां भी आहां खातर इक ई परमेशर आ : मतलब पिता तिस खातर जे सारीयां चीजां ई यां, कने अहें बी तिसरे ई जरिये ये। कने इक ई प्रभु आ, मतलब यीशु मसीह तिसरे जरिये सब चीजां हुई यां, कने अहें भी तिसरे ई जरिये हुये।

7 पर सर्बीं जो ये ज्ञान नीआ, पर किछ तां हुणा तका भी मूर्तिया जो किछ समझणे रिया वजह ते मूर्तियां रे सामणे बली किन्ती रियां चीजां जो किछ समझी ने खावांये, भई तिन्हां रा विवेक कमजोर हुणे रिया वजह ते अशुद्ध हुई जां। 8 रोटी अहां जो अहां जो परमेशरा रे नेडे नीं पजुआंदी। जे अहें नीं खाईये तां आहां जो किछ नुकसान नीं हुंदा, कने जे खाईये तां अहां जो किछ फायदा नीआ। 9 पर सावधान! येदा नीं हो भई तुहां री ये स्वतन्त्रता किन्ती कमजोरां खातर ठोकरा री वजह नी बणी जाओ। 10 काँ भई जे कोई तुझ समझदारा जो मूर्तियां रे मन्दरा च रोटी खान्दे देखो कने सै कमजोर आदमी हो, तां क्या तिसरे विवेका जो मूर्तियां रे सामणे बली किन्ती रियां चीजां रे खाणे री हिम्मत हुई जांगी। 11 इसा ई रीतिया ते तेरे ज्ञाना रिया वजह ते सै निर्बल भाई तिस खातर जे मसीह मरेया, नाश हुई जाणा। 12 ईयां ई भाईयां रे बरुद्ध अपराध करने ते कने तिसरे कमजोर विवेका जो चोट पजुआणे ते तुहें मसीह रे विरुद्ध अपराध करांये। 13 इस वजह ते जे रोटी मेरे भाईयां जो ठोकर खवाओ, तां मांह कदी किसी भी रीतिया ते मांस नीं खाणा, येदा नीं हो भई हऊँ अपणे भाईये खातर ठोकरा री वजह बणुं।

प्रेरिता रे अधिकार कने कर्तव्य

9 क्या हऊँ स्वतन्त्र नीं आ? क्या हऊँ प्रेरित नीं आ? क्या मैं यीशुये जो सै जे आहां रा प्रभु आ, नीं देख्या? क्या तुहें प्रभुये च मेरे बणाई रे नींये? 2 जे हऊँ दुजेयां खातर प्रेरित नीं आ; तां भी तुहां खातर तां हया; काँ भई तुहें प्रभुये च मेरी प्रेरिताईया री छाप ये।

3 सै जे मिजो परखांये, तिन्हां खातर ये ई मेरा जवाब आ। 4 क्या आहां जो खाणे-पीणे रा अधिकार नीं आ? 5 क्या आहां जो ये अधिकार नीं आ भई

किसी मसीह बैहणी ने सौगी ब्याह करी ने तिसा जो सौगी लई ने फिरिये, तेदा जे होर प्रेरित कने प्रभुये च भाई कने कैफा करा? 6 या सिर्फ मिन्जो कने बरनबासा जो ई अधिकार नीं आ भई कमाई करना छुडी दईये। 7 येदा कुण आ सै जे अपणिया मर्जिया ते मना मारी ने सपाईये रा काम्म करा? कुण अँगूरां रा बगीचा लाई ने तिसरा फल नीं खांदा? कुण भेडां री रखवाली करी ने तिन्हां रा दूध नीं पींदा?

8 क्या हऊँ ये गल्लां माहूये रिया रीतिया पर बोलां आ? 9 क्या व्यवस्था भी येई नीं बोलदी? काँ भई मूसा रिया व्यवस्था च लिखीरा, "बाह्ने ते बाद खोली ने बलदा रा मूंह देहां बन्नदे।" क्या परमेशर बलदां री ई चिन्ता करा? 10 या खास करी ने आहां खातर बोलां। हाँ, आहां खातर ई लिखीरा, काँ भई ठीक आ भई बाह्ने औला आशा ने बाह्नां कने हाल चलाणे औला अपणे हिस्से रिया आशा च हल बाह्नां। 11 इस खातर तजे अहें तुहां खातर आत्मिक चीजां बाहईयां, तां ये कोई बड्डी गल्ल हुणी भई तुहां री शारीरिक चीजां री फसल कट्टिये। 12 तजे दुजेयां जो तुहां पर ये अधिकार आ, तां क्या आहां रा अधिकार तिसते जादा नीं हुणा? पर अहें ये अधिकार काम्मा च नीं लंदया; पर सब किछ सह्या भई आहां ते किन्ती मसीह रे सुसमाचार च रुकोट नीं हो। 13 क्या तुहें नीं जाणदे भई सै जे मन्दरा च सेवा करांये, सै मन्दरा च ई खांये; कने सै जे वेदिया री सेवा करांये, सै वेदिया सौगी सहभागी हुआये? 14 इस ई रीतिया ते प्रभुये भी ठेहराया भई सै जे लोक सुसमाचार सुणांवांये, तिन्हां री जीविका सुसमाचारा ते हो।

15 पर मैं इन्हां च ते कोई भी गल्ल कम्मा च नी लंदी, कने मैं ये गल्लां इस खातर नीं लिखियां भई मेरे खातर येदा कित्या जाओ, काँ भई इसते तां मरना भला आ भई कोई मेरे घमण्डा जो बेकार ठेहराओ। 16 जे हऊँ सुसमाचार सुणाऊं, तां मेरे खातर किछ घमण्डा री गल्ल नीं; काँ भई ये तां मेरे खातर जरूरी आ। जे हऊँ सुसमाचार नी सुणाऊं तां मेरे पर हाय ई। 17 काँ भई जे अपणिया इच्छा ते येदा करां तां मजदूरी मिजो मिलाई, कने जे अपणिया इच्छा ते नीं करदा तां भी भण्डारी री सेवा मिजो दिन्ती गई री। 18 तां मेरी कुण जीं मजदूरी ई? ये भई सुसमाचार सुणाणे च मैं मसीह रा मुफ्त करी दूँ, येथी तका भई सुसमाचारा च सै जे मेरा अधिकार आ तिस्सो भी हऊँ पूरीया रीतिया च कमा च नी लयाऊं।

19 काँ भई सबी च स्वतन्त्र हुणे पर भी मैं अप्पु जो सर्बीं रा दास बणाई तया भई जादा ते जादा लोकां जो खिंजी ने ली आऊं। 20 हऊँ यहूदियां खातर यहूदी बणया भई यहूदियां जो खिंजी ने लयाऊं। सै जे लोक व्यवस्था रे अधीन ये तिन्हां खातर हऊँ व्यवस्था रे अधीन नीं हुणे पर भी व्यवस्था रे अधीन बणया भई तिन्हांजो सै जे व्यवस्था रे अधीन ये, खिंजी ने ली आऊं। 21 व्यवस्था ते बाहरा औळ्यां खातर हऊँ - सै जे परमेशरा री व्यवस्था ते हीन नीं आ पर मसीह री व्यवस्था रे अधीन आ - व्यवस्था ते बाहरा औळ्यां साई बणया भई व्यवस्था हीनां जो खिंजी ने ली आऊं। 22 हऊँ निर्बलां खातर कमजोर जेया बणेया भई कमजोरां जो खिंजी ने ली आऊं हऊँ सब माहूआं खातर सब किछ बणया भई किसी ना किसी रीतिया ते कईयां रा उद्धार कराऊं। 23 हऊँ ये सब किछ सुसमाचारा खातर करां भई होरी ने सौगी तिसरा भागी हुई जाऊं।

मसीही दौड़

24 क्या तुहें नीं जाणदे भई दौड़ा च तां सब ई दौड़ां ये, पर नाँ इक्की जो ई मिलां आ? तुहें येदे दौड़ा भई जिन्ती जाओ। 25 हरेक पलहाण सर्बीं किस्मा रा संजम करां; सै तां इक मुर्जाणे औळ मुकुटा जो पाणे खातर ये सब किछ करांये, पर अहें तां तिस मुकुटा खातर करांये सै जे मुर्जांवां नीं आ। 26 इस खातर हऊँ तां इसा रीतिया ते दौड़ां आ, पर बगैर नशाणे ते नीं; हऊँ भी इसा रीतिया ते मुक्क्यां ने लडां आ, पर तिस साई नीं सै जे हवा जो कूटदा फिरां आ। 27 पर हऊँ अपणे शरीरा जो मारां-कूटां कने वशा च लयावां, येदा नीं हो भई होरी जो प्रचार करी ने हऊँ अप्पु ई किसी रीतिया ते नक्कम्मां ठेहरूं।

इस्त्राएल रे इतिहासा ते चेताबनी

10 हे भाईयो, हऊँ नीं चाहंदा भई तुहें इसा गला ते अन्जान रहो भई आहां रे सब बापदादे बदलां रे थल्ले थे, कने सारे समुद्रा चीयें हुई ने पार हुई गये; 2 हे भाईयो, हऊँ नीं चाहंदा भई तुहें इसा गला ते अन्जान रहो भई आहां रे सब बापदादे बदलां रे थल्ले थे, कने सारे समुद्रा चीयें हुई ने पार हुई गये; 3 कने सर्बीं इको जेई आत्मिक रोटी खादी; 4 कने सर्बीं इको जेया आत्मिक पाणी पित्या, काँ भई सैं तिसा आत्मिक पत्थरा ते पिवां थे सैं जे तिन्हां ने सौगी-सौगी चलां थी, कने सैं पत्थर मसीह था। 5 पर परमेशर तिन्हां च ते मतेयां ते खुश नीं हुआ, इस खातर सैं जंगला च मरी गये।

6 ये गलां अहां खातर द्रष्टान्त बणियां, भई तियां जे तिन्हें लालच कित्या, तियां ई अहें बुरियां चीजा रा लालच नीं करिये; 7 कने ना तुहें मूर्ति पूजक बणो, तेडे जे तिन्हां च ते कितने ई बणी गे थे, तेदा जे लिखीरा, “लोक खाणे पीणे बैठे, कने खेलदे-कूददे उठे।” 8 कने ना अहें व्यभिचार करिये, तेदा जे तिना च ते कितनेयां कित्या; कने इक्की दिना च २३ हजार मरी गये। 9 कने ना अहें प्रभुये जो परखीये, तेडआ जे तिन्हां च ते मतेयां कित्या, कने सपां ते नाश कित्ते गये। 10 कने ना तुहें कुडकुडाओ, तिसा रीतिया ते जे तिन्हां च ते बौहत कुडकुडाये कने नाश करने ओल्ले नाश करी ते। 11 पर ये सब गलां, सैं जे तिन्हां पर परईयां, द्रष्टान्ता रिया रीतिया पर थीयां; कने सैं अहां खातर चेतावनिया खातर सैं जे जगता रे आखिरी बगता च रेहवाये तिना खातर लिखी रियां। 12 इस खातर सैं जे समझां भई, “हऊँ, पक्का,” सैं चौकस रओ भई किती परई नीं जाओ। 13 तुहें किसी येडिया परीक्सा च नीं पये, सैं जे माहुआं रे सैणे ते बाहर ई। परमेशर सच्चा आ कने तिस तुहां जो परीक्सा ते बाहर परऊणे नीं देणा, पर परिकसा ने सौगी तुहां जो नकालणा भी आ भई तुहें सहई सक्को।

मुर्तीपूजा रे खलाफ चेताबनी

14 इस वजह ते, हे मेरे प्यारो, मूर्ति पूजा ते बची ने रहओ। 15 हऊँ तुहां जो बुद्धिमान जाणी ने येदा बोलां : सैं जे हऊँ बोलां, तिस्सो तुहें परखा। 16 सैं धन्यावाद रा कटोरा तिस पर अहें धन्यावाद करांये; क्या मसीह रे लहू री सहभागिता च नीं आ? ये रोटी तिसा जे अहें तोड़ाये, क्या ये मसीह रिया देहा री सहभागिता च नीं आ? 17 इस खातर भई इक ई रोटी तां अहें भी सैं जे बौहत ये, इक ई देह हये : काँ भई अहें सब तिसा इक ई रोटीया रे भागी हुआं ये। 18 सैं जे शरीरा खा ते तां इस्त्राएली ये, तिन्हांजो देखा : क्या बलिदाना रे खाणे ओल्ले वेदिया रे सहभागी नीं ये? 19 फेरी हऊँ क्या बोलां? क्या येदा आ भई मूर्तिया पर चढ़ी रा बलिदान किछ आ या मूर्ति किछ ई? 20 नई, पर ये भई अन्याजाति सैं जे बलिदान करांये; सैं परमेशरा खातर नीं पर दुष्टात्मा खातर बलिदान करांये कने हऊँ नीं चाहंदा भई तुहें दुष्टात्मा रे सहभागी हो। 21 तुहें प्रभुये रे कटोरे कने दुष्टात्मा रे कटोरे दूई च ते नीं पी सकदे। तुहें प्रभुये री मेज दुष्टात्मावां री मेजा दूई रे सांझी नीं हुई सकदे। 22 क्या अहें प्रभुये जो गुस्सा दुवावाये क्या अहें तिसते बला ओल्ले ये?

सब किछ परमेशरा रिया महिमा खातर

23 सब चीजां मेरे खातर ठीक तां हईयां पर सब फायदे रियां नीं आं : सब चीजा मेरे खातर ठीक तां हईयां पर सब चीजा ते तरक्की नीं। 24 कोई अपनी ई भलाई जो नीं, पर दूजेयां री भलाई जो भी देखो। 25 जो किछ कसाईयां ले बिकां, तिस्सो खाओ कने विवेका रिया वजह ते किछ नीं पुछो? 26 “काँ भई धरती कने तिस च जो किछ भरपूर हुआं सैं प्रभुये रा आ।” 27 जे अविस्वासियां च ते तुहां नीऊंदा देओ, कने तुहें जाणा चाहओ, तां जो किछ तुहां रे सामणे रखया जाओ तिस्सो खावा; कने विवेका रिया वजह ते किछ नीं पूछो। 28 पर जे कोई तुहां ने बोलो, “ये तां मूर्तिया जो बलि कित्ति री चीज ई,” तां तिस दसणे ओल्ले रिया वजह ते कने विवेका रिया वजह ते नीं खावा। 29 मेरा मतलब तेरा विवेक नीं, पर तिस दुजे रा। भला, मेरी स्वतन्त्रता दूजेयां रे जरिये कैं परखी जाओ? 30 जे हऊँ धन्यवाद करी ने सांझी हुई सकां, तां तिस पर जे हऊँ धन्यवाद करां तिसरिया वजह ते मेरी बदनामी कैं हुआंई?

31 इस खातर तुहें चाहे खाओ, चाये पिओ, चाये जो किछ करो, सब किछ परमेशरा रिया महिमा खातर करो। 32 तुहें ना तां यहूदियां, ना यूनानियां, ना परमेशरा री कलीसिया खातर ठोकरा री वजह बणो। 33 तेदा जे हऊँ भी सर्बीं गलां च सर्बीं जो खुश रखां, कने अपणा नीं पर मतेयां रा फायदा टोलां भई सैं उद्धार पाओ।

11 तुहें मेरे साई चाल चला। तियां जे हऊँ मसीह रे साई चाल चलां।

अराधना च सिर ढकणा

2 हे भाईयो हऊँ तुहां जो सराहां भई सर्बीं गलां च तुहें मिंजो याद रखांये; कने सैं जे रवाज में तुहां जो दित्ते, तिन्हां रा पालन करांये। 3 पर हऊँ चाहूं भई तुहें ये जाणी लो भई हरेक आदमिये रा सिर मसीह आ, कने जनानां रा सिर आदमी आ, कने मसीह रा सिर परमेशर आ। 4 सैं जे आदमी सिर ढक्की ने प्राथना या भविष्याणी करां, सैं अपणे सिरा री बेज्रति करां। 5 पर सैं जे जनाना सिर कुआडी ने प्राथना या भविष्याणी करां, सैं अपणे सिरा री बेज्रति करांई, कैं ये गजिया हुणे रे बराबर आ। 6 जे जनाना चुन्नी नीं ओडो तां बाल भी कटाई लो; जे जनाना खातर बाल कटाणा या सिर मडुआणा बेज्रतिया री गल्ल ई, तां चादरु ओडो। 7 हाँ आदमिये जो अपणा सिर ढकणा खरा नीं आ, काँ भई सैं परमेशरा रा स्वरूप कने महिमा ई; पर जनाना आदमिये री महिमा ई। 8 काँ भई आदमी जनाना ते नीं हुआ, पर जनाना आदमिये ते हुई; 9 कने आदमी जनाना खातर नीं बनाया गया, पर जनाना आदमिये खातर बणाई री। 10 इस खातर स्वर्गदूतां रिया वजह ते जनाना जो ठीक आ भई अधिकार अपणे सिरा पर रखां। 11 तां भी प्रभुये च ना तां जनाना बिना आदमिये ना आदमिये बिना जनाना हुई। 12 काँ भई तियां जे जनाना आदमिये तेई, तियां ई आदमी जनाना ते आ; पर सब चीजा परमेशरा ते ई आं। 13 तुहें अप्पु ई बचार करा, क्या जनाना जो घुआडे सिर परमेशरा ते प्राथना करना खरा लगां? 14 क्या तुहें नीं जाणदे भई जे आदमी लम्बे बाल रखो तां तिस खातर बेज्रती ई। 15 पर जे जनाना लम्बे बाल रखो तां तिसा खातर सैं जवांये, काँ भई बाल तिसा जो चादरुये खातर दित्तिरे। 16 पर जे कोई बेहस करना चाहओ, तां ये जाणी लो भई ना आहांरी कने ना परमेशरा रिया कलीसिया री येदी रीति ई।

प्रभु-भोजा रे बारे च

(मत्ती 26:26-29; मरकुस 14:22-25; लूका 22:14-20)

17 पर ये हुकम देदे हुये हऊँ तुहां जो नीं सरांदा, इस खातर भई तुहां रे कडे हुणे ते भलाई नीं, पर नुक्सान हुआं। 18 काँ भई पहेले तां हऊँ येदा सुणां आ, भई तजे तुहें कलीसिया च कडे हुआं ये तां तुहां च फूट पवांई, कने हऊँ इस पर थोडा-थोडा विस्वास भी करा। 19 काँ भई दल-बन्दी भी तुहां च जरूर हूगीं, इस खातर भई सैं जे लोक तुहां च खरे सैं प्रगट हुई जाओ। 20 तां तुहें सैं जे इक्की जगहा कडे हुआंये, तां ये प्रभु भोज खाणे खातर नीं, 21 काँ भई खाणे रे बगता इक दूजे ते पहेले अपणा भोज खाई लां, इयां कोई तां भूखा रखां कने कोई मतवाला हुई जां। 22 क्या खाणे-पीणे खातर तुहां रे घर नीं ये या परमेशरा री कलीसिया जो घटिया जाणांये, कने तिन्हां ले जे नीं आ तिनां बेज्रत करांये? हऊँ तुहां ने क्या बोलू? क्या इसा गला च तुहां री तारीफ करूं? नहीं, हऊँ तारीफ नीं करदा।

23 काँ भई ये गल्ल मिंजो प्रभुये दस्सी, कने मैं भी तुहां तका पजुवाई ती भई प्रभु यीशु तिसा राति जे पकड़वाया गया, रोटी लाई, 24 कने धन्यवाद करी ने सैं तोडी कने बोलया, “ये मेरी देह ई, सैं जे तुहां खातर ई : मिंजो याद करने खातर येदा करया करो।” 25 इसा ई रीतिया ते तिने तिसते बाद कटोरा भी लया कने बोलया, “ये कटोरा मेरे लहू च नवीं वाचा ई : तजे कदी पीओ, तां मिंजो याद करने खातर येदा ई करया करा।” 26 काँ भई तजे तुहें ये रोटी खावांये कने इस कटोरे च ते पीवांये, तां प्रभुये रिया मौता जो तदुआं तका जे सैं नीं आओ प्रचार करांये।

27 इस खातर सैं जे कोई गलत ढगा ने प्रभुये री रोटी खाओ या तिसरे कटोरे च ते पीओ, तां सैं प्रभुये री देह कने लहूये रा दोषी ठेहरना। 28 इस खातर माहु अप्पु जो परखी लओ कने इसा रीतिया ते इसा रोतिया च ते

खाओ, कने इस कटोरे च ते पीओ। 29 काँ भई सै जे खान्दे-पीन्दे बगता प्रभुये री देहा जो नीं पछयाणो, सै इस खाणे कने पीणे ते अपणे परा दण्ड ली आवां। 30 इस वजह ते तुहां च मते सारे कमजोर कने रोगीये, कने मते सई भी गये। 31 जे अहें अप्पु जो परखदे तां दण्ड नीं पान्दे। 32 पर प्रभु आहां जो दण्ड दर्ई ने आहां री ताड़ना करां, इस खातर भई अहें संसारा सौगी दोषी नीं ठेहरिये।

33 इस खातर, हे मेरे भाईयो, तजे तुहें खाणे खातर कड़े हुआये तां इक्की दुजे जो न्याह्नी लो। 34 जे कोई भूखा हो तां अपणे घरा च खाई लो, तिसते जे तुहां रा कड़ा हुणा दण्डा री वजह नीं बणो। बाकी गल्लां जो हऊँ आईं ने ठीक करगा।

आत्मिक बरदान

12 हे भाईयो, हऊँ नीं चाहंदा भई तुहें आत्मिक वरदानां रे बारे ते अनजान रहो। 2 तुहें जाणांये भई तजे अन्यजातिय थे, तां तुहें गूगीयां मूर्तियां रे पिछे तियां जे तुहां जो चलावां थे तियां चलां थे। 3 इस खातर हऊँ तुहां जो चतन करी दां भई जो कोई परमेशरा रे आत्मा री अगुवाईयां ने बोलां, सै नीं बोलदा भई यीशु सापित आ; कने ना कोई पवित्र आत्मा ते बिना बोली सकां भई यीशु प्रभु आ।

4 वरदान तां कईयां किस्मां रे, पर आत्मा इको आ; 5 कने सेवा भी कईयां किस्मां री, पर प्रभु इक ई आ; 6 कने प्रभावा औळे कम्म कईयां किस्मा रे, पर परमेशर इक ई आ, सै जे सबीं च हर किस्मा रा प्रभाव पैदा करां। 7 पर सबीं जो फायदा पूजूआणे खातर हरेक जो आत्मा रा प्रकाश दित्या जांवां। 8 काँ भई इक्की जो आत्मा ते बुद्धिया रियां गल्लां मिलां ई यां, कने किसी दुजे जो तिसा ई आत्मा रे मताबक ज्ञाना रियां गल्लां। 9 किसी जो तिसा ई आत्मा ते विस्वास, कने किसी जो तिसा ई इक्की आत्मा ते चंगा करने रा वरदान मिलां। 10 फेरी किसी जो सामर्था रे काम्म करने री ताकत, कने किसी जो लग किस्मा री भाषा, कने किसी जो भाषा रा मतलब दसणा। 11 पर ये सब प्रभावा औळे काम्म सै ई इक आत्मा करवावां, कने तिस किसी जो जे चाहंदा तिसो बन्डी दां।

शरीर इक: अंग मते

12 काँ भई तियां जे देह तां इक ई कने तिसरे अंग बौहत ये, कने तिसा इक्की देहा रे बौहत अंग हुणे पर भी सब मिली ने इक ई देह हुआई, तियां ई मसीह भी आ। 13 काँ भई सबीं क्या यहूदी हो क्या यूनानी, क्या दास हो क्या स्वतन्त्र, कने आहां सबीं जो इक ई आत्मा ते पलयाई रा।

14 इस खातर भई देहा च इक ई अंग नीं आ पर मते सारे ये। 15 जै पैर बोलो, “हऊँ हाथ नीं आ, इस खातर देहा रा नीं आ,” तां क्या सै इस वजह ते देहा रा नीं आ? 16 कने जे कान बोलो, “हऊँ आक्ख नीं, इस खातर देहा रा नीं आ,” तां क्या सै इस वजह ते देहा रा नीं आ? 17 जे सारी देह आक्ख ही हुंदी तां सुणना किता ते हुंदा? जे सारी देह कान ई हुंदी, तां सुणना किता ते हुंदा? 18 पर सचमुच परमेशरे अंगां जो अपणियां इच्छा रे मताबक इक-इक करी ने देहा च रखया। 19 जे सै सब ई इक ई अंग हुंदे, तां देह किती हुन्दी? 20 पर हुण अंग तां बौहत ये, पर देह इक ई हई। 21 आक्ख हत्था ने नीं बोली सकदी, “मिन्जो तेरी जरूरत नीं,” कने ना सिर पैरां ने बोली सकां, “मिन्जो तेरी जरूरत नीं।” 22 पर देहा रे सै अंग सै जे दुजेयां ते कमजोर लगांये, बौहत ई जरूरी ये; 23 कने देहा तिन्हां अंगां रे तिनौं जे अहें आदरा रे जोगे नीं समझदे तिनौं ई अहें ज्यादा आदर देवांये; कने आहां रे घट शोभा औळे अंग होर भी ज्यादा शोभा औळे हुई जांये, 24 फेरी आहां रे शोभा औळे अंगां जो इसरी जरूरत नीं। पर परमेशर देहा जो येदा बणाई तरा भई तिस अंगा जो जे आदरा री घटी थी तिसो होर भी मता आदर मिलो। 25 काँ भई देहा च फूट नीं पओ, पर अंग इक्की दुजे री बराबर चिन्ता करो। 26 इस खातर जे इक्की अंगा जो दुःख मिलां, तां सब अंग तिसने सौगी दुःख पावांये; कने जे इक्की अंगा री बड़ाई हुआई, तां सब अंग तिसने सौगी नन्द मनावांये।

27 इयां ई तुहें सब मिली ने मसीह री देह ये, कने लग-लग तिसरे अंग; 28 कने परमेशरे कलीसिया च लग-लग माह्नु नियुक्त कितिरे : पेहले प्रेरित,

दुजे भविष्यवक्ता, तिजे सखाणु अऊले, फेरी चंगा करने अऊले, कने भला करने औळे, कने प्रबन्ध करने औळे, कने लग-लग किस्मा री भाषा बोलणे औळे। 29 क्या सब प्रेरित ये? क्या सब भविष्यवक्ता ये? क्या सब उपदेशक ये? क्या सब सामर्था रे कम्म करने औळे ये? 30 क्या सबीं जो चंगा करने रा वरदान मिलया? क्या सब कईयां किस्मा री भाषा बोलाये? 31 क्या सब अनुवाद करांये? तुहें बड़े-ते-बड़े वरदाना रिया धुना च रहा। पर हऊँ तुहां जो होर भी सबते खरा रस्ता दर्सां?

प्रेम सबनीं ते अब्बल रस्ता

13 जे हऊँ आदमियां कने स्वर्गदूतां री बोलियां बोलूं कने प्रेम नीं रखूं, तां हऊँ ठनठनांदा पीतल, कने झनझनांदा झांज ई। 2 कने जे हऊँ भविष्याणी करी सकूं, कने सबीं भेदां कने सब प्रकारा रे ज्ञाना जो समझूं, कने मिन्जो येथी तका पूरा विस्वास हो भई हऊँ पहाड़ां जो हटाई सकां आ, पर प्रेम नीं रखूं, तां हऊँ किछ नीं आ। 3 जे हऊँ अपणी सारी दौलत कंगालां जो खवाई दूं या अपणा शरीर फूकणे जो दर्ई दूं, कने प्रेम नीं रखूं, तां मिन्जो किछ फायदा नीं आ।

4 प्रेम धीरजा आऊला आ, कने दया आऊला आ; प्रेम डाह नीं करदा; प्रेम अपणी बड़ाई नीं करदा, कने फूलदा नीं आ, 5 सै अनरीति नीं चलदा, सै अपणी भलाई नीं चाहंदा, झूझलांदा नीं आ, बूरा नीं मनदा। 6 कूकर्मा ते खूश नीं हूदां, पर सच्चा ते खूश हूआं। 7 सै सबीं गल्लां जो सहन करी लां, सबीं गल्लां जो मन्त्री लां, सबीं गल्लां री आशा रखां, सबीं गल्लां च धीरज रखां।

8 प्रेम कर्दीं टलदा नीं आ; भविष्याणियां हूणियां, तां खत्म हूई जाणियां; भाषा हूंगी, तां जान्दी रहणी; ज्ञान हूंगा, तां मिटी जाणा। 9 काँ भई आहां रा ज्ञान अधूरा आ, कने आहां री भविष्याणी अधधी; 10 पर तजे सर्व सिध्द औणा, तां अधूरा मिटी जाणा। 11 तजे हऊँ बालक था तां हऊँ बालकां साई बोलां था, बालका साई मन था, बालकां री समझ थी; पर तजे सयाणा हूई गया तां बालकां रियां गल्लां छड्डी तियां। 12 हुण आहां जो सिसे च धूधला जेया दिस्सां, पर तिस बगता आमणे-सामणे देखणा; इस बगता मेरा ज्ञान अधधा आ, पर तिस बगत येडिया पूरीया रीतिया ते पछयाणना, तेदि जे मेरी पछयाण थी। 13 पर हूण विस्वास, आशा, प्रेम ये तिनो पक्के, पर इना च सबते बड्डा प्रेम आ।

भविष्यवाणी कने लग-लग भाषां

14 प्रेमा रे रस्ते चला, कने आत्मिक वरदानां रिया धुना च भी रहा, खास करी ने ये भई भविष्यवाणी करा। 2 काँ भई सै जे अन्य-अन्य भाषा च गल्लां करां सै माह्नु आं ने नीं पर परमेशरा ने गल्लां करां; इस खातर भई तिसरियां गल्लां कोई नीं समझदा, काँ भई सै भेदा रियां गल्लां आत्मा च हुई ने बोलां। 3 पर सै जे भविष्यवाणी करां, सै माह्नु आं री तरक्की कने उपदेशा कने शान्तिया रियां गल्लां बोलां। 4 सै जे अन्य भाषा च गल्लां करां, सै अपणी तरक्की करां; पर सै जे भविष्यवाणी करां, सै कलीसिया री तरक्की करां। 5 हऊँ चाहंदा भई तुहें सब अन्य भाषा च गल्लां करो पर इसते भी जादा येदा चाहंदा भई भविष्यवाणी करा : काँ भई अन्य भाषा बोलणे औला तिसते बदी नें आ। 6 इस खातर हे भाईयो, जे हऊँ तुहां ले आईं ने अन्य भाषा च गल्लां करूं, कने प्रकाशन या ज्ञान या भविष्यवाणी या उपदेशा रियां गल्लां तुहां ने नीं बोलूं, तां मेरते तुहां जो क्या फायदा हुणा? 7 इयां ई जे निरजीव चीजा भी तिन्हां ते जे आवाज निकलांई, तियां जे मूरली या बीण, जे इन्हां रे स्वरां च भेद नीं हो तां सै जे बजाया जाणा, सै किया पछयाणा च आऊणा? 8 कने जे तूरही आ री आवाज साफ नीं हो, तां किस लड़ाईया खातर तैयार हुणा? 9 इयां ई तुहें भी जे जीभा ते साफ-साफ गल्लां नीं बोलो, तां जो किछ तुहां बोलणा सै कियां समझा आऊणा? तां तुहां हवा ने गल्लां करने औळेया ठेहरना। 10 जगता च कितने ई किस्मा री भाषा कैं नीं हो, पर तिन्हां च ते कोई भी बिना अर्था री नीं हुणी। 11 इस खातर जे हऊँ किसी भाषा रा अर्थ नीं समझूं तां बोलणे औळे रिया नजरां च परदेशी ठेहरना कने बोलणे औळे मेरियां नजरां च परदेशी ठेहरना। 12 इस खातर तुहें भी तजे आत्मिक वरदानां

रिया धूना च हो, तां येदा जतन करा भई तुहां रे वरदानां रिया तरक्किया ते कलीसिया री तरक्की हो।

13 इस वजह ते सैं जे अन्य भाषा बोलो सैं प्राथना करो भई तिसरा अनुवाद भी करी सक्रो। 14 इस खातर जे हऊँ अन्य भाषा च प्राथना करुं, तां मेरी आत्मा प्राथना कराई पर मेरी बुद्धि काम्म नीं करदी। 15 इस खातर क्या करना चहीदा? हऊँ आत्मा ते भी प्राथना करुं, कने बुद्धिया ने भी प्राथना करुं; मांह आत्मा ते भी गाणा, कने बुद्धिया ने भी गाणा। 16 नईं तां जे तु आत्मा ते ई धन्यवाद करगा, तां फेरी अनजाणा तेरे धन्यवादा पर आमोन किया बोलणी? काँ भई सैं तां नीं जाणदे भई तु क्या बोलां? 17 तू तां खरे तरीके ने धन्यवाद करां, पर दुजे री तरक्की नीं हूदीं। 18 हऊँ अपने परमेशरा रा धन्यवाद करां, भई हऊँ तुहां सर्बीं ते जादा अन्य भाषा च बोलां। 19 पर कलीसिया च अन्य भाषा च दस हजार गलां बोलणे ते मिजो ये होर भी जादा खरा लगां, भई दुजेयां जो सखाणे खातर बुद्धिया ते पांज ई गलां बोलुं।

20 हे भाईयो, तुहें समझा खातर बालक नीं बणो : बुराईयां खातर बालक बणा, पर समझा च सयाणे बणा। 21 व्यवस्था च लिखीरा भई प्रभु बोलां, "मांह अनजाणी भाषा बोलणे ओळ्यां ते, कने बगानेयां रे मूंहां ते इन्हां लोकां ने गलां करनियां तां भी इन्हां मेरी नीं सुणनी।" 22 इस खातर अन्य भाषा विस्वासियां खातर नीं, पर अविस्वासियां खातर नशाण आ; कने भविष्यवाणी अविस्वासियां खातर नीं, पर विस्वासियां खातर नशाण आ। 23 इस खातर जे कलीसिया इक्की जगहा कट्टी हो, कने सारे के सारे अन्य भाषा बोलो, कने बाहरा ते या अविस्वासी लोक अन्दरा जो आओ तां क्या तिन्हां तुहां जो पागल नीं बोलणा? 24 पर जे सब भविष्यवाणी करने लगे, कने कोई अविस्वासी या बाहरा ते कोई माह्लु अन्दरा जो आओ, तां सर्बीं तिस्सो दोषी ठेहराई देणा कने परखी लेणा; 25 कने तिसरे मना रे भेद सामणे आई जाणे, कने मन्त्री लणा भई सच-मुच परमेशर तुहां च हया।

उपासना च अनुशासन

26 इस खातर हे भाईयो, क्या करना चहिंदा? तजे तुहें कट्टे हुआंये, तां हरेक रे दिला च भजन या उपदेश या अन्य भाषा या प्रकाशन या अन्य भाषा रा मतलब दसणा रह्हां। सब किछ आत्मिक तरक्किया खातर हुणां चहिंदा। 27 जे अन्य भाषा च गलां करनियां हो तां दो या जादा ते जादा तीन जन बारो-बरतिया बोलो, कने इक माह्लु अनुवाद करो। 28 पर जे अनुवाद करने औला नीं हो, तां अन्य भाषा बोलणे औला कलीसिया च शान्त रहो, कने अपने मना च कने परमेशरा ने गलां करो। 29 भविष्यबगता च ते दो या तीन बोलो, कने बाकि लोक तिसरे वचनां जो परखो। 30 पर जे दुजे पर सैं जे बेठी रा, किछ ईश्वरिय प्रकाशन मिलो तां पेहला चुप हुई जाओ। 31 काँ भई तुहें सब इक-इक करी ने भविष्यवाणी करी सकाये, तां कि सब सीखो भई सर्बीं जो शान्ति मिलो। 32 कने भविष्यबगतावां री आत्मा भविष्यबगतावां रे वशा च ई।

33 काँ भई परमेशवर गडबडिया रा नीं, पर शान्तिया रा परमेशर आ। तेदा जे पवित्र लोकां रिया सबी कलीसियावां च हा। 34 जनाना कलीसिया रिया सभा च चुप रहो, काँ भई तिन्हां गलां करने रा हुकम नीं आ, पर अधीन रहणे रा हुकम आ, तेदा जे व्यवस्था च लिखीरा भी आ। 35 जे से किछ सीखणा चाओ, तां घरा च अपने खस्मा ते पुछो, काँ भई जनाना रा कलीसिया च गलां करना शर्मा री गल्ल ई। 36 क्या परमेशरा रा वचन तुहां च ते निकली रा? या सिर्फ तुहां तका ई पुज्जी रा?

37 जे कोई माह्लु अप्पु जो भविष्यबगता या आत्मिक जन समझो, तां ये जाणी लओ भई सैं जे गलां हऊँ तुहां जो लिखां, सैं प्रभुये रा हुकम आ। 38 पर जे कोई येदा नीं मनो, तां तिस्सो भी नीं मनो। 39 इस खातर हे भाईयो, भविष्यवाणी करने रिया धुना च रहो कने अन्य भाषा बोलणे ते मना नीं करो; 40 पर सारियां गलां कोमलता कने ढंगा-ढंगा ने कित्तियां जाओ।

मसीह रा जिन्दा हुणा

15 हे भाईयो, हुण हऊँ तुहां जो से ई सुसमाचार दस्सां सैं जे पेहले सुणाई चुकी रा, तिस्सो जे तुहें अगीकार भी कित्या था कने तिस च

तुहें पक्के भी ये। 2 तिसते ई तुहां रा उद्धार भी हुआ, जे तिस सुसमाचारा जो सैं जे मैं तुहां सुणाया था याद रखांये तां; नहीं तां तुहां रा विस्वास करना बेकार आ।

3 इस वजह ते मैं सबते पेहले तुहां जो से ई गल्ल पजुआई, सैं जे मिजो पुज्जी थी भई पवित्र शास्त्रा रे वचना रे मताबक यीशु मसीह आहां रे पापां रे खातर मरी गया, 4 कने गाडा गया, कने पवित्र शास्त्रा रे मताबक तीजे दिन जी भी उठया, 5 कने कैफा जो फेरी बाहरां जो दुस्सया। 6 फेरी सैं 500 ते जादा भाईयां जो सौगी दुसया, तिन्हां च ते मते सारे हुणा तका ज्युंदे पर किछ सई गये। 7 फेरी सैं याकूबा जो दुसया तां सर्बीं प्रेरितां जो दुसया। 8 सबते बाद मिन्जो भी दुसया, सैं जे मनो अध-परधेयां दिनां रा जम्मी रा था। 9 काँ भई हऊँ प्रेरितां च सबते छोटा, पर प्रेरित कहलाणे जोगा मनीं आ, काँ भई मैं परमेशरा री कलीसिया जो सताई रा था। 10 पर हऊँ जो किछ बी आ, परमेशरा रे अनुग्रह ते आ। तिसरा अनुग्रह सैं जे मेरे पर हुआ, सैं बेकार नीं हुआ; पर मैं तिन्हां सर्बीं ते बदी ने मेहनत कित्ती; तां भी ये मेरिया खाते नीं हुआ; पर परमेशरा रे अनुग्रह ते सैं जे मेरे पर था। 11 इस खातर चाहे हऊँ आ, चाहे सैं ये, अहें ये ई प्रचार करांये, कने इस पर तुहें विस्वास भी कित्या।

अहांरा भीं ते जिन्दा हुणा

12 इस खातर तजे मसीह रा ये प्रचार हुआं भई सैं मरीयेयां च ते ज्युंदा हुआ, तां तुहां च ते कितने येदा बोली सकां ये भई मरीयेयां फेरी भीं ज्युंदेयां नीं हुणा? 13 जे मरीयेयां फेरी ज्युंदेयां हुणा ई नीं आ, तां मसीह मनी जी उठेया; 14 कने जे मसीह नीं जी उठेया, तां आहां रा प्रचार करना बेकार आ कने तुहां रा विस्वास करना भी बेकार आ। 15 पर अहें परमेशरा रे झुठे गवाह ठेहरे; काँ भई अहें परमेशरा रे बारे च ये गवाई दिती भई तिन्हें मसीह जो ज्युंदा कित्या, असल च नीं कित्या जे मरीयेयां नीं जी उठदे तां। 16 काँ भई तदुआ तका जे तिस अपने बैरियां जो अपने पैरा हेठ नी ली औणा, तदुआ तका तिसरा राज करना जरूरी आ। 17 सबते आखरी बैरी सैं जे नाश कित्या जाणा; सैं मौत ई। 18 काँ भई, "परमेशरे सब किछ तिसरे पैरां हेठ करी तरा," पर तजे सैं बोलां भई सब किछ तिसरे अधीन करी दित्या गईरा तां साफ आ भई तिने जे सब किछ तिसरे अधीन करी तया, सैं अप्पु लग रह्हा। 19 कने तजे सब किछ तिसरे अधीन हुई जाणा, तां पुत्रा अप्पु ई भी तिसरे अधीन हुई जाणा, तिने जे सब किछ तिसरे अधीन करी तया, भई सर्बीं च परमेशर ई सब किछ हो।

20 नहीं तां सैं जे लोक मरीयेयां खातर बपतिस्मा लवां ये सैं क्या करगे? जे मुर्दे जी नीं उठदे हो तां फेरी तिन्हां खातर कै बपतिस्मा लवांये? 21 कने अहें भी कजो हर घडी खतरे च पई रे रहवांये? 22 हे भाईयो, मिन्जो तिसा गला रा घमण्डा री कसम सैं जे आहां रे मसीह यीशु च हऊँ तुहां रे बारे च करां भई हऊँ रोज के रोज मरां। 23 जे हऊँ माह्लु आ रिया रीतिया पर इफिसुसा च बण पशुआं ने लडया तां मिजो क्या लाभ हुआ? जे मुर्दे जीऊंदे नीं कित्ते जाणे, "तां आवा अहें खाईये-पीये, काँ भई काल तां मरी जाणा।" 24 धोखा नीं खाओ, "बुरी संगति खरे चरित्रा जो बगाडी देई।" 25 धर्मा खातर जागी जावा कने पाप नीं करा; काँ भई किछ येदे सैं जे परमेशरा जो नीं जाणदे। हऊँ तुहां जो बेजत करने खातर येदा नीं बोलदा। 26 हुण किसी ये बोलणा, "मुर्देयां कियां-कियां जी उठणा, कने केडिया देहा सौगी औणा? 27 हे निर्बुद्धियो! जो किछ तू बावां, तदुआ तका जे से नीं मरो जीऊंदा नीं हुंदा। 28 कने सैं जे तू बावां, ये से देह नीं सैं जे पैदा हुणे औळी, पर नीरा दाणा आ, चाहे कणक हो चाहे किसी होरी नाजा रा।

29 पर परमेशर अपणिया इच्छा रे मताबक तिस्सो देह देवां, कने हरेक बीजा जो तिसरी खास देह। 30 सब शरीर इक्की साई नीं ये : माह्लुआं रा शरीर होर आ, जानवरां रा शरीर होर आ; मच्छियां रा शरीर होर जेया आ। 31 स्वर्गिया देह कने पार्थिव देह भी हई। पर स्वर्गिया देहा रा तेज होर आ कने पार्थिव रा होर जेया आ। 32 सुरजा रा तेज होर आ, चन्द्रमे रा तेज होर आ, कने तारेयां रा तेज होर आ, (काँ भई इक्की तारे ते दुजे तारे रे तेजा रा फरक आ)। 33 मुर्देयां रा जी उठणा भी येदा ई आ। शरीर नाशवान दशा च बाहई ने

कने अविनाशी दशा च जी उठां। 34 सै अनादरा सौगी बाह्या जावां, कने तेजा सौगी जी उठां; कमजोरिया सौगी बाह्या जावां, कने सामर्था सौगी जी उठां;

मुड़दयां रा जिन्दा हुणा

35 स्वभाविक देह बाह्यी जावांई, कने आत्मिक देह जी उठांई : पर स्वभाविक देह ई तां आत्मिक देह भी हई। 36 येदा ई लिखीरा भी आ, भई "पेहला माहु, मतलब आदम ज्युंदा प्राणी बणया" कने आखरी आदम, जीवन देणे आऊला बणया। 37 पर पेहले आत्मिक नी था पर स्वभाविक था, इसते बाद आत्मिक हुआ। 38 पैहला माहु धरतिया ते मतलब मिट्टिया रा था; दुजा माहु स्वर्गिय आ। 39 तेदा जे सै मिट्टिया रा था, तेडे ई सै भी हुये सै जे मिट्टिया रे ये; कने तेदा जे से स्वर्गीय हया, तेडे ई से भी ये सै जे स्वर्गीय हये। 40 कने तियां जे अहें तिसरा रूप धारण कित्या सै जे मिट्टिया रा था तियां ई तिस स्वर्गीय रा भी रूप धारण करना। 41 हे भाईयो, हऊं बोलां भई माँस कने लहू परमेशरा रे राजा रा अधिकारी नी हुई सकदे, कने ना नाश हुणे औला अविनाशीये रा अधिकारी हुई सकां।

42 देखा, हऊं तुहांने भेदा रियां गलां बोलां : अहां सर्बी नीं सऊणा, पे सर्बी बदली जाणा, 43 कने ये इक्की पला च, पलकां जपकदे ई आखरी तूरही बजां दे ई हुणा। काँ भई तूरही बजाई जाणी कने मुर्दयां जो अविनाशी दशा च उठाय जाणा, कने आहां बदली जाणा। 44 भई कै जरुरी आ भई ये नाशवान देह अविनाशिये जो पेहनी लो होर ये मरनहार देह अमरता जो पैहनी लो। 45 कने तदुआं तका जे इस नाशमाना अविनाशिये जो पैहनी लेणा, कने इस मरनहारा अमरता जो पैहनी लेणां, तां सै जे वचन लिखीरा पूरा हुई जाणा : "जय ने मौता जो निंगली लया। 46 हे मौत तेरी जय किती रई? हे मौत, तेदा डंग किती रैह्या?" 47 मौता रा डंग पाप आ, कने पापा रा बल व्यवस्था ई। 48 पर परमेशरा रा धन्यावाद हो, सै जे आहां रे प्रभु यीशु मसीह रे जरिये आहां जो जयवन्त करां। 49 इस खातर हे मेरे भाईयो, पक्के कने अटल रह्या, कने प्रभुये रे कमा च सदा बद्धे जावा, काँ भई ये जाणांये भई तुहां री मेहनत प्रभुये च बेकार नीं।

50 हुण तिस चन्दे रे बारे च सै जे पवित्र लोकां खातर कित्या जावां, तेदा हुक्म जे मैं गलतिया री कलीसिया जो दित्तिरा, तेदा ई तुहें भी करा। 51 हफते रे पैहले दिन तुहां च ते हरेक अपणियां आमदनियां रे मताबक किछ अप्पु ले रखी रखो भई मेरे औणे पर चन्दा कट्टा नीं करना पओ। 52 कने तजे मांह औणा, तां तिना जे तुहें चाहेंगे तिना मांह चिट्टियां दई ने भेजी देणा भई तुहां रा दान यरुशलैमा च पजुवाई दो। 53 जे मेरा भी जाणा हुआ, तां तिन्हां मेरे सौगी जाणा। 54 मांह मकिदुनिया चीयें तुहां ला औणा, काँ भई मांह मकिदुनिया जरुर ई जाणा। 55 मांह मकिदुनिया चीयें तुहां ला आऊणा, काँ भई मांह मकिदुनिया जरुर ई जाणा। 56 काँ भई रस्ते च तुहां ने मिलणा नीं चाहंदा; पर मिन्जो आश ई भई जे प्रभु चाओ तां किछ बगता तका तुहां सौगी रैहंगा। 57 पर मांह पिन्तेकुस्ता तका इफिसुसा च रैहणा, 58 काँ भई मेरे खातर तेथी इक बड़ा कने कम्मा रा दरवाजा खुली रा, कने बरोधी बौहत ये।

बिश्वासियां रे खातर दान

16 जे तीमुथियुस आई जाओ, तां देखयां भई सै तुहां ले निडर रहो; काँ भई सै मेरे साई प्रभुये रा काम्म करां। 2 इस खातर कोई तिस्सो बेकार नी जाणा, पर तिस्सो ठीक-ठाक इखा पजुवाई दो भई मेरे ला आई जाओ; काँ भई हऊं तिस्सो नह्यालया रां भई सै भाईयां ला आओ। 3 भाई अपुलोसा ने मैं बौहत विनती किती भई तुहां ले भाईयां सौगी जाओ; पर तिन्हें इस बगता जाणे री किछ भी इच्छा नीं किती, पर तजे बगत औणा तां तिस आई जाणा। 4 जागदे रह्यां, विस्वासा च पक्के रह्या, काम्म करा, जोरा औले बणा।

पौलुस रिया यात्रा रा कार्यक्रम

5 जो किछ करांये प्यारा ने करयां। 6 हे भाईयो, तुहें स्तिफनासा रे घराने जो जाणांये भई सै अखया रे पैहले फल ये कने पवित्र लोकां री सेवा खातर तैयार रह्यांये। 7 इस खातर हऊं तुहां ने विनती करां भई येदेयां रे अधीन रह्या, पर हर इक जो सै जे इस कम्मा च मेहनती कने सहकर्मी थे। 8 हऊं स्तिफनास कने फूरतूनातुस कने अखइकुस रे अऊणे ते खुशा, काँ भई तिने तुहां री कमिया जो पूरा किती रा। 9 कने जे मुर्दे नीं जी उठदे, तां मसीह भी नीं जी उठेया;

10 कने जे मसीह नीं जी उठेया, तां तुहां रा विस्वास करना बेकार आ, कने तुहें हुणा तका भी अपणे पापां च फसी रे। 11 पर मसीह च सै जे सई गरे, सै भी नाश हुये। 12 जे अहें सिर्फ इस जीवना च मसीह ते आशा रखांये तां अहें सर्बी माहुआं ते जादा अभागे ये।

अन्तिम आदेश कने अभिवादन

13 पर सचमुच मसीह मुर्दयां च ते जी उठी रा, कने सै जे सई गरे तिन्हां च सै पेहला हुआ। 14 काँ भई तजे माहुये ते मौत आई, तां माहुये ते ई मूर्दियां रा जी उठणा भी आया। 15 कने तियां जे आदमा च सब मराये, तियां ई मसीह च सब जीऊंदे किचे जाणे, 16 पर हरेका अपणिया-अपणिया बारिया च : पैहला फल मसीह, फेरी मसीह रे आऊणे पर तिसरे लोक। 17 इसते बाद अन्त हुणा। तिस बगत तिस सारी प्रधानता, कने सारा अधिकार, कने सामर्था रा अन्त करी ने राज्य जो परमेशर पिता रे हाथा च दई देणा। 18 तिने मेरिया कने तुहां रिया आत्मा जो चैन दित्ती रा, इस खातर येदेयां जो मन्नो।

19 आसिया री कलीसियावां खाते तुहां जो नमस्कार; अक्विला कने प्रिस्का रा कने तिन्हां रे घरा रिया कलीसिया रा भी तुहां जो प्रभुये च बौहत-बौहत नमस्कार! 20 सर्बी भाईयां रा तुहां जो नमस्कार। पवित्र गले लाई ने अप्पु चीयें नमस्कार करा। 21 मुझ पौलुसा रा अपणे हत्था रा लिखीरा नमस्कार। 22 जे कोई प्रभुये ने प्रेम नीं रखो तां सै स्थापित हो। हे आहां रे प्रभु, औ! 23 प्रभु यीशुये रा अनुग्रह तुहां पे हुन्दा रहो। 24 मेरा प्रेम मसीह यीशुये च तुहां सर्बी ने सौगी रहो। आमीन।

2 कुरिन्थियों

अभिवादन

1 परमेशरा रिया इच्छा ते मसीह यीशु रे प्रेरित पौलुस कने अहारे भाई तिमुथियुस रिया तरफा ते परमेशरा री करीसिया कुरिन्थुस कने अखया रे लाके रे सारे पवित्र लोकां रे नों: 2 अहारे पिता परमेशर कने प्रभु यीशु मसीह रिया तरफा ते तुहांजो अनुग्रह कने सुख-शान्ति मिलो।

परमेशरा रा धन्यवाद करना

3 अहारे प्रभु यीशु मसीह रे पिता परमेशरा रा धन्यवाद ओ, सैं जे दया रे स्वामी ये कने हर इक किस्मा शान्ति देणे औळे परमेशर ये। 4 अहारिया हर मुसीबता च सैं अहांजो शान्ति देआं ताकि अहें बी मुसीबतां च पईरे लोकां जो तियां ई शान्ति देई सक्को, तियां जे परमेशरे अहांजो दित्ती। 5 कांभई तियां जे मसीह रे दुखां च अहें हिस्सेदार हुआं ये, तियां अहारी खुशी मसीह रे जरिये तुहारे खातर बी उमड़दी रौ। 6 जे अहें दुख सैंये, तां सैं तुहारे उद्धार कने खुशिया रे खातर आ; कने जे अहें खुश ये, तां सैं तुहां रिया खुशिया खातर आ; ये खुशी तिन्हां दुखां जे अहें बी सैंही करां ये तुहांजो हौसले सौगी सैंहणे जो प्रेरित करां ई। 7 तुहारे बारे च अहांजो पूरी आस ई कांभई अहें जाणां ये भई तियां जे तुहें अहारे दुख-तकलीफां जो बंडां ये, तियां ई अहां रियां खुशियां च बी तुहारा हिस्सा।

8 मेरे भाईयो, अहें ये जाणां ये भई तुहें तिन्हां कष्टां रे बारे च जाणा सैं जे अहांजो आसिया च झेलणे पै थे; तिन्ही अहें सैंहण-शक्तिया रिया सीमा ते किति जादा बोझ हेठ दबोईगरे; येथी तक भई अहांजो जीणे तक री कोई आस नीं थी। 9 हां अहें अपने मना च ये समझी बैठीरे थे भई अहांजो मौती री सजा हुईगरी, ताकि अहें खुद अपूँ पर जादा भरोसा नीं रखीने तिस परमेशरा पर भरोसा करिये सैं जे मूर्खियां जो बी भीं ते जिन्दा करी देआं। 10 तिने परमेशरे ई अहांजो मौती रे इतने बड्डे संकटा ते बचाया, कने अहां रियां अजकियां परिस्थितियां च बी सैं ई अहांजो बचागा; अहारी आस तिस पर ई टिकिरी कने अगे बी तिस ई अहें बचाणे। 11 जे तुहें बी अहां रिया तरफा ते प्रार्थना करीने सहयोग देंगे तां अहांजो मते सारे लोकां री प्रार्थनां रे जरिये परमेशरा रा सैं अनुग्रह जे मिलया, इसरे खातर मते लोकां जो अहां रिया तरफा ते धन्यावाद करना चाहिन्दा।

पौलुसा रिया योजना च तबदीली

12 अहांजो इसरा गर्व आ भई अहें ये गल्ल आच्छे मना ने बोली सक्कां ये भई अहें इस संसारा सौगी कने खास जेआ तुहां लोकां सौगी परमेशरा रे अनुग्रह रे रुपा च बताव कित्या; अहें तिसा सिधार्ई ने कने सच्चाईया ने बताव कित्या सैं जे परमेशरा ते मिलां ई, पर तिसा ते नीं सैं जे दुनियां री सोचा ते मिलां ई। 13 अहें तुहांजो होर कुछ नीं लिखया, सिर्फ सैं ई लिखया सैं जे तुहें पढ़ां ये कने मन्नां बी ये, कने मिन्जो आस ई भई तुहां अन्त तक बी मन्द्या रैंहणा। 14 तियां जे तुहें अहांजो थोड़ा जेआ समझया; तुहें अहारे खातर तियां ई गर्व करी सक्कां ये तियां जे अहें तुहारे खातर तिस दिन गर्व करणे ताहली जे अहारे प्रभु यीशु फेरी भीं औंगे।

15 इस विश्वासा रिया वजह ने मैं पैहले तुहांले औणे री ठाणी थी ताकि तुहां जो भीं ते आशीर्वादा रा फायदा मिली सक्को। 16 हऊँ सोचां था भई मकिदुनिया जान्दे हुये तुहांने मिलूँ कने ताहली जे मकिदुनिया ते वापस हऊँ तां फेरी तुहांले आऊँ; कने तुहें मिन्जो यहूदिया रिया तरफा जो थोड़ी जेई

दूर छड्डी जायों। 17 मैं ताहली जे ये योजना बनाईयां थी, तां मिन्जो कोई संशय नीं थी; या हऊँ सैं योजना जे बनां तां क्या तिन्हांजो संसारिक तरिके ने बनां भई इकई घड़िया च 'हां, हां बी करां कने 'नां, नां बी करदा रऊँ। 18 परमेशर सच्च आ कने तिस इसरी गवाही देणी भई तुहारे प्रति अहारा सैं जे वचन आ ईक सा 'हां' कने 'नां' नीं करदा। 19 कांभई तुहां बिच जिस परमेशरा रे पुत्र यीशु मसीह रा अहें, यनि सिलवानुस, तिमुथियुस कने मैं प्रचार कित्या, सैं 'हाँ' कने 'नां' दोनों इक साथ नीं थे, पर तिस्च 'हाँ' ई 'हाँ' हुई। 20 कांभई परमेशरा री जितणी प्रतिज्ञां ईयां, सैं यीशुये च सारयां रे खातर 'हाँ' बणी जाईयां; इस खातर अहें तिसरे जरिये बी सैं जे आमीन बोलां ये, सैं परमेशरा री ई महिमा खातर हुआं। 21 सैं जे तुहांजो मसीह रे आदमिये रे रुपा च अहां सौगी तह करां कने तिने जे अहारा बी अभिशेक कित्या सैं परमेशर ई हाया। 22 तिने जे अहां पर मोहर बी लगाईरी कने अहारे अन्दर बयाने रे रुपा च सैं पवित्र आत्मा दित्या सैं जे इसा गल्ला रा हौसला भई सैं देणे रा वचन तिने अहांजो दित्या, सैं तिस अहांजो देणा।

23 गवाईया रे रुपा च परमेशरा रा दुहाइ देन्दे हुये कने अपने जीबना री कसम खान्दे हुये हऊँ बोलां भई हऊँ दबारा कुरिन्थ इस खातर नीं आया था भई हऊँ तुहांजो पीड़ा ते बचाणा चाँह था। 24 इसरा मतलब ये नीं था भई अहें तुहारे विश्वासा पर काबू पाणा चाँह था; तुहें त अपने विश्वासा च पक्के हुईगरे, वल्कि गल्ल ये ई भई अहें त तुहां रिया खुशिया खातर तुहारे साथी ये।

2 इस खातर मैं ये निश्च करील्या था भई तुहांजो दुबारा दुख देणे तुहांले नीं आऊँ। 2 कांभई जे हऊँ तुहां जो दुखी करणा तां फेरी भला येदा कुण हुँगा सैं जे मिन्जो सुखी करणा, सिवा तुहारे तिन्हीं जे मैं दुख दितीरा? 3 सैंई गल्ल त मैं तुहांजो लिखीरी भई ताहली जे हऊँ तुहांले आऊँ तां तिन्हाते जे मिन्जो खुशी मिलणी चाहिन्दी थी, तिन्हांते मिन्जो दुख नीं मिलो; कांभई तुहां सब्बीं च मेरा ये विश्वास बणीरा भई मेरिया खुशिया ची तुहें सब खुश हुँगे। 4 कांभई तुहांजो मैं दुखा ने भरीरे मना ते कने पीड़ा सौगी आसू बहाई-बहाईने ये लिखीरा; पर तुहांजो दुखी करने खातर नीं, बल्कि इस खातर भई तुहारे प्रति सैं जे मेरा प्यार आ, सैं कितणा महान आ, तुहें इसजो जाणी सक्को।

अपराधिये जो माफी

5 जे किन्हिये दुख दित्या, तां मिन्जो ई नीं बल्कि (भई तिस सौगी बडी सख्ती नीं कऊँ) जरा-जरा तुहां सब्बीं जो बी दुख दित्या। 6 येदे माहूये जो तुहारे भाईयें सैं जे सजा देईती, सैं ई काफी। 7 इस खातर इसते बधिया ये आ भई तिसजो माफ करा कने शान्ति देवा ताकि सैं माहू किति दुखा ची नीं डुब्बीरा रौ। 8 इस खातर मेरी तुहांते ये विनती भई तुहें तिसरे प्रति अपने प्यारा जो बधावा। 9 ये मैं तुहांजो येदा देखणे खातर लिखीरा भई तुहें इन्तेहाना च पूरे उतरां ये कि नीं कने सारियां गल्लां च आज्ञाकारी रैंहने कि नीं। 10 पर जे तुहें किसी जो किसी गल्ला रे खातर माफ करां ये कि नीं तां सैं मसीह रिया मौजूदगिया च मैं तुहां रे खातर ई कित्या, 11 ताकि अहें शैताना ते मात नीं खाई जाओ; कांभई तिस रियां चालां ते अहें अणजाण नीं ये।

त्रोआस च पौलुसा री बेचैनी

12 ताहली जे मसीह रिया खुशखबरिया रा प्रचार करने खातर हऊँ त्रोवास आया तां तिन्ही मेरे खातर प्रभु रा दरवाजा खुल्ला ई था। 13 अपने भाई तीतुस जो तिन्ही नीं पाईने मेरा मन बड़ा दुखी हुया; इस खातर तिन्हाते इजाजत लेईने हऊँ मकिदुनिया जो चलीप्या।

मसीह च बिजय उत्सव

14 पर परमेशरा रा धन्यवाद हो सै जे मसीह रे जरिये अपने विजय अभियाना च अहां जो हमेशा रस्ता दर्स्सा; कने अहारे जरिये हर किति अपने ज्ञाना री खुशबु बिखेरदा रैयां। 15 कांभई अहें परमेशरा रे नेड़े उद्धार पाणे औलआं कने नाश हुणे औलयां इन्हां दुई रे खातर मसीह री खुशबु ये। 16 पर तिन्हां खातर सै जे विनाश रे रस्ते पर ये, सै मौती री येदी दुर्गन्ध ये सै जे तिन्हांजो मौती रिया तरफौं लेई जाई; पर तिन्हांरे खातर सै जे उद्धार रे रस्ते पर बधदे रैयें, ये जिन्दगिया री येदी खुशबु ये, सै जे जीवन री तरफौं बधान्दी रैई। पर इन्हां गल्लां रे लायक कुण आ? 17 परमेशरा रे वचना जो अपने फायदे खातर, तिसच मिलावट करीने बेचणे औळे मते सारे दूजे लोकां साई अहें नीं ये। नां! अहें त परमेशरा रे सामणे परमेशरा रिया तरफा ते भेजरीे माळुआं रे बराबर मसीह च हुईने सच्चाईया ने बोलां ये।

नोंईयां बाचा रे सेबक

3 इसते क्या येदा लगां भई अहें भीं ते अपनी बडयाई अप्पू खुद करने लगीरे? या क्या अहें तुहारे खातर या तुहांते पहचान पत्र लेणे री जरूरत ई? तियां जे कुछ लोक करां ये। ये जरूरी नींआं, 2 अहारी चिड्डी त तुहें अप्पू खुद ये सै जे अहारे मना च लिखीरे तिसजो जे सारे लोक जाणां ये कने पढ़ां ये। 3 कने तुहें बी त येदा ई दर्स्सां ये मन्त्रो तियां जे मसीह री चिड्डी, सै जे अहां रिया सेवा रा नतीजा, तिसजो जे स्याईया ने नीं पर जिन्दा परमेशरा रिया आत्मा ने लिखीरा, तिस्सो जे पत्थरा रियां सिल्लां पर नीं बल्कि माळुआ रे दिला रिया पट्टिया पर लिखीरा।

4 अहें मसीह रे कारण परमेशरा रे सामणे येदा ई भरोसा रखणे रा दावा करां ये। 5 ये नीं आ भई हऊँ अप्पू खा ते इस लायक आ भई अपणिया तरफा ते किसी गल्ला रा विचार करी सक्रो, पर अहारी काबलियत अहांजो परमेशरा रिया तरफा ते मिलां ई, 6 तिने ई अहांजो नौवें बायदे रा सेवक होणे रे लायक बी बणाया, ये कोई लिखीरा शब्द नीं आ बल्कि आत्मा रा वायदा, कांभई शब्द त मारां, पर आत्मा जीवन देआं। 7 पर ये सेवा सै जे मौती ने जुड़ीरी थी यनि व्यवस्था रा विधान सै जे पत्थरां पर लिखीरा था तिसच इतणा तेज था भई इस्राएल रे लोक मूसा रे तिस तेजस्वी मुहां जो देखी नीं सक्रे, कने तिसरा सै तेज बाद बिच घटदा गया, 8 फेरी भला आत्मा रा बायदा होर बी तेज कां बीं हुंगा? 9 कने फेरी ताहली जे दोषी बनाणे औलिया सेवकाईया च इतणा तेज आ तां तिसा सेवा च कितणा तेज हुणा सै जे धर्मी बनाणे औली सेवा ई। 10 कांभई सै जे पैहले तेजा ने भरीरा था सै हुण तिस तेजा रे सामणे किति जादा तेजस्वी आ बगैर तेजा ते हुईया। 11 कांभई सै सेवा तिसरा तेज जे घटना तह था, सै तेजस्वी थी, ता सै जे रोज आ, सै कितणा तेजस्वी होणा।

12 इस खातर अपणिया इसा आसा रे कारण अहें इतणे निडर ये। 13 अहें तिस मूसा रे साई नीं ये, सै जे अपने मुँहा पर परदा पाईरा था भई किति इस्राएल रे लोक तिस घटणे औळे तेजा रे अन्ता जो नीं देखी लो।

14 कांभई तिन्हांरी बुद्धी जड़ हुईगरी थी, कांभई आज तक ताहली जे सै तिस पुरानिया वाचा जो पढ़ां ये, तां सै ई परदा तिन्हांरे दिलां पर बिणा हटाये पैईरा रैयां, कांभई सै परदा सिर्फ मसीह रे जरिये ई हटाया जां। 15 आज तक ताहली जे कदीं मूसा रा ग्रन्थ पढ़या जां, तां पढ़ने औलयां रे मना पर सै पड़दा पैईरा ई रैयां। 16 पर ताहली जे किसी रा दिल प्रभु रिया तरफौं फिरां, तां सै परदा कन्डे करी दित्या जां। 17 देखा! तिस प्रभु रिया तरफा जे हऊँ इशारा करीरां सै ई आत्मा: कने तित्थी जे प्रभु री आत्मा ई, तित्थी छुटकारा। 18 पर ताहली जे अहें सब अपने खुले चेहरे ने दर्षणां च प्रभु रे तेजा रा ताहली जे ध्यान करां ये, तां अहें बी तेदे ई होणे लगां ये कने अहारा तेज जादा ते जादा बधणे लगां, ये तेज तिस प्रभु ते ई मिलां, यनि आत्मा ते।

चिक्का रे बर्तणां च धन

4 कांभई परमेशरा रिया दया ते ये सेवा अहांजो मिली, इस खातर अहें निराश नीं होन्डे। 2 पर अहें त शर्मनाक काम्म करने छड्डी तरे, अहें

छल कपट नीं करदे कने नां ई परमेशरा रे बचनां च मिलावट करां ये: बल्कि सच्चाईया जो सरल रुपा च परगट करीने, लोकां रिया चेतना च परमेशरा रे सामणे खुद अप्पू जो प्रशंसा रे लायक बणाये। 3 जिसा खुशखबरिया रा जे अहें प्रचार करां ये, तिस पर जे कोई परदा पैईरा तां ये सिर्फ तिन्हांरे खातर पैईरा, सै जे बर्बादिया रे रस्ते पर चलीरे। 4 इस जुगा रे स्वामीये (शैताने) इन्हा अविश्वासियां री बुद्धी अन्ही करी तरी, ताकि सै जे परमेशरा रा असली रुप मसीह री महिमा रे सुसमाचारा ते निकलने औळे प्रकाशा जो नीं देखी पाओ। 5 अहें खुद अपना प्रचार नीं करदे बल्कि प्रभु रे रुपा च मसीह यीशुये रा उपदेश देआं ये, कने अपने बारे च त येई बोलां ये भई अहें यीशुये रे नाते तुहारे सेवक ये। 6 कांभई तिने ई परमेशरे, तिने जे बोलया था, "हनेरे ते ई प्रकाश चमकणा" सैई अहारेयां दिलां च चमकीरा, ताकि अहांजो यीशु मसीह रे चेहरे ते परमेशरा री महिमा रे ज्ञाना री जोति मिली सक्रो।

7 पर अहां साई चिक्का रे भाँडयां च ये दौलत इस खातर रखीरी भई ये अलौकिक शक्ति अहारी नीं: बल्कि परमेशरा रिया ई तरफा ते ओ। 8 अहें चहूँ तरफां ते दुख तकलीफां त भोगां ये, पर संकटां च नीं पौंदे; अहें डरीरे त हये, पर निराश नीं ये; 9 सताये त जायें, पर छड्डी नीं जान्दे; अहें झुकाईरे त हाये, पर खत्म नीं हुईरे। 9 सताये त जायें, पर छड्डी नीं जान्दे; अहें झुकाईरे त हाये, पर खत्म नीं हुईरे। 10 अहें हमेशा अपणिया देहा च यीशुये रिया मौती जो हर किति लेई रख्यां ये ताकि यीशुये रा जीवन बी अहां रियां देहां च साफ तौर पर परगट हो। 11 यीशुये रिया वजह ने अहांजो जीते जी हमेशा मौता रे हत्थां च सौंपया जां ताकि यीशुये रा जीवन बी नाश होणे औलयां शरीरां च साफ तौरा पर परगट हुई जाओ। 12 इस तरीके ने मौत त अहां पर प्रभाव पाई कने जीवन तुहां पर।

13 पवित्र शास्त्रा च लिखीरा, "मैं विश्वास कित्या था इस खातर मैं बोलया।" अहां च बी विश्वासा री सैई आत्मा ई कने अहें बी विश्वास करां ये इस खातर अहें बी बोलां ये। 14 कांभई अहें जाणां ये भई तिने जे प्रभु यीशुये जो मूर्देआं च ते जिन्दा कित्या, सै अहांजो बी तुहारे सौगी अपने सामणे खडा करगा। 15 ये सारियां गल्लां तुहारे खातर ई कितियां जाई करां ईयां, ताकि जादा ते जादा लोकां च फैलदा जाई करां परमेशरा रा अनुग्रह, परमेशरा रिया महिमा रे खातर धन्यवाद देणे च फलवन्त हुई सक्रो।

16 इस खातर अहें निराश नीं हन्डे: अहारे भौतिक शरीर कमजोर हुन्डे जाई करां ये, तां बी अहारी अंतरात्मा हर रोज नौई त नौई हुन्दी जाई करां ई। 17 अहारा पल भरा रा ये छोटा-मोटा दुख अहारे खातर इक बड़ा ई खास कने अनन्त महिमा पैदा करदा जां। 18 सै जे कुछ देखया जाई सक्रां अहां रियां अक्खीं तिस पर नीं टिकि रियां, बल्कि अणदेक्खी चीजां टिकिरी; कांभई देखी रियां चीजां थोड़े ई दिनां रियां, पर अणदेखी चीजां सदा बणीरी रैईयां।

अहारा स्वर्गिय घर

5 कांभई अहें जाणां ये भई अहारी ये काया यनिके ये तम्बू तिसच जे अहें इसा धरतिया पर रैयां ये रडवाई दित्या जांगा, तां अहांजो परमेशरा रिया तरफा ते स्वर्गा च इक बणया-बणाया घर मिली जां सै जे माळुआं रे हत्था रा नीं बणाईरा हुन्दा। 2 इस खातर तदुआं तक जे अहें इस घरा च, अहें रोन्डे-बिलखदे रैयें कने ये ई चाहन्डे रैयें भई अपने स्वर्गिय घरा च जाईने बसी जाओ। 3 पक्का अहारी ये ई धारणा ई भई अहें तिसजो पांगे कने फेरी घरा ते बेघर नीं रैहन्गे। 4 कने अहें इस डेरे च रैहन्डे हुये बोझे हेट दबोईने बिलखदे रैयें, बजह ये ई भई अहें इन्हां कपड्यां जो छडणा नीं चांहन्डे बल्कि तिन्हांरे ई उपर तिन्हांजो पैहनणा चाँये ताकि जो कुछ नाशवान आ तिस्सो अनन्त जीवन निंगली लो। 5 तिने जे अहांजो इसा गल्ला रे खातर तैयार कित्तिरा, सै परमेशर ई हाया, तिने इस हौंसले रे रुपा च भई अपने बचना रे मुताबिक सै अहांजो देगा, बयाने रे रुपा च अहांजो आत्मा दित्तिरी।

6 अहांजो पूरा विश्वास आ, कांभई अहें जाणां ये भई तदुआं तक जे अहें अपणिया देहा च रैई करां ये, प्रभु ते दूर ये। 7 कांभई अहें विश्वासा रे सहारे जीयें, रुपा जो देखीने नीं। 8 अहांजो विश्वास आ, इसते ई हऊँ बोलां भई अहें अपणिया देहा जो छड्डीने परमेशरा रिया सौगी रैहणे जो खरा समझां ये।

9 इसते अहांरी ये ई इच्छा ई भई अहें चाहे हाजर रओ कने चाहे नीं बी हाजर रौओ, तिस्सो खरे लगां ये। 10 अहां सबनीं जो अपणे शरीरा च रैईने भला या बुरा काम्म सैं जे कुछ कित्या, तिसरा फल पाणे रे खातर मसीह रे न्याय आसणा रे सामणे जरूर हाजर होणे पौणा।

परमेशरा ने मेल-मलाप

11 इस खातर प्रभु ते डरदे हुये अहें सच्चा जो ग्रहण करने रे खातर लोकां जो समझान्दे बुझान्दे रैयें; अहारे कने परमेशरा रे विच कोई परदा नीं आ; कने मिन्जो ये आस ई भई तुहें बी अहांजो ठीक ढंगा ने जाणां ये। 12 अहें तुहारे सामणे भीं ते अपणी कोई बड्याई नीं करीरां ये, बल्कि तुहांजो ईक मौका देई करां ये भई तुहें अहां पर घमण्ड करी सक्को; ताकि सैं जे सामणे दिखणे औलिया चीजा पर घमण्ड करां ये न सिर्फ तिस पर सैं जे किछ तिसरे मना चा, तिन्हांजो तिसरा जबाब मिली सक्को। 13 कांभई जे अहें दीवाने तां परमेशरा खातर ये कने जे सयाणे तां सैं तुहारे खातर ये। 14 कांभई मसीह रा प्यार अहांजो मजबूर करी देआं: इस खातर भई अहें ये समझां ये भई सैं इक माह्नु सारयां खातर मरया, तां सारे मरीगे। 15 कने ये सारयां लोकां खातर मरया कांभई सैं लोक जे ज्युन्दे, सैं बस अग्गे अपणे खातर ई नीं जीन्दे रौ, बल्कि तिसरे खातर जीओ सैं जे मरने ते बाद भीं ते ज्युन्दा करी दित्या गया।

मसीह च नया जन्म

16 परिणाम स्वारूप हुण ते अग्गे अहें किसी बी माह्नुये जो संसारा रे नजरिये ने नीं देखखो बल्कि इक समय अहें मसीह जो बी संसारा रे नजरिये ने देखया था। किछ बी हो हुण अहें तिस्सो तिस तरीके ने नीं देखदे। 17 इस खातर जे कोई मसीह चा, तां हुण सैं परमेशरा री नौई सृष्टिया रा अंग ये; पुराणी गलां जान्दी रैईयां; सरा कुछ नौवा हुईया, 18 कने फेरी ये सारियां गलां तिस परमेशरा रिया तरफा ते हुआ ईयां, तिने जे अहें मसीह रे जरिये अप्पू च मलाईल्या कने लोकां जो परमेशरा ने मेल-मलापा रा काम्म अहांजो सौंपीत्या। 19 अहांरा संदेश आ भई परमेशर लोकां रे पापां जो अनदेखा करदे हुये मसीह रे जरिये तिन्हांजो अप्पू च मलाईरां कने तिने ई माह्नुआं जो परमेशरा ने मिलणे रा संदेश अहांजो सौंप्या।

20 इस खातर अहें मसीह रे राजदूता रे रूपा च काम्म करी रांये; मानो परमेशर अहारे जरिये तुहांजो चेताई रां। मसीह रिया तरफा ते अहें तुहांने बिनती करां ये भई परमेशरा सौंगी मिली जावा। 21 सैं जे पापा ते अन्जाण आ, तिस्सो तिने इस खातर पाप बली बणाया भई अहें तिसरे जरिये परमेशरा रे सामणे नेक समझे जायें।

6 परमेशरा रे कम्मां च इक साथ काम्म करने रे नाते अहें तुहां लोकां ते बिनती करां ये भई परमेशरा रा सैं अनुग्रह जे तुहांजो मिलीरा, तिस्सो बेकार नीं जाणे देवा। 2 कांभई तिने बोलया:

“मैं ठीक समय पर तेरी सुणी ली कने हऊँ छुटकारे रे दिन तिज्जो सहारा देणे आया।”

देख्वा। “सही समय” येई हाया। देख्वा। “छुटकारे रा दिन येई हाया।

3 अहें किसी गला च ठोकर खाणे रा कोई बी मौका नीं देन्दे ताकि अहांरी सेवकाईया च कोई इल्जाम न लगो। 4 पर परमेशरा रे सेवका रे रूपा च अहें हर तरीके ने अप्पूजो परगट करदे रैयें, धीरजा ने सब किछ सैंहन्दे हुये, दुख तकलीफां रे बिच, अडचणां रे बिच, 5 मार खान्दे हुये, जेलां च रैहन्दे हुये, अशान्तिया रे बिच, मेहनत करदे हुये, कई रातीं तक बिणा सोये, भूखे रैईने, 6 पवित्रता ने, ज्ञाना ते, दयालुता ने, प्रवित्र आत्मा ते, 7 अपणे सच्चे सन्देश कने परमेशरा रिया शक्तिया ने, नेकिया रे हत्थियार अपणे सज्जे कने खव्वे हत्थां च, 8 अहें आदरा कने निरादरा रे बिच अपमाना कने सम्माना च अपणी बड्याई करदे रैयें, अहांजो उग समझया जां, जबकि अहें सच्चे; 9 अहांजो अनजाण समझया जां, जबकि अहांजो सारे जाणां ये; अहांजो मरने औलयां साई जाणया जां, तां बी देख्वा अहें मौती रे अग्गे नीं ये; 10 अहांजो शोका च व्याकुल समझया जां, जबकि अहें त हमेशा ई खुश रैयें; अहें गरीब समझे जायें, जबकि कईयां जो अमीर बणाई दें; लोक समझां ये अहांले कुछ नीं आ, जबकि अहांले त सब किछ आ।

11 हे कुरिन्थियो, अहें तुहांने सारियां गलां खुल्हीने कित्तियां, तुहारे खातर अहांरा मन खुला। 12 अहारा प्यार तुहारे खातर घट नीं हुईरा; पर तुहें अहांने प्यार करना छुडी तरा। 13 तुहांजो अपणा बच्चा समझदे हुये हऊँ बोलीरां भई तुहांजो बी तिसरे बदले च अपणा दिल खुला रखणा चाहिन्दा।

असमान जुये च नीं जुता

14 अविश्वासियां सौंगी बेमेल संगती मता करदे कांभई अच्छाईया कने बुराईया री भला क्या बराबरी हुई? या लोई रे कने नेहरे रे बिच भला मित्रता कियां हुई सक्कां ई? 15 ईयां ई मसीह रा शैताना ने क्या तालमेल? यनिके विश्वासिया रा अविश्वासिये ने क्या नाता? 16 परमेशरा रे मन्दरा रा मूर्तियां ने क्या नाता? कांभई अहें खुद तिस जिवित परमेशरा रे मन्दर ये, तियां जे परमेशरा बोलया था:

“मांह तिन्हां च बसणा कने तिन्हां च चलणा फिरना;
कने हऊँ तिन्हांरा परमेशर हुणा कने सैं मेरे लोक होणे।”

17 इस खातर प्रभु बोलां, “तुहें तिन्हांरे बिच्चा ते निकलीने बाहर आई जावा, तिन्हांते अप्पू जो लग करा; हुण तुहें कदी किछ बी नीं छूआ, सैं जे अशुद्ध आ,

ताई मांह तुहें ग्रहण करने;

18 “कने हऊँ तुहांरा पिता हुणा, कने तुहें मेरे बेटे कने बेटियां हुणे।

ये सब्बीं ते शक्तिशाली प्रभु परमेशरा रा वचन आ।”

7 मेरे प्यारे मित्रो, कांभई अहांले ये प्रतिज्ञां इयां, इस खातर आवा परमेशरा रे प्रति श्रद्धा रे कारण अहें अपणी पवित्रता जो पूरा करदे हुये अपणी बाहरली कने अन्दरली सारी बुराईयां जो धोई देईये।

पौलुसा रा आनन्द

2 अपणे मना च अहांजो जगह दे, अहें किसीरा कुछ बी नीं बगाडीरा; अहें किसी जो बी ठोकर नीं लगणे दिति, कने न ई अहें किसी ने छल-कपट कित्या। 3 हऊँ तुहांरी बेज्जति करने खातर येदा नीं बोलीरां कांभई हऊँ तुहांजो दस्सी बैठीरा भई तुहें त अहारे मना च बसां ये। येथी तक भई अहें तुहां सौंगी मरने जो या जीणे जो त्यार ये। 4 हऊँ तुहां पर भरोसा रखां, तुहां पर मिन्जो बड़ा गर्व आ, हऊँ सुखा च कने चैना चा, अपणी सारी परेशानियां झेलदे हुये मांह च खुशि उमडदी रैई।

5 ताहली जे अहें मकिदुनिया आईरे थे तां बी अहांजो राम नीं मिलया था, पर अहांजो कई किस्मा रियां परेशानियां सैंहणी पैई थी बाहर लड़ाईयां च कने मना रे अन्दर डरा ते। 6 दीन दुखियां जो सुखी करने औळे परमेशरे तीतुस जो येथी पजवाईने अहांजो सान्तवना दिति। 7 कने सैं बी सिर्फ तिसरे येथी पुजणे ते नीं पर इसते अहांजो होर जादा मिली भई तुहें तिसजो कितणा सुख दित्या; तिने अहांजो दस्सया भई तुहें अहांने मिलणे जो कितणे व्याकुल हुईरे; तुहांजो अहांरी कितणी फिक्र ई, इसते अहें होर जादा खुश हुये।

8 कांभई मेरिया चिट्टिया ते तुहांजो बड़ा दुख हुया होणा पर फेरी भीं मिन्जो तिसरे लिखणे रा दुख नीं आ; चाहे पैहले मिन्जो इसरा दुख बी हुया हुंगा, पर हुण हऊँ देख्खीरां भई मेरिया तिसा चिट्टिया ते तुहांजो कुछ ई पल दुख हुया था। 9 पर हुण हऊँ खुश आ, इस खातर नीं भई तुहांजो दुख हुया था बल्कि इस खातर भई तिस दुखा रिया बजह ने ई तुहें पछतावा कित्या था; तुहांजो सैं दुख परमेशरा रिया तरफा ते ई हुया था ताकि तुहांजो अहां रिया बजह ने कोई नुकसान नीं ओ। 10 कांभई सैं दुख तिस्सो जे परमेशर देआं सैं इक येदे मनफिराव जो जन्म देआं तिसरे खातर जे अहांजो पछताणे नीं पौन्दा कने सैं जे मुक्ति दिलां, पर सैं दुख जे संसारिक हुआं तिसते त सिर्फ मौत जन्म लेई।

11 देखा, ये दुख सैं जे परमेशरे दित्या, तिने तुहांजो कितण हौंसला दित्या, अपणे भोले होणे री कितणी प्रतिरक्षा, कितणा गुस्सा, कितणी लालसा, अहांने मिलणे री कितणी बेचैनी, कितणा साहस, पापिये रे प्रति न्याय चुकाणे री केडी भावना पैदा करीती; तुहें हर गला च ये दस्सीत्या भई इस बारे च तुहें कितणे निर्दोष थे। 12 इस खातर जे मैं तुहांजो लिखीरा था तां तिस माह्नुये रिया वजह ने नीं सैं जे अपराधी था कने न ई तिस रिया वजह ने तिसरे प्रति

जे अपराध कित्या था, बल्कि इस खातर लिखया था भई परमेशरा रे सामणे अहारे प्रति तुहां रिया चिन्ता रा तुहांजो ज्ञान हुई जाओ।

13 इस खातर अहांजो शान्ति मिली। अहां रिया इसा शान्तिया ने तीतुस रिया खुशिया री बजह ने होर बी जादा खुशी हुई कांभई तिसरा ज्यू तुहां सारया रिया बजह ने हरा भरा हुईया। 14 तुहारे खातर मैं तिसने सै गल्लां जे बढी-चढीने कितियां थी, तिसरे खातर मिन्जो शर्मिन्दा नीं हुणे पैया; बल्कि अहें तियां जे तुहांने सारा कुछ सच्च-सच्च बोलया था, तियां ई तुहारे बारे च अहांरा गर्व तीतुस रे सामणे सच्च सिद्ध हुया। 15 सै ताहली जे ये आद करां भई तुहें सारया किस तरीके ने तिसरा हुक्म मन्नया कने उरा रे मारे थर-थर कम्बदे हुये तुहें तिस्सो कियां अपनाया तां तुहारे प्रति तिसरा प्यार होर बी बधी जा। 16 हऊं खुश आ भई हऊं तूह च पूरा भरोसा करी सकां।

खुल्ले दिला ने दान देणा

8 देखा, मेरे भाईयो, हुण अहें ये चाहें भई तुहें परमेशरा रे तिस अनुग्रह रे बारे च जाणा सै जे मकिदुनिया रे इलाके री कलीसियां च हुया था। 2 मेरा मतलब ये आ भई यनि तिन्हांरा कठन इन्तेहान लेआ तां बी सै खुश रैये कने अपणी गरीबिया रिया हालता च रहन्दे हुये बी तिन्हांरी उदारता होर कई गुणा उमड़दी रैई। 3 तिन्हारे बारे च मेरी ये गबाही भई सै जितणा जे देई सका थे तिन्हें उतणा दित्या; इतणा ई नीं बल्कि अपणिआ समर्थया ते बी जादा मन भरीने दित्या। 4 सै बड़िया नम्रता सौगी संत लोकां री सहायता करने च अहांरा साथ देणे जो बिनती करदे रैये। 5 तिन्हे अहांते तेढी जे आस किति थी, तेढी नीं बल्कि पैहले खुद अपूँ जो प्रभु जो समर्पित कित्या कने फेरी परमेशरा रिया इच्छा रे मुताबिक सै अहांजो अर्पित हुईये। 6 इस खातर अहें तीतुस ते प्रार्थना किति भई तियां जे सै अपणे कम्मा री शुरुआत करी चुक्या, तियां ई इस अनुग्रह रे कम्मा जो सै तुहारे खातर करो। 7 कने तियां जे भई तुहें हर गल्ला च यनिके विश्वासा च, बाणिया च, ज्ञाना च, कई तरह रे उपकार करने च कने अहें तुहांजो तिस प्यारा री जे शिक्षा दिति तिस प्यारा च, भरपूर ओ, तियां ई अनुग्रह रे इस कम्मा च बी भरपूर हुई जावा।

8 ये हऊं हुक्मा रे रुपा च नीं बोली करां बल्कि होरनीं माह्लुआं रे मना च तुहारे खातर सै जे उत्साह, तिस प्यारा रिया सच्चाईया जो परखणे खातर येढा बोली करां। 9 कांभई अहारे प्रभु यीशु मसीह रे अनुग्रह ते तुहें परिचित ये; तुहें ये जाणां ये भई सै अमीर हुन्दे हुये बी गरीब बणीया, ताकि तिस रिया गरीबिया ते तुहें माला माल हुई जाओ। 10 इस बारे च हऊं तुहांजो अपणी सलाह देआं, तुहांजो ये शोभा देआं, तुहें पिछले साल न सिर्फ दान देणे रिया इच्छा च सब्बीं ते अग्रे थे बल्कि दान देणे च बी सब्बीं ते अग्रे रैये। 11 हुण दान करने रे तिस जोशा जो तुहें सै जे कुछ तुहांले आ, तिसते ई पूरा करा, तुहें इस्सो तितणिया ई लगना ने पूरा करा। 12 कांभई जे दान देणे री लगन हाई तां माह्लुये ले जो कुछ हाया, तिरें मुताबिक दान ग्रहण करने रे लायक बणां, न कि तिसरे मुताबिक सै जे तिसले नीं आ। 13 अहें ये नीं चाहन्दे भई दूज्यां जो त सुख मिलो कने तुहांजो दुख; बल्कि अहें त बराबरी चायें। 14 अहांरी इच्छा ई भई तिन्हा रिया इसा कमिया रे वगत तुहांरी बढती तिन्हांरी जरूरतां पूरी करो ताकि जरूरत पौणे पर अग्रे चलीने तिन्हांरी बढती बी तुहां रिया कमिया जो दूर करी सको ताकि बराबरी बणीरी रौ। 15 तियां जे पवित्र शास्त्र बोलां: "तिने जे मता बटोरया तिसले मता नीं रैया, कने तिने जे थोड़ा बटोरया, तिसरा कुछ घट नीं निकलया।"

तीतुस कने तिसरे सहकर्मि

16 परमेशरा रा धन्यवाद ओ तिने जे तीतुस रे मना च तुहांरी सहायता रे खातर तेढा ई जोश भरीत्या, तेढा जे अहारे मना चा। 17 कांभई तिने अहांरी प्रार्थना स्वीकार किति कने सै तिसरे खातर खासकर अपणी इच्छा बी रखां, इस खातर सै खुद अपणिया इच्छा ते ई तुहांले औणे जो तैयार आ। 18 अहें तिस सौगी तिस भाईये जो बी भेज्जी राँये, तिसरा खुशखबरिया रे प्रचारा रे रुपा च सारी कलीसियां च हर किति यश फैली करा। 19 इसते इलावा इस सेवा रे कम्मा च कलीसियें तिस्सो अहारे सौगी यात्रा करने जो बी भेज्जीरा था। हुण ये सेवा अहें इस खातर करां ये भई प्रभु री महिमा कने अहारे मना

री तैयारि परगट हुई जाओ। 20 अहें इसा गल्ला च साबधान रहणे री कोशिश करी रां ये भई इस बड्डे धना रे खातर तिसरा जे अहें प्रबन्ध करीरां ये, कोई अहांरी अलोचना नीं करो। 21 कांभई सै गल्लां सिर्फ प्रभु रे नेडे ई नीं, पर माह्लुआं रे नेडे बी भली अहें तिसरी चिन्ता करां ये। 22 कने तिन्हां सौगी अहें अपणे तिस भाईये जो बी भेज्जी करां ये, तिसजो अहें बार-बार परखीने कईयां गल्लां च कने कईयां मौकयां च परोपकारा रे खातर इच्छुक पाया; पर हुण तुहारे खातर तिसच सै जे मता विश्वास आ, तिसते तिसच सहायता करने रा जोश होर जादा हुईया। 23 जे कोई तीतुस रे बारे च पुछे, तां सै तुहारे बिच सहायता करने च मेरा साथी कने सौगी-सौगी काम्म करने औला रैया; कने तित्थी तक जे अहारे भाईयां रा स्वाल आ, सै त कलीसियां रे भेज्जीरे कने मसीह री महिमा ये। 24 इस खातर तुहें तिन्हांजो अपणे प्यारा रा प्रमाण देआं कने तुहारे खातर अहें इतणा घमण्ड कजो रखां ये, इसजो सिद्ध करयो ताकि सारियां कलीसियां तिस्सो देखी सको।

साथी मसीहियां खातर सहायता

9 हुण तिसा सेवा रे बारे च सै जे पवित्र लोकां रे खातर किति जाई, मेरा तुहांजो लिखणा जरूरी नीं आ। 2 हऊं सहायता रे खातर तुहारे मना री तैयारिया जो जाणा कने तिसरे खातर मकिदुनिया रे बासियां रे सामणे ये बोलदे हुये मिन्जो गर्व आ भई अखया रे लोक त पिछले साला तेई तैयार ये कने तुहारे हाँसले ते तिन्हा च ते मतयांजो कम्मा खातर प्रेरणा दिति। 3 पर हऊं भाईयां जो तुहांले इस खातर भेज्जीरां भई तुहांजो लेईने अहें सै जे गर्व करां ये, सै इस बारे च बेकार सिद्ध नीं हो, कने इस खातर बी भई तुहें तैयार रौआ, तियां जे भई हऊं गलान्दा आया। 4 नैत ताहली जे कोई मकिदुनिया बासी मेरे सौगी तुहांले औंगा कने तुहांजो तैयार नीं पाँगा, तां हुई सकां भई इस भरोसे रिया वजह ने अहें शर्मिन्दा हो। 5 इस खातर मैं भाईयां ने ये बोलणा जरूरी समझया भई सै अहांते पैहले ई तुहांले जाओ कने तिन्हां फलां जो देणे रा तुहें पैहले तेई बचन देई बैठीरे तिन्हाजो पैहले तेई उदारतापूरवक तैयार रखें, इस खातर ये दान अपणिया इच्छा रे मुताबिक तैयार रखया जाओ न कि दबावा ने तुहांते खोईरी किसी चीजा रे रुपा च।

दान कियां देणा

6 इसजो याद रखा: सै जे थोड़ा बाँह, सै थोड़ा ई कटगा; कने सै जे जादा बाँह, सै जादा कटगां। 7 हर कोई बिणा किसी दुखा ते, या बिणा किसी दबावा ते, उतणा ई देओ जितणा तिसरे मने सोचया; कांभई परमेशर खुशिया ने देणे औळैयां ने जादा प्यार रखां। 8 कने परमेशर तुहां पर हर किस्मा रे बधिया बरदानां री बरखा करी सकां तिसते जे तुहें अपणी जरूरतां री सारी चीजां च सदा जो खुश हुई सकां ये, कने सारयां खरयां कम्मां खातर फेरी तुहांले जरूरता ते बी जादा रहणा। 9 तियां जे भई पवित्र शास्त्रा च लिखीरा:

"सै खुले मना ने देआं, सै दीन लोकां जो देआं,

कने तिसरी उदारता सदा-सदा जो बणीरी रैयां।"

10 सै परमेशर ई बाह्ने औळे जो ब्यू कने खाणे औळे जो रोटी देआं, तिस ई तुहांजो ब्यू देणा कने तिसरी पैदाबार बधान्या, तिसते ई तुहारे धर्मा री खेती फलेगी-फूलेगी। 11 तुहें हर तरफा ते धनी हुणे ताकि तुहें हर मौके पर उदार बणी सको, तुहांरी उदारता परमेशरा रे प्रति लोकां रे धन्यावाद जो पैदा करगी। 12 दाना री इस पवित्र सेवा ते न सिर्फ पवित्र लोकां री जरूरतां पूरी हुआं ई बल्कि परमेशरा रे प्रति जादा ते जादा धन्यवाद रा भाव पैदा हुआं। 13 कांभई तुहांरी इस सेवा ते सै जे प्रमाण परगट हुआं, तिसते संत लोक परमेशरा री स्तुती करगे, कांभई यीशु मसीह रिया खुशखबरिया च तुहारे विश्वासा रिया घोसणा त पैदा हुई तुहांरी आज्ञाकारिता रे कारण कने अपणी उदारता रिया वजह ने तिन्हारे खातर कने दूजे सारयां लोकां रे खातर तुहें दान देआं ये। 14 कने सै बी तुहारे खातर प्रार्थना करदे हुये तुहांने मिलणे री इच्छा करगे, तुहां पर परमेशरा रे कई गुणा अनुग्रह रिया वजह ने। 15 तिस बरदाना रे खातर तिसरा जे बखान नीं कित्या जाई सकदा, परमेशरा रा धन्यवाद ओ।

पौलुस रा अधिकार

10 हऊँ पौलुस, अपणिया तरफा ते मसीह री कोमलता कने सहणशक्तिया जो साक्षी मन्नीने तुहांते विनती करां, लोकां रा बोलणा भई हऊँ त तुहारे बिच रहन्दे हुये विनम्र आ, पर हऊँ सै पौलुस ताहली जे तुहारे बिच नीं आ, तां तुहारे खातर निडर आ। 2 हुण मेरी तुहांते प्रार्थना ई भई ताहली जे हऊँ तुहांते आऊं, तां तिस ई भरोसे ने तेढी ई निडरता दसणे जो माह पर जोर नीं पायों, तेढी जे भई मेरे विचारा च मिन्जो कुछ तिन्हां लोकां रे खिलाफ दसणे पौणी सै जे सोचां ये भई अहें इक संसारिक जीवन जीयें। 3 कांभई अहें बी त इसी संसारा च रैयायें, पर अहें संसारिक लोकां साई नीं लडदे। 4 कांभई तिन्हां शस्त्रां ने जे अहें लडाई करां ये, सै संसारिक नीं ये, बल्कि तिन्हा च खड्डयां जो तहस-नहस करने रे खातर परमेशरा री शक्ति शामिल ई। 5 कने तिन्हां ई शस्त्रां ने अहें लोकां रियां गलां रा कने तिस हरेक बिरोधा रा, सै जे परमेशरा रे ज्ञाना रे बिरोधा च खड्डीरा खण्डन करां ये; कने हर इक भावना जो कैद करीने मसीह रा आज्ञाकारी बणाई दें। 6 कने तैयार रेहां ये भई ताहली जे तुहें आज्ञां रा पूरा पालन करां ये, तां हर तरह री आज्ञा न मनणे औळे जो सजा देओ।

7 तुहारे सामणे सै जे सच्चाईयां ईयां तिन्हांजो देखा, जे कोई अपणे मना च ये मन्ना भई सै मसीह रा, तां सै अपणे बारे च भीं ते आद करो भई सै बी तितना ई मसीह रा जितणा जे अहें। 8 कने जे हऊँ अपणे तिस अधिकारा रे बारे च कुछ होर घमण्ड करूँ, सै जे प्रभुये तुहांजो बिगाड़ने रे खातर नीं बल्कि तुहांजो बनाणे रे खातर अहांजो दितिरा, तां इसरे खातर हऊँ शर्मिन्दा नीं आ। 9 ये हऊँ इस खातर बोलां भई पत्रियां रे जरिये तुहांजो डराणे औला नीं बणूँ। 10 मरे दुश्मणां रा बोलणा, "पौलुस रे पत्र त भारी भरकम कने प्रभावशाली हुआं ये; पर मेरा व्यक्तित्व कमजोर, कने वाणी बेमतलब ई।" 11 पर ईयां बोलणे औळे माह्ये जो समझी लेणा चाहिन्दा भई तुहारे बिच नीं रहन्दे हुये तां जे अहें अपणे पत्रां च कुछ लिखां ये, तां तिसच कने तुहांच रहन्दे हुये अहें सै जे कर्म करां ये तिन्हां च कोई फर्क नीं आ। 12 अहें तिन्हां कुछ लोकां सौगी अपणी तुलना करने री हिम्मत नीं करां ये सै जे खुद अप्पू जो बड़ा खाश समझां ये; पर ताहली जे सै अप्पू जो इक्की दूजे ने नापां ये कने अप्पू चीयें अपणी तुलना करां ये, तां सै ये दस्तां ये भई सै नीं जाणदे भई सै कितणे मूर्ख ये।

13 जो बी ओ, अहें सीमा ते बाहर उच्चे नीहठे गल्ल नीं करणे, पर तिसा सीमा तक सै जे परमेशरे अहांजो सौंपीरी, अहें तिन्हां च रैयायें कने सै सीमां तुहां तक पुज्जां ईयां। 14 कांभई अहें अपणी सीमा ते बाहर खुद अप्पू जो बधाणा नीं चाहन्दे, तियां जे भई तुहां तक पुज्जणे रिया दशा च नीं हुन्दा, पर तुहां तक यीशु मसीह री खुशखबरी लेईने अहें तुहांले सब्बीं ते पैहले पुज्जे। 15 अपणिया सीमा ते बाहर जाईने किसी दूजे माह्ये रे कम्मा पर अहें गर्व नीं करदे, पर अहांजो आस ई भई तुहांरा विश्वास जिआं-जिआं जे बधगा, तां तियां-तियां अहें अपणिया सीमा रे मुताबिक तुहां रिया वजह ने होर बी बधदेआं जाणा, 16 ताकि अहें तुहां रिया सीमा ते अग्रे बधीने खुशखबरी सुणाई सक्को, कने ये नीं भई अहें दूज्यां रिया सीमा रे अन्दर बणे-बणाईरे कम्मा पर घमण्ड करिये। 17 पर सै जे घमण्ड करो, सै प्रभु पर घमण्ड करो। 18 कांभई सै जे अपणी बडयाई करां सै नीं, पर जिसरी बडयाई प्रभु करां, सैई ग्रहण कित्या जां।

पौलुस कने झूठे प्रेरित

11 काश! तुहें मेरी थोड़ी जेई मूर्खता सैई लेन्दे, तां क्या ई भला हुन्दा, हां, तुहें तिस्सो सैही ई लेवा। 2 कांभई हऊँ तुहारे बारे च ईश्वरीय धुन लगाई रखां, मैं तुहारी मसीह ने सगाई करीतरी ताकि तुहांजो इक पवित्र कन्या साई तिस्सो अर्पण करी सकूँ। 3 पर हऊँ डरां भई तियां जे सर्प हव्वा जो अपणे छल-कपटा ने भ्रष्ट कित्या था, तियां ई किति तुहांरा मन बी तिसा सिधाईया ने कने पवित्रता ने सै जे मसीह रे सौगी होणी चाहिन्दी थी, किति भ्रष्ट न कित्ते जायें। 4 कांभई ताहली जे कोई तुहांले आईने तिस यीशुये रा उपदेश जे अहें तुहांजो दित्या था, तिस्सो छड्डीने किसी दूजे यीशुये रा तुहांजो उपदेश देआं, यनिके सै आत्मा जे तुहें ग्रहण कितिरी, तिसते लग

किसी होर आत्मा जो ग्रहण करो यनि छुटकारे रे जिस संदेशा जो तुहें ग्रहण कित्या, तिसते लग किसी दूजे संदेशा जो बी ग्रहण करां ये। 5 तां तुहें बड़े खुश हुआं ये, पर हऊँ खुद अप्पू जो तुहारे तिन्हां बड़े प्रेरितां ते बिल्कुल बी छोटा नीं मनदे। 6 हुई सकां मेरे बोलणे री शक्ति घट ई, पर मेरा ज्ञान त सीमा ते परे आ। इसा गला जो अहें सारियां गलां च तुहांजो साफ रुपा च दर्सीत्या।

7 कने फेरी मैं मुख्ता च खुशखबरिया रा उपदेश देईने तुहांजो उच्चा चकणे रे खातर खुद अप्पू जो झुकान्दे हुये, क्या कोई पाप कित्या? 8 मैं दूजी कलीसियां ते अपणी मजदूरी लेईने तिन्हांजो ठगया ताकि हऊँ तुहारी सेवा करी सकूँ। 9 कने ताहली जे हऊँ तुहां सौगी था तां बी जरूरत पौणे पर मैं किसी रे ऊपर कोई बोझ नीं पाया, कांभई मकिदुनिया ते आईरे भाईयें मेरी जरूरतां पूरी कितियां थी। मैं हर गला पर खुद अप्पू जो तुहां पर बोझ नीं बणने दित्या कने न ई कदीं बणने देगा। 10 कने कांभई माह च मसीह री सच्चाई निवास करां ई, इस खातर अख्या रे सारयां लाकयां च मिन्जो बढी-चढी ने बोलणे ते कोई नीं रोकी सकदा। 11 भला कां? क्या इस खातर भई हऊँ तुहाने प्यार नीं करदा? परमेशर जाणां, भई हऊँ तुहाने प्यार करां।

12 पर सै जे हऊँ करी करां तिसजो त मांह करदे ई रहणा, भई सै लोक जे दौव टोलदे रैयें तिन्हांजो हऊँ दौव लागे नीं देऊँ, ताकि तिसा गला च जे सै घमण्ड करां ये, तिन्हांरे तिस कम्मा च सै अहारे बराबर समझे जाई सक्को। 13 येदे लोक नकली प्रेरित ये, सै छली ये, सै मसीह रे प्रेरित होणे रा ढोंग करां ये। 14 इसच कोई हैरानिया री गल्ल नीं, कांभई शैतान बी त परमेशरा रे दूता रा रुप धारण करी लेआं। 15 इस खातर जे तिसरे सेवक बी भले काम्म करने औळे सेवकां रा रुप धारण करी लो, तां इसच बड़ी गल्ल क्या ई? पर अंत च तिन्हांजो अपणिया करणिया रे मुताबिक फल त मिलणा ई हाया।

प्रेरिता रे रूपा च पौलुस रा दुःख भोगणा

16 हऊँ फेरी बोलां, भई मिन्जो कोई मूर्ख नीं समझो, पर जे फेरी भीं तुहें येदा समझा यें तां मिन्जो मूर्ख बणाईने ई स्वीकर करा, ताकि हऊँ बी कुछ घमण्ड करी सकूँ। 17 हुण ये सै जे हऊँ बोली करां, सै प्रभु रे मुताबिक नीं बोली करां, बल्कि इक मूर्खा रे रूपा च गर्वां ने भरिरे विश्वासा सौगी बोलीरां। 18 कांभई मते सारे लोक अपणे संसारिक जीवना पर ई धमण्ड करां ये। 19 फेरी त मांह बी धमण्ड करना, कने फेरी तुहें त इतणे समझदार ये भई मूर्खा रियां गलां खुशिया ने सैई लें। 20 कांभई जे कोई तहांजो दास बणाये, तुहांरा शोषण करो, तुहांजो किसी जाला च फसाये, अप्पू जो तुहांते बड्डा बणाये यनि तुहारे मुँहा पर चपैड़ मारो तां तुहें तिसजो सैहण करी लें।

21 हऊँ शर्मसार हुईने बोलीरां, अहें बड़े निर्बल थे। (हऊँ मूर्खता ने भरिने गलाईरां) जे कोई आहू किसी चीजा पर घमण्ड करने री हिम्मत करां, तां तेढी हिम्मत हऊँ बी करगा। 22 इब्रानी सैई नीं ये हऊँ बी आ, इस्राएली सैई नीं ये, हऊँ बी त हाया; अब्राहम री सन्तान सैई नीं ये, हऊँ बी त हाया।

23 क्या सैई मसीह रे सेवक ये? भई हऊँ त तिसते बी बड्डा मसीह रा दास आ। मैं बडी कठन मेहनत कितिरी; हऊँ कई बार जेला गया, मिन्जो बार-बार कुट्टया, कईयां मौकया च मेरा मौता ने सामणा हुया। 24 पाँज बार मैं यहूदियां ते इक घट चाली-चाली कोड़े खादे। 25 हऊँ तिन-तिन बार डन्डयां ने कुट्टया, इक बार त मांह पर पत्थर बी मारे गये। तिन बार मेरा जहाज डुब्बया, इक दिन कने इक रात मैं समुद्रा रे डुग्गे पाणिये च कटी। 26 मैं खतरनाक नदिओ, खुँखार डाकुआं, खुद अपणयां लोकां, अधर्मियां, नगरां, गाँवा, समुद्रां कने दिखावा करने औळे भई-बन्धुआं रे संकटां रे बिच कई यात्रां कितियां। 27 मैं बडी मेहनत करीने दुखां ते थक्कीने टुटिया, कईयां मौकयां च त मिन्जो सौणे बी नीं मिलया, बगैर कपड्यां ते ठन्डा च कम्बदा रैया। 28 कने हुण होर जादा क्या बोलूँ? माह पर सारी कलीसियां री चिन्ता रा बोझ बी दिन-प्रति दिन बणीरा रैया। 29 किसरी कमजोरी मिन्जो कमजोर नीं बणाई कने किसरे पापा च मेरा दिल नीं दुखदा।

30 जे घमण्ड करना जरूरी आ, तां हऊँ अपणियां कमजोरिया री गलां पर घमण्ड करगा। 31 परमेशर कने प्रभु यीशु रा पिता सै जे सदा रा ई धन्या, सै जाणां भई हऊँ कोई झूठ नीं बोली करां। 32 ताहली जे हऊँ दमिश्क च था,

तां महाराज अरितास रे राजपाले दमिश्क पर घेरा पाईने मिन्जो बन्दी बनाईने लेई जाणे रा जतन कित्तया था। 33 पर मिन्जो नगरा री चारदवारिया री खडुकिया ते टोकरिया च बढालीने थल्ले त्वारित्या कने हऊँ तिसरे हत्था ते बचीने निकलिया।

पौलुसा रा दिव्य दर्शन कने कमजोरी

12 हुण मिन्जो गर्व करने ई पौणा, इसते कुछ मिलणा नीं आ, पर हऊँ त प्रभु रे दर्शनां कने प्रभु रे देवी संदेशां पर गर्व करदा ई रेंहगा। 2 हऊँ मसीह च येदे आदमिये जो जाणां तिस्सो जे चौदा साल पैहले (हऊँ नीं जाणदा सिर्फ परमेशर ई जाणां) शरीरा सौगी या शरीरा ते बगैर तिस्से स्वर्गा च चक्की लेआ था। 3 कने हऊँ येदे माळुये जो जाणां भई न जाणे शरीरा सौगी, न जाणे शरीरा ते बगैर परमेशर ई जाणां 4 भई स्वर्गलोका च चक्की लेआ था, कने येदियां गलां सुणियां सैं जे गलाणे रियां नीं; कने तिन्हांरा मुँहा पर लौणा माळुये जो ठीक नीं आ। 5 हां, येदे माळुये पर हऊँ घमण्ड करगा, पर खुद अप्पू पर, अपणियां कमजोरियां जो छड्डिने, अपणे बारे च घमण्ड नीं करगा। 6 कांभई जे हऊँ घमण्ड करने री सोचूँ तां बी मांज मूर्ख नीं बणना, कांभई सच्च बोलणा; पर तुहांजो हऊँ इसते बचां ताकि कोई मिन्जो तेदा जे करदे देखां या बोलदे सुणां, मिन्जो तिसते बधीने समझो। 7 इस खातर भई असाधारण देवी संदेशां रिया वजह ने मिन्जो कोई घमण्ड नीं हुई जाओ, इस खातर मिनजो मेरे शरीरा च इक कन्डा चुभाया यनिके सैं जे शैताना रा इक दूत आ, सैं मिन्जो दुखदा रैयां ताकि मिन्जो जादा घमण्ड नीं हुई जाओ। 8 कन्डे रिया इसा समस्या रे बारे च मैं प्रभु ते तिन बार प्रार्थना किति भई सैं इस कन्डे जो मांह च ते नकाली लो। 9 पर तिने मिन्जो बोल्या, “तेरे खातर मेरा अनुग्रह काफी आ; कांभई कमजोरिया ची मेरी शक्ति जादा हुआं ई, इस खातर हऊँ अपणिया कमजोरिया पर खुशिया ने गर्व करां, ताकि मसीह री शक्ति मिन्जो छौं करदी रौ। 10 इस तरीके ने मसीह रिया तरफा ते हऊँ अपणी कमजोरियां, बेज्तियां, मुश्कलां, दुखां कने परेशानियां च खुश रैयां, कांभई ताहली जे हऊँ कमजोर हुआं, तांई ताकतबर हुआं।

कुरिन्थियां रे खातर पौलुसा री चिन्ता

11 हऊँ मूर्खां साई बकीरा रैया, पर येदा करने जो मिन्जो तुहें मजबूर कित्या; तुहांजो त मेरी प्रशंसा करनी चाहिन्दी थी, इयां त हऊँ कुछ नीं आ, पर तुहारे तिन्हां “महान संतां, ते हऊँ किसी बी तरीके ने छोटा नीं आ। 12 किसी जो प्रेरित परगट करने औळे चमत्कारिक चिन्ह, हैरान करने औळे काम्म कने चमत्कारा रे काम्म बी तुहारे बिच हौंसले ने परगट कित्ते। 13 तुहें केदिया जेआ गलां च दूजियां कलीसियां च कम थे, सिवाय इसरे भई मैं तुहां पर अपना बोझ नीं पाया। मिन्जो इस खातर माफ करा। 14 देखा, तुहांले औणे जो हुण हऊँ तिज्जी बार तैयार आ, पर मांह तुहां पर कोई बोझ नीं बणना। मिन्जो तुहांरी धन-दौलता री नीं तुहांरी चाहत ई, कांभई बच्चयां जो अपणे माता-पिता रे खातर कोई बचत करने री जरूरत नीं हुन्दी बल्कि अपणे बच्चयां रे खातर माता-पिता जो ई बचत करनी हुआं ई। 15 तिन्थी तक जे मेरी गल्ल ई, मेरले सैं जे कुछ आ, तुहारे खातर खुशिया ने खर्च करगा, येथी तक भई खुद अप्पू जो बी तुहारे खातर खर्च करी देगा। जे हऊँ तुहांने जादा प्यार रखां, तां भला तुहें मिन्जो घट प्यार कियां करी सकां ये। 16 हुई सकां मैं तुहां पर बड्ठा बोझा नीं पाया हो, पर (तुहांरा बोलणा) हऊँ कपटी था, मैं तुहांजो अपणिया चलाकिया ने फसीलया। 17 क्या तिन्हां लोकां जो जे मैं तुहांले भेज्या था, तिन्हारे जरिये तुहांजो छलया था? नां! 18 तीतुस कने तिस सौगी अहारे भाईये जो मैं तुहांले भेज्या था, क्या तिने तुहांजो कोई धोखा दित्या? नां क्या अहें तिस निष्कपट आत्मा ते नीं चलदे रैये? क्या अहें तिन्हां ई पैरां रे नशाणां पर नीं चले?

19 हुण तुहें क्या सोचीरां ये भई इक्की लम्मे वगता ते अहें तुहारे सामणे अपना पक्ष रखी रांये, पर अहें त परमेशरा रे सामणे मसीह रे चले रे रूपा च बोली रां ये। मेरे प्यारे मित्रो, अहें सैं जे कुछ बोलीरां ये, सैं तुहांरी उन्नति करने रे खातर बोलां ये। 20 कांभई मिन्जो डर आ भई किति ताहली जे हऊँ तुहांले आऊँ, तां तुहांजो तेदा नीं पाऊँ, तेदा जे पाणा चाँह था, कने तुहें बी मिन्जो तेदा ई पावा तेदा जे पाणा चांये। मिन्जो डर आ भई तुहारे बिच मिन्जो किति अहां-तुहां रिया लड़ाईया, हिरख, गलाणे बोलणे च गुस्सा, अपमान, चुगली घमण्ड कने बखेड़े नीं मिलो। 21 मिन्जो डर आ भई ताहली जे हऊँ फेरी तुहांने मिलणे आऊँ, तां तुहारे सामणे मेरा परमेशर किति मिन्जो अपमानित नीं करो, कने मिन्जो तिन्हा मतयां रे खातर बिलाप नीं करने पौ तिन्हें जे पैहले पाप कित्तिरे कने गन्दे काम्म कने व्याभिचार कने भोग-विलासा च डुब्बीरे रैहणे खातर पश्चाताप नीं कित्तिरा।

अन्तिम चेताबनी

13 हुण हऊँ तिज्जी बार तुहांले आईरा; दो या तिन गबाहां रे मुँहां ते हर इक्की गला री पुष्टि किति जाणी। 2 ताहली जे दूज्जी बार हऊँ तुहांने था, मैं तुहांजो साबधान कित्या था कने हुण तां जे हऊँ तुहांते दूर आ, हऊँ तुहांजो भीं ते साबधान करां भई जे हऊँ फेरी भीं तुहांले आया, तां तिन्हे जे पाप कित्तिरे कने सैं जे पाप करीरां ये तिन्हां कने बाकि दुजे लोकां जो बी नीं छडगा। 3 येदा हऊँ इस खातर बोलीरां भई तुहें इसा गला रा सबूत चांये भई मेरे अन्दरा ते मसीह गलां। सैं तुहारे खातर कमजोर नीं आ, बल्कि तुहां च सामर्थी आ। 4 ये सच्ची गल्ल ई भई तिस्सो तिसरिया कमजोरिया रे कारण क्रूसा पर लटकाया गया था, पर हुण सैं परमेशरा रिया शक्तिया रे कारण ई जी करां। ये बी सच्च आ भई मसीह च अहें बी कमजोर ये, पर तुहारे फायदे रे खातर परमेशरा रिया शक्तिया रे कारण अहां तिस सौगी जीणा।

5 ये देखणे खातर खुद अप्पू जो परखा भई क्या तुहें पूरे विश्वासा ने जी करां ये, अपणी जांच-पडताल करा या क्या तुहें नीं जाणदे भई सैं यीशु मसीह तुहारे अन्दर ई हाया; जे येदा नीं आ, तां तुहें इस मतेहाना च पूरे नीं उतरे। 6 हऊँ आस करां भई तुहें ये जाणी जांगे भई अहें इस मतेहाना च किस बी तरीके ने फेल नीं हुये। 7 अहें परमेशरा ने प्रार्थना करां ये भई तुहें कोई बुराई नीं करो; इस खातर नीं भई अहें इस मतेहाना च खरे दिखो, बल्कि इस खातर भई तुहें सैई करा सैं जे ठीक आ। चाहे अहें इस मतेहाना च फेल हुन्दे हुये कां नीं दिखो। 8 हकीकत च अहें सच्चाईया रे बिरोधा च कुछ करी नीं सकदे, पर अहें त सैं जे करां ये, सच्चाईया रे खातर ई करां ये। 9 ताहली जे अहें कमजोर ये कने तुहें बलबन्त ये, तां अहें खुश ये, कने अहें इसरे खातर ई प्रार्थना करां ये, भई तुहें मजबूत हुन्दे जाओ। 10 इस खातर तुहांते दूर हुन्दे हुये बी हऊँ इन्हां गलां जो तुहांजो लिखीरां ताकि ताहली जे हऊँ तुहांले आऊँ, तां मिन्जो प्रभु रे जरिये दित्तिरे अधिकारा ने तुहांजो नुक्सान पहुँचाणे नीं बल्कि तुहां रिया आत्मा री बढौहतरिया रे खातर तुहां कने शक्ती नीं बरतणी पौ।

अभिवादन

11 हुण मेरे भाईयो, हऊँ तुहांते बिदा लेआं। अपना व्यवहार ठीक रखा; तियां ई करदे रौआ तियां जे मैं करने जो बोलया; इक्को जेआ सोचा; शान्तिया ने रौआ; कने प्यार कने शान्तिया रा देणे औला परमेशर तुहांने सौगी हुणा। 12 इक्की दूज्जे जो पवित्र चुम्बन ने नमस्कार करा। 13 सारे पवित्र लोक तुहांजो नमस्कार करां ये। 14 तुहां पर प्रभु यीशु मसीह रा अनुग्रह, परमेशरा रा प्यार कने पवित्र आत्मा री सहभागिता तुहां सब्बी ने सौगी बणीरी रौ।

गलातियां

अभिवादन

1 पौलूस रिया तरफा ते, सै जे इक प्रेरित आ, तिने जे इक येढा सेवा बरत रक्खीलिया, सै जे तिस्सो न माह्नुआं ते मिलया, कने ना त किन्हिये दित्या, पर यीशु मसीह रे जरिये तिस परम पिता परमेशरा ते मिलया, तिने जे यीशु मसीह जो मूर्ईरयां च ते, भीं ते ज्युन्दा कित्या। 2 कने मेरे सौगी सै जे भाई ये, तिन्हां सारयां रिया तरफा ते गलातिया लाके री कलीसियां रे नाँ;

3 अहारे पिता परमेशर कने प्रभु यीशु मसीह रिया तरफा ते तुहांजो अनुग्रह कने शान्ति मिलदी रौ। 4 तिने जे अहारे पापां रे खातर खुद अप्पू जो देईत्या, ताकि तिसते जे सै अहांजो इस पापी संसारा ते छुटकारा दवाई सक्को तिसच जे अहं रही करां ये, अहारे पिता परमेशरा री येई इच्छा ई। 5 तिसरी गुणगान कने बडयाई जुगां-जुगां तक हुन्दी रौ। आमीन।

कोई दूजी खुशखबरी नाँ

6 हऊँ रेहान आ! भाई तुहें लोक इतणी जल्दी तिस परमेशरा ते मुँह फेरी ने, किसी दूजिया खुशखबरिया खौ जाई करां ये, तिने जे मसीह रे अनुग्रह रे जरिये तुहांजो सद्व्या था। 7 असल च कोई दूजी खुश-खबरी त हाई नाँ, पर कई लोक येदे सै जे तुहांजो भरमाये रांये कने मसीह रिया खुशखबरिया च हेरा-फेरी करने रा जतन करे रांये। 8 पर चाये अहं हो या सुरगा ते कोई दूत हो, जे तुहांजो अहारे जरिये सणवाई रिया खुशखबरिया ते बखरी खुशखबरी सुणावां, तां लाणत ई तिस पर। 9 तियां जे अहं बोली चुक्रीरे, तियां ई हऊँ हुण भीं बोलीरां भाई जे चाये अहं ओ या चाये सुरगा ते कोई दूत, जे तुहें ग्रहण कित्तिरिया खुशखबरिया जो छुडी ने कोई होर खुशखबरी सुणावां ये, तां लाणत ई।

10 क्या इसते तुहांजो येढा लगां भाई हऊँ माह्नुआं री सैहमती चाँह? या ये भाई मिन्जो परमेशरा री सैहमती मिलो? या क्या हऊँ माह्नुआं जो खुश करने रा जतन करी करां? जे हऊँ माह्नुआं जो खुश करां, तां हऊँ मसीह रा सेवक नाँ हुन्दा।

पौलूस कियां प्रेरित बणया

11 मेरे भाईयो, हऊँ तुहां जो जतलाणां चाँह भाई सै खुशखबरी तिसारा जे उपदेश मैं तुहांजो दित्या, 12 किसी माह्नुये ते मिलीरी खुशखबरी नाँ, कांभाई नां त मैं इसजो किसी माह्नुये ते लेआ कने नां ई किन्हिये माह्नुये मिन्जो इसरे बारे च दस्सया, पर ये यीशु मसीह रे दर्शणा ते मिली। 13 यहूदी धर्मा च हऊँ पैहले कियां जी रां था, तिस्सो तुहें सुणी चुक्रीरे, कने तुहें ये बी जाणां ये भाई मैं परमेशरा रिया कलीसिया जो कितना सताईरा कने तिसारा नाँ नशाण तक मटयाणे री कोशत कित्ति। 14 हऊँ यहूदि धर्मा च अपनी जाति औलयां ते सै जे मेरिया बराबरिया रे थे, जादा बधदा गया कने मेरे पुरख्यां ते सै जे रुवाज मिन्जो मिले, तिन्हां च मेरी बडी आस्था थी। 15 पर परमेशरे त मिन्जो मेरे जमणे ते पैहले ई चुणीलरा था। 16 ताकि सै मिन्जो अपने पुत्रा रा ज्ञान कराई दो तिसते जे हऊँ गैर यहूदियां रे बिच तिस रिया खुश-खबरिया रा प्रचार करूँ। तिस बगत इकदम मैं किसी माह्नुये ते कोई राय नाँ लैई। 17 कने न ई हऊँ तिन्हां लोकां ले यरुशलेम गया सै जे माहते पैहले प्रेरित बणीरे थे, बल्कि हऊँ अरब जो गया कने फेरी तित्थी ते दमिशक जो मुडीने आईग्या।

18 फेरी तिन्हां सालां ते बाद हऊँ पतरसा ने मिलणे रे खातर यरुशलेम पुजया, कने पन्द्रह दिन तक तिसले रैया। 19 पर तित्थी हऊँ प्रभुये रे भाईये याकूबा जो छुडीने किसी बी दूजे प्रेरिता ने नाँ मिलया। 20 हऊँ परमेशरा रे सामणे सगन्द खाईने बोलां भाई जो किछ जे हऊँ लिखीरां तिसच कोई ग्ल झूठ नाँ। 21 तिसते बाद हऊँ सीरिया कने किलिकिया रे प्रदेशां च गया। 22 पर यहूदिया रियां, मसीह जो मनणे औली कलीसियां मिन्जो नाँ पछयाण दियां थीं। 23 पर सै लोकां जो गलान्दे सुणां थे, "सै माह्नु सै जे पैहले अहांजो सतां था, विश्वासा रिया खुशखबरिया रा ई प्रचार करी करां, तिस्सो जे तिने पैहले खत्म करने री कोशत कित्ति थी।" 24 कने सै मेरे बारे च परमेशरा रा गुणगान करां थियां।

होरनीं प्रेरितां रे जरिये पौलुसा जो मान्यता

2 चौदा सालां बाद हऊँ फेरी भीं यरुशलेम गया, बरनबास मेरे सौगी था कने तीतुस जो बी हऊँ सौगी लेईग्या। 2 हऊँ परमेशरा रे दर्शणां रिया वजह ने ऊत्थी गया था। हऊँ गैर यहूदियां रे बिच तिसा खुशखबरिया रा जे उपदेश देई करां था, तिसा ई खुशखबरिया जो मैं इक्की सभा च कलीसिया रे मुखियां जो सणवाया। हऊँ तित्थी इस खातर गया था भाई परमेशरे मिन्जो दस्सया था भाई मिन्जो तित्थी जाणा चाहिन्दा था, ताकि सै काम्म जे मैं पिछले दिनां च कित्या था, या तिस्सो जे हऊँ करी करां था, सै बेकार नाँ हुई जाओ। 3 पर तीतुस जो बी सै जे मेरिया सौगी था कने सै जे यूनानी आ, फेरी भीं तिस्सो खतना करने जो मजबूर नाँ कित्या। 4 पर ये तिन्हां झूठयां भाई-बन्धुआं रिया वजह ने हुया, सै जे अहारे बिच चोरां साई आईने घुसीगरे थे, भाई तिसा अजादिया रा सै जे यीशु मसीह च अहांजो मिलीरी, तिसारा भेत लेईने अहांजो दास बणाई सक्को। 5 पर अहं तिन्हांरे सामणे घुटने नाँ टेके, ताकि सै सच्चाई, सै जे खुशखबरिया च बसां ई, तुहारे अन्दर बणीरी रौ। 6 पर मन्ने-तन्ने इज्रतदार लोकां ते मिन्जो किछ नाँ मिलया, तिन्हां इज्रतदार लोकां ते मिन्जो कने मेरिया खुशखबरिया जो कोई फायदा नाँ हुया। 7 पर इन्हें मुखिये देकख्या भाई परमेशरे मिन्जो तियां ई इक खास काम्म साँपया तियां जे पतरसा जो परमेशरे यहूदियां जो खुशखबरी सणवाणे रा काम्म दित्या था, पर परमेशरे गैर-यहूदि लोकां जो खुशखबरी सणवाणे रा काम्म मिन्जो दित्या। 8 परमेशरे पतरसा जो इक प्रेरित समझीने काम्म करने री ताकत दित्ती, पतरस गैर-यहूदी लोकां रे खातर इक प्रेरित आ। परमेशरे मिन्जो बी इक प्रेरित समझीने काम्म करने री ताकत दित्ती, पर हऊँ तिन्हां लोकां रा प्रेरित आ सै जे यहूदी नाँ ये। 9 इस तरीके ने तिन्हें माह पर परमेशरा रे तिस अनुग्रह जो समझील्या कने कलीसिया रे खम्बे समझे जाणे औले याकूब, पतरस, कने यहून्ने, मिन्जो कने बरनबासा जो सांझेदार बणाईने भेजया, कने सै सहमत हुईये भाई अहं अधर्मियां रे बिच उपदेश देन्दे रौ कने सै यहूदियां रे बिच। 10 तिन्हें अहांने बस येई बोल्या भाई अहं तिन्हांरे कंगालां रा ध्यान रखिये, कने हऊँ सिर्फ इन्हां ई कम्मां जो करना ई नाँ चाहन्दा था पर इसरे खातर इच्छुक भी था।

पौलुसा रे जरिये पतरसा रा बरोध

11 पर ताहली जे कैफा अंताकिया च आया, तां मैं दिल खोल्ही ने तिसरा बिरोध कित्या कांभाई सै दोषी था। 12 कांभाई याकूबा रिया तरफा ते भेजरीरे किछ लोकां रे पुजणे ते पैहले सै गैर यहूदियां ने सौगी खां पीं था। पर ताहली जे सै लोक आये तां खतना कित्तीरे लोकां रे डरा रे मारे सै पीछे हटिया कने

तिन्हाते कनारा करने लगया।¹³ दूजे यहूदियें बी इस दिखावे च तिसरा साथ दित्या। येथी तक भई इस दिखावे रिया बजह ने बरनबास बी भटकिग्या।¹⁴ मैं ताहली जे ये देखया भई खुशखबरिया रिया सच्चाईया रे मुताबिक सै सिधे रस्ते पर नीं चलीरे, तां मैं सारयां रे सामणे कैफा जो गलाया, “तां जे तू यहूदी हुईने बी गैर-यहूदियां साईं जीवन जीआं, तां फेरी गैर-यहूदियां जो यहूदियां री रीता पर चलणे जो कजो बोलां?”

बिश्वासा रे जरिये धर्मी ठहरना

¹⁵ अहें त जन्म जात यहूदी ये, कने अहांरा पापी गैर-यहूदियां ने कोई रिस्ता नीं आ।¹⁶ फेरी भीं अहें ये जाणां ये भई कोई माळु व्यवस्था रे कम्मां ते नीं, पर सिर्फ यीशु मसीह च विस्वास करने रिया बजह ने धर्मी बणां, अहें खुद बी इस खातर यीशु मसीह पर विस्वास कित्या भई अहें व्यवस्था रे कम्मां ते नीं, पर मसीह पर विस्वास करने ते धर्मी बणो; इस खातर भई व्यवस्था रे कम्मां ते कोई बी माळु धर्मी नीं हुणा।¹⁷ पर जे अहें यीशु मसीह च खुद धर्मी हुणा चाँये, जे अप्पूँ ई पापी बणी जाओ, तां क्या इसरा मतलब ये नीं हुआ भई मसीह पापां जो बढावा देआं? कदी मनी!¹⁸ कांभई सै किछ जे मैं रुढ़हाईतरा जे भीं तिस्रो बणांदा, तां हऊँ खुद अपणे अप्पूँ जो अपराधी बणां।¹⁹ हऊँ त व्यवस्था रे कारण व्यवस्था खातर मरी चुक्रीरा भई परमेशरा खातर जीऊँ।²⁰ हऊँ मसीह सौगी कूसा पर चढाईरा, हुण हऊँ जिन्दा नीं आ, पर मसीह माँह च जिन्दा; कने इस शरीरा च हुण हऊँ तिसा जिन्दगिया जे जी करां, सै सिर्फ तिस विस्वासा पर टिकिरी सै विस्वास जे परमेशरा रे पुत्रा पर आ, तिने जे माहने प्यार कित्या कने खुद अप्पूँ जो मेरे खातर अर्पण कित्या।²¹ हऊँ परमेशरा रे अनुग्रह रा इन्कार नीं करीरां; कांभई जे व्यवस्था रे जरिये धार्मिकता हुन्दी, तां मसीह रा मरना बेकार हुन्दा।

व्यवस्था या बिश्वास

3 ओ मूर्ख गलातियो, तुहां पर किने जादू करीत्या? तुहांजो त इसा गल्ला रा पूरा ब्योरा देईतरा था भई कियां यीशु मसीह जो सब्बीं रे सामणे कूसा पर चढाया था।² हऊँ त तुहांते सिर्फ इतणा जाणना चाँह था भई तुहें आत्मा रा बरदान क्या व्यवस्था रे बिधाना जो पालन करने ते पाया था या खुशखबरिया रे सुणने कने तिस पर विस्वास करने ते पाया था? ³ क्या तुहें इतणे मूर्ख हुई सक्कां ये भई तिसा जिन्दगिया जो जे तुहें आत्मा ते शुरु कित्या, तिस्रो हुण हाड-मासा रे शरीरा रिया ताकता ते पूरा करगे? ⁴ तुहें इतणी परेशानियां क्या बेकार च सैईयां? आशा ई भई सै बेकार नीं थे। ⁵ परमेशर सै जे आत्मा तुहांजो देआं कने सै जे तुहांरे बिच चमत्कारा रे काम्म करां, क्या सै येढा इस खातर करां भई तुहें व्यवस्था रे विधाना रा पालन करां ये या इस खातर भई तुहें खुशखबरिया जो सुणया कने तिस पर विस्वास कित्या? ⁶ ये तेढा ई हाया तेढा जे भई अब्राहम रे बारे च पवित्र शास्त्र बोलां, “तिने परमेशरा पर विस्वास कित्या कने ये तिसरे खातर धार्मिकता गिणी गई। ⁷ तां फेरी तुहें ये जाणी लवा, भई “अब्राहम री असली ल्वादां सैई हाईयां सै जे विस्वास करां ये। ⁸ पवित्र शास्त्रा च पैहले ई दस्सी तरा था, भई “परमेशरा गैर-यहूदियां जो बी तिन्हारे विश्वासा रे कारण धर्मी बनाणा, कने इन्हा बचनां ने पैहले तेई अब्राहमा जो परमेशरा रे जरिये खुशखबरी सणवाई तरी थी।” ⁹ इस खातर सै लोक सै जे विश्वास करां ये, विस्वासी अब्राहमा सौगी आशीष पायें।

¹⁰ पर सै लोक सै जे व्यवस्था रे बिधाना रा पालन करने पर भरोसा रक्खां ये, सै त शरापा रे बसा चे। पवित्र शास्त्रा च लिखिरा: “येढा हरेक माळु शापित आ सै जे व्यवस्था रिया कताबा च लिखिरी हर गल्ला रा लगना ने पालन नीं करदा।” ¹¹ पर ये गल्ल साफ हुईगी भई व्यवस्था रे जरिये परमेशरा रे सामणे कोई धर्मी नीं ठैहरदा, कांभई पवित्र शास्त्रा रे मुताबिक “धर्मी माळु विस्वासा रे सहारे जिन्दा रहैन्ना।” ¹² पर व्यवस्था त विस्वासा पर नीं टिकिरी बल्कि शास्त्रा रे मुताबिक, “सै जे व्यवस्था जो मनगा, सै तिन्हारे ई सहारे ज्युन्दा रहैन्ना। ¹³ मसीह अहारे शरापा जो अपणे उपर लेईने व्यवस्था रे शरापा ते अहांजो छडवाई तरा। शास्त्र बोला: “हर कोई सै जे डाला पर टंगी दित्या जां,

शापित आ।” ¹⁴ मसीहे अहांजो इस खातर छडवाया भई अब्राहमा जो दित्तिरी आशीष मसीह यीशुये रे जरिये गैर-यहूदियां जो मिली सक्को, ताकि विस्वासा रे जरिये अहें तिसा आत्मा जो पाई लो, तिसरा जे वचन दित्तिरी था।

व्यवस्था कने बाचा

¹⁵ मेरे भाईयो, हुण हऊँ तुहांजो हर रोजके जीवना ते इक उदाहरण देई करां, देख्या, तियां जे किसी माळुये रे जरिये कोई करार करने पर; नां त तिस्रो टालया जाई सक्कां कने नां ई तिसच कुछ घटाया-बधाया जाई सक्कां, ¹⁶ तियां ई अब्राहम कने तिस रियां हुणे औलियां ल्वादां ने सौगी कित्तिरे करां रे बारे च बी आ। (देख्या, शास्त्र ये नीं बोलदा, “भई तिसरेयां बंशां जो” जे येढा हुन्दा तां मतयां खौ सहारा हुन्दा पर पवित्र शास्त्रा च इक बचना रा इस्तेमाल कित्तिरा। पवित्र शास्त्र बोलां, “भई तेरिया ल्वादी जो” सै जे मसीह आ।) ¹⁷ मेरा मतलब ये आ: भई सै बादा जे परमेशरे पैहले ई पक्का करीतरा था तिस्रो चार सौ तीह सालां बाद औणे औली व्यवस्था नीं बदली सकदी, कने न ई तिसरे वचना जो नकारा बोली सक्कां ये। ¹⁸ कांभई जे बरासत व्यवस्था पर टिकिरी तां फेरी सै बचना पर नीं टिकिणा, पर परमेशरे बरासत बचना रे जरिये छुटकारे रे रुपा च अब्राहमा जो दित्ति थी।

¹⁹ फेरी भला व्यवस्था कजो दित्ति? सै त आज्ञा नीं मनणे रे अपराधा रे कारण व्यवस्था जो वचना ने जोड़ीत्या था ताकि तिसरे खातर वचन दित्या गया था, तिस वंशजा रे औणे तक सै रये, व्यवस्था इक मध्यस्थ रे रुपा च मूसा री सहायता ते स्वर्गदूता रे जरिये दित्ति गई थी। ²⁰ हुण देख्या, मध्यस्थता त दुई रे बिच हुआ ई, पर परमेशर त इक ई हाया।

व्यवस्था रा मकशद

²¹ क्या इसरा ये मतलब आ भई व्यवस्था रा विधान परमेशरा रे बचना रा बिरोधी आ? कदी मनी! कांभई जे येढी व्यवस्था रा विधान दित्तिरा हुन्दा सै जे लोकां च जीवना रा संचार करी सक्कां तां सै व्यवस्था रा विधान ई परमेशरा रे सामणे धार्मिकता जो सिद्ध करने रा साधन बणी जान्दा। ²² पर पवित्र शास्त्रे घोषणा कित्ति भई सै सारा संसार पापा रिया शक्तिया रे अधीन आ, ताकि यीशु मसीह च विस्वासा रे अधारा पर सै जे वचन दित्तिरा, सै विस्वासी लोकां जो बी मिलो। ²³ इस विस्वासा रे औणे ते पैहले, अहांजो व्यवस्था रे विधाना री देख-रेक्खा च, इस औणे औले विस्वासा रे परगट हुणे तक बन्दी बणाईने रखीरा था। ²⁴ इस तरीके ने व्यवस्था अहांजो मसीह तक ले जाणे रे खातर इक शख्त गुरु था ताकि अपणे विस्वासा रे अधारा पर अहें धर्मी बणी जाओ। ²⁵ पर ताहली जे विस्वास आईया, तां अहें हुण गुरुये रे अधीन नीं रौओ। ²⁶ यीशु मसीह च विस्वासा रे कारण तुहें सारे परमेशरा री सन्तान ये। ²⁷ कने तुहें सारे तिन्हें जे मसीह रा वपतिस्मा लेई लरा, मसीह च समाईगरे। ²⁸ हुण न कोई यहूदी रैया कने न यूनानी, न कोई दास रैया, न अजाद, न मर्द न जनाना, कांभई मसीह यीशुये च तुहें सारे इक्क ये। ²⁹ कने कांभई तुहें जे मसीह रे तां फेरी तुहें अब्राहम रे वंशज ये, कने परमेशरे सै जे वचन अब्राहमा जो दित्या था, तिस वचना रे बारस बी ये।

4 हऊँ बोलां भई बारस तदुआं तक जे बालक आ, तां चाये सारियां चीजां रा स्वामी सैई हुन्दा, तां बी तिसच कने दासा च कोई फर्क नीं आ। ² सै गुरुआं कने घरा रे सेवकां रे तदुआं तक अधीन रैयां, तदुआं तक जे तिसरे पिते रे जरिये सही वगत नीं आई जान्दा। ³ तियां ई अहें बी, ताहली जे वालक थे, तां संसारिक कायदे-कनुना रे दास थे। ⁴ पर ताहली जे सही वगत आया, तां परमेशरे अपणे पुत्रा जो भेजया सै जे औरता ते जम्मीरा था, कने व्यवस्था रे अधीन जीआं था। ⁵ ताकि सै व्यवस्था रे अधीन माळुआं जो आजाद करी सक्को, तिसते जे अहें परमेशरा रे गोद लेईरे बच्चे बणी सक्को। ⁶ कने फेरी कांभई तुहें परमेशरा रे पुत्र ये, इस खातर तिने तुहांरे दिलां च पुत्रा री आत्मा भेजी, सैई आत्मा “ओ अब्बा,” “ओ पिता,” बोलदे हुये हाक पाई। ⁷ इस खातर हुण तू दास नीं आ बल्कि पुत्र आ कने कांभई तू पुत्र आ, इस खातर तिजो परमेशरे अपणा बारस बी बणाईरा।

गलातियां रे बारे च पौलुसा री चिन्ता

8 पैहले तुहें लोक तां जे परमेशरा जो नीं जाणदे थे, तां तुहें लोक देबतयां रे दास थे, सै हकीकत च परमेशर नीं थे। 9 पर हुण तुहें परमेशरा जो जाणां ये, या ईयां बोलणा चाहिन्दा भई परमेशरे हुण तुहांजो पछ्याणी लरा, तां तिन्हां कमजोर कने नकम्मे कायदे-कनूना खा जो कजो मुडीरां ये। तुहें भीं ते तिन्हांरे अधीन कजो होणा चाँये। 10 तुहें किन्हि खास दिनां, महिनयां, ऋतुआं कने वर्षां जो मनणे लगीरे। 11 तुहांरे बारे च मिन्जो डर आ भई तुहांरे खातर सै जे काम्म में कित्तिरा, सै किति सारा वेकार त नीं हुईगरा। 12 मेरे भाईयो मेहरबानी करीने मेरे साई बणी जावा, देख्खा, हऊँ बी त तुहां साई बणीगरा, ये मेरी तुहांते विनती, येदा नीं आ भई तुहें मेरे प्रति कोई अपराध कित्तिरा। 13 तुहें त जाणां ये भई अपणे शरीरा री कमजोरिया रे कारण में पैहली बार तुहांजो ई खुशखबरी सणवाई थी। 14 कने तुहें बी, मेरिया बस्था रे कारण, सै मतेहान जे लेआ था, तिसते मिन्जो छोटा नीं समझया कने न ई माह्ने कोई नफरत किति, बल्कि तुहें परमेशरा रे स्वर्गदूता रे रूपा च मेरा स्वागत कित्या, मानो हऊँ खुद मसीह यीशु ई था। 15 इस खातर तुहांरी तिसा खुशिया रा क्या हुया? हऊँ तुहांरे खातर खुद इसा गल्ला रा गबाह भई जे तुहें सामर्थी हुन्दे, ता तुहें अपणियां अक्खीं तक नकालीने मिन्जो देई देन्दे। 16 ता क्या बोलणे तेई हऊँ तुहांरा दुश्मण हुईया? 17 तुहांजो व्यवस्था रे विधाना पर चलाणे ओले तुहांच बड़ी गैहरी रुची ले, पर तिन्हांरा मकशद ठीक नीं आ। सै तुहांजो माहते लग करना चाँये, ताकि तुहें बी तिन्हां च गैहरी रुची लेई सक्को। 18 कोई किसी च हमेशा गैहरी रुची लेन्दा रौओ, ये त इक खरी गल्ल ई, पर ये किसी खरे खातर होणा चाहिन्दा, कने सिर्फ तिस ई वगत नीं, ताहलीआं तक जे हऊँ तेरिया सौगी आ। 19 मेरे प्यारे बच्चो, हऊँ भीं तुहांरे खातर इक बार बच्चा जणने री पीड सैईरां, तदुआं तक जे तुहें मसीह साई नीं बणी जान्दे। 20 हऊँ चाँह भई हुण तुहांले आई पुञ्जु कने तुहांने लग तरीके ने गल्ल-बात करुँ, कांभई हऊँ नीं समझी पाईरां भई तुहांरे खातर क्या कित्या जाओ।

सारा कने हाजिरा रा उदाहरण

21 व्यवस्था रे अधीन रहणे औलयां ते हऊँ पुछणा चाँह; क्या तुहें व्यवस्था रे नियमा रा ये बोलणा नीं सुणया, 22 भई अब्राहम रे दो पुत्र थे, इक्की रा जन्म दासिया ते हुया था कने दूजे रा जन्म अजाद जनाना ते हुया था। 23 पर सै जे दासिया ते जम्मया, सै शरीरा ते जम्मया; कने सै जे अजाद जनाना ते जम्मया, सै परमेशरा रे बादे रे मुताबिक जम्मया। 24 इन्हां गल्लां रा द्रष्टान्त आ: ये दो जनानां, दुई वाचां रा प्रतीक ईयां, इक वाचा सिनै पर्वता ते मिली थी, तिसै जे तिन्हां लोकां जो जन्म दित्या सै जे दासता खातर थे, ये वाचा हाजिरा ने जुडीरी थी। 25 कने हाजिरा मानो अरब रा सिनै पर्वत आ, सै अज्जके यरुशलेम रे तरफ इशारा करां ई कांभई सै अपणे बच्चयां सौगी दासता रा जीवन भुगती राई। 26 पर स्वर्गा रा यरुशलेम आजाद आ, कने सैई अहांरी माता ई। 27 शास्त्र बोलां:

“हे बांझ, खुशी मना, तैं किसी जो नीं जाणया खुशिया ने हाक पा, तिज्जो बच्चा जणने री पीड नीं उड्डी, कने खुशिया च खिड़खिड़ान्दी हुई हस।

कांभई छड्डी रिया री सन्तान सुहागणां रिया सन्ताना ते बी जादा ईयां।

28 मेरे भाईयो, अहें इसहाका साई परमेशरा रे वचना री सन्तान ये। 29 कने तियां जे तिस वगत शरीरा रे मुताबिक जम्मीरा, आत्मा रिया शक्तिया ते जम्मीरे जो सतां, तियां ई हुण बी हुई करां। 30 पर देख्खा, पवित्र शास्त्र क्या बोलां? “इसा दासिया जो कने इसारे पुत्रा जो नकालीने बाहर कड्ठा, कांभई ये दासी पुत्र त आजाद जनाना रिया सौगी बारस नीं हुणा।” 31 इस खातर मेरे भाईयो, अहें तिसा दासिया रे पुत्र नीं ये, बल्कि अहें त आजाद जनाना री सन्तान ये।

स्वतंत्रता जो सुरक्षित रखा

5 मसीहे अहें अजाद कित्ते, ताकि अहें आजादिया रा मजा लेई सक्को। इस खातर अपणे विश्वासा च पक्के हुई जावा कने फेरी भीं व्यवस्था रे जुये रा बोझा मता चकदे। 2 सुणा, हऊँ पौलुस खुद तुहांने बोली करां भई जे खतना करवाईने तुहें दोबारा व्यवस्था रे नियमां खा जो हुई जायें तां तुहांरे खातर मसीह रा कोई मतलब नीं रहणा। 3 अपणा खतना करवाणे ओले हर माह्नुये जो, हऊँ इक बार भीं ते याद दिलाणा चाँह भई तिस्सो सारे बिधिया रे विधाना पर चलणा जरूरी आ। 4 तुहां चते जितणे बी लोक बिधिया रे विधाना रे पालन करने रिया वजह ने धर्मिये रे रूपा च स्वीकार हुणा चाँये, सै सारे मसीह ते कने परमेशरा रे अनुग्रह ते दूर ये। 5 पर अहें विस्वासा रे जरिये परमेशरा रे सामणे धर्मी होणे री आशा रखां ये। आत्मा रिया सहायता ने अहें इसरी बाट देख्खीरां ये। 6 मसीह यीशुये च न खतना कने न बगैर खतने ते किछ कम्मा रा हाया, पर सिर्फ प्यारा ते पैदा हुणे ओले विस्वासा राई प्रभाव आ। 7 तुहें त बडे अच्छे ढंगा ने इक मसीह जीवन जीन्दे रैये, हुण तुहांजो येदा क्या हुईया? सै जे सच्चाईया पर चलणे ते रोकी राँ। 8 येदी सीख सै जे तुहांजो सच्चाईया ते दूर करी राई, तुहांरे सद्गणे ओले परमेशरा रिया तरफा ते नीं आईरी। 9 थोड़ा जेआ मलेड़ा गुन्हीरे सारे आटे जो मलेड़ा बनाई देआं। 10 हऊँ प्रभु पर तुहांरे बारे च भरोसा रक्खां भई तुहांरा होर कोई विचार नीं होणा; पर तुहांजो विचलित करने ओला चाहे कोई बी हो, ठीक सजा पाँगा। 11 पर मेरे भाईयो, जे हऊँ हुण तक खतने रा प्रचार करां, तां हुण तक कजो मिन्जो सताया जाई करां? जे हऊँ हुण बी खतने री जरूरता रा प्रचार करां, फेरी त मसीह रे कूसा रे कारण पैदा हुईरी मेरी सारी परेशानियां खत्म हुई जाणी चाहिन्दी। 12 हऊँ त चाँह भई सै जे तुहांजो गिराणा चाँये, खतना कराणे सौगी-सौगी सै अपणा अंग ई बड्डी लेन्दे।

13 पर भाईयो, परमेशरे तुहांजो आजाद रहणे रे खातर चुणीरा, पर येदा नीं हो भई ये अजादी शारीरिक कम्मां रे खातर अबसर बणो, इसरे बदले प्यारा रे कारण अप्पू चीयें इक्की दुजे री सेवा करा। 14 कांभई सारा बिधी-बिधान इसा इक्की गल्ला च पूरा हुई जा, “तू अपणे पड़ेसिये ने तियां प्यार कर, तियां जे तू खुद अप्पू ने प्यार करां।” 15 पर जे तुहें इक्की दुये जो दन्दा ने बड्डीने खान्दे रहन्गे तां देख्खा, तुहें अप्पू बाटियें इक्की दुये जो नीं खत्म करी दो।

पवित्र आत्मा रे जरिये संचालन

16 पर हऊँ बोलां भई आत्मा रे अनुशासना रे मुताबिक व्यवहार करा कने अपणे शरीरा रियां इच्छां जो नीं पूरा करा। 17 कांभई शरीरा रियां इच्छां पवित्र आत्मा री इच्छां ते विल्कुल लग ईयां, इन्हांरा अप्पू चीयें बैर आ। इस खातर त सै जे तुहें करना चाये सै करी नीं सकदे। 18 पर जे तुहें पवित्र आत्मा रे मुताबिक चलां ये, तां फेरी बिधिया रे बिधाना रे अधीन नीं रहन्दे। 19 हुण देख्खा, अहांरे शरीरा रे काम्मां जो त सारे जाणां ये, सै येवे: व्यभिचार, अपवित्रता, भोगविलास, 20 मूर्ती पूजा, जादू-टोना, बैर-बरोध, लड़ाई-झगडा, हिरख, गुस्सा, स्वार्थ, मतभेद, फूट, जलण, 21 नशा, मतवाले होणा या येदी ई होर गल्लां, हुण हऊँ तुहांजो इन्हां गल्लां रे बारे च तियां ई चेतावनी देई करां, तियां जे हऊँ तुहांजो पैहले ई चेतावनी देई बैठीरा था भई सै लोक जे येदियां गल्लां च शामिल हुंगे, सै परमेशरा रे राजा रे बारस नीं हुणे। 22 जबकि पवित्र आत्मा रे फलां तैं प्रेम, खुशी, शान्ति, धीरज, दया, नेकी, विश्वास, 23 नम्रता कने आत्म संयम पैदा हुआ। येदियां गल्लां रे बरोधा च कोई बिधिया रा बिधान नीं आ। 24 तिन्हें सै जे यीशु मसीह रे लोक ये, अपणे पापां रे भरिरे मानव स्वाभावा जो बासनां कने इच्छां समेत कूसा पर चढाईत्या। 25 जे अहें आत्मा रे जरिये जिन्दा ये, तां आवा आत्मा रे मुताबिक ई चलिये। 26 अहें घमण्डी नीं हो, अहांरा इक्की दुये ने चिड़-चिड़ा स्वाभाव नीं हो, कने न ई अहें अप्पू चीयें नफरत करो।

इक दूजे री सहायता करा

6 हे भाईयो, तुहां चते जे कोई माह्नु कोई पाप करदे हुये पकड़ोई जाओ, तां तुहां आत्मिक लोकां जो चाहिन्दा भई नम्रता ने तिसजो धर्मा रे

रस्ते पर बापस लौणे च मदद करा, कने खुद अपने खातर बी साबधानी बरता भई किति तुहें खुद बी किसी मतेहाना च नीं पैई जाओ। 2 अप्पू चीयें इक्की दूये रे बोझे जो चक्का, इस तरीके ने तुहें मसीह री व्यवस्था रा पालन करगे। 3 जे कोई माह्लु खास नीं हुन्दे हुये बी खुद अप्पू जो खास समझां तां सै अप्पू जो धोखा देओ। 4 पर अपने कम्मां री जांच-पड़ताल हरेक आदमिये जो खुद करदे रहणा चाहिन्दा, येदा करने ते तिस्सो खुद अप्पू पर, किसी दुये ने फर्क कित्ते बगैर, गर्व करने रा अबसर मिलणा। 5 कांभई हर इक्की जो अपना बोझ खुद ई चकणे पौणा।

6 तिस्सो जे परमेशरा रा वचन सणवाईरा, तिस्सो चाहिन्दा भई सै जे सारियां खरियां चीजां तिसले ईयां, तिसच अपने गुरुये जो सांझी बणाये। 7 धोखा नीं खावा; परमेशरा जो कोई बुद्धु नीं बणाई सकदा कांभई सै तेदा जे बाहन्गा, तिस तेदा ई कटणा। 8 सै जे अपने शरीरा रे खातर बाहन्गा, तिस अपने शरीरा ते विनाशा री फसल कटणी, किन्तु सै जे आत्मा रे खेता च ब्यू बाहन्गा, तिस आत्मा रे जरिये अनन्त काल रे जीवना री फसल कटणी। 9 इस खातर आवा अहें भलाई करदे कदीं मनी थको, कांभई जे अहें भलाई करदे ई रहन्ने, तां सही वगत औणे पर अहांजो तिसरा फल मिलणा। 10 इस खातर तियां जे कोई मौका मिलो, अहांजो सब्बी सौगी भलाई करनी चाहिन्दी, खास कर अपने विस्वासी भाईयां सौगी।

अन्तिम चेताबनी कने अभिबादन

11 देख्वा, मैं खुद अपने हत्थां ने कितणे बड़े-बड़े अखरां च लिखीरा। 12 येदे लोक सै जे शारीरिक रूपा ते दिखावा करना चाँये, तुहां पर खतना कराणे रा जोर पायें, पर सै येदा सिर्फ इस खातर करां ये भई तिन्हांजो मसीह रे कूसा रे कारण परेशानियां नीं झेलणे पौ। 13 कांभई सै खुद बी तिन्हांरा जे खतना हुई चुक्कीरा, बिधिया रे बिधाना रा पालन नीं करदे, पर फेरी भीं सै चाँये भई तुहें खतना कराओ ताकि सै तुहांरे जरिये इस संसारिक प्रथा जो अपनाये जाणे पर डींगे मारी सक्को। 14 पर तिसरे जरिये जे हऊँ संसारा रे खातर कने संसार मेरे खातर मरया, प्रभु यीशु मसीह रे तिस कूसा जो छड्डी ने मिन्जो होर किसी पर गर्व नीं हो। 15 कांभई न त खतने रा कोई महत्व हाया कने न बगैर खतने रा, जे महत्व हाया तां सै आ नौईयां सृष्टिया रा। 16 इस खातर सै लोक जे इस नियमा पर चलगे तिन्हां पर, कने परमेशरा रे इस्त्राएला पर शान्ति कने दया हुन्दी रौ। 17 चिट्ठिया जो खत्म करदे हुये हऊँ तुहांने विनती करां भई हुण मिन्जो कोई होर दुख मता देन्दे, कांभई हऊँ त पैहले ई अपने शरीरा च यीशुये रे जखमां जो लेईने घुम्मीरा। 18 मेरे भाईयो, अहांरे प्रभु यीशु मसीह रा अनुग्रह तुहांरी आत्मां रे सौगी बणीरा रौ। आमीन।

इफिसियां

1 पौलुसा रिया तरफा ते, सै जे परमेशरा रिया इच्छा ते यीशु मसीह रा प्रेरित आ, इफिसुस रे रैहणे औळे संत लोक कने यीशु मसीह च विश्वास रखणे औळ्यां रे नौं: 2 तुहांजो अहांरे पिता परमेशर कने यीशु मसीह रिया तरफा ते अनुग्रह कने शान्ति मिलो।

मसीह कने आत्मिक शीषां

3 अहांरे प्रभु यीशु मसीह रे पिते कने परमेशरा रा धन्यवाद, तिने जे अहांजो मसीह च स्वर्गा ते कई आशीर्वाद दित्तिरे। 4 संसारा रिया रचना ते पैहले ई परमेशरे अहां बिश्वासियां जो मसीह च, अपणे सामणे पवित्र कने निर्दोष बणने खातर चुणया, 5 अहांरे खातर तिसरे प्यारा रिया बजह ने तिने अहांजो यीशु मसीह रे जरिये अपणे पुत्र होणे रा दर्जा देईने नियुक्त कित्या, येई तिसरी इच्छा कने तिसरी योजना थी। 6 तिने येदा इस खातर कित्या भई तिस रे तिस अनुग्रह री महिमा री स्तुती हो, सै जे तिने अहांरे खातर अपणे प्यारे पुत्रा पर विस्वास करने औळ्यां जो मुफ्त च दित्ति। 7 अहांजो तिसच तिसरे लहूये रे जरिये छुटकारा, यनिके अहांरे पापां री माफी, तिसरे तिस अनुग्रह रूपी दौलता रे मुताबिक मिली। 8 तिस्सो जे परमेशरे अपणे ज्ञाना कने समझा ने अहां पर मता सारा कित्या, 9 भई तिने अपणिया इच्छा रा भेत खरे मतलबा खातर अहां जो दस्या, सै जे तिने अप्पू च सोचीलरा था 10 भई परमेशर, सही वगत औणे पर स्वर्गा री कने पृथ्विया परा री सारियां चीजां जो मसीह च कडियां करो।

11 ये सारियां गलां कने योजनाएं परमेशरा रे फैसले रे मुताबिक हुआं ईयां, कने तिने मसीह च अहांजो संत बणने खातर अपणिया इच्छा रे मुताबिक चुणया, सै जे परमेशरे पैहले तेई तह करीने रखीरा था। 12 ताकि अहें तिसरी महिमा री स्तुती रे बजह बणी सक्को। अहें यनि तिन्हेजे सब्बींते पैहले अपणी सारियां आस्सां मसीह पर रखी रियां। 13 ताहली जे तुहें तिस छुटकारे रिया, खुशखबरिया री सच्चाईया रा सन्देश सुणया, तिस मसीहे पर जे तुहें विस्वास कित्या था, तां तुहांजो पवित्र आत्मा रा वचन मिलया, तिसरी छाप जे परमेशरा रे जरिये मसीह च तुहां लोकां पर बी लगीरी। 14 ये आत्मा अहां रिया बरासता रे हिस्से री जमानता च तिस वगता तक अहांजो दित्तिरी, तदुआं तक जे भई सै अहांजो, पूरे तरीके ने छुटकारा नीं देई देन्दा। इस रिया बजह ने लोकां तिस रिया महिमा री स्तुती करनी।

पौलुसा री प्राथना

15 इस खातर ताहलियां ते जे में प्रभु यीशुये च तुहांरा विस्वास कने सारे पवित्र लोकां रे प्रति तुहांरे प्यारा रे बारे च सुणीरा, 16 हऊं तुहांरे खातर परमेशरा रा धन्यवाद हमेशा करी करां। अपणी प्रार्थनां च हऊं तुहांजो याद करदा रैयां। 17 हऊं प्रार्थना करदा रैयां भई अहांरे प्रभु यीशु मसीह रा परमेशर तुहांजो ज्ञान कने प्रकाशा री येदी आत्मा री शक्ति देओ तिसते जे तुहें महिमावान पिते जो जाणी सक्को। 18 मेरी विनती येई भई तुहांरे मना री अकखीं खुली जाओ कने तू प्रकाशा रा दर्शन करी सक्को ताकि तुहांजो पता लगी जाओ भई सै आशा क्या ई तिसरे खातर जे तिने तुहांजो सद्दीरा, कने तिस उत्तराधिकारा जो सै अपणे सारयां लोकां जो देन्गा, सै कितणा अदभुत कने सम्पन्न आ। 19 कने अहां विश्वासियां रे खातर तिसरी शक्ति अतुलनीय रुपा च कितणी महान ई। ये शक्ति अपणी महान शक्तिया रे तिस प्रभावा रे बराबर ई। 20 तिस्सो जे तिने मसीह च तिस वगत कम्मा च लाया था ताहली जे मरीरेआं च ते तिस्सो जिन्दा करीने स्वर्गा रिया जगह च अपणे सजे पासे

बठालीने, 21 सारे राजयां, अधिकारियां, सामर्था, कने प्रभुत्ताओं कने हर किसी येदी शक्तिशाली पदविया रे उपर बठालीरा था, तिस्सो जे न सिर्फ इस जुगा च बल्कि औणे औळे जुगा च बी किसी जो दित्या जाई सक्कां। 22 परमेशरे सब किजि जो मसीह रे चरणां रे हेठ करीत्या कने तिने ई मसीह जो कलीसिया रा सर्वोच्च शिरोमणी बणाया। 23 कलीसिया मसीह री देह ई कने सारियां विधियां ने सब किछ जो तिसरी पूर्णता ई पूरा करां ई।

मौती ते जीबना रिया तरफो

2 इक वगत था ताहली जे तुहें लोक तिन्हां अपराधां कने पापां रे कारण आत्मिक रुपा च मरीरे थे। 2 तिन्हांच पैहले तुहें संसारा रे बुरे रस्तयां पर चलदे हुये कने तिसा आत्मा रा अनुसरण करदे हुये जीआं थे सै जे इसा धरतिया रे ऊपरा री आत्मिक शक्तियां रा मालक आ। सैई आत्मा हुण तिन्हां माहुआं च काम्म करी राई सै जे परमेशरा रा हुक्म नीं मनदे। 3 इक वगत अहें बी तिन्हांरे बिच जीआं थे कने अपणे पापा ने भरीरे स्वाभावा ते इच्छां जो पूरा करदे हुये अपणे दिलां कने पापा रे स्वाभावा री जरूरतां जो पूरा करदे हुये इस संसारा रे दूज्यां लोकां साई परमेशरा रे कोपा रे पात्र थे। 4 पर परमेशर दया रा धनी आ। अहांरे प्रति अपणे महान प्यारा रिया बजह ने 5 तिस वगत अपराधां रे कारण अहें आत्मिक रुपा ते हलित्यें मूईरे ई थे, मसीह रे सौगी-सौगी तिने अहांजो बी जिन्दागी दित्ति (परमेशरा रे अनुग्रह तेई तुहांरा उद्धार हुया।) 6 कने कांभई अहें यीशु मसीह चे इस खातर परमेशरे अहांजो मसीह सौगी फेरी भीं ते जिन्दा कित्या कने तिस रिया सौगी ई स्वर्गा रे संघासणा पर बठालया। 7 ताकि सै औणे औले हर इक जुगा च अपणे अनुग्रह रे असीमित धना जो दस्सो तिस्सो जे तिने मसीह यीशु च अपणी दया रे रुपा च अहां पर दस्सया। 8 परमेशरा रे अनुग्रह रे जरिये अपणे विश्वासा रे कारण तुहांरा उद्धार हुईरा, ये तुहांजो तुहां रिया तरफा ते नीं मिलीरा, बल्कि ये त परमेशरा रा बरदान आ। 9 ये अहांरे कित्तिरे कर्मां रा फल नीं आ भई अहें इसरा घमण्ड करी सक्को। 10 कांभई परमेशर अहां रा बनाणे औला, तिने मसीह यीशु च अहांरी सृष्टी इस खातर कित्ति भई अहें नेक काम्म करो, तिन्हांजो जे परमेशरे पैहले तेई इस खातर तैयार कित्तिरा भई अहें तिन्हांजो ई करदे हुये अपणा जीबन बिताईये।

मसीह च इक

11 इस खातर आद रखा, सै लोक सै जे अपणे शरीरा च माहुआं रे हत्थों कित्तिरे खतने रे कारण खुद अप्पू जो खतना कित्तिरे दस्सां ये, अधर्मिये रे रुपा च जम्मीरे तुहां लोकां जो बगैर खतने ते बोलां ये। 12 तिस वगत तुहें बिणा मसीह ते थे, तुहें इस्राएल रिया बरादरिया ते बाहर थे। परमेशरे अपणे भक्तां जो बचन दित्तिरे थे तिन्हां पर अधारित बाचा ते अनजाण थे, कने इस संसारा च बिणा परमेशरा ते निराश जीबन जीआं थे। 13 पर हुण मसीह यीशु च तुहें सै जे परमेशरा ते बडे दूर थे, मसीह रे बलिदाना रे जरिये मसीह यीशुये रे नेडे आईगरे। 14 यहूदी कने गैर-यहूदी अप्पू चीयें इक्की दुजे ते नफरत करां थे कने लग हुईगरे थे; ठीक यीयां तियां जे तिन्हांरे बिच कोई दवाल खडीरी हो। पर मसीहे खुद अपणी देह रा बलिदान देईने नफरता रिया तिसा दवाला जो रुदाईत्या। 15 तिने येदा ताहली कित्या ताहली जे अपणे सारे नियमां कने व्यवस्था रे विधाना जो खत्म करीत्या। तिने येदा इस खातर कित्या भई सै अप्पू च इन्हां दूई जो ई इक्की दूये च मलाई सक्को, इस तरीके ने मलाप कराई दो। क्रूसा पर अपणिया मौता रे जरिये तिने तिस नफरता रा अंत कित्या कने

तिन्हां दूर्ह जोई परमेशरा सौगी तिसा इक्की देहा च मलाईत्या। 16 कने कूसा पर अपणी मौता रे जरिये बैर भाव रा नाश करीने इक्की शरीरा च तिन्हां दूर्ह जो कट्टा करीने परमेशरा ने फेरी भी मलाईत्या। 17 तिने आईने तुहांजो सै जे दूर थे कने तिन्हांजो सै जे नेडे थे, दूर्ह जो मेल-मिलापा री खुशखबरी सणवाई। 18 कांभई तिसरे ई जरिये इक ई आत्मा ते परम पिते ले अहां दूर्ह री पहुँच हुई। 19 इस खातर हुण तुहें न अणजाण रये कने न ई पराये, बल्कि हुण त तुहें पवित्र लोकां रे स्वदेशी संगी-साथी हुईगरे। 20 तुहें इक येदा घर ये सै जे प्रेरितां कने नबियां री नीऊंवा पर खड़ीरा, कने खुद मसीह यीशु तिसरा जे खास कुणे रा पत्थर आ। 21 तिसच सारी रचना इक साथ मिलीने प्रभु च इक पवित्र मन्दर बणदी जाई, 22 तिसच तुहें बी आत्मा रे जरिये परमेशरा रे बास करने खातर इक साथ बणाये जायें।

अन्यजातियां च पौलुसा री सेवा

3 इस खातर हऊँ पौलुस तुहां गैर-यहूदियां रे खातर मसीह यीशुये रे खातर बंदी बणया। 2 तुहारे कल्याणा खातर परमेशरा रे अनुग्रह सौगी सै काम्म जे मिन्जो सौंपया, तिसरे बारे च तुहें जरूर ई सुणया हुंगा। 3 भई सै रहस्यमयी योजना दर्शणा रे जरिये माह पर परगट हुई, तियां जे भई हऊँ तुहांजो संक्षेप च लिखी चुक्कीरा। 4 कने जे तुहें तिस्सो पढ़गे तां जाणी सक्कां ये भई हऊँ मसीह रा सै भेद कित्ति तक समझां। 5 ये रहस्य पिछली पौढ़िया रे लोकां जो ईयां नीं दस्सया था, तियां जे हुण तिसरे अपणे पवित्र प्रेरितां कने भविष्यवक्त्यां जो आत्मा रे जरिये दस्सया जाया चुक्कीरा। 6 ये रहस्य भई यहूदियां सौगी गैर-यहूदी बी वारस हुणे च सांझे, इक्की शरीरा रे अंग कने मसीह यीशु च सै वचन जे अहांजो दित्तिरा, तिसच सहभागी ये।

7 खुश खबरिया रे कारण हऊँ तिसा खुशखबरिया रा प्रचार करने औळा इक सेवक बणीया, सै जे तिसरिया शक्तिया रे मुजब परमेशरा रे अनुग्रह रे बरदाना रे स्वरूप मिन्जो दित्या गया था। 8 सारे पवित्र लोकां च हऊँ छोटे ते बी छोटा आ पर मसीह रे अनन्त धन रुपी खुशखबरिया रा गैर-यहूदियां च प्रचार करने रा ये अनुग्रह मिन्जो दित्या गईरा। 9 भई हऊँ सारयां लोकां खातर तिस रहस्य ने भरीरी योजना जो तिन्हारे सामणे रक्खूँ सै जे सबी किजिरे सिरजनहार परमेशरा च सृष्टिया रे शुरु तेई छिपीरी थी। 10 ताकि सै स्वर्गा रिया जगहां च शक्तियां कने प्रशासकां जो हुण तिस परमेशरा रे कई तरह रे ज्ञाना जो कलीसिया रे जरिये परगट करी सक्को। 11 ये तिस सनातन इच्छा रे मुताबिक सै जे तिने अहांरे प्रभु यीशु मसीह च पूरी कित्ती थी। 12 मसीह च विश्वासा रे कारण अहें परमेशरा तक भरोसे कने हौंसले सौगी पहुँच रखां ये। 13 इस खातर हऊँ प्रार्थना करां भई तुहारे खातर हऊँ सै जे दुख भोगीरां तिन्हांते आश देखां छडी देन्दा कांभई इस दुखा ची त तुहांरी महिमा ई।

मसीह रा प्रेम

14 इस खातर हऊँ परम पिते रे अगे झुकां। 15 तिसते ई स्वर्गा च या धरतिया परा रे सारे वंश अपणे-अपणे नौं ग्रहण करां ये। 16 हऊँ प्रार्थना करां भई सै महिमा रे अपणे धना रे मुताबिक अपणिया आत्मा रे जरिये तुहारे अन्दरले व्यक्तित्व जो शक्तिया ने भरीने मजबूत करो। 17 कने विश्वासा रे जरिये तुहारे दिलां च मसीह रा वास हो। तुहांरी जडां कने निऊं प्यारा पर टिको, 18 तिसते जे तुहांजो होरीं पवित्र लोकां रे सौगी ये समझणे री शक्ति मिली जाओ भई मसीह रे प्यारा री लम्वाई, कने चौड़ाई, कने उंचाई, कने गहराई कितणी। 19 कने तुहें मसीह रे तिस प्यारा जो जाणी लो सै जे हरेक प्रकारा रे ज्ञाना ते परे ताकि तुहें परमेशरा री सारी परिपूर्णता ने भरी जाओ। 20 हुण तिस परमेशरा खातर सै जे अपणिया तिसा शक्तिया ने सै जे अहां च काम्म करी करां ई, जितणा जे अहें मंगी सक्कां ये या तित्थी तक जे अहें सोच्ची सक्कां ये, तिसते बी किति कई मान जादा करी सक्कां, 21 तिसरी कलीसिया च कने मसीह यीशुये च पीढ़ी दर पीढ़ी सदा-सदा रे खातर महिमा होन्दी रौओ। आमीन।

मसीह रिया देहा च एकता

4 इस खातर हऊँ सै जे प्रभु रा हुणे रिया वजह ने बंदी बणाईने रखीरा, तुहां लोकां ने प्रार्थना करां भई तुहांजो अपणी जिन्दगी तियां ई जीणी चाहिन्दि तियां जे पवित्र लोक जीयें। 2 हमेशा नम्रता कने कोमलता सौगी, धैर्यपूर्वक व्यवहार करा, इक्की दूये री प्यारा ने सैहन्दे रौआ। 3 सै शान्ति, सै जे तुहांजो अप्पू चीयें बन्हीने रखां ई, तिसा ते पैदा हुईरी आत्मा रिया एकता जो बणाये रखणे रे खातर हर तरह री कोशिश करदे रौआ। 4 शरीर इक आ कने पवित्र आत्मा बी इक आ, इयां ई ताहली जे तुहांजो बी सदया गया तां इक ई आसा च भागीदार होणे रे खातर सदया गया। 5 इक ई प्रभु आ, इक ई विश्वास आ, कने इक ई वपतिस्मा, 6 परमेशर इक ई हाया कने सै सबनीं रा पिता, सै ई सब्बीं रा मालक आ, हर किसी च सै ई काम्म करां, कने हर किसी च सै ई समाईरा। 7 अहां चते हर किसी जो तिसरे अनुग्रह रा इक खास उपहार दित्तिरा सै जे मसीह री उदारता रे अनुकूल ई हाया। 8 इस खातर पवित्र शास्त्र बोलां,

“सै ऊँचे पर चढ़या कने बन्दियां जो बन्हीने लेईया,
कने लोकां जो दान दित्ते।”

9 हुण देख्या, ताहली जे सै बोलां “उपर कोह” तां इसरा मतलब इसते इलावा क्या? भई सै जमीना रे थलडे हिस्से च बी उतरीरा था। 10 सै जे हेठ उतरीरा था, ये सै ई हाया, सै जे उपर बी चढ़ीरा था - इतणे उपर भई सारेयां अम्बरां ते बी उपर, ताकि सै सबी किजि जो पूरा करी दो। 11 तिने खुद ई किसी जो प्रेरित हुणे रा बरदान दित्या, तां किसी जो भविष्यवक्ता होणे रा, किसी जो खुशखबरिया रे प्रचारक होणे रा, किसी जो परमेशरा रे लोकां री हिफाजत करने कने सखाणे रा। 12 मसीहे तिन्हाजो ये बरदान पवित्र लोकां रे सेवा रे कम्मा खातर तैयार करने जो दित्ते ताकि अहें सै जे मसीह रा शरीर ये आत्मा च होर मजबूत हुई जाओ, 13 तदुआं तक जे भई अहें सारे रे सारे विश्वास कने परमेशरा रे पुत्रा रिया पछयाणा च इक नीं हुई जाओ, कने मसीह रे पूरे डील-डौला च नीं बधी जाओ। 14 ताकि अहें येदे बच्चे ई नीं बणीरे रौओ सै जे हर किसी येदी शिक्षा री हवा ते उछली जाओ, सै जे अहांरे रस्ते च बैहन्दी रैयां, लोकां रा छलणे रा व्यवहार, येदिया चलाकिया ते सै जे ठगणे रियां योजनां जो बधाईयां, ओरे परे भटकाई दित्ते जायें। 15 बल्कि अहें प्रेमा ने सच्च बोलदे हुये हर तरह ते मसीह साई बणने रे खातर विकास करदे जाओ। मसीह सिर आ, 16 तिस पर जे सारी देह निर्भर हुआं ई। ये देह तिसते जुड़दी हुई हरेक सहायक नसा ने जुडां ई, कने ताहली जे तिसरा हर अंग सै काम्म जे तिस्सो करना चाहिन्दा, तिस्सो पूरा करां, तां प्यारा सौगी सारिया देहा रा विकास हुआं कने ये देह खुद मजबूत हुआं ई।

मसीह च नया जीबन

17 हऊँ इस खातर ये बोलां कने परमेशरा जो गवाह मन्त्रीने तुहांजो खबरदार करां भई तिन्हां रिया बेमतलब सोचा ने अधर्मियां साई जिन्दगी मता जीन्दे रौआ। 18 तिन्हारी बुद्धी अन्धकारा ने भरीरी, सै परमेशरा ते मिलणे औलिया जिन्दगिया ते दूर ये, कांभई सै अणजाण ये कने तिन्हारे मन जड़ हुईगरे। 19 लाज शर्मा री भावना तिन्हां चते जान्दी रैई, कने तिन्हें अप्पू जो इन्द्रियां री उपासना करने च लगाईतरा, बिणा कोई बन्धन मन्त्रे सै हर तरह रे गन्दे काम्म लालसा ने करीरां ये। 20 पर मसीह रे बारे च तुहें सै जे जाणया, सै त येदा नीं आ। 21 मिन्जो कोई सन्देह नीं आ भई तुहें तिसरे बारे च सुणीरा; कने सै सच्च सै जे यीशु मसीह च बास करां, तिसरे मुताबिक तुहें तिसरे चेलयां रे रुपा च सखाये बी ये। 22 भई तुहें पिछले चालचलना रे पुराणे मनुष्यत्व जो त्वारीने सट्टि देआ सै जे तिसरी भटकाणे औळी इच्छां रे कारण भ्रष्ट बणीरा। 23 तिसते बुद्धी कने आत्मा च तुहांजो नौंवा कित्या जाई सक्को। 24 कने तुहें तिस नये रुपा जो धारण करी सक्को सै जे परमेशरा रे रुपा च सच्चमुच धार्मिक कने पवित्र बणने रे खातर सृजीरा।

25 इस खातर तुहें झूठ बोलणा छडी देवा, अपणयां साथियां ने हर किसी जो सच्च बोलणा चाहिन्दा, कांभई अहें सारे इक्की शरीरा रे अंग ये। 26 गुस्से च आईने पाप देख्यां करी बैठदे, सूरजा रे घरने ते पैहले ई अपणे गुस्से जो

खत्म करी देवा। 27 शैताना जो अपणे ऊपर हावी मत हुणे देवा। 28 सैं जे चोरी करदा आया, सैं इसते बाद चोरी नीं करो, बल्कि तिस्सो काम्म करना चाहिन्दा, खुद अपणे हत्थां ने मेहनत करा, ताकि तिसले तिस्सो जे जरूरत ई, तिस सौगी बंडणे जो कुछ हुई सक्को। 29 तुहारे मुँहा ते कोई बुरी गल्ल नीं निकळणी चाहिन्दी, पर जरूरता रे मुताबिक सैंई निकलो सैं जे विकासा रे खातर अच्छी हो, ताकि तिसते जे सुणने औळै रा भला हो। 30 परमेशरा रिया पवित्र आत्मा जो दुख नीं देन्दे रौआ कांभई तिसते तुहां पर छुटकारे रे दिना खातर आत्मा सौगी मोहर लगाईतरी। 31 सारी कड़बाहट, झुझलाहट, गुस्सा, चिखणा-चिलाणा कने निन्दा जो तुहें अपणे अन्दरा ते हरेक बुराईया सौगी नकालीने बाहर सट्टा। 32 अप्पू चीयें इक्की दूजे रे प्रति दयालू कने करुणावान बना कने अप्पू चीयें इक्की दुये रे अपराधां जो तियां ई माफ करा तियां जे मसीह रे जरिये तुहांजो परमेशरे बी माफ कित्या।

जोतिया री सन्तान बना

5 इस खातर प्यारे बचयां साई परमेशरा रा अनुसरण करा। 2 कने प्रेमा ने चला, ठीक तियां ई तियां जे मसीहे अहांने प्रेम कित्या कने खुद अपणे आप जो सुख देणे औली सुगन्धा रे रूपा च, अहारे खातर परमेशरा जो अर्पण करीत्या।

3 तुहारे बिच व्यभिचार कने हर तरह रे अपवित्र कम्मां यनि लालचा री चर्चा तक नीं हुणी चाहिन्दी; तियां जे भई पवित्र लोकां रे खातर ठीक नीं आ। 4 तुहांच नां त गन्दियां गल्लां रा इस्तेमान होणा चाहिन्दा, न मूर्खतापूर्ण गल्लां या हसी-मजाक; ये गल्लां तुहांजो शोभा नीं देन्दियां, बल्कि तुहारे बिच धन्यवाद ई दित्ते जाओ। 5 कांभई तुहें ये जाणां ये भई येदा कोई बी माळु सैं जे दुराचारी आ, अपवित्र आ, या लालची आ (सैं जे इक मूर्तिया री पूजा करने औले साई आ) मसीह रे कने परमेशरा रे राजा रा वारिस नीं बणी सकदा। 6 देख्वा, तुहांजो कोई कोरे शब्दां च धोखा नीं देओ, कांभई इन्हां गल्लां रे कारण ई आज्ञा न मनणे औलयां पर परमेशरा रा कोप भडकां। 7 इस खातर तिन्हारे साथी मत बना। 8 ये हऊँ इस खातर बोली करां भई इक वगत था ताहली जे तुहें अन्धकारा ने भरौरे थे, पर हुण तुहें प्रभु रे चेलयां रे रूपा च ज्योतिया ने भरीरे, इस खातर ज्योतिया रे पुत्रां रे साई व्यवहार करा। 9 कांभई हर तरह री भलाईया च, कने धार्मिकता कने सच्चाईया च ज्योतिया रा फल दिखदा जां। 10 हर वगत ये जाणने रा जतन करदे रौआ भई परमेशरा जो क्या ठीक लगां। 11 येदे काम्म सैं जे अन्धकारा ने भरीरे, तिन्हां वेकारा रे कम्मां च हात्थ मता बटान्दे, बल्कि तिन्हारा भान्डा फोड़ करा। 12 कांभई येदे काम्म तिन्हांजो जे सैं चुपचाप करां ये, तिन्हारे बारे च चर्चा करना बी शर्मा री गल्ल ई। 13 जोत ताहली जे बलां ई, तां सारा किछ दिखणे लगीं जां। कने सैं किछ जे दिखणे लगां, सैं खुद ज्योति बणीं जां। 14 इस कारण सैं बोलां, "ओ सौणे औलया, जाग कने मूर्ईरेआं च ते जिदा हुई जा; तां मसीह री ज्योति तूह पर चमकणी।"

15 इस खातर साबधानिया ने देखदे रौआ भई तुहें केदी जिन्दगी जी करां ये, बेअकलां साई बर्ताव मता करदे, बल्कि बुद्धीमाना रे साई बर्ताव करा। 16 सैं जे हरेक मौके रा अच्छे कर्म करने रे खातर पूरा-पूरा इस्तेमाल करां ये, कांभई ये दिन बुरे। 17 इस खातर मूर्ख मता बणदे, बल्कि ये जाणा भई प्रभु री क्या इच्छा ई? 18 शराब पी ने नशे च मता रैहन्दे, कांभई इसते कामुकता पैदा हुआं ई, पर इसरे उलट आत्मा ते भरदे जावा। 19 कने अप्पू बाटिये भजन कने स्तुती रे गीत कने आत्मिक गीत गाया करा, कने अपणे-अपणे मना च प्रभु रे सामणे गान्दे कने कीर्तण करदे रौआ। 20 कने हर किसी गल्ला रे खातर अहारे प्रभु यीशु मसीह रे नाँवा पर अहारे परम पिता परमेशरा रा सदा धन्यवाद करा। 21 मसीह रे प्रति आदरा रे कारण इक्की दुये जो समर्पित हुई जावा।

पति कने पत्नी

22 हे पत्नियो, अपणे-अपणे पतियां रे प्रति इयां समर्पित रौवा, तियां जे तुहें प्रभुये जो समर्पित हुआं इयां। 23 कांभई पति पत्निया रा सिर आ, तियां जे भई मसीह कलीसिया रा सिर आ, कने सैं खुद इ इस शरीरा रा उद्धार करने

औला। 24 पर तियां जे कलीसिया मसीह रे अधीन ई, तियां इ पत्नियां जो सारियां गल्लां च अपणे-अपणे पतियां रे प्रति समर्पित रैहणा चाहिन्दा।

25 हे पतियो, अपणी पत्नियां ने प्रेम करा, तियां इ तियां जे मसीहे कलीसिया ने प्रेम कित्या कने खुद अप्पू जो तिसरे खातर बलिदान करीत्या। 26 ताकि सैं तिसजो प्रभु रिया सेवा च पाणिये च स्नान कराईने पवित्र करीने वचना रे जरिये परमेशरा जो अर्पण करी दो। 27 इस तरीके ने सैं कलीसिया जो इक येदी चमचमाती दुलहना रे रूपा च अपणे खातर प्रस्तुत करी सक्कां सैं जे निष्कलंक हो, झुरियां ते बगैर हो, या तिसच येदी होर कोई कमी नीं हो, बल्कि सैं पवित्र कने निर्दोष हो। 28 पतियां जो अपणी-अपणी पत्नियां ने तियां ई प्यार करना चाहिन्दा तियां जे सैं खुद अपणे शरीरां ने करां ये, सैं जे अपणिया पत्निया ने प्यार करां, सैं खुद अप्पू नेइ प्यार करां। 29 कोई अपणे शरीरा ने त कर्दी नफरत नीं करदा, बल्कि सैं तिस्सो पालां-पोसां कने तिसरा ध्यान रक्खां, तियां इ तियां जे मसीह अपणिया कलीसिया रा। 30 कांभई अहें बी त तिसरे शरीरा रेई अंग हाये।

31 पवित्र शास्त्र बोलां: "इस खातर इक आदमी अपणे माता-पिता जो छड्डिने अपणी पत्निया ने बड़ी जां, कने दोनों इक देह हुई जायें। 32 ये रहस्य ने भरीरा सच्च बड़ा जरूरी आ कने हऊँ तुहांजो दरसां भई ये मसीह कने कलीसिया पर बी लागू हुआं। 33 इस खातर कुछ बी हो, तुहां चते हर इक्की जो अपणी पत्निया ने तियां ई प्यार करना चाहिन्दा तियां जे तुहें खुद अप्पू जो करां ये, कने इक पत्निया जो बी अपणे पतिये रा डर मनदे हुये तिसरा आदर करना चाहिन्दा।

माता-पिता कने बच्चे

6 मेरे पुत्रो, प्रभु च आस्था रखदे हुये माता-पिता री आज्ञा रा पालन करा कांभई येई ठीक आ। 2 "अपणे माता-पिता रा आदर करा (ये पैहली आज्ञा ई सैं जे इसा प्रतिज्ञा ने बी जुड़ीरी) 3 भई तेरा भला हो कने तू धरतिया पर मतयां दिनां तक ज्यूनदा रौ।" 4 कने हे पिताओ, तुहें बी अपणे बचयां जो गुस्सा मता दलान्दे बल्कि प्रभु ते मिलीरी शिक्षा कने निर्देशां जो देन्दे हुये तिन्हारा पालन-पोषण करा।

स्वामी कने दास

5 हे सेवको, सैं लोक जे इस संसारा च तुहारे स्वामी ये, तिन्हारी आज्ञा सिधे मनां ने डर कने आदरा सौगी तिस तरीके ने मन्ना तियां जे तुहें मसीह री आज्ञा मन्नां ये। 6 लोकां जो खुश करने औलयां साई दिखावा करने रे खातर सेवा नीं करा, पर मसीह रे सेवका रे रूपा च काम्म करा सैं जे अपणा मन लगाईने परमेशरा री इच्छा पूरी करां ये। 7 उत्साह सौगी इक सेवका रे रूपा च येदे काम्म करा तियां जे मन्ना तुहें लोकां री नीं प्रभु री सेवा करीरां ये। 8 याद रक्खा, तुहां च ते हर इक, चाये सैं सेवक हो या आजाद आ, जे कोई खरा काम्म करां, तां प्रभुये ते तिसरा फल पांगा। 9 हे स्वामियो, तुहें बी अपणे सेवकां ने तेदा ई बर्ताव करा कने तिन्हांजो डराणा-धमकाणा छडी दवा, आद रक्खा, तिन्हारा कने तुहांरा स्वामी स्वर्गा चा कने सैं कोई पक्षपात नीं करदा।

आत्मिक लड़ाईया रे हथियार

10 मतलब ये आ भई प्रभु च कने तिसरिया शक्तिया रे प्रभावा च खुद अप्पू जो शक्तिशाली बणावा। 11 परमेशरा रे सारे कवच पैहनी लेवा, ताकि तुहें शैताना री योजनां रे सामणे टिकी सक्को। 12 कांभई अहारी ये लड़ाई खून कने मासा ने नीं, पर प्रधानां ने, कने अधिकारियां ने, कने इस संसारा रे अन्धकारा री शक्तियां ने कने अम्बरा री दुष्टात्मा री शक्तियां ने आ। 13 इस खातर परमेशरा रे सारे हत्थियारां जो पैहनी लेवा ताकि ताहली जे बुरे दिन आओ तां सैं जे कुछ हुई सक्कां, तिस्सो करने ते बाद तुहें मजबूतिया ने टिकी रेई सक्को। 14 इस खातर सच्चाईया ने अपणी कमर कस्तीने, कने धार्मिकता री झिलम पैहनीने, 15 कने पैरां च शान्तिया री खुशखबरी सुनाणे री तयारिया रे जूते पैहनीने; 16 कने इन्हां सारयां ते बड्डी गल्ल येई भई विश्वासा जो ढाला रे रूपा च लेईलवा, तिसते जे तुहें तिस दुष्टा रे सारे बलदे तीरां बुझाई सको, 17 कने छुटकारे रा टोप पैहनी लो, कने परमेशरा रे सन्देश रूपी

आत्मा री तलवार चक्री लो। 18 हर वगत कने हर तरह ते आत्मा च प्रार्थना कने विनती करदे रौआ, कने इसरे ई खातर जागदे रौआ भई सारे पवित्र लोकां खातर विनती करया करा, 19 कने मेरे खातर बी प्रार्थना करा भई हऊँ ताहली बी जे अपणा मुँह खोलूँ, मिन्जो इक प्रवल वचन दित्या जाओ भई हऊँ हिम्मता ने खुशखबरिया रा भेद दस्सी सकूँ, 20 तिसरे खातर जे हऊँ जंजीरां ने जकड़ोईरे राजदूता साई सेवा करीरा; प्रार्थना करा भई जिस तरीके ने मिन्जो बोलणा चाहिन्दा, तियां ई निडर हुईने बोली सकूँ।

अन्तिम अभिवादन

21 तू बी, हऊँ केदा कने क्या करीरां, इसजो जाणी जावा, इस खातर तुखिकुसा तुहांजो सब कुछ दस्सी देणा, सै अहारा प्यारा भाई कने प्रभु च विश्वास रे लायक सेवक आ। 22 इसरे ई खातर हऊँ तिस्सो तुहांले भेज्जीरां ताकि तुहें मेरी खुशखबरीया जो जाणी सक्को कने इस खातर बी भई सै तुहांरे मना जो शान्ति देई सक्को। 23 हे भाईयो, तुहां सब्बीं जो पिता परमेशर कने प्रभु यीशु मसीह रिया तरफा ते विश्वास शान्ति कने प्यार मिलो। 24 सै जे अहारे प्रभु यीशु मसीह ने सच्चा प्यार रखां ये, तिन्हां सब्बीं पर परमेशरा रा अनुग्रह होन्दा रौ।

फिलिप्पियां

1 यीशु मसीह रे सेवक पौलुस कने तिमथियुस रिया तरफा ते यीशु मसीह च फिलिप्पी रे रहणे औले सारे पवित्र लोकां रे नौं सै जे तित्थी अध्यक्षां कने कलीसिया रे सेवकां सौगी रैयां ये: 2 अहारे पिता परमेश्वर कने अहारे प्रभु यीशु मसीह रिया तरफा ते तुहांजो अनुग्रह कने शान्ति मिलो।

पौलुसा री प्राथना कने धन्यवाद

3 हऊं ताहली-ताहली जे तुहांजो याद करां, ताहली ताहली परमेश्वरा रा धन्यवाद करां। 4 अपणिया हर प्रार्थना च हऊं हमेशा खुशिया ने तुहारे खातर प्रार्थना करां। 5 कांभई पैहले ई दिना ते अज्जा तक तुहें खुशखबरिया रे प्रचारा च मेरा सहयोग देन्दे रये। 6 मिन्जो इसा गला रा पूरा भरोसा भई सै परमेश्वर तिने जे तुहारे बिच येदा बधिया काम्म शुरु कित्या, सैई तिस्सो तिस दिना तक बणाई रखगा, ताहली जे मसीह यीशु फेरी भी आईने तिस्सो पूरा करगा। 7 तुहां सारयां रे बारे च मेरा ये सोचणा ठीक इ हाया, कांभई तुहें सारे मेरे मना च बसीरे, कने न सिर्फ तिस वगत ताहली जे हऊं जेला च ओ, बल्कि तिस वगत बी ताहली जे हऊं खुशखबरिया रिया सच्चाईया री हिफाजत करदे हुये, तिस रिया प्रतिष्ठा च लगीरा था, तुहें सारे इस खास अधिकारा च मेरे सौगी अनुग्रह च भागीदार रये। 8 इस च परमेश्वर मेरा गवाह भई हऊं मसीह यीशुये साई प्रेम-भौआ ने तुहां सारयां रे खातर व्याकुल रेआं। 9 हऊं येई प्रार्थना करदा रैयां भई तुहां प्यार, कने सुध-बुध हर तरह रे ज्ञाना सौगी हमेशा बधदी रौ। 10 एथी तक भई तुहें उत्तम ते उत्तम गलां जो प्रिय जाणीने, कने मसीह रे दिना तक सच्चे बणीने रौआ, कने ठोकर नीं खावा; 11 यीशु मसीह री करुणा जो पाईने तुहें अति उत्तम काम्म करा, कने तिसच बधदे रौआ तिसते जे परमेश्वरा री महिमा कने स्तुती होन्दी रौ।

पौलुसा रिया कैदा ते खुशखबरिया री उन्नति

12 हे भाईयो, हऊं चाँह भई तुहें ये जाणी लो भई माह पर सै जे बीती, तिसते खुश-खबरी कई गुणा फैली गई। 13 येत्थी तक भई कैसरा रे राजमैहला री सारी पलटन कने बाकि सारे लोकां च ये परगट हुईया भई हऊं मसीह रे कारण ई बन्दी बणाया गया; 14 कने प्रभु च सै जे भाई ये, तिन्हां चते जादातर भाईयां जो मेरे कैद हुणे रिया वजह ने बड़ा जोश आया, कने जादा ते जादा जोशा ने परमेश्वरा रा वचन निधङ्क हुईने सुणाई रां ये। 15 ये सच्च आ भई तिन्हां चते कुछ हिरख कने बैर-बरोधा रे कारण मसीह रा प्रचार करां ये कने कई लोक अच्छी भावना ते प्रेरित हुईने मसीह रा प्रचार करां ये। 16 ये लोक प्यारा रे कारण येदा करां ये कांभई ये जाणां ये भई परमेश्वरे खुश खबरिया रा बचाव करने रे खातर ई मिन्जो इत्थी रखीरा। 17 पर कुछ होर लोक त सच्चाईया ने नीं, बल्कि स्वार्था ने भरीरी इच्छां ते मसीह रा प्रचार करां ये कांभई ये सोचां ये भई इसते सै जेला च मेरे खातर दुख पैदा करी सकां ये। 18 पर इसते कोई फर्क नीं पौन्दा, जरूरी त ये आ भई इक्की ढंगा ने या दूजे ढंगा ने, चाहे बुरा मकशद हो, चाहे भला प्रचार त मसीह रा ई हुआं कने इसते मिन्जो खुशी मिलां ई कने खुशी मिलदी ई रहणी।

जिन्दा रहणा मसीह आ

19 कांभई हऊं जाणां भई तुहां रियां प्रार्थनां रे जरिये कने तिसा सहायता ते, सै जे यीशु मसीह रिया आत्मा रे दाना ते मिलां ई, इसरा फल मेरा उद्धार हुणा। 20 मेरी ये बड़ी इच्छा कने आस येई हाई कने मिन्जो इसरा विश्वास आ भई मांह किसी बी गला ते निराश नीं हुणा बल्कि पूरे हौसले ने तियां जे मेरे

शरीरा ते मसीह री महिमा हमेशा हुन्दी रेई, तियां ई अग्गे बी हुन्दी रहणी; चाहे हऊं जीऊं या मरी जाऊं। 21 कांभई मेरे खातर जिन्दा रहणा मसीह आ, कने मरने रा मतलब लाभ आ। 22 पर जे हऊं अपने इस शरीरा तेई जिन्दा रऊं, तां इसरा मतलब ये हुणा भई हऊं अपने कर्मा रे फला रा मजा लेऊं; तां हऊं नीं जाणदा भई किसजो चुणुं। 23 कांभई मिन्जो दूई रे बिच चुनाव करने च कठिनाई हुई करां ई। हऊं अपणिया जिन्दगिया ते विदा हुईने मसीह ले जाणा चाँह, कांभई सै बहुत ई अच्छा हुणा। 24 पर शरीरा सौगी मेरा इत्थी रहणा तुहारे खातर होर बी जरूरी आ। 25 इस खातर भई मिन्जो इसरा भरोसा हाया भई मांह इत्थी रहणा कने तुहां सारयां री आत्मिक उन्नति कने विश्वासा ते पैदा हुणे औलिया खुशिया रे खातर तुहांने सौगी रहन्दे ई रहणा; 26 कने सै जे गर्व तुहें मेरे बारे च करां ये, सै मेरे भी तुहांले औणे ते मसीह यीशुये ते होर जादा बधी जाओ।

27 सिर्फ इतना करा भई तुहांरा चाल-चलन मसीह रिया खुशखबरिया रे लायक हो भई चाहे हऊं तुहांजो आईने देखूँ, चाहे तुहांते दूर रऊं, तुहारे बारे च येई सुणुं भई तुहें इक्की आत्मा च मजबूतिया ने टिकीरे, कने इक मन हुईने खुशखबरिया ते पैदा हुईरे विश्वासा रे खातर इक जुट रेईने मेहणत करी करां ये, 28 कने हऊं ये बी सुणना चाँह भई तुहें अपने दुश्मनां ते कियां बी नीं उरदे, तुहांरा ये हौसला तिन्हांरे खातमे रा सबूत आ, कने येई सबूत आ तुहां रिया मुक्तिया रा कने परमेश्वरा रिया तरफा ते येदा ई कित्या जाणा। 29 कांभई मसीह रिया तरफा ते तुहांजो न सिर्फ विश्वास करने रा पर तिसरे खातर मुसीबतां झेलणे रा बी खास अधिकार दित्तिरा; 30 तुहें जाणां ये भई तुसें तिसा ई मेहणता च जुटीरे तिसा च जे हऊं जुटीरा था, तियां जे भई तुहें सुणां ये अज्जा तक हऊं तिसच ई लगीरा।

मसीह री दीनता कने महानता

2 फेरी तुहां लोकां जो जे मसीह च कोई उत्साह, कने प्यारा ते पैदा हुईरी कोई शान्ति हाई, जे आत्मा च कोई भागीदारी कने स्नेह री कोई भावना कने सहानुभूति हाई, 2 तां मेरी ये खुशी पूरी करा भई इक मन रौआ, इक जेआ प्यार करा, आत्मा च एका रखा, कने इक जेआ ई लक्ष्य रखा। 3 हिरख कने घमण्डा ने कुछ बी मता करदे, बल्कि नम्र बणा कने दूज्यां जो अप्पू ते खरा समझा। 4 तुहां चते हर इक्की जो चाहिये भई सिर्फ अपना ई नीं, बल्कि दूज्यां रे हितां रा बी ध्यान रखो। 5 तेदा जे यीशु मसीह रा स्वाभाव था तुहांरा स्वाभाव बी तेदा ई होणा चाहिन्दा;

6 सै जे अपने रूपा च साक्षात परमेश्वर था, पर तिने परमेश्वरा रे बराबर होणे जो अपने बशा च रखणे री कोई चीज नीं समझया।

7 बल्कि तिने त अपना सब कुछ त्याग करीने इक सेवका रा रूप ग्रहण करीलिया कने माहुआं रे बराबर बणिया,

कने ताहली जे सै अपने बाहरले रूपा च माहुआं साई बणिया।

8 तां तिने अप्पू जो दीन करीलिया कने इतना आज्ञाकारी बणिया भई अपने प्राण तक देईते कने क्रूसा री मौत बी सैई ली।

9 इस खातर परमेश्वरे बी तिस्सो उच्चिया ते उच्चिया जगह पर बठाळया कने तिस्सो सै नौं दिल्या सै जे सारे नौवां ते ऊपर आ।

10 ताकि सब कोई ताहली जे यीशुये रे नौवा जो लेन्दे हुये सुणो, तां सै घुटने रे भार झुकी जाओ, चाहे सै स्वर्गा रे हो, चाहे जमीना परा रे हो, चाहे जमीना रे थले रे हो।

11 कने हर इक जीभ पिता परेशरा री महिमा रे खातर स्वीकार करे भई यीशु मसीह ई प्रभु आ।”

संसार च जोति सद्व्र चमको

12 इस खातर मेरे प्यारयो, तुहें मेरे हुक्मां रा तियां जे तिस वगत पालन करी करां थे ताहली जे हऊं तुहां कने था, हुण ताहली जे भई हऊं तुहां कने नीं आ तां तुहें होर जादा लगना ने तिन्हांरा पालन करा। परमेशरा रे प्रति सारे आदर भावा ने अपणे उद्धारा जो पूरा करने रे खातर तुहें लोक काम्म करदे जावा। 13 कांभई सै परमेशर ई हाया सै जे तिन्हां कम्मा री इच्छा कने तिन्हांजो पूरा करने रा काम्म, सै जे परमेशरा जो खरे लगां ये, तुहांच पैदा करां। 14 बिणा कोई शकैत या लडाई झगडा कित्ते सारे काम्म करदे रौआ। 15 ताकि तुहें भोले-भाले कने पवित्र बणी जाओ, कने इस टेडे-मेडे कने अडियल लोकां रे बिच परमेशरा रे निर्दोष पुत्र बणी जावा, तिन्हांरे बिच तुहें जिन्दगिया रा वचन लेईने संसार च बळदे दीपकां साई दिस्सया करां ये 16 भई ताहली जे तुहें तिन्हांजो जिन्दगी देणे औळी खुशखबरी सुणवा यें, तां तुहें येदा ई करदे रौआ ताकि मसीह रे फेरी भीं ते वापिस औणे रे दिन, हऊं ये देखीने भई मेरिया जिन्दगिया री दौड-धूप बेकार नीं गई, तुहां पर गर्व करी सक्क। 17 जे मिन्जो तुहांरे विश्वास रुपी बलिदाना कने सेवा सौगी अपना खून बी बहाणे पौ तां बी मिन्जो खुशी हुणी, कने तुहां सब्बी सौगी मौज करां। 18 इयां ई तुहें बी खुश रौआ कने मेरे सौगी मौज करा।

तीमुथियुस कने इफ्फुउदीतुस

19 प्रभु यीशुये रिया सहायता ने मिन्जो तीमुथियुस जो तुहांले जल्द भेजणे री इच्छा ई ताकि तुहांरेआं समाचारां ते मेरा होंसला बी दुगणा हुई जाओ। 20 कांभई कोई दूजा येदा आदमी नीं आ तिसरी भावनां जे मेरे साई हो कने सै जे तुहांरे कल्याण रे खातर सच्चे मना ने चिन्ता करदा हो। 21 कांभई होर सारे अपणे-अपणे कम्मां च लगीरे, यीशु मसीह रे कम्मां च कोई नीं लगीरा। 22 तुहें तिसरे चरित्रा जो जाणां ये भई खुश खबरिया रे प्रचारा च मेरे सौगी तिने तियां ई सेवा कित्तिरी, तियां जे इक वेटा अपणे पिते सौगी करां। 23 इस खातर तियां जे ये पता चलगा भई मेरने क्या कुछ हुई करां, हऊं तिस्सो तुहांले भेज्नी देणे री उम्मीद रखां। 24 कने मेरा विश्वास आ भई प्रभुये रिया सहायता ने मांह बी छोडचा ने औणा।

25 हऊं ये जरुरी समझां भई इफ्फुउदीतुस जो तुहांले भेज्जू सै जे मेरे भाईये सौगी काम्म करने औळा, कने साथ देणे औळा बीर आ, कने मिन्जो जरुरत पौणे पर मेरी सहायता करने रे खातर तुहांरा दूत आ। 26 कांभई तिसरा मन तुहां सब्बीं च लगीरा था, इस कारण सै ब्याकुल रैयां था, कांभई तुहें तिस रिया बिमारिया रा हाल सुणया था। 27 हॉ, सै बीमार त था, कने सै बी इतणा भई तियां जे मरने ई औळा था, पर परमेशरे तिस पर अनुग्रह कित्या न सिर्फ तिस पर बल्कि माह पर बी ताकि मिन्जो दुखा पर दुख नीं मिलो। 28 इस खातर मैं तिस्सो भेजणे री होर बी जादा कोशत कित्ति भई ताहली जे तुहें तिसजो देखो तां इक बार भीं खुश हुई जाओ कने मेरा दुख घटि जाओ। 29 इस खातर तुहें प्रभु च तिसरा बडिया खुशिया ने स्वागत करा कने येदे लोकां रा बडा आदर करदे रौआ। 30 कांभई मसीह रे कम्मां खातर सै तकरीबन मरीगरा था ताकि तुहांरे जरिये कित्ति रिया मेरिया सेवा च सै कमी जे रई गरी थी, तिस्सो सै पूरा करी दो, इसरे खातर तिने अपणे प्राणां री बाजी लगाईती।

सच्ची धार्मिकता

3 इस खातर मेरे भाईयो, प्रभु च मौज मनान्दे रौआ। तुहांजो भीं बार-बार तिन्हां ई गलां जो लिखदे रैहणे ते मिन्जो कोई दुख नीं हुन्दा कने तुहांरे खातर त ये सुरक्षित ई हाया। 2 इन्हां कुत्तयां ते साबधान रौआ, सै जे बुरयां कम्मां च लगीरे रैं। तिन्हां बुरयां कम्मां जो करने औलायां ते साबधान रौआ। 3 कांभई सच्चे खतने औळे माहू त अहें सै जे अपनी उपासना जो परमेशरा रिया आत्मा रे जरिये अर्पित करां ये, कने मसीह यीशुये पर गर्व करां ये, कने शरीरा पर भरोसा नीं रखदे। 4 पर हऊं त शरीरा पर बी भरोसा करी

सकां। पर जे कोई होर इयां सोचे तां हऊं तिसते बी बधीने रक्खी सकां। 5 ताहली जे हऊं अड्डां दिनां रा था, मेरा खतना करीत्या था। हऊं इस्राएली आ, हऊं बैजमिन रे गोता रा; हऊं इब्रानी माता-पिता ते पैदा हुईरा इक इब्रानी आ; तित्थी तक जे व्यवस्था रे विधाना तक मेरी पहुँचा रा स्वाल आ, हऊं इक फरीसी आ। 6 तित्थी तक जे मेरिया निष्ठा रा स्वाल आ, हऊं कलीसिया जो बडा सताणे औळा था, तित्थी तक जे धार्मिकता रा स्वाल आ, तिस्सो जे व्यवस्था रा विधान सखां, हऊं निर्दोष था। 7 पर ताहली सै जे मेरा फायदा था, आज तिसजो ई मसीह रे खातर हऊं अपना नुकसान समझां था। 8 इसते बी बड्डी गल्ल येई भई हऊं अपणे प्रभु यीशुये रे ज्ञाना री श्रेष्ठता रे कारण आज तक सबी किछी जो कूडा समझां था। तिसरे ई खातर मैं सबी किजिरा त्याग करीत्या, कने हऊं सबी किजि जो नफरता री चीजां समझणे लगया ताकि मसीह जो पाई सक्क। 9 कने तिसच पाया जाई सक्क; मेरिया तिसा धार्मिकता रे कारण नीं सै जे व्यवस्था रे विधाना पर टिकीरी थी, बल्कि तिसा धार्मिकता रे कारण सै जे मसीह च विश्वास रे कारण ई, कने परमेशरा रिया तरफा ते विश्वास करने पर मिलां ई; 10 हऊं मसीह जो जाणना चाँह कने तिसा शक्तिया रा अनुभव करना चाँह तिसते जे सै मरने ते बाद दोबारा जिन्दा होणा हुया था। हऊं तिसरे दुक्खां रा बी हिस्सेदार होणा चाँह, कने तिस ई रुपा जो पाणा चाँह तिस्सो जे तिने अपणिया मौती रे जरिये पाया था। 11 इसा आसा ने भई हऊं बी इस तरीके ने मुईरेआं च ते उड्डीने दूजी बार भीं ते जिन्दगिया जो पाई सक्क।

निशाणे रिया तरफौ दौडना

12 येदा नीं आ भई हऊं अपनी उपलब्धि पाई चुक्या या हऊं पूरा ई सिद्ध बणी चुक्यीरा। पर हऊं तिसा उपलब्धिया जो पाणे रे खातर लगातार कोशिश करीरा तिसरे खातर मसीह यीशुये हऊं बन्धक बनाया था। 13 मेरे भाईयो, हऊं ये नीं सोचदा भई हऊं तिसजो पाई चुक्यीरा, पर गल्ल येई भई बीति रियां गलां जो भुलीने, सै जे मेरे सामणे आ, तिस लक्ष्य तक पुजणे रे खातर हऊं संघर्ष करदा रैयां। 14 हऊं तिस लक्ष्य रे खातर लगातार कोशिश करदा रैआं भई हऊं अपणे तिस इनामा जो पाई सक्क, तिस्सो जे मसीह यीशुये च पाने खातर परमेशरे अहांजो उपर सद्व्या। 15 ताकि तिन्हां लोकां रा, सै जे अहां चते सिद्ध पुरुष बणी चुक्यीरे, येई विचार रखां, पर जे तुहें किसी गलां जो किसी होर तरीके ने सोचां यें, तां परमेशरा तिस्सो बी तुहां पर परगट करना। 16 तिसा सच्चाईया तक जे अहें पुज्नी चुक्यीरे, अहांजो तिस पर चलदे रैहणा चाहिन्दा।

17 हे भाईयो, तुहें सारे मिलीने मेरे पिछे चला, सै उदाहरण जे अहें तुहांरे सामणे रखीरा, तिसरे मुताबिक सै जे जीआं ये, तिन्हां पर ध्यान देवा। 18 कांभई येदे बी मते सारे लोक ये सै जे मसीह रे क्रुसा ते नफरत करदे हुये जीं ये (मैं तुहांजो कई बार दस्सया कने हुण बी हऊं ये बिलखी-बिलखी ने बोली रां) 19 तिन्हांरा नाश तिन्हारी नीयत ई, तिन्हांरा पेट ई तिन्हांरा ईश्वर आ, कने तिस पर जे तिन्हांजो शर्म औणी चाहिन्दी, तिस पर सै गर्व करां ये। तिन्हांजो सिर्फ संसारिक चीजां री चिन्ता ई। 20 पर अहांरी जन्मभूमि त स्वर्गा ची, तित्थीते ई अहें अपणे मुक्तीदाता प्रभु यीशु मसीह रे औणे री बाट देखी रांये। 21 अपनी तिसा शक्तिया रे जरिये तिसाते जे सारियां चीजां जो सै अपणे बशा च करी लेआं, अपणे कमजोर शरीरा जो बदलीने अपणे दिव्य शरीरा साई बणाई देणा।

4 इस खातर हे मेरे भाईयो, तुहें मेरी खुशी ये, मेरा गौरव ये, तुहांजो तियां जे मैं दस्सया, प्रभु च तुहें तियां ई मजबूत बणीने रौआ।

ब्यवहारिक निर्देश

2 हऊं यूओदिआ जो बी कने सुन्तुखे जो बी समझां, भई सै प्रभु च इक मन हुईने रौआ। 3 मेरे सच्चे साथी तुहाने बी मेरी विनती भई इन्हां जनानां री मदद करयां, ये क्रैमेंस कने मेरे दूजे साथियां समेत खुशखबरी फैलाणे च मेरे सौगी जुटी रियां रैईयां, इन्हांरे नीं जिन्दगिया री कताबा च लिखिरे।

4 प्रभु च हमेशा मौज करदे रौआ; हऊं फेरी भीं बोलां, मौज करा। 5 तुहांरी सहनशील आत्मा रा ज्ञान सारयां लोकां च हो, प्रभु नेडे ई हाया। 6 किसी बी

गल्ला री चिन्ता मता करदे; पर हर इक गल्ला च धन्यवादा सौगी प्रार्थना कने विनतिया ने अपणी हाजरी परमेशरा रे सामणे रखदे जावा। 7 इसते परमेशरा रिया तरफा ते मिलणे औळी शान्ति, सै जे समझा ते परे ई तुहारे मना जो कने तुहारे विचारां जो मसीह यीशुये च सुरक्षित बणाईने रखगी।

8 इस खातर हे भाईयो, तिन्हां गल्लां रा ध्यान करा सै जे सच्चिआं ईयां, कने सै गल्लां जे आदर रे लायक ईयां, कने सै जे ठीक ईयां, कने सै जे पवित्र ईयां, सै जे खुशी देणे औळियां ई, सै जे सराहना रे लायक ईयां, यनिके कोई बी होर गुण या प्रशंसा री गल्लां ईयां तिन्हां पर ध्यान लगाया करा। 9 सै गल्लां जे तुहें माहते सिखियां, पाईयां या सुणियां या तिसजो करदे हुये मिन्जो देख्या, तिन्हां गल्लां रा पालन करदे रैया करा, तां परमेशरा रिया शान्तिया रा सोता तुहारे सौगी रहणा।

दाना रे खातर धन्यबाद

10 तुहें पक्का मेरिया भलाईया रे खातर सोचां थे पर तुहांजो तिस्सो दस्सणे रा मौका नीं मिलया था, पर हुण आखिरकार तुहांच मेरे बारे च भीं ते चिन्ता जागी ई, इसते हऊँ प्रभु च बड़ा भरी खुश हुया। 11 किसी जरूरता रिया वजह ने हऊँ ये नीं बोली करा, काँभई हऊँ चाहे केढिया बी हालता च रहूँ; में तिसच ई सन्तोख करना सिक्खी लरा। 12 हऊँ दीन होणा बी जाणा कने बधणा बी जाणा; हर इक गल्ला कने हर इक हालातां च हऊँ तृप्त होणा, भूकरा रहणा, कने बधणा-घटणा सिखां। 13 सै जे मिन्जो शक्ति देआं, तिसरे जरिये हऊँ सारयां हालातां रा सामणा करी सकां।

14 किछ बी हो तुहें मेरे दुक्खां च मेरा हात्थ बटाईने खरा ई कित्या। 15 हे फिलिप्पियो, तुहें त जाणां ये खुशखबरिया रे प्रचारा रे तिन्हां शुरु रे दिनां च ताहली जे में मकिदुनिया छड्डया था, तां लेणे-देणे रे बारे च सिर्फ तुहां रिया कलीसिया जो छड्डुने किसी होर कलीसिये मेरा हात्थ नीं बताया था।

16 ताहली जे हऊँ थिस्सलुनिके च था, मेरी जरूरतां पूरी करने रे खातर तुहें बार-बार मेरी मदद कित्ति। 17 येदा नीं आ भई हऊँ उपहारां रा इच्छुक आ, बल्कि हऊँ त येह चाँह भई तुहारे खाते च फायदा जुडवा ई जाओ। 18 तुहें इपफ्रुदिस रे हत्था सै उपहार सै जे सुख देणे औळी खुशबु भेंटा रे रुपा च मेरले भेज्जी, सै इक येदा स्वीकार करने लायक बलिदान आ, तिसते जे परमेशर खुश हुआं। इन्हां उपहारां रे कारण मेरले जरूरता ते कई मान जादा हुईगरा, मिन्जो मता दित्तिरा, बल्कि तिसते बी जादा दित्तिरा। 19 मेरा परमेशर बी अपणे तिस धना रे अनुशार सै जे महिमा समेत मसीह यीशु चा, तुहांरी सारी जरूरतां जो पूरी करगा। 20 अहारे परमेशर कने पिते री महिमा युगां-युगां तक हुन्दी रौ। आमीन।

अन्तिम नमस्कार

21 यीशु मसीह रे हरेक पवित्र माह्ये जो नमस्कार बोला। सै जे भाई मेरने आ, तुहांजो नमस्कार बोलां ये। 22 सारे पवित्र लोक, खास करीने सै जे कैसर रे घराने रे, तुहांजो नमस्कार बोलां ये। 23 तुहां चते हर इक्की पर अहारे प्रभु यीशु मसीह रा अनुग्रह तुहां रिया आत्मा सौगी रौये।

कुलुस्सियां

अभिवादन

1 पौलुस सैं जे परमेशरा रिया मर्जीया ते यीशु मसीह रा प्रेरित आ, तिसरी कने अहारे भाई तिमथियुस रिया तरफा ते, 2 मसीह च तिन्हां पवित्र कने विश्वासी भाईयां रे नौं सैं जे कुलुस्से च रैयाये: अहारे पिता परमेशरा रिया तरफा ते तुहांजो अनुग्रह कने शान्ति मिलदी रौ।

धन्यवाद री प्राथना

3 ताहली जे अहें तुंहारे खातर प्रार्थना करां ये, हमेशा अपणे प्रभु यीशु मसीह रे पिता परमेशरा रा धन्यवाद करां ये, 4 कांभई अहें सुणीरा भई यीशु मसीह पर तुहांरा विश्वास आ, कने सारे पवित्र लोकां ने तुहें प्यार करां ये; 5 ये तिसा आशा रे कारण हुया सैं जे तुंहारे खातर स्वर्गा च रखीरी, कने तिसरे बारे च तुहें पैहले ई सच्चिया खुशखबरिया रे जरिये सुणी चुकीरे, 6 खुशखबरी सारे संसारा च फैली करां ई, ये तियां ई सफल हुई राई तियां जे तुंहारे बिच ये तिस वगत तेई फैलणे लगी थी, ताहली जे तुहें परमेशरा रे अनुग्रह रे बारे च सुणया था कने सच्चमुच तिसजो समझया था। 7 तिसरी शिक्षा तुहें अहारे प्यारे साथी इपफ्रास ते लेई, सैं जे अहारे खातर मसीह रा विश्वासी सेवक आ। 8 तिने ई तुंहारे प्यारा जो सैं जे आत्मा चा अहां पर परगट कित्या।

9 इस खातर तिस दिना ते जे अहें इसरे बारे च सुणया, अहें बी तुंहारे खातर प्रार्थना करना कने ये विनती करना नीं छडुया: भई तुहें सारे आत्मिक ज्ञाना कने समझा समेत परमेशरा रिया इच्छा री पैहचाणा च परिपूर्ण हुई जवा, 10 ताकि तुहांरा चाल-चलन प्रभु रे लायक हो, कने सैं हर तरफा ते खुश रौ, कने तुहां च हर तरह रे भले कम्मां रा फळ लगे, कने तुहें परमेशरा रिया पहचाणा च बधदे जाओ, 11 सैं तुहांजो अपनी महिमा ते भरीने शक्तिया च मजबूत बणान्दा जाओ, ताकि मसीबता रे वगत खुशिया ने कने बड़े धैर्य सौगी कने शहनशीलता ने तुहें सब सही लो, 12 कने तिस परम पिते रा धन्यवाद करा, तिने जे तुहांजो जोतिया रे लैक बणाया भई परमेशरा रे तिन्हां पवित्र लोकां सौगी तुहें बारस बणने च हिस्सेदार हुई सक्रो। 13 तिने ई अहांजो अन्धकारा रे वशा ते छडवाईने अपणे प्यारे पुत्रा रे राजा च प्रवेश करवाया, 14 तिस पुत्रा रे जरिये ई अहांजो छुटकारा मिलया, यनि अहांजो अहारे पापां री माफी मिली।

मसीह री महानता कने तिसरे काम्म

15 सैं त नीं दिखणे ओळे परमेशरा रा दिसणे ओला रूप आ, कने सैं सारिया सृष्टिया च जेठा हुआ। 16 कांभई सैं जे किछ स्वर्गा चा कने धरतिया परा, सैं सब किछ तिस रिया ई शक्तिया ने पैदा हुया यनि पृथ्विया रे देखी या अणदेखी, चाहे संघासण हो चाहे राज, चाये कोई राजा हो, कने चाहे अधिकारी, सारा किछ तिसरा इ हाया कने तिसरे ई खातर रचीरा। 17 सारियां चीजां च सैंई पैहला, कने तिस रिया ई शक्तिया ने सारी चीजां बणीरी रैईयां। 18 सैंई शरीर, यनिके कलीसिया रा सिर सैंई हाया, सैंई आरम्भ आ कने मूर्इरेआ जो भीं ते ज्युन्दा करने ओळा सब्बीं ते बड्डा प्रधान बी सैंई हाया, ताकि हरेक गल्लां च पैहला स्थान तिसजो ई मिलो। 19 कांभई पिते री खुशी इसच ई हाई भई सारी परिपूर्णता तिसच बास करे। 20 तिसरे ई जरिये सारे ब्रह्माण्डा जो परमेशरे खुद अपणे ते दोबारा मळाणा चाह्या-तिन्हां सब्बीं जो सैं जे धरतिया रे कने स्वर्गा रे, तिस ई खूना रे जरिये परमेशरा ने मलाप करवाया तिसजो जे मसीहे कूसा पर बहाया था।

21 इक वगत था ताहली जे तुहें अपणे बचारां ने कने बुरे कम्मां रिया बजह ने परमेशरा रे खातर अणजाण कने तिसरे बैरी थे। 22 पर हुण तां जे मसीह अपणे संसारिक शरीरा च था, तां मसीह रिया मौती रे जरिये परमेशरे तुहांरा बी मेल करीलया, ताकि तुहांजो अपणे सामणे पवित्र, निश्कलंक, कने निर्दोष बणाईने हाजर कित्या जाओ। 23 ये ताई हुई सक्कां तां जे तुहें अपणे विश्वासा च मजबूतिया ने टिकीरे रौ, कने खुशखबरिया रे जरिये दित्ति रिया तिसा आसा रा त्याग नीं करी दो, तिसजो जे तुहें सुणया। इस अम्बरा हेठ हरेक प्राणिये जो तिसरा उपदेश दित्तिरा, कने हऊँ पौलूस तिसरा ई सेवक बणीरा।

कलीसिया रा सेबक-पौलुस

24 हुण देखा, हऊँ तुंहारे खातर दुख सैयां, तिन्हांच खुशिया रा अनुभव करां, कने मसीह रा शरीर, यनिके कलीसिया रे खातर मसीह रे दुखां च सैं किछ जे कमी रैईगरी थी, तिसजो अपणे शरीरा च पूरा करां। 25 परमेशरे तुंहारे फायदे रे खातर मिन्जो सैं जे हुक्म दित्या था तिसरे मुताबिक हऊँ तिसरा इक सेवक बणया, ताकि हऊँ परमेशरा रिया खुशखबरिया रा पूरी तरह ने प्रचार करूँ। 26 यनिके तिस भेदा जो सैं जे आदिकाला ते कने पीढीयां ते छिपिरा था, पर हुण परमेशरा रे पवित्र लोकां पर परगट हुया। 27 तिन्हां पर जे परमेशरे परगट करना चाह्या भई सैं जाणी जाओ भई गैर-यहूदियां च तिस भेदा री महिमा री कीमत क्या ई, कने सैं ये आ भई मसीह सैं जे महिमा री आस ई तुहां च रैयां। 28 तिसरा प्रचार करीने अहें हर इक माहुये जो साबधान करां ये कने सारे ज्ञाना ते हरेक माहुये जो सखां ये, भई अहें हरेक माहुये जो मसीह च सिद्ध करीने हाजर करे। 29 इसरे ई खातर हऊँ तिस रिया तिसा शक्तिया रे मुताबिक सैं जे मांह च सामर्थाने प्रभाव पाई, तन-मन लाईने मेहणत करी करां।

2 हऊँ चाँह भई तुहांजो इसा गल्ला रा पता लगी जाओ भई तुंहारे खातर लौदिकिया रे रैहणे ओळ्यां रे तैई कने तिन्हां सब्बीं रे खातर सैंजे आमतौर पर मांहने कर्दी नीं मिले, कितणी कठण मेहणत करी करां, 2 ताकि तिन्हांरे मनां जो शान्ति मिली जाओ कने सैं अपूँ चिये प्यारा ने बड़ी जाओ, कने विश्वासा रा सैं सारा धन सैं जे सच्चे ज्ञाना ते मिलां, तिन्हांजो मिली जाओ कने परमेशरा रे छुपीरे भेता री सच्चाईया जो सैं पाई लो, तिसरी सच्चाई जे खुद मसीह आ। 3 तिसच जे बुद्धी कने ज्ञाना रे सारे भण्डार छुपीरे। 4 येदा हऊँ इस खातर बोलीरां भई कोई तुहांजो अपनी मिठी-मिठी गल्लां ने धोखा नीं देई दो। 5 कांभई शरीरा च हऊँ तुहांते दूर हुई सक्कां, पर आत्मा च तुंहारे नेड़े आ दूर नीं आ, हऊँ तुहां रिया जिन्दगिया रे मुताबिक कने मसीह च तुंहारे विश्वासा रिया मजबूतिया जो देखीने खुश आ।

मसीह च जीबना री भरपूरी

6 इस खातर तियां जे तुहें यीशुये जो मसीह कने प्रभुये रे रुपा च ग्रहण कित्या, तुहें तिसच तियां ई बणीने रौआ, 7 कने तिस ची जड पकडदे कने बधदे जावा; कने तियां जे तुहें सखाईरे, तियां ई विश्वासा च मजबूत हुन्दे जाओ, कने परमेशरा रा मते ते मता धन्यवाद करदे रौआ।

8 ध्यान रक्खा, भई तुहांजो अपणे तिस संसारिक ज्ञाना ने कने खोखले प्रपंचा ने कोई धोखा नीं देई दो सैं जे माहुआं रियां बणाई री परम्परा ते कने संसारा रिया आदि शिक्षा रे मुताबिक त हाया, पर मसीह रे मुताबिक नीं आ। 9 कांभई परमेशर अपनी सम्पूर्णता ने शरीरा सौगी तिसच बास करां। 10 कने तुहें तिस ची भरीने परिपूर्ण हुईये, सैं हरेक शासका कने अधिकारियां ते बी

उपर आ। 11 तिस ची तुहांरा येदा खतना हुया, सै जे माळुआं रे हत्थां ते नी हुन्दा, यनिके मसीह रा खतना, तिसते जे शारीरिक देह त्वारी दित्ति जाई, 12 ये इस खातर हुया भई ताहली जे तुहांजो वपतिस्मे च तिसरे सौगी गड्डी त्या तां तिस परमेशरा रे कम्मा च तुहारे विश्वासा रिया वजह ने, तिस सौगी तुहांजो बी भीं ते ज्युन्दा कित्या गया। 13 तिने तुहांजो बी, सै जे अपणे अपराधां कने अपणे शरीरा री बगैर खतने रिया दशा च मुडदा थे, कने परमेशरे तिस सौगी अहांजो जिन्दा कित्या, कने अहांरे सारे अपराधां जो माफ कित्या, 14 कने विधियां रा ये लेख सै जे अहांरे नौवा पर कने अहांरे बरोधा च था अहांरे बिच्चा ते हटाईत्या, तिने तिस्सो मेक्खां ने कूसा पर जडीने मटाईत्या। 15 परमेशरे कूसा रे जरिये अध्यात्मिक शासकां कने अधिकारियां जो उपरा ते त्वारिने तिन्हांरा खुल्लेआम तमाशा बणाया कने अपणे विजय अभियाना च बंदियां रे रुपा च अपणे पिछे-पिछे चलाया।

16 इस खातर खाणे-पीणे री चीजां यनिके पर्वां या नये चांद रे त्योहारां या सब्ब रे दिनां जो लेईने कोई तुहांरी अलोचना न करो। 17 कांभई ये सारी औणे औळी गल्लां री छाया ई, पर इसा छाया री सच्ची काया त मसीह री हाई। 18 कोई माळु सै जे खुद अप्पू जो प्रताडित करने रे कम्मां या स्वर्गदूतां री पूजा रे कम्मां च लगीरा हो, तिस्सो तुहांजो तुहारे फळां जो पाणे च अडचण नीं बणने देणा चाहिन्दा, येदा आदमी हमेशा ई तिन्हां दिव्य दर्शनां री डींग मारदा रैयां तिन्हांजो जे तिने देखीरा कने अपणी संसारिक सोच्चा रिया वजह ने झूठे घमण्डा ने भरीरा रैयां। 19 सै खुद अप्पू जो मसीह रे अधीन नीं रखदा सै जे सब्बीं ते खास आ, तिसते जे सारी देह जोडां कने नसां रे जरिये पालण-पोषण पाईने कने इक साथ गठोईने, परमेशरा रिया तरफा ते बढ़दी जाईयां।

मसीह सौगी मरना कने जीणा

20 कांभई तुहें मसीह रे सौगी मरी चुक्कीरे कने तुहांजो संसारा री बुनियादी शिक्षां ते छुटकारा दवाईतरा, तां इस तरीके रा बर्ताव कजो करां ये, तियां जे भई तुहें इसा दुनियां रे कने येदे नियमां रा पालन करां ये तियां जे, 21 'इसने हात्थ नी लावा,' 'इसजो मता चखदे,' या 'इसजो मता छुन्दे? 22 ये सारियां चीजां त कम्मां च औन्दे-औन्दे खत्म हुणे रे खातर ईयां, कांभई ये माळुआं रियां आज्ञां कने शिक्षां रे मुताबिक आ। 23 मनमानी पूजा अपणे शरीरा जो प्रताडित करने कने अपणिया काया जो दुख देणे रे भौआ ते ज्ञाना ने जुडीरा त हाया, पर शरीरा रियां इच्छां जो रोकणे च इसते किछ बी फायदा नी हुन्दा।

3 कांभई जे तुहांजो मसीह ने सौगी मूर्ईरेआं चा ते जिन्दा करीने खडा कित्या तां तिन्हां चीजां रे खातर कौशिश करदे रौआ, सै जे स्वर्गा बिच ईयां तिन्ही जे मसीह परमेशरा रे सज्जे पास्से बैठीरा। 2 स्वर्गा रियां चीजां रे बारे च सोच्चा पर पृथिव्या री चीजां रे बारे च मता सोचदे, 3 कांभई तुहें त मरी चुक्कीरे कने तुहांरा जीवन मसीह सौगी परमेशरा च छिपीरा। 4 ताहली जे मसीह सै जे अहांरा जीवन आ, भीं ते परगट होणा, तां तुहें बी तिस सौगी तिस रिया महिमा च परगट कित्ते जाणे।

पुराणी जिन्दगी कने नौई जिन्दगी

5 इस खातर सै किछ जे तुहां च संसारिक आ, तिसजो खत्म करी देवा, यनिके व्यभिचार, अपवित्रता, वासनां, बुरी इच्छां कने लालच सै जे मूर्तियां री पूजा रे बराबर आ, 6 इन्हां ई गल्लां रिया वजह ने परमेशरा रा कोप आज्ञा नीं मनणे औळ्यां रे उपर पाँवा। 7 कने इक वगत था ताहली जे तुहें बी येदे कर्म करदे हुये इस तरीके रा जीवन जीयां थे। 8 पर हुण तुहें इन्हां सारियां गल्लां यनि गुस्सा, झुंझलाहट, बैर-बरोध, निन्दा-चुगली कने मुँहां ते गन्द-फन्ट बकणा छडी दे। 9 अप्पू चीयें झूठ नीं बोला कांभई तुहें अपणे पुराणे व्यक्तित्व जो तिसरे कम्मां समेत त्वारीने सट्टी चुक्कीरे। 10 कने नौवे व्यक्तित्व जो पैहनीलरा सै जे अपणे रचणे ओळेरु रे रुपा रे मुताबिक परमेशरा रे सारे ज्ञाना जो पाणे खातर नौवा बणदा जां। 11 तिसच नां त यूनानी रैया, नां यहूदी, नां खतना, नां खतने ते बगैर, नां जंगली कने बर्बरा च, नां दास कने इक अजाद

माळुये च कोई फर्क आ: सिर्फ मसीह सब कुछ आ कने सारे विश्वासियां च तिसरा ई वास आ।

12 कांभई तुहें परमेशरा रे चुणीरे पवित्र कने प्यारे लोक ये इस खातर सहानुभूति, दया, नम्रता, कोमलता कने धीरज धारण करा। 13 तुहांजो अप्पू चीयें ताहली जे कर्दी किसी जो कोई दुख तकलीफ हो, तां इक्की दूये री सैहन करी लो कने इक्की दूये रे अपराध माफ करा, तियां जे परमेशरे तुहारे अपराध माफ कित्ते, तियां ई तुहें बी माफ करा। 14 इन्हां गल्लां रे बजाये प्यारा जो पैहना प्यार ई सारयां जो अप्पू चीयें जोडां कने पूरा करां। 15 तुहारे मना पर मसीह ते पाणे औळी शान्तिया रा राज हो, इसरे खातर तुहांजो तिस इक्की शरीरा च सट्टीरा; कने तिसरा सदा धन्यवाद करदे रौआ। 16 मसीह रे वचना जो अपणे दिला च बसणे देवा, कने पूरे ज्ञाना समेत इक्की दूजे जो सखावा कने निर्देश देन्दे रौआ, कने अपणे मना च अनुग्रह सौगी परमेशरा खातर भजन, स्तुती कने आत्मा रे गीत गावा। 17 वचना च या कम्मा च जो किछ बी करो सब प्रभु यीशुये रे नौवा ते करा, कने तिसरे ई जरिये हर वगत पिता परमेशरा जो धन्यवाद देन्दे रौआ।

नईया जिन्दगिया रे पारिबारिक नियम

18 हे पत्नियो, अपणे घराओळेरु रे प्रति ईयां समर्पित हुई जावा तियां जे प्रभु रे चले जो शोभा देआं। 19 हे पत्नियो, अपणिया घराओळिया ने प्यार करा, कने तिन्हांने शख्तयाई नीं करा। 20 हे बालको, सारियां गल्लां च अपणे माता-पिता री आज्ञा रा पालन करा, कांभई प्रभु रे चेलयां रे इस बर्तावा ने परमेशर खुश हुआं। 21 हे पिताओ, अपणे बच्चयां जो कडवाहटा ने मता भरदे किति येदा नीं हो भई सै जतन करना ई छडी दो। 22 हे दासो, अपणे अपणे संसारिक स्वामियां री सारी गल्लां रा पालन करा, सिर्फ लोकां जो खुश करने रे खातर तिस ई वगत नीं ताहली जे सै देखी रांये, बल्कि सच्चे मना ने तिसरी मन्ना, कांभई तुहें प्रभु रा आदर करां ये। 23 सै जे किछ तुहें करां ये, अपणे सारे मना ने करा, मन्ना तुहें तिस्सो लोकां रे खातर नीं बल्कि प्रभु रे खातर करीरां ये। 24 याद रक्खा भई तुहांजो प्रभु ते वारस हुणे रा फळ मिलणा, अपणे स्वामी मसीह री सेवा करदे रौआ। 25 कांभई तिस जे बुरा कर्म करना, तिसजो तिसरा फळ मिलणा ई मिलणा, कने तिसा जगह किसी ने पक्षपात नीं हुणा।

4 हे मालको, तुहें अपणे-अपणे सेबकां ने न्याय कने ठीक-ठीक बर्ताव करा, याद रक्खा स्वर्गा च तुहांरा बी कोई मालक आ।

किछ व्यबहारिक सलाह

2 हमेशा प्रार्थना च लगीरे रौआ, कने ताहली जे तुहें प्रार्थना करो तां हमेशा परमेशरा रा धन्यवाद करदे रौआ; 3 कने इस सौगी अहांरे खातर बी प्रार्थना करा भई परमेशर अहांरे खातर वचन सुणने रा येदा अबसर देई दो, भई अहें मसीह रे तिस भेदा रा बखान करी सक्रो तिस रिया वजह ने जे हऊँ कैदा चा, 4 प्रार्थना करा भई हऊँ इस्सो ईयां परगट करी सकूँ, तियां जे मिन्जो दसणा चाहिन्दा।

5 मौके जो कीमती समझी ने बाहर औल्यां ने समझदारिया ने बर्ताव करा। 6 तुहांरी बोली सदा मीठी रौ कने तिसते जे समझदारिया री छटा बिखरो ताकि तुहें जाणी सक्रो भई किसी माळुये जो कियां जबाब देणा चाहिन्दा।

अन्तिम अभिबादन

7 अहांरा प्यारा भाई, लुखिकुस सै जे इक विश्वासी सेवक आ, कने प्रभु च मेरा साथी आ, मेरी सारी गल्लां तुहांजो दस्सी देन्ना। 8 हऊँ तिस्सो तुहांले इस खातर भेज्जी करां भई तुहांजो तिसते अहांरे हालचाला रा पता चली जाओ कने सै तुहारे दिलां जो शान्ति देओ। 9 हऊँ अपणे विश्वासी कने प्यारे भाई उनेसिमस जो बी तिसने सौगी भेज्जीरां सै जे तुहां च ते इक आ; सै तुहांजो येथी री सारियां गल्लां दस्सी देन्ने।

10 अरिस्तरखुस, सै जे मेरे सौगी कैदी आ, कने बरनाबास रे भाईये मरकुस रा तुहांजो नमस्कार, (तिसरे बारे च तुहें आज्ञा पाई थी भई जे सै दूजे नेडे आओ, तां तिसने ठीक ढंगा ने बर्ताव करयां), 11 युसतुस रे नौवा ते जाणयां

जाणे औळे यीशुये रा बी तुहांजो नमस्कार हो। खतना हुईरे लोकां चते सिर्फ येई परमेशरा रे राजा खातर मेरे सौगी काम्म करने औळे कने ये मेरे खातर शान्तिया री वजह रैये।¹² इपफ्रास रा बी तुहांजो नमस्कार हो, सै जे तुहां चते इक आ कने यीशु मसीह रा सेवक आ, कने सदा तुहांरे खातर लगना ने प्रार्थनां च कोशिश करदा रैयां, ताकि तुहें सिद्ध हुईने पूरे विश्वासा सौगी परमेशरा रिया इच्छा च टिकीरे रौओ।¹³ हऊँ इसरा गवाह भई सै तुहांरे खातर कने लौदीकिया होर हियरापुलिस रे रैहणे औळयां रे खातर हमेशा कड़ी मेहनत करदा रैया।¹⁴ प्यारे बेद लूका कने देमास रा तुहांजो नमस्कार।

¹⁵ लौदीकिया रे भाईयां जो, कने नुमफास कने तिन्हारे घरा री कलीसिया जो नमस्कार बोलणा।¹⁶ ताहली जे ये चिड्डी तुहांरे येत्थी पढी ली जाओ, तां येढा करयां भई लौदीकिया री कलीसिया च बी पढवाया जाये, कने लौदीकिया ते मेरी सै चिड्डी जे तुहांजो मिलो, तिसाजो तुहें बी पढी लेयों।¹⁷ कने अखिर्पुस ते बोलयां भई सै इसा गल्ला रा ध्यान रखो भई प्रभु च सै जे सेवा तिस्सो दित्तिरी, सै तिसजो साबधानिया ने पूरी करी सक्को।

¹⁸ मेरा यनि पौलूसा रा अपणे हत्था रा लिखीरा नमस्कार। याद रखयां हऊँ जेला चा, परमेशरा रा अनुग्रह तुहांने सौगी रौओ। आमीन।

1 थिस्सलुनीकियां

अभिवादन

1 थिस्सलुनीकियां रे परम पिता परमेशर कने प्रभु यीशु मसीह च कलीसिया जो पौलूस, सिलवानुस कने तीमुथियुस रिया तरफा ते: परमेशरा रा अनुग्रह कने शान्ति तुहारे सौगी रओ।

थिस्सलुनीकियां रा बिशवास

2 अहें तुहां सब्बीं रे खातर हमेशा परमेशरा जो धन्यवाद देन्दे रैयें कने अपणी प्रार्थनां च याद करां ये। 3 प्रार्थना करदे हुये अहें सदा तुहारे तिस कम्मा री आद करां ये सै जे फळ आ विश्वासा रा, प्यारा ते पैदा हुईरी तुहारी कठण मेहणता रा, कने अहारे प्रभु यीशु मसीह च आशा ते पैदा हुईरे तुहारे शबरा रा, अहां जो हमेशा ध्यान आ। 4 परमेशरा रे प्यारे लोको कने अहारे भाईयो, अहें जाणां ये भईं तुहें तिसरे चुणीरे। 5 कांभई अहां रिया खुश-खबरिया रा ब्योरा तुहांले सिर्फ शब्दां ची नीं पुज्जीरा, बल्कि सामर्थ कने पवित्र आत्मा कने गहरी शरधा ने पुज्जीरा; तुहें जाणां ये भईं ताहली जे अहें तुहां सौगी थे, तुहारे फायदे रे खातर किस तरीके री जिन्दगी जीआं थे। 6 तुहें बडयां दुख्खां च पवित्र आत्मा ते मिलणे औळियां खुशिया ने खुश-खबरिया जो ग्रहण कित्या कने अहारी कने प्रभुरी चाल चलणे लगे। 7 कने इस खातर मकिदुनिया कने अख्या रे सारे विश्वासियां रे खातर तुहें इक आदर्श बणीगे, 8 कांभई तुहारे येत्थी ते न सिर्फ मकिदुनिया कने अख्या च प्रभु रा वचन सुणाया गया, पर तुहारे विश्वासा री, सै जे परमेशरा पर आ, हर जगह येदी चर्चा फैलीगी भईं अहांजो गलाणे री जरूरत नीं। 9 कांभई सै खुद अहारे बारे च दस्सां ये भईं तुहें अहारा केदा स्वागत कित्या था कने जीवते कने सच्चे परमेशरा री सेवा करने रे खातर, 10 कने स्वर्गा ते तिसरे पुत्रा रे औणे रा इन्तजार करने रे खातर तुहें मूर्तियां री तरफा ते जीवित परमेशरा रिया तरफा जो कियां मुडे थे, पुत्र यनि यीशुये जो तिने मूर्तियां चते भीं ज्युन्दा करीने खडा कित्या, कने सैई परमेशरा रे औणे औळे कोपा ते अहारी रक्षा करां।

पौलूस रे प्रचारा रा काम्म

2 हे भाईयो, तुहें खुद अप्पू जाणां ये भईं अहारा तुहांले औणा बेकार नीं गया, 2 पर तुहें खुद जाणां ये भईं पैहले फिलिप्पी च दुख भोगणे कने उपद्रव सैहणे ते बाद बी अहारे परमेशरे येदी हिम्मत दिति, भईं अहें परमेशरा री खुशखबरी बडे बरोधा रे बाबजूद बी तुहांजो सुणाई सक्रो। 3 कांभई अहें ताहली जे लोकां रा ध्यान अपणे उपदेशां खौं खिजणा चाँये, तां सै इस खातर नीं भईं अहें कोई भटकीरे, कने नां ई इस खातर भईं अहारे मकशद बुरे कने इस खातर बी नीं भईं अहें लोकां जो छळणे रा जतन करां ये। 4 अहें लोकां जो खुश करने री कोशिश नीं करदे बल्कि अहें त तिस परमेशरा जो खुश करां ये सै जे अहारे मना रा भेत जाणां। 5 कांभई तुहें जाणां ये भईं अहें न त कदीं चापलुसिया री गल्लां करदे थे, कने नां ई लालचा रे खातर कोई बहाना करां ये, इसरा परमेशर गवाह। 6 कने अहें मसीह रे चले होणे रिया वजह ने तुहां पर बोझ पाई सक्रां थे, फेरी बी अहें माळुआं ते आदर नीं चाँहन्दे थे, कने न तुहांते, न किसी होरी ते। 7 अहें मसीह रे प्रेरितां रे रुपा च अपणा हक जताई सक्रां थे, पर अहें तुहारे बिच तियां ई नम्रता ने रैये तियां जे इक मौं अपणे बच्चे जो दुध प्याईने तिसरा पालन-पोषण करां ई। 8 अहें तुहारे बारे च तेदिया ई नम्रता रा अनुभव कित्या, इस खातर परमेशरा ते मिली रिया

खुश खबरिया जोई नीं, बल्कि अहें खुद अप्पू जो बी तुहां सौगी बंडी लेणा चाँये, कांभई तुहें अहारे प्यारे बणिगरे।

9 कांभई हे भाईयो, तुहें अहारी कडी मेहणता कने कठिनाईयां जो याद रखा सै जे अहें दिन-रात इस खातर कित्ति ताकि अहें परमेशरा रिया खुश-खबरिया जो सणवान्दे हुये तुहां पर बोझ नीं बणो। 10 तुहें खुद अप्पू गवाह ये, कने परमेशर बी गवाह भईं तुहां विश्वासियां रे प्रति अहें कितणी आस्था, धार्मिकता कने निर्दोषिता रा बर्ताव कित्या। 11 तुहें जाणदे ई हाये भईं तियां जे इक पिता अपणे बच्चयां ने बर्ताव करां, तियां ई अहें तुहां चते हर इक्की जो उपदेश करदे, शान्ति देन्दे, कने समझान्दे थे, 12 भईं तुहारा चाल-चलन परमेशरा रे लायक हो, तिसते परमेशर, तिने जे तुहांजो अपणे राजा कने महिमा च सद्दी ने कित्या, खुश हुआं।

13 कने इस खातर अहें परमेशरा रा धन्यवाद हमेशा करदे रैयें, कांभई ताहली जे तुहें अहांते वचन ग्रहण कित्या, तां तिस्सो माळुआं रिया खुश-खबरिया रे रुपा च नीं, बल्कि परमेशरा रिया खुश खबरिया रे रुपा च ग्रहण कित्या; कने तियां जे सै सच्च आ, कने तुहां विश्वासियां पर तिसरा असर बी आ। 14 इस खातर तुहें, हे भाईयो, परमेशरा री तिन्हां कलीसियां री चाल चलणे लगे सै जे यहूदिया च मसीह यीशुये चीआं, कांभई तुहें बी अपणे लोकां ते तेदा ई दुख पाया तेदा जे तिन्हें यहूदियां ते पाया था, 15 तिन्हें जे प्रभु यीशुये जो मारया कने भविष्यवक्त्यां जो बाहर खदेडीत्या, कने अहांजो सताया, सै परमेशरा जो नीं खुश करदे, कने सै सारे माळुआं रा वरोध करां ये। 16 कने सै गैर-यहूदियां जो खुशखबरिया रा उपदेश देणे च मुश्कल खडी करां ये भईं कित्ति तिन्हां लोकां रा उद्धार नीं हुई जाओ। इन्हां गल्लां ते सै हमेशा अपणे पापां रा घडा भरदे रैयें; पर हुण तिन्हां पर परमेशरा रा कोप पौणे औळा।

कलीसिया ने मिलणे री इच्छा

17 हे भाईयो, तित्थी तक जे अहारी गल्ल ई, अहें थोडे वगता खातर तुहांते बिछडीं गेरे थे, विचारां ते नीं, सिर्फ शरीरा ते, इस खातर अहें तुहांने मिलणे जो बडे उताबले हुईगरे अहारी लालसा बधी गरी। 18 इस खातर अहें इक बार नीं बल्कि दो बार तुहांले औणा चाहा, पर शैताने अहांजो रोकी रख्या। 19 भला दस्सा त अहारी आशा या अहारी मौज या अहारा सै मुकुट जिस पर अहांजो इतणा गर्व आ, सै क्या? क्या सै तुहें ई नीयें, अहारे प्रभु यीशुये रे दबारा औणे पर ताहली जे अहें तिसरे सामणे हाजर हुनो? 20 तां तित्थी तुहें अहारी महिमा कने अहारी मौज हुणे।

तीमुथियुस रा भेज्या जाणा

3 कांभई अहें होर जादा इन्तजार नीं करी सकदे थे इस खातर अहें एथेंस च कल्हे ही रुकणे रा निश्चा करीलिया; 2 कने अहें तीमुथियुस जो, सै जे मसीह रिया खुश खबरिया च अहारा भाई आ कने परमेशरा रा सेवक आ, इस खातर भेज्या भईं सै तुहांजो मजबूत करने कने विश्वासा रे बारे च समझाई सक्रो। 3 ताकि कोई अजकयां इन्हां कलेशां रिया वजह ने विचलित नीं हुई जाओ। कांभई तुहें त जाणां ई हाये भईं अहां जो त कळेशां रेई खातर भेज्जीरा। 4 कांभई शुरु च, ताहली जे अहें तुहांले थे, तुहांने बोलां थे भईं अहां पर कळेश औणे औळे, कने ये ठीक तियां ई हुया बीआ, तुहें त ये जाणदे ई हाये। 5 इस खातर कांभई हऊं होर जादा इन्तजार नीं करी सकदा था, इस खातर मैं तुहारे विश्वासा रे बारे जाणने तिमथियुस जो भेज्या। कांभई मिन्जो

डर था भई किति येदा नीं हो भई इम्तेहान लेणे औळे तुहांरा इम्तेहान लेआ हो, कने अहां रिया मेहणता जो बेकार त नीं करित्या।

तीमुथियुस रे जरिये खुशखबरी मिलणा

6 तीमुथियुस तुहां लते वापस आईने हुण ई अहांले पुज्या कने तिने अहांजो तुहारे विश्वासा कने तुहारे प्यारा री खुशखबरी दिती। तिने अहांजो दस्सया भई तुहांजो अहांरी बडी याद औवांई, कने तुहें अहांने मिलणे जो बडे बेचैन ये, तियां ई तियां जे अहें तुहांने मिलणे जो। 7 इस खातर हे भाईयो, अहांरी सारी पीड़ां कने दुक्खां च तुहारे विश्वासा ते तुहारे बारे च शान्ति पाई। 8 हां, हुण अहें भी साह लेईरां ये कांभई अहें जाणीगे भई प्रभु च तुहें अटल खडीरे। 9 तुहारे बारे च तुहां रिया वजह ने सै मौज जे अहांजो अपणे परमेशरा रे सामणे मिली, तिसरे खातर अहें परमेशरा रा धन्यवाद कियां करिये? 10 अहें रात-दिन बडी प्रार्थना करदे रैये भई किस तरीके ने तुहांरा मुँह भी देखी सको कने तुहारे विश्वासा च सै जे किछ कमी रैईगरी तिसजो पूरा करीये।

11 अहांरा परम पिता परमेशर कने अहांरा प्रभु यीशु तुहांले औणे जो अहांजो रस्ता दस्सो; 12 कने प्रभु येदा करो भई तियां जे अहें तुहांने प्यार रक्खां ये, तियां ई तुहांरा प्यार बी इक्की दूये ने कने सारे माहुआ सौगी बधो, कने उमडदा रौओ, 13 ताकि सै तुहांरयां दिलां जो मजबूत करो कने तिन्हाजो अहारे परम पिता परमेशरा रे सामणे अहारे प्रभु यीशुये रे औणे पर अपणे सारे पवित्र स्वर्गदूतां ने पवित्र कने निर्दोष बणाई दो।

जीवन सै सै जे परमेशरा जो खुश करो

4 हे भाईयो, अहें तुहांने विनती करां ये कने तुहां जो प्रभु यीशुये च समझावांये भई तेदा जे तुहें आहां ते ठीक चाल चलणा कने परमेश्वरा जो खुश करना सीखी रा, कने तेडे जे चलां भी ये, तेडे ई होर भी तरक्की करदे जाओ। 2 कां भई तुहें नीं जाणदे भई अहें प्रभु यीशुये खाते तुहां जो कुण-कुण हुक्म पुजुवाये। 3 कां भई परमेश्वरा री इच्छा ये ई भई तुहें पवित्र बणा : मतलब व्यभिचारा ते बची रे रहा, 4 कां भई तुहां च ते हरेक पवित्रता कने आदरा ने सौगी अपणिया पत्निया जो प्राप्त करना जाणो, 5 कने ये काम अभिलाषा ने नीं, कने ना तिन्हा जातियां साई सै जे परमेश्वरा जो नीं जाणदे, 6 भई इसा गला च कोई अपणे भाईये जो नीं ठगो, कने ना तिस पर दाव लगाओ, कां भई प्रभु इना सर्बीं गलां रा पलटा लेणे औळा आ; तेदा जे अहें पैहले ते तुहां ने बोलया कने चिताया भी था। 7 कां भई परमेश्वरे आहां जो अशुद्ध हुणे खातर नीं, पर पवित्र हुणे खातर सअदी रा। 8 इस वजह ते सै जे इसो बेकार जाणां, सै माहुये जो नीं पर परमेशवरा जो बेकार जाणां, सै जे अपणा पवित्र आत्मा तुहां जो देवां।

9 पर भाई चारे रिया रीतिया रे बारे च ये जरूरी नीं आ भई हऊं तुहां जो कुछ लिखूं, कां भई अप्पु चीयें प्रेम रखणा तुहें अप्पु ई सिखी रा; 10 कने सारे मकिदुनिया रे सर्बीं भाईयां सौगी येदा ई करां भी ये। पर हे भाईयो, अहें तुहां जो समझावांये भई होर भी बदे जावा, 11 कने तेदा जे अहें तुहां जो हुक्म दित्तिरा, तियां ई चुप-चाप रैहणे कने अपणा-अपणा काम्म-काज करीं ने अपणे-अपणे हत्था ते कमाणे रा जतन करा; 12 तां की बाहरा आऊलेयां ते आदर मिलया करो, कने तुहां जो किसी चीजा रा घाटा नीं हो।

यीशुये रा भीं ते औणा

13 हे भाईयो अहें नीं चांहदे भई तुहें तिन्हा रे बारे च सै जे सुत्तिरे, अन्जान रहो; येदा नीं हो भई तुहें दुजेयां साई दुःख करो तिन्हा ले जे आशा नीं। 14 कां भई जे अहें विश्वास करांये भई यीशु मरया कने जी भी उठेया, तां तियां ई परमेश्वर तिनां भी सै जे यीशुये च सई गईरे, तिसने सौगी ली आऊणे।

15 कां भई अहें प्रभुये रे वचना रे मताबक तुहां ने येदा बोलांये भई अहें तां जीऊदें कने प्रभुये रे आऊणे तकां बची रे रैहणे, सुत्तिरेयां ते कदी अगे नीं बदे। 16 कां भई प्रभु अप्पु ई स्वर्गा ते उतरी ने; तिस वक्त ललकारा, कने प्रधान दुतां री आवाजा, कने परमेश्वरा रिया तुरहियां बजाई ने; कने सै जे मसीह च मरीरे, तिन्हा पैहले जीऊंदेयां हुणा। 17 तां आहां जो भी सै जे जीऊंदे कने बची रे रैहणे तिन्हा सौगी बदलां परां चकोई ने चली जाणा भई हवा च प्रभुये ने मिलो; कने इसा रीतिया ते आहां सदा प्रभुये ने सौगी रैहणा। 18 इयां ई इन्हां गलां ते इक्की दुजे जो शान्ति देया करो।

भीं ते औणे रे खातर तैयार रैहणा

5 हे भाईयो, इसते मतलब नीं आ भई वक्तां कने कालां रे बारे च तुहां जो कुछ लिखूं। 2 कें तुहें अप्पु ठीक जाणये भई तियां जे राती जो चोर आवां, तियां ई प्रभुये रा दिन अऊणे अऊला आ। 3 तजे लोक बोलांये, " खरा आ, कने कुछ डर नीं आ, तां तिना, पर अचानक वनाश आई जाणां, तियां जे भारथिया जो पीड; कने तिन्हा किसी रीतिया ते नी बचणा, 4 पर हे भाईयो, तुहें तां नेहरे च नीये भई सै दिन तुहां पर चोरा साई पओ। 5 कां भई तुहें सारे ज्योतियां री सन्तान कने दिनां री सन्तान ये; अहें ना तां राती रे, ना नेहरे रे। 6 इस खातर अहें होरसीं साई सुत्तीरे नीं रईये, पर जागदे कने सावधान रहो। 7 कां भई सै जे सवांये से राती जो ई सवांये, कने सै जे मतवाले हुआयें से राती जो ई मतवाले हुआये, 8 पर अहें सै जे दिनां रे, विश्वास कने प्रेमा री झिलम पेहनी ने कने उद्धारा रिया आशा रा टोप पैहनीं ने सावधान रहाये। 9 कां भई परमेश्वरे आहां रे खातर नीं, पर इस खातर ठेहरया भई अहें अपणे प्रभु यीशु मसीह रे द्वारा उद्धार पाईये। 10 सै आहां खातर इस वजह ते मरेया भई अहें चाहे जागदे हो चाहे सुत्तिरे हो, सब मिली ने तिसने सौगी जीये। 11 इस जगहा ते इक्की दुजे जो शान्ति देओ कने इक्की दुजे री तरक्किया री वजह बणो, तेदा जे तुहें करां बी ये।

कलीसिया जो उपदेश

12 हे भाईयो अहें तुहां ने विनती करांये भई सै जे तुहां च मेहनत करांये, कने प्रभुये च तुहां रे अगुवे, कने तुहां जो सखावांये, तिन्हा रा आदर करा। 13 कने तिन्हा रे कम्मा रिया वजह ते प्यारा ने सौगी तिन्हा मते आदरा रे जोगा समझो। अप्पु जोगे समझो। अप्पु चीयें मेल-मिलापा ने रहा। 14 हे भाईयो, अहें तुहां जो समझावांये भई सै जे ठीक चाल नीं चलदे तिन्हा जो समझाओ, कायरां जो हिम्मत देवा, कमजोरां जो संभाला, सारेया खा सहनशीलता दस्सा। 15 सावधान! कोई किसी ने बुराईयां रे बदले बुराई नीं करो; पर सदा जो भलाई करने जो तयार रओ, अप्पु चीयें कने सर्बीं ने भी भलाईया री इच्छा करा। 16 सदा खुश रओ। 17 लगातार प्राथना करदे रओ। 18 सारियां गलां रा धन्यवाद करो; कां भई तुहां खातर मसीह यीशु च परमेश्वरा री येई इच्छा ई। 19 आत्मा जो नीं बुझुआओ। 20 भविष्यवाणीयां जो घटिया नीं जाणो। 21 सर्बीं गलां जो परखो; सै जे खरियां ई यां तिनां पकड़ी ने रखो। 22 सर्बीं प्रकारा रिया बुराईयां ते बची रे रहो।

आशीर्वाद

23 शान्तिया रा परमेश्वर अप्पु ई तुहां जो पुरिया रीतिया ते पवित्र करो; कने तुहां री आत्मा कने प्राण कने देह आहांरे प्रभु यीशु मसीह रे आऊणे तकां पूरे-पूरे कने निर्दोष सुरक्षित रहा। 24 तुहां रा सदणे औळा सच्चा, कने तिस येदा ई करना। 25 हे भाईयो, आहां खातर प्राथना करो। 26 सर्बीं भाईयां जो पवित्र गले लाई ने नमस्कार करो। 27 हऊं तुहां जो प्रभुये री कसम खवावां भई ये पत्री सर्बीं भाईयां जो पढीं ने सुणुवाई जाओ। 28 आहांरे प्रभु यीशु मसीह रा अनुग्रह तुहां पर हुंदा रओ।

2 थिस्सलुनीकियां

अभिवादन

1 पौलुस कने सिलवानुस कने तीमुथियुसा खाते थिस्सलुनीकियों रिया कलीसिया रे नौंये, सै जे अहां रे पिता परमेशरा कने प्रभु यीशु मसीह के : 2 अहां रे पिता परमेशरा कने प्रभु यीशु मसीह खाते तुहां जो अनुग्रह कने शान्ति मिलदी रौ।

न्याय रा दिन

3 हे भाईयो, तुहांरे बारे च अहां जो हर वक्त परमेशरा रा धन्यवाद करना चाहिंदा, कने ये भी ठीक अ, इस खातर भई तुहां रा विश्वास बौहत बधदा जाओ, कने तुहां सर्बी रा प्यार अप्पु चीयें बधदा जाओ। 4 येथी तर्को भई अहें अप्पु परमेशरा री कलीसिया च तुहांरे बारे च घमण्ड करांये भई तितने जे पद्रव कने क्लेश तुहें सेहवांये, तिन्हा सर्बी च तुहां रा धीरज कने विश्वास प्रगट हुआ।

5 ये परमेशरा रे सच्चे न्याय रा सपष्ट प्रमाण अ भई तुहें परमेशरा रे राज्य रे योग्य ठेहरो, तिस खातर जे तुहें दुःख भी पावांये। 6 कांभई परमेशरा रे नेडे ये न्याय आ भई सै जे तुहां जो कलेश देवांये, तिन्हा जो बदले च कलेश देओ। 7 कने तुहें, सै जे कलेश पावांये, अहां सौगी चैन देओ; तिस वक्त तजे प्रभु यीशुये अपने सामर्थी दूतां सौगी, भडकी रिया अग्गी व स्वर्गा ते प्रगट हुणा, 8 कने सै जे परमेशरा जो नीं पछयाणदे कने अहांरे प्रभु यीशुये रे सुसमाचारा जो नीं मनदे तिन्हा ने बदला लेणा। 9 तिन्हा प्रभुये रे सामणे ते कने तिसरिया शान्तिया रे तेजा ते दूर हुई ने अन्नत वनाशा रा दण्ड मिलणा। 10 ये तिस दिन हुणा, तजे तिस अपने पवित्र लोकां च महिमा पाणे कने सब विश्वास करने अऊलेयां च हैरानिया अऊले काम्मां रिया वजह बणने खातर अऊणा; कांभई तुहें अहां रिया गवाईया पर विश्वास कित्या। 11 इसी खातर अहें सदा तुहां खातर प्राथना भी करांये भई अहां रा परमेशरा तुहां जो इस बुलाहटा रे जोगे समझो, कने भलाई या री हरेक इच्छा कने विश्वासा रे हरेक कम्मा जो सामर्था सौगी पूरा करो, 12 ताकि अहांरे परमेशरा कने प्रभु यीशु मसीह रे अनुग्रह रे मताबक अहां रे प्रभु यीशुये रा नौं तुहां च महिमा पाओ, कने तुहें तिस च।

पापा रा माह्नु यनिके बिनासा रा पुत्र

2 हे भाईयो, हुणा तर्को अहें अपने प्रभु यीशु मसीह रे अऊणे, कने तिसले अपने कड्डे हुणे रे बारे च तुहां ने विनती करांये 2 भई किसी अत्मा, या वचन, पत्रियां रे द्वारा, सै जे मन्त्रो अहां रिया तरफा ते हो, ये समझी ने भई प्रभुये रा दिहाड़ा अई गरा, तुहां रा मन अचानक अस्थिर नीं हुई जाओ कने ना तुहें घबराओ। 3 किसी रीतिया ते किसी रे धोखे च नीं अवा, कांभई सै नीं अऊणा तदुआं तर्को जे धर्मा रा त्याग नीं हुई लो, कने सै पापा रा पुरुष मतलब विनाशा रा पुत्र प्रगट नीं हो। 4 सै जे बरोध करां, कने हरेक सै जे ईश्वर या पुजणे औळा केहलावां, अपने अप्पु जो बड्डा ठेहरावां, येथी तर्को भई से परमेशरा रे मन्दरा च बैठी ने अप्पु जो ईश्वर ठेहरावां। 5 क्या तुहां जो याद नींअ भई तजे हऊं तुहां ले था, तां तुहां ने ये गल्लां करां था? 6 तुहें तिसा चीजा जो जाणांये, सै जे तिस्सो अजें तक रोकया रां ई भई सै अपने ई वक्ता पर प्रगट हो। 7 कांभई धर्मा रा भेद हुण भी काम्म करदा जांवां, पर अजें इक रोकणे अऊला, कने तदुआं तर्को जे से दूर नीं हुई जाओ तिस रोकी रखणा। 8 तां तिस अधर्मीये प्रगट हुणा, तिस्सो जे प्रभु यीशुये अपने

मुंहा रिया फुका ते मारी देणा, कने अपने अऊणे रे तेजा ते भस्म करना। 9 तिस अधर्मीये रा अऊणा शैताना रे कम्मां रे मताबक सारियां किस्मा री झुठी सामर्थ, कने नशाणां, कने अड्डूत कम्मां सौगी, 10 कने नाश हुणे अऊलेयां खातर अधर्मा रे सब किस्मा रे धोखे ने सौगी हुणा; कने भई तिन्हें सच्चा ने प्रेम नीं कित्या तिसते जे तिन्हा रा उद्धार हुंदा। 11 इस वजह ते परमेश्वरे तिन्हा च इक भटकाणे अऊली सामर्था जो भेजेया भई सै झुठा जो मन्त्रो, 12 भई जितने लोक सच्चा जो नीं मनदे, पर अधर्मा ते खुश हुआये, सै सब दण्ड पाओ।

मजबूत बणीने रौआ

13 हे भाईयो, कने प्रभुये रे प्यारे लोको, चाहिंदा भई अहें तुहां रे बारे च सदा परमेशरा रा धन्यवाद करदे रहिये, कांभई परमेश्वरे अदि ते तुहां जो चुणी लया भई अत्मा ते पवित्र हुई ने, कने सच्चा जो मन्त्री ने उद्धार पान्दे, 14 तिस खातर जे तिने तुहां जो अहांरे सुसमाचारा ते सदेया, भई तुहें अहां रे प्रभु यीशु मसीह रिया महिमा जो पाई लो। 15 इस खातर हे भाईयो, पक्के रहना; कने से-से गल्लां जे तुहें चाह्नां ये वचना ते या पत्रियां ते अहां ते सीखियां तिन्हा जो पकड़ी ने रखा।

16 अहांरा प्रभु यीशु मसीह अप्पु ई, कने अहां रा पिता परमेशर, तिने जे अहां ने प्रेम रखया कने अनुग्रह ते अन्नत शान्ती कने उत्तम आशा दिती री, 17 तुहां रे मना च शान्ती देओ कने तुहां जो हरेक कम्मा कने वचना च पक्का करो।

प्राथना करने रा अनुरोध

3 आखर च, हे भाईयो, अहां खातर प्राथना करेया करा भई प्रभुये रा वचन येदा छोड़ फलो कने महिमा पाओ तेदा जे तुहां च हुआ, 2 कने अहें तेदे कने दुष्ट माह्नुआं ते बची रे रौ कांभई सर्बी च विश्वास नीं आ।

3 पर प्रभु सच्चा; तिस तुहां जो पक्केयाईया ने पक्के करना कने तिस दुष्टा ते बचाणे। 4 अहां जो प्रभुये च तुहां पर भरोसा भई से-से हुक्म जे अहें देवांये, तिन्हा जो तुहें मन्त्रांये, कने मन्त्रदेयां भी रैहणा। 5 परमेशरा रे प्रेमा कने मसीह रे धीरजा खा प्रभु तुहां रे मनां री अगुवाई करो।

काम्म करने री जिम्मेदारी

6 हे भाईयो, अहें तुहां जो अपने प्रभु यीशु मसीह रे नौंये ते हुक्म देवांये भई तुहें हरेक येदे भाईयां ते लग रौ सै जे खरी चाल नीं चलदे कने सै जे शिक्षा तिन्हें अहां ते पाई तिसरे मताबक नीं चलदे। 7 कांभई तुहें अप्पु जाणांये भई कित्या रीतिया ते अहां साई चाल चलणी चाहिंदी, कांभई अहें तुहां ले कोई अनुचित चाल नीं चली, 8 कने किसी री रोटी मुफता च नीं खादी; पर मेहनत कने कष्टा ते रात दिन काम्म धन्धा करां थे भई तुहां च ते किसी पर भार नीं हो। 9 ये नीं भई अहां जो अधिकार नीं आ, पर इस खातर भई अहें अप्पु जो तुहां खातर अदर्श बणाईये भई तुहें अहां साई चाल चलो। 10 कांभई अहें तजे तुहां ले थे, तां भी ये हुक्म देवां थे भई जे कोई काम्म करना नीं चाहो तां रोटी भी नीं खाओ। 11 अहें सुणांये भई किछ लोक तुहां बिच अनुचित चाल चलांये, कने किछ काम्म नीं करदे पर दुजेयां रे कम्मा च लात अड़ावां ये। 12 येदे यां जो अहें प्रभु यीशु मसीह च हुक्म देवांये कने समझावांये भई चुपचाप काम्म करी ने अपनी रोटी खाया करा। 13 तुहें, हे भाईयो, भलाई करने च हिम्मत नीं छड्डो।

¹⁴ जे कोई अहां रिया इसा पत्रिया रियां गल्लां जो नीं मन्ना तां तिस पर नज़र रखा, कने तिसरी संगति नीं करा तिसते जे से शर्म करो। ¹⁵ तां भी तिस्सो दुश्मण नी समझो, पर भाई जाणी ने चितावा।

अन्तिम नमस्कार

¹⁶ हुण प्रभु सै जे शान्तिया रा स्रोत अ अप्पु ई तुहां जो सदा कने हर प्रकारा ने शान्ति देओ, प्रभु तुहां सबीं ने सोगी रौ। ¹⁷ हऊं, पौलुस, अपणे हत्था ते नमस्कार लिखां। हरेक पत्रिया च मेरा ये नशाणा; हऊं ईयां ई लिखां। ¹⁸ अहारे प्रभु यीशु मसीह रा अनुग्रह तुहां सबीं पर हुन्दा रौ।

1 तीमुथियुस

अभिबादन

1 पौलुसा खाते सैं जे आहां रे उद्धार करने औळे परमेशर कने आहारिया आशा रे आधार मसीह यीशुये रे हुक्मा ते मसीह यीशुये रा प्रेरित आ, 2 तीमुथियुसा रे नौये सैं जे बिस्वासा च मेरा सच्चा पुत्र आ : पिता परमेशर, कने आहारे प्रभु मसीह यीशुये खाते तिज्जो अनुग्रह, कने दया कने शान्ती मिलदी रओ।

झुठयां शिक्षा रे बरोधा च चेताबनी

3 तियां जे मैं मकिदुनिया जो जानदे वक्ता तिज्जो समझाया था, भई इफिसुसा च रई ने किछ लोकां जो हुक्म दे भई लग किस्मा री शिक्षा नी देओ, 4 कने तिन्हां काह्नीयां कने अन्नत वंशां वलियां पर मन नी लगाओ, तिना ते जे विवाद हुआये, कने परमेशरा रे तिस प्रबन्धा रे मताबक नी, सैं जे विस्वास पर टिकी रे। तियां ई फेरी भी बोलां। 5 हुक्मा रा नचोड ये आ भई शुद्ध मन कने खरे विवेका, कने बिना कपटा औळे विस्वासा ते प्यार निकलो। 6 इन्हां छड्डी ने कितने लोक बकवादा खा भटकी गये, 7 कने व्यवस्थापक तां हुणा चाह्नाये, पर सैं जे गल्लां बोलांये कने तिना जे पक्के हुई ने बोलां ये, तिन्हां जो समझदे बी नीये। 8 पर अहें जाणां ये भई जे कोई व्यवस्था जो ठीक ढंगा ने काम्मा लयाओ तां सैं खरी। 9 येदा जाणी ने भई कोई व्यवस्था धर्मी माह्नुये खातर नी पर अधर्मियां, निरंकुश भक्ति हीनां, पापीयां, अपवित्र कने अशुद्ध माह्नुआं, मां-बापा रेआं घात करने औळेयां, हत्यारो, 10 व्यभिचार, पुरुष गामियां, माह्नुये रे बेचणे औळेयां, झुठ बोलणे औळेयां, कने झुठी कसम खाणे औळेयां, कने इसते बाद खरे उपदेशा रे सब विरोधियां खातर ठेहराई गई री। 11 ये ई परमधन्य परमेशरा री महिमा रे तिस सुसमाचारा रे मताबक आ सैं जे मिन्जो दित्या गईरा।

अनुग्रह रे खातर धन्यवाद

12 हऊं अपणे प्रभु यीशु मसीह रा तिने जे मिन्जो सामर्थ दित्ती, धन्यवाद करां भई तिने मिन्जो विस्वासा जोगा समझी ने अपणिया सेवा खातर ठहराया। 13 हऊं तां पैहले निंदा करने औळा, कने सताणे औळा, कने नेहर करने औळा था; तां भी मेरे पर दया हुई, कांभई मैं अविस्वासा रिया दशा च बिना समझे ये काम्म कित्ते थे। 14 कने आहारे प्रभुये रा अनुग्रह तिस विस्वास कने प्यारा सौगी सैं जे मसीह यीशु चा, बौहतायात ने हुआ। 15 ये गल्ल सच्च कने हर प्रकारा ने मनणे जोगी भई मसीह यीशु पापियां रा उद्धार करने खातर जगता च आया, तिन्हां सर्बीं च हऊं बड़ा था। 16 पर मेरे पर इस खातर दया हुई भई मुझ सबते बड़े पापिये च यीशु मसीह अपणी पूरी सहनशीलता दसो, भई सैं जे लोक तिस पर अन्नत जीवना खातर विस्वास करणे तिन्हां खातर हऊं इक आर्दश बणुं। 17 हुण सनातन राजा मतलब अविनाशी, अनदेखे, इक मात्र परमेशरा रा आदर कने महिमा युगानयुग हुंदी रहो। आमीन।

18 हे पुत्र तीमुथियुस, तिन्हा भविष्यवाणियां रे मताबक सैं जे पैहले तेरे बारे च हुई रियां थीयां, हऊं ये हुक्म देवां भई तु तिना रे मताबक खरी लड़ाई लड़दा रहै; 19 कने विस्वास कने तिस खरे विवेका जो पकड़ी रख, तिस्सो जे दूर करने रिया वजह ते बौहती रा विस्वास रुपी जहाज डुबी गया। 20 तिन्हां च हुमिनयुस कने सिकन्दर हये, तिन्हां जो मैं शैताना जो दई तरा भई सैं परमेशरा री निन्दा करना नी सिखो।

अराधना सम्बन्धी निर्देश

2 हुण हऊं सबते पैहले ये निवेदन करां भई विनती, कने प्राथना, कने निवेदन, कने धन्यवाद सर्बीं माह्नुआं खातर कित्ते जाओ। 2 राजेयां कने सर्बीं उच्चे जगहा औळेयां खातर कांभई अहें रमाना कने चैना सौगी सारिया भक्तिया कने गम्भीरता ने जीन्दगी बताये। 3 ये आहारे उद्धार करने औळे परमेशरा जो खरा लगां कने भावां भी आ, 4 सैं जे येदा चाह्नां भई सर्बीं माह्नुआं र उद्धार हो, कने सैं सचाईया जो खरे तरीके ने पछयाणी लो। 5 कांभई परमेशर इक ई आ, कने परमेशर कने माह्नुआं रे बीच इक ई आ, मतलब मसीह यीशु सैं जे माह्नु आ। 6 तिने जे अप्पु जो सर्बीं रे छुटकारे रे मूल्हा च दई तया, कने तिसरी गवाई ठीक वक्ता पर दित्ती गई री। 7 हऊं साच बोलां, झूठ नी बोलदा, भई हऊं इस खातर ई प्रचारक कने प्रेरित कने अन्यजातियां खातर विस्वास कने सच्चा रा उपदेशक ठेहराया गई रा।

8 इस खातर हऊं चाह्नां भई हर जगहा पुरुष, बिना गुस्से कने बेहसा ते पवित्र हत्था जो चकी ने प्राथना करया करो। 9 तियां ई जनानां भी शर्म कने संयमा सौगी खरे-खरे कपड़ेया ते अप्पु जो सवारो; ना की बाल बनाणे कने सोने कने मोतियां कने मेंहगेयां कपड़ेयां ते, 10 पर भलेयां कम्मां ते, कांभई परमेशरा री भक्ति करने औलियां जनानां जो ये ई खरा आ। 11 जनाना जो चुप-चाप पूरिया अधीनता सौगी सीखणा चाहींदा। 12 हऊं बोलां भई जनाना ना उपदेश करो कने ना पुरुषा पर हुक्म चलाओ, पर चुप-चाप रहो। 13 कांभई आदम पैहले, तिसते बाद हच्चा बणाई गई; 14 कने आदम बेहकाया नी गया, पर जनाना बेहकावे च आई ने अपराधी बणी, 15 तां भी जनाना बच्चे पैदा करने ते उद्धार मिलणा, जे सैं संयमा सौगी विस्वास, प्रेम, कने पवित्रता च पक्की रहो।

कलीसिया च अध्यक्ष (बिशप)

3 ये गल्ल सच्च ई भई सैं जे अध्यक्ष हुणा चाह्नां, सैं भले कम्मा री इच्छा करां। 2 ये जरूरी आ भई अध्यक्ष निर्दोष कने इक्की जनाना रा खस्म, संयमी, सुशील, सभ्य, आओ बैठ करने औळा, कने सखाणे च ठीक हो। 3 पियक्कड कने मार-पीट करने औळा नीं हो पर नर्म हो, कने ना झगड़ने औळे, कने ना धना रा लोभी हो। 4 अपणे घरा रा खरा प्रबन्ध करदा हो, कने अपणे बाल-बच्चेयां जो पूरिया अधीनता ने गम्भीर रखदा हो। 5 तजे कोई अपणे घरा रा ई प्रबन्ध करना नीं जाणदा हो, तां परमेशरा री कलीसिया री रखवाली कियां करगा? 6 फेरी ये भई नवां चेला नीं हो, येदा नीं हो भई घमण्ड करी ने शैताना साई दण्ड पाओ। 7 कने बाहरा औळेयां च भी सुनाम हो, येदा नीं हो भई निन्दा च फसी ने शैताना रे फन्दे च फसी जाओ।

कलीसिया च सेबक (डीकन)

8 तियां ई सेवकां जो भी गम्भीर हुणां चाहींदा, दो रंगी, पियक्कड कने नीच कमाईया रे लोभी नीं हो; 9 पर विस्वासा रे भेदा जो शुद्ध विवेका ने संभाली रखो। 10 कने ये भी पैहले परखे जाओ, जे फेरी निर्दोष निकलो तां सेवका रा काम्म करो। 11 इयां ई जनाना जो भी गम्भीर हुणां चाहींदा; दोष लागे औळी नीं हो पर चतन कने सारियां गल्लां च विस्वासा जोगी हो। 12 सेवक इक्की जनाना रा खस्म हो, कने बाल-बच्चेयां कने अपणे घरा रा खरा प्रबन्ध करना जाणदा हो; 13 कांभई सैं जे सेवका रा काम खरे ढंगा ने नी करी सकाये, सैं

अपु खातर खरा पद कने तिस बिस्वासा ते सै जे मसीह यीशु पर आ, बड़ी हिम्मत पावाये।

महान रहस्य

14 हऊं तेरे ला छोड़े औणे री आशा रखणे पर भी ये गल्लां तिजो इस खातर लिखां, 15 भई जे मेरे औणे च देर हो, तां तू जाणी लो भई परमेशरा रा घराना सै जे ज्यूदी कलीसिया ई कने सै जे सच्चा रा खम्भा कने नीऊं ई, येदा बतवि करना चाहींदा। 16 इस च शक नी आ भई भक्तियां रे भेद गम्भीर आ, मतलब, सै जे शरीरा च प्रगत हुआ, आत्मा च धर्मी ठेहरेया, स्वर्गदूतां जो दुस्सेया अन्यजातियाँ च तिसरा प्रचार हुआ, जगता च तिस पर विस्वास कित्या गया, कने महिमा च उपरा जो चकोई गया।

झूठे शिक्षक

4 पर आत्मा साफ-साफ बोलां भई औणे औळे बगता च कितनेयां लोकां भरमाणे औलिया आत्मा, कने दुष्टात्मा री शिक्षा पर मन लाई ने बिस्वासा ते बेहकी जाणा। 2 ये तिन्हां झूठे माह्नुआं रे कपटा रिया वजह ते हुणा, तिन्हां रा विवेक मन्नो जलदे हुये लोहे ने दागी तरा हो, 3 तिन्हां जे ब्याह करने ते रोकणा, कने खाणे रियां किछ चीजां ते दूर रहणे रा हुकम देणा, तिन्हां जो परमेशरे इस खातर सृजेया भई विश्वासी कने सच्चा रे पछयाणने औळे तिन्हां जो धन्यवादा सौगी खाओ। 4 कांभई परमेशरा री सुजी री हर इक चीज त्यागी देणे जोगी नीं; पर ये भई धन्यवादा सौगी खाई जाओ, 5 कांभई परमेशरा रे वचन कने प्राथना ते शुद्ध हुई जाई।

मसीह यीशुये रा अच्छा सेबक

6 जे तू भाईयाँ जो इना गल्लां री याद दुवांदा रहंगा, तां मसीह यीशुये रा खरा सेबक ठेहरगा; कने विस्वास कने तिस खरे उपदेशा रियां गल्लां ते, तिन्हां जे तू मनदा आई रा, तेरा पालन पोषण हुंदा रहंगा। 7 पर अशुद्ध कने बुडेयां री झीयां काहणियां ते लग रै; कने भक्तिया री साधना कर। 8 कांभई देहा री साधना ते घट फायदा हुआं, पर भक्ति कईयां गल्लां खातर फायदे औळी, कांभई इस वक्ता री कने औणे औलिया जीन्दगिया री भी प्रतिग्या इस खातर ई हई। 9 ये गल्ल सच कने हर कियां मनणे रे जोगी ई। 10 कांभई अहं मेहनत कने जतन इस ई खातर करांये भई अहारी आशा तिस जीवते परमेशरा पर ई सै जे सब माह्नुआं रा कने खासा जेआ विश्वासियां रा उद्धार करने औळा आ।

11 इन्हां गल्लां रा हुकम दे कने सखान्दा रे। 12 कोई तेरिया जुवानिया जो बेकार नीं समझणे पाओ; पर वचन, कने चाल-चलन कने प्रेम कने विस्वास, कने पवित्रता च विश्वासियाँ खातर आदर्श बणी जा। 13 तदुआं तका जे हऊं नी आऊं, तदुआं तका पढ़ने कने उपदेश देणे कने सखाणे रा काम्म कर। 14 तिस वरदाना खातर सै जे तेरे च आ, कने भविष्यवाणिया रे द्वारा प्राचीनां रे हाथ रखणे वक्ता तिजो मिलया था, निश्चिन्त मत रहंदा। 15 इन्हां गल्लां जो सोचदा रै कने इन्हां गल्लां पर अपना ध्यान लगाई ने रख, भई तेरी तरक्की सबीं च प्रगत हो। 16 अपनी कने अपने उपदेशा री चौकसी रख। इन्हां गल्लां पर पक्का रै, कांभई जे येदा करदा रहंगा तां तू अपने सुणने औळैयां खातर भी उद्धारा री वजह बणगा।

बिश्वासियां रे परति जिम्मेदारियां

5 किसी सयाणे जो नी थिड़क, पर तिस्सो पिते साई जाणी जे समझाई दे, कने जवानां जो भाई जाणी ने; 2 सयाणियां जनानां जो माता जाणी ने; जवाना जानानां जो पूरिया पवित्रता ते बेहण जाणी ने समझाई दे।

3 तिन्हां विधवां रा, सै जे सच-मुच विधवा ईयां, आदर कर। 4 जे किसी विधवा रे बच्चे या दोते-पोते हो, तां सै पहले अपने ई घराने ने सौगी भक्तिया रा बर्ताव करो, कने अपने माता-पिता जो तिन्हां रा हक देणा सिखो कांभई ये परमेशरा जो खरा लगां। 5 सै जे सच-मुच विधवाईयां, कने तिन्हां रा कोई नींआ, सै परमेशरा पर आशा रखाई, कने रात-दिन विनती कने प्राथना करने च लौलीन रहवांईआं; 6 पर सै जे भोग विलासा च पई गई, सै ज्यूदी ई मरी गई। 7 इन्हां गल्लां रा भी हुकम देआ कर भई सै निर्दोष रेया करो। 8 पर जे

कोई अपनेयां री कने खास करी ने अपने घराने री चिन्ता नीं करो, तां सै बिस्वासा ते मुकरी गईरा कने अविश्वासिये ते बी बुरा बणी गरा।

9 तिसा ई विधवा रा नौं लिखेया जाओ सै जे 60 सालां ते घट नीं हो, कने इक्की खसमा री जनाना रही री हो, 10 कने भलेयां कम्मां च सुनाम रई हो, तिसै जे बच्चेयां जो पालेया-पलोसेया हो; मेहमानां री सेवा किती हो, पवित्र लोकां रे पैर धुवाये हो, दुःखियां री मद्द किती हो, कने हरेक भले कम्मा च मन लाया हो। 11 पर जवान विधवा रा नौं नीं लिखणा, कांभई तजे सै मसीह रा बरोध करी ने सुख विलासा च पई जावांई तां ब्याह करना चाई, 12 कने दोषी ठेहराई, कांभई तिसे अपने पहले बिस्वासा जो छुड़ी तया। 13 इसने सौगी-सौगी से घरें-घरें फिरी ने आलसी हुणा सिखांईयां, कने सिर्फ आलसी ईनीं पर बक-बक करदी रखांईयां कने दुजेयां रे कम्मा च विघन भी पावांईयां कने गलत गल्लां बोलांई यां। 14 इस खातर हऊं ये चाह्नां भई जवान विधवां ब्याह करो, कने बच्चे जणो, कने घर-बार सम्भालो, कने किसी बरोधिये जो बदनाम करने रा मौका नीं देओ। 15 कांभई कई तां बेहकी ने शैताना रे पिछे हुई चुकी रियां। 16 जे किसी विश्वासिनी रे घरा विधवा हो, तां सै ई तिन्हांरी मद्द करो भई कलीसिया पर भार नीं हो, भई सै तिन्हां री मद्द करी सको सै जे सचमुच ई विधवां ईयां।

17 सै जे प्राचीन खरा प्रबन्ध करांये, विशेष करी ने सै जे वचन सुनाणे कने सखाणे च मेहनत करांये, दोगुणे आदरा रे जोगे समझे जाओ। 18 कांभई पवित्र शास्त्र बोलां, “बाहन्दी हाण बलधा रा मुँह नी बनणा,” कांभई “मजदूर अपनी मजदूरिया रा हकदार आ।” 19 कोई दोष किसी प्राचीना पर लाया जाओ तां बिना दुई या तिन्हां गवांहे रे तिसरी नी सुणा। 20 पाप करने औळैयां जो सबीं रे सामणे समझाई दे, भई होर लोक भी डरो। 21 परमेशर, कने मसीह यीशु कने चुणी रे स्वर्गदूतां जो हाजर जाणी ने हऊं तिजो चेतावनी देवां भई तू मन खोली ने इन्हां गल्लां जो मनया कर, कने कोई काम्म पक्षपाता ने नीं कर। 22 किसी पर छोड़े हाथ नीं रखणा, कने दुजेयां रे पापां च भागी नीं हुणा; अपने जो पवित्र बणाई रख।

23 अगे खा सिर्फ पाणिये जो ई पीणे औळा ई नीं रै, पर अपने पेटा रे कने बार-बार बमार हुणे रिया वजह ते थोडा-थोडा दाखां रा रस भी कम्मा च लयाओ।

24 किछ माह्नुआं रे पाप प्रगत हुई जांये कने न्याय खातर पहले ई पुज्जी जांये, पर कईयां रे पिछे ते अवांये। 25 तियां ई किछ भले काम्म भी प्रगत हुआंये; कने सै जे येदे नीं हुंदे, सै भी छीपी नीं सकदे।

6 तितने जे दासता च बज्जी रे, सै अपने मालका जो बडे आदरा रे जोगे जाणो, भई परमेशरा रे नौंये कने उपदेशा री निन्दा नीं हो। 2 तिन्हां रे मालक जे विश्वासी ये तिन्हां जो सै भाई हुणे रिया वजह ते बेकार नीं जाणो, पर तिन्हांरी होर भी सेवा करो, कांभई इसते फाइदा लेणे औळे विश्वासी कने प्रेमी ये। इन्हां गल्लां रा उपदेश करेया कर कने समझांदा रै।

झूठी शिक्षा कने धना रा लोभ

3 जे कोई किसी होरी किस्मा रा उपदेश देवां, कने खरीयां गल्लां हो, मतलब अहारे प्रभु यीशु मसीह रियां गल्लां जो कने तिस उपदेशा जो नीं मनदा, सै जे भक्तिया रे मताबक आ। 4 तां सै घमण्डी हुई गया, कने किछ नीं जाणदा; पर तिस्सो बेहस कने शब्दां पर तर्क करने रा रोग आ, तिसते जे डाह, कने झगड़े, कने निन्दा रियां गल्लां, कने बुरे-बुरे शक, 5 कने तिन्हां माह्नुआं च बेकार रगड़े-झगड़े पैदा हुआं ये तिन्हांरी जे अकल बिगड़ी गरी, कने सै सच्चा ते दूर हुई गये, सै जे समझांये भई भक्ति कमाईया रा दुराजा। 6 पर संतोखा औळी भक्ति बड्डी कमाई। 7 कांभई ना अहं जगता च किछ लयाई सक्कांये कने नां अहं किछ नई सक्कांये। 8 जे अहां ले खाणे कने पहनणे जो हो, तां इन्हां पर ई सन्तोख करना चाहिंदा। 9 पर सै जे अमीर हुणां चाह्नांये, सै येदिया परिक्षा कने फन्दे कने मत्तियां सारियां बेकार कने नुकसान करने औळियां लालसावां च फसाये, सै जे माह्नुआं जो बगाडी देवांईयां, विनाशा रे समुद्रा च डुबाई देवां ईयां। 10 कांभई पैसे रा लोभ सारियां बुराईयां री जड़ ई तिस्सो लेणे रा जतन करदे-करदे बौहतीं बिस्वासा ते भटकी ने अपु जो कईयां किस्मां रे दुःखा ते जख्मी बणाई लरा।

तीमुथियुसा जो ब्यक्तिगत निर्देश

11 पर हे परमेश्वर रे जन, तु इन्हां गल्लां ते नठ, कने धर्म, भक्ति, विस्वास, प्रेम, धीरज कने नम्रता रा पीछा कर। 12 बिस्वासा री खरी कुस्ती लड़; कने तिस अन्नत जीवना जो पकड़ी ले, तिसरे खातर जे तु सदीरा कने मत्तेयां गवाह रे सामणे खरा अंगीकार कित्या था। 13 हऊं तिज्जो परमेश्वरा जो, सै जे सबीं जो ज्युंदा रखां, कने मसीह यीशु जो गवाह करीने तिने सै जे पुन्तियुस पिलातुसा रे सामणे खरा अंगीकार कित्या, ये हुक्म देवां 14 भई तु अहारे प्रभु यीशु मसीह रे प्रगट हुणे तका इस हुक्मा जो निष्कलंक कने निर्दोष रखो, 15 तिस्सो जे तिस सही बगता पर दसणा, सै जे परमधन्य कने कल्ला अधीपति कने राजावां रा राजा कने प्रभुआं रा प्रभु आ, 16 कने अमरता सिर्फ तिसरी, कने सै अम्मया जोतीया च रहां, कने ना तिस्सो किसी माळुये देखया

कने ना कदीं देखी सकां। तिसरी प्रतिष्ठा कने राज्य जुग-जुग रैहणां। आमीन।

17 इस संसारा रे धनवांनां जो हुक्म देओ भई सै घमण्डी नीं हो कने चंचल धना पर आशा नीं रखो, पर परमेश्वरा पर सै जे आहारे सुखा खातर सब किछ मता-मता देवां। 18 सै भलाई करो कने भलेयां कम्मां च धनी बणो, कने उद्धार कने मद्द करने च अगो हो, कने अगो खातर इक खरी नींऊं पाई रखो भई सच्चे जीवना जो वशा च करी ले। 19 कने अगो खातर इक खरी नींऊं पाई रखो भई सच्चे जीवना जो वशा च करी लो।

20 हे तीमुथियुस, इस धरोहरा री रखवाली कर; कने तिस ग्याना जो ग्यान बोलणा ही भूल ई, तितरे अशुद्ध बकवास कने वरोधा रियां गल्लां ते दूर रै। 21 कितने ई ग्याना रा अंगीकार करी ने बिस्वासा ते भटकी गरे। तुहां पर अनुग्रह हुन्दा र्हो।

2 तिमथियुस

अभिबादन

1 पौलुसा खा ते सैं परमेशरा री इच्छा ते यीशु मसीह प्रेरित आ कने तिस्सो जे यीशु मसीह च जीवन पाणे री प्रतिज्ञा रा प्रचार करने खातर भेजया गईरा : 2 प्यारे पुत्रा तीमुथियुसा रे नौयें। परम पिता परमेशर कने अहां रे प्रभु यीशु मसीह खाते तिज्जो दया, अनुग्रह कने शान्ति मिलो।

धन्यवाद कने प्रोत्साहन

3 रात दिन अपणियां प्राथनावां च लगातार तिज्जो याद करदे हुये, हऊं तिस परमेशरा रा धन्यवाद करां, कने तिसरी सेवा अपणेयां पुरखेयां रिया रीतिया रे मताबक साफ मना ते करां। 4 मेरे खातर तैं सैं जे आँसू बहाई रे, तिन्हांरी याद करी ने हऊं तेरने मिलणे खातर बेकरार आ, कांभई खुशिया ने भरी जाऊं। 5 मिन्जो तेरा सच्चा विस्वास भी याद आ सैं जे पैहले तेरी नानियां लोईसा कने तेरी या मौआ यूनीके च था। मिन्जो ये भरोसा भई सेई विस्वास तेरे च बी आ। 6 इस खातर हऊं तिज्जो याद दुआये रां भई परमेशरा रे वरदानां रिया तिसा जोतिया जो बाळी रख सैं तिज्जो तां मिली तजे में तेरे परा अपणे हाथ रखे थे। 7 कांभई परमेशरे अहां जो सैं जे आत्म दित्ती री, सैं अहां जो कायर नीं बणांदी पर अहां जो प्रेम, संयम कने ताकता ते भरां ई।

8 इस खातर तू अहां रे प्रभुये या मिन्जो सैं जे तिस खातर बन्धी बणीरा, गवाई देणे ते शर्मान्दा मत। पर तिज्जो परमेशरे ताकत दित्ती री, तिसरे सुसमाचारा खातर सतावा च मेरा साथ दे। 9 तिने ई अहां री रक्षा कित्तीरी कने पवित्र जीवना खातर अहां जो सद्धी रा — अहां रे अपणेयां कम्मां रे मताबक नीं, पर तिसरे अपणे प्रयोजना कने अनुग्रह रे मताबक सैं जे परमेशरे यीशु मसीह च अहां जो पैहले ते अनादि काला ते दईत्या गईरा। 10 पर हुण अहां रे उद्धार कर्ता यीशु मसीह रे प्रकट हूणे सौगी-सौगी अहां खातर प्रकट कित्या गईरा। तिने मौता रा अन्त करीत्या कने अमरता जो सुसमाचारा ते प्रकट कितीरा। 11 इस ई सुसमाचारा जो फैलाणे खातर मिन्जो इक प्रचारक, प्रेरित कने सखाणे औळे रे तौरा पर नियुक्त कित्या गईरा। 12 कने येई वजह ई तिसते जे इन्हां गलां रा दुःख चकेया रां। कने फेरी भीं शर्मान्दा नींआ कांभई तिस पर जे में विस्वास कितीरी रा, हऊं तिस्सो जाणां कने हऊं ये भी मन्नां आ भई तिने मिन्जो जो किछ दित्तीरा, सैं तिस रिया रक्षा करने च समर्थ आ तदुआं तका जे सैं दिन औणा, 13 तिसा खरिया शिक्षा जो सेजे तैं मेरते यीशु मसीह च मिलणे औळे विस्वासा कने प्यारा सौगी सुणिरा सैं जे तु सखावां तिसरा आदर्श सैंई शिक्षा ई। 14 अहां च बसणे औळी पवित्र आत्मा रे द्वारा तु तिस कीमती धरोहरा री रखवाली कर सैं जे तिज्जो मिलीरा।

15 तियां जे तू जाणां भई सैं सारे जे एशिया च रहाये, तिन्हें मिन्जो छड्डी तरा। फुगिलुस कने हिरमुगिनेस तिन्हां च ते ईये। 16 उनेसिफिरुसा रे टबरा पर अनुग्रह हो। कांभई तिन्हें बौहती मौकेयां पर मिन्जो सुख दित्तिरा, कने सैं मेरे जेला च रहणे ते शर्माया नीं आ। 17 पर तजे सैं रोमा च आया था, तां तदुआं तकां जे सैं मेरने नीं मिली गया, तदुआं तका मिन्जो टोलदा रेह्या। 18 प्रभु येदा करो भई तिस्सो, तिस दहाड़े प्रभुये खा ते दया मिलो, तिन्हें इफिसुसा च मेरी लग-लग तरीके ने सेजे सेवा कित्तीरी तू तिन्हां जो खरे दगां ने जाणां।

मसीह यीशुये रा स्वामीभगत सैनिक

2 तेथी तका जे तुहां री गल्ल ई, मेरे पुत्रा, यीशु मसीह च मिलणे औळे अनुग्रह ते पक्का हुई जा। 2 मते सारे लोकां रिया गवाईया ते जो किछ तैं मेरते सुणी रा, तिस्सो तिन्हां विस्वासा जोगेयां माळुआं जो दई दे सैं जे दुजेयां जो भी सखाणे जोगे। 3 सतावा जो सैहणे च मसीह यीशुये रे इक्की खरे सपाईये साई मेरे सौगी मिली जा। 4 येदा कोई भी, सैं जे सपाईये साई सेवा करेया रां, अप्पु जो सधारण जीवना च नीं फसाई लेंदा कांभई सैं अपणे भरती करने औळे जो खुश करने खातर जतन करदा रहवां। 5 कने ईयां ई कुस्तिया च घुलणे औळे, जे नियमा मताबक नीं लडो तां मुकुट नीं लई सकदा। 6 मेहनती करसाणा जो ई फसला रा पैहला हिस्सा मिलणा चाहिंदा। 7 हऊं जो किछ दस्सां तिस पर ध्यान दे, कने प्रभुये तिज्जो सर्बीं गलां री समझ देणी। 8 यीशु मसीह जो याद करदे रओ सैं जे मरिरेयां च ते ज्यूंदा हुई गरा कने सैं जे दाऊदा रे घराने रा। येई तिस सुसमाचारा रा नचोड आ तिसरा जे हऊं प्रचार करां। 9 इस ई खातर हऊं कष्ट सह्या रां। येथी तका भई इक्की अपराधिये साई मिन्जो जंजीरां ने जकडी तया गईरा। पर परमेशरा रा वचन त कैदा ते बाहर आ। 10 इस ई वजह ते परमेशरा रे चुणी रेयां लोकां खातर हऊं हर दुःख सह्यां कांभई सैं बी मसीह यीशुये च मिलणे औळे उद्दारा जो अनन्त महिमा सौगी लई लो। 11 ये वचन विस्वासा जोगा आ भई : जे अहें तिस सौगी मरिरे, तां तिस ई सौगी जीणां, 12 जे दुःखी हुआये तां तिसने सौगी राज भी करना। जे अहें तिस्सो छड्डी देणे, तां तिस भी अहां जो छड्डी देणा, 13 अहें चाहे अविश्वासी भी हुंगे, तां भी सैं विस्वासा जोगा ई बणी रहां, कांभई सैं अप्पु ई अपणा इन्कार नीं करी सकदा।

उत्तम कारीगर

14 इन्हां गलां ते तिन्हां जो चौकन्ना करी दे कने प्रभुये रे सामणे समझाई दे भई सैं शब्दा जो लई ने झगडा नीं करो। येदेयां लडाई-झगडेयां ते कोई फायदा नीं हुंदा, पर सैं जे इन्हां जो सुणाये, सैं भी नाश हुई जावां ये। 15 अप्पु जो परमेशरा रे ग्रहण करने जोगे बणाई ने इक्की येदे सेवका साई ठेहराणे रा जतन कर, तिसते जे किसी गला खातर शर्मिन्दा नीं हुणे पओ, कने सैं जे परमेशरा रे वचना जो ठीक रीतिया च कम्मा च लयाऊदा हो। 16 कने गंदे बकवासा औळियां गलां ते बची रा रह, कांभई ये गलां लोकां जो परमेशरा ते दूर लई जावां ईयां। 17 येदेयां लोकां रियां शिक्षावां नासूरा साई फैलणियां। हुमिनयुस कने फिलेतुस येदे ईये। 18 सैं जे सच्चाईया ते भटकी गरे, तिन्हां रा येदा बोलणा आ भई पुनरुत्थान हुई चुकी रा, कने मतेयां रे विस्वासा जो उलट पलट करी देवां ये। 19 किछ भी हो परमेशरे सैं जे पक्की नींऊं रखी री, सैं पक्की खडी री। तिस पर लिखी रा, “प्रभु अपणेयां भक्तां जो जाणां।” कने “सैं जे प्रभुये रा नौं लेवांये, तिन्हां जो बुराईयां ते बची रैहणा चहिन्दा।”

20 इक्की बड्डे घरा च सिर्फ सोने-चाँदिये रेई बरतन तां नीं हुंदे, तिसच लकड़िया कने मिट्टिया रे भान्डे बी हुआये। किछ खास मतलबा रे हुआये कने किछ रोजके कम्मा खातर। 21 इस खातर जे माळु अप्पु जो बुराईयां ते पवित्र करी लौ तां तिस खास प्रयोगा रे बणी जाणा कने फेरी पवित्र बणी ने अपणे मालका खातर मतलबा रे हुई जाणा, कने किसी बी खरे कम्मा खातर तयार रैहणा। 22 जवानिया रिया बुरियां इच्छावां ते दूर रै धार्मिक जीवन, विस्वास, प्रेम कने शान्तिया खातर तिन्हां सर्बीं सौगी सैं जे साफ मन्ना ने प्रभुये रा नौं

लवाये, जतन करदे रौ। 23 मूर्खता ओळे, बेकारा रेयां विवादां ते सदा बची रे रओ, कांभई तुहें जाणांये भई इन्हां ते लडाई-झगडे पैदा हुआ ये। 24 कने प्रभुये रे सेवका जो तां झगडना ई नीं चहिंदा। तिस्सो तां सर्बी पर दया करनी चहिंदा। तिस्सो सेहणे ओळा हुणा चहिंदा। 25 तिस्सो अपणेया बरोधियां जो भी इसा आशा सौगी भई परमेशर तिन्हां जो भी मन फिरावा री ताकत देंगा, विनम्रता सौगी समझाणा चहिंदा। कांभई तिन्हां जो भी सच्चा रा ज्ञान हुई जाओ। 26 कने सैं चतन्न हुई ने शैताना रे तिस फंदे च ते निकलो तिसच जे शैताने तिन्हां जो पकड़ी ने रखी रा कांभई सैं परमेशरा री इच्छा रा पालन करी सको।

अन्तिम दिनां च अधर्म

3 याद रक्खा आखरी दिनां च अहां परा बौहत बुरा बगत औणा।
2 लोकां आप मतलबी, लालची, घमण्डी, ढीठ, परमेशरा री निन्दा करने औळे, मौ-बुडे रा हुक्म नी मनणे औळे, निर्दयी, अपवित्र, 3 प्रेमा ते बाहर, दया ते बाहर, निन्दक, असंयमी, कठोर, भले रे बैरी, 4 विस्वासघाती, अविवेकी, अहंकारी कने परमेशरा ने प्रेम करने री बजाय सुखा रे ई चाहणे औळे हुई जाणे। 5 तिन्हां धर्मा जो दखाणे खातर तिसरा पालन तां करना पर तिसरिया शक्तिया जो निकारी देणा; येढेयां ते सदा दूर रओ। 6 कांभई इन्हां च ते किछ येढे ये तिन्हां जे घरां च घुस पैठ करिने पापी, कमजोर मना औळियां पापा ते भरी रियां हर किस्मा रियां इच्छावां ते चलणे औळियां जनानां जो अपणे वशा च करी लवाये। 7 ये जनानां सीखणे रा जतन तां सदा करां ईयां, पर सच्चा रे पूरे ज्ञाना तका से कदी मनी पुज्ज दियां। 8 यन्त्रेसे कने यन्त्रेसे तियां जे मूसा रा बरोध कित्या था, तियां ई ये लोक सच्चा रे बरोधी ये। इन्हां लोकां री बुद्धि भ्रष्ट ई कने विस्वासा री पीछा करने च ये असफल ये। 9 पर इना होर जादा अगे नीं बधी पाणा कांभई तियां जे यन्त्रेसा कने यन्त्रेसा री मूर्खता प्रकट हुई गी थी, तियां ई इन्हां री मूर्खता भी सर्बी रे सामणे प्रकट हुई जाणी।

तीमथियुसा जो खाश निर्देश

10 किछ भी हो, तैं मेरीया शिक्षा रा पालने किन्तीरा। मेरा जीणे रा ढंग, जीणे रा मकसद, मेरा विस्वास, मेरी सैहणे री ताकत, मेरा प्रेम, मेरे धीरजा 11 कने मेरीयां तिन्हां यातनावां कने दुःखा रे वक्ता च तैं मेरा साथ दिन्तीरा। तू तां जाणां भई अंताकिया, इकुनियुम कने लुस्त्रा च मिन्जो केडियां बडियां यातनावां दिन्तियां गईयां थियां तिन्हां जे मैं सई लेया था। पर प्रभुये मिन्जो तिन्हां सर्बी ते छुडुवाई लया। 12 असल च परमेशरा री सेवा च सैं जे ईमानदारिया ने जीणा चाह्यांये, सताये ई जाणे। 13 पर पापी कने ठगियां दुजेयां जो धोखा देंदे हुये कने अप्पु धोखा खांदे हुये बुरेयां ते बुरे हुंदे जाणे। 14 पर तुहें तिन्हां गल्लां जो जे सिखया कने मन्नां बी ये, तिन्हां पर चलदे जावा। तुहें जाणांये भई तिन्हां गल्लां जो तैं केडेयां लोकां ते सीखीरा। 15 कने तिजो पता आ भई तू बचपना ते ई पवित्र शास्त्रा जो जाणां आ, ये ई तिजो मसीह पर विस्वास करने ते उद्धार लेणे खातर बुद्धिमान बणाई सकां। 16 सारा पवित्र शास्त्र परमेशरा री प्रेरणा ते रचेया गई रा। सैं लोकां जो सच्चा री शिक्षा देणे, तिन्हां जो सुधारने, तिन्हां जो तिन्हां रीयां बुराईयां दशणे कने धार्मिक जीवन जीणा सखाणे खातर उपयोगी आ। 17 तिसते जे परमेशरा रे सारे सेवक शास्त्रां रा इस्तेमाल करदे हुये हर किस्मा रे खरेयां कम्मां जो करने खातर समर्थ कने साधना सौगी तयार हुई जाओ।

4 परमेशरा जो गवाह जाणी ने कने मसीह यीशुये जो अपणा गवाह बणाई ने तिस जे सर्बी ज्युंदेयां कने सैं जे मेरी गरे तिन्हां रा न्याय करना, कने कांभई तिसरा फेरी औणा कने तिसरा राज्य नेडे आ, हऊं तिजो हुक्म देवां 2 भई तू सुसमाचारा रा प्रचार कर, बगत बे बगत अपणा काम्म करने जो तयार रैं। लोकां जो जो किछ करना चाहिंदा तिन्हां जो समझाई दे। तजे सैं कोई बुरा काम्म करो तां तिन्हां जो चताई दे। लोकां जो धैर्य सौगी समझांदे हुये हिम्मत दे। 3 हऊं येढा इस खातर दस्सेया रां भई इक बगत येढा औणा तजे लोकां खरे उपदेशा जो सुणना भी खरा नीं लगणा। तिन्हां अपणियां इच्छया रे मताबक अपणे खातर बडे उपदेशक कडे करी लेणे। 4 तिन्हां अपणे कान्न सच्चा ते फेरी लेणे कने मन गदंत कहाणियां पर ध्यान देणे लगणा। 5 पर तू निश्च सौगी हर गल्लां च अप्पु चतन्न रैं, दुःखा जो झल कने सुसमाचारा रे प्रचारा रा काम्म कर। सैं जे सेवा तिजो दिन्ती गईरी, तिसा जो पूरा कर।

6 तेथी तका जे मेरी गल्ल ई, हऊं तां हुण अर्घा साई लटेया जावां, कने मेरा इस जीवना जो विदा करने रा बगत आई गरा। 7 मैं खरी कुशती लडी लरी, मैं अपणी दौड पूरी करी लरी, मैं विस्वासा री रक्षा किन्तीरी। 8 हुण जीता रा मुकुट मेरिया नयाह्वा चा, सैं जे मिन्जो धार्मिक जीवना खातर मिलणा। तिस दिन न्याय करने औळे प्रभुये मिन्जो जीता रा मुकुट पहाणा। ना सिर्फ मिन्जो, पर तिन्हां सर्बी जो सैं जे प्यारा सौगी तिसरे प्रकट हुणे जो नयाहल्या रां ये।

व्यक्तिगत संदेश

9 मेरने तितना छोडे जे हुई सको मिलणे खातर औणे रा पूरा जतन करेयां। 10 कांभई इस संसारा रे मोहा च पई ने मिन्जो छड्डी दिन्ती रा कने सैं थिस्सलुनीके जो चली गरा। क्रैसकेंस गलातिया जो कने तीतुस दलमतिया जो चली गरा। 11 सिर्फ लूका ई मेरे ले आ। मरकुसा ला जायां कने तजे तू औणा, तिस्सो अपणे सौगी ली आयां कांभई मेरे कम्मा च सैं मेरी मद्द करी सकां। 12 तुखिकुसा जो हऊं इफिसुसा जो भेजया रां। 13 तजे तू आओ, तां तिस कोटा जो, तिस्सो जे मैं त्रोआसा च करपुसा रे घरा च छड्डी आई रा था, ली आयां। मेरियां कताबां जो, खास करी ने चर्म-पत्रां जो भी ली आयां। 14 ताम्बे रे कम्मां जो करने खातर मिन्जो बौहत नुक्सान पजुवाई रा। तेढा जे किन्हिये किन्तीरा, प्रभुये तिस्सो तेढा ई फल देणा। 15 तू भी इस ते चतन्न रेयां कांभई सैं अहारे उपदेशा रा बरोध करदा रह्यां। 16 शुरु च तजे हऊं अपणा बचाव करने लगेया तां मेरे हका च कोई सामणे नीं आया, पर तिन्हें तां मिन्जो कल्हा छड्डी तया था। परमेशर करो भई तिन्हां जो इसरा हिसाब नीं देणे पओ। 17 मेरे हक्का च तां प्रभुये खडे हुईने मिन्जो ताकत दिन्ती। कांभई मेरे द्वारा सुसमाचारा रा पूरा प्रचार हुई सको, तिस्सो जे सारे गैर यहूदी सुणी पाओ। शेरा रे मुँहा ते मिन्जो बचाई लया गईरा। 18 किसी भी पापा रे हमले ते प्रभुये मिन्जो बचाणा कने अपणे स्वर्गा रे राज्य च सुरक्षित लई जाणा। तिसरी महिमा सदा हुंदी रओ। आमीन।

अन्तिम अभिवादन

19 प्रिसकिल्ला, अक्विला कने उनेसिफुरुसा रे टबरा जो नमस्कार बोलेयां। 20 इरास्तुस कुरिन्थुसा च रुकी गरा। मैं त्रुफिमुसा जो तिसरिया बमारिया रिया वजह ते मिलेतुसा च छड्डी तरा। 21 ठण्डीं ते पैहले औणे रा जतन करेयां। यूबुलुसा, पूदेस, लिनुस कने क्लौदिया कने सर्बी भाईयां रा तिजो नमस्कार। 22 प्रभु तेरने सौगी रओ। तुहां सर्बी पर अनुग्रह हो।

तीतुस

अभिबादन

1 पौलुसा खाते सेजे परमेशरा रा दास कने यीशु मसीह रा प्रेरित आ, परमेशरा रे चुणी रेयां लोकां रे विस्वासा कने तिस सच्चा री पछ्याणा रे मताबक सैं जे भक्तिया रे मताबक आ, 2 तिस अन्नत जीवना री आशा पर तिसरी प्रतिज्ञा जे परमेशरे, सैं जे झूठ नीं बोली सकदा सनातना ते किन्ती री, 3 पर सई वक्ता पर अपणेयां वचना जो तिस प्रचारा ते प्रकट कित्या, सेजे अहां रे उद्धारकर्ता परमेशरा रे हुक्मा मताबक मिन्जो सौंपेया गया।

4 तीतुसा रे नौंवे, सैं जे विस्वासा रिया सहभागिता रे वचारा ते मेरा सच्चा पुत्र आ : परमेशर पिता कने अहांरे उद्धारकर्ता मसीह यीशुये खाते तिज्जो अनुग्रह कने शान्ति मिलदी रौ।

क्रेते च तीतुस रा काम्म

5 हऊं इस खातर तिज्जो क्रेते च छड्डी आया था भई तु बाकी गल्लां जो सुधारो, कने मेरे हुक्मा रे मताबक हर नगरा च प्राचीनां जो नियुक्त करो। 6 सैं जे निर्दोष कने इक्की जनानां रे खरम हो, तिन्हां रे बच्चे विस्वासी हो, कने तिन्हांच लुचपन कने निरंकुशता रा दोष नीं हो। 7 कांभई अध्यक्ष जो परमेशरा रा भण्डारी हुणे रिया वजह ते निर्दोष हुणां चहिंदा; ना जिद्दी, ना पियक्कड़, ना मारपीट करने औळा, ना नीच कमाईया रा लोभी हो, 8 पर आओ बैठ करने औळा, भलाईया रा चाहणे औळा, संयमी, न्यायी, पवित्र कने जितेन्द्रिय हो; 9 कने सैं वचना पर विस्वासा जोगा सेजे धर्मोपदेशा रे मताबका, पक्का रौ भई खरिया शिक्षा ते उपदेश दई सको कने बरोधियां रा मुंह बन्द करी सको।

10 कांभई मते सारे लोक निरंकुश, बकवादी कने धोखा देणे औळे; खाश करी ने खतने औळ्यां चते। 11 इन्हां रा मुंह बन्द करना चाहिंदा ये लोक नीच कमाईया खातर अनुचित गल्लां सखाई ने घरा रे घर बगाड़ी देवाये। 12 तिन्हां च तेई इक्की माळुये, सैं जे तिन्हां रा ई भविष्यवक्ता, बोली रा, “क्रेती लोक सदा झुठे, दुष्ट पशु, कने आलसी पेट हुआंये।” 13 ये गवाई सच ई, इस खातर तिन्हां जो सखतिया ने चेतावनी देया कर भई सैं विस्वासा च पक्के हुई जाओ, 14 कने यहूदियां री कथा कहाणियां कने तिन्हां माळुआं रे हुक्मा पर मन नी लगाओ, सैं जे सच्चा ते भटकी जावाये। 15 शुद्ध लोकां खातर सब चीजां शुद्ध ईयां, पर अशुद्ध कने अविश्वासियां खातर किछ भी शुद्ध नीं आ, पर तिन्हां री बुद्धि कने विवेक दोनां अशुद्ध ये। 16 सैं बोलाये भई अहें परमेशरा जो जाणांये, अपणेयां कम्मां ते तिसरा इन्कार करांये; कांभई सैं घणित कने हुक्म नीं मनणे औळे, कने किसी खरे कम्मा जोगे नींये।

ब्यबहारा रे खातर खरी शिक्षा

2 पर तू येडियां गल्लां बोलया कर सैं जे खरे उपदेशा जोगियां ईयां। 2 मतलब बुदा माळु सचेत, कने गम्भीर, कने संयमी, कने विस्वासा, कने प्रेम, कने धीरजा च पक्का हो। 3 ईयां ई बुडियां जनानां रा चाल-चलन पवित्र लोकां साई हो; सैं दोष लाणे औळियां कने पियक्कड़ नीं, पर खरियां गल्लां सखाणे औळियां हो 4 ताकि सैं जवान जनानां जो चेतावनी देन्दी रौ भई अपणे खसमा कने बच्चेयां ने प्रीति रखो; 5 कने संयमी, कने पतिव्रता, घरा रा काम्म-कार करने औळी, भली कने अपणे-अपणे खस्मा रे अधीन रहणे औळी हो, ताकि परमेशरा रे वचना री निन्दा नीं हुणे पाओ।

6 ईयां ई जवान मर्दा जो भी समझाया कर भई संयमी हों। 7 सर्बीं गल्लां च अप्पु जो भलेयां कम्मां रा नमुना बणा। तेरे उपदेशा च सफाई, गम्भीरता, 8 कने येदी खराई पाई जाओ भई कोई तिस्सो बुरा नीं बोली सको, तिसते जे बरोधी अहां परा कोई दोष लाणे रा मौका नीं पाई ने लज्जित हो।

9 दासां जो समझा भई अपणे-अपणे मालकां रे अधीन रौ, कने सर्बीं गल्लां च तिन्हां जो खुश रखो, कने हटी ने जवाब नीं दओ; 10 चोरी चलाकी नीं करो, पर सारे खाते पुरे विस्वासी निकलो भई सैं सर्बीं गल्लां च अहांरे उद्धारकर्ता परमेशरा रे उपदेशा री शोभा बधाओ।

11 कांभई परमेशरा रा सैं अनुग्रह प्रकट आ, सैं जे सर्बीं माळुआं रे छुटकारे री वजह ई, 12 कने अहां जो चेतावनी देवां भई अहें अभक्ति कने संसारिक अभिलाषावां ते मन फेरी ने इस युगा च संयम कने धर्म कने भक्तिया ने जीवन बताईये; 13 कने तिस धन्य आशा री मतलब अपणे महान परमेशर कने उद्धारकर्ता यीशु मसीह री महिमा रे प्रगट हुणे जो न्याहूदे रईये। 14 तिने जे अप्पु जो अहां खातर दईत्या भई अहां जो हर किस्मा रे अधर्मां ते छुड़ाई लो, कने शुद्ध करी ने अपणे खातर इक येदी जाति बणाई लो सैं जे भले-भले कम्मां च सरगर्म हो।

15 पुरे अधिकारा सौंगी इन्हां गल्लां जो बोल, कने समझांदा रैं। कोई तिज्जो बेकार नीं समझणे पाओ।

मसीही चाल-चलन

3 लोकां जो याद दिलावा भई अधिकारियां रे अधीन रौ, तिन्हां रा हुक्म मन्नो, कने हरेक खरे कम्मा खातर तैयार रौ, 2 किसी जो बदनाम नीं करो, झगड़ने औळे नीं बणो; पर नरम स्वभावा रे हो, कने सर्बीं माळुआं सौंगी बडिया नरमयाईया ने रौ। 3 कांभई अहें भी पैहले निर्बुद्धि कने हुक्म नीं मनणे औळे, कने भरमा च पई रे थे कने लग-लग किस्मा री अभिलाषा कने सुख विलासा रे दास थे; कने बैर भाव, कने डाह करने च जिन्दगी बतावां थे, कने घृणित थे, कने इक्की दुजे ते बैर रखां थे। 4 पर तजे अहांरे उद्धारकर्ता परमेशरा रि कृपा कने माळुआं पर तिसरा प्रेम प्रगट हुआ, 5 तां तिने अहांरा उद्धार कित्या; कने येदा धर्मा रे कम्मां रिया वजह ते नीं, सैं जे अहें अप्पु कित्ते, पर अपणियां दया रे मताबक नौंये जन्मा रे स्नान, पवित्र आत्मा ते अहां जो नवां बनाणे ते हुआ। 6 तिस्सो जे तिने अहांरे उद्धारकर्ता यीशु मसीह रे द्वारा अहां परा मता सारा दित्या था। 7 तिसते जे अहें तिसरे अनुग्रह ते धर्मी ठेहरे थे, अन्नत जीवना री आशा रे मताबक बारस बणे।

8 ये गल्ल सच ई, कने हऊं चाह्वां भई तू इन्हां गल्लां रे बारे च पकयाईया ने बोलो इस खातर भई तिने जे परमेशरा पर विस्वासा कित्या, सैं भले-भले कम्मां च लगी रहणे रा ध्यान रखो। ये गल्लां भलीयां कने माळुआं रे फायदे रियां ईयां। 9 पर मूर्तिया रे विवादां कने वंशावलियां, कने बरोध, कने झगडे सैं जे व्यवस्था रे बारे च हो, बची रा रैं; कांभई सैं निष्फल कने बेकारे। 10 किसी पाखण्डिये जो इक या दो बार समझाई बुझाई ने तिसते लग रैं, 11 येदा जाणी ने भई येदा माळु भटकी गरा, कने अप्पु जो दोषी ठेहराई ने पाप करदा रहवां।

ब्यक्तिगत निर्देश कने अभिबादन

12 तजे हऊं तेरे ला अरतिमास या तुखिकुसा जो भेजुं तां मेरे ला निकुपुलिस जो औणे रा जतन करेयां, कांभई मैं तेथी ठण्ड कटणे रा निश्चर कित्ती रा। 13 जेनास व्यवस्थापक कने अपुलोसा जो जतन करी ने अगे पजुआई दे, कने ध्यान रखेयां भई तिन्हां जो किसी चीजा रा घाटा नीं हुई

जाओ। ¹⁴ अहारे लोकां रीयां जरुरतां पुरियां करने खातर खरेयां कम्मां च लगी रैहणा सीख, ताकि निष्फल नीं रौ। ¹⁵ मेरे सबीं साथियां रा तिञ्जो

नमस्कार। सै जे विस्वासा रिया वजह ते अहां ने प्रीति रखांये, तिन्हां जो नमस्कार। तुहां सबी पर अनुग्रह हुन्दा रौ।

फिलेमोन

अभिवादन

1 पौलुसा खाते सैं जे मसीह यीशु रा कैदी आ, कने भाई तीमुथियुसा खाते अहारे प्रिय सहकर्मी फिलेमोन, 2 कने बैहण अफफिया, कने अहारे साथी योद्धा अरखिप्पुस कने फिलेमोन रे घरा री कलीसिया रे नौये : 3 आहां रे पिता परमेश्वर कने प्रभु यीशु मसीह खाते अनुग्रह कने शान्ति तुहां जो मिलदी रौ।

फिलेमोन रा प्रेम कने बिश्वास

4 हऊं सदा परमेश्वर रा धन्यवाद करां, कने अपणिया प्राथना च भी तुहां जो याद करां, 5 कांभई हऊं तेरे तिस प्रेम कने विस्वासा री चर्चा सुणां, सैं जे सब पवित्र लोकां सौगी कने प्रभु यीशु पर ई। 6 हऊं प्राथना करां भई विस्वासा च तेरा सहभागी हुणा, तेरी सारिया भलाईय रिया पछ्याणा च, मसीह पछ्याणा च, मसीह खातर प्रभावशाली हो। 7 कांभई हे भाई, मिन्जो तेरे प्रेमा ते बौहत खुशी कने शान्ति मिलीरी, इस खातर भई तेरे जरिये पवित्र लोकां रे मन हरे भरे हुई गरे।

उनेसिमस रे खातर निबेदन

8 इस खातर भई मिन्जो मसीह च बड़ी हिम्मत ई भई सैं जे गल्लां ठीक ई यां, तिन्हां रा हुकम तिजो देऊं। 9 तां भी मुझ बुढे पौलुसा जो सैं जे हुण मसीह यीशु खातर कैदी आ, येदा होर भी खरा जाणेया भई प्यारा नैं विनती करूं। 10 हऊं अपने बच्चे उनेसिमसा खातर, सैं जे मेरे ते मेरिया कैदा च जम्मी रा, तेरने विनती करां। 11 सैं तां पैहले ई तेरे किछ कम्मा रा नी था, हुण तेरे कने मेरे दुई रे बडे कम्मा रा। 12 तिस्सो ई मतलब सैं जे मेरे दिला रा

टुकड़ा आ, मैं तेरे ला भेजी रा। 13 तिस्सो हऊं अप्पु लेई रखणा चाह्नां था भई सैं तेरिया खाते कैदा च सुसमाचारा रिया वजह तेई, मेरी सेवा करो। 14 पर मैं तेरिया इच्छा ते बिना किछ भी करना नीं चाहया, भई तेरी ये कृपा दवाबा ते नीं पर खुशिया ने हो।

15 कांभई क्या पता सैं तेरते थोड़ेया दिनां खातर इस वजह ते लग हुआ भई सदा तेरे नेडे रहो। 16 पर हुणा ते दासा साई नीं पर दासा ते भी खरा, मतलब भाईये साई रौ, सैं जे मेरा तां खाश प्यारा हया ईआ, पर हुण शरीरा च कने प्रभुये च भी, तेरा भी खाशा प्यारा हो। 17 इस खातर जे तु मिन्जो अपना सहभागी समझां, तां तिस्सो ईयां ग्रहण कर तियां जे मिन्जो करां। 18 जे तिने तेरा किछ नुकसान किन्ती रा, या तिस तेरा किछ देणा; तां मेरे नौवा पर लिखी ले। 19 हऊं पौलुस अपने हत्था ते लिखां भई मांह अप्पु भरी देणा; कने इसरे बोलणे री किछ जरूरत नीं भई मेरा कर्ज सैं जे तेरे परा सैं तु ईआ। 20 हे भाई, ये खुशी मिन्जो प्रभुये च तेरिया खाते मिलो। मसीह च मेरे दिला जो हरा-भरा करी दे।

21 हऊं तेरे आज्ञाकारी हुणे रा भरोसा रखी ने तिजो लिखां, येदा जाणां भई जो किछ हऊं बोलां, तु तिसते बौहत बधी ने करना। 22 कने ये भी भई मेरे खातर ठेहरने री जगहा तैयार रख। मिन्जो आशा ई भई तुहां रिया प्राथनावां जे हऊं तिजो दई दित्या जांगा।

अन्तिम अभिवादन

23 इपफ्रास, सैं जे मसीह यीशुये च मेरे सौगी कैदी आ, 24 कने मरकुस कने अरिस्तर्खुस कने देमास कने लूका सैं जे मेरे सहकर्मी ये, इन्हां रा तिजो नमस्कार। 25 अहारे प्रभु मसीह रा अनुग्रह तुहांरिया आत्मा पर हुन्दा रौ। आमीन।

इब्रानियों

परमेश्वर रा बचन, पुत्रा रे जरिये

1 पैहल के युगा च परमेश्वरे बापदादेयां ने थोड़ा-थोड़ा करी ने कने लग-लग भविष्यवक्तावां ते गल्ल करी ने, 2 इन्हां आखरी दिनां च अहां ने पुत्रा रे जरिये गल्लां कित्तियां, तिस्सो जे तिने सारियां चीजां रा वारस ठैहराया, कने तिसरे ई जरिये तिने सारियां सृष्टिया री रचना कित्ती। 3 सैं तिस रिया महिमा री लोई कने तिसरे तत्वा री छाप ई, कने सर्बी चीजां जो अपणिया सामर्था रे वचनां ते सम्भालां। सैं पापां जो धोई ने उच्चिया जगह पर महामहीमन रे सज्रिया खा बैठया; 4 कने स्वर्गदूतां ते तितना ई उत्तम ठैहरया, तितना जे तिने तिन्हां ते बड़े पदा रा वारस हुई ने उत्तम नाँ पाया,

परमेश्वर-पुत्रा री महानता

5 कांभई स्वर्गदूतां च ते तिने कर्दी किसी ने बोलया, "तू मेरा पुत्र आ, आज तू मेरेते पैदा हुया?" कने फेरी ये, "मांह तिसरा पिता हुणा, कने तिस मेरे पुत्र हुणा?" 6 कने तजे पैहले जम्मी रे जो संसारा च फेरी लयावां, तां बोलां, "परमेश्वर रे सब स्वर्गदूत तिस्सो दण्डवत करो।" 7 कने स्वर्गदूतां रे बारे च ये बोलां, "तिस अपणेयां दूतां जो हवा, कने अपणेयां सेवकां जो भड़की रिया अग्गी साई बनाणा।" 8 पर पुत्रा रे बारे च बोलां, "हे परमेश्वर, तेरा सिंहासन युगानयुग रहणा : तेरे राजा रा राज-दण्ड न्याय रा राज-दण्ड आ। 9 तैं धर्मिये ने प्रेम कने अधर्मिये ने बैर रखया; इस वजह ते परमेश्वरे, तेरे परमेश्वरे, तेरे साथियां ते बधी ने खुशिया रे तेला ते तेरा अभिषेक कित्या।" 10 कने ये भई, "हे प्रभु, आदि च तैं धरतिया री नीऊं पाई कने स्वर्ग तेरे हत्थां री कारीगरी ई। 11 तिन्हां त नाश हुई जाणां, पर तू बणी रे रहणा; कने तिन्हां सर्बी कपड़ेयां साई पुराणे हुई जाणां, 12 कने तू तिनां चादरी साई लपेटणा, कने तिन्हां जो कपड़ेयां साई बदलना : पर तू सैई आ कने तेरयां सालां रा अन्त नीं हुणां।" 13 कने स्वर्गदूतां च ते तिने किसने कदी बोलया, "तू मेरे सज्रिया खा बैठ, तदुआं तकां जे हऊं तेरे बैरियां जो तेरे पैरां रे हैठा रा पटडू नीं बणाई दू?" 14 क्या सैं सब आओ बैठ करने औळियां आत्मांयें नीं आ, सैं जे मुक्ति पाणे औळियां खातर सेवा करने जो भेजियां जावां ईयां?

महान उद्धार

2 इस वजह ते चाहिन्दा भई अहें तिन्हां गल्लां पर सैं जे अहें सुणी रियां, होर भी मन लाओ, येदा नीं हो भई बैहकी ने तिन्हां ते दूर चली जाओ। 2 कांभई सैं जे वचन स्वर्गदूतां ते बोलया गया था। तजे सैं पक्कां रैया कने हरेक अपराधा कने हुक्मां जो नीं मनणे रा ठीक-ठीक बदला मिलया, 3 तां अहें लोक इतने बड़े उद्धारा ते बेफिक्र रई ने कियां बची सकांये? तिसरी चर्चा जे सबते पैहले प्रभुये रे द्वारा हुई, कने सुणने औळियां रे जरिये अहां जो इसरा निश्चा हुया। 4 कने सौगी-सौगी परमेश्वर भी अपणिया इच्छा मताबक नशाण,

कने नोखे काम्म, कने लग-लग किस्मा रे सामर्था रे काम्म, कने पवित्र आत्मा रे वरदाना रे बधणे ते तिसरी गवाही देन्दा रैया।

अहांरा मुक्ती दाता

5 तिने अहां जो औणे औळे तिस जगता री तिसरी चर्चा जे अहें करेया रां ये, स्वर्गदूतां रे अधीन नीं कित्या। 6 पर किन्हिये ये गवाई दित्ती री, "माळु क्या भई तू तिसरी खबर लवां? या माळुआं रा पुत्र क्या भई तू तिसरी चिन्ता करां? 7 तैं तिस्सो स्वर्गदूतां ते थोड़ा ई घट कित्या, तैं तिस पर महिमा कने आदरा रा मुकुट रखया, कने तिस्सो अपणे हत्थां रे कम्मां पर अधिकार दित्या। 8 तैं सब कुछ तिसरे पैरां हेठ करी तया।" इस खातर तजे तिने सब कुछ तिसरे अधीन करी तया, तां तिने कुछ भी नीं रखया सैं जे तिसरे अधीन नीं हो। पर अहें हुण तकां सब किछ तिसरे अधीन नीं देखदे। 9 पर अहें यीशुये जो स्वर्गदूतां ते कुछ ई घट कित्या गया, मौता रा दुःख सैहणे रिया वजह ते महिमा कने आदरा रा मुकुट पैहनी रे देख्खां ये, ताकि परमेश्वर रे अनुग्रह ते सैं हर इक माळुये खातर मौता रा स्वाद चक्खो। 10 कांभई तिस खातर जे सब कुछ आ कने तिसरे जरिये जे सब कुछ आ, तिस्सो ये खरा लगया भई तजे सैं मतयां पुत्रां जो महिमा च पुजुआओ, तां तिन्हांरे उद्धार करने औळे जो दुःख सैहणे रे जरिये सिद्ध करो। 11 कांभई पवित्र करने औळा कने सैं जे पवित्र कित्ते जावांये, सब ई इक्की मुळा रे; इस वजह ते सैं तिन्हां भाई बोलणे ते नीं शर्मान्दा। 12 सैं बोलां, "मांह तेरा नाँ अपणे भाईयां जो सुनाणां; सभा रे अन्दर मांह तेरा भजन गाणा," 13 कने फेरी येदा, "मांह तिस पर भरोसा रखणां।" कने फेरी येदा, "देख, मांह तिन्हां लड़केयां सौगी सैं जे मिंजो परमेश्वरे दित्ती रे।" 14 इस खातर तजे लड़के माँस कने लहुये रे भागी ये, तां सैं अप्पुं भी तिन्हां साई तिन्हांरा सहभागी हुई गया, भई मौता रे द्वारा तिस्सो, तिस्सो जे मौता पर ताकत मिली री थी, मतलब शैताना जो नक्मा करी दो; 15 कने तितने जे मौता रे डरा रे मारे जिन्दगी भर दासत्व च फँसी रे थे, तिन्हां जो छडवाई लो। 16 कांभई सैं त स्वर्गदूतां जो नी पर अब्राहमा रे वंशा जो संभालां। 17 इस वजह ते तिस्सो चाहिन्दा था, भई सर्बी गल्लां च अपणे भाईयां साई बणो; तिसते जे सैं तिन्हां गल्लां च सैं जे परमेश्वर ने जुड़ी रियां, इक दयालु कने विस्वासा औळा महायाजक बणो ताकि लोकां रे पापां खातर प्रायश्चित्त करो। 18 कांभई तजे तिने परीक्षा रिया घडिया च दुःख सहाया, तां सैं तिन्हां री भी मदद करी सकां तिन्हांरी जे परीक्षा हुआई।

यीशु मूसा ते महान

3 इस खातर हे पवित्र भाईयो, तुहें सैं जे स्वर्गा रिया बुलाहटा च भागी ये, तिस प्रेरित कने महायाजक यीशुये पर तिस्सो जे अहें अंगीकार करां ये, ध्यान करा। 2 सैं अपणे नियुक्त करने औळे खातर विस्वास लैक था, तेदा जे मूसा भी परमेश्वर रे सारे घरा च था। 3 कांभई यीशु मूसा ते इतना बधी ने महिमा लैक समझया गईरा, तितना जे घरा रा बनाणे औळा घरा ते बधी ने आदर रक्खां। 4 कांभई हर इक घरा रा कोई न कोई बनाणे औळा

हुआं, पर तिनै जे सब किछ बनाया सै परमेशर आ। 5 मूसा त परमेशरा रे सारे घरा च सेवका साईं विस्वास लैक रैया भई तिन्हां गल्लां रा जे वर्णन हुणे औळा था, तिन्हारी गवाई देओ। 6 पर मसीह पुत्रा साईं परमेशरा रे घरा रा अधिकारी आ; कने तिसरा घर अहें, जे अहें हिम्मता पर कने अपणिया आशा रे घमण्डा पर अन्नत तकाँ पक्के बणी ने टीकी रे रौ।

अबिश्वासा रे परति चेताबनी

7 इस खातर तेदा जे पवित्र आत्मा बोलां,
 “जे आज तुहें तिसरी अवाज सुणो,
 8 तां अपणे मना जो सख्त नीं करा,
 तेदा जे गुस्सा चढ़ाणे रे वक्त
 कने परीक्षा रे रोज जंगला च कित्या था।
 9 तेथी तुहारे बापदादेयां मिंजो जांची ने परखेय कने
 40 सालां तकाँ मेरे काम्म देखे।
 10 इस वजह ते हऊं तिस जुगा रे लोकां ते गुस्से रैया,
 कने बोलया, ‘इन्हां रे मन सदा भटकदे रैयें,
 होर इन्हें मेरे रस्तयां जो नीं पछयाणया।
 11 तां मैं गुस्से च आईं ने कस्म खादी,
 ‘इन्हां मेरे विश्रामा च प्रवेश नीं करने पाणां।”
 12 हे भाईयो, चत्तन रौआ भईं तुहां च येदा बुरा कने अबिश्वासी मन नीं हो,
 सै जे तुहां जो जिन्दा परमेशरा ते दूर करी दो। 13 पर तिस दिना तकाँ अज्रा
 रा दिन बोलांये, हर रोज इक्की दुज्जे जो समझांदे रौआ, येदा नीं हो भईं तुहां च
 ते कोई माह्लु पापां रे छला च आईं ने कठोर हुई जाओ। 14 कांभईं अहें मसीह
 रे भागीदार हुईं ने, जे अहें अपणे पैहले भरोसे पर अन्त तकाँ पक्के हुईं ने टिकी
 रे रौ। 15 तेदा जे बोलेया जां,
 “जे आज तुहें तिसरी अवाज सुणां ये,
 तां अप्पु जो कठोर नीं करा, तेदा जे गुस्सा चढ़ाणे रे वक्त कित्या गया
 था।”
 16 भला किनें लोकें सुणी ने बी गुस्सा दुआया क्या तिन्हें सर्बीं नीं, सै जे
 मूसा द्वारा मिस्र ते निकले थे? 17 कने सै चाळियां सालां तकाँ किन्हां लोकां
 ने गुस्से रैया? क्या तिन्हां ने नीं तिन्हें जे पाप कित्या, कने तिन्हां रियां लाशां
 जंगला च पईं रियां रैईयां? 18 कने तिनै किन्हां ने कसम खादी भईं तुहां जो
 मेरे विश्रामां ज औणे नीं मिलणा? क्या सिर्फ तिन्हां ने नीं तिन्हें जे हुक्म नीं
 मनया? 19 इस खातर अहें देख्यां ये भईं सै अविश्वासा रिया वजह ते नीं
 जाईं सके।

परमेशरा रे लोकां रा बिस्वाम

4 इस खातर तजे तिसरे आरामा च जाणे री प्रतिम्या अजें तकाँ हईं, तां
 अहां जो डरना चाहिन्दा येदा नीं हो भईं तुहां च ते कोई माह्लु तिसते
 वंचित रईं जाओ। 2 कांभईं अहां जो तिन्हां ईं साईं सुसमाचार सुणाया गईरा,
 पर सुणी रियां वचना ते तिन्हां जो कुछ फायदा नीं हुया; कांभईं सुणने औळ्या
 रे मनां च विस्वासा सौगी नीं बैठया। 3 पर अहें तिन्हें जे विस्वास कित्या,
 तिस विश्रामा च जावांये; तेदा जे तिन्हें बोलया, “मैं अपणे गुस्से च कसम
 खादी भईं तिन्हां मेरे विश्रामा च औणे नीं मिलणा।” तां बी जगता रिया
 उत्पतिया रे वक्ता ते तिसरे काम्म पूरे हुईं चुक्की रे थे। 4 कांभईं सतवें दिनां रे
 बारे च तिनै किती येदा बोली रा, “परमेशरे सतवें दिन अपणे सब कम्मां जो
 नपटाईं ने रमान कित्या।” 5 कने इसा जगह फेरी येदा बोलां,
 “तिन्हां जो मेरे विश्रामा च औणे नीं मिलणा।”
 6 तां तजे ये गल्ल बाकि हाईं भईं कितने होर ये तिन्हां जे तिस विश्रामा च
 जाणां। कने तिन्हां जो जे तिसरा सुसमाचार पैहले सुणाया गया, तिन्हें हुक्म
 नीं मनणे रिया वजह ते तिस च प्रवेश नीं कित्या, 7 इस खातर सै किसी खास
 दिना जो ठैहराईं ने इतने दिनां ते बाद दाऊदा रिया कताबा च तिस्सो
 ‘अज्र का दिहाड़ा’ बोलां। तेदा जे पैहले बोलया गया,
 “जे आज तुहें तिसरी आवाज सुणो, तां अपणे मनां जो कठोर नीं करा।”

8 कांभईं जे यहोशू तिन्हां जो आरामा च लईं जांदा, तां तिसते बाद दुज्जे
 दिनां री चर्चा नीं हुंदी। 9 इस खातर जाणी लवा भईं परमेशरा रे लोकां खातर
 सब्ता रा विश्राम बाकि आ; 10 कांभईं तिन्हें जे तिसरे विश्रामा च प्रवेश किती
 रा, तिन्हें बी परमेशरा साईं अपणेयां कम्मां जो पूरा करी ने विश्राम किती रा।
 11 इस खातर अहें तिस विश्राम चा जाणे री कोशिश करिये, येदा नीं हो भईं
 कोई आदमी तिन्हां साईं हुक्म नीं मनीं ने गिरी जाओ। 12 कांभईं परमेशरा रा
 वचन जीवित, प्रबल, कने हरेक दोधारिया तलवारा ते भी बौहत चोखा; कने
 प्राण कने आत्मा जो, कने गठीं-गठीं, गुदे-गुदे जो लग करी ने आर-पार छेदी
 दां, कने मनां रियां भावनावां कने वचारां जो जांचां। 13 सृष्टिया री कोई भी
 चीज तिसते छिपी री नीं पर तिसते जे अहां जो काम्म आ, तिसरियां आकर्षीं
 रे सामणे सब चीजां खुलियां कने प्रगट रियां।

बड्डा महायाजक

14 इस खातर तजे अहां रा येदा बड्डा महायाजक आ, सै जे स्वर्गा चीयें गईं
 रा; मतलब परमेशरा रा पुत्र यीशु, तां आवा, अहें अपणे अंगीकारा जो पक्के हुईं
 ने थम्मी रखिये। 15 कांभईं अहां रा येदा महायाजक नीं आ सै जे अहां रियां
 कमजोरियां च अहां सौगी दुःखी नीं हुईं सक्को; पर सै सर्बीं गल्लां च अहां साईं
 परखेया त गया, तां भी निष्पाप निकलया। 16 इस खातर आवा, अहें अनुग्रह
 रे सिहासणा रे नेडे हिम्मत रक्खी ने चलीये भईं अहां परा दया हो, कने सै
 अनुग्रह पाओ सै जे जरूरता रे वक्त अहांरी मदद करो।

5 कांभईं हर इक महायाजक माह्लुआं च ते लया जांवां कने माह्लुआं ईं
 खातर, तिन्हां गल्लां रे बारे च सै जे परमेशरा ने जुडी रियां, ठेहराया
 जांवां भईं भेंट कने पाप बलि चढ़ाया करो। 2 सै अणजाणां ने भुलेयां-भटकेयां
 सौगी नर्मयायिया ने ब्यबहार करी सक्कां, इस खातर भईं सै अप्पु बी
 कमजोरिया ने घिरी रा। 3 इस खातर तिस्सो चाहिन्दा भईं तियां जे लोकां
 खातर तियां ईं अप्पु खातर भी पापां री बलि चढ़ाया करो। 4 ये आदरा रा पद
 कोई अप्पु ते ईं नीं लेन्दा, तदुंआ तकाँ जे हारुना साईं परमेशरा खाते नीं
 ठेहराया नीं जाओ।

5 तियां ईं मसीहे भी महायाजक बणने री बड्याईं अप्पु ईं नीं लईं, पर
 तिस्सो तिनै ईं दित्ती, तिनै जे तिसने बोलया था,

“तु मेरा पुत्र आ,
 आज मैं ईं तिज्जो पैदा किती रा।”

6 इयां ईं सै दुज्जिया जगह च बोलां,
 “तू मलिकिसिदक रिया रीतिया पर सदा खातर याजक आ।”

7 यीशुये अपणिया देहा च रैहणे रे दिना च उच्चिया अवाजा च हाक पाईं-पाईं
 ने कने आंशु बहाईं-बहाईं ने तिसने सै जे तिस्सो मौता ते बचाईं सक्कां था;
 प्राथना कने विनती किती, कने भक्तिया रिया वजह ते तिसरी सुणी गईं।

8 पुत्र हुणे पर बी तिनै दुःख सही-सही ने हुक्म मनणा सिखया, 9 कने सिद्ध
 बणीं ने, अपणे सब हुक्म मनणे औळ्यां खातर सदा काल रे उद्दारा री वजह
 बणया, 10 कने तिस्सो परमेशरा खाते मलिकिसिदक रिया रीतिया पर
 महायाजक रा पद मिलया।

बिश्वासा ते भटकणे रा नतीजा

11 इसरे बारे च अहां मत्तियां सारीयां गल्लां बोलणियां, तिन्हां रा समझाणा
 भी कठिन आ, इस खातर भईं तुहें उच्चे सुणने लगीं रे। 12 वक्ता रे हिसाबा ने
 त तुहां जो गुरु बणी जाणा चाहिन्दा था, तां बी ये जरूरी हुईया भईं कोई तुहां
 जो परमेशरा रे वचना री शुरु री शिक्षा फेरी ते सखाओ। तुहें त येदे हुईं गरे
 भईं तुहां जो अनाजा रे बदले हुणां तकाँ बी दुध ईं चाहिंदा। 13 कांभईं दुध
 पीणे औळे बच्चे जो त धर्मा रे वचनां री पछयाण नीं हुंदी, कांभईं सै बालक
 आ। 14 पर अन्न सयाणेयां खातर आ, तिन्हां रियां ग्यानद्रेयां अभ्यास करदे-
 करदे भले-बुरे रे भेद करने च निपुण हुईं गरियां।

6 इस खातर आवा मसीह री शिक्षा रियां शुरु रियां गल्लां जो छड्डी ने अहें
 सिद्धता खॉं अग्रे बढे जाईये, कने मरीरियां कम्मां ते मन फिराणे, कने
 परमेशरा पर विस्वास करने, 2 कने बपतिस्मेयां कने हाथ रखणे, कने मरीरे
 यां रे जी उठणे, कने आखरी न्याय री शिक्षा रुपी नीऊ फेरी भीं नीं पाईये।

3 जे परमेशर चाओ तां अहें येदा ई करणे। 4 कांभई तिने जे इक बार ज्योति पाई री, कने तिने जे स्वर्गीय वरदाना रा स्वाद चखी लरा कने पवित्रात्मा रे भागी हुई गरे, 5 कने परमेशरा रे खरेयां वचना रा कने औणे ओळ्हे युगा री सामर्था रा स्वाद चखी चुकी रे, 6 जे सै भटकी जाओ तां मन फिरावा खातर फेरी नंवां बणना अनहोना; कांभई सै परमेशरा रे पुत्रा जो अपणे खातर फेरी भी क्रुसा पर चढावांये कने सामणे-सामणे तिस पर कलंक लगावांये। 7 कांभई सै जे धरती बरखा रे पाणिये जो, सै जे तिसा पर बार-बार पवां, पी-पी ने तिन्हां लोकां खातर जे बाही-कमाई जांवांई तिन्हांरे कम्मा रा साग-पात पैदा करांई, सै परमेशरा ते आशीष पांवांई। 8 पर जे सै झाडियां कने कण्डे पैदा करांई, तां नकम्मी कने श्रापां ओळ्ही हुणे जो ई, कने तिसारा अन्त फुकणा ई आ।

9 पर हे प्यारो, तां अहें ये गल्लां बोलांये तां बी तुहारे बारे च अहें इसते खरियां कने उद्धारा ओळियां गल्लां रा भरसा करां ये। 10 कांभई परमेशर अन्याई नीं आ भई तुहारे काम्म, कने तिस प्रेमा जो भूली जाओ, सै जे तुहें तिसरे नौं खातर ईयां-ईयां दसया, भई पवित्र लोकां री सेवा किती कने करेया बी करां ये। 11 पर अहें बौहत चाहांये भई तुहां च ते हरेक जन अन्त तकां पुरिया आशा खातर येदा ई कोशिश करदा रौ। 12 भई तुहें आलसी नीं हुई जाओ, पर तिन्हां रा अनुकरण करा सै जे विस्वास कने धीरजा सौगी प्रतिग्या रे वारस हुआंये।

परमेशरा रा अटल बायदा

13 परमेशरे अब्राहमा ने बायदा करदे वक्त तजे कसम खाणे खातर किसी जो अपणे ते बड्डा नीं पाया, तां अपणी कसम खाई ने बोलया, 14 “हऊं सचमुच तिजो बौहत आशीष देंगा, कने तेरियां ओळ्हादां जो बधांदा जांगा।” 15 कने ईयां-ईयां तिने धीरज धरी ने प्रतिग्या किती गल्ल लई ली। 16 माहू तां अपणे ते किसी बड्डे री कसम खावांये, कने तिन्हां रे हर इक विवादा रा फैसला कसमा ते ई पक्का हुआं। 17 इस खातर तजे परमेशरे प्रतिग्या रे वारसां पर होर बी साफ रीतिया ने प्रगट करना चाह्या भई तिसरा मकसद बदली नीं सकदा, तां कसमां जो बिच लंदेया। 18 भई दो नीं बदलोणे ओळियां गल्लां ते, तिन्हांरे बारे च परमेशरा रा झूठा ठैहरना अनहोना, पक्के हुई ने अहांरी हिम्मत बज्झी जाओ, सै जे शरण लेणे जो इस खातर दौडे भई तिस आशा जो सै जे सामणे रखी री लई लो। 19 सै आशा अहारे प्राणां खातर येदा लंगर आ सै जे पक्का कने दूढ आ, कने परदे रे अन्दरा तकां पुज्जां, 20 तेथी जे यीशुये मलिकिसिदक रिया रीतिया पर सदा खातर रा महायाजक बणी ने, अहां खातर अगुवे साई प्रवेश कितीरा।

मलिकिसिदक याजक

7 ये मलिकिसिदक शलेमा रा राजा, कने परमप्रधान परमेशरा रा याजक, सदा याजक बणी रा रह्हां। तजे अब्राहम राजेयां जो हराई ने वापस आया रां था, तां इने ई तिसने मिली ने तिस्सो आशीष दिती थी। 2 इस्सो ई अब्राहमे सबी चीजां रा दसवां अंश भी दित्या, ये पैहले अपणे नौवां रे मतलबा रे मताबक, धर्मा रा राजा, कने फेरी शालेम मतलब शान्तिया रा राजा आ। 3 तिसरा जे ना पिता, ना माता, ना वंशावली, इसरे दिनां री न शुरुआत ई न अन्त आ कने न जीवना रा अन्त आ; पर परमेशरा रे पुत्रा साई ठैहरी ने सै सदा खातर याजक बणीरा रह्हां।

4 पर इस पर ध्यान करा भई सै केदा महान था तिस्सो जे कुलपति अब्राहमे लूटा रे खरे-खरे माला रा दसवां अंश दित्या। 5 लेवियां री सन्ताना च ते सै जे याजकां रा पद लवांये, तिन्हां जो हुक्म मिलीरा भई लोकां, मतलब अपणे भाईयां ते, चाहे सै अब्राहमा री ई देहा ते कै नीं जम्मी रे हो, व्यवस्था रे मताबक दसवां अंश लओ। 6 पर इनें, सै जे तिन्हां रियां वंशावल्यां च ते भी नीं था, अब्राहमा ते दसवां अंश लेआ, कने तिस्सो जे प्रतिग्या मिली थी तिस्सो आशीष दिती थी। 7 इस च कोई शक नीं आ भई बड्डे ते छोटा आशीष पांवां। 8 कने येथी तां मरणहार माहू दसवां अंश लवांये, पर तेथी सै ई लवां तिसरी जे गवाई बी दिती जाई भई सै जीऊंदा। 9 तां अहें येदा बी बोली सकां ये भई लेवीय बी, सै जे दसवां अंश लेवांये, अब्राहमा ते

दसवां अंश दवाया। 10 कांभई तिस वक्त मलिकिसिदके तिसरे पिते ने भेंट किती, तिस वक्त सै अपणे पिते रिया देहा च था।

मलिकिसिदका रे साई दूजा याजक

11 जे लेवीय याजक पदा ते सिद्धी पाई सकांये (तिसरे सहारे जे लोकां जो व्यवस्था मिली थी) तां फेरी क्या जरूरत थी भई दूजा याजक मलिकिसिदक रिया रीतिया पर खडा हो, कने हारूना रिया रीतिया रा नीं बोलया जाओ? 12 कांभई तजे याजका रा पद बदलेया जांवां, तां व्यवस्था रा बी बदलना जरूरी आ। 13 कांभई तिसरे बारे च जे ये गल्लां बोलीयां जांवां ईयां भई सै दुज्जे गोता रा, तिस चा ते जे किन्हिये बी वेदिया री सेवा नीं किती, 14 तां प्रगट आ भई अहारा प्रभु यहूदा रे गोता च ते निकली रा, कने इस गोत्रा रे बारे च मूसे याजक पदा री कुछ चर्चा नीं किती।

15 अहारा दावा आ कने ये स्पष्ट कने होर बी साफ तौरा पर प्रगट आ भई हुई जांवां, तजे मलिकिसिदक साई इक होर याजक पैदा हुई जां, 16 सै जे शारीरिक हुक्मा रिया व्यवस्था रे मताबक नीं, पर अविनाशी जीवना रिया सामर्था रे मताबक नियुक्त हुआ हो। 17 कांभई तिसरे बारे च ये गवाही दिती गईरी,

“तु मलिकिसिदक रिया रितिया पर युगानयुगा रा याजक आ।”

18 इयां ई, पैहला हुक्म निर्बल कने निष्फल हुणे रिया वजह ते लोप हुई गया 19 (इस खातर भई व्यवस्था ते किसी गल्ला री सिद्धि नीं किती), कने तिस रिया जगहा पर इक खरी आशा रखी गई री तिसरे द्वारा अहें परमेशरा रे नेडे जाई सकांये। 20 मसीह री नियुक्ति बिना कसमा ते नीं हुई, 21 कांभई सै तां बिना कसमा ते याजक ठेहराये गये, पर ये कसमा सौगी तिस खाते नियुक्त कित्या गया तिने जे तिसरे बारे च बोलया,

“प्रभुये कसम खादी,

कने तिस तिसते फेरी नीं पछताणा भई तु युगानयुगा रा याजक आ।”

22 इयां ई यीशु इक खरिया वाचा रा जाभिन ठेहराया गया। 23 सै तां मते सारे याजक बणदे आये, इसरी वजह ये थी भई मौत तिन्हां रा पुरा-पुरा रैहणे नीं देदी थी; 24 पर सै युगानयुग रह्हां, इस वजह ने तिसरा याजक पद अटल आ। 25 इस खातर सै जे तिसरे द्वारा परमेशरा ला आवांये, सै तिन्हांरा पूरा-पूरा उद्धार करी सकां, कांभई सै तिन्हां खातर प्राथना करने जो सदा जीऊंदा आ।

26 इस खातर येदा ई महायाजक अहां जोगा था सै जे पवित्र कने निष्कपट, कने निर्मल, कने पापियां ते लग, कने स्वर्गा ते भी उच्चा कित्या गईरा हो। 27 तिन्हां महायाजकां साई तिस्सो जरूरी नीं आ भई हर रोज पैहले अपणे पापां कने फेरी लोकां रे पापां खातर बलिदान चढाओ; कांभई तिने अप्पु जो ई बलिदान चढाई ने तिस्सो इक्की ई बारिया च पूरा करी तया। 28 कांभई व्यवस्था तां कमजोर माहूआं जो नियुक्त करां ई पर तिसा कसमा रा वचन सै जे व्यवस्था ते बाद खादी गई, तिस पुत्रा जो नियुक्त करां सै जे युगानयुग खातर सिद्ध कित्या गईरा।

यीशु अहारा महायाजक

8 हुण सै जे गल्लां अहें बोलया रां ये तिन्हां च ते सबते बड्डी गल्ल येई अहारा येदा महायाजक आ, सै जे स्वर्गा पर महामहिमन रे सिंहासणा रे सज्जिया खा बैठी रा, 2 कने पवित्र स्थान कने तिस सच्चे तम्बुये रा सेवक हुआ तिस्सो जे किन्हिये माहूये नीं पर प्रभुये खडा कितीरा। 3 कांभई हरेक महायाजक भेंट कने बलिदान चढाणे खातर ठेहराया जांवा, इस वजह ते जरूरी आ भई इस याजका ले बी चढाणे रे खातर कुछ हो। 4 जे सै धरतिया पर हुन्दा तां कदी बी याजक नीं हुन्दा, व्यवस्था रे मताबक भेंट चढाणे ओळ्हे तां हये। 5 सै स्वर्गा रिया चीजां रे प्रतिरूप कने प्रतिबिम्बा री सेवा करां ये; तियां जे मूसा तम्बु बनाणे लगया तां तिस्सो ये चेतावनी मिली, “देख, सै जे नमुना तिजो पहाडा पर दस्सी रा गईरा था, तिसरे मताबक सब कुछ बनाणां।” 6 पर इन्हां याजकां ते बधी ने सेवा यीशुये जो मिली कांभई सै होर बी खरिया वाचा रा मध्यस्थ ठेहराया, सै जे होर खरिया प्रतिग्या रे सहारे बन्ही रियां गई रियां।

7 कांभई जे, सै पैहली वाचा निर्दोष हुंदी, तां दुजिया खातर मौका नीं टोळ्या जान्दां। 8 पर सै तिन्हां पर दोष लाई ने बोलां,
 “प्रभु बोलां, देख्वा, सै दिन आवांये भई मांह इस्त्रायला रे घराने सौगी कने यहूदा रे घराने सौगी नौई वाचा बनणी।
 9 ये तिसा वाचा साई नीं हुंदी, सै जे में तिन्हारे बापदादेयां सौगी तिस वक्त बन्ही थी,
 तजे में तिन्हां रा हात्थ पकड़ी ने तिन्हां जो मिश्र देशा ते कढ्या था;
 कांभई सै मेरिया वाचा पर पक्के नीं रहे,
 इस खातर में तिन्हां खोज खबर नीं लई, प्रभु येदा ई बोलां।
 10 फेरी प्रभु बोलां, भई सै जे वाचा में तिन्हां दिनां ते बाद इस्त्रायला रे घराने सौगी बन्हणी,
 सै येई भई मांह अपणी व्यवस्था जो तिन्हारे मना च पाणा,
 कने सै तिन्हारे दिला पर लिखणी,
 कने मांह तिन्हां रा परमेशर ठहरना कने सै मेरे लोक ठहरने।
 11 कने हरेक अपणे देशा औळे जो कने अपणे भाईये जो ये शिक्षा नीं देंगा,
 भई तु प्रभुये जो पछयाण,
 कांभई छोट ते बड्डे तकां सबीं मिंजो जाणी लेणा।
 12 कांभई मांह तिन्हारे अर्धमा रे बारे च दयावन्त हुणा,
 कने तिन्हारे पापां जो फेरी याद नी करगा।”
 13 नौईया वाचा रिया स्थापना ते तिने पुराणिया वाचा जो पुराणा ठहराई तया; कने सै जे चीज पुराणी कने कमजोर हुई जाई तिसा रा खत्म हुई जाणा जरुरी आ।

पार्थिव तम्बुये री सेवा

9 तिसा पैहलिया वाचा च बी सेवा रे नियम थे, कने येदा पवित्र स्थान था सै जे इस जगता रा था। 2 कांभई इक तम्बु बणाया गया, पैहले तम्बुये च दीप कने मेज, कने भेंटा रियां रोटियां थियां; तिस्सो पवित्र स्थान बोलां ये। 3 दूजा, परदे रे पीछे सै तम्बु था, तिस्सो जे परम पवित्र स्थान बोलां ये। 4 तिस च सोने री धूपदानी, कने चऊं पासेयां ते सोने ने मदी रा वाचा रा सन्दूक कने इस च मन्ना ने भरी रा मर्तबान कने हारुना रा सोतू तिस च जे फूल कने फल आई गये थे कने वाचा रिया पटियां थियां। 5 तिसते ऊपर दोनो तेज्जा औळे करुब थे, सै जे प्रायश्चिता रे ढकणा पर छाया करदे हुये थे; इन्हारा इक-इक करी ने दसणे रा येबे मौका नीं आ।
 6 ये चीजां इसा रीतिया ते तैयार हुईयां, तिस पैहले तम्बुये च याजक हर वक्त प्रवेश करी ने सेवा रा काम्म पूरा करां थे, 7 पर दुजे च सिर्फ महायाजक साला भरा च इक बार जांवां था, कने बिना लहु लई ने नीं जान्दा था; तिस्सो सै अपणे खातर कने लोकां रिया भूला चुका खातर चढावां था। 8 इसते पवित्र आत्मा ये दस्सां भई तदुआं तकां जे पैहला तम्बु खड़ा, तदुआं तकां पवित्र स्थाना रा रस्ता प्रकट नीं हुआ। 9 ये तम्बु आज कला रे वक्ता खातर इक द्रष्टान्त आ; तिस च जे येदी भेंट कने बलिदान चढाये जांवां ये, तिसते जे आराधना करने औळे रा विवेक सिद्ध नीं हुई सकदा। 10 कांभई सै सिर्फ खाणे पीणे रियां चीजां कने लग-लग नहाणे रियां विधियां रे आधार रा शारीरिक नियम ये, सै जे सुधरने रे वक्ता तकां रखी रे थे।

मसीह रे लहूये री सामर्थ

11 पर तजे मसीह औणे औळियां खरियां चीजां रा महायाजक हुई ने आया, तां तिने होर बी बडे कने सिद्ध तम्बुये चीयें हुई ने, सै जे हत्था रा बणाई रा नीं मतलब इसा सृष्टिया रा नीं आ, 12 कने बकरेयां कने किसी भी माला रे लहुये रे द्वारा नीं पर अपणे ई लहुये रे द्वारा, इक ई बार पवित्र स्थाना चा गया कने अन्नत छुटकारा पाई लया। 13 कांभई तजे बकरेयां कने मालां रा लहु कने कलोरा री स्वाह रा पवित्र लोकां पर छिड़केया जाणा शरीरा री सुध्वता खातर तिन्हां जो पवित्र करां, 14 तां मसीह रा लहु तिने जे अप्पु जो सनातन आत्मा द्वारा परमेशर रे सामणे निर्दोष चढाया, तुहारे विवेका जो मरी रियां कम्मां ते कैं नीं शुद्ध करगा ताकि तुहें जीऊंदे परमेशर री सेवा करो।

15 इस वजह ते सै नवीया वाचा रा मध्यस्त आ, ताकि तिस रिया मौता ते सै जे पैहलिया वाचा रे वक्ता ते अपराधां ते छुटकारा पाणे खातर हुई री, सदी रे लोक प्रतिग्या रे मताबक अन्नत मीरासा जो पाई लेंगें। 16 कांभई तेथी जे वाचा बन्ही गई री तेथी वाचा बनणे औळे री मौता रा समझी लेणा जरुरी आ। 17 कांभई येदी वाचा मरने पर पक्की हुआं ई, कने तदुआं तकां जे वाचा बनणे औळा जिन्दा रहवां तदुआं तकां वाचा कम्मां री नीं हुन्दी। 18 इस ई खातर पैहली वाचा भी लहुये ते नीं बन्ही गई। 19 कांभई तजे मूसा सबीं लोकां जो व्यवस्था रा हर इक हुक्म सुणाई चुकेया तां तिने मालां कने बकरेयां रा लहु लई ने, पाणी कने लाल ऊन कने जूफा सौगी, तिसा कताबा पर कने सबीं लोकां पर छिड़की तया 20 कने बोलया, “ये तिस वाचा रा लहु आ, तिसरा हुक्म जे परमेशरे तुहां जो दिती रा।” 21 कने इसा ई रीतिया ते तिने तम्बु कने सेवा रे सारे समाना पर लहु छिड़केया। 22 सच तां ये आ भई व्यवस्था रे मताबक लग-भग सारियां चीजां लहुये ते ई शुद्ध कितीयां जावां ईयां। बिना लहु बहाये पापां री माफी नीं।

मसीह रे बलिदाना रे जरिये पापां री माफी

23 इस खातर जरुरी आ भई स्वर्गा चा रियां चीजां साई इन्हां बलिदानां ते शुद्ध कित्ते जाओ, पर स्वर्गा चा रियां चीजां खरेयां बलिदानां ते शुद्ध कितीयां जावां ईयां। 24 कांभई मसीह ने तिस हत्था रे बणाई रे पवित्र स्थाना च, सै जे सच्चे पवित्र स्थाना रा नमूना आ, प्रवेश नीं कित्या पर स्वर्गा च प्रवेश कित्या, ताकि अहां खातर हुण परमेशर रे सामणे दुस्सो। 25 ये नीं भई सै अप्पु जो बार-बार चढाओ, तेदा जे महायाजक हर साल दुजे रा लहु लई ने पवित्र स्थाना च जांवांये, 26 नै त जगता रिया उत्पतिया ते लई नै तिस्सो बार-बार चकणा पौन्दा; पर हुण युगा रे अन्ता च सै इक ई बार पलट हुआ, ताकि अपणे ई बलिदानां ते पापां जो दूर करी दो। 27 कने तियां जे माहूआं खातर इक बार मरना कने तिसते बाद न्याय रा हुणा पक्का आ, 28 तियां ई मसीह बी मतयां रे पापां जो चक्की लेणे खातर इक बार बलिदान हुआ; कने सै जे लोक तिस्सो नयाहल्या रायें तिन्हां रे उद्दारा खातर दुजरी बार बिना पाप चक्की रे दिसणा।

सिद्ध बलिदान

10 कांभई व्यवस्था, तिस च जे औणे औळियां खरियां चीजां री परछाई पर तिसरा असली रूप नीं आ, इस खातर तिन्हां इक्की किस्मा रे बलिदाना ने सै जे हर साल अचूक चढाया जावांये, नेडे औळियां जो कदी भी सिद्ध नीं करी सकदी। 2 नै त तिन्हां जो चढाणा बन्द कैं नीं हुई जान्दा? इस खातर तजे सेवा करने औळे इक ई बार शुद्ध हुई जांये, तां फेरी तिन्हां रा विवेक तिन्हां जो पापी नीं ठहरांदा। 3 कांभई तिन्हां रे द्वारा हर साल पापां री, याद हुआंई। 4 कांभई ये अनहोनी गल्लां ई भई मालां कने बकरेयां रा लहु पापां जो दूर करो।

5 इस वजह ते सै जगता च औन्दे वक्ता बोलां,

“बलिदान कने भेंट तैं नीं चाही,

पर मेरे खातर इक देह तैयार किन्ती।

6 होम बलियां कने पाप बलियां ते तु खुश नीं हुआ।

7 तां में बोलया, “देख हऊं आई गरा,

पवित्र शास्त्रा च मेरे बारे च लिखी रा,

ताकि हे परमेशर, तेरी इच्छा पूरी करुं।”

8 तां उपर सै बोलां, “ना तैं बलिदान कने भेंट कने होम बलियां कने पाप बलियां जो चाह्या, कने न तिन्हां ते खुश हुआ,” ये बलिदान तां व्यवस्था रे मताबक चढाये जावांये। 9 फेरी येदा बी बोलां, “देख, हऊं आई गरा, ताकि तेरी इच्छा पूरी करुं,” इस खातर सै पैहले जो चक्की लां, ताकि दुजे जो नियुक्त करो। 10 तिसा ई इच्छा ते अहें यीशु मसीह री देहा रे इक ई बार बलिदान चढाये जाणे द्वारा पवित्र कित्ते गईरे।

11 हर इक याजक तां खडे हुई ने हर रोज सेवा करां, कने इक्को जे बलिदाना जो सै जे पापां जो कदी भी दूर नीं करी सकदे बार-बार चढावां।

12 पर सै माहू तां पापां रे बदले इक ई बलिदान सदा खातर चढाई ने

परमेश्वर से सज्जिया खा बैठया, 13 कने तिस ई वक्ता ते इस्सो नयाहल्या रां, भई तिसरे बैरी तिसरे पैरां हेठा रा पटऱू बणो। 14 कांभई तिने इक्की चढावे ते तिन्हां जो सैं जे पवित्र कित्ते जावांये, सदा खातर सिद्ध करी तरा। 15 कैं पवित्र आत्मा बी अहां येई गवाई देवां; कांभई तिने पैहले बोलया था, 16 “प्रभु बोलां भई सैं जे वाचा मांह तिन्हां दिनां ते बाद तिन्हां सौगी बन्हणीं सैं येई भई मांह अपणे कनुना जो तिन्हांरे दिला पर लिखणा कने मांह तिन्हांरे विवेका च पाणा।”

17 फेरी सैं येदा बोलां, “मांह तिन्हांरे पापां जो कने तिन्हांरे अधर्मा रे कम्मां जो फेरी कदी याद नीं करना।”
18 कने तजे तिन्हांरी माफी हुई गरी,
तां फेरी पापां रा बलिदान नीं रैया।

परमेश्वर रे नेडे जाओ

19 इस खातर हे भाईयो, तजे अहां यीशुये रे लहुये रे द्वारा तिस ला ते कने जिन्दे रस्ते रे पवित्र स्थाना च जाणे री हिम्मत हुई गरी, 20 सैं जे तिने परदे मतलब अपणे शरीरा च ते हुई ने अहां खातर अभिषेक कित्ती रा, 21 कने इस खातर भई अहांरा येदा महान याजक आ, सैं जे परमेश्वर रे घरा रा अधिकारी आ, 22 तां आवा, अहें सच्चे मना कने पूरे विस्वासा सौगी, कने विवेका रा दोष दूर करने खातर दिला पर छिड़काव लई ने, कने देहा जो शुद्ध पाणिये ने धुआईने परमेश्वर रे नेडे जाईये। 23 आवा अहें अपणिया आशा रे अंगीकारा जो पक्के हुई ने थम्मी रखिये, कांभई तिने जे प्रतिग्या कित्ती री, सैं सच्चा; 24 कने प्रेम। कने भलेयां काम्मां च उकसाणे खातर अहें इक्की दुज्जे री चिंता करया करो, 25 कने इक्की दुज्जे सौगी कट्टा हुणा नीं छडिये, तेदी जे बौहती री रीति, पर इक्की दुज्जे जो समझांदे रहिये; कने तियां जे तिस दिहाड जो नेडे आऊंदे देखिये तियां-तियां कने होर बी जादा येदा करया करो।

26 कांभई सच्चाईया री पछयाण लई लेणे ते बाद जे अहें जाणी बुझी ने पाप करदे रह्यांये, तां पापां खातर फेरी कोई बलिदान बाकी नीं आ। 27 हाँ, दण्डा रा इक भयानक रस्ते री न्याहण कने अमी रा दाह बाकी आ सैं जे वरोधियां जो भस्म करी देंगा। 28 तजे मूसा री व्यवस्था रा नी मनणे औळा, दुई या तिन्हां माळुआं रिया गवाई या पर, बिना दया कित्ते मारी दित्या जांवां, 29 तां सोची लवा भई सैं कितने होर भी भारी दण्डा जोगा ठैहरगा, तिने जे परमेश्वर रे पुत्रा जो पैरां ने रौंदया कने वाचा रे लहुये जो, तिसते जे सैं पवित्र ठैहरया गईरा था, अपवित्र जाणी रा, कने अनुग्रह रे आत्मा रा अपमान कित्या। 30 कांभई अहें तिस्सो जाणां ये, तिने जे बोलया, “पलटा लेणा मेरा काम्मा आ, मांह ई बदला देणा।” कने फेरी ये, भई “प्रभुये अपणेयां लोकां रा न्याय करना।” 31 जिन्दे परमेश्वर रे हत्था च पौणा खतरनाक गल्ल ई।

32 पर तिन्हां पैहलकेयां दिनां जो याद करा, तिन्हां च ते तुहें ज्योति पाई ने दुःखा रे बडे संघर्षा च पक्के रहे। 33 कदी-कदी तां इस खातर भई तुहें निन्दा कने क्लेश सैंहदे-सैंहदे तमाशा बणे, कने कदी ईयां भई तुहें तिन्हां रे सांझी हुये तिन्हां री जे दुर्दशा कित्ती जावां थी। 34 कांभई तुहें कैदियां रे दुःखा च बी दुःखी हुये, कने अपणी सम्पति भी खुशिया ने लुटणे दित्ती; ये जाणी ने भई तुहां ले इक होर बी खरी कने सदा ठैहरने औळी सम्पति ई। 35 इस खातर अपणी हिम्मत नीं छड्डी कांभई तिसरा प्रतिफल बड्डा। 36 कांभई तुहां जो धीरज धरना जरूरी आ, ताकि परमेश्वर री इच्छा जो पूरी करी ने तुहें प्रतिग्या रा फल पाओ।

37 “कांभई हुण बौहत ई थोड़ा वक्त रई गरा,
तजे औणे औळे औणा कने देर नीं करनी।
38 पर मेरे धर्मी जना विस्वासा ते जीऊंदे रैहणां।
कने जे सैं पीछे हटी जाओ तां मेरा मन तिसते खुश नीं हुणा।”
39 पर अहें हटणे औळे नीं ये भई नाश हुई जाईये। विस्वास करने औळे प्राणां जो बचाईये।

बिश्वासा रे उदाहरण

11 हुण विस्वास आशा रियां चीजां रा निश्चा, कने अनदेखी चीजां रा प्रमाण आ। 2 कांभई इसरे बारे च प्राचीनां री खरी गवाई दित्ती गई

री। 3 विस्वासा तेई अहें जाणे जावांये भई सारिया सृष्टिया री रचना परमेश्वर रे वचनां द्वारा हुई री। पर ये नीं भई जो कुछ देखणे च आवां, सैं देखी रियां चीजां ते ई बणी रा हो।

4 विस्वासा तेई हाबिले कैना ते खरा बलिदान परमेश्वर खातर चढाया, कने तिसरे ई द्वारा तिसरे धर्मी हुणे री गवाई बी दित्ती गई, कांभई परमेश्वर तिस रियां भेटां रे बारे च गवाई दित्ती; कने तिसरे ई द्वारा सैं मरने पर भी हुणां तकां गल्लां करां। 5 विस्वासा तेई हनोक चक्की लेया गया भई मौता जो नीं देखो, कने तिसरा पता नीं मिलया कांभई परमेश्वर तिस्सो चक्की लरा था, कने तिसरे चक्के जाणे ते पैहले तिसरी ये गवाई दित्ती गई थी भई तिने परमेश्वर जो खुश कित्ती रा। 6 कने विस्वासा बिना तिस्सो खुश करना अनहोनी गल्ल ई; कांभई परमेश्वर रे नेडे औणे औळे जो विस्वास करना चाईदा भई सैं हया, कने अपणे टोलणे औळ्यां जो प्रतिफल देवां। 7 विस्वासा तेई नुंहे तिन्हां गल्लां रे बारे च सैं जे तिस वक्त नीं दुसदियां थियां, चेतावनी पाई ने भक्तिया सौगी अपणे घराने रे बचावा खातर जहाज बणाया, कने तिसरे द्वारा तिने संसारा जो दोषी ठहरया; कने तिस धर्मा रा वारस बणया सैं जे विस्वासा ते आ।

8 विस्वासा तेई अब्राहम तजे सदया गया तां हुक्म मन्त्री ने येदिया जगह निकली गया तिस्सो जे मीरास च लेणे औळा था; कने ये नीं जाणदा था भई हऊं किखा जाये रां, तां बी निकली गया। 9 विस्वासा तेई तिन्हें प्रतिग्या कित्ती रे देशा च, पराये देशा च प्रदेशियां साई रई ने इसहाक कने याकूबा समेत, सैं जे तिसने सौगी तिसा ई प्रतिग्या रे वारस थे, तम्बुआं च वास कित्या। 10 कांभई सैं तिस पक्किया नीऊंआं औळे नगरा जो न्याह्या रां था, तिसरा जे रचणे औळा कने बनाणे औळा परमेश्वर आ। 11 विस्वासा ते ई सारा अप्पु बुडी हुणे पर भी गर्भ धारण करने री सामर्थ पाई, कांभई तिसे प्रतिग्या करने औळे जो सच्चा जाणया था। 12 इस वजह ते इक्की माळुये ते, सैं जे मरीरा जेया था, आकाशा रे तारेयां कने समुद्रा रे कनारेयां रे रेटां रियां कणियां साई अनगिणत वंश पैदा हुये।

13 ये सब विस्वासा रिया ई दशा च मरे; कने तिन्हें प्रतिग्या कित्ती रियां चीजां नीं पाईयां, पर सैं दूरा तेई देखी ने खुश हुये कने मन्त्री लया भई अहें पृथ्वीया पर परदेशी कने बाहरा औळे। 14 सैं जे येदियां गल्लां बोलां ये, सैं प्रगट करांये भई अपणे देशा रिया टोला च ये। 15 कने तिस देशा ते जे निकली आई रे थे, जे तिस खॉं सुध लांदे तां हटणे रा मौका था। 16 पर सैं इक खरे मतलब स्वर्गीय देशा रे अभिलाषी ये; इस खातर परमेश्वर तिन्हां रा परमेश्वर कहलाणे ते नीं शर्मान्दा, कांभई तिने तिन्हां खातर इक नगर तैयार कित्ती रा।

17 विस्वासा तेई अब्राहमे, परखे जाणे रे वक्ता च, इसहाका जो बलिदान चढाया; कने तिन्हें प्रतिग्या जो सच्च मनया था। 18 कने तिसने येदा बोलया गया था, “इसहाका ते तेरा वंश जाणेया जाणां,” सैं अपणे इकलौते जो चढाणे लाया। 19 कांभई तिने मन्त्री लया, भई परमेश्वर सामर्थी आ भई तिस्सो मरीरेयां ते जीऊंदा करो; इस खातर तिन्हां च ते ई दृष्टान्ता रिया रीतिया पर सैं तिस्सो फेरी मिलया। 20 विस्वासा तेई इसहाके याकूब कने एसावा जो औणे औळियां गल्लां रे बारे च आशीष दित्ती। 21 विस्वासा तेई याकूबे मरदे वक्ता युसुफा रे दुई पुत्रां च ते इक्की-इक्की जो आशीष दित्ती, कने अपणे सोतुये रे सहारे हुई ने दण्डवत् कित्या। 22 विस्वासा तेई युसुफे, तजे सैं मरने पर था, तां इस्राएला रियां औळादां रे निकलणे री चर्चा कित्ती, कने हड्डियां रे बारे च हुक्म दित्या।

23 विस्वासा तेई मूसा रे मौ-बुढे तिस्सो, जमणे ते बाद तिन्हां महीनेयां तकां लुखुआई रखया, कांभई तिने देखया भई बालक बांका, कने सैं राजे रे हुक्मा ते नीं डरे। 24 विस्वासा तेई मूसे बड्डे हुई ने फिरौना रिया बेटिया रा पुत्र कहलाणे ते नां करी ती। 25 इस खातर भई तिस्सो पापां च थोडे ई दिनां रे सुख भोगणे ते परमेश्वर रे लोकां सौगी दुःख भोगणा जादा खरा लगया। 26 तिन्हें मसीह रिया वजह ते निन्दा हुणे जो मिश्रा रे भण्डारा ते बड्डा धन समझया, कांभई तिस रियां फला जो पाणे खॉं लगी रियां थियां। 27 विस्वासा तेई राजे रे गुस्से ते नीं डरी ने तिने मिश्रा जो छड्डी तया, कांभई सैं अनदेखे जो मन्त्रो देखदा हुआ पक्का रेह्या। 28 विस्वासा तेई तिन्हें फसह कने लहु

छिड़कणे री विधी मन्त्री, भई पैहलौठेयां रा नाश करने औळा इस्त्राएलियां पर हाथ नी पाओ।

29 विस्वासा तेई सै लाल समुद्रा चीयें पारा जो चली गये, तियां जे सुकिया धरतिया परा ते; कने तजे मिश्रियें तेढा ई करना चाह्या तां सब डुबीं मरे। 30 विस्वासा तेई यरीहो री चार दीवारी, तजे सै सत्तां दिनां तकां तिसरा चक्कर लाई चूके, तां सै थल्ले परई गई। 31 विस्वासा तेई राहाब वेश्या हुक्म नी मनणे औळ्यां सौगी नाश नीं हुई, इस खातर भई तिसे भेदियां जो बचाई ने रखया था।

32 हुण होर क्या बोलूं? कांभई वक्त नीं रह्या भई गिदोना रा, कने बाराक कने शिमशोना रा, कने यिफतह रा, कने दाऊद कने शमुएल रा, कने भविष्यवक्तावां रा वर्णन करूं। 33 इनें विस्वासा तेई राज्य जित्ते; धर्मा रे काम्म कित्ते; प्रतिग्या किन्ती रियां चीजां लई लियां; शेरं रे मुँह बन्द कित्ते; 34 अग्गी रे दाह जो ठण्डा कित्ता; तलवारा री धारा ते बची निकले; कमजोरियां च ताकता औळे बणे; लड़ाईयां च वीर निकले; विदेशियां री फौजां जो मारी ने नठाय। 35 जनानें अपणे मरीरेयां जो फेरी भीं जीऊंदा पाया; कितने तां मार खान्दे-खान्दे मरी गये कने छुटणां नी चाहया, इस खातर भई खरे छुटकारे रे भागी बणो। 36 मते सारे हासिआ च उड़ाये जाणे; कने कोड़े खाणे पर बन्हे जाणे, कने कैदा च पाणे ते परखे गये। 37 पत्थर मारे गये; आरियां ने चीरे गये; तिन्हारी परिक्षा किन्ती गई; तलवारां ने मारे गये; सै कंगालिया च, कने क्लेशां च, कने दुःख सँहदे-सँहदे भेड़ बकरियां रियां खालां ओडी ने, इखा-उखा मारे-मारे फिरे; 38 कने जंगलां, कने पहाडां, कने गुफा च, कने धरतिया रियां दरारां च भटकदे फिरे। संसार तिन्हां जोगा नी था।

39 विस्वासा तेई इन्हां सर्बीं रे बारे च खरी गवाई दिन्ती गई री, तां बी तिन्हां जो प्रतिग्या किन्ती री चीज नीं मिली। 40 कांभई परमेशरे अहां खातर पैहले तेई इक खरी गल्ल ठेहराई, भई सै अहां ते बिना सिद्धता चा नीं पुजे।

परमेशर पिते रे जरिये ताड़ना

12 इस वजह ते तजे गवाहां रे येढे बड्डे बदलां ते अहें घिरी रे, तां आवा, हरेक रोकणे औळियां चीजां कने उलझाणे औळियां पापां जो दूर करी ने, तिसा दौड़ा च जे अहां दौड़णा धीरजा ने दौड़िये, 2 कने विस्वासा रे कर्ता कने सिद्ध करने औळे यीशुये खां ताकदे रई ये, तिने तिसा खुशिया खातर सै जे तिसरे अग्रे रखी री थी, शरमा री कुछ चिंता नी करी ने कुसा रा दुःख सहैया, कने परमेशरा रे सिंहासना रिया सजिया खा जाई बैठया।

3 इस खातर तिस परा ध्यान करा, तिने जे अपणे बरोधा च पापियां रा इतना बरोध सई लया भई कित्ते तुहें नराश हुई ने हिम्मत नीं छड्डी देओ। 4 तुहें पापां ने लडदे हुये तिसने येढी मुठभेड़ नीं किन्ती भई तुहां रा खून बगया हो; 5 कने तुहें तिस उपदेशा जो, सै जे तुहां जो पुत्रां साई दित्या जांवां, भूलीं गये :

“हे मेरे पुत्र, प्रभुये री ताड़ना जो हल्की गल्ल नीं जाण।

कने ताजे सै तिजो घुडको तां हिम्मत नीं छड्ड।

6 कांभई प्रभु तिसने जे प्रेम करां, तिसरी ताड़ना भी करां,

कने तिस्सो जे पुत्र बणाई लां, तिस्सो कोड़े बी लांवां।”

7 तुहें दुःखा जो ताड़ना समझी ने सही लो; परमेशर तुहां जो पुत्र जाणी ने तुहां सौगी बरताव करां, सै कुण जेया पुत्र आ तिसरी ताड़ना जे पिता नीं करदा? 8 जे सै ताड़ना तिसरे भागी जे सब ये, तुहां री नीं हुई तां तुहें पुत्र नीं ये; पर व्यभिचारा री औळाद ठैहरे। 9 फेरी तजे अहां रा शारीरिक पिता भी अहांरी ताड़ना करां था कने अहें तिन्हां रा आदर कित्या, तां क्या आत्मावां रे पिते रे होर भी अधीन नीं रहीये तिसते जे अहें जीऊंदे रईये। 10 सै तां अपणिया-अपणिया समझा रे मताबक कुछ दिनां खातर ताड़ना करां थे, पर सै त अहारे फायदे खातर ताड़ना करां, भई अहें भी तिसरिया पवित्रता रे भागी हुई जाईये। 11 वर्तमान च हर किस्मा री ताड़ना आनन्दा री गल्ल नीं, पर दुःखा ई री गल्ल दिस्साई, तां भी सै जे तिस्सो सँहदे-सँहदे पके हुईं गये बाद बिच तिन्हां जो चैना ने सौगी धर्मा रा प्रतिफल मिलां।

उपदेश कने चेताबनी

12 इस खातर ढिलयां हत्थां कने कमजोर गोडेयां जो सीधे करा, 13 कने अपणे पैरां खातर सिधा रस्ता बणावा भई लंगड़ा भटकी नीं जाओ पर भला चंगा हुई जाओ। 14 सर्बीं ने मेल-मलाप रखा, कने तिसा पवित्रता रे खोजी बणा तिसरे बिना जे कोई प्रभुये जो बिल्कुल मनीं देखगा। 15 ध्याना ने देखदे सौ, येढा नीं हो भई कोई परमेशरा रे अनुग्रह ते वंचित रई जाओ, या कोई कऊड़ी जड़ निकली ने दुःख देओ, कने तिसरे द्वारा मते सारे लोक अशुद्ध हुई जाओ। 16 येढा नीं हो भई कोई जन व्यभिचारी, या एसावा साई अधर्मी हो तिने जे इक्की बारिया रिया रोटिया खातर अपणे पलौठे हुणे रा पद बेचीत्या। 17 तुहें जाणां ये भई बाद बिच तजे तिने आशीष पाणी चाई तां अयोग्य गिणया गया, कने आंशु बहाई-बहाई ने टोलणे पर बी मन फिराणे रा मौका नी मिलया।

18 तुहें तां तिस पहाड़ा रे नेडे, तिस्सो जे छोई सक्कां थे, कने अग्गी ने बली रा था, कने कालियां घटावां, कने नेहरा, कने तुफाना रे नेडे, 19 कने तुरहिया री आवाज, कने बोलणे औळे रे येढियां गल्लां ला नी आये, तिसरे सुनणे औळ्यां विनती किन्ती भई हुण अहां ने होर गल्लां नी किन्तीयां जाओ। 20 कांभई सै तिस हुक्मा जो नीं सही सके : “जे कोई पशु भी पहाड़ा जो छुओ तां तिस्सो पत्थर मारो।” 21 कने सै दर्शन येढा डरावना था भई मूसे बोलया, “हऊं बौहत डरया रां कने कम्बेया रां।”

22 पर तुहें सिन्धोना रे पहाड़ा रे नेडे, कने जीऊंदे परमेशरा रे नगरा, स्वर्गीय यरूशलेमा, रे नेडे कने लखां स्वर्गदूतां 23 कने तिन्हां पलौठयां रे नगरा, स्वर्गीय यरूशलेमा, रे नेडे कने तिन्हां रे नौं जे स्वर्गा च लिखीरे, सर्बीं रे न्यायी परमेशरा रे नेडे कने सिद्ध कित्ते गईरे धर्मीयां रियां आत्मावां, 24 कने नौईया वाचा रे मध्यस्थ यीशु कने छिड़कावा रे तिस लहुये रे नेडे आई रे, सै जे हाबिला रे लहुये ते खरियां गल्लां बोलां।

25 सावधान रा, कने तिस बोलणे औळे ते मुँह नीं फेरो, कांभई सै लोक तजे धरतिया रे चेतावनी देणे औळे ते मुँह फेरी ने कियां बची सकगे? 26 तिस वक्त तां तिसरिया आवाजे धरतिया जो हिलयाई तया, पर हुण तिन्हें ये प्रतिग्या किन्ती री, “इक बार फेरी मांह ना सिर्फ धरतिया जो पर आकाशा जो बी हिलाई देणा।” 27 कने ये बाक ‘इक बार फेरी’ इसा गल्ला जो प्रगट करां भई सै जे चीजां हिलाई जावांईयां, सै सृजी रियां चीजां हुणे रिया वजह ते टली जाणियां; ताकि सै जे चीजां हिलाईयां नीं जांदायां, सै अटल बणी रियां सौ। 28 इस वजह ते अहें इस राज्य जो पाई ने सै जे हिलणे खातर नीं हो, कने भक्ति, कने डरा सौगी परमेशरा री येढी आराधना करिये तिसते जे सै खुश हुआं; 29 कांभई अहारा परमेशर भस्म करने औळी आग ई।

मसीही जीवन जीणे रे निर्देश

13 भाई चारे री प्रीति बणी री सौ। 2 आओ बैठ करना नीं भूलणा, कांभई इसरे द्वारा कुछ लोकें अनजाणगिया च स्वर्गदूतां रा आदर सत्कार किन्ती रा। 3 कैदिया री सुध लवा भई मन्त्रो तिन्हां सौगी तुहें बी कैदी ये, कने तिन्हां सौगी जे बुरा बरताव हुआं, तिन्हां री बी ये समझी ने सुध लया करो भई अहां री बी देह ई। 4 ब्याह सर्बीं च आदरा औळी गल्ल समझी जाओ, कने ब्याह रा बिछौणा निष्कलंक सौ, कांभई परमेशर व्यभिचारियां, कने परस्त्रीगामियां रा न्याय करगा। 5 तुहांरा स्वभाव लालची नीं हो, कने जो कुछ तुहां ले आ तिस पर सन्तुष्ट सौ; कांभई तिने अप्पु ई बोली रा, “मांह तिजो कदी मनीं छडणा, ना कदी तिजो त्यागणा।” 6 इस खातर अहें निडर हुई ने बोलां ये, “प्रभु मेरा मदद करने औळा, मांह नीं डरना; माहु मेरा क्या करी सक्कां।”

7 सै जे तुहारे अगुवे, कने तिन्हे जे तुहां जो परमेशरा रा वचन सुणाई रा, तिन्हां जो याद रखा; कने ध्याना ने तिन्हां रे चाल-चलना रा अन्त देखी ने तिन्हारे विस्वासा रा अनुकरण करा। 8 यीशु मसीह कल, कने आज कने युगानयुग इक्को जेआ। 9 लग-लग किस्मा रे विचित्र उपदेशां ते नीं भरमाये जाओ, कांभई मना रा अनुग्रह ते पक्का रहणा भला, ना की तिन्हां खाणे रियां चीजां ते तिन्हां ने जे काम्म रखणे औळ्यां जो कुछ फायदा नीं हुआ।

10 अहांसी इक येद्वि वेदी तिस परा ते खाणे रा अधिकार तिन्हां जो नीं आ, सै जे तम्बुये री सेवा करां ये। 11 कांभई तिन्हां पशुआं रा लहु जे महायाजक पाप बलिया खातर पवित्र स्थाना च लई जां, तिन्हांरी देह छावनिया ते बाहर फुकी जांवांई। 12 इसा वजह ते, यीशुये बी लोकां जो अपणे ई लहुये द्वारा पवित्र करने खातर फाटका ते बाहर दुःख उठाय। 13 इस खातर आवा, तिसरी निन्दा अपने ऊपर लई ने छावनिया ते बाहर तिस ला चलिये। 14 कांभई येथी अहांरा कोई पक्का नगर नीं आ, पर अहें इक औणे औळे नगरा रिया खोजा चे। 15 इस खातर अहें तिसरे द्वारा स्तुति रूपी बलिदान, मतलब तिन्हां होंठां रा फल सै जे तिसरे नाँवा रा अंगीकार करां ये, परमेशरा जो सदा चढाया करीये। 16 भलाई करनी कने दया दखाणी नीं भूलो, कांभई परमेशर येदे बलिदानां ते खुश हुआं।

17 अपणे अगुवां रा हुक्म मन्नो कने तिन्हांरे अधीन रौ, कांभई सै तिन्हां साई तुहांरे प्राणां खातर जागदे र्हाये तिन्हां जे लेखा देणे पऊणा; सै ये काम्म खुशिया ने करो, ना की अहां भरी-भरी ने, कांभई इसा दसा च तुहां जो कुछ जादा फायदा नीं आ। 18 अहां खातर प्राथना करदे रौ, कांभई अहां जो

भरोसा भई अहांरा विवेक शुद्ध आ : कने अहें सबीं गल्लां च खरी चाल चलणा चाह्यांये। 19 प्राथना करने खातर हऊं तुहां जो होर भी समझावां भई हऊं छोडे तुहां ला फेरी आई सकूं।

20 हुण शान्ति दाता परमेशर, सै जे अहांरे प्रभु यीशुये जो सै जे भेड्डां रा महान् रखवाला सनातन वाचा रे लहुये रे गुणां ते मरीरियां च ते जीउंदा करी ने ली आया, 21 तुहां जो हरेक भलिया गल्लां च सिद्ध करो, तिसते जे तुहें तिसरिया इच्छा जो पुरा करो, कने सै जे तिस्सो खरा लगां तिस्सो यीशु मसीह रे द्वारा अहां च पैदा करो। तिसरी महिमा युगानयुग हुन्दी रौ। आमीन।

22 हे भाईयो, हऊं तुहां ने विनती करां भई इस उपदेशा रियां गल्लां जो सहन करी लो, कांभई ये तुहां जो बडे संक्षेपा च लिखी रा। 23 तुहां जो ये पता हो भई तीमुथियुस, अहां रा भाई छुटीं गरा कने जे सै छोडे आई गया तां मांह तिसने सौगी तुहां ने मिलणा। 24 अपणे सब अगुवेयां जो कने सब पवित्र लोकां जो नमस्कार बोलेयो। इटलिया औळे तुहां जो नमस्कार बोलां ये। 25 तुहां सबीं पर अनुग्रह हुन्दा रौ। आमीन।

याकूब

अभिवादन

1 परमेश्वराने कने प्रभु यीशु मसीह रे दास याकूब रिया तरफा ते तिन्हा बारह गोतां जो नमस्कार हो सैं जे सारे संसारा च फैलीरे।

बिश्वास कने बुद्धीमानी

2 हे मेरे भाईयो, ताहली जे कर्दीं तुहें बन-बनकेयां मतेहानां च फसी जाओ, तां इस्सो बडे मजे री गल्ल समझयो, 3 कांभईं तुहें ये जाणां ये भईं ताहली जे तुहांरा विश्वास मतेहानां च पास हुईं जां, तां परखे जाणे ते सैहण शक्ति पैदा हुआं ई। 4 पर सैहण शक्तिया जो अपणा पूरा काम्म करने देवा भईं तुहें पूरे कने सिद्ध बणी जाओ, कने तुहां च किसी गल्ला री कमी नीं रैईं जाओ। 5 पर जे तुहां चते किसी च डमाका री कमी हो, तां सैं तिस्सो परमेश्वराने ते मंगी सक्का, सैं सारयां जो खुशी-खुशी उदारता ने देआं। 6 बस विश्वासा ने मंगया जाओ, थोडा जेआ शक बी नीं हुणा चाहिन्दा, कांभईं तिस्सो जे शक हुआं, सैं समुद्रा रिया तिसा लहरा साईं आ सैं जे हवा ने बैया ईं कने उछलां ई। 7 येदे माह्ये जो ये नीं सोचणा चाहिन्दा भईं मिन्जो प्रभु ते कुछ मिलगा, 8 तिस माह्ये रा मन दुविधा च फसीरा रैयां, सैं अपणे सारे कम्मां च टिकीरा नीं रैहन्दा।

गरीबी कने अमीरी

9 आम परिस्थितिया औळे भाईये जो गर्व करना चाहिन्दा भईं परमेश्वराने तिसजो आत्मा रा धन दित्तिरा। 10 कने अमीर भाईये जो ये गर्व करना चाहिन्दा भईं परमेश्वराने तिस्सो नम्रता दित्तिरी, कांभईं तिस त घा पर खिलणे औळे फुल्ला साईं झडी जाणा। 11 सूरज कडकडान्दी धूप लेईने उगां कने डाळियां जो सकोई देआं, तिन्हारे फुल कने पत्तियां झडी जायें कने खूबसूरती खत्म हुईं जाईं। इस तरीके ने अमीर माह्ये बी अपणी दौड़-धूपा च खत्म हुईं जां।

परख कने प्रलोभन

12 धन्या सैं माह्ये आ सैं जे मुशबतां च अटल रैयां कांभईं मतेहानां च खरा उतरने ते बाद तिस जिन्दगिया रे तिस जीता रे मुकटा जो पैहणणा, तिस्सो जे परमेश्वराने अपणे प्यार करने औळयां जो देणे रा वचन दित्तिरा। 13 मतेहाना रिया घडिया च किसी जो ये नीं बोलणा चाहिन्दा भईं “परमेश्वर मेरा मतेहान लेईरां,” कांभईं बुरियां गल्लां ते परमेश्वराने जो कोई लेणा देणा नीं आ, कने न सैं खुद किसी रा मतेहान लेआं। 14 हर कोई अपणी बुरियां इच्छा रे बैहमा च फसी ने मतेहानां च पोआ। 15 फेरी ताहली जे सैं इच्छा गर्भवति हुआईं तां पाप बडा हुईं जां कने सैं मौती जो जन्म देआं। 16 इस खातर मेरे प्यारे भाईयो, धोखा मता खान्दे। 17 कांभईं हर इक खरा बरदान कने हर इक उत्तम दान ऊपरा तेईं मिलां, कने सैं तिस परम पिते रे जरिये तिने जे स्वर्गिय प्रकाशा जो जन्म दित्तिरा, थल्ले लन्दे जायें। सैं नक्षत्रां री गतिविधियां ते पैदा हुईरी छौंवा ते कर्दीं बदलदा नीं आ। 18 तिने अपणिया ई इच्छा ते अहांजो सच्चे वचना रे जरिये पैदा कित्या, ताकि अहें सारे प्राणियां रे बिच तिसरिया फसला रे पैहले फळ सिद्ध हो।

सुणना कने करना

19 हे मेरे प्यारे भाईयो, याद रक्खा, हर किसी जो ध्याना ने सुणना चाहिन्दा, बोलणे च जल्दी मता करदे, गुस्सा करने च उताबले नीं होवा। 20 कांभईं माह्ये रे गुस्से ते परमेश्वराने री धार्मिकता नीं पैदा हुन्दी। 21 हरेक बुरे बर्तावा कने चहू तरफां च फैलीरी दुष्टता ते दूर रौआ, कने नम्रता सौगी तुहांरे दिलां च रोपीरे परमेश्वराने वचना जो ग्रहण करा सैं जे तुहां रिया आत्मा जो छुटकारा देईं सक्को। 22 परमेश्वराने रिया शिक्षा पर चलणे औळे बणा, नां भईं सिर्फ तिस्सो सुणने औळे, जे सिर्फ तुहें सुणने औळे ई हाये, तां खुद अप्पू जो धोखा देईं करा ये। 23 कांभईं जे कोई परमेश्वराने रिया शिक्षा जो सुणां त हाया कने तिस पर चलदा नीं हो, तां सैं तिस माह्ये साईं आ सैं जे अपणे स्वाभावाने रे मुँहा जो शीशे च देखं। 24 सैं खुद अप्पू जो त ठीक ढंगा ने देखं, पर ताहली जे तिन्हीते चली जां तां इकदम भुली जां भईं केडा दिखीरां था। 25 पर सैं जे परमेश्वराने री तिसा सारिया व्यवस्था जो नेडे ते देखं, तिसते जे आजादी मिलां ई कने तिस पर चलां बी आ, कने सुणीने तिस्सो बिणा भूले अपणे व्यवहारा च ढालदा रैयां, सैं अपणे कर्मां रे खातर धन्य हुणा। 26 जे कोई सोचां भईं सैं भगत आ कने अपणिया जीभा पर कस्सीने लगाम नीं लगान्दा, तां सैं धोखे चा, तिसरी सैं भगती किसी मतलबा री नीं। 27 अहांरे परमेश्वराने कने पिते रे सामणे सच्ची कने शुद्ध भगती सैं तिसच जे अनाथां कने विधमां री तिन्हारे दुख तकलीफां च सुध लेईरी हो, कने खुद अप्पू जो कोई संसारिक कलक नीं लगणे दित्या हो।

पक्षपाता रे बरुद्ध चेताबनी

2 हे मेरे भाईयो, अहांरे महिमावान प्रभु यीशु मसीह च सैं जे तुहांरा विश्वास आ, सैं पक्षपातपूर्ण नीं हो। 2 कांभईं जे इक माह्ये सोने री गुडी कने बांके कपडे पैहनीने तुहां रिया सभा च आओ, कने इक गरीब माह्ये बी मैले-कुचैले कपडे पैहनीने आओ, 3 कने तुहें तिस बाँकयां कपडयां औळे रा मुँह देखीने बोलो, “तू येथी खरिया जगह बैठ,” कने तिस गरीब माह्ये जो बोलो, “तू येथी खडीरा रैह,” या मेरे चरणां च बैठ।” 4 येदा करदे हुये कया तुहें अपणे बिच कोई भेद-भाव नीं कित्या कने बुरयां विचारां सौगी न्याय करने औळे नीं बणीगे? 5 हे मेरे प्यारे भाईयो, सुणा, कया परमेश्वराने संसारा री अकखीं च तिन्हां गरीबां जो विश्वासा च अमीर कने तिस राजा रे बारसारे रुपा च नीं चुणया, तिसरा तिने सैं जे तिसजो प्यार करां ये, देणे रा बचन दित्या? 6 पर तुहें त तिस गरीब माह्ये रा अपमान कित्या। कया अमीर लोक सैं नीं ये, सैं जे तुहां पर जुल्म करां ये कने तुहांजो कोट-कचैरियां च घसीटीने लेईं जायें? 7 कया ये सैं नीं ये, सैं जे मसीह रे तिस उत्तम नौवा री निन्दा करां ये, सैं जे तुहांजो दित्तिरा? 8 जे तुहें पवित्र शास्त्रा ते मिलणे औळिया इसा बडिया व्यवस्था रा सच्चमुच पालन करां ये, भईं “अपणे पडेसिये ने तियां ई प्यार करा, तियां जे तुहें खुद अप्पू ने करां ये” तां तुहें ठीक ई करां ये। 9 जे तुहें पक्षपात करां ये, तां तुहें पाप करीरां ये; फेरी तुहांजो व्यवस्था जो तोडने औळा समझया जाणा। 10 कांभईं सैं जे कोई सारी व्यवस्था रा पालन करां कने इक्की गल्ला च चूक करी देआं तां सैं सारियां गल्लां च दोषी हुईं जां। 11 कांभईं तिने जे ये बोलया था, “व्यभिचार मता करदे” तिने ई ये बी बोलया था, “खून नीं करा।” इस खातर जे तुहें व्यभिचार नीं करदे पर खून करां ये तां तुहें व्यवस्था जो तोडने औळे हुये। 12 तुहें तिन्हां लोकां साईं वचन बोला कने तिन्हां साईं बर्ताव करा तिन्हांरा तिस ई व्यवस्था रे मुताबिक न्याय

हुणा, तिसते जे छुटकारा मिलां। 13 सै जे दयालु नींआ, तिसरे खातर परमेशरा रा न्याय बी बिणा दया तेई हुणा; पर दया न्याय पर ई विजय हुआ ई।

बिश्वास कने कर्म

14 हे मेरे भाईयो, जे कोई माहु बोलां भई सै विश्वासी आ तां इसरा क्या फायदा तदुआं तक जे भई तिसरे काम्म विश्वासा रे मुताबिक नीं ओ? क्या येदा विश्वास किसी रा उद्धार करी सकां? 15 जे भाईयां कने भैणां जो कपड़यां री जरूरत हो, कने तिन्हांजो हर रोज रोटिया री कमी हो, 16 कने तुहां चते ई कोई बोलो, “शान्तिया ने जावा, परमेशर तुहांरा कल्याण करो, तुहें गरम रौआ कने रञ्जीने रोटी खावा,” कने जे तुहें तिन्हारे शरीरां री जरूरतां री चीजां तिन्हांजो नीं देओ तां तिसरा क्या फायदा? 17 तियां ई जे विश्वासा ने कर्म नीं आ तां सै अपने स्वाभावा च मरीरा।

18 पर कोई बोली सकां, “तिञ्जो विश्वास आ कने हऊँ कर्म करां।” हुण तुहें बिणा कम्मां ते अपना विश्वास दस्सो कने हऊँ अपना विश्वास अपने कम्मां रे जरिये दसगा।” 19 क्या तुहें विश्वास करां ये भई परमेशर सिर्फ इक आ? तू खरा करां! भूत-प्रेत ये विश्वास करां ये भई परमेशर हाया; कने सै कम्बदे रैयें। 20 पर ओह! निकम्मे माहुआ, क्या तू ये मनी जाणदा भई कर्म बगैर विश्वासा ते बेकार आ? 21 ताहली जे अहारे पिते अब्राहमे अपने मुन्दुये इसहाका जो बेदिया पर अर्पित कित्या, तां क्या सै अपने कर्मां रे मुताबिक धर्मीं नीं गिणया गया? 22 तू देख भई तिसरा ये विश्वास तिसरे कम्मां ने मिलीने प्रभाव पां, कने कम्मां ते विश्वास सिद्ध हुआ, 23 कने पवित्र शास्त्रा रा ये वचन पूरा हुया: “अब्राहमे परमेशरा पर विश्वास कित्या, कने ये तिसरे खातर धर्म गिणया गया; ” कने सै परमेशरा रा मित्र कहलाया। 24 तुहें देखा भई सिर्फ विस्वासा तेई नीं पर अपने कम्मां तेई माहु धर्मीं बणां। 25 तियां ई राहाब वेश्य बी, क्या तिस वगत अपने कम्मां ते धर्मीं नीं बणी, ताहली जे तिसे दूतां जो अपने घरा च शरण दिति कने फेरी तिन्हांजो दूजे रस्ते किति भेञ्जीत्या। 26 इस तरीके ने तियां जे बगैर आत्मा ते शरीर मरीरा हुआं, तियां ई कम्मा ते बगैर विश्वास बी मूर्खरा हुआं।

जीभा जो बशा च करना

3 हे मेरे भाईयो, तुहां चते कई सारयां जो उपदेशक बणने री इच्छा नीं करनी चाहिन्दि, तुहें जाणां ई हाये भई अहां उपदेशकां रा होर जादा शख्तिया ने न्याय कित्या जाणा। 2 हऊँ तुहांजो ईयां इस खातर याद करवाई करां भई अहां सब्बीते येदी कई सारी भूल-चूकां हुन्दी रैईयां, जे कोई बोलणे च कोई बी चूक नीं करो तां सै सिद्ध माहु आ, तां फेरी येदा कुण आ सै जे तिस पर पूरे तरीके ने काबू पाई सकां? 3 अहें घोड़यां रे मुंहां च लगाम इस खातर लगायें भई सै अहारे बसा च रौ, कने इस तरीके ने अहें तिन्हारे सारे शरीरा जो बशा च करी सकां ये। 4 यनि पाणिये रे जहाजां रा उदाहरण बी लेई सकां ये, देकरखा, चाहे सै कितणे ई बड्डे हो ताकतबर हवां तिन्हांजो चलाईयां, पर इक छोटी जेई किश्तीया ने तिन्हारा मांझी तिन्हांजो अपणिया इच्छा रे मुताबिक घुमान्दा रैयां। 5 इस ई तरीके ने जीभ, सै जे शरीरा रा इक छोटा जेआ अंग आ कने सै बड्डी-बड्डी गल्लां करने री डीगा मारदी रैई। देकरखा, अग्गी री इक छोटी जेईया चिन्गारिया ने सारा जंगल फुखी जां। 6 हां, ये जीभ; इक लपट ई। ये बुराईया रा इक पूरा संसार आ। ये जीभ अहारे शरीरा रे अंगां च इक येदा अंग आ, सै जे सारे शरीरा जो कलंकित करी देई कने अहारे सारे जीवन चक्रा च आग लाई देई। ये जीभ नरका री अग्गी ते भडकदी रैई। 7 कांभई हरेक किस्मा रे जंगली पशु-पंछी कने कीडे-मकोडे, पाणिये च रैहणे औळे प्राणी माहुआं रे बशा च कित्ते जाई सकां यें कने कित्तिरे बीये। 8 पर जीभा जो कोई माहु बशा च नीं करी सकदा, ये खतरनाक विषा ने भरीरी इक येदी बुराई सै जे कदीं चैना ने नीं रैहन्दी। 9 अहें इसा जीभा नेई अपने प्रभु कने परमेशरा री स्तुती करां ये कने इसते ई लोकां जो सै जे परमेशरा रे रुपा च पैदा हुईरे, कोसां बी ये। 10 इक्की मुंहां ते आशीर्वाद कने शाप दोनों निकळां ये, मेरे भाईयो, येदा त नीं होणा चाहिन्दा। 11 क्या भला नाळूये रे इक्की मुंहा ते मीठा कने खारा दो तरह रा पाणी निकळी सकां। 12 मेरे भाईयो, क्या दागले रे

डाळा पर जैतून या अंगूरा रिया बेला पर कदीं दागले लगां ये? कदी मनी, कने नां ई खारे नालूये ते कदीं मीठा पाणी निकळदा।

स्वर्गिय ज्ञान

13 भला तुहां च ज्ञानी कने समझदार कुण आ? सै जे हाया, तिस्सो अपने खरे चाल-चलना ते ये दस्सणा चाहिन्दा भई तिसरे काम्म तिसा नम्रता ने कित्तिरे हो सै जे ज्ञाना ते पैदा हुआई। 14 पर जे तुहां लोकां रे दिलां च कडवाहट कने स्वार्थ भरोईरा हो तां अपने ज्ञाना रा ढोल मता पिटदे, येदा करीने त तुहें सचाईया पर पर्दा पान्दे हुये झूठ बोली करां ये। 15 ये ज्ञान सै नीं आ सै जे उपरा ते यनि स्वर्गा ते उतरा, बल्कि सै त संसारिक आ, आत्मिक नीं आ, कने शैताना रा। 16 कांभई तिन्थी जे कडवाहट कने बरोध हुआं, तिन्थी बखेडा कने कई तरह रा बुरा काम्म बी हुआं। 17 पर स्वर्गा ते औणे औळा ज्ञान सब्बीते पैहले त पवित्र हुआं, फेरी मिलणसार, सैहणशील, खुशमिजाज, कने दया ने भरीरा हुआं, कने तिसते खरयां कम्मां री फसल पैदा हुआं ई, सै बगैर पक्षपाता ते कने सच्ची बी हुआई। 18 शान्तिया रे खातर काम्म करने औळयां लोकां जो ई धार्मिक जीवना रा फळ मिलणा, जे तिस्सो शान्तिया ने बाहीरा हुंगा।

संसार ने दोस्ती

4 तुहां च लड़ाई-झगडे कितिते आईये? क्या तिन्हांरी वजह तुहारे अपने ई अन्दर नीं? तुहांरी ये भोग-बिलासा ने भरीरी इच्छां ई हाईयां सै जे तुहारे अंगां च लगातार लडदे-भिडदे रें, क्या ये तिन्हांते ई पैदा नीं हुन्दे? 2 तुहें लोक चाँह त हाये पर तुहांजो मिली नीं पान्दा, तुहां च हिरख आ, कने तुहें दुज्यां रा खून करां ये, फेरी भीं सै जे चाँये, तिसजो पाई नीं पान्दे कने इस खातर लड़ा- झगडां ये, तुहांजो अपणिया मर्जिया री चीजां तां नीं मिली पान्दियां, कांभई तुहें तिन्हांजो परमेशरा ते नीं मंगदे। 3 कने ताहली जे मंगा बी ये तां तुहांरा मकसद ठीक नीं हुन्दा, कांभई तुहें तिन्हांजो अपणिया ऐश-मस्तिया च डवाणे जो मंगां ये। 4 ओ बुरकरनियो, क्या तुहें नीं जाणदे भई संसारा ने प्यार करना परमेशरा ने नफरत करने साई आ? सै कोई जे इसा दुनिया ने दोस्ती रखणा चाँह, सै खुद अप्णूँ जो परमेशरा रा शत्रु बणां। 5 क्या तुहें ये समझां ये भई पवित्र शास्त्र बेकार च बोलां, भई “परमेशरे अहारे अन्दर सै जे आत्मा दितिरी सै ईर्ष्यापूर्ण इच्छां ने भरीरी रैई।” 6 पर परमेशरे अहां पर जादा अनुग्रह दस्सया, इस खातर शस्त्रा च लिखीरा, “परमेशर घमण्डियां रा बरोध करां, जबकि दीन लोकां पर अपना अनुग्रह करां।” 7 इस खातर खुद परमेशरा रे अधीन हुई जवा, कने शैताना रा बरोध करा, तिस तुहारे सामणे ते नड्डी जाणा। 8 परमेशरा रे नेडे आवा, तां तिस बी तुहारे नेडे औणा। अरे पाणियो! अपने हात्थ साफ करा, कने ओ शक करने औलयो, अपने दिलां जो पवित्र करा। 9 दुखी हुआ, कने शोक करा, कने रोआ। हुई सकां तुहांरा ये हसणा शोका च बदली जाओ कने तुहांरी ये मौज उदासिया च बदली जाओ। 10 प्रभु रे सामणे खुद दीन बणा, तिस तुहें उच्चे करने।

भाईयां पर दोष मढ़ना

11 हे भाईयो, इक्की दूजे री बदनामी करना बन्द करा। सै जे अपने भाईये री बदनामी करां या तिस पर इल्जाम लगां, सै व्यवस्था री बदनामी करां; कने जे तू व्यवस्था री बदनामी करां, तां तू व्यवस्था पर चलणे औळा नीं आ, पर तिसरा न्याय करने औला बणी जां। 12 व्यवस्था रे विधाना जो देणे औळा कने तिसरा न्याय करने औळा त बस इक्क ई हाया, कने सैई रक्षा करी सकां कने सैई नाश करां। तां फेरी अपने पडैसिये रा न्याय करने औळे तुहें कुण हुआंये?

घमण्डा रे बरुद्ध चैताबनी

13 येदा बोलणे औळयो सुणा, “आज या कल अहें किसी होर नगरा च जाईने तिन्थी इक साल गुजारागे, कने बपवार करीने मता पैसा कमाई लेंगे। 14 पर तुहें त इतणा बी नीं जाणदे भई कल तुहां रिया जिन्दगिया रा क्या हुन्गा। देकरखा, तुहें त तिसा धुन्धा साई ये सै जे थोड़ी देर दिस्सां ई कने फेरी

गुम हुई जाई।¹⁵ इसरे उलट तुहांजो ये बोलणा चाहिन्दा, “जे प्रभु चाहो तां अहें जिन्दा रहैहो, कने ये या सै काम्म बी करगे।”¹⁶ पर हुण तुहें अपणे डींग मारने पर घमण्ड करां ये; येढा सारा घमण्ड बुरा हुआ।¹⁷ इस खातर सै जे कोई भला करना जाणां कने नीं करवा, तिसरे खातर ये पाप आ।

अमीरां जो चेताबनी

5 हे अमीरो सुणा, सै दुख जे तुहां पर औणे औळे तिन्हारे खातर जोर-जोरा ने रोआ।² तुहारा धन सड़ी चुक्रीरा कने तुहारे कपड़यां जो कीड़े खाईगरे।³ तुहारा सोना चान्दी जंग लगीने बिगड़ीगरे; तिन्हां पर लगी रिया जंगा तुहारे बरोधा च गवाही देणी, कने अगी साई तुहारा मास खाई जाणा। तुहें अपणा खजाना तिसा उम्रा च इक कन्डे चक्रीने रखीत्या तिसरा अन्त जे हुणे औळा।⁴ देख्वा, तिन्हे मजदूरें जे तुहारे खेतां च काम्म कित्तिरा, तुहें तिन्हारी मजदूरी धोखा देईने रोकरी, सैई मजदूरी चीन्डां मारीने हाक पाई राई कने खेतां च काम्म करने औळयां री सै चीन्डां सर्वशक्तिमान प्रभुये रे कन्नां तक जाई पुज्जी रियां।⁵ तुहें धरतिया पर भोग-विलासा च डुक्वीरे रैये कने बड़ा सुख भोगया; इस तरीके ने तुहें खुद अप्पू जो बध कित्ते जाणे रे दिना रे खातर पाळी-पोसीने मोटा तगड़ा करीलरा।⁶ तुहें धर्मी लोकां जो दोषी बणाईने मारया, सै जे तुहारा सामणा नीं करदे।

दुःखा च धैर्य रखणा

7 इस खातर मेरे भाईयो, प्रभुये रे दोवारा औणे तक धीरज रखा। तिस करसाणा रा ध्यान करा सै जे अपणिया जमीना री कीमती फसला खातर आस रखां, इसरे खातर सै शुरु रिया बरखा ते लेईने बाद बिच्चा रिया बरखा तक लगातार धीरज धरीने आस करी रक्खां।⁸ तुहांजो बी धैर्य ने आस रखणे पौणी, अपणे दिलां जो मजबूत बणाईने रक्खा कांभई प्रभु बड़ा जल्दी औणे औळा।⁹ हे भाईयो, अप्पू चीयें इक्की दूये री शकैतां मता करदे ताकि तुहांजो अपराधी नीं बणाया जाओ; देख्वा, न्याय करने औळा त अन्दर औणे रे खातर दरवाजे पर खडीरा।¹⁰ मेरे भाईयो, तिन्हें भविष्यवक्तेयां जे

प्रभु रे नौवा ते गल्लां कित्तियां, तिन्हांजो दुक्ख सैहणे कने धीरज रखणे रा इक आदर्श समझा।¹¹ ध्यान रखयो, अहें तिन्हां रिया सैहणशीलता रिया वजह ने तिन्हांजो धन्य बोलां ये। तुहें अय्यूब रे धीरजा रे बारे च त सुणीरा ई हाया, कने प्रभुये तिस्सो तिसरा सै जे फळ दित्या, तिस्सो बी तुहें जाणां ई हाये भई प्रभु कितणा दयालु कने करुणा ने भरीरा।¹² पर हे मेरे भाईयो, सब्बीते बड्डी गल्ल येई भई सगन्द नीं खायां, न स्वर्गा री, न पृथ्वीया री, न किसी होरी चीजा री; पर तुहारी गल्ल बात हां री हां कने ना री नां होणी चाहिन्दी, ताकि तुहां पर परमेशरा रा दण्ड नीं पौ।

प्राथना री ताकत

13 जे तुहां चते कोई दुःखां च फसीरा हो तां तिस्सो प्राथना करनी चाहिन्दी कने जे कोई खुश आ तां तिस्सो स्तुती रे भजन गाणे चाहिन्दे।¹⁴ जे तुहारे बिच कोई रोगी आ तां तिस्सो कलीसिया रे अगवयां जो सदणा चाहिन्दा भई सै तिन्हारे खातर प्राथना करो कने तिस पर प्रभुये रा नौव लेईने तेल मळो,¹⁵ विश्वासा ने कित्तिरी प्राथना ते रोगी चंगा हुई जाणा, कने प्रभु तिस्सो ठवाळी ने खड़ा करी देआं; जे तिने पाप कित्तिरे हुं, तां प्रभुये तिसरे पाप बी माफ करी देणे।¹⁶ इस खातर तुहें अप्पू चीयें इक्की दूजे रे सामणे अपणे-अपणे पापां जो मन्नी लौआ, कने इक्की दूये रे खातर प्राथना करा, ताकि तुहें भले चंगे हुई जाओ: धर्मी माह्ये रिया प्राथना रे असरा ने बड़ा किछ हुई सकां।¹⁷ एलिय्याह बी त अहां साई दुःख-सुख भोगणे औळा इक माह्य था, कने तिने बिलखी-बिलखी ने रोन्दे हुये प्राथना कित्ति भई बर्खा नीं हो कने साडे तिन्हा सालां तक जमीना पर बर्खा नीं हुई।¹⁸ फेरी तिने प्राथना कित्ति, तां अम्बरा ते बर्खा बरहे लगी, कने जमीना ते फसलां उगणे लगियां।¹⁹ हे मेरे भाईयो, तुहां चते जे कोई सचाईया ते भटकी जाओ कने तिस्सो कोई भी मोडी ने ली आओ,²⁰ तां तिस्सो ये पता होणा चाहिन्दा भई सै जे किसी पापिये जो पापा रे रस्ते ते वापस ली औआं सै तिस पापिये रिया आत्मा जो अनन्त काल रिया मौती ते बचां कने तिसरे कई पापां रे माफ कित्ते जाणे रा कारण बणां।

1 पतरस

अभिवादन

1 पतरस रिया तरफा ते सै जे यीशु मसीह रा प्रेरित आ, परमेशरा रे तिन्हां चुणीरे लोकां रे नौ सै जे पुन्तुस, गलातिया, कप्पदुकिया, आसिया कने बिथुनिया रे लाकयां च हर किति फैलीरे, 2 तुहें, तिन्हांजो जे परम पिता परमेशरा रे पूर्व ज्ञाना रे मुताबिक चुणीरा, सै जे अपणी आत्मा रे कम्मां रे जरिये तिस्सो समर्पित ये, तिन्हांजो जे तिसरे आज्ञाकारी होणे रे खातर कने यीशु मसीह रे खूना रे छिड़के जाणे रे खातर चुणीरा। तुहां पर परमेशरा रा अनुग्रह कने शान्ति जादा ते जादा हुन्दी रौ।

इक जिन्दा आस

3 धन्य हो अहांरे प्रभु यीशु मसीह रा परमेशर, तिने जे यीशु मसीह रे मूर्इरेयां चते ज्युन्दा हुणे रे जरिये अपणी बडी दया ने जिन्दा आस पाणे रे खातर तिने अहांजो नौवा जन्म दित्या। 4 ताकि तुहें, तुहांरे खातर स्वर्गा च सुरक्षित रुपा च रखीरे अजर-अमर दोषा ते बगैर अबिनाशी औतरिया जो पाई लो; 5 तिन्हांरी रक्षा परमेशरा री समर्थय ने विश्वासा रे जरिये तिस छुटकारे खातर, सै जे औणे औळे टैमा च परगट होणे औळी, किति जाई। 6 इस पर तुहें बडे खुश ये, यनिके हुण तुहांजो थोडे टैमा खातर कई तरह रे मतेहानां च पैईने दुखी होणा बडा जरूरी आ। 7 कने ये इस खातर भई तुहांरा परखी रा विश्वास, सै जे अग्गी च परखीरे नाशवान सियुने ते बी किति कई गुणा मैहन्गा, तिस्सो ताहली जे यीशु मसीहे प्रगट होणा, ता परमेशरा ते प्रशंशा, महिमा कने आदर मिलो, 8 यनिके तुहें तिसजो देखीरा नीं आ, फेरी भीं तुहें तिस्सो प्यार करां ये, तुहें हल्लियें तिस्सो देखी नीं पाई रांये, पर फेरी भीं तिसच विश्वास करां ये कने इक येदिया खुशिया ने भरीरे सै जे बर्णन करने ते कने महिमा करने ते परे आ। 9 कने तुहें अपणे विश्वासा रे परिणाम स्वरूप अपणी आत्मा रा उद्धार करीरां ये।

10 इस उद्धारा रे बारे च तिन्हें भविष्यवक्त्यां, बडिया मेहणता ने खोजबीण कीतिरी कने बडिया साबधानिया ने पता लगाया, तिन्हें जे तुहां पर परगट होणे औळे अनुग्रह रे सम्बन्धा च भविष्यवाणी करी तरी थी। 11 तिन्हें भविष्यवक्त्यां मसीह री आत्मा ते ये जाणया सै जे मसीह पर होणे औळे दुख्यां जो दस्सीरां थी, कने सै महिमा सै जे इन्हां दुख्यां ते बाद परगट हुणी। ये आत्मा तिन्हांजो दस्सीरां थी, ये गल्लां इसा दुनियां पर कदीं हुणियां कने ताहली इसा दुनिया रा क्या हुंगा। 12 तिन्हांजो ये दस्सीरा था भई तिन्हां गल्लां रा उपदेश देन्दे हुये सै खुद अपणी सेवा नीं करीरां थे बल्कि तुहांरी करीरां थे। ये गल्लां स्वर्गा ते भेजरीरे पवित्र आत्मा रे जरिये तुहांजो खुशखबरिया रा उपदेश देणे औळयां रे जरिये दस्सी दितिरी थी; कने तिन्हां गल्लां जो जाणने रे खातर त स्वर्गदूत तक तरसां ये।

पवित्र जीबन ज्युणे री बुलाहट

13 इस खातर मानसिक तौर पर सचेत हुई जवा कने अप्पू पर नियन्त्रण रक्खा, तिस बरदाना पर पूरी आशा रखा सै जे यीशु मसीह रे परगट होणे रे वगत तुहांजो मिलणे औळा। 14 आज्ञा मनणे औळे बच्चयां साई तिस वगता री बुरी इच्छां रे मुताबिक अप्पू जो मता ढाळदे सै जे तुहां च पैहले थियां, ताहली जे तुहें अज्ञानी थे। 15 पर तियां जे तुहांजो सदणे औळा परमेशर पवित्र आ, तियां ई तुहें बी अपणे हरेक कम्मां च पवित्र बणा। 16 कांभई पवित्र शास्त्र बी येदा ई बोलां, “पवित्र बणा, कांभई हऊं बी पवित्र आ।” 17 कने तां

जे भई तुहें ‘हे पिता, हे पिता’ बोली ने तिसते प्रार्थना करां ये, सै जे बिना मतभेदा ते हर इक्की रे कम्मा रे मुताबिक न्याय करां, तां परदेशी होणे रा वगत डरा ने बितावा। 18 कांभई तुहें ये जाणां ये भई चान्दिया या सोने साई यनि नाशवान चीजां ते तुहांजो तिसा बेकार जिन्दगिया ते छुटकारा नीं मिली सकदा, सै जे तुहांजो तुहांरे पूर्वजां ते मिलीरा; 19 पर सै त तुहांजो निर्दोष कने कलंक रहित मेमने साई मसीह रे कीमती लहूये तेई मिली सकां था। 20 इस संसारा रिया सृष्टिया ते पैहले ई तिस्सो चुणीलरा था पर तुहां लोकां रे खातर तिस्सो इन्हां अन्तिम दिनां च प्रगट कित्या। 21 तिस मसीह रिया वजह नेई तुहें तिस परमेशरा पर विश्वास करदे रैये तिने जे तिस्सो मूर्इरेआं चते ज्युन्दा कित्या कने तिस्सो महिमा दित्ति, इस तरीके ने तुहांरी आशा कने तुहांरा विश्वास परमेशरा च मजबूत हो।

22 हुण देख्खा, तां जे तुहें सचाईया रा पालन करदे हुये, सच्चे भाईचारे रे प्यारा जो दसणे रे खातर अपणिया आत्मा जो पवित्र करीलया, तां तन-मन लगाईने इक्की दूजे ने ज्यादा प्यार रक्खा। 23 कांभई तुहें नाशवान बीजा ते दुबारा जीवन नीं पाया, पर ये तिस बीजा रा फळ आ सै जे अमर आ। तुहांरा नौवा जीवन परमेशरा रिया तिसा खुशखबरिया ते हुया सै जे जीवित आ कने अटल आ। 24 कांभई पवित्र शास्त्र बोलां,
“प्राणी त सारे घा साई ये कने तिन्हांरी सारी सोभा घा रे फूलां साई।
घा सुक्की जां, कने फुल्ल झडी जायें,
25 पर प्रभु रा बचन सदा सर्वदा टिकीरा रैयां।” कने येई खुशखबरिया रा वचन आ सै जे तुहांजो सणवाईरा।

जिन्दा पत्थर कने पवित्र लोक

2 इस खातर सारी बुराईयां, छल-कपट, पखण्ड, बैर-बिरोध कने इक्की दूये पर दोष लगाणे ते बचीरे रौआ। 2 जमदे बच्चे साई शुद्ध आत्मिक दुधा रे खातर लालायित रौआ ताकि तिसते तुहांरा विकास कने उद्धार हो, 3 हुण देख्खा, तुहें त प्रभु रिया किरपा रा स्वाद त चक्खी लरा।

4 यीशु मसीह रे नेडे औवा, सै जे जीवित पत्थर आ; तिस्सो जे संसारिक लोकें नकारीतरा था, पर सै जे परमेशरा रे खातर कीमती आ कने सै जे तिसरे जरिये चुणीरा। 5 तुहें बी खुद जीवित पत्थरां साई इक आत्मिक घर बणदे जायें, ताकि इक येदे पवित्र याजकां रे रुपा च सेवा करी सको तिसरा फर्ज जे येदे आत्मिक बलिदान चढाणा हुया सै जे यीशु मसीह रे जरिये परमेशरा जो ग्रहण योग्य हो। 6 शास्त्रा च लिखीरा: “देख्खा, हऊं सिय्योन च कुणे रे सिरे रा चुणीरा कने कीमती पत्थर रक्खीरां; कने सै जे कोई तिस पर विश्वास करगा, तिस्सो कदीं बी शर्मिन्दा नीं होणे पौणा।”

7 तुहांरे खातर सै जे विश्वास करां ये, सै त कीमती ये, पर सै जे विश्वास नीं करदे तिन्हांरे खातर “तिस पत्थरा जो जे राजमिस्रियें बेकार समझीने नकारीत्या था, सैई कुणे रा पत्थर हुईगरा,”

8 कने “इक पत्थर तित्थी जे लोक ठोकर खायें कने येदी इक चडान तिस पर जे लोक फिसली जाओ,” कांभई सै परमेशरा रे वचना रा पालन नीं करदे कने बस येई तिन्हांरी नियत रैई। 9 पर तुहें त चुणीरे लोक ये याजकां रा इक राज्य, इक पवित्र प्रजा ई, इक येदा लोकां रा झुण्ड आ सै जे परमेशरा रा अपणा हो, ताकि तुहें परमेशरा रे नोखे कम्मां जो परगट करी सको। सै परमेशर तिने जे तुहांजो हनेरे ते ज्योतिया च सदया। 10 इक वगत था ताहली जे तुहें प्रजा नीं थे, पर हुण तुहें परमेशरा री

प्रजा ये। इक टैम था ताहली जे तुहां पर दया नीं हुईरी थी, पर हुण तुहां पर परमेशरे दया दस्सी।

मसीह जिम्मेदारी

11 मेरे प्यारे मित्रो, हऊँ तुहाने सै जे इस संसारा च अजनबियां रे रूपा चे, विनती करां भई इन्हां शारीरिक इच्छां ते दूर रौआ सै जे तुहां रिया आत्मा ने लड़दियां रईयां। 12 अधर्मियां रे बिच अपणां चाल-चलन ठीक बणाईने रखा भई चाहे सै अपराधियां रे रूपा च तुहांरी बुराई करो, पर सै तुहारे भले कम्मां जो देखीने परमेशरा रे औणे रे दिन परमेशरा री महिमा करो।

परमेशरा रे दास

13 प्रभु रे खातर हरेक माहु अधिकारियां रे अधीन रौआ, राजे रे इस खातर भई सै सब्बीं रे ऊपर प्रधान आ, 14 कने शासकां रे अधीन रौआ, कांभई तिन्हांजो तिने बुरकन्यां जो सजा देणे कने भला काम्म करने औळ्यां री प्रशंसा खातर भेज्जीरा। 15 कांभई परमेशरा री येई इच्छा ई भई तुहें अपणे खरयां कम्मां ते मूर्ख लोकां री अज्ञाना ने भरी रियां गलां जो चुप कराई दवा। 16 अजाद माहुये साई जीओ पर तिसा अजादिया जो बुराईया रे खातर आड मत बणने देआ; पर खुद अप्पूँ जो परमेशरा रे सेवक समझीने चला। 17 सबनीं रा आदर करा, अपणे भाईयां ने प्रेम-भौ रखा, परमेशरा रा आदरा ने उर मन्ना, राजे रा आदर करा।

मसीह अहारा आदर्श

18 हे सेवको, आदरा ने अपणे स्वामियां रे अधीन रौआ, न सिर्फ तिन्हांरे सै जे खरे माहु ये कने दुज्यां रे खातर चिन्ता करां ये बल्कि तिन्हांरे बी सै जे शख्त ये। 19 कांभई जे कोई परमेशरा रा बचार करीने अन्याय ने दुख सैहन्दा हुआ कने यातना झेलदा हो, तां सै प्रशंसा रे लायक आ। 20 पर जे बुरे कम्मां रिया वजह ने तुहांजो मारया-कुट्टया जां कने तुहें तिसजो सैंयांये, तां इसच प्रशंसा री क्या गल ई, पर जे तुहांजो तुहारे खरयां कम्मां रे खातर सताया जां, तां परमेशरा रे सामणे सै प्रशंसा रे लायक आ। 21 परमेशरे तुहें इस खातर सद्दीरे कांभई मसीहे बी अहारे खातर दुख सैहीरे कने येदा करीने अहारे खातर इक मिसाल दित्तिरी ताकि अहें बी तिसरे ई नकसे कदमां पर चली सक्को। 22 न त तिने कोई पाप कित्या कने न ई तिसरे मुँहा ते कोई छल-कपटा री गल निकली। 23 सै गाली सुणीने गाली नीं देन्दा था, कने दुख सैहीने किसी जो बी धमकी नीं देन्दा था, बल्कि तिस सच्चे न्याय करने औळे परमेशरा रे अग्गे तिने खुद अप्पूँ जो अर्पित करीत्या। 24 सै खुद अहारे पापां जो अपणे शरीरा पर लेईने कूसा पर चढ़ीया, तिसते जे अहें पापां रे खातर मरीने भलाईया रे खातर जीवन बिताई सक्को: ये तिसरे तिन्हां जख्मां रे कारण ई हुया तिन्हांते जे तुहें चंगे कित्ते गये। 25 कांभई तुहें भेङ्गां साई भटकणे लगीरे थे, पर हुण तुहें अपणे चरवाहे कने तुहांरी आत्मां रे रखवाले ला जो वापिस आईये।

पति कने पत्नी

3 हे पत्नियो, तुहें बी अपणे-अपणे पतियां रे बोला च रौआ, इस खातर भई जे तिन्हां चते कोई परमेशरा रे वचना रा पालन नीं करदे हो, 2 तां तुहारे पवित्र कने आदरा ने भरीरे चाल-चलणा जो देखीने बिणा किसी गल बाता तेई अपणी-अपणी पत्निया रे व्यवहारा खौ खन्जोई जाओ। 3 तुहांरा सजणा-संबरना दिखाबटी नीं हुणा चाहिन्दा, यनिके सै जे केशां जो गुत करीने सजाणा, सोने रे गैहणे पहनणा, या नेक बनेके कपड़े पहनीने कित्या जां, 4 बल्कि तुहांरा संगार त तुहारे मना रा अन्दरला व्यक्तित्व होणा चाहिन्दा सै जे कोमल कने शान्त आत्मा रे अविनासी सजावटा ने सजीरा रौ, कांभई परमेशरा रिया नजरां च इसरी बड़ी कीमत ई। 5 कांभई पिछले जुगा रियां तिन्हां पवित्र जनानां रा अपणे आप जो सजाणे-संवारने रा येई ढग था, जिन्हांरी आशां परमेशरा पर टिकी रियां थियां। 6 तियां जे अब्राहम रे अधीन रहणे औळी सारा सै जे तिस्सो अपणा मालक मन्नां थी। ईयां ई तुहें बी बिणा किसी उरा ते जे नेक काम्म करां ईयां तां तिसरी पुत्रियां जाणी जाणियां।

7 तियां ई हे पतियो, तुहें बी अपणी पत्नियां ने समझदारिया ने रईने जिन्दगी जीवा, तिन्हांजो कमजोर समझीने, तिन्हारा आदर करा, ये समझीने भई अहें दोनों जणे जिन्दगिया रे बरदाना रे बारस ये, तिसते जे तुहां रियां प्रार्थनां च अड़चण नीं आओ।

भलाई करने रिया बजह ने सताव

8 बाद बिच तुहां सारयां जो इक मन, कने कृपामय कने भाईचारे ने प्यार रखणे औळे कने दयालू कने नम्र बणना चाहिन्दा। 9 इक्की बुराईया रा बदला दूजिया बुराईया ने मता देन्दे कने न गाली रे बदले गाली देवा; बल्कि इसरे बदले आशीर्वाद देवा कांभई परमेशरे तुहांजो आशीष रे वारिस होणे जो सद्दीरा; 10 कांभई

“सै जे कोई जिन्दगिया रा मजा लेणा चाँह कने खरे दिन देखणा चाँह, तिस्सो चाहिन्दा भई सै कदी किति बुरे बोल नीं बोलो, कने अपणे हाँठां जो छल-कपटा रियां गलां ते रोकी ने रखो।

11 सै बुराईया रा साथ छड्डीने भलाई करो;

सै शान्ति पाणे जो कोशिश करने औळा हो,

कने तिस्सो चाहिन्दा भई सै शान्तिया ने रौ।

12 कांभई प्रभु रियां अक्खीं धर्मियां पर लगीरियां रई,

कने तिसरे कात्र तिन्हां रिया तरफा खौ लगीरे रै;

पर प्रभु बुरे काम्म करने औळ्यां खा ते मुँह फेरी रक्खां।”

13 जे तुहें भलाई करने री लालसा रखां ये, तां भला तुहांरा बुरा करने औळा कुण हुई सक्को? 14 जे तुहांजो भले रे खातर दुख बी सैहणे पौ तां तुहें धन्य ये, इस खातर लोकां रे डराणे ते मता डरदे, कने न ई घबरावा, 15 पर अपणे मना च मसीह जो प्रभु रे रूपा च आदर देवा। सै जे कोई तुहांते तुहांरिया आशा रे बारे च कुछ पुछो, तां तिस्सो जबाब देणे रे खातर हमेशा तैयार रौआ, पर बिनम्रता ने कने आदरा ने येदा करा; 16 अपणा दिल साफ रखा ताकि यीशु मसीह च तुहारे अच्छे चाल-चलना री निन्दा करने औळे लोक तुहांरा अपमान करदे हुये शर्म महसूस करो। 17 जे परमेशरा री इच्छा येई भई तुहें दुख सहो तां भला काम्म करदे हुये दुख सौओ नां कि बुरे काम्म करदे हुये। 18 कांभई मसीहे बी अहारे पापां रे खातर दुख सैया। यनिके सै त निर्दोष था अहां पापियां रे खातर इक बार मरया भई अहें परमेशरा रे नेडे भेजे जायें; शरीरा रे भावा ने त सै मारया गया, पर आत्मा रे भावा ने जिन्दा कित्या गया। 19 तिसच ई तिने जाईने कैदी आत्मां जो बी प्रचार कित्या। 20 सै जे तिस वगत परमेशरा री आज्ञा नीं मनणे औलियां थी ताहली जे नूँह री किश्ति बणने लगीरी थी कने परमेशर धीरजा ने इन्तजार करीरां था तिसा किश्तिया च थोड़े जे यनि सिर्फ आहु माहु ई पाणिये ते बचे थे। 21 ये पाणी तिस वपतिस्मे साई आ तिसते जे हुण तुहांरा उद्धार हुआ; इसरा मतलब इसच तुहारे शरीरा रा मैल छडवाणा नीं आ, पर शुद्ध मना ने परमेशरा रे वशा च हुणा हुया। वपतिस्मा तुहांजो यीशु मसीह रे जी उठने रे जरिये बचां। 22 सै जाईने स्वर्गा च परमेशरा रे सजे पासे बैठीया; कने स्वर्गदूत कने अधिकारी कने सारी शक्तियां तिसरे अधीन करीते।

बदलीरा जीबन

4 इस खातर ताहली जे मसीहे शारीरिक दुख सैया, तां तुहें बी तिसा मानसिकता जो हथियारा रे रूपा च धारण करा कांभई सै जे शारीरिक दुख सैही लेआं, सै पापां ते छुटकारा पाई लेआं। 2 इस खातर सै दुबारा माहुआं रियां इच्छां रे मुताबिक नीं चलो, बल्कि परमेशरा रिया इच्छा रे मुताबिक कर्म करदे हुये अपणिया शारीरिक जिन्दगीया रा समर्पण करी दो। 3 कांभई तुहें हुण तक गैर-यहुदि लोकां री इच्छा रे मुताबिक काम्म करने, कने काम-बासनां च डुब्बीरे रहणा, शराबियां कबाबियां रियां पार्टीयां च दारु पीणा, कने येथी तक भई अहें नफरता ने भरीरी मूर्तियां री पूजा च काफी वगत गुजारी चुक्कीरे। 4 हुण तां जे तुहें इस घृणित रहण-सैहणा च तिन्हांरा साथ नीं देन्दे तां तिन्हांजो रेहानी हुआई, इस खातर सै तुहांजो बुरा-भला गलांये। 5 तिन्हांजो सै जे हल्लियें जिन्दा ये या मरी चुक्कीरे अपणे चाल-चलणा रा लेखा-जोखा तिस मसीह ले देणे ई पौणा सै जे तिन्हांरा न्याय

करने औळा। 6 इस खातर तिन्हां विश्वासियां जो सैं जे मरी चुक्रीरे खुशखबरी इस खातर सुणाई भई शारीरिक रुपा ते चाहे तिन्हांरा न्याय माळुआ साई हो, पर आत्मिक रुपा ते सैं परमेशरा रे मुताबिक रौ।

परमेशरा रे भले भण्डारी

7 सैं वगत नेडे आ ताहली जे सबी किजि रा अन्त हुई जाणा; इस खातर समझदार बणा कने अपणे ऊपर काबू रखा ताकि तुहांजो प्रार्थना करने च सहायता मिलो। 8 कने सबनीं ते बड्डी गल्ल येई भई इक्की दूजे ने प्रेम-भौ रखा कांभई प्यार अनगिणत पापां जो ढक्की देआं। 9 बिणा किछ कहे सुणे इक्की दूये रा आदर-सत्कार करा। 10 जिस किसी जो परमेशरा रिया तरफा ते जो बी बरदान मिलीरा, तिस्सो चाहिन्दा भई परमेशरा रे कई प्रकारां रे अनुग्रह रे भले भण्डारियां साई इक दूजे रिया सेवा रे खातर कम्मा च लावा। 11 जे कोई बोले, तां येढा बोले लगे भई ये परमेशरा रा वचन आ; जे कोई सेवा करो, तां सैं तिसा शक्तिया ने करो, तिसा जो जे परमेशर देआं ताकि सारियां गल्लां च यीशु मसीह रे जरिये परमेशरा री महिमा हो। महिमा कने सामर्थ जुगां-जुगां तक तिसरी ई हाई। आमीन।

मसीह रे दुःखां च शामिल हुणा

12 मेरे प्यारे मित्रो, सैं जे दुख रुपी आग तुहांजो परखणे खातर तुहांच भडकीरी, इसते ये समझीने चम्भा नीं करयो भई कोई नोखी गल्ल तुहांने घटी राई। 13 पर तियां-तियां जे मसीह रे दुखां च हिस्सेदारी लेई करां ये, मौज करा, ताकि ताहली जे तिसरी महिमा प्रगट हो, तां तुहें बी खुश कने मगन हुई सक्को। 14 फेरी जे मसीह रे नौवा ते तुहांरा अपमान हुन्दा हो, तां तिस अपमाना जो सैंहन करा कांभई तुहें मसीह रे चले, तुहें धन्य ये कांभई महिमा रा आत्मा, सैं जे परमेशरा रा आत्मा, तुहांच बास करां। 15 तुहां चते कोई माळु खूनी या चोर, बुरकर्ना, या दूजे रे कम्मा च अडचण पैदा करने औळा बणीने दुख नीं सहा। 16 पर जे सैं इक मसीही होणे रे नाते दुख सैयां, तां तिस्सो लज्जित नीं होणा चाहिन्दा; बल्कि तिस्सो त परमेशरा जो महिमा देणी चाहिन्दी भई सैं इस नौवा जो धारण करां। 17 कांभई सैं वगत आई पुज्जरीरा भई पैहले परमेशरा रे लोकां रा न्याय कित्या जाओ; कने न्याय री शुरुआत अहां तेई हुणी तां तिन्हांरा क्या अन्त हुणा सैं जे परमेशरा रिया खुशखबरिया जो नीं मनदे? 18 कने

“जे इक भले माळुये राई उद्धार पाणा मुश्कल आ,

तां सैं पापी जे परमेशरा जो नीं मनदे तिन्हां सौगी क्या हुँगा।”

19 इस खातर सैं जे परमेशरा रिया इच्छा रे मुताबिक दुख सैयें, सैं भलाई करदे हुये अपणे-अपणे प्राणा जो विश्वास लायक कने सृष्टिया रे रचणे औळे रे हत्था च सौपी देणा चाहिन्दा।

बुड्यां कने जबानां जो सन्देश

5 तुहांच सैं जे बजुर्ग ये, हऊं तिन्हां साई बजुर्ग आ कने मसीह रे दुखां रा गवाह कने प्रगट होणे औळी महिमा च सहभागी हुईने तिन्हांजो ये समझां, 2 भई रस्ता दसणे औळे परमेशरा रा जन-समूह तुहां रिया देख-रेखा चा; कने निरीक्षण करने औळे रे रुपा च तुहें तिसरी सेवा करां ये, किसी रे दवावा रिया वजह ने नीं, बल्कि परमेशरा रिया इच्छा रे मुताबिक अपणिया खुशिया ने तुहें अपणा ये काम्म दौलता रे लालचा च नीं, पर सेवा करने रे प्रति तत्पर हुईने करां ये। 3 देख-रेख करने रे खातर सैं लोक जे तुहांजो सौपीरे, तिन्हां पर हक नीं जतावा, बल्कि लोकां रे खातर इक आदर्श बणा। 4 ताकि ताहली जे सैं प्रधान रखवाला प्रगट हो तां तुहांजो विजय रा सैं भव्य मुकुट मिलणा, तिसरी शोभा जे कर्दी घटदी नीं। 5 इस तरीके ने हे नौजबानो, तुहें बी बजुर्गा रे वशा च रौआ, तुहें इक्की दूजे रे प्रति विनम्र हुईने रौआ, कांभई “परमेशर घमण्डियां रा बरोध करां, पर दीन लोकां पर हमेशा अनुग्रह करां।”

6 इस खातर परमेशरा रे महिमावान हत्थां रे हेठ दीनता च रौआ, ताकि सैं सही मौका औणे पर तुहांजो ऊच्चा करी सक्को। 7 तुहें अपणी सारी चिन्तां तिस पर छड्वा, कांभई सैं तुहांरे खातर चिन्तित आ। 8 खुद अपणे ऊपर नियन्त्रण रखा, साबधान रौआ, तुहांरा दुश्मण शैतान इक हुरन्दा हुये शेरा साई इथखा-उथखा घुमदा हुआ इसा ताका च रैयां भई सैं जे मिलो तिसरी चीर-फाड़ करीने खाई जाओ। 9 तिसरा मुकाबला करा कने अपणे विश्वासा पर डटीरे रौआ कांभई तुहें त जाणदे ई हाये भई सारे संसारा च तुहांरे भाई-भैहण येढा ई दुख सैही रांये। 10 हुण परमेशर सैं जे सारे अनुग्रह रा दाता, तिने जे तुहांजो मसीह च अनन्त महिमा रा सहभागी होणे रे खातर सद्द्वीरा, तुहांरा थोडा जेआ दुख भोगणे ते बाद अप्पू ई तुहांजो भीं ते स्थापित करगा, सामर्थी करगा कने स्थिरता प्रदान करगा। 11 तिसरा राज युगां-युगां तक रौ। आमीन।

अन्तिम अभिवादन

12 में तुहांजो ये छोटी जेई चिड्डी सिवानुस रे सहयोगा ने, तिस्सो जे हऊं अपणा विश्वास लायक भाई समझां था, तुहांजो हौंसला देणे खातर भई परमेशरा रा सच्चा अनुग्रह येई हाया, इसा गल्ला री गवाही देणे रे खातर लिखीरा, इस पर ई डट्टीरे रौआ। 13 बेबिलोन री कलीशिया सैं जे तुहां साई परमेशरा रे जरिये चुणीरी, तुहांजो नमस्कार बोलीरा। मसीह च मेरे पुत्र मरकुस रा बी तुहांजो नमस्कार। 14 पवित्र चुम्बना ने इक्की दूजे रा आदर सत्कार करा। तुहां सबनीं जो, सैं जे मसीह च, शान्ति मिलो।

2 पतरस

अभिवादन

1 यीशु मसीह रे सेवक कने प्रेरित, शमोन पतरसा रिया तरफा ते तिन्हां लोकां रे नौं तिन्हांजो जे परमेशरा ते अहारे साई विश्वास मिलया, कांभई अहारा परमेशर कने उद्धारकर्ता यीशु मसीह पूरा न्याय करने औळा। 2 तुहें परमेशर कने अहारे प्रभु यीशु मसीह जो जाणी चुकीरे इस खातर तुहांजो परमेशरा री किरपा कने अनुग्रह जादा ते जादा मिलो।

ईश्वरीय बुलाहट कने चुनाव

3 अपणिया जिन्दगिया रे खातर कने परमेशरा रिया सेबकाईया रे खातर सैं जे कुछ अहांजो चाहिन्दा, तिने अपणिया दिव्य शक्तिया रे जरिये सैं सारा कुछ अहांजो दितिरा, कांभई अहें तिस्सो जाणां ये, तिने जे अपणिया ई महिमा कने अच्छे गुणां रे कारण अहांजो सदया। 4 इन्हां रेई जरिये तिने अहांजो सैं महान कने अनमोल बरदान दित्ते, तिन्हांजो देणे रा जे तिने वायदा कित्या था, ताकि तिन्हांरे जरिये तुहें खुद परमेशरा साई हुई जाओ कने तिस बिनाशा ते बची जाओ सैं जे लोकां री बुरी इच्छां रिया वजह ने इस संसारा च हुआं। 5 इस खातर अपणे विश्वासा च अच्छे गुणां जो, अच्छे गुणां च ज्ञाना जो, 6 ज्ञाना च आत्मसंयमा जो, आत्मसंयमा च धीरज, कने धीरजा च परमेशरा रिया भक्तिया जो, 7 कने भक्तिया च भाईचारे जो, कने भाईचारे रे प्यारा जो उदार मना ने बढ़ादे चला। 8 कांभई जे ये गुण तुहां च हाये, कने तिन्हांरा विकास हुई करां, तां तिन्हां तुहें कर्मशील कने सफल बनाई देणे कने तिन्हांते तुहें अहारे प्रभु यीशु मसीह रा पूरा ज्ञान मिली जाणा। 9 पर तिसच जे ये गुण नीं ये, तिसच दूर-दृष्टि नीं, सैं अन्हा; कने सैं ये भुली चुकीरा भई तिसरे पिछले पाप साफ हुई चुकीरे। 10 इस खातर हे भाईयो, ये दसणे रे खातर होर जादा कोशिश करा भई तुहांजो वास्तव च परमेशरे सद्दीरा कने चुणीरा कांभई जे तुहें इन्हां गल्लां जो करां ये, तां कर्दी ठोकर नीं खांगे कने न ई गिरगे, 11 कने इस तरीके ने अहारे प्रभु कने उद्धारकर्ता यीशु मसीह रे अनन्त राजा च बड़े आदरा ने प्रवेश करी पांगे।

पतरसा रा अन्त समय

12 इस खातर तुहें तिन्हांजो जाणां ई हाये, सैं सच्चाईया रा वचन जे तुहांजो मिलीरा तिस पर टिकीरे रैं, तां बी तुहांजो सदा इन्हां गल्लां री याद दिलान्दा रहन्गा। 13 हऊं अपणे खातर ये ठीक समझां भई तदुआं तक जे हऊं इस डेरे चा, तदुआं तक तुहांजो याद करवाई-करवाई ने समझान्दा रहूँ। 14 कांभई हऊं ये जाणां भई मेरे डेरे जो यनि मेरी काया जो गियाये जाण रा वगत बड़े छोड़ औणे औळा, तियां जे भई अहारे प्रभु यीशु मसीहे माह पर परगट कितिरा। 15 इस खातर हऊं येदी कोशिश करगा भई मेरे मरने ते बाद बी तुहें इन्हां गल्लां जो हमेशा याद करी सक्को।

मसीह रिया महिमा रे अक्खों देक्खे गबाह

16 कांभई ताहली जे अहें तुहांजो अपणे प्रभु मसीह री सामर्थ कने आगमन रे बारे च समाचार दित्या था, तां सैं चलाकिया ने बणाई रियां कहाणियां रा सहारा नीं लेईरा था कांभई अहें त तिस रिया महानता रे खुद गबाह ये। 17 कांभई ताहली जे तिने परमेशर पिता ते आदर कने महिमा पाई कने तिस प्रतापमय महिमा चाते ये वाणी परगट हुई, "ये मेरा प्यारा पुत्र आ, तिसते जे हऊं खुश आ।" 18 ताहली जे अहें तिस सौगी पवित्र पहाड़ा पर थे, तिस वगत

स्वर्गा ते येई वाणी सुणी थी। 19 अहांजो बी भविष्यवक्त्यां रे वचना पर होर जादा आस्था हुई, इस पर ध्यान देईने तुहें बी खरा करीरां ये कांभई ये त इक प्रकाश आ, सैं जे इक हनेरिया जगह च ताहलुआं तक चमकी करां तदुआं तक जे पाँ नीं फटो कने सबेरेके जुन्ना रा तारा तुहांरे दिलां च नीं चमकणे लगी जाओ। 20 पर सब्बीं ते बड्डी गल्ल येई भई तुहांजो येह जाणी लेणा चाहिन्दा भई पवित्र शास्त्रा री कोई बी भविष्यवाणी किसी री अपणी विचारधारा रे अधारा पर पूरी नीं हुन्दी, 21 कांभई कोई बी भविष्यवाणी कर्दी माह्नुआं रिया इच्छा ते नीं हुई, बल्कि पवित्र आत्मा रिया अगुबाईया ते माह्नु परमेशरा री वाणी बोलां ये।

झूठे शिक्षक

2 तियां जे तिन्हां लोकां च झूठे भविष्यवक्ता थे, विल्कुल तियां ई तुहां च बी झूठे उपदेशक परगट हुणे, तिन्हां खतरनाक धारणां री शुरुआत करनी, कने तिन्हां तिस मालका रा बी इन्कार करी देणा, तिने जे तिन्हांजो आजादी दिति, येदा करीने तिन्हां खुद अपणे विनाशा जो निमन्त्रण देणा। 2 मते सारयां लोकां तिन्हां रिया भोग-विलासा री इच्छां रा पालन करना, तिन्हां रिया वजह ने सच्चाईया रा मार्ग बदनाम हुणा। 3 लालचा रे कारण अपणी बनाबटी गल्लां ते तिन्हा तुहांते धन-दौलता री कमाई करनी; तिन्हांरी सजा परमेशर बड़े पैहले ते तह करी चुकीरा। तिसरे औणे च कुछ बी देरी नीं; कने विनाश तिन्हांरा इन्तजार करीरां।

4 कांभई तां जे परमेशरे पाप करने औळे दूतां जो बी नीं छडया कने तिन्हांजो पताळ लोका री हनेरियां कोठडिया च पाईत्या भई सैं न्याय रे दिना तक तिन्ही पैरैरै रौ; 5 तिने तिस पुराणे जुगा रे संसारा जो बी नीं छडड्या पर नूह री तिस वगत रक्षा किति ताहली जे अधर्मियां रे संसारा पर जल-प्रलय हुई थी। पर धर्मा रे प्रचारक नूह समेत अड्डां माह्नुआं जो बचाईल्या; 6 सदोम कने अमोरा साई नगरां जो विनाश री येदी सजा देईने स्वाह करीत्या ताकि अधर्मी लोकां ने सैं गल्लां जे घटगियां तिन्हांरे खातर ये इक चेताबनी हुई जाओ, 7 कने तिने लूता जो बचाईल्या सैं जे इक भला माह्नु था, सैं उदण्ड लोकां रे चाल-चलना ते बड़ा दुखी था। 8 (कांभई सैं भला माह्नु तिन्हांरे बिच रहन्दे हुये तिन्हांरे बुरे कम्मां जो देखी-देखीने कने सुणी-सुणीने, हर रोज तिसरी सच्ची आत्मा तडफदी रियां थी।) 9 इस प्रकार प्रभु जाणां भई भगतां जो न्याय रे दिना तक कियां बचाया जां कने दुष्टां जो सजा रे खातर कियां रखया जां, 10 खासकर तिन्हांजो सैं जे अपणे पापां ने भरीरे स्वाभावा री बुरी बासनां रे पीछे चलां ये कने प्रभु री प्रभुत्ता ते नफरत करां ये।

सैं ढीठ, कने अडियल ये, कने ये महिमावान स्वर्गदूतां रा अपमान करने ते बी नीं डरदे। 11 जबकि ये स्वर्गदूत सैं जे शक्ति कने सामर्था च इन्हां लोकां ते बड्डे, प्रभु रे सामणे तिन्हां पर कोई बुरा-भला गलाईने दोष नीं लगान्दे। 12 पर ये लोक त विचारहीन जानबरां साई ये सैं जे पकड़े जाणे कने मारे जाणे रे खातर पैदा हुईरै; कने तिन्हां गल्लां जो जे जाणदे तक नीं ये तिन्हांरे बारे च बुरा-भला गलांये, सैं अपणी सड़ने औळिया बदबुआ च अप्पू ई सड़ी जाणे। 13 तिन्हांजो बुराईया रा बदला बुराईया तेई मिलणा। दिना रे उजाले च भोग-विलास करना तिन्हांजो ठीक लगां, ये कलंक कने दोष आ; ताहली जे ये लोक तुहां सौगी खां-पीआं ये, तां अपणियां तरफा ते प्रेम-भोज करीने भोग-विलास करां ये। 14 ये हमेशा किसी येदिया जनाना रिया ताका च रैयें तिसा ने जे भोग-विलास कित्या जाई सक्को; इस प्रकार तिन्हां रियां अक्खीं पाप करने ते बाज नीं औन्दियां। ये चंचल मना औळ्यां लोकां जो पापा रे खातर बहकाई लें। इन्हांरे मन पूरे तरीके ने लालचा रे आदी ये; ये श्रापा रे पुत्र ये।

15 सिधा-साधा रस्ता छड्डीने ये भटकी गरे, कने बओर रे पुत्र बिलाम रे रस्ते पर चलीपरे, तिस्सो जे पापा री मजदूरी प्यारी थी; 16 पर तिसरे बुरे कम्मा रे खातर इक गदही, सै जे बोली नीं पान्दी, माहुये रिया बोलिया च बोली कने तिस्सो डान्ट-फटकार दिति कने तिस भविष्यवक्ते जो तिसरे बाबलेपन ते रोकया।

17 ये झूठे उपदेशक सुक्के पाणिये रे सोते कने येढे बगैर पाणिये रे बद्दल ये तिन्हांजो जे तूफान डवाई ने लेई जायें; तिन्हांरे खातर अनन्त काल री गहरी हनेरी जगह तह कित्ति री। 18 ये तिन्हांजो सै जे भटकी रेआं चाते बचीने निकळणे री हल्लियें शुरुआत ई करीरां थे, अपणी बेकारा री घमण्डा ने भरी रियां गल्लां ते तिन्हां लोकां जो शारीरिक इच्छां च फसाईने सच्चाईया रे रस्ते ते भटकाई दें। 19 ये झूठे उपदेशक तिन्हांजो छुटकारे रा वचन दें; कांभई कोई माहु सै जे तिसजो जिती लेआं, सै तिसरा ई दास हुई जां। 20 इस खातर जे ये अहारे प्रभु कने उद्धारकर्ता यीशु मसीह जो जाणी लेणे कने संसारा रे खोटा ते बचीने निकळणे ते बाद बी दोबारा तिन्हां ची फसीने संसारा रिया बदिया ते हारी चुक्रीरे, तां तिन्हांरे खातर तिन्हांरी ये बाद बिच्चा री दशा, तिन्हां रिया पैहल किया दशा ते कई मान बुरी, 21 कांभई तिन्हांरे खातर येई खरा था भई सै इसा भलाईया रे रस्ते जो जाणी नीं पान्दे, बजाये इसरे भई सै जे पवित्र आज्ञा तिन्हांजो दितिरी थी, तिसा जो जाणीने तिसाते मुँह फेरी लेन्दे। 22 तिन्हांने त तेढी घटना घटी तियां जे भई तिन्हां सच्चियां कहाणियां च गलाईरा था; “कुत्ता अपणियां उल्लिया लेई हटि ने वापस औवां।” कने इक नहलाई री सूरनी चीकड़ा च मरेलणे खातर फेरी भीं मुड़ीने चली जाई।

प्रभुये रे औणे रा दिन

3 मेरे प्यारे मित्रो, हुण ये दूझी चिड्डी सै जे हऊँ तुहांजो लिखीरां। इन्हां दूई चिड्डियां च तिन्हां गल्लां री याद दिलाईने मैं तुहांरेयां दिलां जो जगाणे रा जतन कित्या, 2 ताकि तुहें पवित्र भविष्यवक्त्यां रे जरिये अतीत च गलाई रियां गल्लां जो याद करा कने अहारे प्रभु कने उद्धारकर्ता रे हुक्मां रा, सै जे तुहांरे चेलयां रे जरिये तुहांजो दितिरे, ध्यान रखा, 3 सब्बीं तै पैहले तुहांजो ये जाणी लेणा चाहिन्दा भई अंतिम दिनां च हसी डवाणे औळे हसी डवान्दे हुयां औणां, 4 कने बोलणा, “क्या हुया तिस रिया बाचा रा? कांभई अहारे पूर्वज त चल बसे, पर ताहलियां ते जे सृष्टि बणीरी, हर बार, तियां री तियां ई चली आई करां ई।” 5 पर ताहली जे सै अडचण पैदा करां ये तां सै ये भूली जायें भई परमेशरा रे वचना रे जरिये आकाश जुगां-जुगां ते टिकीरा कने पृथ्वी पाणिये चते बणीरी कने पाणिये च स्थिर ई, 6 कने इसते ई तिस जुगा रा संसार जल-प्रलय ते नाश हुईया। 7 पर ये आकाश कने ये धरती सै जे

आज्ज अपणे अस्तित्व ची, तिस ई बचना रे जरिये अग्नी ते नाश होणे रे खातर सुरक्षित ई। तिन्हांजो तिस दिना रे खातर रखया जाई करां ताहली जे अधर्मी लोकां रा न्याय हुणा कने सै नाश करी दिते जाणे।

8 पर मेरे प्यारे मित्रो, इसा इक्की गल्ला जो मता भुलदे: प्रभु रे खातर इक दिन हजार साला रे बराबर ये कने हजार साल इक्की दिना रे बराबर आ। 9 प्रभु अपणे बायदे पूरे करने च देर नीं लगान्दा। तियां जे भई कुछ लोक सोच्चां ये, बल्कि सै अहारे प्रति धीरज रखां कांभई सै किसी भी माहुये जो नाश नीं होणे देणा चाहिन्दा, बल्कि सै त चाँह भई सारे बुराईया ते मन फेरी लो। 10 पर प्रभुये रे दिना चुप-चाप चोरा साई औणा, तिस दिन इक खतरनाक गर्जना सौगी अम्बर खत्म हुई जाणे कने अकाशा रे पिण्ड फुक्खी ने नाश हुई जाणे कने ये धरती कने इसा धरतिया री सारियां चीजां फुक्खी जाणियां। 11 कांभई ताहली जे ये सारियां चीजां इस तरीके ने खत्म होणे ओळियां तां सोच्चा तुहांजो किस तरीके रा बणना चाहिन्दा? (तुहांजो पवित्र जीवन जीऊणा चाहिन्दा, पवित्र जीवन सै जे परमेशरा जो अपित आ कने हर तरह रे भले काम्म करने चाहिन्दे)। 12 कने तुहांजो परमेशरा रे दिना री बाट देखणी चाहिन्दी, कने तिस दिना जो लौणे रे खातर कोशिश करदे रैहणा चाहिन्दा। तिस दिना रे औन्दे ई अकाश लपटां च जळीने खत्म हुई जाणा कने अकाशा रे पिण्ड तिसा गर्मिया ने पिघली जाणे। 13 पर अहें परमेशरा रे वचना रे मुताबिक येढे नौये अकाश कने नौई धरतिया री बाट देखी रांये तिन्ही जे धार्मिकता वास करां ई।

जागदे कने तैयार सौआ

14 इस खातर मेरे प्यारे मित्रो, कांभई तुहें इन्हां गल्लां रे होणे री बाट देखी रांये, पूरी कोशिश करा भई प्रभु रिया नजरां च कने शान्तिया च निर्दोष कने निश्कलक पाये जाओ। 15 अहारे प्रभु रे धीरजा जो उद्धार समझा, तियां जे भई अहारे प्यारे भाई पौलुसे परमेशरा रे जरिये दिति रिया अकला रे मुजब तुहांजो लिखया था। 16 अपणे होर पत्रां रे बराबर तिस पत्रा च तिने इन्हां गल्लां रे बारे च बोलीरा। तिन्हां पत्रां च कुछ गल्लां येदियां इयां सै समझणा जे मुश्कल इयां; अज्ञानी कने अस्थिर लोक तिन्हांरे अर्था रा अनर्थ बणाई दें। दूझयां शास्त्रां सौगी बी सै येढा ई करां ये, इसते सै अपणे ई पैरां पर कुहाड़ी मारां ये। 17 इस खातर मेरे प्यारे भाईयो, कांभई तुहांजो ये गल्लां पैहले तेई पता इयां इस खातर साबधान सौआ भई तुहें बुराईयां कने व्यवस्था ते बगैर लोकां रे जरिये भटकाये जाईने अपणिया स्थितिया ते भटकी नीं जाओ, 18 बल्कि अहारे प्रभु कने उद्धारकर्ता यीशु मसीह रे अनुग्रह कने ज्ञाना च तुहें अगे बधदे जावा; हुण होर अनन्त काल तक तिसरी महिमा हुन्दी सौ।

1 यूहन्ना

जीबना रा बचन

1 तिस जीवना रे वचना रे बारे च सैं जे सृष्टिया रे शुरु तेई था: सैं जे अहें सुणया, कने अपणियां अक्खीं देखया, बल्कि तिससो अहें बडे ध्याना ने देखया कने अपणे हत्थां ने छुया। 2 ये जीवन सामणे आया, कने अहें इस्सो देखया, कने तिसरी गबाही दें, कने तुहांजो तिस अनन्त जीवना री खुशखबरी देआं ये सैं जे पिता परमेशरा ने था कने हुण अहां पर परगट हुया 3 जो किछ अहें देखया कने सुणया तिसरी खुशखबरी तुहें बी देआं ये, इस खातर भई तुहें बी अहांने सौगी मिलो; अहांरा ये मिलणा परम पिते ने कने तिसरे पुत्रा यीशु मसीह रे सौगी आ। 4 कने ये गल्लां अहें इस खातर लिखिरां ये, भई अहांरी मौज पूरी हुई जाओ।

जोतिया च चलणा

5 सैं खुशखबरी जे अहें यीशु मसीह ते सुणी, कने तुहांजो सणवां यें, भई परमेशर येदी जोति आ तिसच जे थोड़ा बी अन्धकार नीं आ। 6 जे अहें बोलिये भई तिसने सौगी अहांरा मिलणा-जुलणा, कने फेरी जे नेहरे च चलो, तां अहें झूठे कने सच्चाईया पर नीं चलदे; 7 पर तियां जे सैं जोतिया चा, तियां ई अहें बी जोतिया च चलो, तां इक दूये ने मेल-मिलाप रखां ये, कने तिसरे पुत्रा यीशु मसीहे रा लहू अहांजो सारयां पापां ते साफ करां। 8 जे अहें येदा बोलिये भई अहां च कोई पाप नीं आ, तां अहें अप्पूँ जो धोखा दें, कने अहां च सच्चाई नीं। 9 जे अहें अपणे पापां जो मन्नी लें, तां परमेशर अहांरे पापां जो माफ करने कने अहांरे हरेक पापा जो साफ करने च विश्वासा रे लायक कने धर्मी आ। 10 जे अहें बोल्लो भई अहें कोई पाप नीं कितिरा, तां अहें तिससो जो झूठा बणाये, कने तिसरा वचन अहां च नीं आ।

मसीह अहांरा सहायक

2 मेरे बच्चयो, ये गल्लां हऊँ तुहांजो इस खातर लिखीरां भई तुहें पाप नीं करो, पर जे कोई पाप करां, तां परमेशरा रे सामणे अहांरे पापां रा वचाव करने औला इक सहायक आ, यनिके धर्मी यीशु मसीह। 2 कने सैं इक बलिदान आ सैं जे अहांरे पापां रा हरण करां, न सिर्फ अहांरे पापां रा बल्कि सारे संसारा रे पापां रा बी। 3 जे अहें परमेशरा रे हुक्मा रा पालन करगे, तां येई सैं रस्ता तिसते जे अहें निश्चा करां ये भई अहें सचमुच तिससो जाणील्या। 4 सैं जे कोई ये बोलां भई "हऊँ परमेशरा जो जाणीया," कने तिसरे हुक्मा रा पालन नीं करदा, तां सैं झूठा, कने तिसरे मना च सच नीं आ। 5 पर जे कोई परमेशरा रे वचना पर चलो, तां तिसच परमेशरा रा प्यार साबित हुईरा, अहां जो इसते पता चलां, भई अहें तिस चे: 6 सैं जे कोई ये बोलां भई हऊँ तिस च बणीरा रैयां, तिससो चाहिन्दा भई सैं अप्पूँ बी तियां ई चलो, तियां जे यीशु चलां था।

नोंई आज्ञा

7 प्यारे मित्रो, हऊँ तुहांजो कोई नोंई आज्ञा नीं लिखीरां बल्कि सैं इक सनातन आज्ञा ई, सैं जे तुहांजो शुरु तेई मिली री। ये पुराणी आज्ञा सैं वचन आ, तिसजो जे तुहें सुणीरा। 8 फेरी हऊँ तुहांजो इक हार नोंई आज्ञा लिखीरां, येत तिस च कने तुहांरे जीवना च सच हुआं ई, कांभई अन्धकार मिटदा जां कने सच्चाईया री जोति हलितियें चमकणे ई लगी। 9 सैं जे कोई ये बोलां भई हऊँ ज्योतिया चा, कने फेरी भीं अपणे भाईये ने नफरत करां, तां

सैं हुण तक नेहरे ची हाया। 10 सैं जे कोई अपणे भाईये ने प्यार रखां, सैं ज्योतिया च बणीरा रैयां। तिसरे जीवना च येदा किछ बी नीं आ, तिसते जे कोई पापा च पौ। 11 पर सैं जे कोई अपणे भाईये ने बैर रखां, सैं नेहरे चा, कने सैं अन्धकारा ने भरीरी जिन्दगी जी करां; सैं नीं जाणदा, भई सैं किति जाईरां, कांभई अन्धकारे तिसजो अन्धा करी तरा।

12 प्यारे बच्चो, हऊँ तुहांजो इस खातर लिखीरां, कांभई यीशु मसीह रिया बजह ने तुहांरे पाप माफ हुईरे। 13 पितरो, हऊँ तुहांजो इस खातर लिखीरां भई सैं जे शुरु तेई आ, तुहें तिससो जाणां ये। जवानो, हऊँ तुहांजो इस खातर लिखीरां, कांभई तुहें तिस दुष्टा पर विजय पाईरी। लडको, हऊँ तुहांजो इस खातर लिखीरां, भई तुहें पिते जो जाणीगरे। 14 पितरो, मैं तुहांजो इस खातर लिखीरा, भई सैं जे शुरु तेई हाया तिससो तुहें जाणी चुक्रीरे। नौजवानो, मैं तुहांजो इस खातर लिखीरा, भई तुहें ताकतबर ये, कने परमेशरा रा वचन तुहांरे बिच बास करां, कने तुहें तिस दुष्टा पर जय पाईरी।

संसारा ने प्रेम नीं करा

15 तुहें न त संसारा ने कने न संसारा रियां चीजां ने प्यार रखा, जे कोई संसारा ने प्यार रखां, तां तिसरे दिला च परमेशरा रे प्रति प्यार नीं आ 16 कांभई जो किछ संसारा चा, यनिके शरीरा रियां लालसां, सैं जे तुहांरे पापी स्वाभावा जो अपणी ओर खिंजा ईयां, तुहां रियां अक्खीं जो अच्छी लगां ईयां कने संसारा री हरेक सैं चीज जिस पर लोक इतणा घमण्ड करां ये, परम पिते रिया तरफा ते नीं बल्कि सैं त संसारा रिया तरफा ते आ। 17 ये संसार अपणी लालसां कने इच्छां समेत खत्म हुन्दा जाई करां, पर सैं जे परमेशरा रिया इच्छा रा पालन करां, सैं अमर हुई जां।

मसीह बरोधी

18 मेरे प्यारे बच्चो, अन्त समय आई पुञ्जीरा, कने तियां जे तुहें सुणया, भई मसीह रा बैरी औणे औळा, तिसरे मुताबिक हुण बी मते सारे मसीह रे बरोधी खडे हुईगरे। इसते अहें जाणां ये भई अन्त समय आई पुञ्जीरा। 19 मसीह रा बरोध करने औले अहांरे बिच्चा तेई निकलीरे, पर हकीकत च सैं अहांरे नीं ये, कांभई जे सैं हकीकता च अहांरे हुन्दे, तां अहांने सौगी रैहन्दे। पर सैं अहांजो छड्डी गरे ताकि सैं ये दस्सी सक्को भई तिन्हां चते कोई बी अहांरा नीं आ। 20 पर तुहांरा त तिस परम पवित्र आत्मे ते अभिषेक हुईरा, इस खातर तुहें सारिया सच्चाई जो जाणां ये। 21 मैं तुहांजो इस खातर नीं लिखया, भई तुहें सच्चाईया जो नीं जाणदे, पर इस खातर भई तुहें तिससो जाणां ये, भई कोई झूठ सच्चाईया रिया तरफा ते नीं आ। 22 पर सैं जे येदा गलां भई यीशु मसीह नीं आ, सैं झूठा माह्नु आ। येदा आदमी मसीह रा दुश्मण आ। सैं त पिते कने पुत्रा दूर्ई रा इन्कार करां। 23 सैं जे कोई पुत्रा रा इन्कार करां तिसले पिता बी नीं आ, पर सैं जे पुत्रा जो मन्नी लेआं, तिसले पिता बी हाया। 24 सैं किछ जे तुहें शुरु ते सुणीरा सैं तुहांरे अन्दर बणीरा रौ। सैं जे तुहें शुरु ते सुणीरा, जे सैं तुहां च बणीरा रौ, तां तुहां बी पुत्रा च, कने पिते च बणीरयां रैहणा। 25 कने तिने अहांजो अनन्त जीवन देणे रा बादा कित्तिरा।

26 मैं ये गल्लां तुहांजो तिन्हां लोकां रे बारे च लिखियां, सैं जे तुहां जो भरमाणे रा जतन करी रांयें। 27 पर तुहांरा सैं अभिषेक सैं जे तिस रिया तरफा ते हुईरा, तुहां च बणीरा रैयां; कने तुहांजो इसरा कोई मतलब नीं आ, भई कोई तुहांजो सखाये, बल्कि तुहां जो त सैं आत्मा दित्तिरा तिने जे तुहांरा अभिषेक कित्तिरा, सैं जे तुहांजो सब किछ सखां, कने आद रक्खा, येई सच

आ, ये झूठ नीं आ; कने तियां जे तिने तुहांजो सखाईरा, तियां ई तुहें तिस च बणीरे रैं।

परमेशरा री सन्तान

28 इस खातर प्यारे बच्चो, तिसच बणीरे रौआ, भई ताहली जे सै परगट हो, तां अहांरा आत्म-विश्वास बणीरा रौ, कने अहां जो तिसरे औणे रे वगत शर्मिन्दा नीं हुणे पौ। 29 जे तुहें जाणां ये भई सै धर्मी आ, तां ये बी जाणदे होणे भई सै जे धर्मा रा काम्म करां, सै परमेशरा री सन्तान ई।

3 बचार करीने देखा, भई पिते अहांने केदा प्यार कित्या, भई अहें परमेशरा री सन्तान बणी सक्को, कने सै अहें हाये बी ये, इसा वजह ने संसार अहांजो नीं जाणदा, कांभई तिने मसीहे जो बी नीं जाणया। 2 मेरे प्यारे मित्रो, हुण अहें परमेशरा री सन्तान ये कने हल्लियां तक ये प्रगट रूपा च नीं आईरा भई भविष्य च अहें क्या हुणे! जो बी हो, अहें ये जाणां ये भई ताहली जे मसीहे प्रगट हुणा, तां अहां बी तिसरे बराबर हुणा, कांभई अहें तिसजो तेदा ई देखणा चायें, तेदा जे सै हाया। 3 कने सै जे कोई तिस पर ये आस रक्खां, सै खुद अप्पू जो तियां ई पवित्र करां, तिआं जे मसीह पवित्र आ।

4 सै जे कोई पाप करां सै परमेशरा रे कायदे-कनूना जो तोड़ां, कांभई कायदे-कनूना जो तोड़ना ई पाप आ। 5 कने तुहें त जाणां ये, भई मसीह लोकां रे पापां जो हरने रे खातर ई प्रगट हुया, कने तिसरे सभावा च पाप नीं आ। 6 सै जे कोई मसीह च बणीरा रैयां, सै पाप नीं करदा; कने सै जे पाप करां, तिने न त तिसरे दर्शण कीतिरे, कने न ई कदीं तिस्सो जाणया। 7 प्यारे बच्चो, किसी रे भरमाणे च नीं आयों; सै जे धर्मा रे काम्म करां, सैई धर्मी आ, ठीक तियां ई तियां जे मसीह धर्मी आ। 8 सै माह्लु जे पाप करां, सै शैताना रिया तरफा तेआ, कांभई शैताना शुरु तेई पाप करदा आया; इस खातर परमेशरा रा पुत्र प्रगट हुया, भई सै शैताना रे कम्मां जो नाश करो। 9 सै जे कोई परमेशरा री सन्तान बणिया, सै पाप नीं करदा; कांभई तिसरा ब्यू तिसच रैयां, इस खातर सै पाप करी नीं सकदा, कांभई सै परमेशरा ते जम्मीरा। 10 इसते ई परमेशरा री सन्तान कने शैताना री सन्तान जाणे जायें; सै माह्लु जे धर्मा रे काम्म नीं करदा सै परमेशरा रा नीं आ, कने न ई सै अपणे भाईये ने कोई प्यार रखदा।

इक्की दूये ने प्रेम-भौ रखा

11 कांभई सै खुशखबरी जे तुहें शुरु ते सुणी, सै येई भई अहें इक-दूरे ने प्यार रखिये। 12 कने कैना साई नीं बणा, सै जे तिस दुष्टा ने था, कने तिने जे अपणे भाईये री हत्या कीत्ति; कने तिने अपणे भाईये जो किसा वजह ने मारया? तिसरी ये वजह थी भई तिसरे काम्म बुरे थे, कने तिसरे भाईये रे काम्म भलाईया रे थे।

13 मेरे भाईयो, जे संसार तुहांने नफरत करां, तां चम्भा नीं करयों। 14 अहांजो पता भई अहें मौती ते पार हुईने जीवना च आई पुञ्जीरे; कांभई अहें अपणे भाई-बन्धुआं ने प्यार रखां ये: सै जे प्यार नीं रखदा, सै मौती रिया दशा च रैयां। 15 सै कोई जे अपणे भाईये ने दुश्मणी रखां, सै हत्यारा हुया कने तुहें त जाणां ये, भई कोई बी हत्यारा अपणिया दौलता रे रूपा च अनन्त जीवना जो नीं रखदा। 16 मसीहे अहांरे खातर अपणीया जिन्दगिया रा त्याग करीत्या। इसते अहें जाणां ये भई प्यार क्या? अहांजो बी अपणे भाईयां रे खातर अपणे प्राणां रा त्याग करना चाहिन्दा। 17 पर जिस किसी ले संसारिक धन-दौलत हो कने सै अपणे भाईयो जो कंगाल देकखीने तिस पर तरस नीं खाओ, तां तिसच परमेशरा रा प्यार कियां बणीने रैंई सक्कां? 18 मेरे प्यारे बच्चो, अहांरा प्यार सिर्फ मुँहा ते गलाई रियां गलां तक ई सीमित नीं रहणा चाहिन्दा, पर कर्म करने औळा कने सच्चा होणा चाहिन्दा।

परमेशरा रे सामणे हौंसला रख

19 इसते ई अहें जाणां ये भई अहें सच्चाईया रे; कने तिसा गला खातर जे अहांरा मन अहांजो दोष देंगा, तिसरे बारे च अहें परमेशरा रे अग्रे अपणे-अपणे दिलां जो हौंसला देई सकगे; 20 कांभई परमेशर अहांरे मना ते बड्डा, कने सारा किछ जाणां। 21 प्यारे बच्चो, जे कोई बुरा काम्म करदे वगत अहांरा

मन अहांजो दोष नीं देओ, तां परमेशरा रे सामणे अहांजो विश्वास बणीरा रैयां। 22 कने सै किछ जे अहें मंगां ये, सै अहांजो तिसते मिलां; कांभई अहें तिसरे हुक्मां जो मन्नां यें, कने सै जे तिस्सो ठीक लगां सैई करां ये। 23 कने तिसरा हुक्म ये आ: भई अहें तिसरे पुत्र यीशु मसीह रे नौवा पर विश्वास करिये कने तियां जे तिने अहांजो हुक्म दित्या तिसरे मुताबिक अहें इक दूजे ने प्यार रखिये। 24 कने सै जे तिस रयां हुक्मां रा पालन करां, सै परमेशरा च बणीरा रैयां, कने तिसच परमेशरा रा बास हुआं। इस तरीके ने तिस आत्मे ते सै जे परमेशरे अहांजो दित्या, अहें जाणां ये, भई अहांरे अन्दर परमेशर बास करां।

आत्मां जो परखा

4 मेरे प्यारे मित्रो, हर किसी आत्मा रा विश्वास मता करदे, पर हमेशा तिन्हारी परख करीने देखा भई क्या सै परमेशरा रिया तरफा ते आ कि नीं? ये हऊं तुहांजो इस खातर गलाईरां कांभई मते सारे झूठे भविष्यवक्ते इस संसारा च फैलीरे। 2 परमेशरा रे आत्मे जो तुहें ईयां पछयाणी सक्कां ये: भई सै जे कोई आत्मा ये मन्नी लेई भई "यीशु मसीह माह्लुये रे रूपा च पृथिव्या पर आया, सै परमेशरा रिया तरफा ते आ। 3 कने सै जे आत्मा यीशुये जो नीं मनदी, सै परमेशरा रिया तरफा ते नीं, कने सैई त मसीह रे दुश्मणा री आत्मा ई, तिसरे बारे च जे तुहें सुणी चुक्कीरे, भई सै औणे औळा: कने हुण बी इस संसारा चा। 4 मेरे प्यारे बच्चो, तुहें परमेशरा रे, इस खातर तुहें मसीह रे दुश्मणा पर जीत पाईरी; कांभई सै परमेशर जे तुहां चा, संसारा च रहणे औले शैताना ते महान आ। 5 सै मसीह बरोधी लोक संसारा रे, तिसा वजह ने सै संसारा रियां गलां गलाये, कने संसार तिन्हारी सुणां। 6 अहें परमेशरा रिया तरफा ते, इस खातर सै जे परमेशरा जो जाणां, सै अहांरी सुणां; कने सै जे परमेशरा जो नीं जाणदा सै अहांरी नीं सुणदा; इयां अहें सच्चे आत्मे च, कने भटकाणे औले आत्मे च फर्क देकखीने पछयाणी लैं।

परमेशर प्रेम आ

7 प्यारे मित्रो, अहांजो इक्की दूये ने प्यार रखणा चाहिन्दा, कांभई प्यार परमेशरा ने मलां कने सै जे कोई प्यार करां, सै परमेशरा ते जम्मीरा, कने परमेशरा जो जाणां। 8 सै जे प्यार नीं रखदा, सै परमेशरा जो नीं जाणदा, कांभई परमेशर प्यार आ। 9 सै प्यार जे परमेशरे अहां ने रखया, सै इसते परगट हुया भई: तिने अपणे इक्को-इक पुत्रा जो संसारा च भेजया, भई अहें तिसरे जरिये जीवन पाओ। 10 प्यार इसच नीं आ भई अहें परमेशरा ने प्यार कित्या, बल्कि इसच आ भई तिने येदे बलिदाना रे रूपा च अहांरे पापां जो अपणे ऊपर लैईल्या, कने अपणे पुत्रा जो भेजीने अहांरे प्रति अपणा प्यार दस्सया। 11 प्यारे मित्रो, जे परमेशर अहांने येदा प्यार कित्या, तां अहांजो बी अप्पू चीयें प्यार रखना चाहिन्दा। 12 परमेशरा जो किन्हिये कदीं नीं देखया, पर जे अहें इक्की दूये ने प्यार रखिये, तां परमेशर अहां च बास करां कने तिसरा प्यार अहांरे अन्दर पूरा हुईया।

13 इसते ई अहें जाणी सक्कां ये भई अहें परमेशरा च बास करां ये, कने सै अहांरे अन्दर बास करां, कांभई तिने अपणिया आत्मा रा कुछ हिस्सा अहांजो दितिरा। 14 कने अहें देकखी बी लैईरा कने गबाही दे भई परम पिते अपणे पुत्रा जो संसारा रा मुक्ति देणे औळा बणाईने भेजया। 15 सै जे कोई ये मन्नी लेआं भई "यीशु परमेशरा रा पुत्र आ," तां परमेशर तिसच बणीरा रैयां, कने सै परमेशरा च। 16 कने सै प्रेम जे परमेशर अहां ने रक्खां, तिस्सो अहें जाणीगे भई अहें अपणा विश्वास तिस प्यारा पर टकाईरा सै जे परमेशरा च अहांरे खातर आ। परमेशर प्यार आ कने सै जे प्यारा च बणीने रैयां, सै परमेशरा च बणीरा रैयां, कने परमेशर तिसच बणीने रैयां। 17 इसते प्यार अहां च सिद्ध हुया, ताकि न्याय रे दिन अहांजो विश्वास बणीने रौ। कांभई तेदा जे सै आ, तियां ई संसारा च अहें बी ये। 18 प्यारा च कोई डर नीं हुन्दा बल्कि सिद्ध प्रेम डरा जो दूर करी देआं। कांभई डरा रा रिस्ता त सजा ने आ, इस खातर तिसच जे डर आ, सै हल्लियें प्यारा च सिद्ध नीं हुईरा। 19 अहें इस खातर प्यार करां ये भई पैहले परमेशरे अहांने प्यार कित्या। 20 जे कोई बोले, भई "हऊं परमेशरा ने प्यार रक्खां," कने अपणे भाईये ने दुश्मणी रक्खो, तां सै झूठा, कांभई अपणे तिस भाईये जो, तिस्सो जे तिने देकखीरा, ताहली जे

सै प्यार नीं रखदा, तां परमेशरा जो बी सै जे तिने नीं देखीरा, प्यार नीं करी सकदा। ²¹ कने तिस मसीहे ते अहांजो ये हुक्म मिलीरा भई सै जे कोई परमेशरा ने प्यार रक्खां, सै अपणे भाईये ने बी प्यार रक्खां।

संसार जो जीतणा

5 तिसरा जे ये विश्वास आ भई यीशु ई मसीह आ, सै परमेशरा ते पैदा हुआ; कने सै जे कोई परम पिते यनि पैदा करने औळे ने प्यार रक्खां, सै तिस ने बी प्यार रक्खां सै जे तिस ते पैदा हुईरा। ² ताहली जे अहें परमेशरा ने प्यार रक्खां ये, कने तिसरे हुक्मां रा पालन करां ये, तां अहें जाणी लें भई अहें परमेशरा रिया सन्तानां ने बी प्यार रक्खां ये। ³ कने परमेशरा रा प्यार ये आ, भई अहें तिसरे हुक्मां रा पालन करिये, सै जे मुश्कल नीं ये। ⁴ कांभई जो किछ परमेशरा ते पैदा हुईरा, सै संसारा पर जय पाई लेआं, कने सै विजय तिसते जे संसारा पर जीत मिलां ई, सै अहांरा विश्वास आ। ⁵ सै जे ये विश्वास करां भई यीशु परमेशरा रा पुत्र आ, सिर्फ सैई संसारा पर जीत पां।

यीशु मसीह रे बारे गबाही

⁶ सै यीशु ई हाया सै जे अहांले पाणीये कने लहूये रे जरिये आया था; सिर्फ पाणिये ने नीं, बल्कि पाणी कने लहू दूई रे जरिये आया था। ⁷ कने सै जे गबाही देआं, सै आत्मा; कांभई आत्मा सच्चा। ⁸ कने गवाही देणे औळे तिन ये; आत्मा, पाणी कने लहू कने ये तिन्हो इक्की गल्ला पर अप्पू चीयें सहमत ये। ⁹ ताहली जे अहें माळुये रिया दिति रिया गबाहिया जो मन्नी लें, तां परमेशरा री दितिरी गबाही त इस्ते बी बधीने ई; कने परमेशरा री गबाही येई भई तिने अपणे पुत्रा रे बारे च गबाही दिति। ¹⁰ सै जे परमेशरा रे पुत्रा च विश्वास करां, सै अपणे अन्दर तिसा गबाहिया जो रक्खां; तिने जे परमेशरा पर विश्वास नीं कित्या, सै परमेशरा जो झूठा बणां; कांभई तिने तिसा गबाहिया पर विश्वास

नीं कित्या, सै जे परमेशरे अपणे पुत्रा रे बारे च दितिरी, ¹¹ कने सै गबाही येई भई परमेशरे अहांजो अनन्त (अनमोल) जीवन दित्या; कने ये जीवन तिसरे पुत्रा चा। ¹² सै जे तिसरे पुत्रा जो स्वीकार करां तिसले जीवन आ; कने तिसले जे परमेशरा रा पुत्र नीं आ, तिसले जीवन बी नीं आ।

अन्नत जीबन

¹³ परमेशरा पर विश्वास रखणे औळयो, ये गल्लां तुहांजो हऊँ इस खातर लिखिरां तिसते जे तुहें ये जाणी लो, भई अनन्त जीवन तुहांरा। ¹⁴ कने अहांरा परमेशरा च ये विश्वास आ भई जे अहें तिस रिया इच्छा रे मुताबिक तिसते विनती करिये, तां सै अहांरी सुणां, ¹⁵ कने तां जे अहें जाणां ये भई चाये अहें तिसते किछ बी मंगो, सै अहांरी सुणां, तां अहें ये बी जाणां ये, भई सै किछ जे अहें तिसते मंगीरा, सै अहें पाईरा।

¹⁶ जे कोई अपणे भाईये जो येदा पाप करदे देखो भई तिसरा फळ जे मौत नीं हो, तां अपणे भाईये रे खातर प्रार्थना करा; कने परमेशरा तिस्सो तिन्हारे खातर तिन्हें जे येदा पाप कित्या, तिसरा फळ जे मौत नीं हो, जीबन देणा। पाप येदा बी हुआं तिसरा फळ जे मौत आ: हऊँ इसरे बारे च विनती करने खातर नीं बोलां। ¹⁷ सारे बुरे काम्म पाप हुया, पर येदा पाप बी आ, तिसरा फळ जे मौत नीं आ।

¹⁸ अहें जाणां ये भई सै जे कोई परमेशरा ते जम्मीरा, सै पाप नीं करदा; पर सै जे परमेशरा ते जम्मीरा, तिसजो सै बचाईने रक्खां, कने शैतान तिसजो छूई नीं पान्दा। ¹⁹ अहें जाणां ये भई अहें परमेशरा रे, कने सारा संसार तिस बुरकनें शैताना रे बसा चा। ²⁰ पर अहांजो पता भई परमेशरा रा पुत्र आईगरा कने तिने अहांजो सै दमाग दित्या ताकि अहें तिस सच्चे परमेशरा जो पछयाणी लो; कने अहें तिस च, सै जे सच्चा, यनि तिसरे पुत्रा यीशु मसीह च रैयें, परम पिता ई सच्चा परमेशर आ कने सैई अनन्त जीवन आ। ²¹ मेरे बच्चो, अप्पू जो मूर्तियां ते बचाईने रक्खा यनिके झूठे देबतयां ते दूर रक्खा।

2 यूहन्ना

अभिवादन

1 मांज बजुर्गा रिया तरफा ते तिसा भगतणिया जो सै जे परमेशरा री चुणीरी, कने तिसारे बच्चयां रे नौं, तिन्हाने जे हऊँ सच्चा प्यार रक्खां, सिर्फ हऊँ ई नीं पर सै सब जणे बी तुहांने प्यार रक्खां ये सै जे सच्चाईयां जाणां ये; 2 ये सै सच्चाई सै जे अहां च बणीरी रैई, कने हमेशा खातर अहांने सौगी अटल रैहणी; 3 परमेशर पिता, कने तिसरे पुत्र यीशु मसीहे रिया तरफा ते अनुग्रह, दया, कने-शान्ति, सच्चाईया ने कने प्रेम-भौवा ने अहां सौगी रैहणे।

सच्चाई कने प्रेम

4 मिन्जो बड़ी खुशी हुई ताहली जे मैं देखखा, भई तुहांरे किछ बच्चे परमेशरा ते मिलीरे हुक्मा रे मुताबिक सच्चाईया रे रस्ते पर चली करां ये। 5 कने हुण, मेरी बैहण, हऊँ तुहांजो ये कोई नौंवा हुक्म नीं लिक्खीरां, पर ये शुरु तेई अहां जो मिलीरा, इस खातर हऊँ तेरते बिनती करां भई अहांजो अप्पू चिये प्यार-प्रेमा ने रैहणा चाहिन्दा। 6 कने प्यारा रा मतलब हुआ भई अहें तिसरे हुक्मा रे मुताबिक चलिये; येई सब्बीं ते बड्डा हुक्म आ तिससो जे तुहें शुरु ते सुणीरा, कने तुहां जो इसरा पालन करना बी चाहिन्दा। 7 काँभई

संसार च बौहत सारे येढे झूठे गुरु आईगरे सै जे लोकां जो भरमाणे च लगीरे, सै इसा गल्ला जो नीं मनदे भई यीशु मसीह माळुये रे रुपा च इसा धरतिया पर आया; येई सै भरमाणे औळे झूठे गुरु मसीह रे दुश्मण ये। 8 अपणे बारे च चक्क्रे रौआ, सै जे कड़ी मेहनत अहें किच्छि तिसजो तुहें बगाडी नीं दो, पर तुहें तिसरा पूरा फल पाई लो। 9 सै जे परमेशरा ते दूर हुणे लगां सै मसीह रे बारे च दित्तिरे सच्चे उपदेशा च टिकिरा नीं रैहन्दा, तिसने कदीं परमेशर नीं हुन्दा, कने सै जे तिसरिया सखाई रियां गल्लां च बणीरा रैयां, तिस सौगी पिता परमेशर कने पुत्र यीशु मसीह हुआ। 10 जे कोई तुहांले आईने इस उपदेशा जो नीं देआं, तां न त तिससो अपणे घरें औणे देओ कने न तिसरा अपणे घरा च कोई आदर करो। 11 काँभई सै जे येढे माळुये-जो नमस्कार करो कने तिस रियां गल्लां सुणो सै तिसरयां बुरयां कम्मां च तिसरा साथी बणी जां।

अन्तिम अभिवादन

12 हलांकि मेरले बड़ी सारी गल्लां येदियां सै जे हल्लिये तुहांरे खातर लिखणे जोई आं, कने हऊँ तिन्हाजो कलमा कने स्याईया ने कागजा पर नीं लिखणा चाहन्दा, पर मिन्जो आस ई भई मांह तुहांले औणा कने आमणे-सामणे गल्ल-बात करनी, तिसते जे तुहांरी मौज पूरी हो। 13 तेरिया चुणी रिया बैहणी रे बच्चयां तिजो अपणा प्यारा ने भरीरा नमस्कार भेजया।

3 यूहन्ना

अभिवादन

1 मांह बजुर्गा रिया तरफा ते तिस प्यारे मित्र गयुस रे नौं, तिसने जे हऊँ सच्चा प्यार रक्खां। 2 मेरे प्यारे मित्र, मेरी परमेशरा ने ये प्रार्थना ई भई तियां जे तू आत्मिक उन्नति करीरां, तियां ई हर गल्ला च उन्नति कर कने तेरी सेहत बी भला-चंगी रौं। 3 कांभई हऊँ बड़ा खुश हुया; भई ताहली जे भाईयें आईने तेरिया तिसा सच्चाईया रे बारे च दस्या, तिस पर जे तू चलीरा। 4 मिन्जो इसते बधीने होर कोई खुशी नीं ताहली जे हऊँ ये सुणुं भई मेरे बच्चे सच्चाईया रे रस्ते पर चलां ये।

गयुस री प्रशंसा

5 मेरे प्यारे मित्र, सै किछ जे तू तिन्हां भाईयां रे खातर करां, सै जे तेरे खातर अन्जाण ये, तिस्सो तू विश्वासिये साई करां। 6 सै प्यार जे तैं तिन्हां पर दस्सया, तिन्हें कलीशिया रे सामणे तिसरी गबाही दिति। तिन्हां रिया यात्रा जो बणया रैहणे खातर मेहरबानी करीने तिन्हा जो इस तरीके ने भेज्यो भई तिसरा समर्थन जे परमेशर करो। 7 कांभई सै मसीह रिया सेबकाईया खातर जानु बणीने निकळीरे, कने अधर्मियां ते सै कोई सहायता नीं लेन्दे। 8 इस खातर अहां विश्वासियां जो येढे लोकां री सहायता करनी चाहिन्दी ताकि अहें बी सच्चाईया रे प्रति तिन्हांने सौगी काम्म करने औळे साथी बणी सक्को।

दियुत्रिफेस कने दिमेत्रियुस

9 इक चिड्डी मैं कलीशिया जो बी लिखी थी, पर दियुत्रेफस सै जे तिन्हांरा नेता बणना चांह था, अहांजो ग्रहण नीं करदा। 10 इस कारण ताहली जे हऊँ आँगा, तां तिसरे काम्म दसगा भई सै क्या करीरां; सै अहारे बारे च बुरी-बुरी गल्लां बकां; कने इन्हां गल्लां ते बी तिस्सो सन्तोख नीं आया। सै खुद त अहारे भाईयां रा आदर नीं करदा, पर सै जे येढा करना चांये, तिन्हांजो बी सै अड़चन पैदा करीने कलीशिया ते बाहर कड्डी देआं।

11 प्यारे मित्र, तू बुराईया जो छड कने भलाई कर। सै जे भला करां, सै परमेशरा रिया तरफा ते आ; कने सै जे बुरा करां, तिने परमेशरा जो नीं देखया। 12 दिमेत्रियुस रे बारे च सारयां ई नीं गबाही दिति; पर खुद सच्चाईये बी तिसरी गबाही दिति, अहें बी तिसरी गबाही दें, कने तू जाणां भई अहारी गबाही सच्ची।

अन्तिम अभिवादन

13 मेरले तेरे वास्ते लिखणे खातर बड्डा किछ आ, पर हऊँ तिजो कलमा कने स्याईया ने लिखणा नीं चाहन्दा। 14 बल्कि मिन्जो त ये आस ई भई मांह तेरने बडे छोड मिलणा, फेरी अहां आमणे-सामणे गल्ल बात करनी। 15 तिजो शान्ति मिलदी रौं। येत्थी रे तेरे सारे मित्रां रा तिजो नमस्कार। कने तित्थीरे अहारे सारे मित्रां रे नौं लेईने तिन्हां जो नमस्कार बोलयो।

यहूदा

अभिवादन

1 यीशु मसीह रे सेवका कने याकूबा रे भाईये यहूदा खा ते तुहां लोकां रे नौर्ये सै जे परमेशरा रे प्यारे कने यीशु मसीह खातर सुरक्षित ये कने परमेशरा रे जरिये सद्दे गईरे। 2 तुहां जो दया, शान्ति कने मता प्यार मिलो।

झुठे शिक्षक

3 प्यारे मित्रो, हऊं बौहत चाहं था भई तुहां जो तिस उद्धार रे बारे च लिखूं, तिसरे जे अहं भागीदार ये। मैं तुहां जो लिखणे री कने तुहां जो हिम्मत देणे री जरुरत महसूस किती कांभई तुहें तिस विश्वासा खातर जे लडया रांये, तिस्सो जे परमेशरे संतां जो सदा-सदा खातर दई तरा। 4 कांभई आहारे झुंडा च कुछ लोक चोरिया ने घुसी गरे। इन्हं लोकां रे दण्डा रे बारे च शास्त्रां च पैहले ई बौहत कुछ लिखी रा : ये भक्ति हीन ये, कने आहारे परमेशरा रे अनुग्रहा जो लुचपना च बदली देआं ये, कने अहारे इको ई मालका कने प्रभु यीशु मसीह जो इन्कार करां ये।

5 हऊं तुहां जो आद दिलाणा चाहं (ईयां तां तुहें इन्हा सब्बीं गल्लां जो जाणां ये) भई तिने प्रभुये जे पैहले अपणे लोकां जो मिस्र रिया धरतिया ते बचाई ने नकाळी लैया था, बादा च तिन्हें विश्वासा ते इन्कार करी तया, तिन्हा जो कियां नाश करी तया गईरा। 6 हऊं तुहां जो ये बी याद करवाणा चाहं भई सै जे दूत अपणे पदां पर टिकीरे नीं रई सके, पर तिन्हें जे अपणे रैहणे रिया जगहां जो छड्डी तया, तिने तिन्हांजो भी तिस खतरनाक दिना रे न्याय खातर नेहरे च, सै जे सदा खातरा, बन्धनां च रखीरा। 7 इयां ई हऊं तुहां जो याद दुआणा चाहवां भई सदोम कने अमोरा कने आसे-पासे रे नगरें इन्हां दूतां साई व्यभिचारी हुई गये थे कने पराये शरीरा रे पीछे लगीये थे, अग्गी रे अनन्त दण्डा च पई ने दृष्टान्त ठेहरी रे।

8 ठीक इयां ई आहारे झुंडा चा घुसी औणे औळे ये लोक अपणेयां सुफणेयां रे पीछे दौडदे हुये अपणे शरीरां जो बगाडेया रांये। ये प्रभुये रियां सामर्था जो चक्की ने ताका पर रखी देयांये कने महिमा औळयां स्वर्गदूतां रे बरोधा च बोलांये। 9 पर प्रधान स्वर्गदूत मीकाईले, तजे शैताना ते मूसा रिया लाहशा रे बारे च वाद-विवाद कित्या, तां तिस्सो बुरा-भला बोलीने दोष लागे री हिम्मत नीं किती पर ये बोलया, “प्रभु तिजो झिडको।” 10 पर ये लोक तां तिन्हां गल्लां रा बरोध करां ये, तिन्हां जो जे ये समझदे ई नींये कने ये लोक बुध्दिया ते बाहर पशुआं साई तिन्हां गल्लां च जे सहज तौरा जो जाणां ये, से गल्लां सैई हईयां तिन्हां ते जे तिन्हां रा नाश हुणे औळा। 11 तिन्हां लोकां खातर ये बौहत बुरा भई तिन्हें कैना साई सैई रस्ता चुणेया। धन कमाणे खातर तिन्हें अप्पु जो तेदिया ई गल्लतिया रे हत्था च दई तया तियां जे बिलामा जो दईत्या

था। इस खातर तिन्हां ई नष्ट हुई जाणा तियां जे कोरह रे विद्रोहा च हिस्सा लेणे औळे नष्ट करीतरे गये थे। 12 ये लोक तुहांरियां धामां च तुहां सौगी खावां -पीवां ये, कने समुद्रा रियां लुखी रिया चड्डानां साई ये, कने बेधड़क अपणा ई पेट भरने औळे; सै निर्जल बादला साई ये, तिन्हां जो जे हवा डुआई ने लई जावां ई, पतझड़ा रे बिणा फला औळे डाळ ये, सै जे दो बार मरी चुकी रेये, कने जड़ां ते पटोई गरे; 13 सै समुद्रा रियां येदियां भयानक लैहरां ईयां, सै जे अपणे शरमा औळयां कम्मां रा झाग उगलदियां रह्वां ई यां। सै इखा-उखा भटकदे येदे तारे तिन्हां खातर जे सदा काला तका घोर नेहरा रखी रा।

14 आदमा ते सतवियां पीढीया रे हनोके भी तिन्हां लोकां खातर इन्हां शब्दां च भविष्यवाणी किती थी : “देखो, सै प्रभु अपणे हजारां-हजारां पवित्रां सौगी आये रां 15 भई सबीं लोकां रा न्याय करो। कांभई लोके सै जे बुरे काम कितीरे, तिन्हां जो तिन्हा खातर कने तिन्हें सै जे परमेशरा रे बरोधा च बुरे वचन बोली रे, तिन्हा खातर दण्ड देओ।” 16 ये चुगलखोर ये कने दोष टोलणे औळे। ये अपणिया इच्छावां रे दास ये कने अपणे मुँहा ते घमण्डा औळियां गल्लां बोलां ये, कने सै फायदे खातर मुँहा देखी ने बडयाई करांये।

चेताबनी कने उपदेश

17 पर प्यारे मित्रो, तिन्हां शब्दां जो याद रखा सै जे आहारे प्रभु यीशु मसीह रे प्रेरितां रे द्वारा पैहले ही बोली जाई चुक्की रे। 18 सै तुहां ने बोलां थे भई, “आखरी बगता च येदे लोक हुणे तिन्हां जे परमेशरा ते जो किछ जुडीरा हुणा तिसरी हासी डुवाया करनी।” कने तिन्हां गन्दियां इच्छावां रे पीछे-पीछे चलेया करना। 19 ये लोक सै ई हये सै जे फूट पावांये। 20 पर हे प्रियो, तुहें आध्यात्मिक रूपा ते अपणे अति पवित्र विश्वासा च पक्के हुंदे रओ। पवित्र आत्मा सौगी प्राथना करो। 21 आहारे प्रभु यीशु मसीह री दया जो निहालदे हुये तिसा जे तुहां जो अनन्त जीवना च लई जाणे औलिया, परमेशरा रिया भक्तिया च लगी रे रह्वा। 22 सै जे शका चा दया करा; 23 दुजेयां जो अग्गे बधी ने अग्गी च ते कड्डा। पर दया दसदे बगता चतन्न रह्वा कने तिन्हारे तिन्हां कपडेयां ते भी घृणा करा तिन्हा पर जे तिन्हारे पापा औळे स्वभावा रे धब्बे लगी रे।

आशीष बचन

24 हुण सै जे तुहां जो ठोकर खाणे ते बचाई सक्कां, कने अपणिया महिमा रिया भरपुरिया रे सामणे मगन कने निर्दोष करीने खड़ा करी सकां, 25 तिस इक्की परमेशरा आहारे उद्धार करने औळे री महिमा कने वैभव कने पराक्रम कने अधिकार, आहारे प्रभु यीशु मसीह रे द्वारा तेदा जे सनातन बगता ते आ, हुण भी हो कने युगानयुग रौ। आमीन।

प्रकाशितवाक्य

1 यीशु मसीह रा प्रकाशितवाक्य, सै जे तिस्सो परमेशरे इस खातर दित्या भई अपणे दासां जो सै गल्लां, तिन्हां रा जे छोड़े हुणा जरूरी आ, तिस्सो; कने तिने अपणे स्वर्गदूतां जो भेजी ने अपणे दास यूहन्ना जो दसया, 2 तिने जे परमेशरा रे वचन कने यीशु मसीह री गवाई, मतलब जो किछ तिने देखया था तिसरी गवाई दित्ती। 3 धन्य ये से सै जे इसा भविष्यवाणिया रे वचना जो पढ़ां ये, कने सै जे सुणां ये कने इस च लिखी रियां गल्लां जो मंत्रां ये; कांभई वगत नेड़े आ।

सत्तां कलीसियां रा स्वागत

4 यूहन्ना रिया तरफा ते सै जे हया कने सै जे था कने सै जे औणे औळा; कने तिन्हां सत्तां आत्मांवां खाते सै जे तिसरे सिंहासना रे सामणे ईयां, 5 कने यीशु मसीह खाते सै जे विस्वास लैक गवाह कने मरीरियां च ते जी उठणे औळियां च ते पैहला कने धरतिया रे राजेयां रा हाकम आ, तुहां जो अनुग्रह कने शान्ति मिलदी रौ। सै अहां ने प्रेम रखां, कने तिने अपणे लहुये ते अहां जो पापां च ते छुड़ाया, 6 कने अहां जो इक राज्य कने अपणे पिता परमेशर खातर याजक भी बणाईत्या; तिसरी महिमा कने पराक्रम युगानयुग रौ। आमीन। 7 देखा, सै बदलां सौगी औणे औळा आ, कने सारेया तिस्सो देखणा, पर तिन्हें जे तिस्सो बीन्हया था। तिन्हां भी तिस्सो देखणा, कने पृथ्विया रे सारेयां कुळा रियां तिस रिया वजह ते पिठणा। हाँ। आमीन। 8 प्रभु परमेशर सै जे हया कने सै जे था कने सै जे औणे औळा आ, सै जे सर्वशक्तिमान आ, सै बोलां, “हऊं ई अलफा कने ओमेगा।”

यूहन्ने जो मसीह रा दर्शन

9 हऊं यूहन्ना सै जे तुहां रा भाई कने यीशुये री गवाईया रिया वजह ते पतमुस नौवा रे टापुये च था। 10 हऊं अपणे प्रभुये रे दिहाड़े च आत्मा च आई गया, कने अपणे पिछे तुरहिया साई बड्डिया आवाजा च येदा बोलदे सुणया, 11 “जो किछ तु देखां इस्सो कताबा च लिखी ने सत्तां कलीसियां ला जो भेजी दे, मतलब इफिसुस, कने स्मुरना, कने पिरगमुन, कने थुआतिरा, कने सरदीस, कने फिलदिलफिया, कने लौदीकिया जो।”

12 तां में तिस्सो सै जे मेरने, गलाया रां था, देखणे खातर अपणा मुँह फेरया; कने पिछे घुम्मी ने में सोने रियां सात्त दिऊठियां देखियां, 13 कने तिन्हां दिऊठियां रे बीच माह्ये रे पुत्रा साई इक माह्ये देखया, तिने जे पैरां तका कपड़े पैहनी रे थे, कने छातिया पर सोने रा पटका बन्ही रा था। 14 तिसरे सिरा रे बाल सफेद ऊनां पर पईरे पाले साई चमका औळे थे, कने तिसरियां आकृषीं अग्नी रियां लपटा साई थियां। 15 तिसरे पैर खरे पितला साई थे सै जे मन्ना भड्डिया च तपाई रा हो, कने तिसरी आवाज मत्ते पाणिये साई थी। 16 तिने अपणे सज्जे हत्था च सात्त तारे लई रे थे, कने तिसरे मुँहां ते तेज दुई धारां औळी तलवार (वचन) निकलां थी, तिसरा मुँह येदा चमकी रा था, तैदा जे सुरज दपेहरके वगता च चमकां। 17 तजे में तिस्सो देखया तां हऊं तिसरे पैरां पर मूर्दयां साई पई गया। तिने मेरे पर अपणा सज्जा हाथ रखी ने बोलया, “मत डर; हऊं पैहला कने आखिरी कने जीऊंदा आ; 18 हऊं मरी गया था, कने हुण देख हऊं युगानयुग जीऊंदा आ; कने मौत कने अधोलोका रियां चाबियां मेरे ले ईयां। 19 इस खातर सै जे गल्लां तै देखियां कने सै जे गल्लां होया रां ईयां कने सै जे गल्लां इसते बाद हुणे औळियां ई यां, तिन्हां सर्बीं जो लिखी ले। 20 मतलब तिन्हां सत्तां तारेयां रा भेत तिन्हां जे तें मेरे सज्जे हत्था

देखे थे, कने तिन्हां सत्तां सोने रियां दिऊठियां रा भेत : सै सात्त तारे सत्तां कलीसियां रे दूत ये, कने सै सात्त दिऊठियां सात्त कलीसिया ईयां।

इफिसुस जो सन्देश

2 “इफिसुसा रिया कलीसिया रे दूता जो येदा लिख :
“ सै जे सात्त तारे अपणे हत्था च लईरे, कने सोने रियां सत्तां दिऊठियां रे बिच फिरां, सै येदा बोलां भई 2 हऊं तेरे कम्मां, कने तेरिया मेहनता, कने तेरे धीरजा जो जाणां; कने येदा भी भई तू बुरेयां लोकां जो देखी नीं सकदा, कने सै जे अप्पु जो प्रेरित बोलां ये, कने हये नीं ये, तिन्हां जो परखी ने झुटा पाया। 3 तू धीरज धरां, कने मेरे नौवा खातर दुःख सैहदे-सैहदे थकेया नीं आ। 4 पर मांह तेरे बरोधा च येदा बोलणा भई तें अपणा पैहला जे या प्रेम छड्डी तरा। 5 इस खातर याद कर भई तू किता जे ते टिरेया, मना जो फेर होर पैहले साई काम्म कर। जे तू मन नीं फिरांगा, तां मांह तेरे ला आई ने तेरियां दिऊठियां जो तिसा जगहा ते हटाई लेणा। 6 पर हाँ, तेरे च ये गल्लां तां हई भई तू नीकुलईयां रेआं काम्मां ते घृणा करां, तिन्हां ते जे हऊं भी घृणा करां। 7 तिसरे जे कान हो सै सुणी लो भई आत्मा कलीसियावां ने क्या बोलां। सै जे जय पाओ मांह तिस्सो तिस जीन्दडिया रे डाला च ते सै जे परमेशर रे स्वर्ग लोका चा, फल खाणे जो देणा।

स्मुरना जो सन्देश

8 “स्मुरना रिया कलीसिया रे दूता जो येदा लिख :
“सै जे पैहला कने आखरी आ, सै जे मरीग्या था कने हुण जीऊंदा हुई गरा, सै येदा बोलां भई 9 हऊं तेरे क्लेशा च कने दरिद्रता जो जाणां (पर तू धनी आ), कने सै जे लोक अप्पु जो यहूदी बोलां ये कने हये नीं ये, पर शैताना री सभा ये, तिन्हां रिया निन्दा जो भी जाणां। 10 सै जे दुःख तिज्जो झलणे पऊणे, तिन्हां ते मत डर। कांभई देखा, शैतान तुहां च ते थोड़ेयां जो जेल खाने च पाणे पर ई आ कांभई तुहें परखे जाओ; होर तुहां जो दस्सां दिनां तका क्लेश सेहणे पौणा। प्राण देणे तका विश्वासी रह, तां मांह तिज्जो जीवना रा मुकुट देणा। 11 तिसरे जे कान हो सै सुणी लो भई आत्मा कलीसियावां ने क्या बोलां। सै जे जय पाओ, तिस्सो दुजिया मौता ते नुक्सान नीं हुणा।

पिरगमुन जो सन्देश

12 “पिरगमुन रिया कलीसिया रे दूता जो येदा लिख :
“ तिस ले जे दुई धारां औळी तलवार ई, सै येदा बोलां भई 13 हऊं ये जाणां भई तु येथी रह्हां तेथी जे शैताना रा सिंहासन आ; तू मेरे नौवा पर पक्का रह्हां, कने मेरे पर विश्वास करने ते तिन्हां दिनां च भी पीछे नीं हटया तिन्हां च जे मेरा विश्वास लैक गवाह अन्तिपास, तुहां रे बिच तिसा जगहा घात कित्या गया, तेथी जे शैतान रह्हां। 14 पर मांह तेरे बरोधा च किछ गल्लां बोलणियां ई आं, कांभई तेरे ले किछ येदे, सै जे बिलामा रिया शिक्षा जो मन्नाये, तिने जे बालाका जो इझ्राएलियां रे अगे ठोकरा री वजह बनणां सखाया भई सै मूर्तियां पर चढाई रिया चीजां खाओ कने व्यभिचार करो। 15 तियां ई तेरे ले किछ येदे, सै जे निकुलईयां रिया शिक्षा जो मन्नाये। 16 इस खातर मन फिरा, नई तां मांह तेरे ला छोड़े ई आई ने अपणे मुखा रिया तलवारा ने तिन्हां सौगी लडना। 17 तिसरे जे कान हो सै सुणी लो भई आत्मा कलीसियावां ने क्या बोलां। सै जे जय पाओ, तिस्सो मांह गुप्त मन्ना च ते देणा, कने तिस्सो इक

सफेद पत्थर भी देणा; कने तिस पत्थरा पर इक नौं लिखी रा हुणा, तिस्सो जे तिसरे पाणे औळे रे सुआये होर कोई नौं जाणी सकगा।

थुआतिरे जो सन्देश

18 “थुआतिरा रिया कलीसिया रे दूता जो येदा लिख :

“परमेशर रा पुत्र तिस रियां आक्खीं जे अग्गी रियां लपटां साई, कने तिसरे पैर उत्तम पितला साई ये, सै येदा बोलां भई 19 हऊं तेरे कम्मां, तेरे प्रेमा कने विस्वासा कने सेवा कने धीरजा, जो जाणां कने येदा भी भई तेरे पिछले काम्म पैहलकेयां ते बधी ने ये। 20 पर मांह तेरे बरोधा च येदा बोलणा भई तु तिसा जनाना ईजेबेला जो रहणे देवां सै जे अप्पु जो भविष्यवक्तिन बोलां ई, कने मेरे दासां जो व्यभिचार करने कने मूर्तियां रे अगे चढाई रियां चीजां जो खाणां सखाई ने भरमावाई। 21 मैं तिसा जो मन फिराणे खातर मौका दित्या, पर सै अपणे व्यभिचारा ते मन फराणां नीं चाहंदी, 22 देख, हऊं तिसा जो रोगा ने मंजे ई पाई देणा; कने सै जे तिसा सौगी व्यभिचार करांये जे सै बी तिसा साई कम्मां ते मन नीं फिरांगे तां मांह तिन्हां जो बडे क्लेशा च पाणा। 23 मांह तिसारे बचेयां जो मारी देणा; तां सर्बीं कलीसियां ये जाणी लेणां भई हृदय कने मनां रा परखणे औळा हऊं ई आ, कने मांह तुहां च ते हरेका जो तिस रेयां कम्मां मताबक बदला देणां। 24 पर तुहां थुआतिरा रे बाकी लोकां ने, तितने जे इसा शिक्षा जो नीं मनदे कने तिन्हां गलां जो तिनां जे शैताना रियां गेहरियां गलां बोलां ये, नीं जाणदे, ये बोलां भई मांह तुहां परा होर बोझ नीं पाणा। 25 पर हाँ, सै जे तुहां ले आ तिस्सो मेरे औणे तका थम्मी रखा। 26 सै जे जय पाओ, कने मरीरियां कम्मां रे मताबक अन्त तका करदे रओ, मांह तिन्हां जो जाति-जाति रे लोकां पर अधिकार देणां, 27 कने तिस लोहे रा राज दण्ड लई ने तिन्हां परा राज करना, तियां जे कम्हारा रे मिट्टिया रे बर्तन चकनाचूर हुई जांये : मै भी येदा ई अधिकार अपणे पिते ते पाई रा; 28 कने मांह तिस्सो तडके रा तारा देणां। 29 तिसरे जे कान हो सै सुणी लो भई आत्मा कलीसियांवां ने क्या बोलां।

सरदीम जो सन्देश

3 “सरदीस रिया कलीसिया रे दूता जो येदा लिख :

“तिसले जे परमेशर रियां सात्त आत्मा ई यां कने सात्त तारे, सै येदा बोलां भई हऊं तेरे कम्मां जो जाणां : तु जीऊंदा केहलावां पर हया मरीरा। 2 जागी जा, कने तिन्हां चीजां जो सै जे बाकी रई गरियां कने सै जे मिटणे पर ई यां, तिन्हां पक्का कर; कैं मैं तेरे किसी भी कम्मां जो अपणे परमेशर रे नेडे पूरा नीं पाया। 3 इस खातर याद कर भई तैं केदी शिक्षा पाई कने सुणी थी, कने तिसा च बणी रा रहै कने मन फिरा। जे तू जागदा नीं रहैगा तां मांह चोरा साई आई जाणां, कने तू कदी नीं जाणी सकगा भई मांह किसा घडिया तेरे ला आई जाणां। 4 पर हाँ, सरदीसा च तेरे ले किछ येदे लोक ये तिन्हें जे अपणे-अपणे कपडे अशुद्ध नीं किचे, तिन्हां सफेद कपडे पैहनी ने मेरे सौगी घुमणां, कांभई सै इस लेक ये। 5 सै जे जय पांगा तिस्सो ईयां ई सफेद कपडे पह्नाये जाणे, मांह तिसरा नौं जीवना रिया कताबा च ते किसी रीतिया ते नीं कटणां; पर तिसरा नौं अपणे पिता कने स्वर्गदूतां रे सामणे मन्त्री लेणां। 6 तिसरे जे कान हो सै सुणी लो भई आत्मा कलीसियांवां ने क्या बोलां।

फिलदिलफिया जो सन्देश

7 “फिलदिलफिया रिया कलीसिया रे दूता जो येदा लिख :

“सै जे पवित्र कने सच्च आ, कने सै जे दाऊदा री चाबी रखां, तिसरे जे खोल्ही रे जो कोई बन्द नीं करी सकदा, सै येदा बोलां भई 8 हऊं तेरे कम्मां जो जाणां; देख, मैं तेरे सामणे इक द्वार खोली रा, तिस्सो जे कोई बन्द नीं करी सकदा, तेरी सामर्थ थोड़ी त हई, फेरी भीं तैं मेरे वचनां रा पालन कित्या कने मेरे नौंवा रा इन्कार नीं कित्या। 9 देख, मांह शैताना रे तिन्हां सभा औळ्यां जो तेरे वशा च करी देणा सै जे यहूदी बणी बैठी रे, कने झूठ बोलां ये-देख, मांह येदा करना भई तिन्हां आई ने तैरे पैरां पौणा, कने ये जाणी ले हऊं तेरने प्रेम रखां। 10 तैं मेरे धीरजा रे वचनां जो थम्मी रा इस खातर मांह भी तिजो परिक्षा रिया तिसा घडिया बचाई रखणां सै जे पृथ्वीया पर रहणे

औळ्यां रे खातर सारे संसारा पर औणे औळा। 11 हऊं छोड़े औणे औळा आ; जो किछ तेरले आ तिस्सो थम्मी रख भई कोई तेरा मुकुट खोई नीं लओ। 12 सै जे जय पाओ तिस्सो मांह अपणे परमेशर रे मन्दरा च इक खम्बा बनाणा, कने तिस फेरी कदी बाहरा जो नीं कडणा; कने मांह अपणे परमेशर रा नौं कने अपणे परमेशर रा नगर मतलब नौंये यरुशलेमा रा नौं, सै जे मेरे परमेशर लाते स्वर्गा परा ते उतरने औळा, कने अपणां नंवां नौं तिस पर लिखगा। 13 तिसरे जे कान हो सै सुणी लो भई आत्मा कलीसियांवां ने क्या बोलां।

लौदीकिया जो सन्देश

14 “लौदीकिया रिया कलीसिया रे दूता जो येदा लिख :

“सै जे आमीन कने विस्वासा लैक कने सच्चा गवाह आ, कने परमेशर री सृष्टिया री मूल वजह ई, सै येदा बोलां भई 15 हऊं तेरे कम्मां जो जाणां भई ना तू ठण्डा ना तू गर्म आ : भला हुन्दा भई तू ठण्डा या गर्म हुन्दा। 16 इस खातर भई तू मिसना, कने ना ठण्डा होर ना गर्म, हऊं तिजो अपणे मुँहा च ते उगलणे पर आ। 17 तू बोलां भई हऊं धनी आ कने धनवान हुई गरा कने मिंजो किसी चीजा रा घाटा नीं आ; कने ये नीं जाणदा भई तू अभागा कने बेकार कने कंगाल कने अन्हा कने नंगा। 18 इस खातर हऊं तिजो सलाह देवां भई अग्गी च सेकी रा सोना मेरे ते मूला च लई ले भई तू धनी हूई जाओ, कने चिट्टे कपडे लई ले भई पैहनी ने तिजो अपणे नंगे हुणे री शर्म नीं हो, कने अपणियां आक्खीं च लाणे खातर सुस्मा लैं भई तू देखणे लगे। 19 हऊं तिस-तिस ने जे प्रेम करां, तिन्हां सर्बीं जो उलाहना सौगी ताडना देवा; इस खातर सरगर्म हो कने मन फिरा। 20 देख, हऊं दुरुवाजे पर खड़ी ने खटखटावां; जे कोई मेरी अवाज सुणी ने खोलगा, तां मांह तिसला अन्दर आई ने तिसने सौगी रोटी खाणी कने तिस मेरे सौगी। 21 सै जे जय पाओ मांह तिस्सो अपणे सौगी अपणे सिंहासना पर बटालणा, तियां जे हऊं जय पाई ने अपणे पिते सौगी तिसरे सिंहासना पर बैठी गया। 22 तिसरे जे कान हो सै सुणी लो भई आत्मा कलीसियांवां ने क्या बोलां।

स्वर्गा च अराधना

4 इन्हां गलां ते बाद तजे मैं नजरं दित्तियां तां क्या देखां भई स्वर्गा च इक दुरुवाजा खुली रा, कने तिस्सो जे मैं पैहले तुरहिया री आवाजा साई अप्पु ने गलां करदे सुणया था, सै ई बोलां, “येथी उपरा जो आओ; कने मांह से गलां तिजो दसणियां, तिन्हां रा जे इन्हां गलां ते बाद हुणां जरूरी आ।” 2 ताहुं ई हऊं आत्मा च आई गया; कने क्या देखां भई इक सिंहासन स्वर्गा च रखी रा, कने तिस सिंहासना पर कोई बैठी रा। 3 सै जे तिस पर बैठी रा सै यशब कने माणिक्य साई दिस्सां, कने तिस सिंहासना रे चऊं पासेयां मरकता साई इक मेघधनुष दुस्या रां। 4 तिस सिंहासना रे चऊं पासेयां चौबी सिंहासन थे; कने इन्हा सिंहासनां पर चौबी प्राचीन चिट्टे कपडे पैहनीं ने बैठी रे थे, कने तिन्हां रे सिरां पर सोने रे मुकुट थे। 5 तिस सिंहासना च ते बिजलियां कने गडगडाट हुआं ई कने सिंहासनां रे सामणे अग्गी रे सात्त दीऊये बळ्या रां ये, 6 कने सिंहासनां रे सामणे मन्त्रो बिलौरा साई कच्चा रा समुद्र आ।

सिंहासना रे बिच्चा च कने सिंहासना रे चऊं पासेयां चार प्राणी थे, तिन्हां रे अगे पिछे आक्खीं ई आक्खीं आं। 7 पैहला प्राणी सिंह आ साई आ, कने दुज्रा प्राणी बछड़े साई आ, तिज्जे प्राणिये रा मुँह माहुये साई आ, कने चौथा प्राणी उडदे हुये उकाबा साई आ। 8 चऊं प्राणियां रे छे-छे फंग ये, कने चऊं पासेयां कने अन्दर आक्खीं ई आक्खीं आं; कने सै रात-दिन बिना रुके येदा बोलदे रहवांये,

“पवित्र, पवित्र, पवित्र प्रभु परमेशर, सर्वशक्तिमान,

सै जे था कने सै जे हया कने सै जे औणे औळा आ।”

9 तजे तिन्हां प्राणी तिसरी सै जे सिंहासना पर बैठी रा, सै जे युगानयुग जीऊंदा, महिमा कने आदर कने धन्यवाद करना। 10 तां चौबी प्राचीनां सिंहासना पर बैठणे औळे रे सामणे पैई जाणां, कने तिस्सो सै जे युगानयुग

जीऊंदा तिस्रो प्रणाम करना; कने तिन्हां अपणे-अपणे मुकुट सिंहासना रे सामणे येदा बोलदे हुये रखी देणे,

11 "हे आहारे प्रभु कने परमेश्वर, तू ई महिमा कने आदर कने सामर्था लैक आ;

कांभई तैं ई सब चीजां सृजियां कने सैं तेरिया ई इच्छा ते थियां कने सृजियां गर्इयां।"

मोहरबन्द कताब कने मेम्ना

5 सैं जे सिंहासना पर बैठी रा, मैं तिसरे हत्था च इक कताब देखी सैं जे अन्दर कने बाहरा खा ते लिखी री थी, कने सैं सात्त मोहरां लाई ने बन्द किती गई री थी। 2 फेरी मैं इक ताकता औळे स्वर्गदूता जो देखया सैं जे उच्चिया अवाजा च ये प्रचार करेयां रां था, "इस कताबा रे खोलणे कने इस रियां मोहरां तोड़णे जोगा कुण आ?" 3 पर ना स्वर्गा च, ना धरतिया पर, ना धरतिया ते थल्ले कोई तिसा कताबा जो खोलणे या तिसा जो देखणे ई जोगा कोई नीं मिलया। 4 तां हऊं फूटी-फूटी ने रोणे लगया, कांभई तिसा कताबा रे खोलणे या तिसा जो देखणे जोगा कोई नीं मिलया। 5 इत पर तिन्हां प्राचीनां च ते इक्की मेरने बोलया, "मत रोंदा; देख यहुदा रे गोत्रा रा सैं सिंह सैं जे दाऊदा रा मूळ आ, इसा कताबा जो खोलणे कने इस रियां सत्तां मोहरां तोड़ने खातर जय वन्त हुई रा।"

6 तां मैं तिस सिंहासना कने चऊं प्राणियां कने तिन्हां प्राचीनां रे बिच्चा च, मन्ना इक बध कितीरा मेमना खड़ा देखया। तिसरे सात्त सिंग कने सात्त आक्खीं थियां; ये परमेश्वर रियां सैं सात्त आत्मा ई यां सैं जे सारिया पृथ्विया पर भेजिया गई रियां। 7 तिने आई ने तिसरे सजे हत्था ते सैं जे सिंहासना पर बैठी रा था, सैं कताबा लई ली। 8 तजे तिने कताबा लई ली, तां सैं चारो प्राणी कने चौबी प्राचीन तिस मेमने रे सामणे पैईगे। तिन्हां च ते हरेक रे हत्था च वीणा कने धूपा ने भरी रे सोने रे कटोरे थे, ये त पवित्र लोकां रियां प्राथना ईयां। 9 सैं येदा नवां गीत गाणे लगे,

"तु इसा कताबा जो लेणे, कने इस रियां मोहरां खोलणे लैक आ; कांभई तैं बध हुई ने अपने लहूये रे हरेक कुळा कने भाषा कने लोक कने जातियां च ते परमेश्वर खातर मूळ लई लरा,

10 कने तिन्हां जो आहारे परमेश्वर खातर इक राज्य कने याजक बणाया; कने सैं धरतिया पर राज्य करांये।"

11 तजे मैं देखया, तां तिस सिंहासना कने तिन्हां प्राणियां कने तिन्हां प्राचीनां रे चऊं पासेयां मते सारे स्वर्गदूतां री आवाज सुणी, तिन्हांरी गिणती जे लखां कने करोड़ां री थी, 12 कने सैं उच्चिया अवाज च बोलां थे, "बध कितीरा मेमना ई सामर्थ कने धन कने ज्ञान कने शक्ति कने आदर कने महिमा कने धन्यावादा रे लैक आ!" 13 फेरी मैं स्वर्गा च कने पृथ्विया पर कने पृथ्विया रे थल्ले कने समुद्रा रियां सब सृजी रियां चीजां जो, कने सब किछ सैं जे तिस चा, येदा बोलदे सुणेया, "सैं जे सिंहासना पर बैठी रा तिसरा कने मेमने रा धन्यवाद कने आदर कने महिमा कने राज्य युगानयुग राओ!" 14 कने चऊं प्राणियें आमीन बोली, कने प्राचीनें पैई ने मत्था टेकेया।

सात्त मोहरां रा खोलया जाणा

6 फेरी मैं देखया भई मेमने तिन्हां सत्तां मोहरां च ते इक्की जो खोलया; कने तिन्हां चऊं प्राणियां च ते इक्की रा गर्जना साई आवाज सुणी, "आओ!" 2 मैं नजरां कितीयां, कने देखो, इक चिद्दा घोड़ा, कने तिसरा सवार धनुषा सौगी आ; कने तिस्रो इक मुकुट दित्या गया कने सैं जय-कार करदा हुआ निकलया भई होर भी जय पाई लो।

3 तजे तिन्हें दुज्जी मोहर खोलही तां मैं दुज्जे प्राणिये जो येदा बोलदे सुणेया, "आओ!" 4 फेरी इक होर घोड़ा निकलया सैं जे लाल रंगा रा था; तिसरे सवारा जो ये अधिकार दित्या गया भई पृथ्विया परा ते मेल-मलापा जो चक्की लो, ताकि लोक इक्की दुज्जे जो बड़ही दो; कने तिस्रो इक बड्डी तलवार दित्ती गई।

5 तजे तिन्हें तिज्जी मोहर खोली तां मैं तिज्जे प्राणिये जो येदा बोलदे सुणेया, "आओ!" मैं नजरां कितीयां, कने देखो, इक काला घोड़ा, कने तिसरे सवारा

रे हत्था च इक तकड़ी ई; 6 कने मैं तिन्हां चऊं प्राणियां रे बिच्चा च ते इक अवाज येदी सुणी, "दिनार रा शेर कणक, कने दिनारा तिन्न सेर जौ, पर तेल कने दाखरसा रा नुक्सान नीं करना।"

7 तजे तिन्हें चौथी मोहर खोली तां मैं चौथे प्राणिये जो येदा बोलदे सुणेया, "आओ!" 8 मैं नजरां कितीयां, कने देखो, इक पीऊला जेया घोड़ा, कने तिसरे सवारा रा नाँ मौत आ, कने अधोलोक तिसरे पिछे-पिछे आ; कने तिन्हां जो धरतिया रे चौथे हिस्से पर ये अधिकार दित्या गया, भई तलवार, नकाळ, कने मरी, धरतिया रे वन पशुआं रे जरिये लोकां जो मारी दो।

9 तजे तिन्हें पँजवीं मोहर खोली तां, मैं वेदिया रे थल्ले तिन्हांरे प्राणां जो देखया सैं जे परमेश्वर रे वचनां रिया वजह ते कने तिसा गवाई या रिया वजह ते सैं जे तिने दित्ती थी बध किते गये थे। 10 तिन्हें बड्डिया अवाजा च बोलया, "हे स्वामी, हे पवित्र कने सत्य; तू कदूआं तका न्याय नीं करगा? कने धरतिया रे रेहणे औळयां ते अहारे लहूये रा बदला कदूआं तका नीं लेंगा?

11 तिन्हां च ते हरेक जो चिद्दा कपड़ा दित्या गया, कने तिन्हां ने बोलया गया भई थोड़िया देरा तका रमान करा, तदुआ तका जे तुहां रे सौगी औळे दास कने भाई सैं जे तुहां साई बध हुणे औळे तिन्हां री भी गिणती पूरी नीं हुई लो।

12 तजे तिन्हें छेवीं मोहर खोली तां, मैं देखया भई इक बड्डा हिलण हुआ, कने सुरज कम्बला साई काला कने पूरा चन्द्रमा लहूये साई हुई गया।

13 आकाशा ते तारे पृथ्विया पर ईयां टिकीगे तियां जे मतिया नेहरिया ते हिल्ली ने अंजीरा रे डाला च ते कचे फल झड़ां ये। 14 आकाश इक्की खा खिसकी गया तियां जे पत्ता लपेटणे ते खिसकी जां; कने हरेक पहाड़, कने टापु अपणिया-अपणिया जगह ते खिसकी गे। 15 तजे पृथ्विया रे राजा, कने प्रधान, कने सरदार, कने धनवान कने सामर्थी लोक, कने हरेक दास कने हरेक स्वतन्त्र पहाड़ा रियां टोहडां च पत्थरां हेठ लुखी गये, 16 कने पहाड़ कने टरेयां ने बोलणे लगे, "अहां परा टिरी जावा; कने अहां जो तिसरे मुँहा ते सैं जे सिंहासना पर बैठी रा, कने मेमने रे प्रकोपा ले लुखुवाई लो। 17 कांभई तिन्हां रे प्रकोपा रा खतरनाक दिन आई गरा, हुण कुण ठेहरी सकां?"

इसाएल रे 1,44,000 लोक

7 इसते बाद मैं पृथ्विया रे चऊं कोणेयां पर स्वर्गदूत खड़े देखे। सैं पृथ्विया रियां चऊं हवां जो थम्मी रे थे ताकि पृथ्वी या समुद्र या किसी डाला पर हवा नीं चलो। 2 फेरी मैं इक होर स्वर्गदूतां जो जीऊंदे परमेश्वर री मोहर लई ने पूर्वा खाते उपर खा आऊंदे देखया; तिन्हें तिन्हां चऊं स्वर्गदूतां ने तिनां जे पृथ्वी कने समुद्रा रा नुक्सान रा अधिकार दित्या गया था, उच्चिया आवाजा च बोलया, 3 "तदुआं तका जे अहें अपणे परमेश्वर रे दासां रे मत्थे पर मोहर नीं लाई लईये, तदुआं तका पृथ्वी कने समुद्र कने डालां जो नुक्सान नीं पुजुआणां।" 4 तिन्हां पर जे मोहर लाई ती मैं तिन्हां री गिणती सुणी, मतलब इसाएला रियां सन्तानां रे सबीं गोत्रां च ते इक लाख चौताली हजार पर मोहर लाई गई : 5 यहूदा रे गोता च ते बारा हजार पर मोहर लाई गई; रूबेना रे गोता च ते बारा हजार पर मोहर लाई गई, गादा रे गोता च ते बारा हजार पर मोहर लाई गई, 6 आशेरा रे गोता च ते बारा हजार पर मोहर लाई गई, नपताली रे गोता च ते बारा हजार पर मोहर लाई गई, मनश्शे रे गोता च ते बारा हजार पर मोहर लाई गई, 7 शमौना रे गोता च ते बारा हजार पर मोहर लाई गई, लेवी रे गोता च ते बारा हजार पर मोहर लाई गई, इस्राकार रे गोता च ते बारा हजार पर मोहर लाई गई, 8 जबूलूना रे गोता च ते बारा हजार पर मोहर लाई गई, यूसुफ रे गोता च ते बारा हजार पर मोहर लाई गई, कने बिन्यामीना रे गोता च ते बाराह हजार पर मोहर लाई गई।

इक बड्डी भीड़

9 इसते बाद मैं देखया, कने देखो, हरेक जाति कने कुल कने लोक कने भाषा च ते इक बड्डी भीड़, तिसां जे कोई गिणी नीं सकदा था, चिट्टे कपड़े पैहनीं ने कने अपणेयां हत्थां च खजुरा रियां डालियां लई ने सिंहासना रे सामणे कने मेमने रे सामणे खड़ी री, 10 कने उच्चिया आवाज च बोलया रां ये, "उद्धारा खातर आहारे परमेश्वर रा, सैं जे सिंहासना पर बैठी रा, कने मेमने रा जय-जय कार हो!" 11 कने सारे स्वर्गदूत तिस सिंहासना कने प्राचीनां कने

चऊं प्राणियां रे चऊं पासेयां खड़ी रे; फेरी सै सिंहासना रे सामणे मुँहा रे भार पैड़ी कने परमेशरा जो दण्डवत करी ने बोलया, ¹² “आमीना! आहारै परमेशरा री स्तुति कने महिमा कने ज्ञान कने धन्यवाद कने आदर कने सामर्थ कने शक्ति युगानयुग बणी री रहो। आमीना!”

¹³ इस पर प्राचीनां च ते इक्की मेरने बोलया, “ये सफेद कपड़े पैहनी ने कुण ये? कने किती ते आई रे?” ¹⁴ मैं तिसने बोलया, “हे स्वामी, तू ई जाणां।” तिने मेरने बोलया, “ये सैई हये, सै जे तिस महा क्लेशा च ते निकली ने आई रे; इन्हे अपणे-अपणे कपड़े मेन्ने रे लहूये ने धोई ने चिट्टे किती रे।

¹⁵ इस वजह ते ये परमेशर रे सिंहासना रे सामणे, कने तिसरे मन्दरा च दिन रात तिसरी सेवा करां ये, कने सै जे सिंहासना पर बैठी रा,

तिस तिन्हां परा अपणे तम्बू ताणना।

¹⁶ तिन्हां फेरी भुक्खे कने प्यासे नीं हुणां;

कने नां तिन्हां परा धूपा, नां कोई सेंक लगणां।

¹⁷ कांभई मेमना सै जे सिंहासना रे बिच आ तिन्हांरी रखवाली करगा,

कने तिन्हां जीवना औळे पाणिये रे सोते ला लई जाया करगा;

कने परमेशर तिन्हांरी आक्खीं ते सारे आँसु पूंजी देणे।

सत्तां मोहर कने सोने रा धूपदान

8 तजे तिन्हेँ दुज्जी मोहर खोली, तां स्वर्गा च अधे तका सत्राटा छई गया। ² तां मैं तिन्हां सत्तां स्वर्गदूतां जो देखया सै जे परमेशरा रे सामणे खड़े रहवाये, कने तिन्हां जो सात्त तुरहियां दित्तियां। ³ फेरी इक होर स्वर्गदूत सोने रा धूप दान लई ने आया, कने वेदिया रे नेडे खड़ा हुआ; कने तिस्सो बौहत धूप दित्या गया भई सब पवित्र लोकां रिया प्राथना सौगी सोने री तिसा वेदिया पर, सै जे सिंहासना रे सामणे ई चढाओ। ⁴ तिस धूपा रा धुआँ पवित्र लोकां रिया प्राथना सौगी स्वर्गदूतां हत्थां ते परमेशरा रे सामणे पुज्जी गया। ⁵ तां स्वर्गदूते धूप दान लई ने तिस च वेदिया री आग भरी कने पृथ्विया पर सट्टी ती; कने गड़गड़ाहट कने आवाज कने बिजलियाँ कने भूकम्प हूणे लगे।

सात्त तुरहियां

⁶ तां सै सात्त स्वर्गदूत तिन्हां ले जे सात्त तुरहियां थियां तिन्हा बजाणे जो तैयार हुये। ⁷ पैहले स्वर्गदूते तुरही बजाई, कने लहू मिली री आहू कने आग पैदा हुई, कने धरतिया पर सट्टी गई; कने पृथ्विया री इक तिहाई फूखी गई, कने डालां री इक तिहाई फूखी गई, कने सारा घा भी फूखी गया।

⁸ दुज्जे स्वर्गदूते तुरही बजाई, तां मन्त्रो आग्नी साई जलदा हुआ इक बड्डा पहाड़ समुद्रा च पई गया; कने समुद्रा रा इक तिहाई लहू बणी गया, ⁹ कने समुद्रा रे इक तिहाई हिस्से रे सारे प्राणी मरी गये, कने इक तिहाई जहाज नष्ट हुई गये।

¹⁰ तिज्जे स्वर्गदूते तुरही बजाई, कने इक बड्डा तारा सै जे मशाला साई जलया रां था स्वर्गा ते टुटेया, कने नदियां रे इक तिहाई हिस्से पर कने पाणिये रे सरोतां पर पई गया। ¹¹ कने तारे रा नाँ नागदौना था; कने इक तिहाई पाणी नागदौने साई कऊड़ा हुई गया, कने मते सारे माहू तिस पाणिये रे कऊड़े हुणे पर मरी गये।

¹² चौथे स्वर्गदूते तुरही बजाई, कने सूरजा रा तिज्जा हिस्सा, कने चन्द्रमे रा तिज्जा हिस्सा कने तारयाँ रे तिज्जे हिस्से पर मसीबत आई, येथी तका भई तिन्हां रा इक तिहाई हिस्सा नेहरा हुई गया कने दिनां री इक तिहाई च उज्रियाला नीं रेहया, कने तियां ई राती च भी।

¹³ तजे मैं फेरी देखया तं आकाशा च इक्की उकाबा जो उडदे कने उच्चिया आवाजा च येदा बोलदे सुणेया, “इन्हां तिन्हां स्वर्गदूतां री तुरहिया रियां आवाजा रिया वजह ते, तिन्हांरा बजणां जे अर्ज रेंहदा आ, पृथ्विया पर रैहणे औळियां पर हाय, हाय, हाय!”

9 पंजवें स्वर्गदूते तुरही बजाई, तां मैं स्वर्गा ते धरतिया परा इक तारा टिरदा देख्या, कने तिस्सो अथाह कुण्डा रियां चाबियां दित्तियाँ गईयाँ। ² तिने अथाह कुण्डा जो खोलया, कने कुण्डा च ते बड्डिया भड्डिया साई धुआँ निकलेया, कने कुण्डा रे धुयें ते सुरज कने हवा नेहरी हुई गई। ³ तिस धुयें च

ते धरतिया परा टिड्डियाँ निकलियां कने तिन्हां जो बिच्छुये साई ताकत दित्ती गई। ⁴ तिन्हां ने बोलया गया भई ना धरतिया रे घा जो, ना किसी हरियालिया जो, ना किसी डाला जो नुक्सान पुजुआओ, सिर्फ तिन्हां माहूआं जो नुक्सान पुजुआओ तिन्हां रे मथे पर जे परमेशर री मोहर नीं। ⁵ तिन्हां जो लोकां जो मारने रा नीं पर पंजाँ महीनेयाँ तका दुःख देणे रा अधिकार दित्या गया : कने तिन्हांरी पीड़ येदि थी तेदि जे बिच्छुये रे ढंक मारने ते हुआई। ⁶ तिन्हां दिनां च माहूआं मौता जो टोलणा पर तिसा नीं मिलणा; कने मरने री इच्छा करनी, पर मौता तिन्हां ते नठी जाणां।

⁷ तिन्हां टिड्डियाँ रा आकार लड़ाईया खातर तैयार किती रे घोड़ेयां साई था। ⁸ तिन्हां रे बाल जनानां रे बालां साई कने दान्द शरां रे दन्दां साई थे। ⁹ तिन्हेँ लोहे साई झिलम पैहनी री थी तिन्हांरे फंगां री आवाज येदि थी तेदी जे रथां कने मत्तयां घोड़ेयाँ री हुआई सै जे लड़ाईया च दौड़ाये। ¹⁰ तिन्हां री फूटी बिच्छुआं साई थी कने तिन्हां च ढंक थे, कने तिन्हां जो पंजाँ महीनेयां तका माहूआं जो दुःख पुजुआणे री सै जे ताकत मिली री थी सै तिन्हां रिया फूटीया च थी। ¹¹ अथाह कुण्डा रा दूत तिन्हां पर राजा था; तिसरा नीं इब्रानिया च अबद्योन, कने यूनानी च अपुल्योन आ।

¹² पैहली विपत्ती त बीत्ती गई, देखो, हुण इसते बाद दो विपत्तियाँ होर औणे औळियां ई यां।

¹³ तजे छेवें स्वर्गदूते तुरही बजाई, तां सोने रिया वेदिया जो सै जे परमेशर रे सामणे ई तिसरेयां सीगां च ते मैं येदि आवाज सुणी, ¹⁴ मन्त्रो कोई छेवें स्वर्गदूता ने, तिसले जे तुरही थी, बोलया रां, “तिन्हां चऊं स्वर्गदूतां जो सै जे बड्डिया नदिया फुराता ले बन्ही रे, खोली दे।” ¹⁵ सै चारों दूत खोली दित्ते गये सै जे तिसा घडिया, कने दिनां, कने महीनेयां, कने सालां खातर माहूआं री इक तिहाई जो मारी देणे तैयार कित्ते गईरे थे। ¹⁶ तिन्हां री फौजां रे सवारां री गिणती बीह करोड़ थी; मैं तिन्हां री गिणती सुणी। ¹⁷ मिंजो इस दर्शना च घोड़े कने तिन्हां रे येदे सवार दुस्से तिन्हां रियां झिलमां जे अग्गी, कने धुयें, कने गन्धका साई थियां, कने तिन्हां घोड़ेयां रे सिर शरां रे सिरां साई थे; कने तिन्हां रे मुँहा ते आग, धुआं कने गन्धक निकलां थे। ¹⁸ इन्हां तिन्हां महामारियां मतलब आग कने धुआँ कने गन्धका ते, सै जे तिन्हां रे मुँहां ते निकलां थे माहूआं री इक तिहाई मारी दित्ते गये। ¹⁹ कांभई तिन्हां घोड़ेयां री सामर्थ तिन्हांरे मुँहा कने तिन्हां रिया फूटीया च थी; इस खातर भई तिन्हांरियां फूटीयां सप्पां साई थियां कने तिन्हां फूटीयां रे सिर बी थे कने इन्हां तेई सै पीड़ देवां थे। ²⁰ बाकी माहूआं ते सै जे तिन्हां मरियां ते नीं मरे थे, अपणेयां हत्थां रे कम्मां ते मन फिराया, भई दुष्टात्मावां री, कने सोने कने चाँदीये कने पीतला कने पत्थरां कने लकडां रियां मूर्तियां री पूजा नी करो सै जे नां देखी, नां सुणी, नां चली सकां ईयां; ²¹ कने सै जे खून, कने टोणां, कने व्यभिचार, कने चोरी तिन्हेँ किती थी, तिन्हां ते मन नीं फिराया।

स्वर्गदूत कने छोटि कताब

10 फेरी मैं इक होर ताकता औळे स्वर्गदूता जो बदला जो ओडी ने स्वर्गा ते उतरदे देखया। तिसरे सिरा पर मेघधनुष था। तिसरा मुँहा सुरजा साई कने पैर अग्गी रे खम्बे साई थे। ² तिसरे हत्था च इक छोटी जी खुलीरी कताब थी। तिने अपणे सज्जा पैर समुद्रा पर कने खब्बा धरतिया पर रखया, ³ कने इतनिया मत्तिया आवाजा च रड़ाया, तेदा जे सिंह गर्जा; कने तजे सै रड़ाया तां गर्जणे रियां सात्त आवाजां सुणीयां। ⁴ तजे सत्तां गर्जणां रियां आवाजां सुणीं चुकियां, तां हऊं लिखणे जो ई था, पर मैं स्वर्गा ते ये आवाज सुणी, “सै जे गलां गर्जणां रे तिन्हां सत्तां आवाजां च सुणी री तिन्हां जो लखुवाई ने रख, कने मत लिखदा।” ⁵ तिस स्वर्गदूता जो जे मैं समुद्रा कने धरतिया पर खडिरे देखया था, तिन्हेँ अपना सज्जा हाथ स्वर्गा खा चक्या, ⁶ कने सै जे युगानयुग जीऊंदा आ, कने तिने जे स्वर्गा जो कने जो किछ तिस चा, कने धरतिया जो कने जो किछ तिस पर आ, कने समुद्रा जो कने जो किछ तिस चा, सूज्जेया, तिसरी कसम खाई ने बोलया, “हुण तां होर बेर नीं हुणी।” ⁷ पर सतवें स्वर्गदूता रे तुरही बजाणे पर हुणे औळिया आवाजा रे दिनां च परमेशरा री गुप्त मना री इच्छा तिस सुसमाचारा रे मताबक सै जे तिने अपणे दास भविष्यवक्तावां जो दित्या, पूरा हुणां।” ⁸ तिसा आवाजा जो सै जे

मैं स्वर्गा ते बोलदे सुणी थी, सै फेरी मेरने सौगी गल्लां करने लगया।" जा, सै जे स्वर्गदूत समुद्र कने धरतिया पर खड़ी रा, तिसरे हत्था ते कताब लई ले।" 9 मैं स्वर्गदूता ले नेड़े जाई ने बोलया, "इसा छोटिया कताबा मिंजो दई दे।" तिने मेरने बोलया, "लै, इसा खाई ले; इसा तेरा पेट कऊड़ा त करना, पर तेरे मुँहां च शैहता साई मिठी लगणी।" 10 इस खातर मैं सै छोटी कताब तिस स्वर्गदूता रे हत्था ते लई ने खाई ली। सै मेरे मुँहां च शैहता साई मिठी लगी, पर तजे हउं तिसा जो खाई गया तां मेरा पेट कऊड़ा हुई गया। 11 तां मेरने येद्दा बोलया गया, "तिज्जो मत्तेयां लोकां, कने जातियां, कने भाषावां कने राजेयां रे बारे च फेरी भविष्यवाणी करनी पौणी।"

दो गबाह

11 फेरी मिंजो नापणे खातर इक सरकण्डा दित्या गया, कने किन्हिये बोल्या, "उठ, परमेशरा रे मन्दरा कने वेदिया, कने तिस च भक्ति करने औळ्यां जो नापी ले। 2 पर मन्दरा रे बाहरा रे अंगणा जो छड्डी देयां; तिस्सो मत नापदा कांभई सै अन्यजातियां जो दित्या गईरा, कने तिन्हां पवित्र नगरा जो बताळियां महीनेयां तका रौंदणां। 3 मांह अपणेयां दुई गवाहं जो ये अधिकार देणा भई टाट ओडी ने इक हजार दो सौ साड्ड दिनां तका भविष्यवाणी करा।

4 ये सै ई जैतुना रे दो डाल कने दो दिऊटां ईयां। सै जे धरतिया रे प्रभुये रे सामणे खड़े रह्याये। 5 जे कोई तिन्हां जो नुक्सान पजुवाणां चाओ, तां तिन्हारे मुँहां ते आग निकली ने तिन्हारे बैरियां जो भस्म करी देवांई, कने जे कोई तिन्हां जो नुक्सान पजुवाणां चाहंगा, तां इसा ई रीतिया ते मारी दित्या जांगा। 6 तिन्हां जो अधिकार आ भई आकाशा जो बन्द करो, भई तिन्हारी भविष्यवाणियां रे दिनां च बरखा नी बरहो; कने तिन्हां जो सारे पाणिये पर अधिकार आ भई तिस्सो लहू बणाओ, कने तजे कदी चाओ ताहू-ताहू धरतिया पर हर किस्मा री बिपत्ती लयाओ। 7 तजे सै अपणी गवाई दई चुकगे, तां सै पशु सै जे अथाह कुण्डा च ते निकलगा, तिस तिन्हां ने लडी ने तिन्हां जो जीतणा कने तिन्हां जो मारी देणां। 8 तिन्हां रियां लाहशी तिस बड्डे नगरा रे चौका च पई रियां रैहणियां, सै जे आत्मिक तौरा च सदोम कने मिश्र केहलावां, तेथी जे तिन्हांरा प्रभु भी क्रुसा पर चढाया गया। 9 सब लोक कने कुळा कने भाषावां कने जातियां रे लोकां तिन्हां रियां लाहशां जो साढे तिन्हां दिनां तका देखदे रैहणां, कने तिन्हां रियां लाहशीं जो कब्रा च नी रखणे देणां। 10 धरतिया रे रैहणे औळ्यां तिन्हारे मरने ते खुश हुणां, कने इक्की दुजे ला तोफे भेजणे, कांभई इनें दुई भविष्यवक्तावे धरतिया रे रैहणे औळ्यां जो सताया था। 11 पर साढे तिन्हां दिनां ते बाद परमेशरा खा ते जीवना रा साह तिन्हां च पई जाणा। कने तिन्हां अपणे पैरां रे भार खड़े हुई जाणां, कने तिन्हां रे देखणे औळ्यां पर मता डर छाई जाणां। 12 तां तिन्हां जो स्वर्गा ते इक बड्डी हाक सुणीं, "येथी ऊपरा जो आवा!" ये सुणी ने सै बदलां पर सवार हुई ने अपणे बैरियां रे देखदे-देखदे स्वर्गा परा चढ़ीगे। 13 फेरी तिसा ई घडिया इक बड्डा हिलण हुआ, कने नगरा रा दसवां हिस्सा टिरी गया; कने तिस हिलणा ते सात्त हजार माल्लु मरी गये, कने बाकी डरी गये कने स्वर्गा रे परमेशरा री महिमा किती। 14 दुज्जी विपत्ती बीती गई; देखो तिज्जी विपत्ती छोड़े औणे औळी।

सत्तो तुरही

15 तजे सतवे दूते तरही बजाई, तां स्वर्गा रे बारे च बडी-बडी आवाजां हुणे लगियां; "जगता रा राज्य आहारे प्रभुये रा कने तिसरे मसीह रा हुई गया। कने तिस युगानयुग राज्य करना।" 16 तजे चौबी रे चौबी प्राचीन सै जे परमेशरा रे सामणे अपणे-अपणे सिंहासना पर बैठे थे, मुँहा रे भार पई ने परमेशरा जो दण्डवत करी ने 17 येद्दा बोलणे लगे,

"हे सर्वशक्तिमान प्रभु परमेशर, सै जे हया कने सै जे था,

अहें तेरा धन्यावाद करां ये भई तै अपणिया बडिया सामर्था जो कम्मा च लयाई ने राज्य किती रा।

18 जातियें गुस्सा किताया, पर तेरा प्रकोप आई गया,

कने सै बगत आई पुजया भई मरीरेयां रा न्याय किताया जाओ,

कने तेरे दास भविष्यवक्तावां कने पवित्र लोकां जो कने तिन्हां छोटे-बड्डेयां जो सै जे तेरे नाँवा ते डरांये बदला दित्या जाओ,

कने धरतिया रे बगाडने औळे नाश किन्ते जाओ।"

19 तां परमेशरा रा सै जे मन्दर स्वर्गा चा सै खोलया गया, कने तिसरे मन्दरा च तिसरिया वाचा रा सन्दूक दुस्सया; कने बिजलियां कने आवाजां कने गर्जणां कने हिलण हुये कने मती आण पई।

जनाना कने अजगर

12 फेरी स्वर्गा च इक बडा नसाण दुस्सया, मतलब इक जनाना तिसै जे सुरज ओडी रा था, कने चाँद तिसा रे पैरां हेत था, कने तिसारे सिरा पर बारहां तारेयां रा मुकुट था। 2 सै भारहत्थी हुई, कने रडावां थी, कांभई जमणे रिया पीडां च थी। 3 इक होर नशाण स्वर्गा च दुस्सया; कने देखो इक बडा लाल अजगर था, तिसरे जे सात्त सिर कने दुस्स सींग थे, कने तिसरे सिरां पर सात्त राज मुकुट थे। 4 तिस रिया फूंटिया ते आकाशा रे यां तारेयां रा इक तिहाई हिस्सा खंजोई ने धरतिया परा सटोई गया। सै अजगर तिसा जनाना ने सामणे सै जे जणने औळी थी, खडा हुआ भई तजे सै बच्चे जो जणो तां तिस बच्चे जो खाई जाओ। 5 तिसे बालक जणेया सै जे लोहे रा राजदण्ड लई ने सबीं जतियां पर राज्य करने पर था, कने सै बच्चा इक दम परमेशर ले कने तिसरे सिंहासणा ला चक्की ने पुजुवाई तया गया; 6 कने सै जनाना तिस जंगला जो नठीगी तेथी जे परमेशर रिया तरफा ते तिसा खातर इक जगह तैयार किती गई थी भई तेथी सै बारहा सौ साठ दिनां तका पाळी जाओ।

7 फेरी स्वर्गा च लडाई हुई, मिकाल कने तिसरे स्वर्गदूत अजगरा ने लडने जो निकले; कने अजगर कने तिसरे दूत तिसने लडे, 8 पर प्रबल नीं हुये, कने स्वर्गा च तिन्हां खातर फेरी जगह नीं रई। 9 तां सै बड्डा अजगर, मतलब सै ई पुराणा साप्प तिस्सो जे इबलीस कने शैतान बोलांये कने सारे संसारा रा भरमाणे औळा, धरतिया परा सट्टी तया गया, कने तिसरे दूत तिसने सौगी सट्टी ते गये। 10 फेरी मैं स्वर्गा ते ये बडी आवाज आऊंटी सुणीं, "हुण आहारे परमेशर रा उद्धार कने सामर्थ कने राज्य कने तिसरे मसीह रा अधिकार प्रगट हुई रा, कांभई आहारे भाईयां परा दोष लाणे औळा, सै जे रात-दिन आहारे परमेशर रे सामणे तिन्हां परा दोष लांदा रह्यां था सट्टी तया गईरा। 11 सै मेन्ने रे लहूये रिया वजह ते कने अपणिया गवाईया रेयां वचनां रिया वजह ते तिस परा जयवन्त हुये, कने तिन्हें अपणेयां प्राणां जो प्यारा नीं जाणया, येथी तका भई मौत भी सई ली। 12 इस वजह ते हे स्वर्गा कने तिन्हां च रैहणे औळ्यो, मगन हुआ; हे धरती, कने समुद्र, तुहां परा हाय! कांभई शैतान बडे गुस्से सौगी तुहां ले उतरी आई रा, कांभई जाणां भई तिसरा थोड़ा ई वगत बाकी आ।

13 हुण अजगरे देखया भई हऊं धरतिया परा टराई तरा, तां सै जनाना जो तिसै जे बालक जणेया था, सताया। 14 पर तिसा जनाना जो बडे ऊकाबा रे दो फंग दित्ते गये भई सपा रे सामणे ते उडी ने जंगला रिया तिसा जगह पुज्जी जाओ, तेथी जे इक वगत कने वक्तां, कने अद्धे वक्ता तका पाळी जाओ। 15 कने सप्पे तिसा जनाना रे पिछे अपणे मुँहा ते नदिया साई पाणी बगाया भई तिसा जो इसा नदिया च हडाई दो। 16 पर धरतिये तिसा जनाना री मद्द किती, कने अपणां मुँह खोली ने तिसा नदिया जो सै जे अजगरे अपणे मुँहा ते बगाई थी पी लेया। 17 तां अजगर जनानां पर गुस्से हुआ, कने तिसा रियां बाकी औळादां ते, सै जे परमेशर रे हुक्मा जो मन्दे कने यीशुये री गवाई देणे पर पक्के ये, लडने जो गया। 18 कने सै समुद्रा रिया रेता पर जाई ने खडीग्या।

दो पशु

13 तां मैं इक्की पशुये जो समुद्रा च ते निकलदे देखया, तिसरे दस्स सींग कने सात्त सिर थे, तिसरेयां सींगां पर दस्स राजमुकुट, कने तिसरेयां सिरां पर परमेशर रे निन्दा रे नाँ लिखी रे थे। 2 सै जे पशु मैं देखेया सै चीते साई था; कने तिसरे पैर भालुये साई, कने मुँह शेरा साई था। तिने अजगरे अपणी सामर्थ कने अपणा सिंहासन कने बडा अधिकार तिस्सो दई तया। 3 मैं तिसरे सिरां च ते इक्की पर इतना भारी जखम लगी रा देखया मन्ने सै

मरने ई औळा आ, फेरी तिसरा प्राण लेणे औळा जख्म खरा हुई गया, कने सारी धरतियां रे लोक तिस पशुये र पीछे-पीछे हैरानी जतांदे चले। 4 लोकें अजगरा री पूजा किच्ची, कांभई तिने पशुये जो अपणा अधिकार दई तया, कने येदा बोली ने पशुये री पूजा किच्ची, “इस पशुये साई कुण आ? कुण इसने लड़ी सकां?”

5 बड्डे बोल बोलणे कने निन्दा करने खातर तिस्सो इक मुँह दित्या गया, कने तिस्सो बतालियाँ महीनेयां तका काम्म करने रा अधिकार दित्या गया। 6 तिन्हें परमेशर री निन्दा करने खातर मुँह खोलया भई तिसरे नौवा कने तिसरे तम्बुये री मतलब स्वर्गा च रहणे औळ्यां री निन्दा करो। 7 तिस्सो ये भी अधिकार दित्या गया भई पवित्र लोकां ने लडो कने तिन्हां पर जय पाओ, तिस्सो हरेक कुल कने लोकां कने भाषा कने जातियां पर अधिकार दित्या गया। 8 धरतिया रे सर्बी रहणे औळ्या तिन्हारे नौं जे मेन्ने रिया जीवना रिया कताबा च नीं लिखी रे थे सै जे जगता रिया उत्पतिया रे वक्ता ते घात हुई रा, तिस पशुये री पूजा करणे। 9 तिसरे जे कान हो सै सुणी लो।

10 तिस जे कैद हुणां तिस कैद हुई ने ई रहणां;

सै जे तलवारा ने मारगा, जरूरी आ भई सै तलवारा ने मारया जांगा।

पवित्र लोकां रा धीरज कने विश्वास इस ची आ।

11 फेरी मैं इक होरी पशुये जो धरतिया च ते निकलदे देखया, तिसरे मेन्ने साई दो सींग थे, कने सै अजगरा साई बोलां था। 12 सै तिस पैहले पशुये रा अधिकार तिसरे सामणे कम्मा च लयावां था; कने धरती कने तिसरे रहणे औळ्यां ते तिस पैहले पशुये री, तिसरा जे प्राण घातक जख्म ठीक हुई गया था, पूजा करावां था। 13 सै बडे-बडे नशाण दस्सां था, येथी तका भई माहुआं रे सामणे आकाशा ते धरतिया परा आग बरसाई देवां था। 14 तिन्हां नशाणां रिया वजह ते, तिना जे सै तिस पशुये रे सामणे दसणे रा अधिकार तिस्सो दित्या गया था, सै धरतिया पर रहणे औळ्यां जो भरमावां था कने धरतिया रे रहणे औळ्यां ने बोलां था भई तिस पशुये जो जे तलवार लगी री थी सै जीऊंदा हुई गरा, तिसरी मूर्ती बणावा। 15 तिस्सो तिस पशुये रिया मूर्तिया च प्राण पाणे रा अधिकार दित्या गया भई पशुये री मूर्ती बोलणे लगे, कने तितने लोक जे तिस पशुये रिया मूर्तिया री पूजा नीं करो, तिन्हां जो मुरुवाई दो। 16 तिने छोट्यां-बड्ड्यां, धनीयां-कंगालां, स्वतन्त्रां-दासां सर्बीं रे सज्जे हत्था या तिन्हारे मथे पर इक-इक छाप लुआई ती, 17 भई तिस्सो छड्डी ने तिस पर जे छाप मतलब तिस पशुये रा नौं या अंक हो, होर किसी किस्मा रा लेणे-देण नीं करी सको। 18 ज्ञान इस ची आ : तिस्सो जे बुद्धी हो सै तिस पशुये रा अंक जोडी लो कांभई सै माहुये रा अंक आ, कने तिसरा अंक छे सौ छयाहट आ।

मेमना कने तिसरे लोक

14 फेरी मैं नजरां किच्तियां, फेरी देखो, सै मेम्ना सियोन पहाडा पर खड़ी रा कने तिसने सौगी इक लाख चौताली हजार जन थे, तिन्हां रे मथे पर तिसरा कने तिसरे पिते रा नौं लिखी रा। 2 कने स्वर्गा च मिंजो इक येदी आवाज सुणी सै जे पाणीये रे मत्तेयां झरनेयां कने बड्डिया गर्जना साई आवाज थी, कने सै जे आवाज मैं सुणी सै येदी थी मन्नो वीणा बजाणे औळे वीणा बजाया करदे हो। 3 सै सिंहासना रे सामणे कने चऊं प्राणियां कने प्राचीनां रे सामणे इक नवां गीत गाया करां थे। तिन्हां इक लाख चौताली हजार जनां जो छड्डी ने, सै जे धरतिया ते मूल लई रे थे, कोई सै गीत नीं सीखी सकदा था। 4 ये सै ये सै जे जनाना ने सौगी अशुद्ध नीं हुये, पर कुवारे ये; ये सै ई ये भई तेथी किच्ती ने मेम्ना जांवां, सै तिसरे पीछे आई जांये; ये तां परमेशर खातर पैहले फल हुणे खातर माहुआं च ते मूल लिक्ते गई रे। 5 तिन्हां रे मुँहा ते जे कदी झूठ नीं निकलदा था, सै निर्दोष ये।

तिन स्वर्गदूत

6 फेरी मैं इक होर स्वर्गदूता जो आकाशा रे बीच उड़दे हुये देखया, तिसते जे धरतिया परा रे रहणे औळ्यां री हरेक जाति, कने कूल, कने भाषा, कने लोकां जो सुनाणे खातर सनातन सुसमाचार था। 7 तिने बड्डिया आवाजा च बोलया, “परमेशर ते डरो, कने तिसरी महिमा करो, कांभई तिसरे न्याय करने रा वगत आई पुज्जी रा; कने तिसरा भजन करो, तिने ने स्वर्ग कने धरती कने

समुद्र कने पाणिये रे सत्रोत बणाये।” 8 फेरी इसते बाद इक होर, दुजा, स्वर्गदूत येदा बोलदा हुआ आया, “टिरी गया, सै बडा बेबीलोन टिरी गया, तिन्हें जे अपणे व्यभिचारा रे कोपा औळी शराब सर्बीं जातियां जो पयाई री।” 9 फेरी इन्हां ते बाद इक होर, तीज्रा स्वर्गदूत बड्डिया आवाज च येदा बोलदा हुआ आया, “सै जे कोई तिस पशुये कने तिसरिया मूर्तिया री पूजा करो, कने अपणे मथे या अपणे हत्था पर तिसरी छाप लओ 10 सै परमेशर रे प्रकोपा री निरी मदिरा, सै जे तिसरे गुस्से रे कटोरे च पाई दिक्ती गई री, पींगा कने पवित्र स्वर्गदूतां रे सामणे कने मेन्ने रे सामणे आग कने गन्धका रिया पीडा च पऊंगा। 11 तिसरिया पीडा रा धुआं युगानयुग उठदा रहंगा, कने सै जे तिसरे नौंवा री छाप लवांये, तिन्हां जो रात दिन चैन नीं मिलणां।”

12 पवित्र लोकां रा धीरज इस चा, सै जे परमेशर रे हुक्मा जो मन्नांये कने प्रभु यीशुये पर विश्वास करांये।

13 फेरी मैं स्वर्गा च ते येदी आवाज सुणीं, “लिख : सै जे मृतक प्रभुये च मरांये, सै हुणां ते धन्य ये।” आत्मा बोलां, “हौं, कांभई तिन्हां जो अपणिया मेहनता ते रमान मिलणां, कने तिन्हां रे काम्म तिन्हां सौगी हुणे।”

कटणी

14 मैं नजरां किच्तियां, कने देखो, इक उजला बदल आ, कने तिस पर माहुये रे पुत्रा साई कोई बैठी रा, तिसरे सिरा पर सोने रा मुकट आ कने हत्था च तेज डाटी। 15 फेरी इक होर स्वर्गदूत मन्दरा च ते निकली ने तिसने, सै जे बदलां पर बैठी रा था, बड्डिया आवाजा च हाक्क पाई ने बोलया, “अपणी डाटी लई ने लूणी लै, कांभई लूणने रा वक्ता आई गरा, इस खातर भई धरतिया री फसल पक्की गरी।” 16 इस खातर सै जे बदलां पर बैठी रा था तिने धरतिया पर अपणी डाटी लाई, कने धरतिया जो लूणी लया।

17 फेरी इक होर स्वर्गदूत तिस मन्दरा च ते निकलया सै जे स्वर्गा च आ, कने तिसले भी इक तेज डाटी थी। 18 फेरी इक होर स्वर्गदूत तिस्सो जे अग्नी पर अधिकार था, वेदिया च ते निकलया, कने तिसले जे तेज डाटी थी तिसने उच्चिया आवाजा च बोलया, “अपणी तेज डाटी लई ने धरतिया रिया दाखलता रे गुच्छे कट्टी लै। कांभई तिसा री दाख पक्की गरी।” 19 तां तिने स्वर्गदूते धरतिया पर अपणी डाटी लाई कने धरतिया रिया दाख लता रा फल कट्टी ने अपणे परमेशर रे प्रकोपा रे बड्डे रस कुण्डा च पाई तया; 20 कने नगरा ते बाहर तिस रस कुण्डा च दाख पीहत्, कने रस कुण्डा च ते इतना लहू निकलया भई घोड़यां री लगामा तका पुजया, कने सौ कोहा तका बगदा गया।

अन्तिम बिपत्तियां ने स्वर्गदूत

15 फेरी मैं स्वर्गा च इक होर बड्डा कने नोखा नशाण देखया, मतलब सात्त स्वर्गदूत तिन्हां ले जे सत्तां आखरी विपत्तियां थियां, कांभई तिन्हां रे खत्म हुणे पर परमेशर रे प्रकोपा रा अन्त हुणा।

2 तां मैं अग्नी च मिली रे कच्चा साई इक समुद्र देखया; कने सै जे लोक तिस पशुये पर कने तिसरिया मूर्तिया पर कने तिसरे नौंवा रे अंका पर जयवन्त हुये थे, तिन्हां जो तिस कच्चा रे समुद्रा रे नेडे परमेशर रियां वीणां जो लई ने खड़ी रे देखया। 3 सै परमेशर रे दास मूसा रा गीत, कने मेन्ने रा गीत गाई-गाई ने बोलां थे,

“हे सर्वशक्तिमान प्रभु परमेशर, तेरे काम्म महान कने नोखे ये;

हे युगानयुगा रे राजा, तेरी चाल ठीक कने सच्ची।”

4 “हे प्रभु, कुण तेरते नीं डरगा कने तेरे नौंवा री महिमा नीं करगा?

कांभई तेरे न्याय रे काम्म प्रगट हुई गरे।”

5 इसते बाद मैं देखया भई स्वर्गा च साक्षियां रे तम्बूये रा मन्दर खोलया गया; 6 कने सै सत्तां स्वर्गदूत तिन्हां ले जे सत्तां विपत्तियां थियां, मलमला रे शुद्ध कने चमकदार कपडे पहनी ने कने छातिया पर सोने रियां पट्टियां बन्ही ने मन्दरा च ते निकले। 7 तां तिन्हां चऊं प्राणियां च ते इक्की तिन्हां सत्तां स्वर्गदूतां जो परमेशर, सै जे युगानयुग जीऊंदा आ, रे प्रकोपा ते भरी रे सोने रे सात्त कटोरे दीक्ते 8 कने परमेशर री महिमा कने तिसरिया सामर्था रिया वजह ते मन्दर धुयें ने भरी गया, कने तदुआं तका जे तिन्हां सत्तां स्वर्गदूतां

रियां सत्तो विपत्तियां खत्म नीं हुईयां तदुआं तका कोई मन्दरा च नीं जाई सकया।

परमेशरा रे कोपा रे सात्त कटोरे

16 फेरी मै मन्दरा च किसी जो उच्चिया आवाजा च तिन्हां सत्तां स्वर्गदूतां ने येदा बोलदे सुणेया, “जावा, परमेशरा रे प्रकोपा रे सत्तां कटोरेयां जो धरतिया पर लटी दवा।”

2 इस खातर पैहले स्वर्गदूते जाई ने अपणा कटोरा धरतिया पर लटी तया। तां तिन्हां माह्लुआं रे तिन्हां पर जे पशुये री छाप थी कने सै जे तिसरिया मूर्तिया री पूजा करां थे, इक्की किस्मां रा बुरा कने दुःख देणे औळा फोड़ा निकलया।

3 दुजे स्वर्गदूते जाई ने अपणा कटोरा समुद्रा पर लटी तया, कने सै मरीरेयां माह्लुआं रे लहुये साई बणी गया, कने समुद्रा रा हरेक जीव धारी मरी गया।

4 तिजे स्वर्गदूते जाई ने अपणा कटोरा नदियां कने पाणिये रे स्रोतां पर लटी तया, कने सै लहू बणी गये। 5 तां मै पाणिये रे स्वर्गदूता जो येदा बोलदे सुणेया,

“हे पवित्र, सै जे हया कने सै जे था,
न्यायी आ कने तैं ये न्याय कित्या।

6 कांभई तिन्हें पवित्र लोकां कने भविष्यवक्तावां रा लहू बहाया था,
कने तैं तिन्हां जो लहू पलाया;
कांभई सै इस ई लैक ये।”

7 फेरी मै वेदिया च ते येदी आवाज सुणी, “हाँ,
हे सर्वशक्तिमान प्रभु परमेशर तेरे निर्णय ठीक कने सच्चे।”

8 चौथे स्वर्गदूते जाई ने अपणा कटोरा सुरजा पर लटी तया, कने तिस्सो माह्लुआं जो अग्गी ते झूलसाणे रा अधिकार दित्या। 9 माह्लु मते सेका ते झूलसी गये, कने परमेशर रे नौवा री तिस्सो जे इन्हां विपत्तियां पर अधिकार आ, निन्दा किन्ती पर तिसरी महिमा करने खातर मन नी फिराया।

10 पंजवे स्वर्गदूते जाई ने अपणा कटोरा तिस पशुये रे सिंहासणा पर लटी तया, कने तिसरे राज्य पर नेहरा छाई गया। लोक पीड़ा रे मारे अपणी-अपणी जीभ चबाणे लगे, 11 कने अपणियां पीड़ा कने फोड़ेयां रिया वजह ते स्वर्गा रे परमेशर री निन्दा किन्ती; पर अपणेयां-अपणेयां कम्मां ते मन नी फिराया।

12 छेवें स्वर्गदूते जाई ने अपणा कटोरा महानदी फराता पर लटी तया, कने तिसरा पाणी सुक्की गया भई पूर्वा रे राजेयां खातर रस्ता तैयार हुई जाओ। 13 फेरी मै तिस अजगरा रे मुँहा ते, कने तिस पशुये रे मुँहा ते, कने तिस झुठे भविष्यक्ता रे मुँहा ते, तिन्हां अशुद्ध आत्मावां जो मेनकां रे रूपा च निकलदे देखया। 14 ये नशाण दसणे औळियां दुष्टात्मावां ई आं, सै जे सारे संसारा रे राजेयां ला निकली ने इस खातर जावाईयां भई तिन्हां जो सर्वशक्तिमान परमेशर रे तिस बड्डे दिनां रिया लड़ाईया खातर कड्डा करो — 15 “देख, मांह चोरा साई आई जाणा; धन्य सै आ सै जे जागदा रहवां, कने अपणे कपडे री चौकसी करां भई नंगा नी फिरो, कने लोक तिसरा नंगापन नी देखो।” —

16 कने तिने तिन्हां जो तिसा जगहा कड्डा कित्या तिस्सो जे इब्रानी च हर-मगिदोन बोलांये।

17 सतवें स्वर्गदूते जाई ने अपणा कटोरा हवा पर लटी तया, कने मन्दरा रे सिंहासणा च ते येदी आवाज आई, “हुई गया!” 18 फेरी बिजलियां चमकियां, कने आवाजां कने गर्जनां हुईयां, कने इक येदा बड्डा हिलण आया भई तदुआं ते जे माह्लुआं री उत्पति धरतिया पर हुई, तदुआं ते इतना बड्डा हिलण कदी मनी आया था। 19 इसते तिस बड्डे नगरा रे तिन टुकडे हुई गये, कने जाति-जाति रे नगर टिरी गये; कने बडे बेबीलोनो री याद परमेशर ले हुई भई सै अपणे गुस्से री जलजलाहटा री मदिरा तिस्सो प्याओ। 20 कने हर इक टापु अपणिया जगह ते टली गया, कने पहाड़ा रा पता नीं लगया। 21 आकाशा ते माह्लुआं परा मणा-मणा री बड्डी आण पई, कने इस खातर भई ये विपत्ति बौहत ई भारी थी, लोके आणी रिया विपत्तिया रिया वजह ते परमेशर री निन्दा किन्ती।

बड्डी बैश्या

17 तिन्हां सत्तां स्वर्गदूतां ले सै जे सात्त कटोरे थे, तिन्हां च ते इक्की आई ने मेरने येदा बोलया, “इखा जो आओ मांह तिजो तिसा बड्डिया वैश्या रा दण्ड दसणां, सै जे मते पाणिये पर बैठी री, 2 तिसा ने सौगी धरतिया रे राजेयां व्यभिचार कित्या; कने धरतिया रे रैहणे औळे तिसरे व्यभिचारा रिया शराबा ते मतवाले हुई गये थे।” 3 तां सै मिजो आत्मा च जंगला जो लई गया, कने मै सात्त सिर कने दास्स सींग थे, इक्की जनाना जो बैठी रे देखया। 4 इसे जनाने बैंगनी कने लाल रंगा रे कपडे पैहनी रे थे, कने सोने कने कीमती मणियां कने मोतियां ने सजी री थी, कने तिसा रे हत्था च इक सोने रा कटोरा था सै जे घृणित चीजां ने कने तिसारे व्यभिचारा रियां गन्दियां चीजां ने भरी रा था। 5 तिसरे मथे पर ये नौं लिखी रा था, “भेत — बड्डा बेबीलोन धरतिया रियां वैश्यांवां कने घृणित चीजां री मौ।” 6 मै तिसा जनाना जो पवित्र लोकां रा लहू कने यीशुये रे गवाहां रा लहू पी ने मतवाली हुई री देखी; तिसा देखी ने हऊ हैरान हुई गया।

7 तां तिन्हें स्वर्गदूते मेरने बोलया, “तू केँ हैरान हुआ? हऊं तिसा जनानां कने तिस पशुये रा, तिस पर जे सै सवार आ कने तिसरे जे सात्त सिर कने दास्स सींग थे, तिजो भेत दस्सां आ। 8 सै जे पशु तैं देखया, सै पैहले तां था पर हुण नींआ, कने अथाह कुण्डा ते निकली ने विनाशा च पौणा; कने धरतिया रे रैहणे औळियां तिन्हां रे नौं जे जगता रिया उत्पतिया रे वक्ता ते जीवना री कताबा च नीं लिखी रे थे, इस पशुये री ये दसा देखी ने भई पैहले था कने हुण नीं आ कने फेरी आई जाणां, हैरान हुणा। 9 तिसा बुद्धिया खातर तिस च जे ज्ञान आ, ये ई वगत आ : सै सत्तां सिर सात्त पहाड़ ये तिन्हां पर जे सै जनाना बैठी री। 10 सै सात्त राजा भी ये, पाँज तां हुई चूक्री रे, कने इक हुण, कने इक हुणा तका आईरा नीं आ, कने तजे सै आऊंगा तां किछ वक्ता तका तिसरा रैहणा भी जरूरी आ। 11 सै जे पशु पैहले था, कने हुण नीं आ, सै अप्पु अठवां आ कने तिन्हां सत्तां च ते पैदा हुआ, कने तिस बनाशा च पौणां। 12 सै जे दस्स सींग तैं देखे सै दास्स राजा ये तिन्हें जे हुणां तका राज्य नीं पाया, पर तिस पशुये सौगी घड़िया भरा तका राजेयां साई अधिकार पाई लेणें। 13 इन्हां सबी इक मन हुणां, कने तिन्हां अपणी-अपणी सामर्था कने अधिकार तिस पशुये जो देणां। 14 तिन्हां मेमने ने लडना, कने मेमने तिन्हां परा जय पाणी, कांभई सै प्रभुआं रा प्रभु कने राजेयां रा राजा आ, कने सै जे सदी रे ये कने चुणी रे ये कने विश्वासी ये सै तिसने सौगी ये; तिन्हां भी जय पाणी।”

15 फेरी तिने मरने बोलया, “सै जे पाणी तैं देखे, तिन्हां पर जे वैश्या बैठी री, सै तां लोक कने भीड़ कने जातियां कने भाषां ई यां। 16 सै जे दास्स सींग तैं देखे, तिन्हां कने पशुये तिसा वैश्या ते वैर रखणा, कने तिसा जो लाचार कने नंगिया करी देणा, कने तिसा रा माँस खाई लेणा, कने तिसा जो अग्गी च फुक्की देणां। 17 कांभई परमेशर तिन्हां रे मना च येदा पाणा भई तिन्हां तिसरे मना री इच्छा पूरी करनी, कने तदुआं तका जे परमेशरा रे वचन पूरे नीं हुई जाओ तदुआं तका इक मन हुई ने अपणा-अपणा राज्य पशुये जो दई दो। 18 सै जनाना, तिसा जे तैं देखीरा, सै बड्डा नगर आ सै जे धरतिया रे राजेया पर राज करां।”

बेबीलोन रा पतन

18 इसते बाद मै इक्की स्वर्गदूता जो सर्वां ते उतरदे देखया, तिस्सो जे बड्डा अधिकार मिली रा था; कने धरती तिसरे तेजा ते चमकी गई।

2 तिने उच्चिया आवाजा च हाक पाई ने बोलया,
“टिरी गया, बड्डा बेबीलोन टिरी गया! सै गन्दियां आत्मावां री रैहणे री जगहा,

कने हरेक दुष्टात्मावां रा अड्डा, कने हरेक अशुद्ध कने घृणित पंछियां रा अड्डा बणी गया।

3 कांभई तिसरे व्यभिचारा रिया भयानक शराबा रिया वजह ते सब जातियां टिरी गियां,

कने धरतिया रे राजेयां तिसने सौगी व्यभिचार कित्या,

कने धरतिया रेयाँ वयोपारियें तिसरे सुख-बलासा रे जादा हुणे रिया वजह ते धना ओळे हुईरे।”

4 फेरी में स्वर्गा च ते इक होर आवाज सुणी,
“हे मेरे लोको, तिस च ते निकली आवा भई तुहें तिसरे पापां रे भागी नीं हुआ,

कने तिसरिया विपत्तियां च ते कोई तुहां परा नीं आई जाओ।
5 कांभई तिसरेयां पापां रा ढेर स्वर्गा तका पुज्जी गरा,
कने तिसरे अधर्म परमेशर जो याद आई रे।
6 तेदा जे तिन्हें तुहां जो दिती रा तेदा ई तिस्सो देवा,
कने तिसरे कम्पां रे मताबक तिस्सो दो गुणा बदला देवा;
तिस कटोरे च ते तिने भरी तथा था तियां ई तिस खातर दो गुणा भरी दवा।
7 तितनी जे तिने अपणी बड़याई किती कने सुख-बलास कित्या,
तितनी ई तिस्सो पीड कने दुःख देओ; कांभई सै अपणे मनां च बोलायें,
‘हऊं राणी बणी गरी, विधवा नीं;

कने मांह दुःखा च कदी मनी पौणा।’
8 इस वजह रे इक ई दिन तिसा परा विपत्तियां आई जाणियां,
मतलब मौत, कने दुःख, कने अकाल;
कने सै अग्गी च भस्म करी दिती जाणी,
कांभई तिसा रा न्याय करने औळा प्रभु परमेशर शक्तिया औळा आ।

9 “धरतिया रे राजेयां तिन्हें जे तिसा सौगी व्यभिचार कने सुख-बलास कित्या, तजे तिसरे फुखणे रा धूँ देखगे, तां तिस खातर रोणा कने छातियां पिठणियां। 10 तिसरिया पीड़ा रे उरा रे मारे तिन्हां बड़ीया दुरा ते खडे हुई ने बोलना,

‘हे बडे नगर, बेबीलोन! हे पक्के नगर,
हाय! हाय! घड़िया भरा च तिजो दण्ड मिली गया।’

11 “धरतिया रे वपारियां तिस खातर रोणा कने पीठणां, कांभई हुण किसी तिन्हां रा माल मुल्ले नीं लेणां; 12 मतलब सोना, चाँदी, रत्न, मोती, कने मलमल, कने बैंगनी, रेशमी, लाला रंगा रे कपडे, कने हर किस्मा री खुशबुआ औळी लकड़ी, कने हाथी दंदा रियां हर किस्मा रियां चीजां, कने किमती लकड़ी कने पीतल कने लोहा कने संगमरमरा रियां सबीं किस्मा रियां चीजां
13 कने दाल-चीनी, मसाले, धूप, इत्र, लोबान, मदिरा, तेल, मैदा, कणक, गाय, बलद, भेड, बकरियां, घोड़े, रथ, कने दास, कने माहुआं रे प्राण।
14 हुण तेरे मना जो खरे लगणे ओळे फल तेरे ला ते जान्दे रहे, स्वादा औळियां कने भड़किलीयां चीजां तेरते दूर हुई रां ईयां, कने सै फेरी कदी मनी मिलणियां। 15 इन्हां चीजां रे वपारियें सै जे इन्हां ते धनी हुई रे थे, तिसरिया पीड़ा रे उरा रे मारे दूर खडेयां हुणा, कने रोंदेयां कने पिठदेयां बोलणा,

16 “हाय! हाय! ये बड्डा नगर सै जे मलमला, बैंगनी कने लाला रंगां रे कपडे पैहनां था,

कने सोने कने रत्नां कने मोतियां ने सजी रा था;
17 घड़िया भरा च ई तिसरा इतना भारी धन नष्ट हुई गया।’
हरेक माझी कने यात्री कने मल्लाह, कने तितने जे समुद्रा ते कमावांये सब दूर खडी रे, 18 कने तिसरे फुखणे रा धूँ देखदे हुये रड़ाई ने बोलणां,
‘कुण जेया नगर इस बड्डे नगरा साई आ?’

19 कने अपणे-अपणे सिरां च धूल सट्टी ने, कने रोन्दे कने पीठदे हुये रड़ाई-रड़ाई ने बोलगे,

‘हाय! हाय! ये बड्डा नगर तिसरिया सम्पतिया ते जे समुद्रा रे सब जहाजा ओळे धनी हुई गये थे,

घड़िया भरा च उजड़ी गया।’
20 हे स्वर्ग, हे पवित्र लोगो, कने प्ररितो, कने भविष्यवक्ताओ, तिस पर आनन्द करा,

कांभई परमेश्वरे न्याय करी ने तिसते तुहां रा बदला लई रा।”
21 इक्की ताकता ओळे स्वर्गदूते घराटा रा बाटा साई इक पत्थर चकेया, कने येदा बोली ने समुद्रा च सट्टी तथा,
“बड्डा नगर बेबीलोन इतने ई बडे बला ने रुडाया जाणां;
कने फेरी कदी तिसरा पता नीं लगणा।
22 वीणां बजाणे ओळियां, कने गाणे ओळियां, कने बांसरी बजाणे ओळियां,

कने तुरही बजाणे ओळियां री आवाज फेरी कदी तेरे च नीं सुणानी;
कने किसी किस्मा रा कोई कारीगर भी तुझ च नीं मिलणां;
कने घराटां रे चलणे री आवाज फेरी कदी तुझ च नीं सुणनीं;
23 कने दीऊये री लोये फेरी कदी तुझ च नीं चमकर्णी,
कने दुल्हे कने दुल्हना री आवाज फेरी कदी तुझ च नीं सुणनीं;
कांभई तेरे वयोपारी धरतिया रे प्रधान थे,
कने तेरे टोळियां ते सब जातियां भरमाईयां गई रियां थियां।
24 भविष्यवक्तावां कने पवित्र लोकां,
कने धरतिया पर सब घात किती रेयां रा लहू तिस च मिलया।”

19 इसते बाद में स्वर्गा च मन्त्रो मत्तिया भीड़ा जो उच्चिया आवाजा च येदा बोलदे सुणया, “हाल्लिलुय्याह! उद्धार कने महिमा कने सामर्थ सिर्फ अहारे परमेशरा री हई।

2 कांभई तिसरे निर्णय सच्चे कने ठीक ये। तिने तिसा बड्डिया वेश्या रा, सै जे अपणे व्यभिचारा ते धरतिया जो भ्रष्ट करां थी, न्याय कित्या कने अपणे दासां रे खुना रा बदला लई लया।”
3 फेरी दुज्जी बार तिन्हें बोलया,
“हाल्लिलुय्याह! तिन्हांरे फुखणे रा धूँ युगानयुग उठदा रैहणा।
4 तां चौबी प्राचीनें कने चऊं प्राणियें थल्ले पई ने परमेशर जो दण्डवत कित्या, सै जे सिंहासना पर बैठी रा था, कने बोलया, “आमीन! हाल्लिलुय्याह!”

मेमने रा ब्याह

5 तां सिंहासना च ते इक आवाज आई,
“हे आहारे परमेशर ते सब डरने ओळियो दासो।
क्या छोटे, क्या बड्डे; तुहें सब तिसरी स्तुति करा।”
6 फेरी में मत्तिया भीड़ा साई कने मते पाणिये रे बगणे री आवाज, कने गर्जना साई बडी आवाज सुणी :
“हाल्लिलुय्याह! कांभई प्रभु आहारा परमेशर सर्वशक्तिमान राज्य करया रां।
7 आवा, अहें आनन्दित कने मगन हुईये, कने तिसरी स्तुति करिये,
कांभई मेम्ने रा ब्याह आई गरा, कने तिसरिये दुल्हने अप्पु जो तैयार करी लरा।

8 तिस्सो शुद्ध कने चमकदार बरीक मलमला जो पैहनणे रा अधिकार दित्या गईरा”

— कांभई तिस बरीक मलमला रा मतलब पवित्र लोकां रे धर्मा रे काम्म ये।

9 तां स्वर्गदूते मेरने बोलया, “येदा लिख, भई धन्य ये सै, सै जे मेम्ने रे ब्याह रिया धामा च सद्धे गईरे।” फेरी तिने मेरने बोलया, “ये वचन परमेशर रे सच्चे वचन ये।” 10 तां हऊं तिस्सो दण्डवत करने खातर तिसरे पैरां पर पई गया। तिन्हें मेरने बोलया, “देख, येदा मत करदा, हऊं तेरा कने तेरे भाईयां रा दास आ सै जे यीशुये री गवाई देणे पर पक्के। परमेशर जो ई दण्डवत कर; कांभई यीशुये री गवाई ई भविष्यवाणिया री आत्मा ई।

चिट्टे घोडे रा स्वार

11 फेरी में स्वर्गा जो खूल्ही रा देखया, कने देखया भई इक चिट्टा घोड़ा आ; कने तिस पर इक सवार आ, सै जे विस्वासा जोगा कने सच्च कहलावां; कने सै धर्मा सौगी न्याय कने युद्ध करां। 12 तिसरियां अग्गी रियां लपटां ई यां, कने तिसरे सिरा पर मते राज मुकुट ये। तिस पर इक नौं लिखी रा, तिस्सो जे तिस्सो छड्डी ने होर कोई नीं जाणदा। 13 तिन्हें लहू छिडकी रा कपडा पैहनी रा, कने तिसरा नौं परमेशर रा वचन आ। 14 स्वर्गा री सेना चिट्टेयां घोडेयां पर सवार कने चिट्टे कने शुद्ध मलमल पैहनी ने तिसरे पीछे-पीछे ये। 15 जाति-जातियां जो मारने खातर तिसरे मुँहा ते इक चोखी तलवार निकलां ई। तिस लोहे रा राजदण्ड लई ने तिन्हां पर राज्य करना, कने सर्वशक्तिमान परमेशर रे भयानक गुस्से री जलजलाहटा री मदिरा रे कुण्डा च दाख पीळी। 16 तिसरे कपडे कने जगा पर येदा नौं लिखी रा : “राजावां रा राजा कने प्रभुआं रा प्रभु।”

17 फेरी में इक्की स्वर्गदूता जो सुरजा पर खड़ी रे देखया। तिने बड़िया आवाज च हाक्क पाई ने उड़ने औळैयां सर्बीं पंछियां ने बोलया, “आवा, परमेशर रियां बड़िया धामा खातर कड़े हुई जावा, 18 तिसते जे तुहें राजेयां रा माँस, कने सरदारं रा माँस, कने ताकता औळे आदमियाँ रा माँस, कने घोड़ेयां रा माँस, कने तिन्हां रे सवारां रा माँस, क्या स्वतन्त्र क्या दास, क्या छोटे क्या बड़े, सर्बीं लोकां रा माँस खाओ।”

19 फेरी में तिस प्रभुये, कने धरतिया रे राजेयां कने तिन्हां रिया सेना जो तिस घोड़े रे सवारा कने तिसरिया सेना ने लड़ने खातर कड़े हुई रे देखया। 20 सै पशु, कने तिसने सौगी सै झुठा भविष्यवक्ता पकड़ोई गया तिन्हें जे तिसरे सामणे येदे नशाण दस्से थे तिन्हां ते जे तिने तिन्हां जो भरमाया तिन्हां पर जे पशुये री छाप थी कने सै जे तिसरियां मुर्तियां री पुजा करां थे। ये दोनों जीऊंदे ई तिसा अग्गी रिया झीला च, सै जे गन्धका ने जलां ई, सट्टी ते गये। 21 बाकी लोक तिस घोड़े रे सवारा रिया तलवारा ते, सै जे तिसरे मुहा ते निकली थी, मारी ते गये; कने सब पंछी तिन्हारे माँसा ते रज्जी गे।

हजार सालां रा राज

20 फेरी में इक्की स्वर्गदूता जो स्वर्गा ते उतरदे देखया, तिसरे हत्था च जे अथाह कुण्डा रियां चाबियां थियां कने इक बड़्डी जंजीर थी। 2 तिने तिस अजगरा, मतलब पुराणे सपा जो, सै जे इबलीस कने शैतान आ, पकड़ी ने हजार सालां खातर बन्ही तया, 3 कने तिस्सो अथाह कुण्डा च सटी ने बन्द करी तया जाति-जाति रे लोकां जो फेरी नीं भरमाओ। इसने बाद जरूरी आ भई तिस्सो थोड़िया देरा खातर फेरी खोलया जाओ।

4 फेरी में सिंहासण देखे, कने तिन्हां पर लोक बैठी गे, कने तिन्हां जो न्याय करने रा अधिकार दित्या गया। मैं तिन्हां रियां आत्मावां जो भी देखया, तिन्हां रे जे सिर यीशुये री गवाही देणे कने परमेशर रे वचनां रिया वजह ते कटे गइरे थे, कने तिन्हें जे ना तिस पशुये री, कने ना तिसरिया मुर्तिया री पुजा किती थी, कने ना तिसरी छाप अपणे मथे कने हत्था पर लई थी। तिन्हां जीऊंदे हुई ने मसीह ने सौगी हजार सालां तका राज्य करदे रेहणा। 5 तदुआं तका जे ये हजार साल पूरे नीं हुये तदुआं तका बाकी मरीरे नीं जी उठे। ये तां पैहला पुर्नुत्थान आ। 6 धन्य कने पवित्र सै आ सै जे इस पैहले पुर्नु उत्थाना रा भागी आ। येदेआं पर दुज्जीया मौता रा किछ भी अधिकार नीं आ, पर तिन्हां परमेशर कने मसीह रे याजक हुणा कने तिसने सौगी हजार सालां तका राज्य करना।

शैताना रा नाश

7 तजे हजार साल पूरे हुई जाणे तां शैतान जेला ते छड्डी दित्या जाणा। 8 तिस तिन्हां जातियां जो सै जे धरतिया रे चऊं पासेयां हुणियां, मतलब गोग कने मगोगा जो तिन्हां री गिणती जे समुद्रा रे रेता साई हुणीं, भरमाई ने लड़ाईया खातर कइ करणे जो निकलणा। 9 तिन्हां सारिया धरतिया पर फैली ने पवित्र लोकां रिया छावनिया कने प्यारे नगरा जो घेरी लणा; कने अग्गी स्वर्गा ते उतरती ने तिन्हां जो भस्म करना। 10 तिन्हां रा भरमाण औळा शैतान अग्गी कने गन्धका रिया झीला च, तिस च जे सै पशु कने झुठा भविष्यवक्ता भी हुणा, सटी दित्या जाणा; कने तिन्हां रात दिन युगानयुग पीड़ा च तड़फदेयां रेहणां।

बड्ढा चिड्ढा संघासण कने अन्तिम न्याय

11 फेरी में इक बड्ढा चीड्ढा सिंहासण कने तिस्सो, सै जे तिस पर बैठी रा था, देखया; तिसरे सामणे ते धरती कने आकाश नड्डी गये, कने तिन्हां जो जगहा नीं मिली। 12 फेरी में छोटेयां बड्ढेयां सर्बीं मरी रेयां जो सिंहासणा रे सामणे खड़ी रे देखया, कने कताबां खोलियां गईयां; कने फेरी इक होर कताब खोली गई, मतलब जीवना री कताब; कने तेदा जे तिन्हां कताबां च लिखी रा था, तेदा ई तिन्हारे कम्मां रे मताबक मरी रेयां रा न्याय कित्या जाणा। 13 समुद्रे तिन्हां मरी रेयां जो सै जे तिस च थे दई तया; कने तिन्हां च ते हरेक रे कम्मां रे मताबक तिन्हां रा न्याय कित्या गया। 14 मौत कने अधोलोक अग्गी रिया झीला च सटे गये। ये अग्गी री झील दुज्जी मौत ई;

15 कने तिस किसी रा नीं जे जीवना रिया कताबा च लिखी रा नीं मिलया, सै अग्गी रिया झीला च सटी तया गया।

नौआं असमाण कने नौई धरती

21 फेरी में इक नौये आकाशा कने नौईयां धरतिया जो देखया, कांभई पैहलका आसमाण कने पैहलकी धरती चली गई थी, कने समुद्र भी नीं रह्या। 2 फेरी में पवित्र नगर नौये यरुशलेमा जो स्वर्गा ते परमेशरा ला उतरदे देखया। सै तिसा दुल्हना साई थी सै जे अपणे खसमा खातर सज्जी री हो। 3 फेरी में सिंहासणा च ते किसी जो उच्चिया आवाजा च येदा बोलदे सुणेया, “देख, परमेशरा रा डेरा माहुआं रे बीच आ। तिस तिन्हां सौगी रेहणा, कने सै तिसरे लोक बोले जाणे, कने परमेशरा अप्पु तिन्हां सौगी रेहणा कने तिस तिन्हां रे परमेशर हुणां। 4 तिस तिन्हांरियां आक्खीं ते सारे आंसु पुंजी देणे; कने इसते बाद मौत नीं रेहणी, कने ना दुःख, ना वलाप, ना पीड़ रेहणी; पैहलकियां गल्लां चली जाणियां।”

5 सै जे सिंहासणा पर बैठी रा था, तिने बोलया, “देख, मांह सब किछ नंवां करी देणा।” फेरी तिने बोलया, “लिखी ले, कांभई ये वचन विस्वासा जोणे कने सच्चे ये।” 6 फेरी तिने मेरने बोलया, “ये गल्लां पूरीयां हुई गरीयां। हऊं अल्फा कने ओमेगा आ, आदि कने अन्त आ। मांह त्याह्वे जो जीवना रे जला रे यां सोते यां च ते पयाणा। 7 सै जे जय पाओ तिस ई इन्हां चीजा रे बारस बणना, कने हऊं तिसरा परमेशर हुणां कने तिस मेरे पुत्र हुणां। 8 पर डरपोकां, कने अविश्वासियां, कने धिनोनेयां, कने हत्यारेयां, कने व्यभिचारियां, कने टोहनेयां, कने मूर्ती पूजकां, कने सर्बीं झुठेयां रा हिस्सा तिसा झीला च मिलणा सै जे अग्गी कने गन्धका ते भखदी रहवां ई : ये दुज्जी मौत ई।”

नौआं यरुशलेम

9 फेरी तिन्हां सत्तां स्वर्गदूतां ले जे सात्त आखरी विपत्तियां ते भरि रे सात्त कटोरे थे, तिन्हां च ते इक मेरे ला आया, कने मेरे सौगी गल्लां करी ने बोलया, “इखा जो आओ, मांह तिज्जो दुल्हन मतलब मेमने री जनाना दसणी।” 10 तां सै मिंजो आत्मा च इक्की बड्ढे कने उच्चे पहाड़ा परा लई गया, कने पवित्र नगर यरुशलेमा जो स्वर्गा च ते परमेशरा ला ते उतरदे दस्सया। 11 परमेशर री महिमा तिन्हां च थी, कने तिसरी जोती बौहती किमती पत्थर, मतलब बिलौरा कने यशबा साई साफ थी। 12 तिसरी शहरपनाह बडी उच्च थी, कने तिसरे बारा फाटक कने फाटकां पर बारा स्वर्गदूत थे; कने तिन्हां फाटकां पर इस्राएला रे बाहरां गोत्रां रे नीं लिखी रे थे। 13 पूर्वा खा तिन्न फाटक, उत्तरा खा तिन्न फाटक, दखणा खा तिन्न फाटक, कने पश्चमा खा तिन्न फाटक थे। 14 नगरा री शहरपनाह रियां बारा नींऊंआं थियां, कने तिन्हां पर मेम्ने रे बाहरां प्रेरितां रे बारा नीं लिखी रे थे। 15 सै जे मेरे सौगी गल्लां करां था तिसले नगर कने तसरे फाटकां कने तिसरिया शहरपनाह जो नापणे खातर इक सोने रा गज था। 16 सै नगर वर्गाकार बस्सी रा था कने तिसरी लंबाई, चौड़ाईया रे बराबर थी; कने तिन्हें तिस गजा ने नगरा जो नापेया, तां साडे सात्त सौ कोहा रा निकलेया : तिसरी लंबाई कने चौड़ाई तिसरिया उच्चाईया बराबर थी। 17 तिने तिसरिया शहर पनाह जो माहुआं रे मतलब स्वर्गदूतां रे नापा ते नापेया, तां इक सौ चतुआली हाथ निकली। 18 तिसरी शहरपनाह यशबा री बणी री थी, कने नगर येदे शुद्ध सोने रा था सै जे साफ कच्चा साई हो। 19 तिस नगरा री नीऊंआं हर किस्मा रे कीमती पत्थरा ते सुआरी रियां थीयां; पैहली नीऊं यशबा री, दुज्जी नील मणीयां री, तिज्जी लालडिया री, चौथी मरकता री, 20 पँजवीं गोमेदा री, छेवीं माणिक्य री, सतवीं पीतमणीया री, अठवीं परोज, नौवीं पुरखाराजा री, दसवीं लहसनीये री, ग्यारवीं धुम्रकान्ता री, कने बाहरवीं याकूता री थी। 21 बारहा फाटक बाहरां मोतियां रे थे; इक-इक फाटक इक-इक मोतिये रा बणी रा था। नगरा री सड़क साफ कच्चा साई शुद्ध सोने री थी।

22 में तिस च कोई मन्दर नीं देखया, कांभई सर्वशक्तिमान प्रभु परमेशर कने मेम्ना तिसरा मन्दर आ। 23 तिस नगरा च सुरज कने चन्द्रमे रे उजियाले री जरूरत नीं, कांभई परमेशर रे तेजा ते तिस च उजयाला होया रां, कने मेम्ना तिसरा दीपक आ, 24 जाति-जाति रे लोकें तिस रिया जयौतियां च चलना-

फिरना, कने धरतिया रे राजेयां अपणे-अपणे तेजा रा समान तिस च ल्युणा।
 25 तिसरे फाटक दिना जो कदी बन्द नीं हुणे, कने रात तेथी नीं हुणी।
 26 लोकां जाति-जाति रे तेज कने वैभवा रा समान तिस च ल्युणा। 27 पर
 तिस च कोई अपवित्र चीज, या घृणित काम्म करने औळा या झुठा रा गडने
 औळे किसी रीतिया च प्रवेश नीं करना, पर सिर्फ सै लोक तिन्हां रे नों जे
 मेम्ने रे जीवना रिया कताबा च लिखी रे।

22 फेरी तिने मिंजो बिलौरा साई झलकदी हुई, जीवना रे पाणिये री
 नदी दस्सी, सै जे परमेशर कने मेम्ने रे सिंहासणा ते निकली ने
 2 तिस नगरा रिया सडकां रे बीचा चीयें बगां थी। नदिया रे इस कनारे कने
 दुजे कनारे पर जीवना रा डाल था; तिस च बारहां किस्मा रे फल लगां थे,
 कने सै हर महीने फलां था; कने तिस डाला रे पत्तेयां ते जातियां-जातियां रे
 लोक ठीक हुआं थे। 3 फेरी श्राप नीं हुणा, कने परमेशर कने मेम्ने रा सिंहासन
 तिस नगरा च हुणा कने तिसरेयां दासां तिसरी सेवा करनी। 4 तिन्हां तिसरा
 मुंह देखया करना, कने तिसरा नों तिन्हारे मथेयां पर लिखी रा हुणां। 5 फेरी
 रात नीं हुणी, कने दीपका कने सुरजा रे उजियाले री जरुरत नीं हुणी, कांभई
 प्रभु परमेशरा तिन्हां जो उजियाला देणा, कने तिन्हां युगायुग राज्य करना।

यीशुये रा धरतिया पर भीं ते औणा

6 फेरी तिन्हें मेरने बोलया, “ये गलां विस्वासा जोगियां कने सच ई आं।
 प्रभुये, सै जे भविष्यवक्तावां रिया आत्मावां रा परमेशर आ, अपणे स्वर्गदूतां
 जो इस खातर भेजया भई अपणेयां दासां जो सै गलां, तिनारा जे छोड़े पूरा
 हुणा जरुरी आ, दस्सो।”

7 “देख, हऊं छोड़े औणे औळा आ! धन्य आ सै, सै जे इसा कताबा रियां
 भविष्यवाणियां रियां गलां मन्नां।”

8 हऊं सै ई यूहन्ना, सै जे इना गलां सुणां कने देखां था। तजे में सुणया कने
 देखया, तां सै जे स्वर्गदूत मिंजो ये गलां दस्सा था, हऊं तिसरे पैरां पर मथा
 टेकणे खातर पई गया। 9 पर तिने मेरने बोलया, “देख, येदा मत करदा;
 कांभई हऊं तेरा, कने तेरे भाई भविष्यवक्तावां, कने इसा कताबा रियां गलां रे
 मणने औळेयां रा साथी दास आ। परमेशरा ले ई मथा टेक।”

10 फेरी तिने मेरने बोलया, “इसा कताबा री भविष्यवाणिया रियां गलां जो
 बन्द नीं कर; कांभई वगत नेड़े आ। 11 सै जे अन्याय करां, सै अन्याय ई
 करदा रओ; सै जे गन्दा आ, सै गन्दा ई बणी रा रओ; सै जे धर्मी आ, सै धर्मी
 ई बणी रा रओ; कने सै जे पवित्र आ, सै पवित्र ई बणी रा रओ।”

12 “देख, हऊं छोड़े ई औणे औळा; कने हरेक रे कम्मा रे मताबक बदला
 देणे खातर प्रतिफल मेरले आ। 13 हऊं अल्फा कने ओमेगा, पैहला कने
 आखरी, आदि कने अन्त आ।

14 “धन्य ये से, सै जे अपणे कपड़े धोई लवांये, कांभई तिन्हां जो जीवना रे
 डाला ले औणे रा अधिकार मिलणा, कने तिन्हां फाटका चीयें हुई ने नगरा च
 औणा। 15 पर कुत्ते, कने टोहने, कने व्यभिचारी, कने हत्यारे, कने मूर्ति
 पूजक, कने हरेक झूठा रे चाहणे औळे कने गढ़णे औळे बाहर रैहणा।

16 “मैं यीशुये अपणे स्वर्गदूता जो इस खातर भेजया भई तुहां ले
 कलीसियावां रे बारे च इन्हां गलां री गवाई देओ। हऊं दाऊदा रा मूल कने
 वंश, कने भोरा रा चमकदा हुआ तारा आ।”

17 आत्मा कने दुल्हन दोनो बोलां ईयां, “आओ!” कने सुणने औळे भी
 बोलो, “आओ!” सै जे त्याह्या हो, कने सै जे चाओ सै जीवना रा पाणी मुफ्त
 लओ।

उपसंहार

18 हऊं हरेका जो, सै जे इसा कताबा रिया भविष्यवाणीयां रियां गलां जो
 सुणां, गवाई देवां : जे कोई माहू इन्हां गलां च किछ बधाओ तां परमेशर
 तिन्हां विपत्तियां जो, सै जे इसा कताबा च लिखी रियां, तिस पर बधांगा।
 19 जे कोई इसा भविष्यवाणिया रियां गलां च ते किछ कड्डी दो, तां परमेशरा
 तिस जीवना रे डाला कने तिस पवित्र नगरा च ते, तिसरा वर्णन जे इसा
 कताबा च आ, तिसरा हिस्सा कडी देणा।

20 सै जे इन्हां गलां री गवाई देवां सै येदा बोलां, “हाँ, हऊं छोड़े औणे
 औळा आ।” आमीन। हे प्रभु यीशु आओ!

21 प्रभु यीशुये रा अनुग्रह पवित्र लोकां सौगी रहो। आमीन।